


Melĕ Mékōōlē



New Testament in Akoose (CM:bss:Akoose)

Mel̥ Mékō̄lē

New Testament in Akoose (CM:bss:Akoose)

copyright © 2011 Wycliffe Bible Translators, Inc.

Language: Akoose

Translation by: Wycliffe Bible Translators, Inc.

Akoose

bss

Cameroon

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Akoose

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 18 Apr 2025 from source files dated 29 Jan 2022

0143729f-907e-5098-b6ce-63b1629b8e48

Contents

Matyo	1
Makose	45
Lukase	72
Jone	116
Mbeltéd	147
Roma	188
1 Korinto	207
2 Korinto	225
Galesia	238
Efesus	245
Filipi	252
Kolose	257
1 Tesalonika	262
2 Tesalonika	266
1 Timoti	269
2 Timoti	275
Titus	279
Filemon	282
Hibru	284
Jemse	299
1 Petro	304
2 Petro	309
1 Jone	313
2 Jone	318
3 Jone	319
Jude	320
Mam nime mbenléd	322

Nkalan mí bwám míme Yesuε ngáne

Matyo

átélé

Ndibned ní kálag

Nkalan mí bwám ngáne Matyo átélé ríhóbe nén bán Yesuε mós adé Nsoode awě Dyöb dénhǎbpé aá mósólóm á nkòǎsé te. Mbwiined ne mós dós Dyöb dénlónédte mekan míme ánhǎbpé aá mósóbelé ábē bad se' boód. Mmén nkalan mí bwám rídé áyāl e nkòǎsé rísyāāl.

Mekan míme Yesuε áyógté'áá békábé mós áte metón métáan. (1) Abé áde bad bé nkamlen ní Dyöb bétángéné awóǎ ne mbéltéd mímáb, mekan míme mbē mímáb ne mekan míme mébenlé ne bós (E'ped 5-7); (2) Nsón míme bembapee dyóm ne bébe bétángéné abel (Eped 10); (3) Ngáne nkamlen ní Dyöb rídíí (Eped 13); (4) Ngáne mod átángéné Dyöb abele (Eped 18); (5) Mekan míme mébenlad ne ngáne ébēē áde Krístəə ápéé (E'ped 24-25).

Nkabtéd ní kálag

Nchyaátén ne echyáa éche Yesu Krístəə 1.1-2.23

Nsón míme Jone, Ndusenε 3.1-12

Edusen ne mekəgsen míme Yesuε 3.13-4.11

Nsón míme Yesuε á mbwóg e Galilia 4.12-18.35

Nsón míme Yesuε áde áhídté á Galilia ápe á Jerusalem 19.1-20.34

E'pun bé asóg ábe Yesuε á Jerusalem ne benben ne á Jerusalem 21-27

Mpuu ne alúmed áde Sǎngwéé álúmtáá bad yāl áde amáá apuu 28.1-20

Betaa dbe Yesuε

(Luk 3.23-38)

¹ Tóngé e betaa ábe Yesu Krístəə edii nén. Yesuε ambíd á nchyaátén míme kǎǎ Dabide, Dabide mós-ε abid á nchyaátén míme Abrahame.*

² Abrahame mós abédé sáá awě Aisige. Aisige-ε ambé sáá awě Jakobe, Jakobe-ε mós anchyáá Judaa bóbbe baányan.

³ Judaa bós mwaád Tamaa, bénchyaā Perese ne Zeraa. Perese ambé sáá awě Heserone, Heserone-ε sáá awě Rame.

⁴ Rame mós abédé sáá awě Aminadabe, Aminadabe-ε abédé sáá awě Nashone. Nashone ambé sáá awě Salmone.

⁵ Salmone bós mwaád, Rahabe bós-áá bénchyaā Boase. Boase bós mwaád Rute bénchyaā Obede, Obede-ε ambé sáá awě Jese.

⁶ Jese ambé sáá awě kǎǎ Dabide.

Kǎǎ Dabide bós Uria mwaád béchyaā Solomone.

⁷ Solomone ambé sáá awě Rehoboame, Rehoboame-ε mós ambé sáá awě Abijaa, Abijaa ambé sáá awě Asaa.

⁸ Asaa ambé sáá awě Jehosafade, Jehosafade mós-ε ambé sáá awě Jorame, Jorame mós-ε ambé sáá awě Uzzia.

⁹ Uzzia abédé sáá awě Jotame, Jotame mós-ε ambé sáá awě Ahase. Ahase mós-ε ambé sáá awě Hezekaya.

¹⁰ Hezekaya-ε ambé sáá awě Manase. Manase-ε sáá awě Amose. Amose mós ambé sáá awě Josia.

¹¹ Josia mós anchyáá Jekonyase bóbbe baányan, á pónde eche bad bé alon á Israel bénkweé nzum bon bad bé Babilon béswéén bós awáb alon.

¹² Ade nén démmadté atóm, kǎǎǎ ne á pónde eché bénchyaā'ε Yesuε, betaa ábe Yesuε bébédéé; Jekonyase mós ambé sáá awě Sheltyele, Sheltyele-ε mós ambé sáá awě Zerubabele.

¹³ Zerubabele ambé sáá awě Abutee, Abutee-ε sáá awě Elyakime. Elyakime-ε ambé sáá awě Azoo.

¹⁴ Azoo abédé sáá awě Zadoge, Zadoge mós-ε ambé sáá awě Akime, Akime-ε sáá awě Eliude.

¹⁵ Eliude mós ambé sáá awě Elizaa. Elizaa-ε sáá awě Matane. Matane mós-ε ambé sáá awě Jakobe.

¹⁶ Jakobe mós abédé sáá awě Josebe. Josebe mós awóǎ Maria awě anchyáá Yesuε awě béchəgéé bán Krístəə.

¹⁷ Né-ós, nyongel ésyāāl, mbooted ne Abrahame ápe wée Dabide, édé dyóm-é-nyongel ne éniin. Mbooted ne Dabide ápe pónde eche béswééné bad bé Israel á Babilon áde bénkweé

* 1:1 Mmén nchoo rídé kǎǎǎne á kálag e Dyöb e'só 5.1, 6.9, 10.1, 11.10, 27.

nzum, édé dyóm-é-nyongel ne éniin. Bootya póndé eche bénsweɛnne bad bé Israel á Babilon áde bɛnkweé nzum, káájne á póndé eche béchyáá Yesue, áde dyóm-é-nyongel ne éniin.

*Echyaá éche Yesue
(Luk 2.1-7)*

¹⁸ Echyaá éche Yesue ébédé nén: Maria, nyaá awé Yesue, ábédé ngon e mmwaád eché enkembíi mwenchóm. Bɛnkií mó mod nhóg awé béchágé' áá bán Josebe. Bonj byánán Maria ásu á e'wóngé wée Josebe, ényinnéd nén bán adé nkog á ngine e Edáádaj éche Esáá.

¹⁹ Josebe-é, ngáne ábédé mó mod á bwám, enkéndajé Maria e'són awoged. Né-óó, abel'é áá mbojnsén áchene mó á mesoom-té.

²⁰ A póndé eché nímé mewémten médíí mó áte, ángel e Dyób empií mó áde ánánjé nló. Angel ne enláá mó nén áá, "A-Joseb, mod á mbyaa níme Dabidé, weebáá' Maria atéd néé mmwaád awón, áyále Edáádaj éche Esáá chóó epífidé mó bonj abé nkog.

²¹ Achyaá mwán a mwenchóm, échuu-é mó dín wée Yesue† áyále nén móshúd ábé bad á mbéb-te."

²² Mmén mésyāāl mēmbenléd álóned e'yale ábe Dyób dénlómenné nkal é'dáádaj áá,

²³ "Nyénone", ngon e mmwaád eché eébií mwenchóm ébɛ nkog,

echyaá-é mwán a mwenchóm,
béchág-ke mó bán Emmanuele."

Adén dín adé nén bán, "Dyób adé ne sé."

²⁴ Néé Josebe ásyónjé ásé, ambél ngáne ángel enláá' é mó. Antéd Maria néé awé mmwaád.

²⁵ Bonj kááj ne póndé eche Maria áchyaá mwán, Josebe enkéndyénne mó. Josebe anchuu-é ane mwán dín áá Yesue.

2

Beláj-bé-betintine bébidé á akuu áhye dé abe Yesue edúbé

¹ Béchyaá Yesue á dyad á Betlehem á mbwóg e Judeya á póndé eche Heróde ábédé kâj. Bad behóg ábe beláá' áá betintine ábií mekan, bémbid á akuu,* bépé á Jerusalem. ² Ade bépédé á Jerusalem, bénsedéd bánken, "Héé kâj e bad bé Israel, ane awé achyaáadté wén ádíí? Sényiné tintine á akuu awé alúmte nén bán achyaáadté. Nê dóó ákóá bonj sépag ábe mó edúbé."

³ Adé kâj Heróde áwógé nê, nê déntagéd mó á mewémten-té bwámbwam. Déntagéd mó, átágéd-te bad bé Jerusalem bésyāāl.

⁴ Heróde anlád ábe beprise bémbáá ne bemeléede bé mbéndé bésyāāl áte. Bonj ásedté bó aáken, "Héé Ane awé Dyób Áwógté, awé bésinéé, áchyaáadté?"

⁵ Dóó békwenténé mó bán, "Béchyaá mó á dyad á Betlehem, á mbwóg e Judeya. Nkal é'dáádaj antél áá,

⁶ 'A-bad bé Betlehem á ndoob e Juda, adén dyad adé dyad ahóg áde adé etógnén bwámbwam áfinté e myad mé alonj á Juda.

Áyále mod ábid áfinté echên, awé ályāgéd ábém bad bé alonj á Israel.' "

⁷ Néé Heróde áwógé nê, anchélé ábé beláj-bé-betintine á kun-té, bonj ásedté bó nyaa e póndé eché tintine ne ámbidte.

⁸ Dóó álómé bó á Betlehem áá, "Nyéka, nyétón anón. Nzé nyényiné wée ane mwán áchyaáadté, nyétim ámbid nyéhye nyéláá me, ábel bonj mámpé níke níbe mó edúbé."

⁹ Ade bémaá mekan níme kâj álánjé bó awóg, bémbóotéd áke ámpé. Bonj áde benóné ámín, bényín melemlem mé tintine níme bényinné á akuu nê ákagké bó á'só. Ane tintine anké kááj atyéém wée ane mwán áchyaáadté.

¹⁰ Anyín áde bényiné ane tintine, bénwóg menyinje bwámbwam.

¹¹ Bénsāl á ndáb-te. Néé bésólé, bényín ane mwán bó nyanj, Maria. Bémbwógé ane mwán mebohónj ábe mó edúbé. Bémbidéd mende áwed níme benwánlédte mó, bébé-é mó. Mmé mende mébébé gól,† mǎg mé e'lod é' bwám níme béchágéé bán frankinsɛn‡ ne mía. §

¹² Néé bémaá ane mwán edúbé abe, bémbwógé esú áwáb alonj, bonj bémponj nzii empée, áyále Dyób dénláá bó á nló-te áá béetimé' ámbid wée Heróde.

Bésobné Yesue, békééné mó á alonj á Egipto

¹³ Ade ábé beláj-bé-betintine bémaá áke, ángel e Dyób enláá Josebe á nló-te áá, "Hidé ásé, étéd anén mwán bó nyanj ésoben bó, étimen bó á Egipto. Nyédye-é áwed kááj né nlánjé nyé meé nyéhíde, áyále Heróde álóm bad áhed anén mwán, áwúu mó."

† 1:21 Yesue: Adén dín ádíí bán Mod a e'soosón. * 2:1 A akuu: Péd eché etondéé ábidéé. † 2:11 Gól: Edii ekii éche édé nkun bwámbwam éche élitúte bán Yesue adé kâj. ‡ 2:11 Frankinsɛn: Ábédé dyóg áde bébagnéé Dyób mende.

§ 2:11 Mía: Mébédeé dyóg áde bɛnabnadte ndim.

¹⁴ Mmē nkuu dēn, Josebē anhidé ásē, atéd mwān bó nyan, ákēēn bó nkuu ne nkuu, átimnád bó á Egipto.

¹⁵ Awed dōo bendyεé'ε kásŋ ne pónéd eche Herode áwédé. Nén dēmbenléd álóned e'yale ábe Dyób dénlómēnnē nkal é'daádəŋ aá, "Nlébpé awem Mwān mēé ábíd á alonj á Egipto."

Béwúú e'ched é' bān á Betlehem

¹⁶ Ade Herode ásonťéné nēn aá belán-bé-betintine bē bédógé mós, anlŋ bwāmbwam. Anlóm eche sánze á Betlehem ne ene ped e mbwóg esyáál, aá béwúú bān bé baachóm bésyáál ábe béepede mwé rílaán. Ambel nē átāŋgen ne pónéd eche belán-bé-betintine bēnlāa-é mós bān bēnkālē tintine awē anlóméd echyáa éche Yesue anyín.

¹⁷ Nén dēmbenléd álóned e'yale ábe Dyób dénlómēnnē nkal é'daádəŋ Jeremayaa. Jere-mayaa anhób aá,

¹⁸ "Bad bēnwóg e'saad ne awé á ngine adé ábídé'áá á Rama, áde Rashede áchyeε'ε ábe bān. Bélénté'áá mós awé, bonj eekobpe aléned áyāle nēn bān bēmmad mós awé."

Josebe, Maria, ne Yesue bébidé á Egipto bétim á Nazaret

¹⁹ Ambíd e kwééd eche Herode, ángel e Dyób empiŋ Josebe á nló-te áde ámbēē abé á Egipto, élanǵē mós nēn aá,

²⁰ "Téd awóŋ mmwáád bó mwān, nyétime ámbíd á alonj á Israel. Herode ne ábē bad ábe bēhédé'áá ane mwān awúú bémáá awé."

²¹ Néε Josebe áwógé nē, anlad yāl, atéd Maria bó mwān, bōōbō bétim ámbíd á alonj á Israel.

²² Bonj áde Josebe áwógé bān Achelausé atédé atii dé nkamlen áde sáá, kēŋ Herode á mbwóg e Judeya, ambāŋ atim ámbíd áwed. Angel e Dyób enhyé mós mekan mémpēe aláá á nló-te. Nē dēmbēl, á mbwóg e Galilia dōo ántimmé akē.

²³ Anké alonj á dyad ámbáá ahōg áde bēchógé'áá bān Nazaret. Nén dēmbenléd álóned e'yale ábe Dyób dénlómēnnē bekal bé'daádəŋ tāŋgene Yesue aá, "Ábyēēn néε Mod á Nazaret."

3

Nkalaŋ nime Jone, Nduzene

(Mak 1.1-8; Luk 3.1-18; Jōn 1.19-28)

¹ Etún é pónéd ámbíd enē, Jone, Nduzene ámbíd nkal é'daádəŋ a Dyób. Akalé'áá eyale é Dyób á ehyāŋge á Judeya, álanǵē bad aá,

² "Nyétede abel dé mbéb áyāle nēn nkamlen ní Dyób rídé benben."

³ Jone mós abédé mod awé nkal é'daádəŋ Yesayaa áhóbé'áá, áde ánhōbpē aá, "Ehāŋgé ébide' á ehyāŋge bān, 'Nyébonŋsen epe éche Sāŋgwéé. Nyéti eché nzii.' "

⁴ Jone ahágé'áá mbóté eche bebēnlé nyon eche ébídé á yāl e kamēl.* Awáá'áá ngásá á ngob e nyam. E'chuu ne bengóméé bōo bebédé ndyééd eche.

⁵ Bad bebídé-áá á Jerusalem, ne níminíí myad mé mbwóg e Judeya esyáál ne á melonj mémpēe nime mbébéde á nkag mé edib é mbáá é Jodan, békag wēε Jone.

⁶ Néε bēmpaléé nímbā mbéb áte, Jone ádusén bó á edib é Jodan.

⁷ Bonj áde Jone anyíné néε Befarisia ne Besadusia bēhúε'ε ábel bonj ádusén bó, anláá bó aá, "Píí é nyō chēn! Nzéé múmós alāŋgé nyé aá nkáásé ní Dyób ríhué' bonj aléb-pe nyé aá nyékúme abāŋgé?"

⁸ Nyéke nyébele mam nime mélúméd nēn bān nyéťédté ádēn abé dé mbéb.

⁹ Nyéewémtán nēn bān nzé nyéhóbé bān, nyédé bān ábe Abrahame, nyéekudte nkōgsen ní Dyób. Bonj rílaá nyé nēn mēé, Dyób áhele ábenléd nímén meláá átiméd mós bān ábe Abrahame.

¹⁰ Bōōb-pōó ehón émáá anaa á nkaŋ ní mel. Né-ōó, bwel ké é'héé ábe bééchyāā e'pum é' bwām, bēkwel bó bebwém-me bó á muú-te.

¹¹ Nduzan nyé bōōb ne mendíb álúméd nēn bān nyéhōŋléné áden abé dé mbéb. Bonj mod ampée ahúε', awé atómé me. Meékwognedéé ké ápém nime metámbé. Ádusén nyé ne Edaádəŋ eche Esáá, ádusén-ne nyé ne muú.

¹² Awánlé éché epeben á ekáá, ábel nēn, ápeb nime menyán ámin. Nzé amadé, állād mbum é bwām áte, ákōó chō. Bonj állād e'pāá, ahyáád bó á ebonde é muú éche éédímé'."

Bédúséné Yesue

(Mak 1.9-11; Luk 3.21-22)

¹³ Bōōb-pōó, Yesue ámbíd á mbwóg e Galilia, áke wēε Jone á edib é Jodan ábel nēn Jone ádusén mós.

¹⁴ Bonj Jone anwanén mós mewémtēn ahōŋlen, áhōbē nēn aá, "Néε edíí bān wε-εé wembé edusan me, chán étímé abé eche wεwε éhyagké áwēm wéé ndusén wε?"

* **3:4 Kamēl:** Edii nyam eché edé néε nyag eché bebēnladte á ehyāŋge ápém nted.

¹⁵ Bon Yesue ankwentén mós áá, “Mwě ébê nê bəəb ábel nén débél mam mésyāəl bwām ngáne Dyöb áhedéé.” Né-óó, Jone ankwentén mós adusen.

¹⁶ Melemlem mé pónde níme Jone ámáá Yesue adusen, Yesue ansyāá á mendíb-te. Dóo ngob e dyöb énédnédé, bon ányīnē nēe Edāádəŋ é Dyöb ébíde ádyöb ésudé ášé nēe éllāš, étyéém-me mós á nló mín. ¹⁷ Ehób chós-é ámpé ébíde ádyöb nén, “Awem Mwān a nlém nén, awógte me menyinje bwāmbwam.”

4

Satane akagé Yesue

(Mak 1.12-13; Luk 4.1-13)

¹ Ambíd e pónde, Edāádəŋ é Dyöb éntimén Yesue á ehyánge ábel nén Satane ákagé mós.

² Yesue andid yšl nzaa á mekáne-té móom mé e'pun méniin. Ambíd e ene pónde nzaa ewagé'áá mós.

³ Dóo Satane ápedé bon álánge mós áá, “Nzé We-éé edé Mwān a Dyöb, kamlén nímén meláá métim e'wéle.”

⁴ Bon Yesue antimtén mós áá, “Etenléde á kálag e Dyöb nén bán, 'Saké ndyéed chēmpen edide moonyon á alongé. Bon eyale téé éche Dyöb áhóbé, chós édíde moonyon á alongé.' ”

⁵ Dóo Satane ákééné Yesue á Jerusalem, dyad áde ásáá bon átyēemān mós á nzongē e Ndáb-e-Dyöb mín,

⁶ álánge mós áá, “Nzé we-éé edé Mwān a Dyöb, éheb á bwéle-mín hén éhūn á ndəəb, áyāle étenléde á kálag e Dyöb nén bán,

'Dyöb dékamlén éche ángel ásáb we, épēm-me we ámín ábel weébōmē ekuu á aláá.' ”

⁷ Yesue-é antimtén mós áá, “Bon kálag e Dyöb ehóbé ámpé nén áá, 'Weéksge Sāngwéé ádon Dyöb áte.' ”

⁸ Satane antéd Yesue ámpé, búmō bétyéém á mbəəd mín, bon álumtē mós melonj mé nkōŋsé mésyāəl ne nhən rísyāəl níme rídé áwéd-te.

⁹ Dóo álánge mós áá, “Měbē we ábén bwēm é'syāəl nzé ebwógkē me mebóbōŋ bon ébāg-ke me edúbé.”

¹⁰ Dóo Yesue álánge mós áá, “Syāá me á dīd-te, a-Satan! Etenléde nén bán,

'Ebwógke' Sāngwéé ádon Dyöb mebóbōŋ,

ébage-é mós edúbé. Mwēnpen-naa étāngéne abele.' ”

¹¹ Né-óó, Satane antédé Yesue, ákē. Ángel émpé, éwóngén Yesue.

Yesue abootédé níme nsón á Galilia

(Mak 1.14-15; Luk 4.14-15)

¹² Ene pónde bénhē Jone, Ndusene á mbwəg. Ade Yesue áwógé nē, antīm ámbíd á mbwəg e Galilia.

¹³ Anhidé á dyad á Nazaret, áke ádyēē á dyad á Kapenahum. Kapenahum abédé á nkəg mé edib-é-nzab é Galilia, á abwóg á hóm á túmbé e Zebuln ne e Naftali.

¹⁴ Yesue anké á Kapenahum álonéd mekan níme nkal é' dāádəŋ Yesayaa ánhōbpē áá,

¹⁵ “A-mbwəg e Zebuln, a-mbwəg e Naftali, ntimned ne edib é nkwē,

á múde mé edib ní Jodan, Galilia mbwəg echē bad ábe béesē bad bé Israel bédye'é.

¹⁶ Bad ábe bébéde á ehintén-té békúde e'nyīnen bé ekide;

Bad ábe bébéde á nsal ní soŋ békúde e'soósoŋ.”

¹⁷ Bootya pónde echē Yesue ánké á Galilia ambootéd eyale é Dyöb akal áhōbē nén áá, “Nyéhəŋlen abé dé mbéb, áyāle nkamlén ní Dyöb rídé bēnbēn.”

Yesue apwéde bembapēe bé'sō

(Mak 1.16-20; Luk 5.1-11)

¹⁸ Epun ehóg Yesue akagé'áá á nkin mé edib-é-nzab é Galilia. Annyín bán bé baachóm bébe; Simone awē béchágé'áá bán Petro, bós mwānyarj Andreyā nēe bébwéméé mbínzé. Bébédeé bekób-bé-súu.

¹⁹ Dóo álánge bós áá “Nyéhíde me. Ngáne nyékóbeé súu bəəb, meéyāgēd nyé ngáne nyétédte bad nlém á abum áhíd me.”

²⁰ Abwəg-ábwəg bēntédé échab mbínzé, béhídē-é mós.

²¹ Nēe bésítde á'sō, Yesue annyín bán bé baachóm bēmpēe bébe; Jemse bós mwānyarj Jone, bán ábe Zebēdie. Bóobe sáá bēmbē á bōle-tē, bébwémé'áá échab mbínzé. Hē dóo Yesue áchēnléé bós bad bébe áá bhíde mós.

²² Abwəg-ábwəg bēntédé sáá ne bōle, béhídē-é Yesue.

Yesue ayógté'áá, áchəŋtē-é bad

(Luk 6.17-19)

²³ Yesue akagé'áá myad mésyāāl á alon á Galilia áyāgtē eyale é Dyōb á ndáb é mekáne, ákalé-'e nkalanj m' bwám mé nkamlen ní Dyōb. Achōnté'áá bad bé nkole bésyāāl ne nyaa e nkole téé echē émbē áttíntē echáb.

²⁴ Né-ōō mekan m'ime Yesue ábélé'áá nwōgnádtáá á mbwóg e Siria esyāāl. Nē dēnkān bad bēpééné'áá bad bé nkole bésyāāl áwē. Bēpééné'áá bad áwē ábe békónlé'áá nkole ne mewē nyaa ne nyaa. Bad ábe e'dáádān bē mbēb bēmbēē áte, bad ábe bēhúne ekikíd, ne bad ábe bēwédé eped, Yesue áchōnté ábē bad bésyāāl.

²⁵ Nē dēnkān, ndun e mod ehíde'áá Yesue. Bad bēbídé'áá melonj bootya á Galilia ne mbwóg e Myad Dyōm, Jerusalem, Judeya, ne ped echē edé á múde mé edíb é Jordan nímíní.

5

Yesue ayágté bad á ekone m'ín

¹ Ade Yesue ányíné ene ndun e mod, anchágé é ekone m'ín, ádyēē ásē. Ahed-taá ábe bembapee bétáné m'ó

² bonj ábootéd b'ó ayáged, áhābē áá,

³ "Nnam mbē ne bad ábe bédé atóg á edáádān-tē áyāle bédé ásē e nkamlen m'ín.

⁴ Nnam ne bad ábe békénlé nlém á abum, áyāle Dyōb déwōgéd b'ó menyinge ámpē.

⁵ Nnam ne bad ábe bēpwítédé, áyāle nkōnsé rísyāāl mébē nímāb.

⁶ Nnam mbē ne bad ábe bédé nzaa ne píd ábel mam n'ime Dyōb áhedeé áá mébenled, áyāle Dyōb dékōdéd b'ó.

⁷ Nnam ne bad ábe bēwóge bad bēmpēe ngol, áyāle Dyōb dōmpē déwōg b'ó ngol.

⁸ Nnam ne bad ábe békénlé nlém á abum, áyāle bényín Dyōb.

⁹ Nnam ne bad ábe békóme nsan, áyāle Dyōb déchag b'ó ábē bán.

¹⁰ Nnam ne bad ábe békude metake áyāle bébeleé mam n'ime Dyōb áhedeé. Bédé ásē e nkamlen m'ín.

¹¹ Nnam mbē ne nyé ábe bad bésyāáé, nyé ábe bētagtéé, bēbánē nyé e'bébtéd é' mam áyāl, bēbídé-'e nyé mbónj é metóm áyāl, á d'ín ádém.

¹² Nyéwóge bwám, nyébé-'e menyinge áyāle nsábe m'ime nyékudté ádyōb níchábé ámín. Nén d'ó bad bétágté'áá bekal bē'dáádān bē' b'óod.

Nkwē n'ime mbódé e'nyin, ne etrukān éche békōngé

(Mak 9.50; Luk 14.34-35)

¹³ "Nyédé etógnén á alonjé á bad bé nkōnsé ngáne nkwē rídí etógnén áyāle ndyééd. Bonj nzé nkwē mbódé alonj chán béhele-se bényínéd m'ó ámpē? Méesaá dyam dé abelen ámpē. Né-ōō, apim d'ó bēpimeé, bad békōgtáád m'ó ámín.

¹⁴ Nyéé nyédé nēngáne etrukān álúmed bad bé nkōnsé bésyāāl nzii e Dyōb. Dyad áde álōgnédé á ekone m'ín déesōm'éé.

¹⁵ Mod eémaa-'áá etrukān achod se ákōō chó á ebwōg-sé, bonj abelé ákēlé chó ámín, ábel nén ényínte kénz'éé awé adé á ndáb-te ekíde.

¹⁶ Nyémpē nyépene', melemlem néé etrukān. Nzé bad bényíné nsón m'í bwám n'ime nyébeleé, bēken Dyōb, awēn Titée awé adé ámín.

Ayáged áde Yesue tēngene mbéndé

¹⁷ "Nyéewém'tán nén bán mpedé á nkōnsé ábóded mbéndé éche Mosēe ne mekan n'ime bekal bē'dáádān bēyágté nyé. Meépedéé ábóded m'ó, bonj mpedé álōned m'ó.

¹⁸ Ne mbále nlānge nyé nén meé, káān ne á asóg dé nkonj ní sé ne m'ín, ké mwāmp'ín mé eyale nhóg awé atēnlédé á mbéndé e Dyōb eéhídtéé ásē káān né mésyāāl melóné.*

¹⁹ Né-ōō, kénz'éé awé abóó mbéndé póg áttíntē echē mbéndé é Dyōb, ké ene echē bēwém'téné bán eésaá etógnén, áyāgté-'e bad bēmpēe áá bēbel melemlem, ene ndín e mod ébē ndim'tene áttíntē e bad ábe bédé ásē e nkamlen m'ín. Bonj kénz'éé awé abele ngáne mbéndé éhóbé, áyāgté-'e bad bēmpēe ábel melemlem, ábē etógnén bwāmbwam áttíntē e bad ábe bédé ásē e nkamlen m'ín.

²⁰ Né-ōō, nlānge nyé nén meé, ešebán abele á Dyōb ád'én átómé áde Befarisia ne bemeleede bē mbéndé, né nyémpē nyéeesónlé á nkamlen m'ín mbéd."

Ayáged áde Yesue tēngene melingá

(Luk 12.57-59)

²¹ Yesue ambád ahób áá, "Nyéwóge nén bán bēnlāá bad bē' b'óod bán, 'Mod eewúé mod. Kénz'éé awé awúú mod, bétāngéné m'ó akáad.'

* 5:18 Né mésyāāl melóné káa áde ayáge ásyāāl alóné.

²² Boŋ nlanŋe nyé nén meé, kénzéé awé alíñé† mwányanŋ bétánŋéné mós akáad. Kénzéé awé ásyāŋ mwányanŋ bépéén mós á kóte e bad bémbáá békáád mós. Kénzéé-ε awé áchag mwányanŋ aá, 'Edimdim é chóm chén', béhele bébwém mós á dü-á-muú.

²³ Né-ǝ, nzé ekag á menyán mé mende áke dé abe Dyöb mende, boŋ ekámténé nén weé nyé mod nyéwánléné kǝkǝ,

²⁴ ébané nímōŋ mende áse á'sō é' menyán mé mende. Esébe éke ébél nsanŋ ne ane mod boŋ étím ámbíd éke ébe mende.

²⁵ Nzé mod ahede we áke dé asómén á kóte, bǝl kǝŋ nyúmō nyépe á nchemten byánán nyéǝpé á kóte. Esebé nê, ahelése asómén we á kóte. Kóte-ε ébese we á mekáá mé plúse, plúse chǝ-ε éhē we á mbwǝg.

²⁶ Ne mbále, nlanŋe we meé, weéhēlē-se ebíd á ndáb e mbwǝg-tē wē kǝŋ né etwedé ádōŋ alúm ásyāǝl.

Ayáged áde Yesue tǝŋgene akáb dé mesón

²⁷ "Nyéwógé ngáne béhóbé nén bán, 'Nyéekábé mesón á ndáb e'wóngé.'

²⁸ Boŋ nlanŋe nyé meé, kénzéé awé anané mmwaád boŋ awémten aá né mǝnnaŋnéd mós, amaá asón akáb ne ane mmwaád áwe nlém-té.

²⁹ Nzé ádoŋ díđ ábelte we mbéb, ehúd dǝ, épim. Edé mboŋ ábód dǝ, tómaa bǝ ábwém ehoŋ yǝl esyǝǝl á dü-á-muú.

³⁰ Melemlem nê, nzé échoŋ ekáá ébelte we mbéb, esél chǝ, épim chǝ. Edé mboŋ ábód chǝ tómaa bǝ ábwém ehoŋ yǝl esyǝǝl á dü-á-muú.

Ayáged áde Yesue tǝŋgene abó-dé-e'wóngé

(Mat 19.9; Mak 10.11-12; Luk 16.18)

³¹ "Kálag e Dyöb ehóbé ámpé nén, 'Kénzéé awé anané mwaád á e'wóngé atánŋéné ábe mós apab áde álúmté nén bán anané mós á e'wóngé.'

³² Boŋ nlanŋe nyé nén meé, nzé mod anané mwaád á e'wóngé ésebán ane mmwaád akábé asón, boŋ ane mmwaád akí mod ampée awón, né nchóm awé anané mós á e'wóngé mós atúmté mós mmwaád awé akábe' mesón. Kénzéé-ε awé awóó mmwaád awé bénáné á e'wóngé né mómpé akábé asón.

Ayáged áde Yesue tǝŋgene amwé dé melé

³³ "Nyéwógé nén bán bénlāá bad bé' bǝsd bán, 'Mod eemwág melé boŋ nzé mod amwéde melé atánŋéné ábél dyaŋ áde ámwééné melé á'sō é Dyöb.'

³⁴ Boŋ nlanŋe nyé nén meé, nyéemwág melé ké mehóg. Nyéemwág melé á đin dé nkamlen ní mín, áyāle áhed dǝo Dyöb áwóó e'dii bé nkamlen.

³⁵ Nyéemwág-ke á đin dé nkǝŋsé, áyāle áhed dǝo Dyöb ásumé mekuu. Nyéebenlād-te ké đin á dyad á Jerusalem, áyāle áđii dyad áde kǝŋ embáá.

³⁶ Nyéemwág melé ké á đin dé nló nímēn, áyāle nyéhēlē ké mbum e esid póg ahəŋlen áwēn nló, ápúbéd ké'ε áhined chǝ.

³⁷ Boŋ nzé ehóbé weé móbele dyaŋ, ehób weé, 'Eε, mēbel dǝ.' Ké-ε weé, 'Aáy, méebenlé.' Kéché éche ébádé áhed né ébíde wéε Satane.

Ayáged áde Yesue tǝŋgene akun-á-yǝl

(Luk 6.29-30)

³⁸ "Nyéwógé ngáne béhóbé nén bán, 'Nzé mod atúbé mod díđ, bétúb mómpé díđ. Nzé mod ahúde-ε mod ason, béhúd mómpé ason.'

³⁹ Boŋ nlanŋe nyé nén meé, nzé mod abelé we mbéb, éched yǝl. Nzé mod abomé we abén á akag ahóg, ékunnéd mós áđiní ámpé.

⁴⁰ Nzé mod ahede we asómén á kóte ákobēn we nímōŋ nkobe, ébag mós kǝŋ ne ehoŋ síte.

⁴¹ Nzé mod anyágté we aá ékēen mós máyl mehóg, ékēen mós máyl mébe.

⁴² Kénzéé awé achómé we chóm, bεé mós. Nzé mod ahóbé-ε aá, ébál mós chóm éche éwóó, ebál mós.

Ayáged áde Yesue tǝŋgene bad bé ekǝyi

(Luk 6.27-28, 32-36)

⁴³ "Nyéwógé ngáne béhóbé bán, 'Edəŋ mwányon, ékǝo-ε mod awé akǝo we.'

⁴⁴ Boŋ nlanŋe nyé nén meé, nyédəŋ bad ábe békós nyé, nyékannad-te ábe bétagte nyé.

⁴⁵ Nzé nyébelé nê, né nyéēbē bán ábe Titée awēn awé adé ámin. Alóme' enyēn ne mbúú wéε bad bé mbéb ne bé bwám nyaa póg.

⁴⁶ Nzé edǝá bad ábe bédás we bēnpen, nê deēpiinédte we nsábe ké nhóg. Kǝŋne besaad-bé-tááse bómpé bébele melemlem.

† 5:22 Kénzéé awé alíñé; donŋe á kálag áwóó kénzéé awé alii ngēn.

⁴⁷ Nzé elente' ábōŋ bad bēnpen né ebele melemlen ngáne kénzée ampée ábeléé. Káŋŋe bad ábe béesē bad bé Israel bébele nē.

⁴⁸ Né-óó, mbeltéd nímēn rítáŋgéné nēe rítýéémé bwám, nēŋgáne mbeltéd níme awēn Titée awē adé ámín.

6

Ayáged áde Yesue tãŋgene áwōŋgen bad

¹ “Nyétéd pón dé! Nyéébelē nsōn ní Dyōb ábel boŋ bad bényín nyé. Nzé nyébele nē, né nyéekudté nsábe wéé awēn Titée awē adé á nkamlen ní mín.

² “Né-óó, nzé ebage mod chōm éche átógnéné, weékūmē nkāŋ nēŋgáne bad ábe bédoge yāl. Békume nkāŋ á ndáb é mekáne ne á dyad-té wéé bad bédíí, ábel boŋ bényín bó. Ne mbále nlánge nyé meé, bémáá nímab nsábe rísyā́l akud.

³ Boŋ nzé ebage mod chōm éche átógnéné, weébelē'-se ké awoŋ wēn awē étómténé adāŋ abíí.

⁴ Nē débēl mod ké nhóg éebíí' é chōm éche ébágé mó. Dyōb, awoŋ Titée awē anyíne mam níme mébenled á e'koŋnéd-te móósbā́ wē.

Ayáged áde Yesue tãŋgene mekáne

(Luk 11.2-4)

⁵ “Nzé nyékanne', nyéekánne' nēe bedog-badé, ábe nzé békánne' bédəə atyéem á ndáb é mekáne ne á mbom, ábel boŋ bad bényín bó. Ne mbále nlánge nyé nēn meé, bémáá nímab nsábe rísyā́l akud.

⁶ Boŋ pen, nzé mod akánne', asól awē toŋ-té, ádíb ekob, boŋ ákánne' wéé eche sáŋ Dyōb awé mod éenyínē. Ene pón dé awōŋ Titée awē anyíne' mam níme mé dé á e'koŋnéd-te ásbā́ wē.

⁷ Nzé nyékanne', nyéebádnán e'yale mbád ne mbád, ngáne bad ábe béesē bad bé Israel bébeleé. Bébelé béwēm̄tān bán Dyōb déwóg bó mekáne áyale bébúdé e'yale áte.

⁸ Nyéebág nēe bó, áyale Dyōb, awēn Titée, amaá abíí chōm éche nyétógnéné byánán nyéésédéd mó.

⁹ Né-óó, enén nyaa e mekáne chōó nyétáŋgéné akáne, Dyōb, Titée awēd, awē adé ámín, edúbé ébē ne ádoŋ díŋ.

¹⁰ Mmōŋ nkamlen níhye rítéd etál.

Bad bé nkōŋsé bébel mekan níme éhédeé, ngáne ébenlaadté ámín.

¹¹ Bag sé eched ndyééd e epun e bín é' chíí.*

¹² Lagsén sé níméd mbéb, ngáne sémpé sélagsanné mod téé awē ábelé sé mbéb.

¹³ Weémwāg-se sehún á mekáŋsen-té, boŋ húd sé á mekáá mé Satan.†

¹⁴ Nzé nyélagsan bad mewusé níme bébénlé nyé, né Dyōb Titée awēn awē áde ámín mómpé álagsén nyé.

¹⁵ Boŋ nzé nyéélagsán bad, né ké Dyōb awēn Titée éelagsénné nyé.

Ayáged áde Yesue

tãŋgene ádíí á yāl nzaa á mekáne-té

¹⁶ “Nzé edide yāl nzaa á mekáne-té, weésudné' ngáne bedog-badé bébeleé. Béchémté' e'só á nló ábel boŋ bad béchem bán bédide yāl nzaa á mekáne-té. Ne mbále, nlánge nyé nēn meé bémáá nímab nsábe rísyā́l akud.

¹⁷ Boŋ nzé edide yāl nzaa á mekáne-té, éwōbē e'só, ésēdē'-e nló áte.

¹⁸ Bēl nē, ábel boŋ bad béchemé bán edide yāl nzaa á mekáne-té, étóméé awōŋ Titée awē mod éenyínē. Anyíne' mam níme mé dé á e'koŋnéd-te, mó-'aa ásbā́ wē.

Ayáged áde Yesue

tãŋgene awōŋ á bwēm

(Luk 12.33-34)

¹⁹ “Nyéekōŋnád yāl nhōn á nkōŋsé wēn, wéé síi ne ngag bébēbēdté, bechíb-pe ámpē bébóó ndáb, béchíb.

²⁰ Boŋ nyékoo nímēn nhōn wéé síi ne ngag bébēbēdté, bechíb-pe ámpē bébóó' é ndáb se béchíb.

²¹ Nyébíí bán wéé nhōn nábáŋkē mod, áhed dōó nlém-me nábáŋkē mó.

²² “Díd dōó áde ngáne etrukāŋ é yāl e mod. Nzé díđ ákénlé wē áte, echoŋ yāl esyā́l chōmpē ebelé ekélé.

* **6:11** Bag sé ndyééd e epun e bín é' chíí káa ndyééd e epun e bín é' chán. † **6:13** Donje á kálag dé'só ábádé bán Nkamlen, ngíne ne ehúmé bédíí aboŋ á ngíndé ne á ngíndé.

²³ Nzé déekénle, yál chǎmpē ēlōn wε áte ne ehíntén. Né-òó, nzé chǎm éche ényínte nyé ekíde étímé abé chǎm éche étímté nyé á ehíntén-tè, né échē ehíntén échē nyébéε áte étómtén ngíne abé.

²⁴ “Modmod eéhélεε-se abé mbaledε a bewōŋ bébe. Alúmēd nhóg edǎnge tómaa aníní, ké’ε átíman nhóg, abǎn-ε aníní áyál. Weéhélεε-se ebé mbaledε a bad bébe abé ahóg. Weéhélεε-se ebé mbaledε a Dyǒb se ebé-ε mbaledε a mané.

²⁵ “Né-òó, nlánge nyé nén mεé nyéétágē áte á alongé, se nyéhǎbē nén bán cheé nyédyεε, ké’ε nzé-chómé nyémwεε, ké’ε cheé nyéwǎǎ’ε á yál. Eesaá mbále bán alongé átómé ndyééd-ε? Yǎl-le ámpé eesaá etógnén tómaa mbóté-yε?

²⁶ Nyénǎne menǎn, mééwēnεε bwēm, méēpādεε, mééwóo-’áa hǒm ádē békongéé medyé. Kénε, Dyǒb awēn Títεε awé adé ámín adítte mǎ! Nyéebíi’ε bán nyédé etógnén bwǎmbwam tómaa menǎn-ε?

²⁷ Nzé-módé áwεn tínté ahεle átág áte kǎŋ, abád ké epun ehóg áwē alongé?‡

²⁸ Cheé-òó ékásǎŋ nyétágé áte áyále mǎbóté éche nyéwǎǎ’ε? Nyénǎne’ mbonja éche édé á mehín-te ngáne ékwogεε. Eebeléé ntú, éebanjéé mesanj.

²⁹ Nlánge nyé nén mεé, ké kǎŋ Solomonε ne nímē nhǎn rǎsyǎal eewǎǎ’aa mbóté éche épédé échén mbonja ké póg e’bonj.

³⁰ Nzé Dyǒb áhεlεε awǎádté e’sum abé é’bág chíi bonj chǎn béhé bǎ á dù, né éetómmé nyé awǎád né-yε? Chán adúbe ádíí nyé mwǎmpín nén?

³¹ Né-òó nyéétágē áte bán, ‘Cheé sédyεε? Cheé sémwεε?’ Ké-’ε bán, ‘Cheé séwǎǎ’ε?’

³² Bad ábe béesé bad bé Israel bǎó béchyeε’ ákud échén ndín é bwēm. Awēn Títεε awé adé ámín abíi’áa nyétógnéné ábén bwēm é’syǎal.

³³ Bonj nyésébe nyé nyéhεd mam mé nkamlen ní Dyǒb tómaa mam mésyǎal, nyébele-ε ngáne Dyǒb áhεdnéé nyé. Nzé nyébele nē, né Dyǒb débǎ nyé ábíníí bwēm é’syǎal.

³⁴ Né-òó nyéétágē áte áyále epun é’ chǎn. Epun é’ chǎn chén éwōŋ nímē metake nímē mékwognéd chǎ. Epun téé éwóó nímē metake.

7

Ayáged áde Yesuε

tǎngεne bad ábe békáadtε badb

(Luk 6.37-38, 41-42)

¹ “Mod eekáádté waáb. Nzé eekáádté wēn, né Dyǒb dǎmpé dékǎád wε.

² Nyaa eché eekáádté wēn, chǎó Dyǒb dǎmpé dékǎádté wε. Melemlen mé nhǎgtéd nímε ébénlédé mǎó Dyǒb dǎmpé débenlédé.

³ Cheé ékásǎŋ bonj éwǎmsǎn mwǎ púuted anyín á díđ áwēn, ésebǎn ehεle nkǎg nímε rídé mmǎŋ á díđ anyín?

⁴ Chán éhεle-se eláá mwǎnyonj wεé ámwε mǎhūd mǎ púuted á díđ, áde nkǎg rídíí mmǎŋ á díđ?

⁵ A-edog-bad! Sébé éhūd nkǎg nímε rídé mmǎŋ á díđ, dǎó wétōŋ’ε púuted eché edé mwǎnyonj á díđ anyín, bonj ehúd-te chǎ.

⁶ Weetédé mam mé Dyǒb se ébē mbwé, áyále ékunnéd wε yál ékūm-mε wε. Weebwémme nguu échōŋ ngεse áyále édyantéd chǎ ámín.

Hédén Dyǒb kéchéé éche éhεdéé

(Luk 11.9-13)

⁷ “Hédén Dyǒb, ábǎ wε. Héd, Dyǒb débǎl enyín, kūm ekob, Dyǒb dédíbnéd wε.

⁸ Áyále kénzéé awé ahédné Dyǒb, ákūd, awé ahéde-ε, ányín. Kénzéé-ε awé akumé ekob, Dyǒb dédíbnéd mǎ.

⁹ Sáa-a-mwǎn ahéé mwǎn áhédénné ewεle, bonj ábε mǎ aláá?

¹⁰ Ké-’ε nyé ahéé mwǎn áhédénné súu, bonj ábε mǎ nyǎ?

¹¹ Nzé e’bébtéd é’ bad nēε nyé nyébage ábén bán kǎse é bwēm, tǎgtén-naá echén Sǎŋ awé adé ámín? Chán-nǎ éebaá bad ábe béhédné mǎ kǎse é bwēm?

¹² Né-òó, kéchéé éche édás wεé bad bébel áwōŋ, ébel chǎ áwǎb. Nén dǎó mbéndé e Dyǒb ne bekal-bé-e’ dǎádǎŋ ékoo’ε ayáged.”

Nzii e alongé áde déemád’

elélé áte

(Luk 13.24)

¹³ Yesuε ambád áá, “Bwεé á ekob éche échíné áte, áyále ekob éche ékag á dù-á-muú ékálé áte, nzii echéd-te etǎnlédé, bad ábe bébwag-kε áhéd bébuú áte.

‡ 6:27 Ábdé ké epun ehóg áwē alongé kǎa áchab tómaa ngáne díđil.

¹⁴Boŋ ekob é nzii e alongé ádè déemaá' edé mwämpin. Nzii-'ε eché etime áwed elélé abwε áte. Nguse é bad chásó ébwag-ke áhed.

Bekal-bé-e'dáádəŋ bé metóm
(Luk 6.43-44)

¹⁵"Nyétéd pónde ne bekal-bé-e'dáádəŋ bé metóm. Bélúmte byánán bépweédtedé néε rídyəŋ ní mbód, boŋ áwab nlém-té bédé ebébtéd néε ngá.

¹⁶Nyéεchem bós á mbeltéd nímb. Mewán méchyáa e'pum é' besabé-yε? Ké-'ε mekód méchyáa' e'pum é' mángəle-yε?

¹⁷Melemlem-'áa bwel ké é'héé ábe é'kwoge' bwám, é'chyáa-'ε e'pum é' bwám. Boŋ ké é'héé ábe béekwogé' bwám, béechyáa-'é e'pum é' bwám.

¹⁸Bwel é' bwám béehelélé e'pum bé mbéb achyáa. Bwel bé mbéb-pε béehelélé e'pum é' bwám achyáa.

¹⁹Bwel ké é'héé ábe béechyáa' e'pum é' bwám, nwóó-nzag ákwel bós, abwém bós á dū.

²⁰Né-ós, nyéébií bekal-bé-e'dáádəŋ bé metóm á mbeltéd nímb.

Bad ábe béhíde Yesue
ne nlém níbe

(Luk 13.25-27)

²¹"Saké mod téé awé achəgtaad me áa, 'A-Sán, A-Sán,' ášöl á nkamlen ní mín. Bad ábe bébale ngáne echem Sán awé adé ámín áhednéé bós, bós bésəl.

²²Ade epun é nkáásé mé asóg épeé, bad híin bépé áwém, bélangé me bán, 'A-Sán, A-Sán,' ngómé sékánlé'áa bad mam míme Dyób álómné'áa sé áa mébenléd, á dín ádōŋ, sébenléd-te ádōŋ dín ábíded bad e'dáádəŋ bé mbéb áte, sébelé-'ε menyáké híin!'

²³Héε méláá' é bós méé, 'Meebíí' é me nyé. Nyésyəə me á díd-te! E'bébtéd é' bad ngēn!'"

Belón-bé-ndáb béε:
a debyéé ne a eyókél

(Luk 6.47-49)

²⁴Yesue ambád ámpé áa, "Né-ós, mod téé awé awógé ábém e'yale bén, boŋ ábelé-'ε ngáne é'hóbéé, ádíi néε mod a mekínzé awé alóó ndáb á ebən é aláá mín ábel boŋ éwúu ášé.

²⁵Ambíd e nē, mbúú e ngíne enchá, e'díb é'lóne, ekukud-te étóm wéε ene ndáb émbē, boŋ enkénkwéé, áyāle enlónéd á aláá mín.

²⁶Boŋ kénzéé awé awógé ábém e'yale bén, boŋ eébele ngáne é'hóbéé, ádíi nēngáne eyókél é mod éche élóó eche ndáb á nsí mín.

²⁷Ambíd e nē, mbúú e ngíne enchó, e'díb é'lóne, ekukud-te étóm wéε ene ndáb émbē. Ene ndáb enkwé. Enkúme émad-te ahented áte."

Kunze eche Yesue awóó áyóged

²⁸Ade Yesue ámáá nímén mésyāal ahób, amute áde áwóglánnáá mó démbē menyáké bwámbwam áyāle nyaa eché áyágté'áa.

²⁹Áyágté'áa bós néε mod awé nzé ahóbé, né émáá. Eeyágté'áa, nēngáne bemeléde bé mbéndé.

8

Yesue achóŋté mod
awé meləŋ mékóbé

(Mak 1.40-45; Luk 5.12-16)

¹Yesue ansüd á ekone sé. Ade ápedé é ekone sé ndun e mod ehídé'áa mó.

²Hé dós mod nhóg awé meləŋ mékóbé ápedé áwé boŋ ábwəgə mebóbōŋ ne edúbé ésyāal, áhəbē nēn áa, "A-Sán, nzé edəé ehele ébəl me nsán."*

³Dós Yesue ábídté ekáá, ábānē mó á yəl boŋ álangé mó áa, "Ndaá, sán!" Ábwəg-ábwəg nímmé meləŋ mémmaa áne mod á yəl.

⁴Dós Yesue álangéé mó áa, "Weelángé modmod dyam áde ábenléd, boŋ ké élúmed yəl wéε prise, ásimen we. Ebag-ke mende ngáne mbéndé e Moseε éhedeé, álúmed bad wéé móšāá."

Yesue achóŋté mbəlede
a mod ambáá a sánze

(Luk 7.1-10)

⁵Ambíd e nē, Yesue anké á dyad á Kapenahum. Néε ápedé áwed, mod ambáá a sánze é Roma ambé awé akamlaan mbwókel e sánze. Ane mod anhye mó achán, áhəbē

* 8:2 Mmēn nteltéd rídé á Kálag e Levitikus eped dyóm ne é'láan nchoo móóm méniin ne rítáan ápe nchoo móóm méniin ne ntóób (Lev 13.45-46).

⁶ aá “A-Sán, awém mbaledé eédyé’ é bwám, adé á anonj de nkole á ndáb. Eéhéłéé ahide ásē. Atage bwámbwam.”

⁷ Yesue anláá mó aá, “Meépé, ríchōōd-te mó.”

⁸ Dóo mod ambáá a sánze ne átímtanné Yesue aá, “A-Sán, mmèn meékwognedéé ákob we nken awém ndáb, bonj hób ké eyale, awém mbaledé ádyéé bwám.

⁹ Mmèn ndli mod awé adé ásē e nkamlen, mmèn-ne nwóó sánze éche ríkamlanné. Nlånge póg mezé, ‘Käg’, ékäg-ke né dēn, empée mezé ‘Hyäg’, éhyäg-ke né dēn. Nzé nlånge awém mbaledé mezé, ‘Bél échéń’, ábelé-’é né dēn.”

¹⁰ Ade Yesue áwógé nē, yál enkóm mó áte. Dóo álångeé bad ábe behídé’ áá mó aá, “Ne mbále, nlånge nyé mezé, meényínéé mod a alonj á Israel ké nhóg awé awóó nyaa e adúbe échē anén nken-e-mod áwóó.

¹¹ Nlånge-’é nyé nén mezé pónde échē ngande ébēé á nkamlen ní Dyób, bad híin ábe bēnkéntāngēń abé áhed bēbíd á akuu ne á mbənj ábē á ngande nchoo ne betaa, Abrahamé, Aisigé ne Jakobe.

¹² Bonj bēbídēd bad ábe bēntāngēń abé á nkamlen ní Dyób á ebwóg-te, bēbwém bó á ehíntén-tē. Ahed-taá béchysé’ é bēdyāg-ke mesonj á nsal.”

¹³ Dóo Yesue álångeé ane mod á sánze aá, “Súé’ á ndáb, ébēnled ngáne édúbpe.” Melemlem mé pónde mbaledé awé ane mod ambáá a sánze andyé bwám.

Yesue achōjté ekud é bad

(Mak 1.29-34; Luk 4.38-41)

¹⁴ Adé Yesue ápédé á ndáb wéé Petro, antán Petro mwaád nyaá á anonj dé nkole, ahéb dēnsog mó.

¹⁵ Néé Yesue áchāngé mó á ekáá, ahéb ámāá mó. Anhidé ásē, ákōb-pe Yesue nken.

¹⁶ Ene ngukél bad bēmpēń bad híin wéé Yesue, ábe e’daádənj bē mbéb bēmbēé áte. Yesue ambenléd ábē e’yale bē nsal abídéd ábē e’daádənj bē mbéb, áchōōd-te bad bésyāł ábe békónlé’ áá.

¹⁷ Yesue ambēl nímén mésyāł áloned e’yale ábe Dyób dénlōmēnnē nkal é’daádənj Yesayaa nén aá,

“Ankobén syánē nkole rísyāł ne nímdē metake.”

Bad ábe bēmpōn Yesue ahid

(Luk 9.57-62)

¹⁸ Ade Yesue ányíné ngáne ndun e mod élājnédé mó, anláá abē bēmbapēe aá bóbōo bétíme á pēd e edib-é-nzab eníní.

¹⁹ Hē dóo meléede a mbéndé nhóg ápédé áwē bonj áhōbē aá, “A-meléed, mēhíd we kéhéé áde ékágké.”

²⁰ Yesue antímtén mó aá, “E’bubwóg é’wóó ábab e’lóm wéé bésóléé, menən-ne ámpē méwóó nímbab mūm, bonj Mwān-a-Moonyonj eewóó’ é hóm adé ábánnéé nló.”

²¹ Dóo mod ampée awé mómpē ahídé’ áá Yesue álångeé mó aá, “A-Sán, mwē, rísebe ríke nílime echem sánj.”

²² Dóo Yesue átímtanné mó aá, “Hídé me, chené ndim ní bad mēń nílime nímbāb ndim.”

Yesue ahóódté ekukud

(Mak 4.35-41; Luk 8.22-25)

²³ Ene pónde dóo Yesue ásolé á bōle-tē ne abē bēmbapēe bonj bēbwōgē eke.

²⁴ Adé bēpédé á edib-te, dóo ekukud é ngíne ébóótédé atóm. Embē ngíne nyaa échē káájne bōle bēmpōnné asú ásē á mendíb-te. A pónde eched Yesue akuné’ áá.

²⁵ Hē-’aá bēmbapēe bényeméé mó ásē bonj bēlāngē mó bán, “A-Sán, són, wōnjén, pōn syánē dewāg-ōō!”

²⁶ Yesue ankwentén bó aá, “Cheé ékás bonj nyéwōgē mbwóg? Cheé ékás bonj ádēń adúbe abé mwāmpín nén?” Dóo átyéémé amin, bonj ákamlán ekukud éche étómé’ áá, ne edib éche éhódé’ áá áte. Abwōg-ábwōg ekukud énsēle, edib ámpē éche éhódé’ áá áte énsóg ahod.

²⁷ Yál enkóm bēmbapēe áte bwámbwam áde bényíné nē, bésēdté bánken, “Ebál é mod éhéé chén éche kááj ne ekukud ne mendíb bēwógnéé?”

Yesue achōjté bad bēbe

ábē e’daádənj bē mbéb bēmbēé áte

(Mak 5.1-20; Luk 8.26-39)

²⁸ Ade Yesue ne abē bēmbapēe bēpédé á múde mé edib-é-nzab níminí, á mbwóg e bad bē Gerasin, bad bēbe ábe bēmbíd á soóbadé bēmbomén mó. E’daádənj bē mbéb bēmbē abé bad bēbe áte. Abé bad bēmbē nganjlen nyaa échē mod ké nhóg éechue’ áá ene nzii abwe.

²⁹ Anyín áde bényíné Yesue, bēmbootéd abón bán, “A-Mwān a Dyób, cheé syánē déwōjné? Epédé hēń ákōgsen sé áde pónde éépédē-ye?”

³⁰ Esog é nguu chó-'é ébéde benben ne áhed, édyāg medyé.

³¹ Héé ábê e'daádan bé mbéb é'cháa-'é Yesue bán, "Sébíí bán wēbīdēd sé, bonj tedé sésól á esog é nguu-té éche éde híníí nê."

³² Dóo Yesue ákamlanné ábê e'daádan bé mbéb aá, "Nyébíd!" Abid áde ábê e'daádan bé mbéb é'bidé ábê bad áte, bénsól nguu ché áte. Abwōg-ábwōg, éché esog é nguu émpādē ásē, ényāgté' á aláá é nkin mé edib-é-nzab, éhún á edib-tē, éwé-'é.

³³ Benon bé nguu béntōm mehélé á dyad-tē, békag békanklé bad dyam áde ábénlédé ne ábê bad ábe e'daádan bé mbéb bémbēē áte.

³⁴ Awóg áde ábê bad bé dyad béwógé nê, bémpādē ásē áke dé atán Yesue. Néé bényíné mō, bēnchān mō bán, áhide áwab mbwóg.

9

Yesue achōnté mod awē awédé epeđ

(Mak 2.1-12; Luk 5.17-26)

¹ Ambīd e ene pōndé, Yesue ansól á bōle-tē ámpē, áchābē edib-é-nzab, átm ambīd awē dyad wēé ádyéé'áá.

² Ape áde Yesue ápedé awē dyad, bad behóg bémpēén mod á mekále mín awē awédé epeđ. Ade Yesue ányíné adúbe áde ábê bad, anláá ane mod awē awédé epeđ aá, "A-mwān, weewógé mbwóg, nlagséné wē mbéb."

³ Hé dōo donje dé bemeléede bé mbéndé bényonjéé áte bán, "Anén mod asyāā Dyōb!"

⁴ Yesue anchēm bō mewēmtēn áte. Héé ásedtēé bō aáken, "Cheé ékás bonj nyéwōj nímēn mewēmtēn mé mbéb áte?"

⁵ Ahéé adé dyam ásad, áhób wēé, 'Nlagséné wē mbéb,' káa áhób wēé, 'Syāā ásē, ébooted aké?'

⁶ Bonj mēlūmēd nyé mēé Mwān-a-Moonyonj awóo kunze á nkōjsé álagsen mbéb." Héé álanjéé ane mod awē awédé epeđ aá, "Syāā ásē, étēd nímōj mekále, ésúe' á ndáb."

⁷ Dōo ane mod áhídté ásē bonj ásūē-'é á ndáb.

⁸ Mbwóg ménkōb bad ábe bényín ngáne ádén akan ábénlédé. Bébootēd-tē Dyōb akēn áde ábágé baányonj kunze ábel éché n dín é mam.

Yesue achēnlé Matyo áhid mō

(Mak 2.13-17; Luk 5.27-32)

⁹ Ambīd enē Yesue ansyāā áde abwóg á hōm. Ade ákagké nē, annyín mod awē béchágé'áá bán, Matyo. Matyo andyēé ásē á ndáb eche ásānté'áá tááse áte. Héé Yesue álanjéé mō nēn aá, "Hídé mē." Dōo Matyo átyéémé ámín, bonj áhídē-'é mō.

¹⁰ Ambīd e pōndé Yesue ankē á ndáb wēé Matyo* ádyé ndyééd. Ekud é besaad bé tááse né bad bé mbéb bémpēe bémpēé bédyēēn Yesue ne ábē bembapee áhed.

¹¹ Néé donje dé Befarisia bényíné ngáne Yesue ádyééné échē n dín é bad, bénsēdéd ábē bembapee bánken, "Cheé ékás bonj awēn meléede ádyāg ndyééd ne besaad bé tááse ne bebel bé mbéb bémpēe?"

¹² Dōo Yesue ákwentanné bō aá, "Bad ábe bédyéé bwām béetōgnēné mod-a-bwēl. Bad ábe bēkonle' bōo bētōgnēné mod-a-bwēl.

¹³ Nyéke nyéhēd áte ábel nyésōjten ábén e'yale ábe é'ténlédé á kálag e Dyōb nēn bán, 'Chōm éche nhēdnēé bad édíí n lēm n ngól, saké mende.' Meēpedēé á nkōjsé áchéle bad ábe bēkōbnédé á'sō é' Dyōb, bonj mpedé áyāle bad bé mbéb."

Nsedtéd tōngene ádid yāl nzaa á mekáne-tē

(Mak 2.18-22; Luk 5.33-39)

¹⁴ Hé dōo bembapee ábe jōnē, Ndušené bépédé wēé Yesue bonj bésēdté mō bánken, "Cheé ékás bonj sé ne Befarisia sédidé yāl nzaa á mekáne-tē, bonj ábōj bembapee pen béedidé?"

¹⁵ Yesue ankwentēn bō ne ngan aá, "Chán bad ábe bélēbpé á ngande e e'wōngé béhele bélebe' áde bēdíí ne mod awē akudé sōmbé? Béeheléé. Bonj epun épē éche bēkōbēnné bō mod awē akudé sōmbé. Echē epun dōo bēdiditē yāl nzaa á mekáne-tē.

¹⁶ Nyébíí nēn bán, nzé mod anabpe' mbóté, eetédéé epeđ é abad ékāsle se ábanbéd nchun n mbóté, áyāle nzé échē epeđ é abad ékāsle ébōótédé abób áte ébelé éhabnéd abad dé nchun. Né ábele' échē epōn é mbóté ékále' áte tōmaa ngáne énsēbēé abé.

¹⁷ Melemlem nēngáne mod éētēdēé mím mékāsle se ápen mō á nchun mé ntyág n ngob e nyam. Áyāle nzé abelé nē, né mím méhōd kásj ntyág n'yéd? Mím mémād asyōge, ntyág-ke

* 9:10 Ndáb wēé Matyo káa ndáb eche Yesue.

ámpē níbéb. Boŋ bétédéé mím mékǝǝl béhé á ntyág mékǝǝl-te. Nê ábele' mím mébé bwám, ntyág-ke ámpē níbé bwám."

Yesue apuidté ngǝndéré pǝg eché enwé

(Mak 5.21-43; Luk 8.40-56)

¹⁸ Ade Yesue álanǝé bad nímén mekan, mod a nkamlen nhǝg ampé áwé abwǝg mebóbǝn ne edubé ésyǝǝl, áhǝbē nēn aá, "Awem mwán a mmwaád awédé bǝǝb nēn dēn, hyǝg ebán mó ekáá á yǝl ábel nēn ápuu."

¹⁹ Né-ǝ Yesue ampádé ášē ne ábē bembapēé béhídē ane mod.

²⁰ Ade békagké nē, mmwaád nhǝg ambé awé anwǝn nkole níme mekií mébíde'áá mó á yǝl pǝndé ésyǝǝl. Mmē nkole níbéde mó á yǝl á etún é dyǝm-a-mwé ne níbe. Héé ane mmwaád ábíde Yesue á mbíd, ásitán mó mesó mé nkobe níme ánwǝá'ē.

²¹ Ambel nē áyǝle ánwǝlé mewémten aá, nzé mǝsíténé níme nkobe, aá né mǝodyéé bwám.

²² Dǝǝ Yesue ákúnnédé boŋ anyín ane mmwaád. Anyín áde ányíné mó dǝǝ álanǝé mó áá, "A-mwán-a-mmwaád, adúbe ádǝŋ ádíde wē bwám." Abwǝg-ábwǝg ane mmwaád andyéé bwám.

²³ Yesue ampé á ndáb eché ane mod a nkamlen. Ade ásolé á ndáb-te, antán ndun e mod ebéle ntǝgag ní ngine ne bad ábe bétóo e'lǝŋ, békǝnē-é nkǝngé ní kwééd.

²⁴ Dǝǝ Yesue áhǝbéé aá, "Nyé moosyǝǝl nyébíd á ebwǝg, áyǝle anén mwán-a-mmwaád eewédéé, ákúne kúnén." Héé bǝ moosyǝǝl bébǝótédé mó awǝǝ.

²⁵ Boŋ áde ene ndun e mod émáá abíd á ebwǝg dǝǝ Yesue ásolé á toŋ eché bēnnaádté ane mwán. Néé Yesue áchéŋgé mó á ekáá, apádé-é ášē ábwǝg-ábwǝg.

²⁶ Adén akan dēnkanléd ene pēd e alon ésyǝǝl.

Yesue achǝŋté bad bé ndim bébe

²⁷ Néé Yesue áhídte áde abwǝg á hǝm, bad bébe ábe bēnkwe ndim béhídé'áá mó ámbíd, bélehpē-é e'saad bán, "A-Mwán a mbyaa níme Dabide, wǝg sé ngǝl."

²⁸ Ade Yesue ásolé á ndáb-te, ábē bad bébe ábe bēnkwe ndim bēntǝn mó. Dǝǝ Yesue ásedtéé bǝ aá, "Nyédúbpé nēn bán nhele níbel nyényínēn-é?" Bēnkwentén mó bán, "Éé. A-Sǝŋ, sédúbpé."

²⁹ Dǝǝ Yesue ábáné bǝ mekáá á míd, boŋ áhǝbē nēn aá, "Nyēwǝó adúbe bán nyényínēn, né-ǝ ébenled ngáne nyédúbpé."

³⁰ Abwǝg-ábwǝg bébootéd-te anyínēn. Boŋ Yesue asím bǝ etúu áte, álanǝé bǝ aá, "Nyélanǝgé mod ké nhǝg adén dyam áde ábénléde."

³¹ Boŋ ké nē, néé bébíde áhed, bēmbē békēēn nkalan ene pēd é alon ésyǝǝl ngáne Yesue ábélé menyáké.

Yesue achǝŋté mod awé eehǝbē'áá dyam

³² Néé ábē bad bébe ábe bēnkwe ndim ábe Yesue áchǝŋté béhídte, bad bēmpēín mod wéé Yesue awé ankwé ebǝbé áyǝle edǝádǝŋ é mbé bēmbē mó áte.

³³ Boŋ áde Yesue ámáá ane mod éché edǝádǝŋ é mbé bēmbē áte, ambootéd dyam áhǝb. Nēn dēnkǝbēd ndun e mod eché ebédé áhed menyáké, béhǝbē-é bán, "Dyam néé adén débēnledéé á Israel mbéd."

³⁴ Boŋ Befarisia pēn béhǝbē nēn bán, ahele bad e'dǝádǝŋ bé mbé bēmbē áte áyǝle kǝŋ e e'dǝádǝŋ hé mbé bēmbē chǝǝ ebage mó ngine ábel nē.

Yesue awǝgé bad ngǝl

³⁵ Né-ǝ Yesue akagé'áá myad mésyǝǝl, mémbáá ne mésad ene pēd e alon, áyǝgté eyale é Dyǝb á ndáb é mekáne, ákalé-é nkalan ní bwám mé nkamlen ní Dyǝb. Yesue achǝŋté'áá bad bé nkole bésyǝǝl ne nyaa é nkole ésyǝǝl éche émbē átfnté echáb.

³⁶ Ade Yesue ányíné ndun e mod, ngǝl enlóg mó á nlem-té bwámbwam áyǝle echáb. Ambé bǝ ngǝl áyǝle bétágé'áá áte, béēwǝó-é nwǝŋgen. Bēmbē nēé nídyǝŋ ní mbód níme méēwǝo nnǝn.

³⁷ Dǝǝ álanǝé ábē bembapēé aá, "Nzag echyáá bwámbwam, bwēm é'hednaad apád, boŋ bepád béebuu'é áte.

³⁸ Né-ǝ, nyékǝnne nēn bán nwǝó-nzag álǝm bepád."

10

Bembapēé bé nlǝmag dyǝm ne bébe

(Mak 3.13-19; Luk 6.12-16)

¹ Ambíð e nê Yesue anlăd abê bembapεε dyôm ne bêbe áte. Ambe bó kunze ábíded bad e'đáádŋj bé mbéb áte, áchood bad bé nkole ne nyaa é nkole ésyāāl.

² Mīn nīme bembapεε bé nlómag dyôm ne bêbe ábe Yesue mōmēn: A'só, Simōne awê béchágé'áá bán Petro ne mwānyŋj Andreyā. Jemse bó mwānyŋj Jōne, bán ábe Zebēdíe,

³ Filibē ne Batolomyo, Tōmasē ne Matyo nsaad-a-tááse, Jemse mwān awê Alfōse, ne Tadiōse,

⁴ Simōne awê ambé á epepé é kán e alon, ne Judas Iskariōde awê antīm Yesue asóm.

*Yesue alŋgē bembapεε bé nlómag
ngáne bēbenlé nīme nsōn*

(Mak 6.7-13; Luk 9.1-6)

⁵ Abé bad dyôm ne bêbe bóo Yesue anlōmmē. Anláá bó áá, "Nyéekāg á myad nīme méesē myad mé alon á Israel, nyéekāg-ke dyad ké ahóg á alon á Samaria.

⁶ Boŋ nyékag wée bad bé Israel. Bédé nēe rídyŋj ní mbód nīme mībós.

⁷ Nyékag, ngáne nyékagké, nyéhāŋte nén bán, 'Nkamlen ní mīn rídé benben.'

⁸ Nyéchoŋte bad bé nkole, nyépuudte bad ábe bēwédé, nyéchoŋte bad ábe békōnle nkole mé melŋj ábel bésāŋ, nyébídte-ε bad e'đáádŋj bé mbéb áte. Mbagé nyé ngine ábel nīmēn mésyāāl, meéhēdnēé nyé nsábe. Né-óó nyémpē nyéke nyébele melemlen nyééhēdnē bad nsábe.

⁹ Nyéewánlé mōné ké nhóg áyāl.

¹⁰ Nyéewánlé ekwe, ké'ε mbóté ébe áyāl. Nyéewánlé metámbé, ké'ε ntóŋ. Ayāle mod a nsōn atāŋgénē ndyééd akud wée mod awê ábenléé nsōn.

¹¹ Nzé nyēsólé dyad ké ahéé, nyéhēd mod awê akwēnténē nyé nken akob, nyédyēē awe ndáb kóāŋ ne póndé éche nyéhídteé ádē dyad.

¹² Ndáb ké ehéé eché nyēsólé áte, nyélēléd bad ábe bédé áwēd-te nén bán, 'Nsaŋ nībē ne nyé.'

¹³ Nzé bad ábe bédé áwēd-te békóbé nyé nken, nīmēn melentēn mé nsaŋ ní Dyōb nībē ne bó. Boŋ nzé béekobe nyé nken, nīmēn melentēn rísú ne nyé.

¹⁴ Boŋ nzé nyépedé ndáb ké'ε dyad ké áhéé, boŋ béekwentene nyé awóglēn, nyékūd ebumbú á mekuu áde nyéhídteé áhed, álúmed nén bán, Dyōb déekobéé bó.

¹⁵ Ne mbále, nlāŋge nyé nén méé á Epun é Nkáásé, nkōgsen nīme myad mé Sodom ne Gomora bēnyīnnē mébē mwāmpīn tómaa nīme bad ábe bédé ádē dyad."

*Metake nīme
bembapεε békudté
á dīn áde Yesue*

(Mak 13.9-13; Luk 21.12-17)

¹⁶ Yesue ambád áá, "Nyénane", nlóme nyé nēe rídyŋj ní mbód áfínté e ngā. Né-óó nyébē mekínzé nēe nyā, nyépwiited-te nēe élāā.

¹⁷ Nyétéd póndé, áyāle bad bēbē ábe bēkéén nyé á kóte, béswādtēd nyé e'tanjú áwab ndáb é mekáne.

¹⁸ Ayāl e echēm bēpēén nyé á'só é' benkamlēne ne é' kán. Bébēl nē ábel nyékale bó nkalan ní bwām, nyékale-ε bad ábe béesē bad bé Israel.

¹⁹ Nzé bépééné nyé ké ahéé ákáad nyé, mod eétāgē' áte áyāle chōm-éé áhōbpē ké'ε ngáne áhōbpē chō. Ade póndé épéé, chōm ébē éche áhōbpē.

²⁰ E'yale ábe áhōbpē béebáá ábē, bēhūū ne Edáádŋj éche eche Sāŋ awê áhōbpē mó.

²¹ Mod ábe mwānyŋj á mekáá mé bad bēmpēe ábel bēwúu mó. Sēe mwān ámpē ábēl melemlen ne mwān. Mwān ákunnén sáá ne nyan yāl ábēl bēwúú-ε bó.

²² Mod asyāāl ákóó nyé, áyāl echēm, boŋ kénzéé awê ákaán nīmē metake nlém kóāŋ ne a asóg, ákūd e'sooson.

²³ Nzé bétāgté nyé á dyad ahóg, nyényoged nyéke ádíníí. Ne mbále, nlāŋge nyé nén méé, nyéepáá nsōn amad á myad mé alon á Israel mésyāāl, boŋ Mwān-a-Moonyonj ápag.

²⁴ Mwān-a-ayáge eetóméé mod awê ayágte mó. Mbālede-ε eetóméé eche sāj.

²⁵ Né-óó mwān-a-ayáge eetāŋgenéé nēe áhēdeé edubé éche étómé éche mod awê ayágte mó. Mbālede-ε ámpē eetāŋgenéé nēe áhēdeé edubé éche étómé éche eche sāj. Nzé béchúúde sáa-a-mbwóg bán Belzebule, né béchúú bad ábe bédé áwe ndáb mīn nīme mébēbē tómaa nē.

*Mod awê bétāŋgénē abāŋ
(Luk 12.2-7)*

²⁶ "Né-óó nyéebáá' moonyonj. Ayāle dyamdyam déesaá á e'konŋéd-te áde déebíd áwed. Ké ahóg-ke déesaá, áde ásóomé boŋ bán déebyéénné.

²⁷ Mam mésyāāl nīme rílāŋgeé nyé á ehíntēn-tē, nyéhōb mó á e'nyīnen bé ekíde. Mésyāāl-le nīme nyéwógé á kun-tē, nyékál mó á nhéné.

²⁸ Nyéewógé mbwóg ne moonoyon awě ahele awtúú ekob é yál, boŋ eéhelē' edaádəŋ awtú. Boŋ nyébáa Dyób áde áhəle ábēbéd ekob é yál, abēbéd-te edaádəŋ á dū-á-muú.

²⁹ Eesaá mbále nén bán, bésóme' ndun ébe áyāle kábpe póg-ε? Ké nē, ké póg eehúnéé á ndəəb ésebé á nkwennten míme echen Sáj Dyóbə.

³⁰ Boŋ ne nyé, Dyób ábíí káəŋne mesonjé mé e'sid ábe é'dé nyé á nló.

³¹ Né-óó, nyéewógé mbwóg, nyédé etógnén tómaa ndun, ké émbuú ké áte.

Abid Yesue mbóŋ,

ké'ε abāŋ mó áyāl

(Luk 12.8-9)

³² "Kénzée' awě ábíí me mbóŋ á'só é' baányon, me-ε mébíí mó mbóŋ á'só wée echem Sáj awě adé ámín.

³³ Boŋ kénzée-ε awě ábāŋ me áyāl á'só é' baányon, me-ε mébāŋ mó áyāl á'só wée echem Sáj awě adé ámín.

Yesue ad ngabén chóó

mápééné átínté e baányon

(Luk 12.51-53; 14.26-27)

³⁴ "Nyéewém tán nén bán, nhyedé á nkónsə ápəen nsan. Aáy, meépedeé ápəen nsan, boŋ ngabén.

³⁵ Mpedé ákón mwān a mwənchóm átəŋgen sáá, mwān a mmwaád átəŋgen nyaá, mmwaád-te átəŋgen nyāŋ-kálé.

³⁶ Bad bé ekoyí bé mod bēbíí áwe ndáb-te dēn.

³⁷ "Kénzée' awě adaá nyaá ké'ε sáá tómaa me eékwoɗnedé awēm mbapəe abé. Kénzée-ε awě adaá awe mwān a mwənchóm ké'ε awe mwān a mmwaád tómaa me, eékwoɗnedé awēm mbapəe abé.

³⁸ Kénzée-ε awě éepém adé awóg se áhídné me, eékwoɗnedé ábē awēm mbapəe.

³⁹ Kénzée' awě ahəde adé alonjé ason, ábəd dó. Boŋ kénzée-ε awě ábəd adé alonjé áyāle echēm, ákud alonjé áde déemaá'.

Nsábe ní Dyób ne bad

ábe bəkobe' ábē bembəledə

(Mak 9.41)

⁴⁰ "Kénzée' awě akobé nyé nken, né me-εé ákóbé nken. Kénzée-ε awě akobé me nken né echem Sáj awě alómé me mós ákóbé nken.

⁴¹ Kénzée' awě akobé nkal é'daádəŋ nken áyāle ádíí nkal é'daádəŋ, ákud nsábe mé nkal é'daádəŋ. Kénzée-ε awě akobé mod awě asáá nken áyāle ásaá, ákud nsábe míme mod awě asáá.

⁴² Ne mbále, nlānge nyé nén meé, kénzée' awě abagé ké mendíb mámwé ngēn wée anén nhóg awě ahíde me, ké ane awě eébude etógnén abé, atəŋgené nēe ákudé nsábe ní Dyób."

11

Jone, Nduzene alómé

ábē bembapəe wée Yesue

(Luk 7.18-35)

¹ Ade Yesue amáá ábē bembapəe dyóm ne bébe mímén mésyāəl alyágtən, anhidé adé abwóg á hóm áke déyáged ne ákal eyale é Dyób á myad míme mébédé bənben ne áhed.

² Ene pónde Jone, Nduzene ambé á mbwóg. Ade áwógé mam mésyāəl míme Kristəə ábélé'áá, anlóm ábē bembapəe awě.

³ Anhób aá béseded mó bánken, mó adé ane awě Dyób áhóbé aá mósólom-ε, ngé bésine' mod ampéé?

⁴ Héé Yesue átímtanné bó aá, "Nyétime' ámbíí, nyéke nyéláa Jone mekan míme nyéwógé ne míme nyényínné díí.

⁵ Nyéláa mó bán, bad ábe bēnkwē ndím bényínne', ábe bésyágtáá, békag bwām, ábe meləŋ ménkōbpē, bésáá. Ábe bēnkwē ndóg bəwógne', ábe bēnwē, bəpuude', nkaləŋ ní bwām-me ámpē níkalte' wée betóótōkə bé bad.

⁶ Nnam míbē-ε ne kénzée' awě eéhəŋlene nlém á abum təŋgene me."

Yesue ahóbé təŋgene

Jone Nduzene

⁷ Ade bembapəe ábē Jone bétímeé ámbíí nē, dóo Yesue ábóótédé ndun e mod echē embé áhed akale təŋgene Jone. Ansedéd bó aáken, "Pónde echē nyémbíídté áke dətán Jone á ehyaŋge, cheé nyéwém tēnné bán nyéenyín? Apab á chyaá áde epub ésaágté-ye?"

⁸ Cheé nyênkonǵé abíd áke dé anyín? Mod awě ahédé mbóté echě ébóó bwámbwam-e? Bad ábe behág echě ndín é mbóté bédyee dásó á ndáb é kǵn.

⁹ Nyélaa me, cheé nyémbídtě áke dényín. Nkal é' dǵádǵn mǵó nyênkeé anyín-e? Ně dǵn! Ne mbále nlǵnge nyé meé, nyényíné mod awě atómé nkal é' dǵádǵn.

¹⁰ Jǵne mǵ adé ane awě behóbé'áá adé bétélé e'yale ábe Dyǵb áhóbé áá, 'Nǵné', nlóme nímém mésénze níme mésébě we á'sǵ, áboǵsen we nzii.'

¹¹ Ne mbále, nlǵnge nyé nǵn meé, mod ké nhǵg awě abídé á abum dé mmwáád eetómé Jǵne, Ndušene. Boǵ ké ně, mod awě adé ndimten áyǵle bad ábe bédé á nkamlen mí mín, adé etǵgnǵn tǵmaa Jǵne.

¹² Bootya ne pǵndé echě Jǵne, Ndušene ábótótédé nkalǵn rí Dyǵb akal kǵńj ne epun é'chii, nkamlen mí mín níkude metake híin á mekáá mé bad, e'wanǵe é' bad-te é'kume níme nkamlen nzum.*

¹³ Mbéndé ne bekal bé' dǵádǵn behóbé tǵngene nímé nkamlen kǵńj ne pǵndé echě Jǵne.

¹⁴ Né-ǵǵ, nzé nyěbǵǵséné échab ehób adúbe, Jǵne mǵ adé ane awě behóbé'áá adé behǵpě bán, Elaijaa ahúé'.

¹⁵ Kénzéé awě awóó metúu áwǵge'.

¹⁶ "Boǵ cheé méhǵgtǵnné nyonǵel e'chii? Enǵn nyonǵel edii nǵngǵne bǵndem ábe bédyěé á dyad-tě, boǵ behěpě nhǵg ne anínii,

¹⁷ bán, 'Sétǵngé nyé e'lonǵ,
boǵ nyéesǵgeé.

Sékǵnné nyé nkǵngé rí kwééd,

boǵ ké ně nyéelěbǵe.'

¹⁸ Áyǵle, Jǵne abédé, eéyǵke'áá ndyééd adyé, eemwǵge'áá-'e mím, behóbě bán, 'Edǵádǵn é mbéb éde mǵ áte.'

¹⁹ Mwǵn-a-Moonyonǵ apedé, ádyǵg ndyééd, ámwǵg-ke mím, behóbě bán, 'Nyénǵne mǵ, adǵs ndyééd bwámbwam. Mmwé-mímne ngǵn, awonǵne belad bé tááse ne bebel bé mbéb.' Boǵ kǵńj ne á asǵ, mam níme mébenléd mélúméd nǵn bán, debyéé á Dyǵb átǵngéne.'

*Myad níme bad bǵnkǵndúbéé Yesue
(Luk 10.13-15)*

²⁰ Bad ábe behédé á myad níme Yesue ámbǵnlé ekud é menyáké áte bǵnkǵnhǵǵlǵnné ádab abé dé mbéb. Né-ǵǵ Yesue ambootéd bǵ akǵne áte,

²¹ áhóbě áá, "A-bad bé Korazin, ebǵǵn nyé ebébtéd! Ebǵǵn nyémpě ebébtéd á-bad bé Betsaida! Áyǵle nzé émbǵ bán, ndǵle é mekan éche Dyǵb ábélé áwǵn myad, mémbenléd ně á dyad á Tiré ne dyad á Sidǵn, né bǵnwǵá melebe se etún, bǵmwǵgtéd-te mbúmbú áyǵl álúmed nǵn bán, behǵǵlǵné ádab abé dé mbéb.

²² Mbále, nlǵnge nyé nǵn meé, á mbwe mé nkǵásé, nkǵáá níme bad bé Tiré ne bé Sidǵn mébǵ mwǵmpǵn tǵmaa nímǵn.

²³ Nyé bad bé Kapenahum ámpě, nyěwǵmtan bán, nyěmaá ape ádyǵb, boǵ bésudéd nyé kǵńjse ášé á dǵ-á-muú. Nzé menyáké níme Dyǵb ábélé áwǵn dyad mémbenléd á Sodom† né áde dyad ádii áde chii.

²⁴ Boǵ ne mbále nlǵnge nyé nǵn meé á mbwe mé nkǵásé Dyǵb délúméd ngǵl ne bad bé Sodom tǵmaa ne nyé."

*Yesue alébpě bad ad,
behǵyag áwě
(Luk 10.21-22)*

²⁵ Ene Pǵndé Yesue anhób áá, "A-Tě, Sǵngwéé á nkonǵ mí mín ne rí sé, nsǵngǵn nǵbǵ ne we, áyǵle elúmté mpǵn mí bǵndem mam níme ébǵǵné bad bé debyéé ne bad bé nsǵǵten.

²⁶ Ee, A-Tě, ně dǵn dǵó édáš weé ébenled."

²⁷ Dǵó ábádeé áá, "Echem Sǵn ebǵgé mekan méšyǵál áwem mekáá. Mod ké nhǵg eékonǵteé mwǵn abii ésebé Dyǵb Tité. Mod ké nhǵg-ke ámpě eebii'é ngǵne Tité ákǵjté abé ésebé mwǵn, ne kénzéé awě mwǵn ádáš áá mǵlúmed mǵ.

²⁸ "Nyéhyag áwǵm, nyé bad bésyǵál ábe nyékǵmé nted níme rídélé apém, mébǵe nyé nkǵme-áte.

²⁹ Nyékwǵntǵn áhíd nímém mekuu, nyéyǵgke-'e awǵm, áyǵle mpwiítédé, nchii-'e nlém á abum. Nyéhyag, nyéekud nkǵme-áte.

³⁰ Áyǵle áyǵged ádǵm déelǵléé áte, nted nímǵm-me méedelǵé."

* **11:12** E'wanǵe é' bad-te é'kume nímé nkamlen nzum kǵá nǵpag ne ewǵnge. † **11:23** Dyǵb démbǵbed dyad á Sodom áyǵle ebébtéd éche émbǵ áwed.

12

Atón dé Mbwe-mé-nkóme-áte
(Mak 2.23-28; Luk 6.1-5)

¹ Mwämpin mí pónde ámbíd e nê, Yesue ne ábē bembapee bétómé'áá á nzaa é ngun-tê.* Nén ábédé á mbwe-mé-nkóme-áte. Nzaa ewagáá ábē bembapee. Né-ós bēmbóotéd e'sóg é' ngun apád, bépáke', bédyág.

² Befarisia bényin nê, dōo bélāngēé Yesue bán, "Nóné', ábōn bembapee bébele dyam áde mbéndé éebagēé kunze ábel á mbwe-mé-nkóme-áte."[†]

³ Dōo Yesue átimtanné bō áá, "Nédé nyéeláá' é mbéd á kálag e Dyōb dyam áde kār Dabide ámbenlé áde nzaa ékóbé mō ne ábē bad-e?

⁴ Eténlédé nén bán, ansól á Ndáb-e-Dyōb mō ne bad ábe bēnwoón mō, bédyé e'wēle ábe é'bédé nde e Dyōb, ábe eched mbéndé éebagēé mod ké nhóg kunze ádyé. Ké bad ábe bēnwoón mō bēnkéntāngēnné adyé. Bepriše bēnpēn bōo bēntāngēn adyé.

⁵ Káa nyéeláá' é á mbéndé eche Mosee nén bán, mbwe-mé-nkóme-áte téé, bepriše bé Ndáb-e-Dyōb békweg mbéndé e mbwe-mé-nkóme-áte áyale nsón nīme bébeléé boŋ ké nê, nê déesaá mbéb á'sō é' Dyōb-e?

⁶ Nlānge nyé nén méé dyam áde hén bōob áde áde etógnén tómaa Ndáb-e-Dyōb.

⁷ Eténlédé ngāne Dyōb áhábé áá 'Chōm éche nīhednéé bad édíi nlem ní ngol saké ábe dé mende.' Nzé nyēnkon áben e'yale asōhtēn né nyéēhēlē-se nyéehagé bad bán, bédé bebelé bé mbéb áde bébeléé mbéb.

⁸ Nyébīi-ós nén bán Mwān-a-Moonyon awóo nkamlen kásīrne ámin e mbwe-mé-nkóme-áte."

Yesue achōhté mod
awé ekáá éwédé

(Mak 3.1-6; Luk 6.6-11)

⁹ Ambid e pónde, Yesue anhidé hē, áke asól á ndáb e mekáne.

¹⁰ Mod ábédé áhed awé ekáá éwédé. Bad behóg ábe bēhédé'áá Yesue awusé akōben, bēnsédéd mō bánken, "Eched mbéndé ebagé kunze ádid mod bwám á mbwe-mé-nkóme-áte-ye?"

¹¹ Dōo ásedtéé bō ááken, "Nyé ahéé nīmé mpōm mí mbód mēhūnnē á echóg-te á mbwe-mé-nkóme-áte boŋ eékag mō ahúd?

¹² Nzé nyéhele-se nyébél nē ne mbód ngēn, tógtēnnē moonyon awé áde etógnén tómaa mbód. Né-ós, mbéndé eesaá nén bán mod eébēlé bwám á mbwe-mé-nkóme-áte."

¹³ Dōo álāngēé ane mod awé ekáá énwēé áá, "Sálé ekáá áte." Asále áde ane mod ásanlé ekáá áte, ekáá éndyéé mō bwám ámpē néé échíníí.

¹⁴ Ade nén ábénlédé, Befarisia bēmbíd á ndáb e mekáne, bébootéd Yesue ahāge, áwúu mō.

Yesue, mbáledé awé Dyōb ápwédé

¹⁵ Yesue ambíí áá bēhāgke mō. Nē démbēl anhidé áde abwóg á hōm. Ade áhídté, ndun e mod anhidé mō, anchoód-te bad bé nkole bésyāal.

¹⁶ Boŋ ansím bō etúu áte áá bēlāngē bad nyaa e mod eche módíí.

¹⁷ Ambel nén álóned e'yale ábe Dyōb dénlōmēnnē nkál é'dáádāŋ Yesayaa áá,

¹⁸ "Nyēnōne', awēm mbáledé nén awé nīpwédé,

ndás mō nwógne-e mō menyīngē.

Mēlōm échēm edáádāŋ ébē ne mō.

Ábídéd mbakú eché etyéémé áftínté e bad ábe béesē bad bé Israel.

¹⁹ Eebeléé nswāŋ ne bad, éetōgé-'áá.

Béewóg-kaá mō ehób á dyad-tē.

²⁰ Eekógédté ngen echē enōgkē, éedíméd-tāá etrukāj éche éhēde adím.

Ábel nén kásīŋ né mbeltéd mí bwám mómó nítédé etál.

²¹ A díŋ áde dōo bad ábe béesē bad bé Israel bésūmmé nlem."

Bad bán Yesue abenlaad
ngīne eche Belzēbulé

(Mak 3.20-30; Luk 11.14-23)

²² Dōo bépééné mod wēe Yesue, awé ankwē ndím, ákwē-'e ebóbé áyale edáádāŋ é mbéb émbē mō áte. Yesue anchoód mō. Ambootéd anyīnen, áhōbē-'e akan.

* 12:1 Echē ngun ébédé nyaa e ngun eche bēbenléé e'wēle. † 12:2 Bad bēnkéntāngēnné nsón ábel á mbwe-mé-nkóme-áte. Ne Befarisia, apád áde bembapee bēpádé'áá ngun ébédéé néé ábel dé nsón.

²³ Ade bad bésyāal bényíné nê, yāl enkóm bós áte bwāmbwam. Bën ne bën bêmbootéd ahób nén bán, “Ehele-se ébé né anén mod adii mwān a mbyaa nîme Dabidê awê bésinê-yōō?”

²⁴ Bonj áde Befarisia bówógé nê, bénhōb bán, “Saá ngíne eche Belzebule awê akamlan e'daádaj bé mbéb chōo ábenlaadté ábided bad e'daádaj bé mbéb áte-ye?”

²⁵ Yesue ambíí nímāb mewémten, né-ōs, anlāá bós aá, “Alonj ké ahéé áde ákábne áte, bonj nchemten méésē, débēb. Dyad ké ahéé-ε, ké'ε abum á ndáb áde ákábne áte, bonj nchemten-ε méésē, déétyéémē.

²⁶ Né-ōs, nzé Satane awanne Satane, né awanne eche yāl. Chán-nō nímē nkamlen méhenlé atyéem?

²⁷ Nzé ngíne eche Belzebule chōo mbenladté ábided bad e'daádaj bé mbéb áte, né ngíne eche nzé-ε áben bad ábe bēbídte e'daádaj bé mbéb bēbenladté? Bën bōo békwid nyé nkāá.

²⁸ Bonj ngáne edíí nén bán ngíne e Edaádaj é Dyōb chōo mbenladté ábided bad e'daádaj bé mbéb áte, né álumte nén bán nkamlen ní Dyōb nípedé átfnté echēn.

²⁹ “Mod eéhēlē-se asól á ndáb e mod a ngíne se ádūm ábē bwēm ésebán asébpé mó ahanj. Amaa-áa mó ahanj bonj atéd ábē bwēm é'syāal.

³⁰ “Kéznéé awé éesē ne me, né atāngan me. Kéznéé-ε awé eewóngán me álad, né apāa páán.

³¹ Né-ōs, nlānge nyé mēé, Dyōb délagсэн bad mbéb ké ríhée nîme bēbélé ne nzyāj ké ehéé eche bésyāá Dyōb. Bonj kéznéé awé ahóbé e'bēbtéd é' mekan tāngene Edaádaj éche Esáá éekudté alagsen.

³² Dyōb délagсэн kéznéé awé ahóbé eyale é mbéb tāngene Mwān-a-Moonyonj, bonj déelagsenné kéznéé awé ahóbé eyale é mbéb tāngene Edaádaj éche Esáá, ken bōob ké'ε á póndé echē ehúé'.

A epum dōo bécheméé bwel

(Luk 6.43-45)

³³ “Nzé epum é' bwel ébōó, né bwel ábe é'chyáá échē epum bōmpé é'bōó. Nzé epum é bwel ébēbē, né bwel ábe é'chyáá échē epum bōmpé é'bēbē. Áyāle á epum dōo bécheméé bwel.

³⁴ Píí e nyō chén! Chán nyéheleé-se nyéhōb mekan mé mó bwām, áde nyé bën nyédíí mbéb? Mam nîme ríloné mod á nlém-tē, mó-áa mébide mó á nsal.

³⁵ Mod a bwām abele bwām áyāle é'bidé mó á nlém-tē wéé bwām é'kōnjédé. Mod a mbé-
pe abele mbéb áyāle mbídé mó á nlém-tē wéé mbéb ríkōnjédé.

³⁶ Nlānge nyé nén mēé, á mbwε nîme Dyōb dékaádté bad bé nkōjse, mod téé ábē nzōm echē enkānj bonj ahób ekúkú é eyale téé échē ámbídēdté á nsal.

³⁷ Né-ōs, kéchéé éche wénhōbpe chōo ékāj bonj ésūu nzōm káa ékwe nkāá.”

Béhédné Yesue e'chemléd

(Mak 8.11-12; Luk 11.29-32)

³⁸ Dōo donje dé bemeléede bé mbéndé ne Befarisia belāngéé Yesue nén bán “A-meléed, sēhēde nén bán élúmed sé e'chemléd ábe é'lumte nén bán ehojn ngíne ehúú ne Dyōb.”

³⁹ Yesue antímtén bós aá, “Echén ebébtéd é nyongel, nyééhēdēē Dyōb awógen, nyéhede-ε e'chemléd bé menyáké! Bonj nyéekudté nzése e'chemléd bé menyáké ábe nkal é'daádaj Jonaa.

⁴⁰ Jonaa ambé e'pun é'láán á abum á súu e mbáá-tē. Melemlem dōo Mwān-a-Moonyonj ábēé á ndōob-sé e'pun é'láán.

⁴¹ A mbwε mé nkāásé, bad bé Ninive bényemé á soj-tē nchoo ne enén nyongel e bad. Bétýéém mbōnj echē ékwid enén nyongel e bad nkāá, áyāle áde Jonaa ákánlé'áá bad bé Ninive eyale é Dyōb, bēntéde abel dé mbéb. Bonj mod adé hén bōob awé atómé Jonaa, bonj nyéwóglánné mó.

⁴² A mbwε mé nkāásé, mmwaád awé akamlánnaá alonj á Seba, ānyemé á soj-tē, nchoo ne nyongel e bad bé' chii, átyéém mbōnj echē ékwid bós nkāá. Békwe nkāá áyāle áde Solomoné áyágté'áá, ane mmwaád ambíd se nchabnede wéé nkōjse rísógé áhye dé awóglan mam mé debýéé nîme Solomoné áyágté'áá. Bonj chii nén mod adé hén awé atómé Solomoné.”

Nzé edaádaj é mbéb

éttmé mod á yāl ámpé

(Luk 11.24-26)

⁴³ Yesue ambád ahób aá, “Nzé edaádaj é mbéb ébídé mod áte, ébelé ébwāgē á ehyānge áhéd abwóg áde ékōmméé áte. Nzé éekude,

⁴⁴ ébelé éhōb aá, ‘Mēfīm ámbíd á ndáb eche mémbidté áte.’ Ape áde épagké ébelé étán néé chōmchōm éesáá á ndáb-te, néé ndáb éesáá áte ne néé benábpé-ε chō áte.

⁴⁵ Héε ékagké bōob, éke épēen e'daádaj bé mbéb bēmpēe saámbé ábe é'dé ebébtéd tōmaa mwēn, bonj é'hye é'sól ane mod áte, é'bwóg-ke e'dii áhéd. Enε póndé, ane mod abg ebébtéd tōmaa ngáne ánsēbēé ábē. Né-ōs, né dōo ébenlédte ne nyongel e ebébtéd e'chii.”

*Tumbé eche Yesue**(Mak 3.31-35; Luk 8.19-21)*

⁴⁶ Ade Yesue aláŋgeé bad nímén mekan, nyaá ne Yesue baányan bẽmpě bẽtyéém á ebwóg-te. Béhédé'áá Yesue ábel bon bɔ́ɔ́bɔ́ békál.

⁴⁷ Hẽ dɔ́o mod nhóg aláŋgeé Yesue áá nyaá ne baányan bẽpédé, bésine mó ebwóg-te, ákalen mó.‡

⁴⁸ Hẽe átímténé ane mod áá, “Nzée adé echẽm nyan, benzée-’e bédé bãnned?”

⁴⁹ Hẽ dɔ́o Yesue ányíitanné ábẽ bembapɛɛ ekáá bon áhɔ́bẽ áá, “Echẽm nyan ne bãnned bɔ́o bẽn!

⁵⁰ Kénzée awẽ abele mam níme awẽm Titée awẽ adé ámín áhedéé adíi mwánned abé-’e echẽm nyan.”

13*Ngan e mbál-e-bũ**(Mak 4.1-9; Luk 8.4-8)*

¹ Mmẽ mbwẽ mẽn ámbíd e nê, Yesue ámbíd á ndáb-te wée ámbẽẽ, áke ádyẽẽ ásẽ á nkin mé edib-é-nzab é Galília, áyáged bad.

² Bad ábẽ bẽmpě áhed bẽntómtɛn abuu áte. Nê dẽnkáŋ ansól á bɔ́le-té, ádyẽẽ ásẽ áyáged bɔ́. Ábẽ bad bésyáál bẽtyeem á nkin bẽwóglãn mó.

³ Abẽnládtaa ngan áyáged bɔ́ mekan híin. Ankalé bɔ́ ngan áá, “Nkwel-é-nzag nhóg ankẽ mbál asob á nzag-té.

⁴ Ade ásobéé mó nê, donge dénhũn á nzii-té, menɔn mẽmpě, mémad mó asómted.

⁵ Donge dénhũn á meláá-té wée ndoob énkẽmbuú’é áte. Enwámsen abíd ásẽ ngáne ndoob énkẽnchabpé ásẽ áhed.

⁶ Bon nê enyen é ngine épédé, ényháad ábẽ bwẽm é’wé-’e, áyále nkanj ménkẽnsónlé bɔ́ á ndoob-té bwám.

⁷ Mbál mẽmpɛɛ ménhũn wée mekód médíí. Née mekód mé mékwógé, mékánj akwog áde ábẽ bwẽm.

⁸ Bon donge dé mbál démpɛɛ dénhũn á ndoob e bwám. Mmẽn mbál mémbííd ásẽ bwám, ríchyáá-’e bwámbwam. Donge dé e’sóg dénwālẽ mbwókɛl é mbum, donge móom ntóób, ábíníí-’e móom meláán.”

⁹ Ade Yesue ámadé nê, ámbád áte áá, “Kénzée awẽ awóó metúu áwóge’.”

*Nzom echẽ ekáá bon Yesue**ábẽnlád ngan áyáged bad**(Mak 4.10-12; Luk 8.9-10)*

¹⁰ Ámbíd e nê, bembapɛɛ ábẽ Yesue bẽmpě mó benben bon bésɛdté mó bánken, “Cheé ekáá bon ébenláád ngan áyáged bad?”

¹¹ Yesue ankwentén bɔ́ áá, “Dyób ábágé nyé kunze ábíi kun é nkamlɛn mí mín, bon ene kunze eebagnedéé ne bad bẽmpɛɛ.

¹² Kénzée awẽ awóó nsóŋten ní kun é nkamlɛn mí mín, Dyób débád mó níme nsóŋten abe, ábel nèn átómtɛn awóŋ. Bon kénzée awẽ eewóó, Dyób dékobén mó ké mwá nsóŋten awẽ áwóó.

¹³ Nzom echẽ ekáá bon níkanlé bad ngan edíi áyále bényíne’, bon béecheméé, bẽwóge’, bon béésóŋtannẽ.

¹⁴ Nèn álónte e’yale ábẽ Dyób dénlómennẽ nkal é’dáádɔŋ Yesayaa áá, ‘Nyéewóg awóg-ne-awóg bon nyéésóŋtinnẽ, nyéenyín, anyín ne anyín bon nyéechemmé.

¹⁵ Nhóbe nèn áyále ábén bad béehelée dyam ayáge ámpɛ.

Békólé metúu, beláde-’e míd. Bẽwóóké, béenyín-naa dyamdyam.

Nzé énkẽmbé nê, né bényín, béchẽm-’e.

Né bẽwógɛn metúu, nlém nímb-’pɛ nísoŋten.

Nzé bẽbélé-’e nê, né bétímén me, né mẽchoód-te bɔ́.’ ”

¹⁶ Hẽe Yesue ábádeé ábẽ bembapɛɛ aláa áá, “Nsimé rídé ne nyé áyále nyényíne’ mam níme nyényínéé, nyéwógɛ-’e mam níme nyéwógɛé.

¹⁷ Ne mbále, nláŋge nyé nèn meé, bekal-bé-e’dáádɔŋ ne bad bé Dyób híin bẽnwanén ányín mekan níme nyényíné ne áwóg mekan níme nyéwógé bon bénkényinné, bénkẽnwóg-kaá.

*Yesue atógké ngan e nwén-é-mbál**(Mak 4.13-20; Luk 8.11-15)*

¹⁸ “Bɔ́ob-pɔ́ó nyésóŋten ngáne enén ngan e nwén-é-mbál edíí.

‡ 12:47 Donge á kálág dé e’só déewóó’é nímén nchoo.

¹⁹ Nzé mod awóge eyale tângene nkamlen ní mín, boŋ eesóŋtane ch́, Satane abelé áhye, ahúd mó ch́ á nlém-té. Echén ndín é bad édíi nêŋgáne mbál níme ríhúné á nzii-té.

²⁰ Mbál níme ménhūn á meláá-te rílúmte bad ábe békobe' eyale é Dyöb ne menyíŋge ábwōg-ábwōg áde b́wógé ch́.

²¹ Boŋ éché eyale ééwennāádté b́ á nlém-té. Bédúbpe ch́ á esóŋ é pónde boŋ nzé ndutul ne metake b́pédé áyale éché eyale, b́dol yál ámbíd.

²² Mbál níme ríhúné á mekód-te rílúmte bad ábe b́wóge eyale é Dyöb, boŋ kásŋ ne á asóg, mpúlé mé nkōŋsé ne adāŋ dé abud á bwēm awóŋ akán b́ nlém áte. Nê ábele', b́eheeléé ahāŋŋen ábel mam mé bwām.

²³ Mbál níme mō-ε méntān kase e ndōb rílúmte bad ábe b́wóge eyale é Dyöb boŋ b́esóŋtán-ne ch́. Abén bad b́ebele kase é mekan nêŋgáne e'sóg é' ngun ábe é'wánlé mesoŋgé mé mbum é ngun mbwōkel móom ntóób, ne móom meláán."

Ngan e mesisoŋ

²⁴ Yesue ankalé ene ndun e mod ngan empée aá, "Nkamlen ní mín rídé nêŋgáne mod awé awéné kunze é mbál áwé nzag-té,

²⁵ boŋ ámbíd e nê, nkuu nhóg áde bad b́emáá akún, mod a ekoyí awé ane mod nhóg, anké á nzag e ngun-té wé, awén mbál mé mesisoŋ

²⁶ Ade ngun ch́ ébóótédé akwog, d́o bad b́enyíné bán mesisoŋ mómpé mékwoge' áwéd-te.

²⁷ Bembalede ábe ane nwóo-nzag b́empé áwé, b́esédté mó bánken, 'A-Sán, éesáá mbále bán, mbál ní ngun ní bwām móo wénwénné á nzag-té-ye? Chán ébénlédé boŋ mesisoŋ mékwog áwéd-te?'

²⁸ D́o ákwentanné b́o aá, 'Mod a ekoyí awém nhóg mó awéné níme mesisoŋ.' Abé bembalede b́ensédédé mó bánken, 'Séke séhub mesisoŋ mé áse-ye?'

²⁹ Ankwentén b́o ámpé aá, 'Aáy. Nyééhúbé', áyale nzé nyéhóbé bán nyéhube', nyééhubén b́óbe ngun.

³⁰ Nyémwe ngun b́óbe mesisoŋ b́ekwoge' kásŋ ne áde pónde épeé eche b́pádté ch́. Ene pónde d́o meláá' é b́epád meé, b́esébe b́éhúd mesisoŋ, b́elad mó áte boŋ b́ehyáád mó. Ámbíd e nê, d́o b́pádté ngun, b́ebānē ch́ áwém etág-te.' "

Ngan e mbál-e-bū

(Mak 4.30-32; Luk 13.18-19)

³¹ Yesue ankalé ene ndun e mod ngan empée aá, "Nkamlen ní mín rídé nêŋgáne mbál-e-bū éché mod átédé boŋ awén áwé nzag-té.

³² Mbál-e-bū edé mwāmpín bwāmbwam nzé b́éhágténé ch́ ne mbál mémpée. Boŋ nzé ekwogé, ekale' tómaa mel mésad mésyāāl. Menon méhyag-ke mūm alóŋ á ngen-té."

Ngan e esulten

(Luk 13.20-21)

³³ Yesue ambé akālē b́o ngan empée aá, "Nkamlen ní mín rídé nêŋgáne esulten éche mmwaád ámuúnédé asii á pān é mbumé ní ngun éláán kásŋ esule."

Nzom eché ekáá boŋ Yesue

ábenláád ngan

(Mak 4.33-34)

³⁴ Yesue ab́enláádtáá ngan áyáged bad. Eeyágte'aá dyamdyam ésebán ab́enlédé ngan.

³⁵ Ambel nén álóned e'yale ábe nkal e'dáádāŋ ánhōbpē nén aá,

"Ḿēbenléd ngan nzé nhóbe wée bad. Ḿeyáged b́o mam níme b́enkémbíí' é bootya á mbooted mé nkōŋsé."

Yesue atógké ngan e mesisoŋ

³⁶ Yesue antédé ene ndun e mod, áke asól á ndáb-te. Áhed d́o ábē bembapeé b́etáné mó, boŋ b́elāŋgē mó bán, "Tógnéd sé ngan e mesisoŋ."

³⁷ Yesue antimtén b́o aá, "Mod awé anwén níme mbál ní bwām adii Mwān-a-Moonyoŋ.

³⁸ Nzag edii nkōŋsé. Mbál ní bwām rídii bad ábe b́édé áse e nkamlen ní Dyöb. Mesisoŋ médíi bad ábe Satane.

³⁹ Mod a ekoyí awé ane nwóo-nzag-ke, awé anwén mesisoŋ áwé nzag-té mó adé Satane. Pónde eche b́epádeé ngun ch́ edé asóg dé nkōŋsé. Bepád b́e ngun-ne b́edii ángel.

⁴⁰ Ngáne b́eladeé mesisoŋ áte boŋ b́ehyáád mó, melemlen nê d́o ébēē ne bad ábe Satane, nzé nkōŋsé nípédé á asóg.

⁴¹ Mwān-a-Moonyoŋ álōm éche ángel áhúd bad ábe b́ebelte bad b́empée mbéb, ne bad b́esyāāl ábe b́ebele mbéb.

⁴² B́ebwēm b́o á d́ú-á-muú, áhed-taá b́echyē'é'é, b́edyāg-ke mesoŋ á nsal.

⁴³ Ene pónde bad ábe bém̄bēl-le ngáne Dyōb áhedeé, bépené' née enyen á nkamlen wée echab Sán. Mod ké ahéé awé awóo metúu, áwóge'."

Ngan t̄ngene Nkamlen mí mín

Ngan e nhon níme mēnkoñné

⁴⁴ Yesue ambád ngan empée aá, "Nkamlen mí mín níde nēngáne nhon níme mēnkoñné á nzag-tē, boñ née mod nhóg ádíbté mós, akútén mós. Menyinge níme ámbēē mēnkāñ anke bwēm é'syāal ábe ánwoñgē asóm, ábel nēn áke áchan ene nzag.

Ngan e aláá dé etógnén

⁴⁵ "Nkamlen mí mín níde nhəgtén ámpē nēngáne mod a nyongé awé ahedé'áá meláá mé etógnén níme níde nkun bwāmbwam níme áchanéé.

⁴⁶ Anyín áde anyíné aláá áde átómténé aboñ bwāmbwam, áde bésóméé, anké ábē bwēm é'syāal asóm, áchān-ne dós."

Ngan e mbínzé

⁴⁷ Yesue ankál ngan empée aá, "Nkamlen mí mín níde nēngáne mbínzé eche bekób-bé-súu bébwémé á edib-te boñ bekób nyaa é súu ésyāal.

⁴⁸ Ade mbínzé émáá alón, bēndōl chó á nkin, bēdyēé áse ábon súu áte. Eche émbon adyé bēnhē chó á melongé-te. Eche chó-'é énkēmbon adyé, bēmpim.

⁴⁹ Né-ós enén ngan elúmté ngáne asóg dé nkōñsé débēē. Dyōb délōm eche ángel áhúd bad bé mbēb áttinté e bad ábe bésáa.

⁵⁰ Bēbwēm ábē bad á dū-á-muú. Ahed-taá béchyéé'é bēdyāg-ke meson á nsəl."

Ayáge dékōōlē ne dé nchun

⁵¹ Yesue ansedéd ábē bembapee ké bésóñténé nímén mam. Bēnkwentén mós bán bésóñténé.

⁵² Né-ós Yesue anláá bó aá, "Meléede a mbéndé ké ahéé awé ayággé t̄ngene nkamlen mí mín adii nēngáne nwóo-ndáb awé abídte bwēm bé ekóólé ne bé nchun wée ákonggéé bwēm."

Bad bé Nazarēt béekobéé Yesue

(Mak 6.1-6; Luk 4.16-30)

⁵³ Ade Yesue amáá ayáged ne ngan, anhidé áde abwóg á hóm,

⁵⁴ asú ámbid áwe dyad wée ámbídtē. Awed ayágté'áá bad á ndáb e mekáne. Bad ábe bēnwóg ngáne ayágté, yál enkóm bó áte bwāmbwam. Bésēdté bánken, "Héé múmó ákúde enén ndín e debyéé? Chán múmó ámwagké-'é nímén menyáké mésyāal ábel?

⁵⁵ Kíné saá mwán a kápéntaa ádíi-yé? Saá Maria ahyáá mó-yé? Kíné saá Jemse, Josebe, Simōne ne Judase bóó bédé baányan-é?

⁵⁶ Baányan bé bebaad bésyāal-le ámpē béedyéé'é á dyad-tē hén ne syānē-yé? Héé ákúde enén ndín e debyéé? Héé ákúde enén nyaa e ngine échē ábenléé nímé menyáké?"

⁵⁷ Né-ós, bēnkōó Yesue. Anláá bó aá, "Nkal e'dáádəñ awóo' edubé hóm ásyāal étóméé áwe dyad ne áwe túmbé."

⁵⁸ Ngáne bēnkēndúbéé Yesue, enkēmbenlé menyáké híin áhed.

14

Kwééd echē Jōne Nduzene

(Mak 6.14-29; Luk 9.7-9)

¹ Ene pónde Herōde awé akamlánnaá alon á Galilia anwóg mam níme Yesue ábélé'áá.

² Dóó álāngéé ábē bembēdeé aá, "Anén mod, Yesue, adii Jōne, Nduzene awé ammad awé boñ apuúde. Née ákás boñ awón ngine ábel nímén menyáké mésyāal."

³ Herōde anhób né áyale anlóm bad aá bekób Jōne, béhan mós, béhé-'é mós á mbwog. Ambel nén áyale mwaád, Herodyase, awé mwānyan Filibe ánsēbēē awón.

⁴ Herōde anhē Jōne, Nduzene á mbwog áyale Jōne anláá mós nén aá, "Weewóó'é kunze áwón Herodyase, mmwaád awé mwānyon."

⁵ Kénéé Herōde áhéde'áá Jōne, Nduzene awúu, abédé mbwóg ne bad bé Israel. Bad bé Israel bēndúbē bán Jōne adii nkal é'dáádəñ.

⁶ Boñ Herōde antim Jōne awúu. Nén dēmbenléé epun-éé Herōde ábélé'áá ngande áwēmtēn epun-éé áchyáádtē. Echē epun mwán-a-mmwaád awé Herodyase anság esáke á'só é' bad bésyāal. Nén dénwógēd Herōde menyinge bwāmbwam.

⁷ Nén dēmbēl ambe mós akag. Anhób nén aá, "Mmwág melē nén, mēbē wē kéchéé éche éhedeé."

⁸ Nyaa anláá mós chóm eche átāngéné saá aheden. Né-ós anláá Herōde aá, "Bāg me nló níme Jōne, Nduzene á taplēt-te hén bóob."

⁹ Nén dénwōgēd k̄n̄ Herode ndutul boŋ ngáne ámmadté melē amwé á'sō wée abē beken, ambéé kunze aá béhyene nló nime ɔne ábe ane mwān-a-mmwaád.

¹⁰ Né-ò anlóm bad á ndáb e mbwōg ásél ɔne nló.

¹¹ Bēmpēn nló níméd á taplēt-te, bēbē ane mwān-a-mmwaád, mó-'e ábe nyaa.

¹² Ámbíd e nē bembapēe ábe ɔne bēnkē á ndáb e mbwōg bētéd mó ndim béke bélime, boŋ béke bēlāngē Yesue dyam áde ábénlédé.

Yesue adidté ndun e mod

(Mak 6.30-44; Luk 9.10-17; ɔn 6.1-14)

¹³ Ade Yesue áwógé dyam áde ábénlédé ne ɔne, ansól á b̄le-tē áke á abwōg á hōm wée ábéd mwēmpēn. Boŋ áde bad bēwógé bán Yesue amaá ake á b̄le-tē, bēnchené nímāb myad bēkēn mekuu áhíd mó ámbíd.

¹⁴ Ade Yesue ábídé á b̄le-tē, boŋ anyín ndun e mod, antómtén bó ngol abé, ámād-te bó nkole.

¹⁵ Ade b̄n é'bóótédé ahín, abē bembapēe bēmpē áwē, bēhābē nēn bán, “Hén adé á etūn-tē, pónde emaa-'e atóm bwāmbwam. Láá ábén bad bētime' á myad-té nime méde bēnben, ábel béchan ndyééd eche bēdyē.”

¹⁶ Dóo Yesue átímtanné bó aá, “Bētāngeneé ake. Nyébó nyébe bó chōm éche bēdyē.”

¹⁷ Dóo bēhābē bán, “Sēwóó e'wale é'táan ne súu ébe chēmpēn.” ¹⁸ Yesue aá, “Nyéhyene'.”

¹⁹ Ade abē bembapēe bēpēnédé mó ch̄, anláá ene ndun e mod aá bēdyēe asē á nkāákā m̄n. Hē dóo Yesue awánlé abē e'wale é'táan ne éché súu ébe á mekáá boŋ ánōné ám̄n ásāgnān Dyōb. Ankabtéd bó áte, boŋ ábagé abē bembapēe aá békabe ene ndun e mod.

²⁰ Bad bēsyāal bēndyē ene ndyééd békód, élyāg-ke asē. Néé bēládé éché elyāgé asē, enlón e'lōŋ dyóm ne é'be.

²¹ Mesōngé mé bad nime méndyē ene ndyééd mémbē ké e'kálé é'táan. Mmē mesōngé mé bad mébédé-e baachóm. Bēnkētōngé bebaád ne bēndem.

Yesue akit á mendib-m̄n

(Mak 6.45-52; ɔn 6.15-21)

²² Ámbíd e nē, Yesue anláá abē bembapēe aá, bés̄l á b̄le-tē, békag á'sō á múde mé edib-é-nzab n̄m̄n̄í, boŋ álāngē-'e ene ndun e mod aá bés̄ū' áwab mendáb.

²³ Ade moosyāal ámáá ake, Yesue anchágé á ekone m̄n ákáne. Ade ehíntén emáá akwe, ambé abé áhed mwēmpēn.

²⁴ Enén pónde Yesue abē bembapēe bēnchab b̄le abēene áfíntē e edib-é-nzab. B̄le étágé'áá, bēhele'áá ake á'sō áyāle epub é ngine émbíd bó á'sō-te.

²⁵ Epōg é mbwēmbwē Yesue ankē á mendib m̄n atán bó.

²⁶ Ade bembapēe bényíné mod akag á mendib m̄n, bēnāñné, bēlélé-'e esaád ne mbwōg rí ngine, bēhābē-'e nēn bán, “Nwú móo rídé.”

²⁷ Abwāg-ábwōg Yesue anláá bó aá, “Nlém méēhūnē nyé, me-éé ndé. Nyéebáá'.”

²⁸ Dóo Petro álāngéé mó aá, “A-Sāj, nzé édé bán mmōn-éé édé, láá me n̄ke á mendib m̄n n̄pe wée édíí nē.”

²⁹ Yesue anláá mó aá, “Hyāg.” Dóo Petro ábídé á b̄le-tē ábootéd-te ake á mendib-m̄n āpe wée Yesue.

³⁰ Boŋ áde anyíné ngáne epub é ngine étóméé, mbwōg ménkōb mó, ábootéd-te asú asē á mendib-te. Dóo áléppé esaád aá, “A-Sāj sōn, wōŋgēn me!”

³¹ Melemlem mé pónde Yesue ansād ekáá, acháá-'e mó, áhābē aá, “Chán adúbe ádíí we mwāmp̄n nēn, cheé ékás boŋ nlém r̄hūnē wē?”

³² Néé Yesue bó Petro bés̄ólé á b̄le-tē, epub énsōg atóm.

³³ Ade nēn ábénlédé, ábíníí bembapēe ábe bēmbē á b̄le-tē bēmbēé Yesue edúbé, bēhābē-'e nēn bán, “Ne mbále, edíí Mwān a Dyōb.”

³⁴ Néé bēchāppé edib-é-nzab, bēmpē á múde n̄m̄n̄í, á mbwōg e Genesarēt.

³⁵ Ade bad ábe bēmbē áde abwōg á hōm bēchémé Yesue, bēnlóm bad bán bēpēen bad bé nkole bēsyāal ábe bēbédé ene ped e alon.

³⁶ Bad ábe bēmpēn bad bé nkole wée Yesue bēchāŋ mó bán ámwē bad bé nkole bēsítēn ké mesó mé mbóté n̄m̄. Né-ò bad bé nkole bēsyāal ábe bēnsítēn n̄ime mesó mé mbóté bēndyēé bwām.

15

Ayāged á bad bé' b̄s̄ád

(Mak 7.1-13)

¹ Ámbíd e nē Befarisia ne bemeléede bé mbéndé bēmbíd á Jerusalem, bētān Yesue, bēsēdté mó bánken,

² “Cheé ekásá bonj ábōnj bembapεε béēhídē’ ayáge áde ábēd betaa bétēdnédé sé? Béewobpéé mekáá nyaa eché éhédnεé bonj bédyε ndyééd.”

³ Yesuε ankwen-tén bó aá, “Cheé ekásá bonj nyémpē nyéehídē’ ngáne mbéndé e Dyōb éhóβεé aá débél, á etútú éche nyéhídεé ayáge áden dēn?”

⁴ Dyōb áhóβεé aá, “Béé sóó ne nyon edúbé.’ Ahóβ-pe ámpē aá, ‘Kénzée awé ahóβεé sáá ké’ε nyaa dyam dé mbéb áyál bétāngéné bēwúú mós.’

⁵ Bonj nyé, nyéyágte nén bán, nzé mod awóó chōm éche ántāngēnē sáá ké’ε nyaa awōngēn bonj alāngé bó aá mósβε Dyōb chós,

⁶ né éesaá nén bán atāngéné sáá bó nyanj* chós edúbé abεen. Abel áde mod ábélé nē, né nyéetédéé eyale é Dyōb nēε dyam á etútú éche nyéhídεé ayáge áden.

⁷ Nyé bedog-badé! Nkal é’daódaη Yesayaa antāngēn áde ánhóβpē ne e’yale ábe Dyōb dénlōmānnē mós tāngene nyé aá,

⁸ ‘Abēn bad bébage mε edúbé é nsəl ngēn, bonj nímbab nlém méesaá áwēm.

⁹ Edúbé éche bébageé mε éesaá dyamdyam, áyāle báyágte bad áhíd mbéndé é baányon byánán édíi mbéndé é Dyōb.”

*Mam nime mébele bonj
mod eesáá’ á’só é’ Dyōb
(Mak 7.14-23)*

¹⁰ Héε Yesuε áchēnleé ene ndun e mod bonj alāngē bó aá, “Nyéwōglēn, nyésōntēn-nε mε!

¹¹ Saké chōm éche ékag mod á nsəl ébele bonj mod eesáá’ á’só é’ Dyōb, bonj chōm éche ébídé mós á nsəl chós ébele’ bonj eesáá.”

¹² Ade áhóβεé nē, dós abē bembapεε bépédé mós benben bonj bésēdté mós bánken, “Ebíi nén wεé dyam áde mósóβεé ábēbté Befarisia nlém á abum-ε?”

¹³ Yesuε ankwen-tén bó aá, “Bwél téé ábe áwēm Titée awé adé ámūn éewénéé, béhūb bó áse.”

¹⁴ Nyéche ne bó. Bédíi bad bé ndím ábe bēlūmte bad bé ndím bēmpée nzii. Nzé mod awé akwedé ndím atómne mod a ndím ampée, búmō béhūn á echóg-te.

¹⁵ Petro anláá mós aá, “Tógnéd sé enén ngan.”

¹⁶ Héε Yesuε alāngéé bó aá, “Kásā ne’ bōob, ké nyémpē nyéésōntēnēé-yε?”

¹⁷ Nyéenyínéé nén bán, chōm ké ehéé éche mod ádyédé, éésóléé mós á nsəl, étím á abum-té, bonj ébídé mós á yāl-ε?

¹⁸ Bonj mam nime mod áhóβεé mbídé mós se á nlém-tē. Mmén mam mós’ aá mébele mod bonj eesáá’ á’só é’ Dyōb.

¹⁹ Ayāle á nlém-tē dós mewēmten mé mbéb méhúé’ é nime mékəə bonj ábélé mam mé mbéb nēngáne, ewūen, akáb dé mesón á ndáb e e’wōngé, echīb, abíd á mbóη é metóm, ne mehóben á mbíd.

²⁰ Mmén mam mós mébele bonj mod eesáá’ á’só Dyōb. Bonj saké adyé á ndyééd áde éewobpéé mekáá ngáne béhédeé, débél bonj eesáá.”

*Adúbe áde mmwaád a Kanahan
(Mak 7.24-30)*

²¹ Ámbíd e pónéd, Yesuε anhidé adé abwóg á hōm átm á ped e mbwóg eché enchiitēn myad mé Tirε ne Sidon.

²² Hé dós mmwaád a Kana nhóg awé adyéé’ áá adē abwóg á hōm ápééné awé áwé bonj áhóβεé nén aá “A-Sán, Mwán a mbyaa nime Dabide, sōn wóg mε ngól! Awem mwán a mmwaád atage bwāmbwam, áyāle edáódaη é mbéb édé mós áte.”

²³ Bonj Yesuε ekéntimtēnné mós dyamdyam. Hé dós abē bembapεε bétánéé mós, bonj bécháā mós nén bán “Láá anén mmwaád wεé ákag áyāle ahídne syánē ntogag ámbíd.”

²⁴ Dós Yesuε ákwentanné bó aá, “Bad bé Israel ábe bédé néε rídyonj m mbóđ nime mbós bóó Dyōb álómé mε awōngēn.”

²⁵ Néε ane mmwaád áwógé nē, ankwε Yesuε á mekuu, bonj ácháā mós aá, “A-Sán, wōngēn mε.”

²⁶ Dós Yesuε ákwentanné aá, “Eesaá bwām átéd ndyééd e bánbán bonj ebwémé mbwéé.”

²⁷ Dós ane mmwaád átimtanné mós aá, “Nē dēn A-Sán, bonj kásāne mbwé édyág píuted é medyé éche ábab bésáá béhúnté.”

²⁸ Hé dós Yesuε ákwentanné mós aá, “A-mwán-a-mmwaád, ewóó adúbe ámbáá. Ebenled ngáne éhédeé.” Melemlem mé pónéd, ane mmwaád awe mwán-a-mmwaád andyééé bwām.

Yesuε achōjté ndun e mod

²⁹ Yesuε anhidé adē abwóg á hōm, ápōη á nkəg mé edib-é-nzab é Galilia. Ankε adyéε áse á ekone mfn.

* 15:6 *Sad bó nyanj*; donje á kálag dé e’só déewóó’ é bó nyanj.

³⁰ Ndun e mod empɛ áwɛ. Bépééné'áá bad ábe bésyágté'áá, ábe bɛnkɔwɛ ndim, ábe mekuu ménwɛɛ, e'bóbé ne ekud é bad bé nkole bémpɛe. Bébánné'áá ábɛ bad bésyáál á'só wɛɛ Yesue, áchōōd-te bō.

³¹ Menyáké ménkōb ene ndun e mod áde bényíné nɛɛ bad ábe bééhōbe'áá akan nɛɛ béhōbɛé akan. Abe mekuu ménwɛɛ béntyɛm bwám, ábe bésyágté'áá békag bwám. Abe bɛnkɔwɛ ndim bényinne'. Békéné Dyōb á bad bé Israel.

*Yesue addité ndun e mod
(Mak 8.1-10)*

³² Yesue anchélé ábɛ bembapɛɛ, álǎngɛ bō nɛn áá, “Ndé enén ndun e mod ngol áyále békébɛ ne mɛ e'pun é'láán, béewóo-áa chōm éche bédyákɛ bōob. Meehédɛɛ mɛɛ béhíde hén ne nzaa, áyále béhele sɛ béhún ásɛ á nzii.”

³³ Dóo ábɛ bembapɛɛ bɛ bésɛdteɛ mō nɛn bán, “Héé syánɛ dákudté ndyééd á ehyánge-té hén eché ékwóg enén ndun e mod?”

³⁴ Yesue ansɛdéd bō aáken, “E'wɛle é'táj nyéwóó?” Bɛnkɔwɛntén bán, “E'wɛle saámbé ne nguse é sūu ésad.”

³⁵ Dóo Yesue álǎngɛ ene ndun e mod áá bédyɛɛ ásɛ á ndōob-té.

³⁶ Héé átédé ábɛ e'wɛle saámbé ne échɛ sūu, áságnán Dyōb, ákabtáád bō áte, ábagé ábɛ bembapɛɛ, bō-ɛ békabpɛ ene ndun e mod.

³⁷ Bad bésyáál béndyɛ ene ndyééd, békód-te, káŋh élyāg-ke ásɛ. Echɛ enlyāg ásɛ enlón e'lón saámbé.

³⁸ Mesongé mé bad nime méndyɛ ene ndyééd mébédé e'kálé é'niin. Mmɛ mesongé mé bad mébédɛ baachóm, bɛnkɛntóngɛ bebaád ne bɛndem.

³⁹ Héé Yesue álǎngɛɛ ene ndun e mod áá bésūɛ' áwab mendáb. Ade ámáá bō aláa nɛ, ansól á bōle-té, áke á mbwóg e Magadan.

16

*Béhédné Yesue
e'chemléd é' menyáké*

(Mak 8.11-13; Luk 12.54-56)

¹ Ambíd e nɛ, Befarisia ne Besadusia bɛnkɛ wɛɛ Yesue ákag mō. Bɛnlāá mō bán álúmed bō e'chemléd ábe é'húu ádyōb.

² Dóo Yesue álǎngɛɛ bō áá, “Nzé ngukél epedé, nyéhōbe bán, ‘Abobe áyage ámín, nɛ álúmte bán bín béboŋ chǎn.’

³ Nzé bín é'sáŋgɛ-ɛ, nyéhōbe bán, ‘Abobe áyage ámín, bín-ne é'wábpɛ, nɛ álúmte bán mbúú échǎ.’ Nyébiɛ' bín aláŋ ámín, ngáne bɛbɛɛ, boŋ nyéhɛhɛɛ mam nime mébenlad chii achem.*

⁴ Echén ebébtéd é nyongɛl, nyéhɛhɛɛ Dyōb awógɛn, nyéhɛde-ɛ e'chemléd bé menyáké! Boŋ nyéekudté nzése e'chemléd bé menyáké ábe nkal é'dáđáŋ Jonaa bɛnɛn.” Dóo átédé bō, boŋ ákag.

*Esultɛn éche Befarisia ne Besadusia
(Mak 8.14-21)*

⁵ Yesue ne ábɛ bembapɛɛ bɛnchabé edib é nzab ámín, boŋ bembapɛɛ bɛnchatén e'wɛle awále áyál.

⁶ Yesue anláá bō áá, “Nyétéd pónéd ne esultɛn éche Befarisia ne Besadusia.”

⁷ Héé ábɛ bembapɛɛ bɛn ne bɛn bébóótédé ahōb bán, “Ahóbé nɛ áyále syáá deewánléɛ e'wɛle áyál.”

⁸ Yesue ambíí chōm-ɛɛ békálé. Dóo ásɛdteɛ bō ááken, “Cheé nyé bɛn ne bɛn nyéhōbɛ áyále e'wɛle ábe nyéewōó'ɛ? Chán adúbe ádíí nyé mwámpín nɛn?”

⁹ Káŋh ne' bōob, nyéésóŋtɛné-ɛ? Nyémaa achatɛn ngáne méndíɛɛ e'kálé e' bad é'táan ne e'wɛle é'táan. Ambíd echɛ bémáá ene ndyééd adyé, e'lón é'táj echɛ enlyāg ásɛ enlōnnɛ?

¹⁰ Nyéchátɛné káŋh ne adíde áde méndíɛɛ e'kálé é' bad é'niin ne e'wɛle saámbé. Ambíd echɛ bōmpɛ bémáá adyé, echɛ enlyāg ásɛ chō-ɛ enlón e'lón é'táj?

¹¹ Ade ílǎngɛ nyé mɛɛ nyétédɛn esultɛn pónéd, saké ewɛle chɛn chōo íhōbɛ'áá. Nyétéd pónéd ne esultɛn é Befarisia ne Besadusia.”

¹² Dóo bembapɛɛ bétímé asóŋtɛn bán saké esultɛn éche bébenléɛ ewɛle chōo Yesue ahóbé'áá áá bétédɛn pónéd boŋ ayáged áde Befarisia ne Besadusia báyágté'áá dōo ákóŋtɛ'áá ahōb.

* 16:3 Donje á kálag dééwóó'ɛ e'yale ábɛ Yesue ngáne é'ténlédé á nchoo 2 ne 3.

*Petro aá Yesue mō
adé Ane-awē-Béwógté*

(Mak 8.27-30; Luk 9.18-21)

¹³ Yesue anké á mbwóg e Kaisaria Filipi. Ade ápédé áwed, dáo ásedtée ábē bembapee aaken, “Nzé-módé bad bō béhóbeé bán Mwän-a-Moonyonj adé?”

¹⁴ Béntimtén mō bán, “Donje á bad béhóbe bán edii Jone Ndusene, bémpée bán Elaijaa, ábííí-’e bán Jeremayaa ké’ e nkál é’ dáádānj nhóg ampée.”

¹⁵ Hée Yesue ásedtée bō aaken, “Bonj nyébēn-ne, nzé-módé nyéhóbeé bán ndé?”

¹⁶ Simōn Petro ankwentén aá, “Wē-éé edé Ane-awē-Béwógté, Mwän a Dyōb áde adé á alongé.”

¹⁷ Yesue antimtén aá, “Nnam ndé ne wē, a-Simōn, mwän awē Jonaa. Saké moonyonj álánjé wē nē, bonj echem Sáj awē adé ámín mōo ahóbté wē.

¹⁸ Né-óó a-Petro nlánje wē,† wéé edé ndim-e-aláá. Ámín e ene ndim e aláá dáo mélōngē nímēm mwembé. Ké ngine e kwééd éehnlé nímé mwembé ahóbed áse.

¹⁹ Awōnj dáo mébéé mekii mé nkamlen ní mín. Kéchéé éche ébéné á nkōjsé, né ébénndéé ámín. Kéchéé-’e éche ébágé kunze a nkōjsé, né ébágnédé kunze ámín.”

*Yesue ahóbé tǎngene
nīmē metake ne eché kwééd*

(Mak 8.31-9.1; Luk 9.22-27)

²⁰ Hée Yesue ásííméé ábē bembapee etúu áte nén bééhōbē bán mōo módé Ane-awē-Béwógté.

²¹ Bootya ene pónndé, Yesue ambootéd ábē bembapee alúmed áte aá móǎngēnē áke á Jerusalem. Awed-táá mókudté metake híin á mekáá mé bad bémbáá, beprise bémbáá ne bemeléede bé mbéndé. Aá béwūú mō, bonj e’pun ábe é’lónnténé é’lálán móspuú.

²² Dáo Petro átimné Yesue á nkæg bonj ákægé átimed mō áte, áhōbē nén aá, “A-Sáj, Dyōb déekwenténné mbéd aá nén ábenled ne wē.”

²³ Hée Yesue ákúnnédé bonj áhōbē wéé Petro aá “Hidé me á’sō-te, a-Satan! Cheé ékásé me ábel mewémten mé Dyōb? Ehóbe né ne mewémten mé moonyonj saké mé Dyōb.”

²⁴ Dáo Yesue álánjéé ábē bembapee aá, “Kénzéé awé awémténé me ahíd, atǎngéne ásob yǎl mendíb, ápēm adé awog, bonj áhíde me.

²⁵ Ayále kénzéé awé ahéde adé alongé ason, ábōd dó. Kénzéé-’e awé ábōd adé alongé ayál echēm, ákud dó.

²⁶ Nsyáj ríhéé mod ákudté nzé akudé nkōjsé rísyāal bonj abódé adé alongé? Ké-’e, cheé mod áhelese ábe ákōde adé alongé?

²⁷ Nlánje nyé nímén mekan ayále Mwän-a-Moonyonj ápē ne ehúmé éche eche Sáj nchoo ne éche ángel. Ene pónndé dáo ákōgsēnné ké’ e ánamédte kénzéé tǎngene chóm éche ámbnlé.

²⁸ Ne mbále nlánje nyé nén mēé donje á bad áfínté echēn béenyínénné kwééd díd ésebán bényíne néé Mwän-a-Moonyonj ápééné nímé nkamlen á nkōjsé.”

17

Yǎl ehǎjéné Yesue

(Mak 9.2-13; Luk 9.28-36)

¹ Ámbid e epun ntóób Yesue ankeén Petro ne Jemse bō mwányanj Jone á mbōod eché echabé ámín. Bēnpēn-éé bémbē áhed.

² Dáo ábē bembapee bényíne néé ahǎjéné, e’só é’pēné mō á nló nēngáne enyen. Mbóte chō-’e épūbē mō féréd émwaá-’e áte.

³ Ábwōg-ábwōg, ábē bembapee bényín néé Mosee ne Elaijaa bébídeé tǎléd, bōobe Yesue békale’.

⁴ Dáo Petro álánjéé Yesue aá, “A-Sáj, ébóó ngáne syáá dédíí hén. Nzé edáá, mélōnj e’bem é’lálán, échōnj, éche Mosee ne éche Elaijaa.”

⁵ Éepedéé ké amad á nsal bonj mbag eché ekine áte ékūtán bō. Hée béwógéé ehób ébide á mbag-té nén, “Awem Mwän a nlém nén, awógte me menyínje. Nyéwógne mō.”

⁶ Ade ábē bembapee béwógéé éché ehób, bémbwōg mebóbōnj, bēsōnj-’e e’só áse ne mbwóg rí ngine.

⁷ Dáo Yesue ápédé wéé bémbēé bonj ábānē bō ekáá á yǎl, áhōbē aá, “Nyéhíde áse, nyéebáá’.”

⁸ Ade bényéne nló ámín, bényín Yesue mwēnpēn.

⁹ Ade bǎbōo bésudeé á mbōod mín nē, dáo Yesue ásííméé bō etúu áte ahóbe’ aá, “Nyéelánjé modmod dyamdyam áde nyényíné kááj ne á pónndé eché Dyōb dépuúdté Mwän-a-Moonyonj á kwééd.”

¹⁰ Hée ábē bembapee bésedtéé mō bánken, “Cheé ekásá bonj bemeléede bé mbéndé béhóbē nén bán Elaijaa atǎngéne asébe dé ape bonj Ane-awē-Béwógté ápē?”

† 16:18 **Petro:** á ehšb é Grikia adii ndim e aláá.

11 Yesue antimtén bó aá, “Ne mbále, Elaijaa atáŋgéné asébe dé ape, atíi-é mam mésyāā.

12 Bonj nlánge nyé nén meé Elaijaa ammad ape, bonj bad bénkénchemmé mó, bēmbēl-le mó ngáne bēndanjé. Melemlem né-’aá Mwān-a-Moonyonj átagké áwab mekáá.”

13 Enén pónédé dóo ábē bembapee bésōŋtēnnē nén bán Jonē, Ndušene móo áhóbeé.

*Yesue achōŋtē mwān a mwēnchóm
awē edāádāŋ é mbéb émbēē áte
(Mak 9.14-29; Luk 9.37-43a)*

14 Ade Yesue ne ábē bembapee bétimé ámbíd ámpē bonj bétān ndun e mod, mod nhóg ampē áwē, akóg mebóbónj, bonj áhōbē nén aá,

15 “A-Sāŋ sōn, wóg awem mwān ngol. Awem mwān a mwēnchóm akonle nkole mé ekikíd, atage bwāmbwam. Ayógké ahún káōŋ ne á muú-te ne á mendíi-te.

16 Mempoēn mó wēē ábōŋ bembapee, bonj béehelēé mó achool.”

17 Dóo Yesue átimtanné aá, “Wáá! Nyé bad bé’ chíi, mbeltéd nímēn méétyeeméé, nyéewóo-’áa adúbe. Chán mépēé nyé adyen hén-ēē? Chán mépēé nyé awesen-ē? Hyenáád me mwān awed hén.”

18 Dóo Yesue ákamlanné edāádāŋ é mbéb éche étágté’áa ane mwān aá ébíd, bonj ébíd-te. Ábwōg-ábwōg ane mwān áchōŋ-’e.

19 Ámbíd e pónédé bembapee ábe Yesue béntān mó, bonj bésēdté mó á kun-té nén bánken, “Cheé ěnkāŋ bonj sēnkēnhēl éché edāádāŋ é mbéb abided?”

20 Dóo Yesue átimtanné bó aá, “Ayāle adúbe ádé nyé mwāmpín. Ne mbále nlánge nyé nén meé, nzé nyéwóo adúbe áde ádé mwāmpín nēngáne mbál-e-bū, né nyéekamlén échén ekone bán éhide hén, étim hínií, étm-me nē dēn. Dyam ké ahóg déetómmé nyé áte.

21 Nyēhele-se nyēbídéd enén ndín e edāádāŋ é mbéb nzé nyékānne, nyédidé-’e yāl nzaa á mekáne-tē.”*

*Yesue ahóbé ámpē
ngáne bad béwūū’é mó*

(Mak 9.30-32; Luk 9.43b-45)

22 Yesue ne ábē bembapee bēnladén áte hóm ahóg á mbwóg e Galilia. Héé álanjéé bó aá, “Bébeé Mwān-a-Moonyonj á mekáá mé baányonj. Bó-’aá béwūū mó.

23 Bonj Dyōb dépuúd mó ámbíd e e’pun é’láán.” Ade bembapee béwógé nē, bēnwōg ndutul bwāmbwam.

Yesue asaŋgé tááse e Ndáb-e-Dyōb

24 Yesue ne ábē bembapee bēmpē á dyad á Kapenahum. Ahed dóo bad ábe bésāŋtē’áá tááse e Ndáb-e-Dyōb bétānē Petro bonj bésēdté mó bánken, “Kíné awen meléede eesāŋgéé tááse e Ndáb-e-Dyōb-e?”

25 Petro antimtén bó aá, “Asaŋge’.” Ade Petro ásólé á ndáb sólén, eepedeé dyam ahób bonj Yesue ásedtē mó aá, “A-Simōn, chán ényíné ádén akan? Benzébadé kāŋ é nkōŋsé ésaŋtēé e’saŋgé ké’ē tááse? Bán bé alonj-’e, ngé beken?”†

26 Petro ákwētén aá, “Beken.” Yesue aá, “Nē álúmte nén bán, bán bé alonj béetāŋgenéé asaa.

27 Bonj ké nē, ábel nén deélinjé ábē bad ábe bésāŋtē tááse, ké ébwēm e’chōb á edib-é-nzab-tē. Súu eche wēsēbēē akób, énedé chó nsal áte, wētān mōné níme mékwog sóo tááse asaŋjed áwēd-te. Téd mó, ésaŋjed sóo.”

18

*Nzéé atómténé mod ambáá
abé d’só é’ Dyōb?*

(Mak 9.33-37; Luk 9.46-48)

1 Eebeméé áte ámbíd e nē, bembapee ábe Yesue bēmpē áwē, bésēdéd mó bánken, “Nzé-módé-’e atómténé mod ambáá abé á nkamlén mí mín?”

2 Hē dóo Yesue áchénlé mwēndem nhóg, áftídé mó áwab ftnté,

3 bonj áhōb aá, “Ne mbále nlánge nyé nén meé ésebān mod ahāŋléné ádé alonjé bonj abé nēngáne anén mwān, eéhēlēē-se asól á nkamlén mí mín.

4 Né-’ó, kēnzéé awē asúdté yāl nēngáne anén mwān né móo atómténé mod ambáá abé áftnté e bad ábe bédé áse e nkamlén mí mín.

5 Kēnzéé awē akobé enén ndín e mwān á đín ádēm, né akobé me.

* 17:21 Donge á kálag dé e’só déewóó’ē nímēn nchoo. † 17:25 Ene pónédé beken bóo bésāŋgé’áá tááse é kāŋ.

⁶ Boŋ kenzéé awě abělté enén ndín e mwëndem awě adúbpé me mbéb, émbē mboŋ né bēntáé ene ndín e mod sánkalaa a aláá á nkǎŋ, boŋ béhúnéd-te mó wée edib é nkwe étómténé achab ásē.

⁷ E'beb é' yál áte ne nkǎŋsé áyale mekǎgsen níme mébelte bad mbéb. Mekǎgsen métǎŋgéné ape, boŋ e'beb é' yál áte ne mod awě abělté mod ampée mbéb.

⁸ Nzé échoŋ ekáá ké'ε ekuu ébelte we mbéb, esél chǎ, épim. Edé mboŋ we ákud alongé ne eped é yál tómaa we áwǎŋ mekáá mébe ké'ε mekuu mébe boŋ bébwém we á muú níme méédímé'.

⁹ Melemlem nzé ádoŋ díd ábelte we mbéb, ehúd dǎ, épim. Edé mboŋ we ákud alongé ne díd ahóg tómaa we áwǎŋ mǐd mébe boŋ bébwém we á dū-á-muú.

Ngan e ndyoyŋ ní mbód níme mémbǎo
(Luk 15.3-7)

¹⁰ "Nyényín nén bán nyéetédéé nímén mpín ní bán ké nhóg nkǎŋtéd, bán méesaá etógnén. Nlǎnge nyé nén meé ángel éche énoné' bǎ ébág á'sǎ ábe echem Sǎŋ awě adé ámín áhǎbe bǎ.*

¹² Chán nyényíné ádn dyam? Nzé mod awóó mbwǎkel é ndyoyŋ ní mbód, boŋ nhóg mbǎó, ngǎmé átedé nímíní móom mé ndyoyŋ ní mbód abog ne abog wée bédyáké medyé á ekone mǐn áké dé ahed nímé nhóg níme mbǎó?

¹³ Ne mbále nlǎnge nyé nén meé, nzé adǐbté'ε mó abelé awógén mó menyinje tómaa nímíní móom abog ne abog níme ménkǎmbǎo.

¹⁴ Melemlem nē dǎo echen† Sǎŋ awě adé ámín éhédéé áá ké mpín ní mwëndem néé nímén mbǎo.

Mwǎnyoyŋ awě abēnlé we awusé

¹⁵ "Nzé mwǎnyoyŋ abēnlé we awusé, tán mó wée nyúmǎ bad bébe bēnpen nyédíí, échu mó dǎ aláa. Nzé achemé áde awusé, né nyé mwǎnyoyŋ nyétimé ásē.‡

¹⁶ Boŋ nzé eékwentene áa mǎpǎnné we, etéd mod ampée nhóg ké'ε bébe ékēen áwé, ábel nén, 'Mbéb ké nǐhéé níme éhǎbé wéé abelé we nǐbyén ne mbǎŋ ébe ké'ε éláán.‡

¹⁷ Nzé eékobe kǎŋŋe chǎm-ée éché mboŋ éhǎbé, épēen mó á mwembé. Nzé eékwentene ké bǎ awóglén, etéd mó néé mod awě eedúpe áyál e níme nsǎŋten kǎa nēŋgáne nsaad-a-tááse.*

Yesu e ad bembapeé béwóó
ngne ákǎŋ ne ábe dyam kunze

¹⁸ "Ne mbále, nlǎnge nyé nén meé, kéchéé éche nyébéné á nkǎŋsé ébénénéé ámín. Kéchéé'ε éche nyébágé kunze á nkǎŋsé, ébágnédéé kunze ámín.

¹⁹ Nlǎnge nyé ámpé nén meé, nzé nyé bad bébe nyéchémténé áyale kéchéé boŋ nyéhédé chǎ á mekáne-té, echem Sǎŋ awě adé ámín ábē nyé chǎ.

²⁰ Ayále wée bad bébe ké'ε beláán beládné áwém díŋ, mémpē ndé áwab tinté."

Ngan e mod-a-nsǎn a kǎŋ
awě enkēnlagǎn waab

²¹ Hē dǎo Petro ápedé wée Yesu, boŋ ásedté mó áá "A-Sǎŋ, nzé mwǎnnéd abenle me awusé pǎndé téé, ngen étǎŋ nǐtǎŋgéné mó alagsen? Kǎŋŋe ngen saámbe-yé?"

²² Dǎo Yesu e átimtanné mó áá, "Nlǎnge nyé nén meé, saké ngen saámbe, boŋ móom mé ngen saámbe ne saámbe.†

²³ Nē dǎo édíí á nkamlén ní mǐn. Dyǎb ákamlanné nēŋgáne kǎŋ pǎg eché echénlé bad ábe bébele nsǎn ásē eché, áŋon mǎné níme bǎ ké ahéé béwǎnlé mó.

²⁴ Abooted áde ábóótédé áŋon mǎné níme ábē bad béwǎnlé mó, dǎo bad bépéénéé mó mod nhóg awě anwálé mó nkúú ní mǎné.

²⁵ Ane mod enkēnhenlé áde alúm atwe, né-ǎó kǎŋ enhǎb áá bésóm mó nchoo ne mwaád ne bán nēŋgáne betǎŋ, bésóm-me bwém é'syǎal ábe áwóó. Mímé mǎné mébe ásaábe áde alúm.

²⁶ Ane mod ankwe kǎŋ á mekuu, ácháá mó áá, 'Beé me pǎndé, métwé ádoŋ alúm ásyǎal.'

²⁷ Kǎŋ enwóg mó ngǎl, anchené mó áá ákag, álagsén-ne áde alúm.

²⁸ Néé ane mod áhídte hē, amboméŋ waáb awě mǎmpē abelé'áá nsǎn ásē e kǎŋ. Waáb ne anwálé mó mwá mǎné awě énkēmbuú áte. Dǎo átólé waáb á mengǎgíd, áá ásaábe mó nímé mǎné.

²⁹ Waáb ankwe mó á mekuu, ácháá mó áá, ábe mó pǎndé áá, móǎsǎbé mó áde alúm.

* **18:10** Donje á kǎlag dé'sǎ ábáde nchoo 11: Nyébí nén bán Mwǎn-a-Moonyoyŋ apedé ásoŋ bad ábe bébǎ. † **18:14** Echen: donje á kǎlag dé'sǎ áwóó echem. ‡ **18:15** Abēnlé we awusé: donje á kǎlag dé é'sǎ áwóó abelé awusé. § **18:16** Nén átenléde á kǎlag e Dyǎb, Dieteronomi: 19.15. * **18:17** Bad bé Israel béndúbe nén bán besaad bé tááse bǎo bétómténé bad bé mbéb abé, bán béesl-laá á nkamlén ní mǐn. † **18:22** Móom mé ngen saámbe ne saámbe: donje á kǎlag dé é'sǎ áwóó móom mé ngen saámbe ngen saámbe.

³⁰ Ane mod enkénlagsénné waáb, anhé mó á mbwög aá kóón né asábpé áde alúm boŋ bébídéd mó.

³¹ Ade bad ábe bébéde áhed ábe bómpē bébéle'áá nsón asē e kâŋ bényíné dyam áde ábénlédé, bénlîŋ bwâmbwam. Bênkē kâŋ dyam ásyāāl áde ábénlédé aláa.

³² Né-óó, kâŋ enchélé ane mod, álânŋē mó aá, 'Ekúkú é læ nén! Menlagnén wē alúm áde wénwālēē me áyāle wenchân me.

³³ Cheé ékás boŋ weewógē wēn ngol melemlem nêŋgáne me-'e ménwōgkē wē ngol?"

³⁴ Kâŋ ênlîŋ bwâmbwam, né-óó anlóm ane mod á mbwög aá béwógēd mó ndutul. Aá ábé-'e á mbwög kóón né asábpé áde alúm ásyāāl."

³⁵ Né-óó, Yesue ansógtén nén aá, "Nê dōo Titēe Dyōbe awē adé ámín ábenlé. Nzé weelagsene mwányonŋ ne nítmōŋ nlém rísyāāl, né Dyōb dékōgsēn wē ngáne ene kâŋ énkōgsēnné ane mod."

19

*Ayáged tâŋgene anan
dé mmwaád á e'wóngé
(Mak 10.1-12)*

¹ Ade Yesue amáá nímmén mekan ahób, anhidé á Galilia áke á mbwóg e Judeya, áchābē á ped e edīb é Jodan eníní.

² Ndun e mod enhíd mó áwed, áchōōd-te bad bé nkole.

³ Donŋe á Befarisia bémpē áwē ákæg mó. Bēnsēdéd mó bánken, "Mbéndé echēd ebage kunze nén bán, mod áne awē mwaád áyāle nyaa e nzom ké ehéé-ye?"

⁴ Yesue ankwentén bó aáken, "Nyéeláá' é á kálag e Dyōb nén bán á mbooted, Dyōb dénhæg bó mmwaád ne mwēnchóm-e?"

⁵ Dyōb á hóbpe aá, "Áyāle né-óó, mwēnchóm átedé sáá ne nyan abé ne mwaád, boŋ búmō bad bébe bétim mod nhóg.

⁶ Né-óó, búmō béesaá ampē bad bébe, boŋ bédii mod nhóg. Né-óó, échē Dyōb aládé, modmod eepáá'."

⁷ Hē dōo ábē Befarisia bēsedtē mó bánken, "Nzé édé nē, cheé-ō ênkâŋ boŋ Mosēe ábagé bad kunze aá, mod ábe mwaád kálag echē elúmte nén bán, e'wóngé é'máá boŋ ánan mó."

⁸ Dōo Yesue álânŋéé bó aá, "Mosēe ambäg nyé enén kunze áyāle nyélelé nlém á abum. Enkēmbáá nē á mbooted mé nkōŋsé.

⁹ Né-óó, nlânŋe nyé nén meé, mod ké ahéé awē anané mwaád ésebán ane mmwaád akábé asón, nzé ene ndín e mod awóó mmwaád ampé, né akábé asón."

¹⁰ Hē dōo ábē bembapēe bélânŋéé mó bán, "Nzé nén dōo mekan mé mmwaád ne nchóm médíí, né éesaá nsyáŋ áwōŋ mmwaád."

¹¹ Yesue antimtén bó aá, "Saké mod asyāāl ahele ákob adén ayáged. Boŋ dékobnéd ne bad ábe Dyōb ábágé dō.

¹² Nyébíí nén bán, nzom édé híin échē ékás boŋ bad béewōō bebaád. Behóg bédé ábe béchyááténé nē. Bémpē-'e bédé nē áyāle bad bébéle bó nē. Abíníí-'e, bébéle yāl nē ábel boŋ bébel nsón mé nkamlen ní Dyōb. Kénzēé awē ahele adén ayáge akob, ákob dō."

*Yesue anámté bëndem
(Mak 10.13-16; Luk 18.15-17)*

¹³ Bad bēmpēén bëndem wē Yesue nén bán ábán bó ekáá á nló, ákânned-te bó. Ábē bembapēe bēnkānē ábe bad áte.

¹⁴ Boŋ Yesue anláá bó aá, "Nyétedē bëndem béhyag áwēm, nyéekás bó, áyāle nén, nyaa é bad néé bó chōó éwóó nkamlen ní mín."

¹⁵ Né-óó, Yesue ambán ábē bán ekáá á nló. Ámbíd e nē, anhidé áhed.

*Nhon ní bad
ne nkamlen ní Dyōb*

(Mak 10.17-31; Luk 18.18-30)

¹⁶ Póndé póg mod nhóg ampē wēe Yesue, ásedtē mó aáken, "A-melēed, dyam á bwám áhéé rítânŋéné ábel, ábel nén níkud alonŋé áde déemaá?"

¹⁷ Hēe Yesue ákwentanné mó aá, "Chán éheleé ésedtē me dyam áde adé dyam á bwám? Mod nhóg mwēnpen mó adé awē adé mod a bwám. Konŋé' mbéndé é Dyōb nzé ehēde wē mókud alonŋé áde déemaá'."

¹⁸ Dōo ane mod ásedtē mó aáken, "Mbéndé éhéé?" Yesue ankwentén mó aá, "Weewúé' mod, weekábé asón á ndáb e'wóngé, weechíbé', weebídé mbōŋ e metóm,

¹⁹ beé sóo ne nyan edúbé, édan-'e mwányonŋ nêŋgáne ehoŋ yāl."

²⁰ Hēe ene kódemod élanŋéé Yesue aá, "Nhídé échén mbéndé ésyāāl; cheé émpēe éhedne me ábel."

²¹ Yesue antimtén mó aá, “Nzé ehede weé mósówó awusé á yál ké ahóg, kág ésóm bwém é’syāl ábe éwóó, étéd nímé máné ébe betóótóké bé bad. Nzé ebelé nê, wéküd nhon ádyób. Ene pónké éhye éhíde me.

²² Ade ene kódemod áwógé nê, anwóg mbéb áte bwámbwam áhídé-’é áyále ambé nhon bwámbwam.”

²³ Hée Yesue álanjéé ábē bembapee aá, “Ne mbále nlánje nyé nén meé élél áte nhon ní mod ásíł á nkamlen ní Dyób.

²⁴ Nlāa nyé ámpé nén meé édé mwān a akan sánjkalaa a nyam née Kamēl apon á epōn é ndānde tómaa nhon ní mod ásíł á nkamlen ní Dyób.”

²⁵ Ade bembapee béwógé nén, yāl enkóm bó áte bwámbwam. Bēnsedéd bánken, “Nzéé-’s ahēle ákud e’soosōj?”

²⁶ Hée Yesue ánóné bó chóónj bonj áhōbē aá, “Ne baányonj nén déehelē se ábenléd bonj ne Dyób dyamdyam déeleléé áte.”

²⁷ Hée Petro áhōbēé aá, “Nóné’, sētédte chōm ésyāl áhíd we, cheé-’s ébē nímed nsyāj.”

²⁸ Hée Yesue álanjéé bó aá, “Ne mbále, nlánje nyé nén meé, pónké echē Mwān-a-Moonyonj ádyé-’é á atii dé nkamlen ne eche ehúmé ésyāl á nkōnsé níme ríhúe’, nyé bad dyóm ne bébe ábe béhíde me nyémpē nyéédyéé á metii mé nkamlen, nyékāádtē metúmbé mé Israel dyóm ne mébe.

²⁹ Kénzēé-’é awē atédte eche ndáb, baányanj, sáá, nyaá, bán, ne eche mbwóg áyāl echēm, ákud chó mbwókel e ngen, ákūd-te alongé áde déemaá’.

³⁰ Bonj bad híin ábe bédé á’só bōb bēlyəg mbíd, híin-ne ábe bēnyəg mbíd bēbē á’só.”

20

Ngan e bad bé nsón

¹ Hē dso Yesue ákaléé ngan aá, “Nhóbe nê áyále nkamlen ní mín rídé nhəgtén nēngáne nwóo-nzag nhóg awē ambíd á ndáb epəg é mbwəmbwə áke dé ahəd bad ábe ásábēē, ábel nsón áwē nzag-tē.

² Bósbō bēmpē á nchemten áyále nsábe mé epun é bín bonj álómé bó áwē nzag-tē.

³ Ane nwóo-nzag antim ambíd ámpé á dyad-té á ngāj abog. Antán bad bé nsón bēmpēe áhed. Bentyēem ngēn, béebele’áá chōmchōm.

⁴ Hée álanjéé bó aá, ‘Nyémpē nyéke nyébel nsón áwēm nzag-tē, mēsábē nyé nsábe níme ríkwógnédé.’

⁵ Né-’s, bēnkē. Ambēl melemlem mé dyam á kəd, ne á ngāj éláán.

⁶ Dyam ngāj étáan née ane mod átímé á dyad-té ámpé, antán bad bé nsón ábe bōmpē bentyēem, béebele’áá dyamdyam. Hée ásedteé bó aá, ‘Cheé nyébēbtēe epun é bín ésyāl hén ngēn áde nyébeléé dyamdyam.’

⁷ Bēnkwentén mó nēn bán, ‘Modmod eetédeé sé á nsón.’ Hée ane mod álanjéé bó aá, ‘Nyémpē nyékag-kó nyébel nsón áwēm nzag-tē.’

⁸ “Ade ngukél épédé, ane nwóo-nzag anláá awē mod awē anone ábē bad bé nsón aá, álad bad bé nsón áte, ásábe bó. Aá, ábooted ne bad ábe bédímténé ape, ásóg-ke ne ábe bésébpé ape.

⁹ Ambéé bad ábe bēmbootéd nsón á ngāj étáan nsábe mé epun é bín

¹⁰ Ade bad ábe bēnsēbē nsón abooted bépédé ákob nsábe, bēnwēmtēn bán, békud nsábe níme rítómé ní bad ábe bēmbootéd nsón á ngāj étáan. Bonj bōmpē bēnkūd melemlem mé nsábe.

¹¹ Ade békóbé mōné níme bēmbēé bó, bēmbootéd anyoo áte.

¹² Béhōbē bán, ‘Ábén bad bēbélé nsón háwa póg chēmpen, ké nē, esábpé bó melemlem nēé sé ábe sēbelé nsón epun é bín ésyāl ne enyen é ngine.’

¹³ Nwóo-nzag antimtén ábē bad nhóg aá, ‘Amūē, meédogeé nyé. Eesaá mbále bán dentí bán mēbe nyé nsábe mé nsón mé epun é bín-’?

¹⁴ Nyékob-póó nímmēn mōné, nyékag. Mmēn-éé ntíídé meé mēsábē anén mod awē adímténé ape melemlem ngáne rísábpé’áá wēmpē.

¹⁵ Meewóó’é kunze ábenled nímmēn mōné ngáne rídás-yé? Cheé ékás bonj nyébēbtē nlém á abum áyále ábēm e’bonj bé nlém?”

¹⁶ Yesue ansógtén ene ngan aá, “Né-’s, bé’só bētīm bé mbíd, bé mbíd-te bētīm bé e’só.”

Yesue ahóbé ngen echē elónténé éldán ngáne bēwūū’é mó

(Mak 10.32-34; Luk 18.31-34)

¹⁷ Yesue ne ábē bembapee békágé’áá á akuu á Jerusalem. Ade békagké nē dso áchágé bó á nkag, bonj álanjéé bó á kun-té áá,

¹⁸ “Pón nyébii bán dekap á Jerusalem, áwed-taá bébée Mwán-a-Moonyon á mekáá mé beprise bémbáá ne bemeléede bé mbéndé. Bó-ε bébée mbakú bán atáŋgéné awé.

¹⁹ Bébe mós á mekáá mé bad ábe béesž bad bé Israel. Bó-ε béwɔɔdé mós, béswádtáád mós e'tangú, bébómé-ε mós á awɔg. Bonj ámbíd e e'pun é'laán Dyöb dépuúid mós.”

Nyě-mwán ahedte bán metii

(Mak 10.35-45)

²⁰ Ámbíd e pónde dós Zεbedie mwaád ápedé wée Yesue ne ábē bán bé baachóm bébe, abwɔg mebóbón, ácháá-ε Yesue áá ábele mós dyam.

²¹ Yesue ansedéd mós aáken, “Cheé éhedéé?” Dós ákwentanné mós aá, “Băg me akag nēn wée, pónde eche wébēē á nkamlen, ábēm bán bēn bébe bēdyéé wε á nkag, nhóg ekáá émbáá, aníní-ε á ekáá é emwed.”

²² Héε Yesue ákwentanné bós aá, “Nyéebii'ε chóm éche nyésedté. Nyéēhēl metuné míme mépēmme apém-ε?” Bēnkwentén bán béhēl.

²³ Dós Yesue álanğéé bós aá, “Ne mbále, nyéēpēm bonj meewóó'ε kunze ápwed mod awé ádyéé me á ekáá é mbáá ké'ε á ekáá é emwed. Ábē e'tál é'díi e'tál ábe é'bágnédé ne bad ábe echem Sáj anábnédé bós.”

²⁴ Ade ábíní bembapεε dyóm béwógé nē, bēnliín ábē baányan bébe.

²⁵ Né-óó Yesue anlad bós áte, bonj álanğéé bós aá, “Nyébii' nēn bán, benkamlεne ne bad bémbáá bé nkónsέ bébenlad nğine ákamlen bad ábe bédé áse echáb.

²⁶ Bonj éatáŋğenéé ábē nē áftinté echēn. Kénzéeé awé ahede aá móbē mod ambáá áftinté echēn, atáŋgéné abē mbālede awēn.

²⁷ Kénzée-ε awé ábē mod a'só áftinté echēn, atáŋgéné abē awēn ntán.

²⁸ Melemlem nēε Mwán-a-Moonyon eépedéé aá bad bébenle mós, bonj apedé ábele bad, ábe-ε áde alongé ákōde bad híin.”

Yesue achónté bad bébe

ábe bēnkwe ndim

(Mak 10.46-52; Luk 18.35-43)

²⁹ Ade Yesue ne ábē bembapεε béhidtéé á Dyad á Jeriko, ndun e mod ehíde' áá mós.

³⁰ Ene pónde-óó bad bébe ábe bēnkwe ndim bēndyéé á nkag ní nzii. Ade béwógé bán, Yesue atóme', bēmbootéd abón bán, “A-Mwán a mbyaa míme Dabide, wóg sé ngól!”

³¹ Ndun e mod eché embé áhed enkáne bós áte bán bédib nsál. Bonj bó-ε bémbádnēn abón ne nğine bán, “A-Mwán a mbyaa míme Dabide, a-Sáj, wóg sé ngól!”

³² Yesue antyéem, achéléé bós bonj ásdtdé bós aáken, “Cheé nyéhedéé bán, míbele nyé?”

³³ Bēnkwentén bán, “A-Sáj, séhede bán, ébel sényinεn.”

³⁴ Yesue anwóg bós ngól, né-óó ambán bós mekáá á míd. Abwɔg-ábwɔg bēmbootéd anyinεn, béhíde-ε mós.

21

Yesue asólé á Jerusalem nēε kâŋ

(Mak 11.1-11; Luk 19.28-40; Jɔn 12.12-19)

¹ Ade Yesue ne ábē bembapεε bēkwógé ape á Jerusalem, nēε bepédé á dyad á Betpeg á ekone é menzab Yesue anlóm bembapεε bébe á'só.

² Anláá bós nēn aá, “Nyékag á dyad áde áde nyé á'só nē. Nzé nyésólé sólén, nyéētán nēε bétáŋgé ésel ne mwán ánkag. Nyéhune bós nyéhyiinad me.

³ Nzé mod asēdté nyé aáken, cheé ékás bonj nyéhunne', nyeláá mós bán Sájgwée* atógnéné bós. Nzé nyéhóbé nē, ábwɔg-ábwɔg ane mod áchennédé nyé.”

⁴ Nēn dēmbenléd áloned e'yale ábe Dyöb dénlómēnné nkal é'dáádəŋ aá,

⁵ “Aláa dyad á Zayon aá,

Nyénone', echen kâŋ ehyağ awēn,

asúdté yál, adíidé ésel, etum é nchóm a ésel.”

⁶ Né-óó ábē bembapεε bēnkž bébēl-le nğane Yesue ányágtēnné bós.

⁷ Bēmpεēn éché ésel ne mwán, bétéd échab mbóté, bétal chós ámín, bonj Yesue ádiide'.

⁸ Ekud é bad bēntál échab mbóté á nzii-tē, ábíní-ε bésēl' e'kikag é míi, bétalé' á nzii-tē.

⁹ Ndun e mod eché ekágé' áá mós á'só ne eché ehíde' áá mós ámbíd bēmbootéd abón bán, “Hosána, mekenag mébē ne mwán a mbya míme Dabide.

Nnam mbē ne ane awé apedé á đín áde Sájgwée.

Hosána, mekenag ne Dyöb áde áde se ámín!”

¹⁰ Nēε Yesue asólé á Jerusalem nēn sólén, bad bésyāal bépuutéd, bésēdté-ε bánken, “Nzéeé ne?”

* 21:3 Sájgwée: káa nwóŋ.

¹¹ Dóo ene ndun e mod ékwɛntanné bán, “Yesue mó adé, nkal é’ dǎǎdǎŋ a dyad á Nazaret á mbwóg e Galilia.”

Yesue anané bekáb bé nyongé á Ndáb-e-Dyób

(Mak 11.15-19; Luk 19.45-48; Jɔn 2.13-22)

¹² Ámbíd e nê, Yesue anke asól á Ndáb-e-Dyób. Annán bad bésyāāl ábe bekábé’áá dyɔn áwéd-te. Ankuné betébelɛ ábe bad bépénlɛ’áá mɔné ámín mekuu ámín, ákúnɛ-ɛ metii nímé bad ábe bésómme’áá mbɔngé mekuu ámín.

¹³ Anláá-ɛ bó aá, “Eténlédé nén bán, Dyób áhóbé aá, ‘Echem ndáb etǎngéné achəgned bán ndáb e mekáne.’ Boŋ nyétimté chó, ‘mbwóg mé bechíbi!’”

¹⁴ Bad ábe bɛnkwɛ ndím ne bad ábe mekuu ménwɛɛ ábe bémbɛ áhed bémpɛ áwɛ, ádid-te bó bwám.

¹⁵ Boŋ áde beprise bémbáá ne bemeléede bé mbéndé bényíné menyáké nímé Yesue ábélɛ, boŋ béwóg-ke e’ saad ábe béndem béhónɛé á Ndáb-e-Dyób bán, “Mekɛnag mébɛ ne mwán a mbyaa nímé Dabide,” bɛnlɪŋ bwám bwam.

¹⁶ Bénsédéd Yesue bánken, “Ewóge chòm-ɛɛ ábɛ bán béhóbé-ye?” Yesue ankwentén bó aá, “Eɛ, nwóge’. Nyééláá’ɛ mbéd á kálag e Dyób nén bán, Dyób ábónsɛné e’ched é’ béndem ne é’ bán bé nkáál ábe mó mekɛnag mé bwám-ɛ?”

¹⁷ Ámbíd e nê Yesue antedé bó á Jerusalem áke ánáá á dyad á Betani.

Yesue ne alín á ngəl

(Mak 11.12-14, 20-24)

¹⁸ Epog é mbwɛmbwɛ áde átimeé ámbíd á Jerusalem nzaa enkób mó.

¹⁹ Ade ákagké nê annyín alín á ngəl. Anké áhed, boŋ enkényínne epum ké ehóg áwédé-mín étóméé byaa. Héɛ Yesue álanɣɛé ábɛ bwəl aá, “Wéechyáá’ɛ epum ámpɛ mbéd.” Abwəg-ábwəg bwəl bɛnhyéle.

²⁰ Ade ábɛ bembapɛɛ bényíné nê, yəl enkóm bó áte bwám bwam. Héɛ béseɛdtɛé bánken, “Chán ádɛn alín á ngəl ámwédé ayéle á mehélɛ-te nén-ɛ?”

²¹ Yesue ankwentén aá, “Ne mbále nlanɣe nyé nén meé, nzé nyédúbpɛ ne nlem rísyāāl, né saké dyam áde mbélɛ ábɛn bwəl áyāl dɛmpɛn nyébenlé. Boŋ né nyéhɛle-se nyéláá káŋne enén mbɔɔd nén bán, ‘Hídé hɛn, éke ébwɛm yál á edíb é nkwɛ-te,’ ébenléd-te né dɛn.

²² Nzé nyéwóó adúbe bán, kéchéé éche nyéhédné Dyób á mekáne-tɛ nyéékúd, né nzé nyéhédé nyéékúd.”

Nsɛɛtéd tǎngene kunze eche Yesue

(Mak 11.27-33; Luk 20.1-8)

²³ Yesue ansól á Ndáb-e-Dyób, áyágtɛ bad. Ade áyágtɛɛ nê, dóo beprise bémbáá ne bad bémbáá bé Israel bɛpédé áwɛ, béseɛdtɛ mó bánken, “Kunze ehéé éwóó ábel nímén mekan? Nzé-módé abagé-ɛ wɛ ene kunze?”

²⁴ Yesue antimtén bó aá, “Me ámpɛ mɛsɛdéd nyé dyam ahóg. Nzé nyékwɛnténé dó né me-ɛ mɛláá nyé kunze eché n̄wóó ábel nímén mekan.

²⁵ Edusen éche Jɔnɛ ádúsánnáá bad héé émbídtɛ? Embíd ne Dyób-ɛ ngé ne baányoŋ?” Bɛn ne bɛn bémbootéd apɛntɛn bán, “Nzé dehóbé nén bán, ‘Jɔnɛ eché kunze enhúú ne Dyób,’ né áseɛdéd syánɛ aáken, ‘Cheé-ɔ enkəŋ boŋ nyénkéndúbé mó?”

²⁶ Boŋ nzé dehóbé bán, ‘Eché kunze ehúú ne baányoŋ,’ né échɛn ekud é mod ébel syánɛ mbéɛ áyále bad bésyāāl béndúbɛ bán Jɔnɛ abédɛɛ nkal é’ dǎǎdǎŋ.”

²⁷ Né-ɔó bɛnkwentén Yesue bán, “Séebí’ɛ.” Mó-ɛ antimtén bó aá, “Né ké me-ɛ ámpɛ méeláá’ɛ nyé kunze eché n̄wóó ábel nímén mekan.”

Ngan e bán bé baachóm bébe

²⁸ Yesue ambé áseɛdéd beprise bémbáá ne bad bémbáá bé dyad aáken, “Chán nyényíné ádɛn akan tǎngene enén ngan? Mod nhóg abédé awé anchyáá bán bé baachóm bébe. Héɛ ákíí mwán ambáá aláa aá, ‘A-mwán, ké ébel nsón á nzag-tɛ chíi.’”

²⁹ Mwán antimtén mó aá móokaá. Boŋ ámbíd e pónde anhəŋlɛn mewɛmtɛn, áke.

³⁰ Dóo ane mod ákíí wɛɛ mwán asad, aláá-ɛ mómpɛ melemlɛm mé dyam. Anén mwán antimtén sáá aá, ‘A-Sán, mɛkɛ’ boŋ eékíi.”

³¹ Héɛ Yesue áseɛdɛɛ beprise bémbáá aáken, “Átíntɛ ábɛn bán bébe, ahéé ambɛl ngáne sáá áhédé’áá?” Bɛnkwentén mó bán, “Ambáá.” Né-ɔó, Yesue anláá bó aá, “Ne mbále, nlanɣe nyé nén meé, besaad-bé-tááse ne bekwalɛɛ bédé asól á nkamlen ní Dyób tómaa nyé.†

† 21:31 Baá mbáá bé Israel béndúbɛ nén bán bekwalɛɛ ne besaad-bé-tááse béésónlé á nkamlen ní mín.

³² Nhóbe nén, áyāle Jone, Ndušene ampē, alúmed nyé nzii echē etyéémé, nyénkëndúbéé mós, bon besaad-bé-táás ne bekwalēe béndúbē. Ké nēe nyénnyín-naa nē, nyénkénhājénnē, nyénkëndúbé-’áá mós.”

Ngan e bebel bé nsón ntéd
(Mak 12.1-12; Luk 20.9-19)

³³ Yesue anláá bós áá, “Nyéwóglēn ngan empēe. Nwóó-nzag nhóg abédé awē ankwēl nzag e e’pum é’ mel ábe bébenléé mím. Ankág chós, ábel bwāl wēe bémineé ábē e’pum é’ mel ábel mím, alónj-’e ebem áwēd-te wēe bédyē’-é ánon nzag áte. Ambēe ene nzag wēe bad ábe bósōō békāb mbote áte, ákē á alonj démpēe.

³⁴ Adē pónde épédé eche bépádē e’pum, ane nwóó-nzag anlóm ábē bembāledē wēe ábē bebel-bé-nsón ákobe mós adē asii dé e’pum.

³⁵ Hēe ábē bebel-bé-nsón békóbē ábē bembāledē, bēwanné’ nhóg, bēwū’-e ampēe, aníní’-e bēwūēnē meláá.

³⁶ Ambid é pónde ane nwóó-nzag anlóm bembāledē bēmpēe ábe bēmbuú áte tómaa ábíníí. Ábē bebel-bé-nsón bēmbēl ábē bembāledē melemlēn ngāne bēmbēnlé bē’sō.

³⁷ Ambid e pónde anlóm awe mwān áwāb, ne mewēmtēn nēn bēbēe mós edúbē.

³⁸ Bon áde bebel-bé-nsón bényíné ane mwān nēe áhúe’-é, dōo bós bēn ne bēn bēhóbēe nēn bán, ‘Ndyé-a-mbwóg nēn, nyéhyag! Déwúu mós, ábel nēn, eche mbwóg ésuuned syāné.’

³⁹ Hē dōo békóbē mós, bēbīdēn mós á nzag-tē, bon bēwúú’-e mós.”

⁴⁰ Hēe Yesue áseáde ábē bad bēmbāá bē dyad ne beprise bēmbāá áá, “Bōōb-pōō, nzé nwóó-nzag ne apedé, cheé ábenlé ábē bebel-bé-nsón?”

⁴¹ Hē dōo bēkwēntanné bán, “Awúú ábē e’bēbtéd é’ bad e’bēbtéd é kwēéd, ábē’-e ene nzag wēe bebel-bé-nsón bēmpēe ábe bēbe mós adē asii á mbote nzé pónde epedé eche bépádē e’pum.”

⁴² Yesue anláá bós ampē áá, “Nyéélāā’-é mbéd wēe eyale é Dyōb éhóbē nēn bán, ‘Aláá adē belónj-bé-ndáb bēnchenéé dōo átimé aláá dé etógnēn ábē. Sāngwēé mós ambel nēn, édē’-e syāné menyáké.’

⁴³ Né-ōō nlānge nyé nēn mēé, békobēn nyé etál éche nyéwóó nēe bad bē nkamlēn rí Dyōb, bēbē wēe bad ábe bēbele’ ngāne Dyōb áhedeé.”[‡]

⁴⁵ Ade beprise bēmbāá ne Befarisia bēwógé échén ngan eche Yesue ákálé, bēnchem bán, bós ákanléé chós.

⁴⁶ Né-ōō bēhédé’áá mós akób, bon bēmbān abel nē, áyāle bényín bán, ene ndun e mod enyíné’áá Yesue nēe nkal é’dáōdān.

22

Ngan e ngande e e’wóngé
(Luk 14.15-24)

¹ Yesue ambé ábenléd ngan ampē ákalēn ábē bad. Anhób áá,

² “Nkamlēn mí mín rídé nēngāne kāj póg echē enláá ábē bembāledē áá bēbonsen ngande e e’wóngé ábe awē mwān a mwēnchóm.

³ Ene kāj’-e anlóm ábē bembāledē áá bēke bēchāg bad ábe álēbpé áyāle ene ngande, bon ábē bad bēnkēnkwenténnē ape.

⁴ Hēe álóméé bembāledē bēmpēe áá beláa bad ábe mólēbpé nēn bán, ‘Nyēbii nēn bán, mmaá nyag ne e’lem ábe é’bóó yāl awúu. Chóm ésyāāl-le édē mbonsén, nyéhyag-kōō á ngande.’

⁵ Bon ké nē ábē bad ábe bēnlēbēē bēnkéntédté mímé nlébtéd nēe dyam. Mod téé ahídé’áá mímé ntii ámbid. Behóg bēnké’ áwāb nzag-tē, ábíníí bēhídé bímab nsón mémpēe ámbid.

⁶ Ábíníí’-e bēnkōb ábē bembāledē, bēbōm bós, bēwúú’-e bós.

⁷ Ene kāj enlīn bwāmbwam. Né-ōō, anlóm éche sánze. Nēe épédé, éwúú bad ábe bēnwúú ábē bembāledē, éhyāād-te ábē bad dyad.

⁸ Dōo álāngéé ábē bembāledē bēmpēe áá, ‘Ngande e e’wóngé emaa mbonsén abé, bon bad ábe ríléppé bēekwognedéé chós abé áse.

⁹ Bōōb-pōō, nyékağ á mbom rí nzii á dyad-tē, nyéchéle bad bēsyāāl ábe bényíné bán, bēhyag á ngande.’

¹⁰ Né-ōō ábē bembāledē bēnké’ á dyad-tē, bēlād bad bēsyāāl ábe bényínnē, ken mod a bwām ké’-e mod a mbéb, kāj náb e ngande enlóg áte.

¹¹ “Kāj empē á ndáb-te ánon bad ábe bēpédé á ngande. Ade apédé anyín mod awē enkénhé asağ áde ántāngēnnē ahé á ngande e e’wóngé.

[‡] 21:43 Dōnge á kálag dé’sō ábáde nchoo 44: Mod ké ahéé awē alúme adē aláá ámln ábōgtéd áte. Bon ane awē déhūntédte ámln, anyōgtéd áte.

¹² Hée ásedtée mó aá, ‘Amúē, chán émwéde apē hén áde wéēhēdeé asañ á ngande e e’wóngé.’ Boñ ane mod enkēnhópé dyamdyam.

¹³ Dóo kãñ élanḡeé ábē bembalede ábe béchágté’áá beken aá, ‘Nyéhanj mó mekáá ne mekuu, nyébwēm mó á ebwóg, á ehintēn-tē. Ahed-taá béchyéé’ē, bédyāḡ-ke mesonj á nsāl.’”

¹⁴ Hée Yesue ásoḡtēé enén ngan ne e’yale nén aá, “Dyöb áchēnle’ bad hūm ábē áse e nkamlēn nīmē, boñ nguse chós épweḡnéd.”

Yesue ne asaa á tādse

(Mak 12.13-17; Luk 20.20-26)

¹⁵ Ebédé pónde póg echē Befarisia bēnkeé mbom, áhage Yesue, ábel békóben mó awusé tēḡgene e’yale ábe bēbíd mó á nsāl.

¹⁶ Bēnlóm ábáb bembapē nchoo ne bad bé epepé éche Herōde wēe Yesue. Néē bēpédé áwē, bēlanḡé mó nén bán, “A-meléed, sébíí nén bán, ekale mbále. Sébíí-’ē ámpē nén bán, ayáḡe ádōñ tēḡgene mbéndé e Dyöb áde mbále. Mewēmten mé bad ne e’só é’ mbóm é’ bad bēehañlanné ádōñ ayáḡed.

¹⁷ Láá-’ē sé ngáne ényíné ádén akan. Mbéndé eche syánē ehóbe nén bán désange’ tááse wēe Kaisēe, kãñ e Roma-yē?”

¹⁸ Boñ Yesue ambíí nímab mewēmten mé mbéb. Né-óó ansedéd bó aáken, “Nyé bedogbadé, cheé nyéhagkeé me?”

¹⁹ Nyélúmed me moné níme bēsajnadté tááse eched.” Bēmpiinéd mó moné mé ekii.

²⁰ Dóo ásedté bó aáken, “Ediidinge éche nzéé chén? Dín áde nzéé-’ē déñ?”

²¹ Bēnkwentén mó bán, “Ábe Kaisēe.” Dóo álanḡeé bó aá, “Nyébag-kóó Kaisēe éche éde éche Kaisēe, nyébag-ke Dyöb éche éde é Dyöb.”

²² Ade bēwógé nē, yāl enkóm bó áte. Né-óó bēnhidé áhed, békē-’ē.

Ayáḡed áde Yesue

tēḡgene mpuu ámbíd e kwééd

(Mak 12.18-27; Luk 20.27-40)

²³ Echē epun chēn doḡe á Besadusia bēmpē wēe Yesue. Besadusia bēndübē bán mpuu méesaá ámbíd e kwééd.

²⁴ Dóo bēhóbeé bán, “A-meléed, mbéndé e Mosēe ehóbe nén bán, ‘Nzé mod awóó mmwaád boñ awédé áde bó ane mmwaád bépedeé mwān awále, mwānyañ a abum ahóg atāḡḡéné ane nkúd awónj, ábel boñ dín áde mwānyañ déēbō’.”

²⁵ Bóob-póó, bad bēbédé hén mod saámbé ábe bēmbíd abum ahóg. Mod a’só anwónj mmwaád, boñ awé áde bó mmwaád ne bépedeé bán awále, né-óó mwānyañ awé anhíd mó anlyāḡnéd ane nkúd a mmwaád.

²⁶ Ane mómpē anwé áde bó ane mmwaád bépedeé bán awále. Melelem mé dyam mēmbenléd ne awé alónténé beláán, kósñ bēbóm bó mod saámbé.

²⁷ Kósñne á asóg ane mmwaád mómpē anwé.

²⁸ Bóob-póó á pónde e mpuu, mmwaád awé nzéé ane mmwaád áchāḡnédté áyale bó moosyāál saámbé bēnwōñ mó?”

²⁹ Yesue antimtén bó aá, “Nyépane’ áyale nyéesōñtēé chōm éche eyale é Dyöb ehóbeé, nyéesōñtēé-’ē ngáne ngíne e Dyöb ésógé abé.

³⁰ Ayāle pónde echē bad bēpuí’ē ámbíd e kwééd mewōḡḡé méebáá ámpē. Bad bēbē nēḡgáne ángel éche éde ámín, bēewōñnéé.

³¹ Nyééláá’ē mbéd dyam áde Dyöb ahóbe áwēn tēḡgene mpuu-yē? Dyöb ahóbe tēḡgene ábēd betaa aá,

³² ‘Mē-éé ndé Dyöb áde Abrahame, Aisige ne Jakóbe.’ Dyöb ádíí Dyöb á bad ábe bédé á alonḡé, saké Dyöb á bad ábe bēwédé.”

³³ Ade ene ndun e mod echē embé áhed éwógé nē, bēmbē menyáké bwāmbwam tēḡgene ayáḡed áde Yesue.

Mbéndé ébe éche étómténé

etógnén abé

(Mak 12.28-34; Luk 10.25-28)

³⁴ Ade Befarisia bēwógé bán nkwenten níme Yesue ámbéé Besadusia mēmbēl bēhelele dyamdyam ahób, bēnláden áte.

³⁵ Hé dós bó mod nhóg awé abédé meléede a mbéndé, áhyédé Yesue akag, ásedté mó aá,

³⁶ “A-meléed, ántinté mbéndé ésyāál, ehéé étómténé etógnén abé?”

³⁷ Yesue ankwentén bó aá, “Etāḡḡéné édañ Sāḡḡwéé ádōñ Dyöb ne nímōñ nléñ rísyāál, ne échoñ edaádañ ésyāál, édañ-’ē mó ne nímōñ mewēmten mésyāál.

³⁸ Enén mbéndé chō étómténé etógnén abé, ebé-’ē mbéndé e’só.

³⁹ Mbéndé eché elónténé ébe eché chómpe edé etógnén melemlem nêngáne e'so edii nên 'Edañ mwányon ngáne édáá echon yál.'

⁴⁰ Echén mbéndé ébe chòó éwánlé mbéndé éche Mosεε ésyāal ne mekan níme bekal-bé-e dáádān béyāgté."

Nsedtéd t̄ngene

Ane-awë-Béwōgté

(Mak 12.35-37; Luk 20.41-44)

⁴¹ Hê dōo Yesue ásedtée ábë Befarisia ábe bēnladén áte aá,

⁴² "Chán nyéwēmtanné t̄ngene Ane-awë-Béwōgté? Á mbyaa níme nzéé áhúú?" Héc békwénténé mós bán, "Abidé á mbyaa níme k̄n Dabide."

⁴³ Yesue ansedéd bós aá, "Cheé-ō enk̄n bonj Dabide áde Edáádān é Dyōb élyāgté mós ánhāgkē mós aá, 'A-Sān,' áde ahóbé aá,

⁴⁴ 'Sān Dyōbe anláá awēm Sāngwéé aá,

Dyεé áwēm ekáá émbáá,

káān ne á pónde eché mébenlé bonj ékōgtéd ábōn bad bé ekōyí ámīn ne mekuu.'

⁴⁵ Née Dabide mwēn áshēpé mós achāg aá, Sāngwéé, chán-nō Ane-awë-Béwōgté áhēlé abé awe mwān?"

⁴⁶ Bós modmod bēnkēnhenlé mós dyamdyam akwēntēn. Bootya éché epun bēnkēnchu' é mós dyamdyam asēded ámpē.

23

Elébé t̄ngene bemeléede

bé mbéndé ne Befarisia

(Mak 12.38-39; Luk 11.43, 46, 20.45-46)

¹ Ambíd e nē, dōo Yesue álāngéé ene ndun e mod ne ábë bembapεε aá,

² "Bemeléede bé mbéndé ne Befarisia bós bétédé etál éche Mosεε bōob áyāged bad.

³ Né-ōó, nyétāngéné bós awóglēn nyébelé-ε mekan mésyāal níme belāngéé nyé, bonj nyéēbēlē' mekan nime bébeléé, áyāle béebeléé mekan níme béhóbéé.

⁴ Bēkaa' é dēltéd bé nted, bēpēmtad bad, bonj béesaá mbonjsēn ábān ké ekáá áwōngēn bós ápém mós.

⁵ Kéchéé éche bébeléé, bébele chós ábel bonj bad bényīn bós. Bēkalte' bán bé ntyāg ábe béhāgkē nchoo mé e'yale e' Dyōb áte, bonj bētāā á mbōm ne á mekáá, béchabte e'túd* ábe béwāá' é mengombe mīn bwāmbwam. ⁶ Bédāā e'tál bé edúbé adyεε á hōm á ngande, bédān-ε metii mé edúbé adyεε á ndáb é mekáne.

⁷ Bédāā bán, bad bélente bós ne edúbé ésyāal á dyōn-tē, bédān-ε bán, bad béchāge bós bán, 'A-meléed.'

⁸ Bonj nyé, nyéēmwāg-se béchāgé nyé bán, 'Meléede.' Áyāle meléede nhóg mós nyéwóó, baányān bō-áá nyédíí.

⁹ Nyéechāgē-ε mod ké nhóg á nkōnsé wēn bán Titée áyāle nyéwóó-ε Titée nhóg, awēn Titée awé adé ámīn.

¹⁰ Nyéēmwāg-ke se béchāgé nyé bán, 'Sāngwéé' áyāle nyéwóó Sāngwéé nhóg, Ane-awë-Béwōgté.

¹¹ Mod awé adé ambáá áttinté e echēn atāngéné abé mbālede awēn.

¹² Kénzée awé achāgté yál, Dyōb dēsudéd mós, kénzée-ε awé asúdté yál, Dyōb déchāgéd mós."

Yesue asélé bad bé medogké

(Mak 12.40; Luk 11.39-42, 44, 52, 20.47)

¹³ Dōo Yesue áhóbé aá, "Ebēēn nyé bemeléede bé mbéndé ne Befarisia ebébtéd, nyé bad bé medogké! Nyédibe' ekob é nkamlēn mī mīn ábel bonj bad béésōlē'. Nyé bēn nyéesōléé, nyéēmwāg-kaá bán bad bēmpēe ábe béhede asól bēsól.†

¹⁵ Ebēēn nyé bemeléede bé mbéndé ne Befarisia ebébtéd, nyé bad bé medogké. Nyékag melōn ne melōn ábel bonj mod nhóg átimen nyé. Bonj nzé amaá nyé átimen, nyébelé nyéhbéd mós nyaa eché ákwógnédé ákud nkógsen á dū-á-muú níme rítómé nīmēn ngen ébe.

¹⁶ "Ebēēn nyé ebébtéd nyé bad ábe békwédé ndīm, bonj bélyāgté bad bēmpēe. Nyéyāgté bán, 'Nzé mod amwédé melē á dīn á Ndáb-e-Dyōb, né nē déesaá dyam, bonj nzé mod amwédé melē á dīn á bwēm é' gól ábe é' dé áwēd-te, átāngéné ábel dyam áde ámwééné melē.'

* **23:5 Etud:** Bēwāá' áá e'túd áluimed bán bēbenle Dyōb. † **23:13** Donje á kálag dé'so ábádé nchoo 14: Ebēēn nyé bemeléede bé mbéndé ne Befarisia ebébtéd, nyé bad bé medogké. Nyelāmtan yāl ne ntōj-ntōj mé mekáne, nyédumé-ε mbōw é bekúd. Né-ōó, nyéekud nkógsen nime nchābé ámtn.

¹⁷ E'yókél é' bad bën, nyékwedé ndím! Cheé étómténé etógnén abé, gól-le, ngé Ndáb-e-Dyöb eché ebélé boŋ gól ebé chöm éche ésáá á'só é' Dyöb?

¹⁸ Nyéyágte' ámpé bán, 'Nzé mod amwédé melé á dín dé menyán mé mendε, né nê déesaa dyam. Boŋ nzé mod amwédé melé á dín dé mendε míme médé á menyán mín, atánjéné ábel dyam áde ámwééné melé.'

¹⁹ Bad bé ndím bën! Cheé étómténé etógnén abé, mendε ngé menyán míme mébéle boŋ míme mendε mébé chöm éche ésáá á'só é' Dyöb?

²⁰ Né-óó kénzéé'ε awé amwédé melé á dín dé menyán mé mendε, né amwédé míme melé á dín dé menyán ne mendε ké méhéé míme médé áwedé-mín.

²¹ Kénzéé'ε awé amwédé melé á dín á Ndáb-e-Dyöb, né amwédé míme melé á dín á Ndáb-e-Dyöb ne á dín á Dyöb áde ádyεε' áwéd-te.

²² Kénzéé'ε ámpé awé amwédé melé á dín dé nkoŋ m' mín né amwédé melé á dín dé atii dé nkamlén rí Dyöb ne á dín á Dyöb áde ádífé áde atii.

²³ "Ebēēn nyé bemeléede bé mbéndé ne Befarisia ebébtéd, nyé bad bé medogké! Nyébage Dyöb akab ahóg áfínté e mekab dyöm, ké dé meküle míme béchámneé ndyééd néε mínt, díl ne kúmin.‡ Boŋ nyééhédeé nló áte ábel ndín é mekan éche mbéndé éhóbé aa nyébele'. Nyéesaa mbále ne Dyöb, nyéewóó'ε nlém rí ngól, nyéedúbpe-'áa Dyöb. Nyéntánjén mímén méšyāā ábel, ésebán nyéchoḅte' míminí.

²⁴ Nyé bad ábe békwidé ndím boŋ bélyāgté bad bémpē. Nyébude' mekan míme méesé etógnén ahíd ámbíd. Nyéhúde' píuted á mendíb míme nyémwāgkē-te, boŋ nyéεdte mbinde émbáá éche éde áwéd-te.

²⁵ "Ebēēn nyé bemeléede bé mbéndé ne Befarisia ebébtéd, nyé bad bé medogké! Nyéwobpe mbwendé ne díse ámbíd e ebwóg, boŋ medyé míme méde áwéd-te médíi medyé míme nyékúdné ndumbán ne ngoód.

²⁶ Nyé Befarisia, bad bé ndím bën! Nyésébe nyéwoḅe mbwendé ne díse áte, káŋne mbíd e ebwóg chómpé éšāŋ.

²⁷ "Medim ne nyé bemeléede bé mbéndé ne Befarisia, nyé bad bé medogké! Nyédíi néε soŋ éche bépúbté. Ekine' áte ámbíd e ebwóg boŋ e'hid ne e'boó bé ndim m' bad bóó é'lóné áwéd-te.

²⁸ Melemlem nê dáó nyényínnadté á'só é' bad néε bad ábe básáá boŋ áte nyélóné ne edogké ne mbéb.

*Dyöb dékōgsēn bemeléede
bé mbéndé ne Befarisia
(Luk 11.47-51)*

²⁹ "Medim ne nyé bemeléede bé mbéndé ne Befarisia, nyé bad bé medogké! Nyéloo' soŋ é bekal-bé-e' daádaŋ bwám, nyélonṭé-ε meboŋ míme bad ábe básáá.

³⁰ Nyékag, nyéhóbe-ε bán, 'Nzé sémbé á pónde eché ábéd betaa, né sēnkēnlaténné bó áde bēnwūū'ε bekal-bé-e' daádaŋ áte.'

³¹ Nê děn álúmte nēn bán nyēnkwenṭén nēn bán nyébídé á mbyaa míme bad ábe béwúé' bekal-bé-e' daádaŋ.

³² Nyékag-kóó á'só nyémad nsón míme ábēn betaa bēmbóótédte.

³³ Nyə chén! Etod é píi ngén. Chán nyémwéé nkōgsen rí dū-á-muú abame?

³⁴ Né-óó, mélōmē nyé bekal-bé-e' daádaŋ ne bad bé debyéé ne bemeléede. Nyéewūū donje, nyébōmē-ε bó á awog. Nyéswádtéd donje e'tanjú á ndáb é mekáne. Abiníí-ε nyénané myad ne myad.

³⁵ Awúu áde nyéwúé'ε bó débél Dyöb akōgsén nyé áyāle mekií mé bad ábe básáá béšyāā ábe nyéwúú ebēn á nkōŋsé, bootya kwééd eche Abéle awé béwúú ngén, ápe kwééd eché Zakariyaa, mwān awé Berekayaa. Zakariyaa awé nyéwúú áfínté e Ndáb-e-Dyöb ne hóm áde bébageé mendε.

³⁶ Ne mbále nlāŋge nyé nēn méé, enén nyoŋgei chóó éküđ nkōgsen áyāle échén kwééd éšyāā.

*Yesuε adé ngól
ne bad bé Jerusalem
(Luk 13.34-35)*

³⁷ "Wóowó! A-bad bé Jerusalem, nyéwúé bekal-bé-e' daádaŋ, nyéwūēnē-ε bad meláá ábe Dyöb álómé! Nkénwān áte ngen ne ngen álad nyé áte nēŋgāne nyaá-kúb ákútanné bán, boŋ nyééhédeé etál!

³⁸ Nyénōne', Dyöb détdé echēn ndáb, modmod éebáá-'áá áwéd-te.

‡ 23:23 *Mínt, díl ne kúmin*: bédii byaa ábe bébnlátáá áchám ndyééd.

³⁹ A mbále, nlánge nyé nén meé, nyéenyínénné me díd ámpē kááj ne á pónde eche nyééhábpē bán, 'Nnam ne ane awē apedé á dín á Sàngú.' "

24

Mbooted mé metake

(Mak 13.1-2; Luk 21.5-6)

¹ Ambíd e nē, Yesue anhidé á Ndáb-e-Dyób. Ade ákagké nē, dǎǎ ábē bembapēé bétáné mǎ, boŋ bēláŋgē mǎ bán ánne nyaa eche bēlóó Ndáb-e-Dyób.

² Héé Yesue ákwentanné bó aá, "Ngáne nyényínéé ábē bwēm é'syāl nē, ne mbále, nlánge nyé nén meé pónde épē eché aláá ké ahóg déelyǎgké ámín e waáb. Bépāntēd mésyāal áte."

³ Anké á Ekone é Menzab ádyēé áse. Héé ábē bembapēé bétáné mǎ wēé bēbéde bēnpen boŋ bésēdté mǎ bán, "Láá sé pónde eché mímén mekan mésyāal mébenlédté. E'chemléd é'héé bēlūméd epē échōŋ ne asóg dé nkōŋsé?"

⁴ Yesue antimtén bó nén aá, "Nyétéd pónde nén modmod eédōgē nyé.

⁵ Bad híin bēpē bán bóó bēdé Ane-awē-Béwǎgté. Bédōg-ke bad híin.

⁶ Nyéewōgē ngáne nzum éwantéé, nyéewōgē-é nzunze é nzum. Boŋ nyé modmod nyéénāš. Mmén mekan mésyāal métǎŋgéné abenled, boŋ saké mǎǎ mēlūméd bán asóg amáá ape.

⁷ Alon ahóg détyēēmēn ádíníi nzum. Nkamlēn nhóg-ke rityēēmēn mímíní. Nzaa ébē, ndǎǎb-pe eénnēnnéd ášē mebwǎg ne mebwǎg.

⁸ Echén ndutul ésyāal ébē nēngáne mewē mé'sǎ mímē mmwaád áwógéé nzé ahede achyáa.

⁹ Ene pónde békǎb nyé, bēbē nyé á mekáá mé bad ábē békǎgsēn nyé, bēwúú-é nyé. Melon mésyāal mékǎǎ nyé áyāle dín ádém.

¹⁰ "Bad híin bēewǎŋgé adúbe ámpē. Bēbéé nhóg ne aníníí á mekáá mé bad ábē békǎǎ bó. Bó bēn-ne békǎǎn.

¹¹ Bekal bē'dǎǎdǎŋ bē metóm híin bēbíd, bédōg-ke ekud é bad áhíd bó.

¹² E'bēb bē nlém á abum bēchǎgē, né-ǎǎ edǎŋge é bad híin ésūd.

¹³ Boŋ kénzéé awē ákaán mímē metake nlém kááj ne á asóg, ákúid é'soóson.

¹⁴ Mmén nkalaŋ ní bwám tǎŋge ne nkamlēn rí Dyób mékanléd nkōŋsé áte rísyāal ábēl boŋ melon mésyāal méwǎg. Ene pónde dǎǎ asóg dépēé.

E'bēbtéd é' mekan abe bēpē

(Mak 13.14-23; Luk 21.20-24)

¹⁵ "Nyéenyín nēé ekúkú é akan éche épēene e'són á'sǎ é Dyób ébenléde á Ndáb-e-Dyób á hóm áde ásaá * ngáne nkal é'dǎǎdǎŋ Daniéle ánhǎbpē aá ébenléd. (Nyé ábē nyéláa' mímén mekan nyésǎŋten mǎ bwám.)

¹⁶ Nzé nyényíné nē, bad ábē bēdé á Judeya bétóm mehélé, bēké bésǎǎm á e'kone mín.

¹⁷ Mod awē adé á nnoŋ rí ndáb mín eéǎŋné asud áke déttéd chǎm éche éde mǎ á ndáb-te.

¹⁸ Mod awē mǎ-é ámpē adé á nzag-té, eétmē ámbíd á ndáb áke déttéd sóte.

¹⁹ Ebē ebébtéd ne bebaád ábē bēbē nkog ne ábē bēmwǎnté mímé mesú.

²⁰ Nyékánnē nén bán áde abǎŋgé déttánē nyé á pónde e nkóg áde ahéb ádíi ngíne bwám bwám, ké' é á mbwē-mé-nkǎme-áte.

²¹ Ayāle ndǎŋge eché ébē ene pónde ébē ndín eché eébenléde mbéd bootya nkōŋsé níbootede kááj ne epun é'chii. Dyamdyam nēé áde déebenléd-taá ámpē mbéd.

²² Dyób amáá ábē e'pun é' metake asél áte. Nzé énkémbé nē, né modmod éechongé. Boŋ á etútú é bad ábē ápwédé, ášél ábē e'pun áte.

²³ Ene pónde nzé mod aláŋgé nyé aá, 'Nyénne', Ane-awē-Béwǎgté mǎ nén' káa aá, 'Mníníí,' nyéedúbpé.

²⁴ Ayāle bad híin bēbídé' ábē bēkalé metóm nén bán, bóó bēdé Ane awē Dyób Áwǎgté. Bekal bē'dǎǎdǎŋ bē metóm ámpē bēbíd. Bēbelé menyáké mé ngíne, bēlūmte-é e'chemléd híin. Bēbel nén ábēl boŋ bédog káájne bad ábē Dyób ápwédé, nzé nzii edé ádog bó.

²⁵ Nyénne', nlánge nyé mímén mekan á'sǎ é' pónde.

²⁶ Né-ǎǎ nzé bad bēláŋgé nyé nén bán, 'Nyénne' adé á ehyáŋge,' nyéékǎg áwed. Káa nzé bēláŋgé nyé bán, 'Nyénne', adé á toŋ-té hén,' nyéedúbpé.

²⁷ Epē éche Mwǎn-a-Moonyon ébē melemlēn nēngáne emwēdmwēd étóméé á akuu ne á mbǎŋ.

²⁸ Ké héé wēé ndim níbǎgké dǎǎ benhǎŋné bēladnéé.

* **24:15 Hóm adé asáa:** ádíi hóm áde bēbagé Dyób edúbe ne wēé bad bēndúbē bán, Edǎǎdǎŋ eche Esáá éde.

*Epe é Mwän-a-Moonyonj**ne asóg dé nkòḡsé**(Mak 13.24-27; Luk 21.25-28)*

²⁹ “Ade póndé e ndaḡge ne étõmmē tómén, etondεε ákwε ehintén, ngon-ne esóg apεn. Betintine bébid amín, béhün asé, ngine-’ε éche édé amín énaḡnéd á e’dii.

³⁰ Ene póndé dáo nyényínnē nεε e’chemléd é’ Mwän-a-Moonyonj é’bidé amín. Hē dáo metúmbé mé nkòḡsé mésyāāl mébootédte achii ne mbwóg. Bad bényín nεε Mwän-a-Moonyonj áhúε’ é á mbag mín, ne ngum, ne ehúmé ésyāāl.

³¹ Esaád é elonj émbaá éwògnéd. Ene póndé álom éche ángel á metóḡgé mé nkòḡsé mésyāāl méniiin, álad ábē bad áte ábe Dyöb ápwéde, bootya atóḡgé dé nkòḡsé ahóg ápe ádínií.

³² “Nyétéd eláḡsén wεε alín á ngal. Nzé ngen ébóótédé byaaá békāāle abided, nyébele nyébíi bán nchoḡj níde benben.

³³ Melemlem nzé nyényíné nímén mekan mésyāāl mébenlad, nyébíi nén bán, Mwän-a-Moonyonj akwogé ape,† adé-’ε benben.

³⁴ Ne mbále, nláḡge nyé nén mεé, enén nyonḡel e bad éemaá’ é kááḡ ne nímén mekan mésyāāl mébenlédé.

³⁵ Nkoḡj mí mín ne nkòḡsé bémaá, boḡj ábēm e’yale bēbē abé ne abé.

*Modmod eebíi’ é epun**éche Mwän-a-Moonyonj ápeé**(Mak 13.32-37; Luk 17.26-30, 34-36)*

³⁶ “Modmod eebíi’ é epun pen ké’ε póndé echē nímén mam mébenlédte. Ké ángel éche édé amín éebíi’ é, ké mwän ámpē eebíi’ é.‡ Titéε mwēmpen mó abíi póndé eche nímén mekan mébenlédte.

³⁷ Melemlem ngáne émbēε á póndé eche Noa, nē dáo ébēε póndé echē Mwän-a-Moonyonj ápeé.

³⁸ Ayāle á póndé eched, byánán mendíb mé mbúú mélōn á nkòḡsé-te bad bédyágé’áá bwēm, bémwāg-ke, bebaád ne baachóm bēwōḡne, kááḡ ne mbwε níme Noa ásólé á bōle é’mbáá-te.

³⁹ Bénkēmbíi’ é dyam áde ábenlad, kááḡ ne póndé eche mendíb mé mbúú mélónné, méhóód-te bō. Melemlem nē dáo ébenlédte á póndé echē Mwän-a-Moonyonj ápeé.

⁴⁰ Bad bébe bēbelé nsón á nzaḡ-té, Dyöb átéd nhóg, átédé aníní.

⁴¹ Bebaád bébe békogé medyé, Dyöb átéd nhóg, áchēnē aníní.

⁴² Né-óó nyétéd póndé áyāle nyéebíi’ é epun éche awen Sáḡwéé ápeé ámpē.

⁴³ Boḡj nyébíi nén bán, nzé nwóó-ndáb abyéé’áá póndé eche nchíb ápeé nkuu, né ádyéé epin ánon ndáb. Né enkēmmwaa áá nchíb ábóo mó ndáb.

⁴⁴ Né-óó nyémpē nyétáḡgéné mboḡsén abé, áyāle Mwän-a-Moonyonj ápē á póndé echē nyéekamtεné.

*Mbālede a bwām ne mbālede a mbéb**(Luk 12.41-48)*

⁴⁵ “Né-óó, nyé mod té ábē nεε mbālede awē awóó debyéé, awē abele-’ε mam níme eche sán áláḡgé mó áá ábēl. Mó adé mbālede awē eche sán ábánné áá ákamlen bembālede ábíní, anyín-ne nén áá békúdé echab ndyééd póndé echē etáḡgéné.

⁴⁶ Nnam mébē ne ane mbālede awē eche sán áhūū’ é, boḡj atán nēḡgáne ábeleé mam níme ányáḡtēnnē mó.

⁴⁷ Ne mbále nláḡge nyé nén mεé, ane mbālede eche sán ábané bwēm é’syāāl ábe awóó áwe mekáá áá ákamlan.

⁴⁸ Boḡj nzé ane mbālede adé mbālede a mbéb, boḡj ahóbé áwe nlém-té áá, ‘Ebēm áte boḡj echem sán áhūū.’

⁴⁹ Né-óó aboótédé ábíníi bembālede ábe bédé áse echē awanεn, ádyāḡ bwēm, ámwāg-ke mím ne be-mmwé-mímε.

⁵⁰ Boḡj ane mbālede eche sán áhūū epun éche éewēmtεné ne á póndé echē énkēmbíi’ é áá áhūū.

⁵¹ Ane mbālede eche sán ákōḡsēn mó hεén. Akōḡsēn mó melemlem ngáne ánkōḡsēnnē bedog-badé, áhed dós-’áá áchyéé’ é boḡj ádyāḡ-ke mesonj á nsāl.”

25*Ngan e ngōndérε dyóm*

† 24:33 Mwän-a-Moonyonj akwogé ape káa pónde ekwogé ape. ‡ 24:36 Ké mwän-ne ámpē eebíi’ é: donḡe á kálag déewóó’ é ábén e’yale.

¹ Yesue ambenléd ngan empée, áhšbē nēn aá, “Póndé eche Mwän-a-Moonyon ápée, nkamlen mí mín mébēē nēngáne ngandere dyóm eche éntéd ábab e’trúkán áke dé asin mod awē akude sómbé áke delyáged mós.

² Atínté échē ngandere dyóm, étáan émbē eyókél, étáan-ne énwōn debyéé.

³ Abe bémbē eyókél bēnwālē e’trúkán bon bēnkēnwālēé dyóg dé etrúkán áde ákwógnédé.

⁴ Bon ábe bēnwōn debyéé bēnwālē ábab e’trúkán ne dyóg démpēe á e’píd te.

⁵ Mod awē akudé’áá sómbé enkēnkobéé ape, né-óó e’chó é tágté’áá bó, békún-ne.

⁶ Melúde mé nkúu dós esaád ébidé bán, ‘Mod awē akude sómbé mós ahúe’ nēn! Nyéhyag-kós nyétán mós.’

⁷ Dós échē ngandere dyóm ésyāngé ásē, échágéd ábab e’trúkán,

⁸ Héé eche ébéde eyókél élanngéé eche énwōn debyéé bán, ‘Nyéwōngēn se áden dyóg dé etrúkán áyale e’trúkán ábēd é’dimme.’

⁹ Ngandere eche énwōn debyéé entimtén bó nēn bán, ‘Aáy! Dyóg áde séwóó déekwogké syānē moosyáál. Nyéke nyéchan áden wēé bésómé.’

¹⁰ Né-óó, ngandere chē énké dyóg dé etrúkán achan. Ade békíí nē, dós mod awē akude sómbé ápédé. Echē ngandere é debyéé étáan eche émbē mbonšén bósšō bēnké bésól á ndáb e ngande e e’wōngé bédib-pe ekob.

¹¹ Ambid e póndé dós éhíníí ngandere épédé bon bélébpé bán, ‘A-Sán dibnéd sé ekob!’

¹² Dós mod awē akude sómbé átímtanné bó aá, ‘Ne mbále, nlanngē nyé nēn meé meeblíí’ é nyé.’ ”

¹³ Héé Yesue ásogtéé ene ngan nēn aá, “Nyétéd póndé áyale nyéebíí’ é póndé eche Mwän-a-Moonyon ápée.”

*Ngan e bembáledé béléán
ábe bényágnédte ngáb
(Luk 19.11-27)*

¹⁴ Yesue ambád ampé aá, “Ene póndé nkamlen mímn mébē nēngáne mod nhóg awē anlédé eke áke, bon achélé ábe bembáledé alyóg eche ngáb áwáb mekáá.

¹⁵ Ambe bó mod té tāngene échē ngude. Ambe nhóg e’kálé é’ kábpe é’táan, ábe aníníí e’kálé é’be, ábe-’e aníníí ekálé ehóg. Amaá-’aá bó ábe bon ákag.

¹⁶ Mbáledé awē anküd e’kálé é’táan atéd níímē melemlen mé póndé áke akábén nyongé, ákudé’ e’kálé é’táan bēmpēe néē nsyān.

¹⁷ Awē mómpē anküd e’kálé é’be ambēl melemlen áküd-te e’kálé bēmpēe é’be néē nsyān.

¹⁸ Bon mbáledé awē anküd ekálé ehóg anké echóg alím, atéd níímē mōné níímē awē sāngwéé ámbéé mós, ákóó mós áwēd-te.

¹⁹ “Etūn é póndé ámbid enē, sāngwéé awē ábē bembáledé anhúu, bósšō béléúmtén áte ngáne bó mod téé ábēnlédé níímē mōné.

²⁰ Mbáledé awē ámbéé e’kálé é’ kábpe é’táan ampé wēé eche sán, áhšbē nēn aá, ‘A-Sán, wembé me e’kálé é’táan ábe ménkábenne nyongé bon níkud e’kálé é’táan bēmpēe néē nsyān, mós mén.’

²¹ Dós eche sán élanngéé mós aá, ‘Nē ábóó, edíí mbáledé a bwám, edé mod a mbále, ebelé bwám. Ngáne éhélé nsongé nísad alyáged, mébē we nsongé níbáá alyáged. Hyág-kó, déwóg menyínge.’

²² “Mbáledé awē bēmbéé e’kálé é’ kábpe é’be mós-’e ampé, áhšbē nēn aá, ‘A-Sán, wembé me e’kálé é’be ábē ménkábenne nyongé bon níkud e’kálé é’be bēmpēe néē nsyān, mós mén.’

²³ Dós echab sán álanngéé mómpē aá, ‘Ebelé dyam áde ábóó, edíí mbáledé a bwám. Ngáne éhélé nsongé nísad alyáged, mébē we nsongé níbáá alyáged. Hyág-kó, déwóg menyínge.’

²⁴ Dós ane-’e awē bēmbéé ekálé é’ kábpe ehóg ápédé bon áhšbē nēn aá, ‘A-Sán, mbíí meé edíí mod awē alélé áte. Ehúde’ wéé wéewénéé, épáde-’e wéé wéesobéé.

²⁵ Menwóg mbwóg, né-óó, menké níímōn mōné alíme á ndōob-té. Mímōn mōné mós níde, mós-’e we mén.’

²⁶ “Héé echab sán álanngéé mós aá ‘A-ebébtéd ne ewōmwōm é mbáledé! Wembíí wéé ndíí mod awē ahúde’ wéé éwénéé, wéé mpáde-’e wéé méesobéé.

²⁷ Cheé-š énkān bon wehéde níímēm mōné á ndáb eche bēkongéé mōné ábel nēn á ehúu échēm rítan néē níchyáá mōné mémpēe amín?’

²⁸ Dós ane mod álanngéé bembáledé bēmpēe aá, ‘Nyékoben mós níímē mōné nyébe wéé mod awē awóó e’kálé é’ kábpe dyóm.

²⁹ Kénzéé awē awóó, Dyób débād mós ábe, ábūd-te awōn bwámbwam. Bon ane awē mós-’e eewóó, Dyób dékobén mós kááñne mwámpín awē awóó.

³⁰ Né-óó anén mbáledé awē eésē dyam dé abenled, bēbwēm mós á ebwóg-te, á ehintén-té. Ahed-táá áchyéé’ é, ádyāg-ke meson á nsál.’ ”

³¹ Yesue ambád ahób ámpē aá, “A póndé echē Mwān-a-Moonyonj ápē nēe kǎn ne ángel é Dyób ésyāāl ádyéé á atii dé nkamlen ákáad bad.

³² Bad bésyāāl a nkǎnsé bēladén áte áwē e’só. Ene póndé ákab bó áte monje mébe melemlem nēngáne nnǎn-a-mbód ákabéé éche mbód áte, ábānē rǎdyonj mǎ mbód pēd pág, ábānē-’é tón é mbód échíníí epēd.

³³ Nē dǎo ene kǎn ébanéé bad ábe bésáá á ekáá émbáá, ábānē-’é bad ábe béesaá á ekáá é emwēd.

³⁴ Ade nēn débenlédté, áláá bad ábe bédé mó á ekáá émbáá aá, ‘Nyéhyag, nyé bad ábe echem Sǎnj ánámte! Nyéhye nyékob nnam mé nkamlen ní Dyób nǎme ábǎnséné nyé bootya póndé eche áhágé nkǎnsé.

³⁵ Nyéékúd nǎmén nnam áyāle áde nzaa ékóbé me, nyēmbéé me chǎm éche méndyēē. Ade píd ékóbé me nyēnhé me mendib mémwē. Ade mpédé-’é nken, nyēnkób me bwám.

³⁶ Ade ménkēnwǎnj’ é chǎm éche rǎwáá’ é, nyēmbé me mbóté. Ade ménkēndyē’ é bwám, nyēntagén me. Ade mbédé-’é á mbwǎg, nyēnhyē me anǎn.’

³⁷ Hēe bad ábe bésáá békwenténne mó bán, ‘A-Sǎnj póndé ehéé sēnnyǎnnē wē ne nzaa bonj sébē wē ndyééd, káa áde píd ékóbé wē bonj sébē wē mendib?

³⁸ Póndé ehéé-’áá sēnnyǎnnē wē bonj sékób wē nken áwēd mendáb, ké’ é sébē wē mbóté ádē wéewó’ é chǎm éche éhágkē?

³⁹ Póndé ehéé wénkēndyē’ é bwám, bonj sétǎgēn wē, ké-’ é séhyē sēnǎn wē ádē édíí á mbwǎg?’

⁴⁰ Hēe ene kǎn étimtanné bó aá, ‘Ne mbále, nlǎnge nyé meé, póndé ké ehéé echē nyēmbēnlé nē ne mwǎnned ké ahéé, ké awē eesé etógnén, né meé nyēmbeléé.’

⁴¹ “Hē-’áá áláá’ é bad ábe bédé mó á ekáá é emwēd aá, ‘Nyésyāe me á díd-te, nyé ábe nyékudé nkǎgsen ní Dyób. Nyékag á dǎ-á-muú nǎme méédtímē’, nǎme Dyób ábǎnséné áyāl e Devēle ne éche ángel.

⁴² Nzaa ewagé’áá me bonj nyēnkēmbáá me chǎm éche rǎdyákgē. Ade píd énkǎbpē me, nyēnkēháá me mendib.

⁴³ Mbédé nken, bonj nyēnkēnkǎbpē me áwēn mendáb. Ade ménkēnwǎngé chǎm éche rǎwáá’ é, nyēnkēmbáá me mbóté. Ade ménkēndyē’ é bwám, mbé-’ é á mbwǎg nyéētǎgne’áá me.’

⁴⁴ Hē dǎo békwenténne mó bán, ‘A-Sǎnj, póndé ehéé sēnnyǎnnē nēe nzaa, ké’ é píd ékóbé wē, ké’ é nēe édíí nken, ké’ é áde wéewó’ é chǎm éche éwáá’ é, ké’ é ádē ékonléé, ké’ é édíí á mbwǎg bonj séewǎngēne wē?’

⁴⁵ Hē ene kǎn étimtanné bó aá, ‘Ne mbále, nlǎnge nyé meé, póndé ké ehéé echē nyēnkēnwǎngénne ábén bad ké ahéé awē eebéde etógnén, me-’ é nyēnkēnwǎngénne.’

⁴⁶ Abén bó-aá béké ákud nkǎgsen nǎme méemaá’. Bad ábe bésáá-’ é béké á alongé ádē déemaá’.”

26

Bad bémháá bé Israēl

béhágke Yesue áwúu mó

(Mak 14.1-2; Luk 22.1-2; Jǎn 11.45-53)

¹ Ade Yesue ámáá nǎmē mam mésyāāl áyáged, dǎo álǎngéé ábē bembapēe aá,

² “Nyébíí nēn bán, ámbid e e’pun é’be Ngande e Nnyíme-ámín ébē. Echē epun dǎo bēbéé Mwān-a-Moonyonj á mekáá mé bad ábe bēbomé mó á awǎg.”

³ Bepriše bémháá ne bad bémháá bé dyad bémbǎm á ndáb wēe Kaifase, priše ambáámháa.

⁴ Ahed dǎo bēbélé’áá ntíí ákób Yesue á mesǎom-tē, áwúu mó.

⁵ Bonj bēnhǎb bán, “Deébélé nē á mbwē ní ngande, áyāle nēn bad bēpēen epuutéd.”

Mmwáád nhóg awǎgté

Yesue á dyad á Betani

(Mak 14.3-9; Jǎn 12.1-8)

⁶ Yesue ambé á Betani á ndáb wēe Simǎne awē akékolé nkole mé melǎj.

⁷ Ade ádyákgē ndyééd nē, dǎo mmwáád nhóg ápédé áwē ne apom á dyǎg dé elod é bwám áde dénlél nkun, ásyǎg mó dǎ á nló.

⁸ Nēe ábē bembapēe bényíné nē, bēnlǎj, bésédté-’ é bánken, “Cheé ékáá bonj anén mmwáád ábēbté, enén nyaa e dyǎg?

⁹ Béhélé’áá se bésóm ádén dyǎg nkun mbáá, bēwǎngén betóótókē bé bad.”

¹⁰ Yesue ambíí mam nǎme ábē bembapēe bēhóbé’áá. Né-’ó anláá bó aá, “Cheé nyétagté anén mmwáád? Dyam ádē ábēnlé me átómténé abonj.

¹¹ Betóótókē bé bad bēbé ne nyé póndé ésyāāl, bonj me pēn méebáá ne nyé póndé ésyāāl.

¹² Asyogé me ádén dyöŋ á nló áboŋsen me áyāle nlíme nímēm.

¹³ Ne mbále, nlánge nyé nén meé kéhéé ádē nímén nkalanj m̄ bwám mékanlédté nkōŋsé áte rísyāāl, bēhōb dyam ádē anén mmwāád ábélé, ákamten m̄ó.”

Judase akwēténé Yesue asóm
(Mak 14.10-11; Luk 22.3-6)

¹⁴ Ambld e nē, mbapēe nhóg átínté e dyóm ne bébe ábe Yesue, awě béchágé'áá bán, Judas Iskariode ankē beprise bémbáá atán.

¹⁵ Héé ásedtēé b̄ó aá, “Cheé nyébéé me nzé mbagé Yesue áwēn mekáá ábel nyékób m̄ó?” D̄óó bétóó móom mé kábpe meláán boŋ bébagé m̄ó.

¹⁶ Bootya ene pónde d̄óó ábótédé nzii ahed ásom m̄ó áwáb.

Yesue ne abē bembapēe bétómté

Ngande e Nnyíme ámín

(Mak 14.12-21; Luk 22.7-13, 21-23; J̄on 13.21-30)

¹⁷ B̄óó-b̄óó, pónde e Ngande e Ewēle-é-Ngēn emp̄é. A epun é'só é ngande, bembapēe ábē Yesue bēntán m̄ó, bésedte m̄ó bánken, “Héé wédan̄gé weé séboŋsen we ndyééd e Nnyíme-ámín?”

¹⁸ D̄óó Yesue álóméé b̄ó á dyad-tē wēe mod nhóg aá, beláa m̄ó bán meléede ahóbé nén aá, “Echem pónde emaa ape. Awōŋ ndáb d̄óó syáabe ábēm bembapēe sédyēē ndyééd e ngande e Nnyíme-ámín.”

¹⁹ Né-óó bembapēe bēmbēl ngáne Yesue ánlā'áé b̄ó, bēmbōŋsén-ne ndyééd e Ngande e Nnyíme-ámín.

²⁰ Ene ngukél Yesue ne ábē bembapēe bēndyēé ásé, bēdyāg ene ndyééd.

²¹ A ndyééd m̄ín wē, d̄óó Yesue álan̄géé b̄ó aá, “Ne mbále, nlánge nyé nén meé nyé mod nhóg ábē me á mekáá mé bad bé ekoyí.”

²² Nén dēnwōgēd bembapēe ndutul bwámbwam. Bēmbóótéd m̄ó aseded nhóg ámbld aníní, bán, “A-Sán, ndúbpé meé saké me.”

²³ D̄óó Yesue átímtanné b̄ó aá, “Mod awě súm̄ó séētōde ewēle á d̄ise-tē atōde ahóg m̄óssóm me.

²⁴ Mwán-a-Moonyonj áwē ngáne éténléde, boŋ medim ne ane mod awě ásom m̄ó. Ebágé'áá bwám ne ane mod nzé bēnkéntōgen m̄ó achyáa.”

²⁵ Héé Judase awě ankwētén Yesue asóm ásedtēé m̄ó aá, “A-meléed, me-yé?” Héé Yesue átímtanné m̄ó aá, “Ngáne éhóbé.”

Ndyéed e Sányú

(Mak 14.22-26; Luk 22.14-20; 1 K̄or 11.23-25)

²⁶ Ade bēdyákē ndyééd nē, d̄óó Yesue átédé ewēle, áságñān Dyōb, boŋ ákabtaád áte, ábagé ábē bembapēe áhóbé nén aá, “Nyékob, nyédyé, echem yál nén.”

²⁷ Ambld e nē, antéd mbwendé m̄í m̄ím, áságñān Dyōb, ábagé b̄ó, boŋ áhóbé nén aá, “Nyé moosyāál nyémwē.

²⁸ Mmēm mekií m̄ómén. Mmén mekií médií melē mékōs̄lē. Mmén mekií mésyógkē á nló m̄í bad híin, ábel nén Dyōb álaḡsen b̄ó mbéb.

²⁹ Nlánge nyé nén meé, méemwáá nímén m̄ím ámp̄é k̄óŋj ne epun éche mémwēé m̄ó ekóólé ne nyé á nkamlen nímé echem Sán.”

³⁰ Bēnkōn nk̄ŋgé mé nságnen. Néé bémáá akón, bēnké á Ekone é menzab.

Yesue ahóbé ngáne

Petro ában̄gē m̄ó áyāl

(Mak 14.27-31; Luk 22.31-34; J̄on 13.36-38)

³¹ Ade bēpédé á ekone m̄ín, d̄óó Yesue álan̄géé ábē bembapēe aá, “Nkuu nén dēn, nyé baasyāāl nyēnyagéd, nyétēde me. Nyēnyagéd, áyāle dyam áde dēbenléd ne me. Eténléde nén bán, ‘Mēwūū nnōn-a-mbód, éche mbód ésyāāl épántéd áte.

³² Boŋ ádē echem Sán ápuúdté me, mēkē á'só á Galilia, áwed-taá nyétānnē me.’”

³³ Ade Yesue ámáá ahóbé nē, d̄óó Petro áhóbéé aá, “Ké moosyāál ambāŋ we áyāl, me pen méetetéé we mbéd.”

³⁴ D̄óó Yesue átímtanné m̄ó aá, “A-Petro, rílāa we meé, nchóm-a-kúb adēhób aá m̄ótōo' nkuu nén, wēbāŋ me áyāl ngen éláán.”

³⁵ D̄óó Petro ábádtēé m̄ó áte aá, “Ké nk̄ŋj m̄óó bésēlēē me, méebāŋgé we áyāl mbéd.” Abíníí bembapēe bésyāāl b̄ómp̄é bēnhōb melemlen.

Yesue akánné á Getsemani

(Mak 14.32-42; Luk 22.39-46)

³⁶ Ambld e nē, Yesue ne ábē bembapēe bēnké á abwóg á h̄óm áde béchágé'áá bán Getsemani. Ade bēpédé, Yesue anlāá b̄ó aá bēdyēe áhed, aá m̄ó-é m̄ósf̄dte' á'só, ákáne.

³⁷ Ade akagké, ankeén Petro ne bán ábe Zebédie bébe. Ndange ne metake hiin bébédé mós ánlém-té.

³⁸ Dóo álàngéé bó aá, “Ndange eché edé me ánlém ehéle-se ewúú me. Nyélyag hén, nyédyeen me epin.”

³⁹ Dóo Yesue ásidté á’só ámpē bon ábwēmē yāl ásē. Ankúdán ásē, akännē aá, “A-Tē, nzé ébónnéde wē, ékóbēn me nímén metuné. Bon ké nē, bēl ngáne ébónnéde wē, saké ngáne ébónnéde me.”

⁴⁰ Ade amáá akáne, antim ámbíd wée ábē bembapēe beláán. Antán nēe békúnéé, bon álàngē Petro aá, “Cheé ékás bon nyéehéle awesen ádyeen me epin ké háwa póg?”

⁴¹ Nyédyeen epin, nyékánne ábel nén Dyób déemwäg-se mekagsen mépiinéd nyé. Nlém rídás, bon ekob é yāl edé mbwóg.”

⁴² Yesue anke akáne ámpē, áhōbē nén, aá, “A-Tē, nzé edé nén bán, weéhélēē-se ékóbēn me nímén nted mé metuné, ésebán mpémé mós, ébel ngáne ébónnéde wē.”

⁴³ Nēe átimé ámbíd ámpē, antán nēe ábē bembapēe bédii békúnéé áyále e’chá bémbē bó á díd bwámbwam.

⁴⁴ Yesue antim ámbíd á mekáne ámpē ngen éche élónténe éláán, áhōbē melemlem mé e’yale.

⁴⁵ Hē dóo Yesue átimé ámbíd ámpē wée ábē bembapēe, bon álàngē bó aá, “Nyélyagé nyékúne’, nyékómme-’e nyé áte-ye? Nyénone’, pónde-’aá epedé nén eche bébéé Mwán-a-Moonyon á mekáá mé bad bé mbéb.

⁴⁶ Nyépáde ásé dékag. Nyénone’, mod awé akii me ntúrē mós ahúe’ nén.”

Békóbé Yesue

(Mak 14.43-50; Luk 22.47-53; Jon 18.3-12)

⁴⁷ Ehōb éepedeé Yesue amaa á nsal bon Judase ápag. Judase, mbapēe nhóg áfinté e bembapēe dyóm-ne-bébe ábe Yesue, ámpē ne amute ádē dénwálé nkwaté ne mbid. Beprise bémbáá ne bad bémbáá bé Israel bóo bénlóm ábē bad.

⁴⁸ Ntúrē awé Yesue amad bó e’chemléd abe aá, “Kéznéé awé méhēē tál, né mod awé nyéhedeé mōne, nyékób mós.”

⁴⁹ Nēe Judase ápedé pēén, atóm-me wée Yesue, áléléd mós aá, “A-meléed, nsan mbē ne wē.” Ahé-’e mós tál.

⁵⁰ Yesue antimén mós aá, “Amúē, wéebeléé chóm éche éhyédé abel-’e?”* Hē dóo ábē bad bésidté á’só, bon békóbē’ Yesue, bēwéd-te mós acháa.

⁵¹ Hē dóo mod nhóg áfinté e bad ábe bémbē ne Yesue ádólé nkwaté á abám, nēe átómté mós bon asél-le ntán awé prise ambáámáa etúu.

⁵² Dóo Yesue álàngéé ane mod aá, “Timéd nimon nkwaté á abám. Kéznéé awé awanne nkwaté, nkwaté móo bēwūēnnē mós.

⁵³ Weehí’ē nén wée nzé nhēdné echem Sán nwōngēn, wēé né ábwāg-ábwāg, álómē me e’chon ne e’chon é ángel áwōngēn me-ye?”

⁵⁴ Bon nzé mbelé nē, né chán-nō kálag e Dyób eché ehóbē nén aá, nén átāngéné abenled élónné?”

⁵⁵ Hēe Yesue álàngéé ádē amute aá, “Nchíb móo rídí awé nyéhyédé akób ne mbid ne nkwaté-ye? Epun téé mbédé á Ndáb-e-Dyób, rí’yāgtē bad, bon nyéekóbe me.

⁵⁶ Bon nímén mésyāal mébénlédé álóned mam nime bekal bé’dáodān bétélé á kálag e Dyób.” Hē dóo bembapēe bésyāal bétédte mós, bon bétómé mehélé.

Bépéneé Yesue á kóte

(Mak 14.53-65; Luk 22.54-55, 63-71; Jon 18.13-14, 19-24)

⁵⁷ Hē dóo bad ábe bēnkōb Yesue békééné mós á ndáb wée Kaifase awé ambé Prise Ambáámáa. Ahed dóo bemeléede bé mbéndé ne bad bémbáá bé Israel bēmpēe bēnladénné áte.

⁵⁸ Ade békéneé Yesue nē, Petro ahidé’áá mós ámbíd mwā etún kásān bēpe nchiiten ne eyáde éche Kaifase. Nēe ápedé áhed ansól á eyáde-té, ádyē ásē ne benon bé Ndáb-e-Dyób, ábel nén ányín ngáne nkáásé nime Yesue mésoǵkē.

⁵⁹ Bóo-b-’pós, beprise bémbáá ne bad bé káansel bésyāal bēhédé’áá bad ábe bēbíd mbón é metóm á nló wée Yesue ábel nén bēwúú mós.

⁶⁰ Ké nēngáne ekud é bad éhnyē mbón é metóm abíd áwe nló, bēnkēnkóbénné mós awusé ké ahóg. Kásān ne á asóg, dóo mbón ébe ébídé, éhōbē nén bán,

⁶¹ “Anén mod anhób aá, móhele móbōōtéd Ndáb-e-Dyób aá mólōn-’e chó ámbíd ámpē áfinté e e’pun é’láán.”

* 26:50 Amúē, wéebeléé chóm éche éhyédé abel-’e? Káa, Amúē, cheé éhyédé abel hén?

⁶² Ade Prise Ambaábmbáa éwógé nê, dóo átyéémé ámin bonj áseɗtɛ Yesue aáken, “Weewóo’ é dyamdyam áhób tângene dyam ádê ábén bad béhóbé wɛ á yàl-ɛ?”

⁶³ Bonj Yesue enkénkædénne mós. Hê dóo Prise Ambaábmbáa álãngéé mós ámpê aá, “Ne melê á ðín á Dyöb áde ádê á alonjé, láá sé mbále, wɛ-ɛé edé Ane-awê-Béwógté, Mwán á Dyöb-ɛ?”

⁶⁴ Hê dóo Yesue ákwentanné mós aá, “Ngáne éhóbé.” Yesue ambád-te ámpê aá, “A mbále, nlãnge nyé nén meé bootya enén pónde, nyényín nê Mwán-a-Moonyonj ádyéé á ekáá émbáá é Dyöb á Ngum. Nyényín-ne nêe ádyéé á mbag mín, ásudeé á nkõjsé.”

⁶⁵ Dóo Prise Ambaábmbáa ányábé mbóté álúmed nén aá mólii, bonj álãngé bad bé kóte aá, “Asyáá Dyöb! Mbónj éhéé émpêe déhedéé? Nyé baasyáal nyéwógé bõob ngáne ásyáá Dyöb!”

⁶⁶ Dóo áseɗtɛé bós aáken, “Chán nyéwémtené?” Hêe békwénténé bán, “Akwedé nkáá, atãngéné-ɛ awê.”

⁶⁷ Dóo donje á bad bébóótédé mós meléed asobted á’só, bébómé-ɛ mós. Abíní-ɛ bébómé mós mebén,

⁶⁸ béhóbé-ɛ bán, “A-mod awê ahóbé aá móo móðé Krístæ, láá-ɛ sé mod awê abómé wɛ.”

Petro abáá Yesue áyãl

(Mak 14.66-72; Luk 22.56-62; Jon 18.15-18, 25-27)

⁶⁹ Ene pónde Petro andyeé ásê á eyáde é kóte-tê. Hê dós ngandére e mbaledé póg épédé áwê, bonj éhóbé aá, “Wɛ nén, edé nhóg awê awõjné’áá Yesue, ane mod awê abíde á mbwóg e Galilia.”

⁷⁰ Bonj Petro antãnj á’só wéé ábê bad bésyáal, ákwentén aá, “Meebíi’ é dyam áde éhóbéé.”

⁷¹ Ade ámáá ahób nê, antñm á mmwe mé eyáde é kóte. Áhed dós mbaledé a ngandére ampée ányíné mós, bonj álãngé bad ábe bébédé áhed aá, “Anén mod abédé ne Yesue, mod a dyad á Nazaret.”

⁷² Bonj Petro antãnj ámpê, áhóbé nén aá, “Mmwág melê nén meé meebíi’ é me ane mod.”

⁷³ Eebemeé áte, bad ábe béntyéem áhed bémpê wéé Petro, bonj béhóbé nén bán, “Etáa ngên, edé nhóg awê ahíde’áá ane mod. Mbwéd e ehób echõnj epanle wɛ áte, nén ebíde á mbwóg e Galilia.”

⁷⁴ Dóo Petro ámwáké melê aá, “Dyöb ákõgsen me nzé nkale metóm! Meebíi’ é ane mod!” Ade ámáá ahób nê hóbén, nchóm-a-kúb antõnj.

⁷⁵ Dóo Petro ákámtené ehób éche Yesue ánlãá’ é mós aá, “Nchóm-a-kúb adéhób aá mótoó’, wêbãnj me áyãl ngen éláán.” Dóo Petro ábíde á ebwóg-te, bonj ábãnlê awê. Anchií bwámbwam.

27

Békééné Yesue wéé Payledé

(Mak 15.1; Luk 23.1-2; Jon 18.28-32)

¹ Nêe bín é’sãnjé sãnjén, beprise bémbáá ne bad bémbáá bé Israel bésyáal bémbóotéd Yesue aháge ngáne béwúú’ é mós.

² Bênhãnj mós, bébãg-ke mós á mekáá wéé Payledé awê kãnj e alonj á Roma émbanéeé aá ákamlan bad bé mbwóg e Judeya á pónde eched.

Kwééd eche Judase

(Mbel 1.18-19)

³ Ade Judase, ntúré awê Yesue ányíné nén aá kóte ebagé mbakú nén bán béwúú Yesue, ambé ngól ne awusé áde ábélé. Nê ðenkãnj, antéd móom mé kábpe meláán níme beprise bémbáá ne bad bémbáá bé Israel bémbéé mós, áke átúmtéd bós ámbíd.

⁴ Anhób aá, “Mbelé mbéb áke mod ntúré awê eébele dyamdyam, awê béwúú’-áá bõob ngên.” Dóo bétimtanné mós bán, “Cheé séwóó abel ne nê? Nê ánoe wɛ.”

⁵ Nêe Judase áwógé nê, ambwémé bós nímé móom mé kábpe meláán ásê wéé bémbéé á Ndáb-e-Dyöb. Nêe ámáá abwém, ámbíd áke ápan yãl.

⁶ Beprise bémbáá bẽnlãd nímé mone áte, béhóbé nén bán, “Mmẽn mone nídií mone mé eben. Né-õó, mbéndé eébageé kunze nén bán déladten nímẽn mone ne mone ní Ndáb-e-Dyöb.”

⁷ Ade bémáá ahãgten tãngene nímé mone, béntéd mós, béchãnen etúú éche ébédé etúú é mod nhóg awê atumé’áá mbeé. Bẽchan chós, álíme beken.

⁸ Nê dós ákás bonj kásnj ne’ chii, béchágé éché etúú bán, Etúú é Mekii.

⁹ Nén, dẽmbenléd álóned e’yale ábe nkal é’daádãnj Jeremayaa ánhõbpê aá, “Béted móom mé kábpe meláán níme níde nsonjé ní mone níme donje á bad bé Israel bẽnkwenténne asábe áwe nló,

¹⁰ bébẽnléd áchanen etúú éche ntumé-mbeé. Nén dós Dyöb dénlãá’ é me aá, mbel.”

*Paylede akáádté Yesue**(Mak 15.2-5; Luk 23.3-5; Jɔn 18.33-38)*

¹¹ Enén pónde-ɔ́ Yesue antyéém á nkáásé á'sò wée Paylede awě akámlánnáá mbwóg e Juda. Paylede ansedéd mó aá, “Wée edé kǎn e bad bé Israel-ε?” Yesue antimtén mó aá, “Ngáne éhóbé.”

¹² Boŋ áde beprise bémbáá ne bad bémbáá bé Israel bénhóbpé mó mam áyǎl, enkénhóbpé dyamdyam.

¹³ Né-ɔ́ Paylede ansedéd mó aáken, “Weewógéé nímén mam mésyǎl níme ábén bad béhóbé e wε áyǎl-ε?”

¹⁴ Boŋ ké nê, Yesue enkénhóbpé ké eyale, nê-ε dénkǔméd Paylede yǎl áte bwámbwam.

*Mbakú e kwééd eche Yesue**(Mak 15.6-15; Luk 23.13-25; Jɔn 18.39-19.16)*

¹⁵ Bɔɔb-pɔ́, mwě téé nzé Ngande e Nnyíme-ámín empě, Paylede ammentén mod a mbwóg nhóg abided á mbwóg. Ane mod abágé'áá mod ké ahéé awě bad bé dyad bempwdté.

¹⁶ Ene pónde mod a mbwóg nhóg ambé awě béchágé'áá bán Barabase. Ane mod ambyéén bwámbwam áyǎle e'bébtéd é' mekan ábe ábélé'áá.

¹⁷ Né-ɔ́ áde ndun e mod éladné áte á ndáb wée Paylede, ansedéd bó aá, “Nzé-módé nyéhédeé bán níbided, Barabase ké'ε Yesue awě béchágéé bán Krístáa?”

¹⁸ Ambel nén áyǎle ambii bwám aá prise ambáá ne baámáá bebágé Yesue áwe mekáá áyǎle kǎnjí embé bó áte.

¹⁹ Ade Paylede ádyéé á atii wée akáádté'áá bad, mwaád anlómé mó nsǎl aá, “Weewóó dyamdyam ábel ne mbakú eche ane mod awě eébele dyamdyam, áyǎle nnǎngé mó nló nkuu níme rítómé nén níme rítágté me bwámbwam.”

²⁰ Beprise bémbáá ne bad bémbáá bé Israel bénsǎl ábê bad áte nén bán beláa Paylede ábided dásɔ́ Barabase boŋ ábe mbakú nén béwúu Yesue.

²¹ Né-ɔ́, áde Paylede ásdté ábê bad aá, “Áyǎle ábén bad bébe, ahéé nyéhédeé bán, níbided?” Bó moosyǎl bēnkwentén bán, “Barabase!”

²² Dɔ́ Paylede ásedtéé bó ámpě aá, “Chán-nɔ́ nyéhédeé bɔɔb bán níbel ne Yesue awě béchágéé bán Krístáa?” Dɔ́ bēkwentanné bán, “Bébome mó á awóg!”

²³ Héé Paylede ásedtéé bó ámpě aá, “Áyǎle chán? Ebébtéd éhéé ábélé?” Boŋ bénnabé abón bán, “Bomé mó á awóg.”

²⁴ Ade Paylede ányiné aá móðhélē se móhǎjǎlén ábê bad mewēmten tǎngene mbakú eche Yesue, ábán nén aá, ábê bad bépeene' mpuutéé, dɔ́ átédé mendíb boŋ áwobpé mekáá áwab e'sò, áhóbe-ε aá, “Mekáá mésáá me áyǎle kwééd eche anén mod. Nê áñone nyé bēn.”

²⁵ Héé ene ndun e mod ékwentanné bán, “Sékwenténé. Mmē mekiú mébê áwed nló, nchoo ne níméd nchyaátén!”

²⁶ Né-ɔ́, Paylede ambítéd bó Barabase. Ambě kunze aá, sánze ébom Yesue, boŋ béke bébome-ε mó á awóg.

*Sánze éwélé Yesue**(Mak 15.16-20; Jɔn 19.2-3)*

²⁷ Sánze eche Paylede éntéd Yesue, ékēēn mó á eyáde é nkamlene, beláad-te baáb ábinií bésyǎl áte áhed.

²⁸ Bénhūd mó mbóté áyǎl, béhé mó mengombe níme ní'yáge' níme níwágné mengombe mé kǎn.

²⁹ Béntéd ngen é mechǎ, belóó mó ekóté eche émbē néé ekóté é kǎn, béhé mó ch́ á nló. Bénhē mó ntón á ekáá é mbáá te, bébwáǎgkē-ε mó mebóónj áwel mó. Béhóbé'áá nén bán, “Edúbé ébē ne wε, a-kǎn e bad bé Israel!”

³⁰ Dɔ́ bebóótédé mó meléed asob á yǎl, boŋ bétédé nímé ntón, bebómé mó á nló.

³¹ Ade bémáá mó awel, bénhūd mó nímé mengombe á yǎl, bétíméd éche mbóté. Néé bémáde nê, bēnkēén mó áke dé ábome mó á awóg.

*Bébómmé Yesue á awóg**(Mak 15.21-32; Luk 23.26-43; Jɔn 19.17-27)*

³² Ade békagké nê, néé éché sánze ébidēnné Yesue á dyad-té, dɔ́ bebómmé mod awě ambíd á dyad á Sirine awě béchágé'áá bán Simone. Héé békóbé mó, boŋ bepēmte mó awóg áde Yesue bán áhidne mó d́ ambíd.

³³ Dɔ́ bebédé hóm áde béchágé'áá bán, Golgota, awě adé nén bán, “Hóm dé Ebóngél é Nló.”

³⁴ Áhed, bēmbě Yesue ním nímé béhédeé achachæ áte. Boŋ adé áwógléné mó á nsǎl, enkēnkwenténné amwé.

³⁵ Ade bémáá mó abome á awóg bénsíd mbambú ákab éche mbóté.

³⁶ Née bémáá mós mbóté akab, bényéé áhed ánon mós.

³⁷ Béntél eché nzom e kwééd á abámbe nén bán, “Yesue móo nén, kâh e bad bé Israel.” Béntéd ádé abámbe, bébómē áwe nló-mín.

³⁸ Bémomé bechíb bébe á awög nchoo ne Yesue, nhóg á ped e ekáá émbáá, aníní-é á ped e ekáá é emwed.

³⁹ Bad ábe bétómé’áá nzii benben ne áhed bébómé’áá nló bébwēmme-é mós nzyáñ

⁴⁰ bán, “Wenhób weé mósboótéd Ndáb-e-Dyób, weé mólōñ-é chó ámpé áfinté e e’pun é’láán. Nzé we-éé edé Mwán a Dyób, sōñ echoñ yál, ésud ásé á awög hē.”

⁴¹ Beprisé bémáá, bemeléde bé mbéndé ne bad bémáá bé Israel bómpe béwélé’áá mós, béhábē bán,

⁴² “Achōñté’áá bad, bōob eéheleé yál awōñgen. Nzé ne mbále mōdé kâh e alon á Israel, ásud-tōó á awög hē bōob. Hé dōó sédübē bán mōdé Ane-awé-Béwōgté.

⁴³ Adubpé áá Dyób ádé ne mós, áá mōdé-é Mwán a Dyób. Ahá! Dyób áwōñgen-nōó mós bōob dényín.”

⁴⁴ Kósñ ne bechíb ábe bémoméé á awög nchoo ne Yesue bómpe bésyóó’áá Yesue.

Yesue awédé

(Mak 15.33-41; Luk 23.44-49; Jon 19.28-30)

⁴⁵ Ade bín é’pedé kəd, ehintén énkwé hóm ásyāal kósñ ne ngāñ éláán.

⁴⁶ Dōó Yesue álébpé esaád áá, “Elí, Elí, lámá sábatāni,” awé ádé nén bán, “A-Dyób ádem, a-Dyób ádem, cheé ékós boñ étédte me?”

⁴⁷ Néé donge á bad ábe bémbe benben béwógé nē, bénhób bán, “Achēnle Elaijaa áá áhye áwōñgen mós.”

⁴⁸ Abwōg-ábwōg bós mod nhóg annyagéd, antéd kuchá, ásōm á ntón, átōdē á ebéntéd é mím tē, boñ áhāg mós á nsal áá ámwē.

⁴⁹ Abíní-é béhábē nén bán, “Nyémwe, dényín nzé Elaijaa áhye mós awōñgen.”

⁵⁰ Hé dōó Yesue álébpé esaád ámpé boñ ámyē-é nlém.

⁵¹ Ene pónde chēn abad ádé dēnkāb Ndáb-e-Dyób áte, dēnsalé áte e’ped é’be bootya ámín kósñ ne ásé. Ndōob ennāñnéd, meláá mésanlé áte,

⁵² soñ énednad. Ekud é bad bé Dyób ábe bēmmad awé bēmpuú,

⁵³ bébíd á soñ-tē. Ámbíd e pónde áde Yesue ámáá apuu, bēnké á dyad tē á Jerusalem. A dyad tē wē, ekud é bad énnýín bós.

⁵⁴ Néé mod ámbáá a sánze ne sánze éche énoné’áá Yesue bényíné née ndōob énonéde, bényín-ne mekan mésyāal nime mébēnlédé, mbwōg ménkōb bós bwāmbwam, béhóbē-é nén bán, “Ne mbále, anén mod abédé Mwán a Dyób.”

⁵⁵ Ekud é bebaád éche émbootéd Yesue ahíd ámbíd se á Galilia, béwōñgān-ne mós, béntyēem etún, bēnōné mekan mésyāal nime mébēnlad.

⁵⁶ Áfinté e ábē bebaád, Maria Magdalēne, Maria awé abédé nyaá awé Jemse bós Joseb, ne nyaá awé bán ábe Zebēdie bémbe áhed.

Níme nime Yesue

(Mak 15.42-47; Luk 23.50-56; Jon 19.38-42)

⁵⁷ Néé ngukél épédé, nhōn ní mod nhóg níme béchágé’áá bán Josebe mēmpē. Ane mod abédé mod a dyad á Arimatia. Mómpe abédé nhóg awé ahidé’áá Yesue.

⁵⁸ Ankē wēé Payledé áá ábe mós kunze átéd ndim níme Yesue. Payledé ambē kunze nén áá bébe mós ndim níme Yesue.

⁵⁹ Josebe antéd ndim níme Yesue, ákāān mós mbóm e ekóólé,

⁶⁰ alímé mós á soñ eche bépwógé á eláá-tē. Ene soñ ebédé-é soñ e ekóólé eché Josebe mwēn ánwōñgē. Ámbíd e nē, antínéd aláá ámbáá akólns nsal ní soñ, ákē-é mós.

⁶¹ Maria Magdalēne ne Maria awé anchyáá Jemse bós Joseb, bēnyāg bēdyēé á nkag ní soñ.

Payledé alomé sánze

ánon soñ eche Yesue

⁶² Néé bín é’sāngé, nē démbē á Mbwe-mé-nkōme-áte, beprisé bémáá ne Befarisia bēnladēn, béke bényín Payledé,

⁶³ bēlāngē mós nén bán, “A-sāj, sékamtan nén bán ádé nkā a metómē ne abédé ámín, anhób áá móspuú ámbíd e e’pun é’láán.

⁶⁴ Né-ōó tóméd akale nén, wēé bēnōne’ eché soñ bwām, kósñ ne e’pun é’láán ábel nén boñ ábē bembapēe béehelé nímē ndim achíb se bēlāngē bad bán apuúde. Né nén débē metóm nime níchábé ámín tómaa níme ásebpé akal.”

⁶⁵ Dōó Payledé álāngéé bós áá, “Nyétéd sánze ánon soñ bwām, ábel nén dyamdyam débēnlád.”

⁶⁶ Hée békíí, boŋ béhāg e'chem á aláá adé démbē á nsəl rí soŋ, ábel nén bēbii nzé mod anédťé, bétédē-’e sánze áhed ábel boŋ béčhībē Yesue ndim.

28

Yesue apuúde

(Mak 16.1-10; Luk 24.1-12; Jōn 20.1-10)

¹ Ambíd e mbwe-mé-nkóme-áte, á epun é’só é sōndé,* epog é mbwembwe, Maria Magdalenē ne Maria awē anchyáá Jemse bō Joseb, bēnkē soŋ eche Yesue anōn.

² Esám-éékōmtēnē, ndōob ennəŋnéd, ángel e Dyōb ebíd amín épe. Entínéd adé aláá adé démbē á nsəl rí soŋ, édī-’e dō amín.

³ E’só é’péné’áá ene ángel áte née emwedmwed, mbóté-’e épūbē mós féréd.

⁴ Mbwōg ménkōb sánze éche énoné’áá ene soŋ. Nē dēnkāŋ bēnnəŋnéd, békwe áse, bēbē née ndim m bad.

⁵ Hée ángel élanġeé ábē bebaád aá, “Nyéebáá’. Mbíí meé Yesue awē bēmboméé á awog móo nyéhyédé anōn.

⁶ Eésaa hén. Apuúde ngáne ánlāá’ é nyé aá ébenléd. Nyéhye nyénōn wée bēnnaadté mó.

⁷ Nyékag-kōs mehélé bōob, nyéláa ábē bembapee bán, apuúde, amaá-’e ake á’só á Galilia, áwed-taá bényinē mō. Nyéechatán dyam áde rílanġe nyé.”

⁸ Né-ōs, bēnhidnéd mehélé áhed, ké née bēbédé mbwōg, menyinge mémbe bō áte. Bēnnyagéd áke déláa bembapee ábe Yesue dyam áde ábenlédé.

⁹ Ade ábē bebaád békagké nē, dōo Yesue átáné bō táléd, boŋ áhōbē aá, “Nlēté nyé.” Bēmpē áwe, békōbén mō á mekuu ábe mō edúbé.

¹⁰ Hée Yesue álanġeé bō aá, “Nyéebáá’. Nyéke nyéláa ábēm bembapee ábe bédé née ábēm baanyan nén bán, békag á Galilia. Awed dōo bényinē me.”

Sánze éhōbē dyam áde ábenlédé

¹¹ Ngáne ábē bebaád békagké aláa bembapee ábe Yesue dyam adé ábenlédé, doŋge á sánze adé ánóné’áá soŋ eche Yesue dēnké á dyad-tē áke dé aláa beprise bēmbáá chōm ésyāal éche ébenlédé adé ángel épédé.

¹² Beprise bēmbáá ne bad bēmbáá bé Israel bēmbōm átti ngáne bēbenléd. Née bémáá atii, bēmbē éché sánze nsoŋgé mī mōné míme ríchábé amín.

¹³ Běláá-’e bō bán bēhōb bán, “Yesue ábē bembapee bēnhye mó ndim achíb nkuu adé nyékúnéé.

¹⁴ Nzé Payledé awógé, né séebēl adúbé nén aá awusé déesaa ádēn. Nē dēbēl nyéesónlé á ndutul-tē.”

¹⁵ Né-ōs éche sánze énkōb mímē mōné, bēbēl-le ngáne bēnlāá’ é bō. Kósŋ ne’ chii, bad bé Israel bēdii békale mímē nkalan.

Yesue apúldé ábē bembapee

(Mak 16.14-18; Luk 24.36-49; Jōn 20.19-23; Mbēl 1.6-8)

¹⁶ Bōob-pōs, bembapee dyōm-ne-nhōg ábe Yesue bēnké á ekone-mín á Galilia wée ánlēbēē aá bēke.

¹⁷ Anyín adé bényinē mó, bēmbē mó edúbé, kénée bō doŋge á bad bēnkēnkoŋgé adúbe nén bán Yesue mwēn-éé akōŋté abé.

¹⁸ Hée Yesue ásídté bō benben, boŋ álanġe bō aá, “Kunze esyāal ebāgnédé me, ádyōb ne á nkōŋ ríse.

¹⁹ Nyékag meloŋ mé nkōŋsé mésyāal, nyébele bad ábēm bembapee. Nyédusan-ne bō á đín adé Títéé, á đín á Mwán ne á đín dé Edāsdāŋ éche Esáá.

²⁰ Nyéyágte-’e bō áhíd mekan mésyāal míme rísógténé nyé. Nyébii nén bán mēbē-’e ne nyé kósŋ ne á asóg dé nkōŋsé.”

* 28:1 Nédé á Sōndé.

Nkalan ní bwám níme Yesuɛ ngáne

Makɔsɛ

átélé

Ndibned ní kálag

Nkalan ní bwám ngáne Makɔsɛ átélé níhóbe tǎngene Yesu Krístəə, Mwǎn a Dyǒb. Nlúmté Yesuɛ ngáne mod awé abele mekan, awón-’ɛ kunze ábel nímé mekan. Ene kunze enyínnédé áyál e mekan níme áyágté’áá ne níme ábélé’áá. Yesuɛ ahóbé aá mós módé Mwǎn-a-Moonyon awé ampé, ábe ádè alonǵé, ábel bon bad békud alagsen dé mbéb.

A kálag té wén, Makɔsɛ ábídté mekan áwed níme Yesuɛ ábélé’áá tómaa níme áhóbé’áá ne níme áyágté’áá. Ahóbé ngáne Jone áhǎǵé epe éche Yesuɛ, ahób tǎngene edusen éche Yesuɛ, ahób-pe mekǵsen níme Yesuɛ ánkudté. Asóged, alúmté áte ngáne bemboméé Yesuɛ á awǵ ne ngáne ámpuú’é. Nyaa édé ébe éche enén kálag ésógé, élúmté-’ɛ nén bán saké Makɔsɛ átélé chó.

Nkabted ní kálag

Mbooted mé nkalan ní bwám 1.1-13

Nsón níme Yesuɛ á Galilia 1.14-9.50

Nsón níme Yesuɛ áde áhídté a Galilia ápe á Jerusalem 10.1-52

E’pun bé asóg ábe Yesuɛ á Jerusalem ne bemben ne Jerusalem 11-13

Akáad áde békáádté Yesuɛ ne kwééd eche áwédé 14-15

Mpuu níme Yesuɛ 16.1-8

Alúmed áde Sǎǵwéé álúmté yǎl ámbíd e mpuu ne mpume nímé 16.9-20

Ehǎǵé éche Jone, Nduɛne

(Mat 3.1-12; Luk 3.1-18; Jon 1.19-28)

¹ Nkalan ní bwám níme Yesu Krístəə Mwǎn a Dyǒb mǎmén.

² Mbóótédé ngáne nkal é’ dǎádǎǵ Yesayaa ántenlé aá,

‘Dyǒb áhóbé aá,

‘Nóné’, nlóme mímém mésénze níme mésébe we á’só,

ábonɛn we nzii.’

³ Móbelé’ ehǎǵé á ehýǎǵe nén,

‘Nyébonɛn epe éche Sǎǵwéé. Nyétii eché nzii.’”

⁴ Né-óó Jone ampé á ehýǎǵe, ádusén bad, ákalé-’ɛ eyale é Dyǒb aá, “Nyétéde abel dé mbéb, nyékud edusen ábel bon Dyǒb álagsen nyé mbéb.”

⁵ Bad bébídé’áá á mbwǵ e Judeya esyáál ne á dyad á Jerusalem, békag awé áwǵlɛn mós. Néé bémpaléé nímáb mbéb áte Jone ádusén bó á edib é Jodan.

⁶ Jone ahágé’áá mbóté éche bébénlé nyon éche ébídé á yǎl e kamél.* Awáá’áá ngáá a ngob e nyam. E’chuu ne bengóméé bóo ádyágé’áá.

⁷ Ahǎǵt’áá aá, “Mod ápǵ ámbíd echém awé atómé me. Meékwonedé ké ábwaam ásé áhune nímé nkǎod mé metámbé.

⁸ Ndusan nyé ne mendib, bon ádusén nyé ne Edǎádǎǵ éche Esáá.”

Yesuɛ akudé edusen ne mekǵsen

(Mat 3.13-4.11; Luk 3.21-22, 4.1-13)

⁹ Mímé mesú Yesuɛ ámbíd á dyad á Nazaret á mbwǵ e Galilia ápe wée Jone. Jone andusén mós a edib é Jodan.

¹⁰ Ade Yesuɛ ábídéé á edib-te dǎo ányiné néé ngob e dyǒb énednadté. Edǎádǎǵ é Dyǒb émbíd ádyǒb, ésud mós á nló mín néé élǎǎ.

¹¹ Héé ehób ébídéé ádyǒb nén, “Edii awem mwǎn a nlém awé nídǎó bwámbwam. Ndé menyǎǵe ne we.”

¹² Ábwǵ-ábwǵ éché Edǎádǎǵ énkid Yesuɛ á ehýǎǵe.

¹³ Andyéé áwed móom mé e’pun ménin, Satane ákágé mós. Nyam éché ékaa’ ébédé áwed, áǵel-le éwǎǵán mós.

Yesuɛ apwédé bembapeé bé’só

(Mat 4.12-22; Luk 4.14-15, 5.1-11)

¹⁴ Ámbíd e pónde béhé Jone á mbwǵ. Ade bémáá mós ahé á mbwǵ, Yesuɛ ampé á mbwǵ e Galilia ákalé nkalan ní bwám ní Dyǒb, áhóbé nén,

* 1:6 Bébénládtáá nyon é nyam eche béchagéé bán Kamél ábel mbóté. Mbóté échéd éébage’áá kunze é mbóté.

¹⁵ “Póndé epedé, nkamlen ní Dyöb níde benben. Nyé mod téé áhànjen adē abé dé mbéb, nyédúbe-’ε nkalanj ní bwám.”

¹⁶ Ade Yesue ábamméé nkin mé edib-é-nzab é Galilia annyín Simone bó mwányan Andreyá, néé bébwéméé mbínzé. Bébédéé bekób-bé-sútu.

¹⁷ Héé Yesue álanjéé bó aá, “Nyéhíde me. Ngáne nyékóbéé sútu bōob, meéyāgēd nyé ngáne nyétédte bad nlém á abum áhíd me.”

¹⁸ Abwōg-ábwōg bēntedé échab mbínzé, béhídē-’ε mós.

¹⁹ Néé akíí mwā etún, annyín bán ábe Zebedie, Jemse bó mwányan Jone á bōle-té néé bébwéméé mbínzé.

²⁰ Anyín adē anyíné bó, anchélé bó. Bēntedé echab sánj Zebedie ne bad bé nsón á bōle-té béhídē Yesue.

Yesue abídté mod edāádaj é mbéb áte

(Luk 4.31-37)

²¹ Yesue ne ábē bembapεε bēniin bēnkē á dyad á Kapenahum. Adē mbwe-mé-nkóme-áte nípédé, Yesue ankē asól á ndáb é mekáne, ábootéd bad ayāge.

²² Nyaa eche áyāgté áá enkóméd bad yāl áte bwāmbwam áyāle ayāgté áá néé mod awē nzé ahóbé né émáá. Eeyāgte’áá nēngáne bemeléede bé mbéndé.

²³ Héé mod nhóg awē edāádaj é mbéb émbēé áte ápédé taléd, ábōnē aá,

²⁴ “A-Yesu, mod a Nazaret, cheé syāné déwōjné? Ehyedé sé awúu-ye? Mbíí we bwám. Edíí mod awē Dyöb álómé, awē asáá.”

²⁵ Héé Yesue akánnéé éché edāádaj é mbéb áte aá, “Lám, bíd ane mod áte!”

²⁶ Dōó éché edāádaj é mbéb ésågté ane mod áte ngíne-ngíne, éhé-’ε esaád é ngíne, bonj ébíd-te mós áte.

²⁷ Menyáké ménkōb ábē bad bwāmbwam. Bésēdté nhóg ne aníníí bánken, “Nzé-dyámé dén! Ayāged dékōlē dén-ε? Anén mod awóó ngíne ákamlen e’daádaj bé mbéb, é’wōgné-’ε mól!”

²⁸ Nén dēmbēl nkalanj míme Yesue ménkanléd mbwóg e Galilia esyāál.

Yesue achōjté ekud é bad

(Mat 8.14-17; Luk 4.38-41)

²⁹ Néé béhídté á ndáb e mekáne hidtén, Yesue nchoo ne Jemse bó Jōn bēnkē á ndáb eche Simone bó Andreyá.

³⁰ Simone mwaád nyaá ambé á anōj dé nkole, ahéb dēnsog mós. Ade Yesue ápédé pēén, bēnlāá mós tājene nkole míme ane mmwaád.

³¹ Dōó akíí wée ane mmwaád ábédé, bonj áchāngē mós á ekáá, awōngén mós ásyā asē. Ahéb dēmmaá mós, ákōb-pe bó nken.

³² Ene ngukél adē enyen émáá asud, bad bēmpēén bad bé nkole bésyāál ne bad bésyāál ábe e’daádaj bé mbéb bēmbēé áte wée Yesue.

³³ Bad bé dyad bésyāál bēnkarjnén mmwe ndáb míme Simone.

³⁴ Yesue anchoód bad híin ábe békónlé áá nkole nyaa ne nyaa, abíded-te bad e’daádaj bé mbéb híin áte. Eémwage’áá pen aá ábē e’daádaj bé mbéb é’hōb dyamdyam áyāle bēmbíí mod awē ádíí.

Yesue akalé nkalanj ní bwám á Galilia

(Luk 4.42-44)

³⁵ Epog é mbwεmbwε áde bín béékēnlēé, Yesue anhidé ásē, áhídé á dyad-té, áke á ahāngé á hóm, ákánne’.

³⁶ Simone ne bad ábe bóbōó bēmbē, bēmbootéd Yesue ahéd.

³⁷ Bédíbté-’áá mós, dōó bēlanjéé mós bán, “Moosyāál ahede we!”

³⁸ Yesue anláá bó aá, “Dékag hóm démpēe. Dékag á myad míme níde benben ábel bonj níkal nkalanj ní bwám áwed ámpē, áyāle mímé nkalanj mōó níkáás bonj nípē á nkōjsé.”

³⁹ Né-ōó, ankē mbwóg e Galilia esyāál, akalé nkalanj ní bwám á ndáb é mekáne, abídté-’ε bad e’daádaj bé mbéb áte.

Yesue achōjté mod awē melaj mékóbé

(Mat 8.1-4; Luk 5.12-16)

⁴⁰ Mod nhóg awē melaj mékóbé ampé wée Yesue, abwóg mebóbōn, ácháā mós aá áwōngén mós. Anhób aá, “Nzé edāé ehele ébēl me nsāj.”

⁴¹ Ngól enkonnéé Yesue. Dōó abídté ekáá, ábané mós á yāl, bonj álanjéé mós aá, “Ndāá, sánj!”

⁴² Abwōg-ábwōg míme melaj mēmmaá ane mod á yāl, áchōj-’ε.

⁴³ Yesue anláá mós aá ákag, ásím-me mós etúu áte aá,

⁴⁴ “Nōné, weelāngé modmod dyam áde ábēnlédé, bonj ké élúmed yāl wée prise, ásimen we. Ebag-ke mende ngáne mbéndé e Mosεε éhedéé, álúmed bad wéé mōsāá.”

⁴⁵ Bonj ké nê, áde ane mod abídé, ankê, áke ákalé mós nímé nkalaj hóm ásyāā. Ankal mós bwámbwam nyaa eche Yesue éehéle'áá dyad ké ahóg asól ámpé á ntálé. Antím ádyéé' á mehánjé wée bad béesaá. Ké nê, bad bébidé' mebwóg mésyāā béhyāg áwé.

2

Yesue achōjté mod awé awédé eped
(Mat 9.1-8; Luk 5.17-26)

¹ Née nguse é e'pun étómé, Yesue ansú ámbíd á Kapenahum. Bad bēnwōg bán ahúú.
² Ekud é bad énkūmēn áwe ndáb nyaa echē étál éébēdeé á ndáb-te, ké á mmwē. Yesue akánlé'áá bós eyale é Dyōb.

³ Héé dōo bad béniin bēpééne mod awé awédé eped.

⁴ Bonj ngáne ndun e mod émbēē áhed, bēnkēnhenlé mós apēen wée Yesue ábédé. Né-óó, bēnchāge á ndáb mín, bēnéde nnōj ní ndáb á nló mín wée Yesue ántyēemē. Ade bémáá nnōj anede, bēnsudtēn ane mod ebúm éche ánnáá' é ámín wée Yesue ámbēē.

⁵ Ade Yesue ányíné adúbe ádé ábe bad bēwóó áte anláá ane mod awé awédé eped áá, "A-mwān, nlāgséné we mbéb." ⁶ Donje dé bemeléde bé mbéndé ábe bēndyéé áse áhed bēmbootéd anyoo áte á nlém-té bán,

⁷ "Chán anén mod áhēlé se áhōbē' enén ndín e akan? Asyāā Dyōb. Nzéé ahelese álagsén mbéb ésebān Dyōb dēmpen?"

⁸ Abwōg-ábwōg Yesue anchēm bó mewēmtēn. Héé ásedtēé bó aáken, "Cheé ékás bonj nyéwōó' enén ndín e mewēmtēn?"

⁹ Ahéé áde dyam ásad, naa áhōb wée 'Nlāgséné we mbéb,' káa áhōb wée, 'Syāá áse, étéd échōj ebúm ébooted áke?"

¹⁰ Bonj, mēlūméd nyé nén meé Mwān-a-Moonyon awóó kunze á nkōjse álagsen mbéb." Dōo álánjéé ane mod awé awédé eped áá,

¹¹ "Nlānje we nén, syāá áse, étéd échōj ebúm, ésúe' á ndáb."

¹² Hē dēn wée moosyāā ánōné mós nê, ane mod anhidé áse, atéd éche ebúm ábootéd-te áke. Yāl enkóm bó áte bwámbwam, békēnē Dyōb, bēhōbē bán, "Séenyínē sé enén ndín e dyam mbéd!"

Yesue achénlé Levie
(Mat 9.9-13; Luk 5.27-32)

¹³ Ámbíd e nê, Yesue antím ámbíd ámpé á nkin mé edib-é-nzab é Galilia. Ndun e mod empé áwé, ábootéd-te bós áyáged.

¹⁴ Ade átoméé á nzii, annyin nlad-é-tááse nhóg awé bēchāgé'áá bán Levie, mwān awé Alpasee. Levie andyéé áse á ndáb echē ákóbé'áá tááse áte. Héé Yesue álánjéé mós áá, "Hídé me." Dōo Levie átyéémé ámín bonj áhídē-'e mós.

¹⁵ Ámbíd e pónde Yesue ádyágé'áá ndyééd á ndáb wée Levie. Ekud é besaad bé tááse ne bad bé mbéb bēmpé bēhídé'áá mós. Bóbōo bēndyéé á tébele ne ábē bembapēe.

¹⁶ Ade donje dé bemeléde bé mbéndé ábe bēbédé Befarisia bényíné Yesue ádyāg ndyééd ne ábē bad bé mbéb, ne besaad bé tááse, dōo bēsedtēé ábē bembapēe bánken, "Cheé ékás bonj ádyāg ndyééd ne échē ndín é bad?"

¹⁷ Ade Yesue áwógé nê, anláá bós áá, "Bad ábe bēdyéé bwām bēétógnēné mod-a-bwēl. Bad ábe békōnle' bōo bétógné mod-a-bwēl. Meépedéé á nkōjse áchéle bad ábe békóbnédé á'só é' Dyōb, bonj mpedé áyāle bad bé mbéb."

Nsedtéd tōjgene adid á yāl
nzaa á mekáne-té
(Mat 9.14-17; Luk 5.33-39)

¹⁸ Pónde póg ebédé, bembapēe ábe Jōne, Ndusene ne Befarisia bēndfid yāl nzaa á mekáne-té. Dōo bad behóg bēpédé wée Yesue bonj bēsedte mós bánken, "Cheé ékás bonj bembapēe ábe Jōne, Ndusene ne ábe Befarisia bēdidé yāl nzaa á mekáne-té bonj ábōj pēn bēdidé?"

¹⁹ Yesue ankwētén bó ne ngan áá, "Chán bad ábe bēlébpé á ngande e e'wóngé, bēhēle bēdidé yāl nzaa á mekáne-té áde mod awé akude sómbé ádíí adé ne bós? Bēdidéé, bēétāngēnéé yāl nzaa adid á mekáne-té pónde echē mod awé akude sómbé ádíí ne bós.

²⁰ Bonj epun epé éche békóbnéé bós mod awé akude sómbé. Echē epun dōo bēdidé yāl nzaa á mekáne-té.

²¹ Nyēbíí nén bán nzé mod anapbe' mbóté, eetédéé eped é abad ékōōlé se ánanbéd nchun ní mbóté. Ayāle nzé échē eped é abad ébóótédé abób áte ébélé éhabnéd abad dé nchun. Nē ábele', échē epōn ékale' áte tōmaa ngáne énsēbēé abé.

²² Melemlem n̄ngáne mod éētēdēē m̄m mēkōōlē se ahé mós á nchun mé ntyág, * se ápen. Ayāle nzé abelē nē, né m̄m mēhōd kááj ntyág n̄yéd, m̄m mémād asyoge ntyág-ke ámpē n̄bēb. Boj bētédēē m̄m mēkōōlē, bēhé á ntyág mēkōōlē-te.”

Nsēdtéd t̄ngene

Mbwē-mé-nkóme-áte

(Mat 12.1-8; Luk 6.1-5)

²³ Mbwē-mé-nkóme-áte nhóg Yesue atómé'áá á nzag e ngun-tē. Ambē ne ábē bembapēe. Ade bēkagké nē, dōo ábē bembapēe bēbōótédé e'sóg é' ngun apád.

²⁴ Hēe Befarisia bēlāngēe Yesue bán, “Nōné, chee ékás boj ábōj bembapēe bēbele dyam áde mbéndé éebagēe kunze ábel á mbwē-mé-nkóme-áte?”

²⁵ Yesue antimtén bó aá, “Nédē nyéelāā'ē mbéd á kálag e Dyōb dyam ádē k̄j Dabide ámbenl ádē bétógé ch̄m éche bēdyágkē ne ádē nzaa ékóbé mós ne ábē bad-ē?”

²⁶ Ansól á Ndáb-e-Dyōb á pónéd echē Abyataa ábédé prisē ambáám̄báa. Andyé e'wēle ábe é'bédé nde e Dyōb. Boj eched mbéndé éebagēe mod ké nhóg kunze ádyé ábē e'wēle étomēe Prisē. Mwēn andyé ábē'-e káájne bad ábe bēnwoón mós donje.”

²⁷ Dōo Yesue ásogtēe aá, “Dyōb dēnsēbē moonyonj ahag, boj áfīdē epun éche bēkōmmēe áte. Enkēnsébéē epun atii boj áhagēe moonyonj aá ákōmme áte échē epun.

²⁸ Né-ōó, Mwān-a-Moonyonj awóó nkamlēn káájne ám̄n e mbwē-mé-nkóme-áte.”

3

Yesue achōjté mod

awē ekáá éwédé

(Mat 12.9-14; Luk 6.6-11)

¹ Hēe Yesue átímé ámbid á ndáb e mekáne. Mod abédé áhed awē ekáá éwédé.

² Bad behóg ábe bēbédé áhed bēhédé'áá Yesue awusé akōben. Né-ōó bēnóné'áá Yesue chodchod, ányin nzé ádid ane mod bwām á mbwē-mé-nkóme-áte.

³ Hēe Yesue álāngēe ane mod aá, “Hyē étyéem á'sō hén!”

⁴ Dōo Yesue ásedtēe ábē bad aáken, “Nyéláa me ké édé mbéndé ábel mboj á mbwē-mé-nkóme-áte, káa ábel mbēb. Edé mbéndé áson alongé á mod, káa áwúu mós?” Boj bēnkēnhōbpē dyamdyam.

⁵ Anwóg ndutul á nlem-tē bwāmbwam áyāle ábāb e'lel bé nlem á abum. Hēe ánóné bó ne melingá, boj álāngēe ane mod aá, “Sálé ekáá áte.” Asále áde ane mod ásánlé ekáá áte, ekáá éndyēe mós bwām ámpē.

⁶ Hēe Befarisia bēbídé á ndáb e mekáne, boj bēkē bētānē bad bé epepé éche Herode, ábwōg-ábwōg bōbōo bhéagké Yesue áwúu mós.

Ndun e mod ehidé

Yesue á edib é Galilia

⁷ Yesue ne ábē bembapēe bēnhidē bēkē á edib é Galilia. Ndun e mod enhid mós áwed. Abē bad bēmbid á mbwōg e Galilia, á Judeya,

⁸ á Jerusalem, á mbwōg e Idumeya, á mbwōg echē edé échíní eped é Jodan, ne á myad n̄me mēde bēnben ne myad mémábá mé Tire ne Sidon. Abén bad bēpágé'áá wēe Yesue áyāle bēnwōg mam n̄me ábélé'áá.

⁹ Bad bēmbuú áte nyaa echē echabé ám̄n. Né-ōó, Yesue anláá ábē bembapēe aá bēbojnen bóle ábel boj bad bēekajnan mós.

¹⁰ Ammād ekud é bad achod, né-ōó bad bēsýāl bēmpēe ábe bēkónlé'áá bēbuné ape wēe ádíí, ásitēn mós ábel boj bēdyēe bwām.

¹¹ Pónéd tēe echē e'dáádəj bé mbēb ábe é'bédé bad áte bēnyinnē mós, é'bélé'áá bad ábe é'díí áte bēhūnē ásē, é'bōnē'-e bán, “Wē-ēē edé Mwān á Dyōb!”

¹² Yesue ansim bó etúu áte aá bēlāngē bad nyaa e mod eche mósdíí.

Yesue apwédé bembapēe

dyóm ne bēbe

(Mat 10.1-4; Luk 6.12-16)

¹³ Hēe Yesue áchágkē á ekone m̄n, áchēnlē bad ábe áhédé'áá, boj bēpág áwē.

¹⁴ Dōo ápwédé bad dyóm ne bēbe ábē ne mós, áchagēe bó aá bembapēe bé nlómag ábe álómme'-e ákal eyale é Dyōb.

¹⁵ Ambág-ke bó ngine ábided bad e'dáádəj bé mbēb áte.

¹⁶ Abē bad dyóm ne bēbe bēbédēe: Simōne awe Yesue ánchuu'ē mbəj aá Petro;

* 2:22 Ntyág n̄mē bēbēnlē ngob e nyam mós bēbēnládtáá pónéd eched.

17 Jemse bós mwányan Jone, bán ábe Zebedie, (ábe Yesue ânchutu'ê mbəŋ aá Bwanegese, awě adé bán, Bán bé ngin.)

18 Andreyá bós Filibe, Batolomyo, Matyo, Tomase, Jemse mwán awě Alfose, Tadiose, Simone awě ambé á epepé é kán e alon,

19 ne Judas Iskariode awě antím Yesue asóm.

Béchógé Yesue bán Belzebule

(Mat 12.22-32; Luk 11.14-23, 12.10)

20 Héε Yesue átímé á dyad. Ekud é bad éŋkaán ámpé nyaa echě Yesue ne ábē bembapεε békénwóngé pónde ádyé ndyééd.

21 Ade Yesue baányan bəwógé nē, bēnkě mó ahead, átéd mó áswēn mó á ndáb áyāle bad bēhóbé'áá nēn bán, "Nló méésáá'ē mó áte."

22 Donje dé bemelēde bé mbéndé ábe bémbid á Jerusalem bēhóbé'áá bán, "Belzebule adé mó áte. Ene kəŋ e e' dəədəŋ bé mbéb chō ebagé mó ngine ábided bad e' dəədəŋ bé mbéb áte."

23 Héε Yesue áchénlé bós bonj ákanlé bós ngan aáken, "Chán Satane áhele se abided Satane?"

24 Nzé bad bé alon ahóg békábné áte, bonj nchemtén méésē, adé alon déehelēé atyéem.

25 Nzé abum á ndáb-pe ákábné áte, bonj nchemtén méésē, adé abum á ndáb déehelēé atyéem.

26 Né-óó, nzé nkamlen ní Satan ríkábné áte, bonj bēn ne bēn bəwane, nímē nkamlen méebemmé, mékwé, rípe-'ε ásoğ.

27 Né dós mod eħālē se asól á ndáb e ngine-e-mod se ádūm ábē bwēm ésebán asébpé mó ahan. Amaa-'áá mó ahan, bonj atéd ábē bwēm é'syāā.

28 Ne mbále nlanje nyé nēn meé Dyōb délagsén bán bé baányon mbéb rísyāā níme bebélé káŋne nzyán ké ehéé echē bēbíté á nsāl.

29 Bonj kénzée awě ahóbé e'bēbtéd é' mekan tənene Edəədəŋ éche Esáá, éekudté alagsen mbéd. Abelé mbéb níme méewóo alagsen."

30 Yesue anhób nēn áyāle bad bēhóbé'áá bán, "Edəədəŋ é mbéb edé mó áte."

Yesue nyaa ne baányan

(Mat 12.46-50; Luk 8.19-21)

31 Héε Yesue nyaa ne Yesue baányan bəpédé, bətyéem é ebwóg-te, bonj bəlōmē mó achəğ.

32 Ndun e mod enlanjed Yesue. Bėndyεé áse. Dós bəlānje mó bán, "Echōŋ nyon ne baányon bédé á ebwóg-te bēhede we."

33 Héε Yesue ásedteé bós aáken, "Nzée adé echēm nyan, benzée-'ε bédé bānnet?"

34 Dós Yesue ánneé bad ábe bəlānjédé mó nē, bonj áhōbē' aá, "Echēm nyan ne bānnet bós bēn!

35 Kénzée awě abele mam níme Dyōb áhedéé adii mwānnet, abé-'ε echēm nyan."

4

Ngan e mbál-e-bū

(Mat 13.1-9; Luk 8.4-8)

1 Yesue ambootéd bad áyáged ámpé á nkəğ mé edib é Galilia. Bad ábe bēnləŋjedé mó bəntōmtən abuu áte, nē dēmbēl asól á bōle-té ádyēé áwəd-te. Abē bōle bēmbē á edib-tē. Ene ndun e mod chō-'ε enlyəğ á nkīn mé edib.

2 Abēnládtáá ngan áyáged bós mekan híin. Ankalé bós ngan aá,

3 "Nyéwóglen! Nkwel-é-nzag nhóg ankě mbál asob á nzag-té.

4 Ade ásobēé mó nē, donje dénhūn á nzii-tē, menən mēmpé mémad mó asómted.

5 Donje dénhūn á meláá-té wēε ndəəb énkémbuú'é áte. Enwāmsen abíd áse ngáne ndəəb énkénchabpé áse.

6 Bonj nēε enyen é ngine épédé ényhāād ábē bwēm é'wé-'ε, áyāle nkanj ménkənsónlé bós á ndəəb-té bwām.

7 Mbál mēmpēe ménhūn wēε mekōd médíí. Nēε mekōd mé mékwógé, mékánj akwog adé ábē bwēm, nē ábēl békénchyaá'é.

8 Bonj donje dé mbál dénhūn á ndəəb e bwām. Mmén mbál mēmbid áse bwām, ríkwōğ, ríchyáá-'ε. Donje dé e'sóg dénwālē móom mé mbum meláán, donje móom ntóób, ábíní-'ε, mbwōkel."

9 Yesue ansógéd enén ngan aá, "Kénzée awě awóó metúu, áwóge'."

Nzəm echē ekəə bonj Yesue dkalé ngan

(Mat 13.10-17; Luk 8.9-10)

10 Ade Yesue ályáge mwēmpen, ábē bembapεε dyóm ne bēbe ne bad ábe bēmbē ne mó, bēnlāá mó bán átógned bós échē ngan.

¹¹ Hée Yesue álanǵeé bó aá, “Dyöb ábágé nyé kunze ábii kun e nkamlen nímē, boŋ ne bad bémpēe abele aá béwóge’ nímén mekan méšyā́l dásá á ngan-tē.

¹² Abelé nē, ábel boŋ, ké bényinē ké nyínén, béechemé, ké béwóge ké wóǵén béēsōŋtān áyāle nzé béšōŋténé né bétimén Dyöb, békūd-te alagsen dé mbéb.”

Yesue atóǵké ngan e nsob a mbál-e-bū
(Mat 13.18-23; Luk 8.11-15)

¹³ Dóo Yesue ásedtēé bó aáken, “Nédē nyéesōŋtēneé enén ngan-e? Nzé nyéesōŋtēne chó chán-nō nyémwēé échíníí ngan asōŋten?

¹⁴ Nsob-a-mbál awéne eyale é Dyöb.
¹⁵ Donje á bad bédé nēŋgáne mbál níme ríhúné á nzii-tē. Nzé béwóge eyale é Dyöb ábwōg-ábwōg Satane abelé áhye ahúd bó chó á nlém-tē.

¹⁶ Abíníí bédé nēŋgáne mbál níme ríhúné á meláá-tē. Béwóge’ eyale é Dyöb, ábwōg-ábwōg békōb-pe chó ne menyiŋge.

¹⁷ Boŋ échē eyale éwēnnāádtē bó á nlém-tē, bédúbpē-’é chó dásá á esōŋ é pónde. Né-óó, nzé ndutul ne metake bépédé áyāle échē eyale bédol yāl ámbíd ábwōg-ábwōg.

¹⁸ Abíníí-’é bédíí nēé mbál níme ríhúné á mekōd-te. Bédíí bad ábe béwóge eyale é Dyöb,
¹⁹ boŋ mpúlé mé nkōŋsē ne adəŋ dé abud á bwēm awōŋ, ne ahed á bwēm bémpēe ákán bó nlém áte nyaa échē béheléé e’pum achyáa.

²⁰ Boŋ bad ábe bédé nēŋgáne mbál níme ríhúné á ndoob échē eboó yāl, bédíí bad ábe béwóge’ eyale é Dyöb, békōb-pe chó, béchyāā-’e e’sóg ábe é wánlé mesōŋgé mé mbum móom meláán, móom ntóob ne mbwákēl.”

Nzé béchódé etrukāŋ béekōŋgéé chó
(Luk 8.16-18)

²¹ Hée Yesue ásedtēé ene ndun e mod aáken, “Mod asónléé etrukāŋ échē ámáá achod á ndáb-te, ábānē chó á ebwōg-sé ké’ē á anōŋ sé-yē? Saá á atii dé etrukāŋ mín dóo ábelé ábānē chó?

²² Chóm ké éhéé éche ékōŋnéde ébíd á enyen. Ké éhéé-’é éche békúténé bédibé chó.
²³ Kénzēé awē awóó metúu, áwóge’.

²⁴ “Nyétōŋ chóm-’éé nyéwógeé anōn áte bwám! Melemlem mé nhagtéd níme ébenléde wēé wēn mōo Dyöb dōmpē débenlédté, ábenléde-te mó tómaa ngáne wēmbēnlédté wēé wēn.

²⁵ Kénzēé awē awóó nsōŋten rí kun é nkamlen mí mín, Dyöb débád mó nímé nsōŋten abe. Ane awē mō-’e eewóo, Dyöb dékōbén mó káŋne mwāmpin awē awóó.”

Ngan e mbál-e-bū

²⁶ Yesue ambé áhóbe aá, “Nkamlen rí Dyöb rídii nēŋgáne mod awē akii mbál-e-bū asob á nzag-tē,

²⁷ átím ámbíd á ndáb, nkuu ákūne’, mūte ábelé níme nsón. Ene pónde esyā́l, mbál ébide ásē, ékwōge’ ésebán abíe’ ngáne nē ábenlادتé.

²⁸ Ndoob chēn-’éé ebele boŋ bwēm é’kwogé’, é’chyāā-’e e’pum. Nlóm mí byaa móo rísēbpe abíd, ámbíd e pónde mbwēem káŋne ášōg, e’sóg bómpē é’bíd.

²⁹ Boŋ nzé e’sóg é’máá awúu, ábwōg-ábwōg ane mod abelé atéd páá áke dé apád áyāle pónde échē bépadeé epedé.”

Ngan e mbál níme richíne
(Mat 13.31-32, 34; Luk 13.18-19)

³⁰ Hée Yesue áhóbeé ámpē aáken, “Cheé déheléé-se déhagtén nkamlen rí Dyöb-ē? Ngan ehéé débenlédté échē élüméd ngáne nímé nkamlen rídii-ye’?

³¹ Ndií nēŋgáne mbwé e mbál-e-bū échē mod átédé boŋ ásob á nzag-tē. Mbál-e-bū edé mwāmpin bwāmbwam nzé béhógténé chó ne mbál mémpēe níme ríde á nkōŋsē.

³² Boŋ nzé ékwogé, ékale’ tómaa e’sum* é’syā́l, éwóo-’e ngen éche menōn méhyagké mūm alón áte.”

³³ Yesue akánlé’áá bad eyale é Dyöb, ábenláád ekud é ngan émpēe nēŋgáne échén. Akánlé’áá bó nyaa échē bēsōŋtēnnē.

³⁴ Eékanle’áá bó áde ébenlédeé ngan, boŋ nzé anlyāg mwēmpēn ne ábe bembapeé aláá bó mam méšyā́l níme échē ngan éhóbeé.

Yesue ahóódté ekukud
(Mat 8.23-27; Luk 8.22-25)

* 4:32 Bān bé mel nēé ndón.

³⁵ Echê epun dën ngukél, dso Yesue álàngéé ábē bembapεε aá, “Syáá déchabe pεd e edib eníní.”

³⁶ Héε ábē bembapεε béchénné ene ndun e mod bonj bésälé á bōle-té wée Yesue ámbēε bonj békεεné mó. Myōle mémpēe mémbe áhed.

³⁷ Abwōg-ábwōg dso ekukud é ngine ébóótédé atóm, bonj mendíb mésälé á bōle-té nyaa eché bōle bēmponné asú á mendíb sé.

³⁸ Yesue ámbé á bōle-té á pεd e mbíd. Annaá ásē ábānē nló á mbónjé mín, ákūne’. Héε bényeméé mó ásē, bonj belāngē mó bánken, “A meléed, weewóó’ é wε pónédé éε syānē dédíí á kwééd-te-yε?”

³⁹ Héε Yesue átyéémé ámín bonj ákännē éché ekukud áte aá éhóó, aláá-’ε mendíb aá mésud. Ekukud énsōg awan, ekíde-’ε éhóótédé áte.

⁴⁰ Héε Yesue ásedtεé bó aáken, “Cheé ékásá bonj nyéwōgē mbwóg? Nyéewóó’ é adúbe kááj ne boob-ε?”

⁴¹ Bonj mbwóg ménkōb bó bwāmbwam, bésédte nhóg ne aníní bánken, “Ebál e mod éhéé chén éche káájne ekukud ne mendíb bēwógné?”

5

*Yesue achōjté mod awe
awóó e’daádaj bé mbéb*

(Mat 8.28-34; Luk 8.26-39)

¹ Yesue ne ábē bembapεε bēmpē á pεd e edib eníní, á mbwóg e Gerasin.

² Ade Yesue ábídé á bōle-té bídén, amboméén mod awé ábídé á soóbadε. Edáádaj é mbéb émbē ane mod áte.

³ A soóbadε dso ádyéé’áá. Modmod enkénhenlé mó abane á mehanj ámpē, ké ne bengóbéngōbē.

⁴ Áyāle ngen ne ngen, béháá’áá mó ne e’pwōg ne bengóbéngōbē bonj ké nē aselé’áá bengóbéngōbē áhentéd-te e’pwōg bē áte. Antómtén ngine awónj nyaa eché modmod éehéle’áá mó abwōge.

⁵ Atamnádtáá á soóbadε ne á e’kone-té nkuu ne müte, ábōnē e’saád ákweltáád-te yāl ne meláá.

⁶ Ane mod abédé mwā etún áde ányíné Yesue. Héε ányágté mehélé, bonj ábwōgē mebóbónj áwē e’só-te,

⁷ ábōnē esaád é ngine, áhōbē aá, “A-Yesu, Mwān a Dyōb á Ngum, cheé sóo déwónné? Ncháa wε á dín á Dyōb méé weekógsán me.”

⁸ Ane mod anhób nē áyāle Yesue anláá edáádaj é mbéb aá, “A-edáádaj é mbéb, bíd ane mod áte!”

⁹ Dso Yesue ásedtεé mó aáken, “Chán dín ádíí wε?” Ankwentén aá, “Dín ádíí me bán Amudtεε, áyāle sébuú áte.”

¹⁰ Ámbé ácháá Yesue aá eénānē’ ábē e’daádaj bé mbéb ene mbwóg.

¹¹ Boob-póó, sánjalaa a esōg é nguu chō-’ε ébédé bēnbēn ne áhed, édyāg medyé á mbám mé ekone.

¹² Héε ábē e’daádaj bé mbéb é’cháá’é Yesue bán, “Lóm sé á nguu-té wē, émwe sésól chō áte.”

¹³ Héε Yesue ábágé bó kunze bonj é’bíde ane mod áte. Ábíde áde é’bíde ane mod áte é’sälé éché nguu áte. Eché esōg ébédé dyam e’kálé é’ nguu é’bε. Abwōg-ábwōg éché esōg émpāde ásē, ényāgté’ á eláá é nkin mé edib-é-nzab, éhún á edib-té, éhó-’ε.

¹⁴ Bēnōn bé nguu bēntōm mehélé á dyad-té ne á mebwóg níme médé bēnbēn, ákale bad dyam áde ábénléde. Ábē bad bēmbíd áke dényín.

¹⁵ Ade bépédé wée Yesue bonj bényín ane mod awē ndun e e’daádaj bé mbéb émbēε áte, nēε ádyéé ásē, ahédé-’ε bwēm á yāl bwām, adyε-’ε sēn, mbwóg ménkōb bó.

¹⁶ Bad ábe bényín áde dyam bēnlāá ábē bad ngáne émbēnlédte ne ane mod awē e’daádaj bé mbéb bēmbēε áte. Bēnlāá-’ε bó dyam áde ábénléde ne éché esōg é nguu.

¹⁷ Héε ábē bad bēbóótédé Yesue achán bán ásyāā áwab mbwóg.

¹⁸ Ade Yesue áśléé á bōle-té, ane mod awē e’daádaj bé mbéb bēmbēε áte nē anchán mó aá búmō békag.

¹⁹ Bonj Yesue enkénkwenténné. Anláá mó aá, “Súé’ áwónj dyad, éke éláa ábonj bad ndale e dyam eche Sāngwéé ábénlé wε ne ngáne ápédé wε ngól awóg.”

²⁰ Hē dso ane mod áhídté bonj ákag á mbwóg e Dekapolis.* Akanlé mod té dyam áde Yesue ábénlé mó. Bad bésyāāl ábe bēnwōg, yāl enkóm bé áte bwāmbwam.

* 5:20 Dekapolis: adíí mbwóg e myad dyóm.

*Yesue achōhté mmwaád nhóg,
ápüüd-te Jairuse mwän
(Mat 9.18-26; Luk 8.40-56)*

²¹ Yesue antüm ámbíd á ped e edib eníní ne bōle. Ade ápédé á nkin mímíní, ndun e mod enkanñén áhed.

²² Dóo mod nhóg awè akamlan ndáb e mekáne awè béchágé'áá bán Jairuse ápédé áhed. Anyín áde anyíné Yesue, ankwè ásé áwe mekuu.

²³ Ne mechángé mé ngíne áhóbé aá, "Awem mwän a mmwaád awág. Són, hyè ébán mó ekáá á yál, ábel nén ádyeε bwám, ábé-ε á alongé."

²⁴ Héε Yesue áhídé mó. Ekud é bad éhídé'áá Yesue nyaa eché bēnkanñénné mó.

²⁵ Mmwaád nhóg-ke ambé áhed awè anwón nkole míme mekií mébíde'áá mó á yál pónde ésyáál. Mmè nkole míbédé mó á yál á etún é dyóm-a-mwé ne míbe.

²⁶ Atagé híin á mekáá mé bad bé e'bo, abébed-te ngáb esyáál eché ánwōngé, bon ké né enkéndyé'ε bwám, nkole míbádé bádén.

²⁷ Anén mmwaád anwóg mam míme Yesue ábéle'áá, dóo ábíde mó ámbíd ántúte ene ndun e mod bon ásitán mó nkobe.

²⁸ Ayále anhób áwe nlem-té aá nzé mósiténé ké míme nkobe, né móodyéε bwám.

²⁹ Asiten áde ane mmwaád ásiténé Yesue nkobe, mekií míme mébíde'áá mó á yál ménsélé, awóg-ke á yál aá móchoó.

³⁰ Abwóg-ábwóg Yesue ambii aá ngíne ebíde mó á yál. Hé dóo ákúnnéde ántúte ene ndun e mod, bon ásedté aáken, "Nzéé asiténé me nkobe?"

³¹ Dóo ábé bembapeε békwentanné mó bánken, "Néε ényíneé bad békáñné we á yál nén ésedté' weé ken nzéé asiténé we-ye?"

³² Ké né, Yesue ambé ánóné' ekide ányín mod awè asiténé mó.

³³ Héε ane mmwaád ábóótédé anəñ ne mbwóg áde ányíné chóm-éε ébénléde mó. Dóo ápédé wéε Yesue bon ákwag mó á mekuu, álāngé mó mbále esyáál.

³⁴ Héε Yesue álāngéé mó aá, "A mwän-a-mmwaád, adúbe ádon ádíde wéε bwám. Kág ne nsan. Ndutul echón chó-ε émaa."

³⁵ Ade Yesue áhóbéé né, dóo bad behóg ábe bébíde á ndáb wéε Jairuse bélāngéé Jairuse bán, "Awon mwän amaa mó awé. Cheé étognéé Meléede ataged?"

³⁶ Bon Yesue enkéntédé dyaam áde behóbé néε dyaam. Héε álāngéé ane mod a nkamlan aá, "Weewógé mbwóg! Dúbé dúbpen."

³⁷ Yesue enkēmmwéé aá mod ampée áhíd mó étóméé Petro ne Jemse bó mwānyan Jone.

³⁸ Ade bépédé á ndáb wéε Jairuse dóo ányíné mpuutéde, awóg-ke mewé mé ngíne míme bad béchye'ε.

³⁹ Héε ásolé á ndáb-te bon ásedté bó aáken, "Cheé ekáá bon nyébelé' mímán mpuutéde, nyéchyé-ε mewé? Ane mwän eewédeé, akúne kúnén."

⁴⁰ Bon bēmbootédé mó awóo. Ámbídédé bó mod asyáál á ebwóg-te. Antéd ane mwän saá bó nyan ne ábe bembapeε beláán, bésál á ton eché ane mwän ámbéé áte.

⁴¹ Héε Yesue áchāngé ane mwän á ekáá, bon álāngé mó aá, "Talíta kúm," (awé adé bán, "A-mwän a ngondére, nlanje we meé, hidé ásé.")

⁴² Ane mwän anhidé ásé ábwóg-ábwóg, ábootéd-te ake. (Abéde dyóm á mwé ne míbe.) Yál enkóm bó áte híin áde nén ábénléde.

⁴³ Héε Yesue ásiméé bó etúu áte aá béelāngé modmod dyaam áde ábénléde, aláá-ε bó aá bébe ane mwän ndyééde.

6

*Bad bé Nazaré bēekobéé Yesue
(Mat 13.53-58; Luk 4.16-30)*

¹ Yesue anhidé adé hóm, asú awé dyad nchoo ne ábē bembapeε.

² Néε mbwe-mé-nkóme-áte npédé, ambootédé ayáged á ndáb e mekáne. Bad híin bēmbé áhed. Ade bēwógé áde ayáge yál enkóm bó áte. Bésédte bánken, "Héé mó ábídné nímén mésyáál-é? Ndin e debyéé éhéé bébágé mó nén? Chán ámwagké nímén menyáké ábel-é?"

³ Kíné saá kápéntaa ádí-ye? Saá mwän awé Maria nén-é? Kíné saá Jemse, Josebe, Judase ne Simone bóo bédé baānyan-é? Baānyan bé bebaád bésyáál-le ámpé béedyéé'ε ádyad-té hén ne syān-ye?" Né-óó, bēnkóó Yesue.

⁴ Dóo álāngéé bó aá, "Nkal e'daádon awóo' edúbe hóm ásyáál étóméé awé dyad, awé túmbé-te ne awé abum á ndáb."

⁵ Eéhééé menyáké ké mehóg ábel áhed, étóméé nguse é bad bé nkole ábe ábáné mekáá á yál, bédyē-ε bwám.

⁶ Yál enkóm mó áte bwāmbwam ne adúbe áde bad bēnkēnwōngé.

Yesue alómé bembapεε dyóm ne bébe
(Mat 10.5-15; Luk 9.1-6)

Dóo Yesue ákíí á myad mésad níme médé benben, áyágtē bad.

⁷ Anchélé ábē bembapεε dyóm ne bébe. Anlád bō áte, alóm bō bébe ne bébe. Ambē-ε bō kunze ábided bad e'dááðan bé mbéb áte.

⁸ Anlyágtēn bō aá, "Nyéewánlé chómchóm á eke étóméé ntón. Nyéewánlé ndyééd kéε ekwe, mod eesóó-ε moné á mesó mé abad.

⁹ Nyéhē metámbé bon nyéewánlé mbóté ébe."

¹⁰ Ambád aá, "Ndáb ké ehéé echē ekobé nyé nyédyēē áhed káán ne pónéd echē nyéhidtéé áde dyad.

¹¹ Nzé nyépedé dyad áde béekobéé nyé, káa béekwentenεé nyé awóglēn, nyétēdē dō, nyékūd-te ebumbú á mekuu, álúmed nén bán échab ebébtéd énone bēn."

¹² Né-óó, bēnké békálé' eyale é Dyób bán bad bétēde ádad abé dé mbéb.

¹³ Bémbíded bad e'dááðan bé mbéb híin áte, bēwōgtē bad bé nkole híin ne dyǒg dé menzab, béchōód bō.

Kwééd echē Jone, Ndusene
(Mat 14.1-12; Luk 9.7-9)

¹⁴ Bóob-póó, Heróde anwóg mam mésyāāl níme Yesue ábélé'áá. Ayāle mam mé bwām níme Yesue ábélé'áá mēmbēl ambyēen hóm ásyāāl. Donge á bad bēhóbé'áá bán, "Jone, Ndusene apuúde. Néε ákásá bon awón ngíne ábel nímén menyáké mésyāāl."

¹⁵ Bēmpēe bēhōbē bán, "Elaijaa móódé." Abíníí-ε bán, "Adii nkal e'dááðan nēngáne nhóg átínté e bekal bé'dááðan ábe bēmbē se' bóód."

¹⁶ Ade Heróde áwógé nē anhób aá, "Jone, Ndusene awē mēmbenlé bon bésēl nló móódé. Atimé ámbíd á alongé."

¹⁷ Heróde anhób nē áyāle anlóm bad aá békób Jone, béhan mó, bēhé-ε mó á mbwōg. Ambel nén áyāle Herodyase, mwaád awē mwānyan, Filibe ánsēbēē awón, anwón mó.

¹⁸ Jone álāngé'áá Heróde pónéd téé aá, "Weewóó'ε kunze áwón Herodyase, mmwaád awē mwānyon."

¹⁹ Né-óó, Herodyase anhíi Jone pél á nlém-tē, áhedé-ε aá mówúu mó. Bon Heróde ambēl enkēnhenlé.

²⁰ Heróde ambé mbwóg áte tāngene Jone áyāle ambii aá adii mod a bwām awē asáá. Né-óó akāngé mó bwām, ábel bon dyam dé mbéb déebenlád mó. Adás'áá mó awóglēn kénεé édíf bán pónéd téé nzé anwóglēn mó, atagé'áá áte á mewēmten-tē bwāmbwam.

²¹ Kááñne á asóg, Herodyase ankūd nzii echē áhédé'áá. Nén ábédé epun-εε Heróde ábélé'áá ngande áwēmtēn epun-εε ánychyāádtē. A ngande wē, Heróde anlébé ábē bad bēmbáá bé ngómenaá, bad bēmbáá bé sánze, ne kase é bad é mbwōg á Galilia.

²² Echē epun mwān a mmwaád awē Herodyase anhyé aság esáke. Nē dénwōgēd Heróde ne ábē beken menyīnge. Né-óó, Kāñ Heróde ansédéd ane mwān a mmwaád aáken, "Cheé édáá wéε mbé wε? Mēbē wε kéchéé échē éhedéé."

²³ Nén dēmbēl ammwé melē, álāngē mó aá, "Mmwág melē mεé, mēbēε wε kéchéé éche éhedéé. Ké eped é mbwóg échēm echē níkamlanné."

²⁴ Né-óó ane mwān ankē nyaá asceded aáken, "Cheé méhedénné mó?" Dóo nyaá átímténé mó aá, "Hédén mó nló níme Jone, Ndusene."

²⁵ Héε ane mwān átimé ámbíd ábwōg-ábwōg wéε kāñ, bon álāngē mó aá, "Bāg me nló níme Jone, Ndusene á taplēt-te hén bóob."

²⁶ Nén dénwōgēd kāñ Heróde ndutul bwāmbwam, bon ngáne ámmadté melē amwé á'só wéε ábē beken, enkēnhenlé mó nló níme Jone abáan.

²⁷ Héε álómé sánze póg aá épēen nló níme Jone. Ene sánze enkē á ndáb e mbwōg, esél Jone nló,

²⁸ épēēn nímé nló á taplēt-te, ábē ane mwān a mmwaád. Ane mwān a mmwaád mó-ε ábe nyaá.

²⁹ Ade Jone ábe bembapεε bēwógé nē, bēmpē, bétéd mó ndim, béke bélime.

Yesue adídté e'kálé é' bad é'taan
(Mat 14.13-21; Luk 9.10-17; Jon 6.1-14)

³⁰ Bembapεε bé nlomag ábe Yesue ánlómmē bēnhūu bétán mó bēláá-ε mó mekan mésyāāl níme bēbélé ne níme bēyágté.

³¹ Ekud é bad épágé'áá wéε Yesue ne ábē bembapεε bétimé-ε ámbíd nyaá echē Yesue ne ábē bembapεε benkēnwóngé etál ádyé ké ndyééd. Dóo Yesue álāngéé ábē bembapεε aá, "Syáá détim á ahāngé á hóm. Bon nyékóme áte mwāmpín."

³² Héé dóo bésálé á bāle-tē, bon bétimé' á ahāngé á hóm.

³³ Ekud é bad énnýn áde békagké, bēnchēm-me bó ábwōg-ábwōg. Abē bad bēmbíd myad ne myad, békēen mekuu, bényāgēd á'sō ne mekuu, bésébé ape wēe Yesue ne abē bembapēe békágé'áá.

³⁴ Ade Yesue ábidé á bōle-tē boj anyín ene ndun e mod, antómtén bō ngəl abé áyāle bēbédé née ndýon mí mbód míme méēwōo nnōn. Né-ōó ambootéd bō ekud é mekan ayāged.

³⁵ Ade bīn é' bōótédé ahín, abē bembapēe bēmpē áwē, bēhōbē nēn bán, "Hén adé á etún-tē, pónédé emaá-'e atóm bwāmbwam.

³⁶ Láá abén bad bétime' á myad-tē míme médé benben, ábel bēn bēchan medyé míme bédýēē."

³⁷ Boj Yesue antimtén bō aá, "Nyé bō nyébe bō chōm éche bédýēē." Héé bésēdteé mó bánken, "Ehéde wēé séke séchan e'wēle é' mbwōkel é káppe ébe,* sébe bō, bédýē-yē?"

³⁸ Héé ásēdteé bō aáken, "E'wēle é'tān nyéwóó? Nyéke nyēnōn." Ade bémáá anōn dōo bēlānggēé mó bán, "E'wēle é'dé é'tāan ne sūu ébe."

³⁹ Héé Yesue álānggēé abē bembapēe aá bēbel bad, békaben áte monje ne monje bédýēe á nkáákāē mīn.

⁴⁰ Né-ōó ábe bad bēndýēé ásē, donje á monje, mbwōkel é bad, donje-'e móom mé bad métāan.

⁴¹ Hē dōo Yesue átédé abē e'wēle é'tāan ne éché sūu ébe, ánōné ámīn, ásāgnān Dyōb, ákabtāád bō áte, boj ábagé abē bembapēe aá bēkabpe ene ndun e mod. Ankabé-'e abē bad káōhne éché sūu ébe.

⁴² Moosýāál andýé, akód-te.

⁴³ Bembapēe bēnlād e'wēle ne sūu éche ényāg ásē, enlón e'lōn dyōm ne é'be.

⁴⁴ Mesongé mé baachóm ábe bēndýē ene ndýēéd mémbe e'kálé é'tāan.

Yesue akii á mendib mīn

(Mat 14.22-33; Jōn 6.15-21)

⁴⁵ Melemlem mé pónédé Yesue anláá abē bembapēe aá bēsíl á bōle-tē, békag á'sō á Betsaida, á múde mé edib-é-nzab mīmíní. Ade békagké nē, anláá ene ndun e mod aá bēsūē' áwab mendáb.

⁴⁶ Ade Yesue áamá bō alyōgtēn, anchágé á ekone mīn, ákáne.

⁴⁷ Née ngukél épédé, Yesue abē bembapēe bēmbēen bōle áfinté e edib, Yesue-'e abé á nkin mwēnpen.

⁴⁸ Annýn aá abē bembapēe bétage ákēen bōle áyāle epub é ngīne émbíd bō á'sō-te. Né-ōó, dyam-éé adé epōg-ne-ngwa anké bō atán, ákag á mendib mīn. Ahédé'áá aá mótóm bō ámīn.

⁴⁹ Boj anyín áde bényiné akag á mendib mīn, bēnwēmtēn bán nwú móo rídé. Héé bēbóótédé abón.

⁵⁰ Bēbóné'áá áyāle áde bényiné mó, mbwōg ménkōb bō moosýāál bwāmbwam. Abwōg-ábwōg Yesue anláá bō aá, "Nlém mééhūnē nyé, méé ndé. Nyéebáá'."

⁵¹ Héé ásilé á bōle-tē wēe bēmbēē, epub-pe énsōg atóm. Yāl enkóm ábe bembapēe áte bwāmbwam.

⁵² Yāl enkóm bō áte áyāle bēnkēnsōh'tēnné chōm-éé menyáké míme ámbēnlé ádíde e'kálé é' bad é'tāan nílúmtéé. Bēnkēnhēnlé-'e achem.

Yesue achōhté bad

bé nkole d Genesaret

(Mat 14.34-36)

⁵³ Née bēchábpé edib-é-nzab, bēmpē á múde mīmíní, á mbwōg e Genesaret. Ahed-táá bēntáá-'é bōle.

⁵⁴ Bēbídé-'aá á bōle-tē bídén bad bēchēm-me Yesue.

⁵⁵ Héé bényōgté mbwōg áte esýāál bēpēmē bad bé nkole á mekále mīn, békēené' hōm téé áde bēnwōgkē bán Yesue adé.

⁵⁶ Hōm téé-'e áde Yesue ánkéé, á myad mémábáá ne mēsád, ne wēe bad bēlōó á nzag-tē, bad bēpēné'áá bad bé nkole wēe bad bēbúdé aladēn á dyad-tē ákáb nyonggé. Née bēmpēénné bō, bēcháá mó bán ámwē bad bé nkole bēsiten ké mesó mé mbóté nímē. Né-ōó bad bé nkole bēsýāál ábe bēnsitēn míme mesó mé mbóté bēndýēé bwām.

7

Ayāged dé betaa

(Mat 15.1-9)

¹ Befarisia ne donje dé bemelēede bé mbéndé ábe bēmbíd á Jerusalem bēnlāhned Yesue áwōglēn mó.

* 6:37 *Mbwōkel é kabpe ebe*: ébédé nsábe mí mod nhōg áyāle ngōn waam.

² Bényin bán donje dé bembapee ábe Yesue bedyág medyé ne mekáá mé mbinde, néde béewobpe' aá mekáá nyaa eché Befarisia béhábéé bán bétángéné awobe.

³ Befarisia ne bad bé Israel ábe belyáge áse bésyāāl bēhíde ayáge áde bēnkudté wée ábab betaa. Béedyákgé ndyéed ésebán bēwóbpé mekáá nyaa eché etángéné.

⁴ Póndé eché mod ábídeé á dyan-té, eedyákgé chōmchōm ésebán asébpé yāl awobe. Mbéndé édé-ε ámpē hiin eché bēhídeé, nēngáne awobe á bwēm bwám. Bwēm nēngáne kōb, mbeé, kúmbe é e'kii, ne bwēm nēe mebendé.

⁵ Héε Befarisia ne bemeléede bé mbéndé bésedteé Yesue bánken, “Cheé ékáá bonj ábōn bembapee bééhíde' ayáge áde ábēd betaa bétédnéde sé? Bedyág ndyéed áde béewopéé mekáá nyaa eché éhednadté.”

⁶ Yesue antimtén bó aá, “Nkal é' dāóđan Yesayaa antángén áde ánhōbpē ne e'yale ábe Dyōb dénlōmēnnē mó tāngene nyé bedog-badé, ngáne éténlédé nēn, 'Ábēn bad bēbage me edúbé é nsāl ngēn, bonj mímab nlém méesaá áwēm.

⁷ Edúbé éche bēbageé me éesaá dyamdyam, áyāle bēyágte bad áhíd mbéndé é baányon byánán édíi mbéndé é Dyōb.’

⁸ Nyétédte mbéndé é Dyōb bonj pēn nyéhíde ayáge á baányon.’

⁹ Héε Yesue ábádeé aá, “Nyēbenlad mwane átede mbéndé é Dyōb ábel nēn nyéhíde ayáge áden dēn.

¹⁰ Mosēe ahóbé aá, ‘Béé sóó ne nyon edúbé.’ Ahób-pe ámpē aá, ‘Kéznéé awē ahóbé sáá ké'ε nyaá dyam dé mbéb áyāl bétángéné bēwúú mó.’

¹¹ Bonj nyéyágte nēn bán nzé mod awóó chōm éche ántāngēnnē sáá ké'ε nyaá awōngēn bonj ahóbé aá, ‘Echēn chōm édé Kōban,’ (Nē adé bán édíi chōm é Dyōb),

¹² Né eewóó'ε nzōm áwōngēn sáá ké'ε nyaá.

¹³ Né-óó, áde ayáge áde nyébageé bad ábélé nyéetédéé eyale é Dyōb nēe dyam. Mam méde-ε ámpē hiin nēe mīmēn míme nyébeleé.”

*Mam míme mébele bonj
mod eesáá' d'só é Dyōb
(Mat 15.10-20)*

¹⁴ Héε Yesue áchēnléé ene ndun e mod bonj álāngē bó aá, “Nyéwóglen, nyésōnjen-ne me.

¹⁵ Chōmchōm éesaá éche ébide á ebwóg bonj nēe éslé mod áte ébel mó abé mbinde á'só é Dyōb. Bonj chōm éché ébide mod áte chōó ébele bonj abé mbinde á'só é Dyōb.”*

¹⁷ Yesue anchené ene ndun e mod, asl á ndáb-te. Dóó ábē bembapee bépédé bonj belāngē mó bán átānled bó ene ngan.

¹⁸ Héε Yesue ákwēntanné bó aáken, “Nyémpē nyéésōntánné-ye? Nyéenyínéé nēn bán kéchéé éche éslé mod áte, éche ébíde á mbíd e ebwóg, éebeléé-se mod abé mbinde á'só é Dyōb-ε?”

¹⁹ Ngáne ésléé mod áte, éepagké mó á nlém-tē. Ebelé ésud mó dásó á abum-tē ébíd-te.” (Yesue anhób nē álúmed nēn aá ndyéed ké ehéé eboó adyé.)

²⁰ Ambád aá, “Chōm éché ébíde mod áte chōó ébele bonj eesáá' á'só é Dyōb.

²¹ Ayāle, á nlém mí mod-tē dōó mewēmten mé mbéb nēngáne akáb dé mesón, echíb, ne ewúen bēbídeé. Mmē mewēmten mó mébelte mod mbéb.

²² Akáb dé mesón á ndáb e'wóngé, abé dé metag, ne abel á mam mé mbéb mémpēe nēngáne edogké, ábel mbinde é mekan, akón á bad, akal á bad metóm áyāl, abé á kúmbe ne abel dé e'yókél é' mekan.

²³ Mmēn mam mé mbéb mésyāāl mébíde mod á nlém-tē mébelé-ε mod eesáá' á'só é Dyōb.”

*Adube dé nken-a-mmwaad
(Mat 15.21-28)*

²⁴ Dóó Yesue ásyángé bonj ákág á eped é mbwóg eché enchiitén myad mé Tíre ne Sidon. Héε áslé ndáb póg, ééhede' aá-ε á modmod ábíi aá módé áwed-te. Ké nē bēmbē bēbíi.

²⁵ Nēe mmwaad nhóg awē edāóđan é mbéb ébédé awe mwān a mmwaad áte áwógé bán Yesue adé áhed, ampē ákwē-ε mó á mekuu.

²⁶ Ane mmwaad abédéé mmwaad a lonj á Grikia awē béchyáá á ped e mbwóg e Siria eché bēchágéé bán Fonisia. Héε ácháá'ε Yesue aá ábíded mwān éché edāóđan é mbéb áte.

²⁷ Bonj Yesue ankwentén mó aá, “Sé sébe sédíde bēndem. Eesaá bwám átéd ndyéed e bānbān ábwēme mbwé.”

²⁸ Ane mmwaad ankwentén aá, “Nē dēn a-Sánj, bonj kóáñne mbwé éché edyéé á tébele-sé ebelé edyé púuted é medyé éche bēndem bēhúnté.”

* 7:15 Donje á kálag dé'só ábádé nchoo 16: “Kéznéé awē awóó metíu dwóg.”

²⁹ Dóo Yesue álanḡeé mó aá, “Áyale échén ehób éche éhóbé nén, ehale ésūē we á ndáb. Edaádaḡ é mbéb éche ébédé awonḡ mwān áte étédé mó.”

³⁰ Né-óó, ane mmwaád ansú á ndáb, atán nāḡgāne mwān ánāḡgé á anon mín. Echē edaádaḡ é mbéb émmād mó atede.

*Yesue achōḡtē mod awē
eewōgne’ad, eehóbé’ad-’e dyam bwām*

³¹ Héē Yesue áhídté á mbwōḡ e Tirc, átimé á Sidān á pēd e edib é Galilia, átimnád á pēd e mbwōḡ e Myad Dyóm.

³² Bad behóg bēmpēén mod áwē awē eewōgne’ad, eehóbe’ad-’e dyam bwām. Abé bad bēnchāḡ Yesue bán ábán ane mod ekáá á yāl.

³³ Héē Yesue áhídnédé mó wēē ene ndun e mod édíḡ boḡ átmēn mó á ahāḡgé á hōm. Ansóléd memii á metúu nīme ane mod, ásob meléed boḡ ásitén mó echém.

³⁴ Héē Yesue ánóné amín, áheeméd áte, boḡ áhóbē aá, “Efáta,” nē adé nén bán, “Dibnéd.”

³⁵ Ábwōḡ-ábwōḡ, ane mod ábootéd-tē awōḡen, echém étyéém mó á nsal, ábootéd-tē dyam ahób bwām.

³⁶ Héē Yesue ásímeé bó etúu áte aá béétúbpē modmod adén akan dīn. Boḡ pónédé tēé echē áhóbé aá béehóbé’, bō-’e bēnabpē bó ahób hóbén.

³⁷ Bad bésyāal ábe bēnwōḡ, yāl enkóm bó áte nyaa echē echabé amín bwāmbwam. Béhóbé’ad bán, “Abele’ mam mésyāal bwām. Abele káāḡne bad bé ndóg bēwōgne’, ábele-’e e’bóbé é’hōbē dyam.”

8

*Yesue adídté e’kálé é’ bad é’niin
(Mat 15.32-39)*

¹ Mmē mesú mēn ndun e mod empée empē wēē Yesue. Ngāne bēnkēnwōḡgé chōm-éē bēdyáḡkē, Yesue anchélé ábē bembapēē, álāḡḡé bó aá,

² “Ndé enén ndun e mod ngol áyale békébé ne me e’pun é’láan, bēēwōo-’aa chōm éche bēdyáḡkē bōob.

³ Nzé nsuúténé bó nzaa bōob, né bēhūn asē á nzii áyale bó donḡe á bad bēchábé abíd.”

⁴ Héē ábē bembapēē bétimtanné mó bánken, “Héé mod áhale ákud ndyééd á ehyanḡe-tē hén echē ékwōḡ ábēn bad adyē-ye?”

⁵ Yesue ansedéd bó aáken, “E’wēle é’tāḡ nyéwóó?” Bēnkwentén bán, “E’wēle saámbé.”

⁶ Dóo álāḡḡé ene ndun e mod aá bēdyēe asē á ndoob-tē. Héē átédé ábē e’wēle saámbé, ásaḡnān Dyób, ákabtád bó áte, ábagé ábē bembapēē, bō-’e békabpē ene ndun e mod.

⁷ Bēnwōḡ-’e baá nguse bé súu ésad. Yesue annaméd chōmpē. Amaá-’ad chō anamed, ábagé bembapēē aá békabe bad.

⁸ Bad bēndyē ene ndyééd, békód-tē, káāḡ élyāḡ-ke asē. Echē enlyāḡ asē enlón e’lōḡ saámbé.

⁹ Mesonḡé mé bad nīme méndyē ene ndyééd mébédé dyam e’kálé é’niin. Yesue ansúúdt ábē bad áwab mendáb.

¹⁰ Asúuté-’ad bó súútén, asól-le mó á bōle-tē ne ábē bembapēē, békē-’e á mbwōḡ e Dalmanuta.

*Befarisia béhede’ e’chemléd
(Mat 12.38-42; 16.1-4)*

¹¹ Befarisia bēmpē wēē Yesue bébootéd mó apenten, béhedné mó e’chemléd ábe é’húú ádyōb. Bébélé’ad nē ákag mó.

¹² Héē Yesue áhéémédé áte, boḡ áhóbē aáken, “Cheé ékás boḡ nyonḡel e’chii éhedé e’chemléd? Ne mbále, nlāḡe nyé nén meé, nyonḡel e’chii éekudté e’chemléd ké’ ehóg.”

¹³ Héē áchénné bó, boḡ ásōlē á bōle-tē, átimé á pēd e edib eníní.

*Esulten é Befarisia
(Mat 16.5-12)*

¹⁴ Bōob-pōó, áde bembapēē ábe Yesue bésólé á bōle-tē, bēnchatén e’wēle awále áyāl. Ewēle ehóg chēmpēn chōo bēnlyāḡnédé á bōle-tē.

¹⁵ Héē Yesue álāḡḡé bó aá, “Nyétéd pónédé ne esulten é Befarisia ne éche Hērodē.”

¹⁶ Dóo békaleé bēn ne bēn bán, “Ahóbé nē áyale deewānleé e’wēle áyāl.”

¹⁷ Yesue ambii chōm éche bēhóbéé, héē ásedtēé bó aáken, “Cheé nyéhóbéé áyale e’wēle ábe nyéēwōó’é? Káāḡ ne’ bōob nyéebii’ é ké’ nyéesōḡtēneé-ye? Chán nyélélé nlem á abum nén?”

¹⁸ Nyéwóó míd, nyéenyínnéé-ye? Nyéwóó-’e metúu nyéewōḡnéé-ye? Káāḡne bōob nyéekamtánné-ye?

¹⁹ Ade mēnkabpē e’wēle é’tān ádíde e’kálé é’ bad é’tān, e’lōḡ é’tāḡ e’wēle ábe bēnlyāḡ asē ábe nyēnladté bēnlōnné?” Bēnkwentén mó bán, “Dyóm ne é’Be.”

²⁰ Ambád bós aseded ámpē aá, “Ade mēnkabpē-’e ewele saámbé ádíde e’kálé é’ bad é’niin, e’lón é’táj e’wele ábe bēnylag áse ábe nyēnladté bēnlōnnē?” Bēnkwentén mós bán, “E’lón saámbé.”

²¹ Ambád bós aseded aáken, “Bonj ké nē nyéesōnjené-ye?”

Yesue achōjté mod awē akwedé ndim

²² Yesue ne ábē bembapēe bēmpē á Betsaida. Ahed dōo bad behóg bépééné mod awē akwedé ndim áwē, bonj bēcháa mós bán ábán mós ekáá á yāl.

²³ Yesue ancháá ane mod á ekáá, áhidnéd mós á dyad-tē wē. Ansob mós meléed á mīd, ábán mós mekáá á yāl, bonj ásedté mós aáken, “Enyíne chōmchōm-ε?” ²⁴ Héε ane mod ánóné ámín bonj áhōbē aá, “Nnyíne bad bonj bényinnad nēngáne mel níme mekág.”

²⁵ Héε Yesue ábáné mós mekáá á mīd ámpē. Dōo ane mod ákídté anōn, mīd mēndibnéd mós, ábootéd-tē anyínen bwám.

²⁶ Yesue ansúúd mós á ndáb, áhōbē aá, “Wētōgné-’e asól ádyad-tē ámpē.”

Yesue mós adé Ane-awē-Béwógté

(Mat 16.13-20; Luk 9.18-21)

²⁷ Yesue ne ábē bembapēe békágé’áá á myad níme médé á mbwóg e Kaisaria Filipi. Bépédé-’aá á nzii wē, dōo ásedtéé bós aáken, “Nzé-módé bad bós behōbēé bán ndé?”

²⁸ Héε bēkwentanné bán, “Donje á bad behōbe bán edii Jōne Nduसे, bēmpēe bán Elaijaa, ábíní-’ε bán nkal é’dāadaj nhóg.”

²⁹ Dōo ásedtéé bós ámpē aáken, “Bonj nyébēn-ne nzé-módé nyéhōbēé bán ndé?” Héε Petro ákwentanné mós aá, “Wéé edé Ane-awē-Béwógté.”

³⁰ Ade Petro amaá-’aá áhōbē nē, Yesue ansím bós etúu áte aá béélāngē modmod nyaa e mod echē módíí.

Yesue ahóbé tōngene metake nímé

akudté ne kwééd eché áwēε

(Mat 16.21-28; Luk 9.22-27)

³¹ Yesue ambootéd ábē bembapēe ayóged, áhōbē aá, “Mwán-a-Moonyonj atōngéné ákūd metake híin. Bad bēmbáá bé dyad, beprise bēmbáá ne bemeléede bé mbéndé bēbān-’ε mós á yāl. Béwūú mós, bonj e’pun ábe é’lōnténé é’láán, ápuu.”

³² Yesue anhób ádén dyam nyaa eché énkēnkonjnédté bós mbále ké póg. Héε Petro áfímné Yesue á nkag, bonj ákágé átimed mós áte.

³³ Bonj Yesue ankuné, ánōn ábē bembapēe. Dōo ákánné Petro áte aá, “Hidé me á’sō-te, a-Satan! Mmoj mewēmtan mewésáá mewēmtan mé Dyōb, médíi mewēmtan mé moonyonj.”

³⁴ Dōo Yesue áchēnlé ene ndun e mod ne ábē bembapēe, bonj álāngē bós aá, “Kéznéé awē adáó me ahíd, ásob yāl mēndib, ápēm-me adé awóg áhíde me.

³⁵ Ayāle kéznéé awē ahēde adé alongé asonj ábōd dō. Kéznéé-’ε awē abódé adé alongé ayāle echém ne ayāle nímén nkalanj ní bwám né ákud alongé áde déemaá’.

³⁶ Nsyááj rhéé mod ákudté nzé akudé nkōjsé nsyāāl bonj abódé adé alongé.

³⁷ Cheé mod áhēleε ábe ákōde adé alongé?

³⁸ Kéznéé awē ákwāgēn me ne ábēm e’yale á nyonjel e’chii eché ehídne Dyōb nlém nibe, abé-’ε ebébtéd, Mwán-a-Moonyonj mós ámpē ákwāgēn mós á pōndé eché ápéé ne ángel éché éśáá ne ehúmé éche Sáá.”

9

¹ Héε álāngéé bós aá, “Ne mbále, nlānge nyé nén meé, donje á bad áfínté echēn béenyínénné kwééd díd áde bényinéé néε nkamlén ní Dyōb nípédé ne ngíne.”

Yāl ehōjiléne Yesue

(Mat 17.1-13; Luk 9.28-36)

² Ambíd e epun ntóób Yesue ankéén Petro, Jemse ne Jōne á mbōod echē echabé ámín. Bēmpen-εé bēmbē áhed. Awáb e’sō-te hē dōo ábē bembapēe bényíné néε Yesue áhōjiléne.

³ Mbóté éche ánhēε épené áte, épúbē-’ε féréd. Epúbé’áá nyaa echē modmod á nkōjsé éheléé-se apúbéd.

⁴ Héε bényíné Mosεε ne Elaijaa bēbídé taléd, bōobe Yesue békale’.

⁵ Dōo Petro álāngéé Yesue aá, “A meléed, ébóó ngáne syāá dédíí hēn. Délōnj e’bem é’láán, échōnj, éche Mosεε ne éche Elaijaa.”

⁶ Petro enkēmbíí’ε chōm éche áhōbēé ayāle mbwóg ní ngíne níme mémbē bōobe baáb á yāl.

⁷ Hē dōo mbag ékúténé bós bonj ehōb-pe ébídé’ á mbag-tē wē nén, “Awem Mwán a nlém nén, nyéwógne mós.”

⁸ Abwōg-ábwōg dōo bēnóné ekíde bonj béenyíne modmod ampée nzése Yesue.

⁹ Ade bésudéé á mbòod mín nê, Yesue ansim bó etúu áte, álāngē bó aá, “Nyéelāngé modmod dyam áde nyényiné kááñ ne á pónde echê Mwān-a-Moonyonj ápuú’é.”

¹⁰ Né-òó, ábē bembapēē bēnkoó áde dyam ne bēn, bésēdté yál chòm-ēē mpuu rídíí.

¹¹ Hēē bésēdtéé Yesue bánken, “Cheé ékás bonj bemelēede bé mbéndé bēhóbē nēn bán Elaijaa atāngéné asēbe dé ape bonj Ane-awē-Béwógté ápē?”

¹² Dóó átímtanné bó aá, “Ne mbále Elaijaa atāngéné asēbe dé ape atíí-ē mam mēsýāā. Cheé-ō ékás bonj étenléd á kálag e Dyób nēn bán Mwān-a-Moonyonj ákūd metake híin, bad bēbāñ-ē mó á yál?”

¹³ Bonj nlāngē nyé nēn mēé Elaijaa ammad ape, bēmbēl-ē mó ngāne bēndāngé. Nē dénlōnēd mam míme mēntenléd áyāl e echē.”

Yesue achōñtē mwān

awē edāádāñ é mbēb étāgtéé

(Mat 17.14-21; Luk 9.37-43a)

¹⁴ Ade bēpédé wēē ábíníí bembapēē bēbédé, bēntān nēē ndun e mod éláñnéde bó. Bemelēede bé mbéndé bēpéntānnáá ne bó.

¹⁵ Mýnín áde ábē bad bényíné Yesue, menyáké ménkōb bó bwāmbwam. Bēnnyāgéd áwē áleled mó.

¹⁶ Hēē Yesue áseđtēé ábē bembapēē aáken, “Cheé nyāábō nyépentanné?”

¹⁷ Dóó mod nhóg áfínté e ene ndun e mod ákwentanné aá, “A-melēed, mpēēné awēm mwān a mwenchóm áwōñ áyāle edāádāñ é mbēb éde mó áte, ébélé eehóbēé-ē dyam.

¹⁸ Nzé ékóbé mó, ébelé éhūnēd mó ásē, mehod-te mébídé mó á nsal. Ene pónde ádyāg mesonj á nsal, anámén-ne. Nlāngé-ē ábōñ bembapēē mēé bēbídéd mó chó áte bonj bēheleé.”

¹⁹ Dóó Yesue ákwentanné aá, “Wāā, nyé bad bé’ chíi, nyéewóó-é adúbe. Chán mpēéé nyé adyēn hēn-ēē? Chán mpēéé nyé awēsén-é? Hyēnāáđ mē mwān awed.”

²⁰ Dóó bēpínédé mó ane mwān. Anyín áđé échē edāádāñ é mbēb ényíné Yesue, ēnsōg ane mwān, éhūnēd mó ásē, áhāñlād á ndāob, mehod-te mébídé mó á nsal.

²¹ Hēē Yesue áseđtēé sáá aáken, “A etún é pónde éhéé ákétāgké nēn?” Dóó sáá ákwentanné aá, “Bootyā se á mwēndem.

²² Eyógké mó ahūned á muu-te ne á mendīb-te áwúu mó. Bonj nzé dyam áde áde éheleé-se ébēl, ewóg sé ngol, ewōngén sé.”

²³ Hēē Yesue átímténé mó aá, “Wēé nzé dyam áde áde ríheleé se rúbēl-ē? Chóm ésyāā éhele ébēndel ne mod awē awóó adúbe.”

²⁴ Ábwōg-ábwōg dóó ane mwān sáá ákánté ehōb ámín aá, “Ndúbpe, wōngén adúbe áđēm áde déekwognede.”

²⁵ Ndun e mod enyāgté’áá áladēn áte áhed. Ade Yesue ányíné nē, ankáné échē edāádāñ é mbēb áte aá, “A-edāádāñ é ndóg ne é ebóbé, nkamlan wē mēé ébíd mó áte, weesólé-ē mó áte ámpē.”

²⁶ Echē edāádāñ élēbpē-áá esaád, éságéd ane mwān ne ngíne, ébíd-te. Ane mwān antím nēē ndim ní mod káñ donje á bad bēhóbē bán, “Awédé.”

²⁷ Bonj nēé Yesue áchāngé mó á ekáá, áfíldé mó ámín, ane mwān atyéém-me.

²⁸ Yesue ansól á ndáb-te. Hēē ábē bembapēē bésēdtéé mó á kun-tē, bánken, “Cheé éñkāñ bonj sēnkēnhēl échē edāádāñ é mbēb abíded?”

²⁹ Ankwentén bó aá, “Mekáne mwēmpēn móó méhele mébídéd enēn ndín e edāádāñ.”

Yesue ahóbé ámpē tāngene eche kwééd

(Mat 17.22-23; Luk 9.43b-45)

³⁰ Yesue ne ábē bembapēē bēhídté-áá hē, bēpōñ á mbwóg é Galilia. Enkēnmwáá aá modmod ábíí wēē módíí,

³¹ áyāle ayāgté’áá ábē bembapēē aá, “Bēbē Mwān-a-Moonyonj á mekáá mé baányonj. Bó-áá bēwúú mó. Nzé bémáá-ē mó awúu ápuú ámbíd e epun é’lāán.”

³² Bonj ábē bembapēē bēenkēnsōñtēnné chóm eche ánhōbpē, bēbáá’áá-ē mó asēded.

Nzéé atómténé mod ambáá abé?

(Mat 18.1-5; Luk 9.46-48)

³³ Yesue ne ábē bembapēē bēmpē á Kapenahum. Ade bēpédé, bēnsól á ndáb-te. Dóó Yesue áseđtēé bó aáken, “Cheé nyéswāntānnáá á nzii bwéed?”

³⁴ Bonj bēnkēnhōbpē dyamdyam áyāle bēn ne bēn bēpéntānnáá tāngene mod awē atómténé mod ambáá abé áfínté echáb.

³⁵ Hēē Yesue ádyéé ásē, áchāgē ábē bembapēē dyóm ne bēbe bonj álāngē bó aá, “Kenzéé awē ahēde mod a mbáá abé, atāngéné abé ndímtene, abé-ē mbālede a moosýāā.”

³⁶ Hē dóó átédé mwēndem bonj áfíldé mó áwab fínté. Dóó abwááde ane mwān, bonj áhōbē aá,

³⁷ “Kéznéé awé akobé enén ndín e mwān á dín adém, né akobé me. Kéznéé-’ε awé akobé me, eékobéé mmēn-pen. Akobé káōne ane awé alómé me.”

*Kéznéé awé eetāngán syānē,
né adé ne syānē*

(Luk 9.49-50)

³⁸ Jone anláá Yesue aá, “A meléed sennyín mod abídte bad e’daódan bé mbéb áte á dín adōn, sēnláá-’ε mó bán ásoğ abel nē, ayāle eésaá mod a echon eche syānē.”

³⁹ Bon Yesue anláá bó aá, “Nyéelāngé mó bán ásoğ abel nē. Mod ké nhóg eésaá awé āmad menyáké abel á dín adém, bon āmbíd e pónidé áhōbē me mam mé mbéb á yāl.

⁴⁰ Ayāle, kéznéé awé eetāngán syānē né adé ne syānē.

⁴¹ Ne mbále, nlānge nyé nén meé, kéznéé awé abagé nyé ké kōb e mendib ámwé á dín adém, ayāle nyédíí bad bé Křisto, atāngéné nime nsábe akud.

Mekāgsen nime mébelte bad mbéb

(Mat 18.6-9; Luk 17.1-2)

⁴² “Kéznéé awé abēlté enén ndín e mwēndem echē edúbpé me mbéb, ébē mbon ātā mó sánkalaa aláá á nkān, béhúnéd-te mó á edib é nkwē.

⁴³ Nzé echon ekáá ébelte we mbéb, esél chō, épim. Edé mbon we ákud alongé áde déemaá’ ne epeđ é yāl tómaa we áwōn mekáá mébe bon bébwém we á dū-á-muú.*

⁴⁵ Nzé echon ekuu ébelte we mbéb, esél chō, épim. Edé we mbon ákud alongé áde déemaá’ ne epeđ é yāl tómaa we áwōn mekuu mébe, bon bébwém we á dū-á-muú.†

⁴⁷ Nzé ádon díđ ábelte we mbéb, ehúd dō, épim. Edé mbon we ásol á nkamlēn ní Dyōb ne díđ ahóg tómaa we áwōn míđ mébe bon bébwém we á dū-á-muú.

⁴⁸ Ahed, e’kuu abē é’dyāg bad béēwāgkē, muú nímed-te méédímē.

⁴⁹ “Muú ményāā mod ké ahéé á yāl ngāne nkwe nínyāngéé á ndyééd-te.

⁵⁰ Nkwē níbóó, bon nze níbódé alān, chán béhele-se bényínéd mó ampē? Nyényine’ nēē nkwe, nyédyē-’ε ne nšan ne nhóg ne anííí.”

10

*Ayāged tāngene anan
dé mmwáád á e’wōngé*

(Mat 19.1-12; Luk 16.18)

¹ Yesue anhidé adé abwóg á hóm, ampōn á mbwóg e Judeya, áchābē á ped e edib é Jodan enííí. Ndun e mod epagé áá awé, ayāgtē-’ε bó ngāne āmentēnné bó ayāged.

² Befarisa bémpē awé ákag mó. Bēnsédéd mó bánken, “Eched mbéndé chóchó ebagé kunze nēn mod anan mwaád á e’wōngé-ye?”

³ Héé Yesue átímtanné bó aáken, “Chán mbéndé eche Moseé ekaléé?”

⁴ Bēnkwentēn bán, “Mbéndé echē Moseé ebagé kunze nēn, mod ábe mwaád kálag echē elúmtē nēn bán, e’wōngé é máá bon ānan mó.”

⁵ Héé Yesue álángeé bó aá, “E’lel bé nlém á abum ábēn bóó bēmbēl bon Moseé ábe nyé échēn mbéndé.

⁶ Bon se á mbooted, áde Dyōb áhágé bad, anhāg mmwáád bó mwēnchóm.

⁷ Né-óó, mwēnchóm ātedé sáá ne nyan, abē ne mwaád.

⁸ Búmō bad bébe bétim mod nhóg. Né-óó, béesaá ampē bad bébe, bon bédíí mod nhóg.

⁹ Né-óó, échē Dyōb áládé, modmod eepáá.”

¹⁰ Ade bétimé āmbíd á ndáb-te, Yesue ábē bembapēē bēnsédéd mó tāngene dyan áde áhóbē.

¹¹ Héé Yesue álángeé bó aá, “Kéznéé awé anané mwaád bon awōn mmwáád ampēé né akábé asón.

¹² Nzé mmwáád-te atēdté nchóm bon awóó mod ampēé, né akábé asón.”

Yesue anāmté bēndem

(Mat 19.13-15; Luk 18.15-17)

¹³ Bad bēpééné áá bēndem wéé Yesue bán ábán bó ekáá á yāl ānamed bó. Bon ábē bembapēē bēnkānē ábē bad áte.

¹⁴ Ade Yesue ányíné nē, anlīn, aláá-’ε ábē bembapēē aá, “Nyéte de bēndem béhyag áwēm. Nyéekáá bó ayāle nēn nyaa e bad nēé bó chōó éwóó nkamlēn ní Dyōb.

¹⁵ Ne mbále nlānge nyé nén meé, kéznéé awé eékode nkamlēn ní Dyōb nēngāne mwēndem, éésónlé áwēd-te.”

* **9:43** Donje á kálag dé’só ábádé nchoo 44: *Ahed, e’kuu abē é’dyāg bad béēwāgkē, muú nímed-te méédímē.* † **9:45** Donje á kálag dé’só ábádé nchoo 46: *Ahed, e’kuu abē é’dyāg bad béēwāgkē, muú nímed-te méédímē.*

16 Hée Yesue áladé ábê bán áte, ábānē bó mekáá á nló nhógē-nhógē, ánamté-’ε bó.

Nhɔn mí bad ne nkamlɛn ní Dyɔb
(Mat 19.16-30; Luk 18.18-30)

17 Ade Yesue ábwógkē eke ámpē, dɔɔ mod nhóg ányágté awē, abwóg mebóbón awē e’só-te, bonj ásedté mó áá, “A-meléed a bwám, dyam áhéé ntáŋgéné ábel, ábel nén ríkud alongé áde déemaá?”

18 Hée Yesue ásedtéé mó áaken, “Cheé ékáá bonj échágé me meléede a bwám? Mod ké nhóg eesaá mod a bwám étóméé Dyɔb dēmpɛn.

19 Ebií mbéndé éche éhóbe bán, “Weewúé’ mod, weekábé asón á ndáb e’wóngé, weechíbé’, weebídé mbón e metóm, weédōgē bad, bée sóó ne nyon edúbé.’”

20 Hée ane mod áhóbeé áá, “A meléed, nhídé échén mbéndé ésyāal bootya se á mwëndemé.”

21 Hée Yesue ánonéé mó chóón ne nlém mé edəŋge, bonj álanḡē mó áá, “Dyam ahóg áhedne we. Kág, ésom bwēm é’syāal ábe éwóó, étéd nímé məné, ébe betóótókē bé bad. Nzé ebelé nē, wēkúd nhɔn ádyɔb. Ene pónde éhye éhíde me.”

22 Ade ane mod áwógé nē ansudén, asú-’ε ne ndutul á nlém-té áyāle ambé nhɔn bwámbwam.

23 Hée Yesue ákúnné míd wée ábē bembapee bonj álanḡē bó áá, “Elél áte bwámbwam behɔn bé bad ásol á nkamlɛn ní Dyɔb.”

24 E’yale ábe Yesue bénkɔméd ábē bembapee yāl áte. Ambád ahób ámpē áá, “A-baányan élél áte bwámbwam ásol á nkamlɛn ní Dyɔb!

25 Edé mwān e akan sánkalaa a nyam néε Kamél áponj á epɔn e ndənde tómaa nhɔn mí mod ásol á nkamlɛn ní Dyɔb.”

26 Ade bembapee béwógé nē yāl enkóm bó áte bwámbwam. Hée bēn ne bēn béhóbeé bánken, “Nzéé-’ɔ ahele ákud e’sóson?”

27 Hée Yesue ánonéé bó chóón, bonj áhóbē áá, “Ne baányon nén déeheléé se abenled, bonj ne Dyɔb dyamdyam déeleléé áte.”

28 Hée Petro áhóbeé áá, “Nóné’, sētədté chóm ésyāal áhíd we.”

29 Dɔɔ Yesue áhóbeé áá, “Ne mbále, nlánge nyé nén meé, kénzéé awē atədté eche ndáb, baányan, nyaá, saá, bán ne eche mbwóg áyāl echém, ne áyāl e nkalanj mí bwám,

30 ákúd tómaa ne nē á alongé dé’ chíi. Akúd ndáb, baányan, bán, ne mbwóg mbwókel é ngen. Akúd-te kóónne metake á dīn ádēm. Akud-te alongé áde déemaá’ á pónde éché ehúe’

31 Bonj bad híin ábe bédé á’só bəɔb bélyəg mbíd, híin-ne ábe bényəg mbíd bébē á’só.”

Yesue ahóbe ngen éche elónténe
éladán ngáne béwúú’é mó
(Mat 20.17-19; Luk 18.31-34)

32 Yesue ne ábē bembapee békágé’áá á akuu á Jerusalem, mó-’áá antómén bó. Yāl enkóm ábē bembapee áte bwámbwam, mbwóg-ke ríkób bad ábe behídé’áá bó. Ade békagké nē, dɔɔ Yesue átimné ábē bembapee á nkəg ámpē bonj álanḡē bó mam níme mébenléd ne mó.

33 Hée áhóbeé áá, “Pón nyébii bán dekag á Jerusalem, áwed-tá bébéé Mwān-a-Moonyon á mekáá mé beprise bémbáá ne bemeléede bé mbéndé. Bó-’ε bébē mbakú bán atáŋgéné awé, bébē-’ε mó á mekáá mé bad ábe béese bad bé alonj á Israél.

34 Béwélé mó, bésotád mó meléed á yāl, béswádtāad mó e’tanḡú, béwúú-’ε mó. Bonj ámbíd e e’pun é’lāán ápuú.”

Jemse bó Jɔne béhede’ e’tál
(Mat 20.20-28)

35 Ámbíd e nē Jemse bó Jɔn, bán ábe Zεbedie bēmpē wée Yesue. Ade bépédé, bēnlāá mó bán, “A meléed, dyam ádé áde séhedéé bán ébele sé.”

36 Hée Yesue ásedtéé bó áaken, “Cheé nyéhedeé bán níbele nyé.”

37 Dɔɔ behóbeé bán, “Séhede bán áde wédyé’é ádɔŋ atii dé nkamlɛn, émwε sédyε we á nkəg, nhóg á ekáá émbáá aníní-’ε á ekáá é emwed.”

38 Hée Yesue ákwentanné bó áá, “Nyéebii’ é chóm éche nyésedtéé. Nyéehēl metuné níme mépēmme apém-ε? Nyéehēl edusen é metuné éche mékudté akud-ε?”

39 Dɔɔ békwentanné mó bán behēl. Hée Yesue álanḡéé bó áá, “Nyéepēm metuné níme mépēmme, nyéekúd edusen é metuné éché mékudté,

40 bonj meewóó’ é kunze ápwed mod awē ádyéé me á ekáá é mbáá ké’ε á ekáá é emwed. Dyɔb dɔɔ dēbē nímé metii wée bad ábe ánábndéé mó.”

41 Ade ábiníi bembapee dyóm béwógé dyam áde Jemse bó Jɔn bésédte, bēnlíin bó bwámbwam.

⁴² Hée Yesue áchagée bó moosyaál benben bonj álāngē bó aá, “Nyébíí nén bán bad ábe bébyééné nées benkamlene bé nkònsé ne bad bémbáá bé dyad, bébenlad ngine ákamlen bad ábe bédé ásē echāb.

⁴³ Bonj étāngeneé abé nē áfinté echēn. Kénzée awē ahede aá móbē mod ambáá áfinté echēn, atāngéné abé mbalede awēn.

⁴⁴ Kénzée-’e awē ábē mod a’ só áfinté echēn, atāngéné abé ntān a moosyaál.

⁴⁵ Ayāle ké Mwān-a-Moonyon eépedeé aá bad bébenle mó, bonj apedeé ábele bad, ábe-’e áde alongé ákōde bad híin.”

*Yesue achōnté mod
awē ankwē ndim*

(Mat 20.29-34; Luk 18.35-43)

⁴⁶ Yesue ne ábē bembapee bémpē á dyad á Jeriko. Ndun e mod ehídé’áá bó. Ade bémadté dyad áte nē, dōó betáné mod nhóg awē béchágé’áá bán Batimuse. Batimuse abédé-’eé mwān awē Timause. Ankwē ndim. Andyéé á nkog ní nzii, áchōmē bwēm.

⁴⁷ Ade áwógé bán Yesue a dyad á Nazaret móo atómé’ nē, ambootéd abón, áhōbē aá, “A-Yesu, Mwān a mbyaa nime Dabide, wóg me ngol!”

⁴⁸ Bad híin békánne’áá mó áte, bélāngē-’e mó bán ádib nsāl. Bonj mó-’e ambé ábōnē aá, “A-Mwān a Dabid, wóg me ngol!”

⁴⁹ Hée Yesue átyéémé bonj áhōbē aá, “Nyéchéle mó.” Dōó béchénlé, bélāngē mó bán, “Weētāgē áte. Tyéem ámín achēnle wē.”

⁵⁰ Hée ane mod ábwémé kóte winíí, apádé ásē, ápāg-ke wēe Yesue.

⁵¹ Hée Yesue ásedtēé mó aáken, “Cheé ehedeé wēe mbele wē?” Ane mod anhób aá, “A-meléed, nhede mē rinyinē ámpē.”

⁵² Hée Yesue álāngēé mó aá, “Kāg, adúbe ádōn ádíde wē bwām.” Ábwōg-ábwōg ambootéd anyinēn, áhídé-’e Yesue.

11

Yesue asólé á Jerusalem nées kōn

(Mat 21.1-11; Luk 19.28-40; Jon 12.12-19)

¹ Ade Yesue ne ábē bembapee békwógé ape á Jerusalem, benben ne myad mé Betpeg ne Betani á Ekone é Menzab, anlóm ábē bembapee bébe á’ sō,

² álāngē bó aá, “Nyékag á dyad áde áde nyé á’ sō nē. Nzé nyésólé sólén nyéētán nées betāngé etum é nchóm a ésel awē mod éedfidē mbéd. Nyéhune mó, nyéhyene’.

³ Nzé mod asédté nyé aáken, ‘Cheé ékáás bonj nyébelé nén?’ Nyéláa mó bán, ‘Sāngwée atógnéné chō, álóm-me chō ámbid ábwōg-ábwōg.’”

⁴ Hée békíí bonj betānē’ etum é nchóm a ésel éche betāngé á mmwē-rí-nzii bonj béhunne’.

⁵ Hée bad ábe béntyéem benben ne áhed bésēdtēé bó bánken, “Cheé nyébeléé nē, nyéhunne éché ésel-’e?”

⁶ Bembapee béntimtén bó ngáne Yesue ánhōbpē aá béhōb. Dōó ábē bad-te bētdté bó bán békag.

⁷ Bēmpēén éché ésel wēe Yesue, bétal chō échab mbóté ámín bonj mó-’e ádiidé’.

⁸ Bad híin béntál échab mbóté á nzii-tē ábe mó edúbé, ábíní-’e bésēlē’ e’kikag é’ mií, bétalé’ á nzii-tē.

⁹ Bad ábe békágé’áá mó á’ sō ne ábe behídé’áá mó ámbid béhágé’áá e’saad bán, “Hosána, Mekenag!”

Nnam mbē ne ane awē apedeé á dīn áde Sāngwée’.

¹⁰ Nnam mbē ne nkamlen nime eched sāj Dabide, nime rihúe’.

Hosána, Mekenag ne Dyōb áde áde se ámín!”

¹¹ Yesue apedeé-’aá á Jerusalem, asól á Ndáb-e-Dyōb. Ansimén ekide ésyāal. Ngáne pónde émmadté atóm, antīm ámbid á Betani ne ábē bembapee dyōm ne bébe.

Yesue abagé alín á ngal ebómán

(Mat 21.18-19)

¹² Chān é’bíníí áde behúe’ é á Betani, nzaa enkób Yesue.

¹³ Annýin alín á ngal nchabnede ne byaa ámín. Dōó ákíí áhed ányin nzé móhele se mókud e’pum áwedé-mín. Ade apédé áhed enkéntánne epum ké ehóg étómēé byaa áyāle enēn pónde eebédeé pónde échē ngal échyáa’ é e’pum. ¹⁴ Hée álāngēé ábē bwel aá, “Wéechyáá’ é epum ámpē mbéd.” Ábē bembapee bēnwōg áde Yesue áhōbē nē.

*Yesue anané bekáb bé nyongé
á Ndáb-e-Dyōb*

(Mat 21.12-17; Luk 19.45-48; Jon 2.13-22)

¹⁵ Yesue ne ábē bembapεε bēmpε á Jerusalem. Ade bēpédé, ansól á Ndáb-e-Dyōb, ábootéd-te bad ábe békábé'áá dyon áwēd-te ananted. Ankuné betébele ábe bad bēpénlé'áá mōné ámín mekuu ámín, ákūnē-'ε metii nīme bad ábe bésómmé'áá mbəŋgé mekuu ámín.

¹⁶ Enkēmmwaa-'ε áá modmod átómēn chóm é nyoŋgé ké ehóg á eyáde é Ndáb-e-Dyōb-te.

¹⁷ Hée áyágtéé bō, áhōbē áá, "Eesaá mbále bán éténlédé nēn bán, 'Echem ndáb échagnéd bán ndáb e mekáne e meloŋ mésyāal-e?' Boŋ nyétimté chō mbwōg mé bechīb!"

¹⁸ Bepriε bēmbáá ne bemeléede bé mbéndé bēnwōg áde Yesue áhóbé nē, bébootéd-te nzii áhed áwúu mō. Boŋ bēmbē mbwōg áyale ndun e mod esyāal eché embé áhed émbē menyáké ne mekan nīme áyágté'áá.

¹⁹ Ade ngukél épédé Yesue ne ábē bembapεε bēnhidé á dyad-tē wē.

*Ayáged tŋgene alin á ngəl adē dénwē
(Mat 21.20-22)*

²⁰ Mbwembwe, áde bétiméé ámbíd, bényin ádē alin á ngəl ngáne áwédé kááŋne á nkan.

²¹ Hée Petro ákámtné dyam áde Yesue ámbenlé, boŋ aláŋgē mō áá, "A-Sán, nōné', alin á ngəl áde wēmbéé ebómán áwédé."

²² Hée Yesue ákwentanné áá, "Nyédúbe Dyōb ne nlém rísyāal.

²³ Ne mbále, nláŋge nyé nēn meé, kénzéé awé áláá enén mbəod áá, 'Hidé áse, éhūn á edíb é nkwē-te' boŋ adúbé ne nlém rísyāal áá dyam áde mōhōbēé débenléd ésebán apide', né débenléd.

²⁴ Né-óó, nláŋge nyé meé kéchéé éche mod ásédté Dyōb á mekáne-tē, boŋ adúbe nēn áá mōokud chō, ákūd-te chō.

²⁵ Póndé ké ehéé échē étyéémé wéé mōkanné', nzé ewánléné mod melingá, élagseŋ mō, ábel nēn awōŋ Titéé awé adé ámín mō-'ε ámpē alagsen wε nīmoŋ mbéb."*

*Hée kunze eche Yesue ébidé?
(Mat 21.23-27; Luk 20.1-8)*

²⁷ Yesue ne ábē bembapεε bēmpε á Jerusalem ámpē. Ahyómmé'áá á Ndáb-e-Dyōb-te. Hē dōo bepriε bēmbáá, bemeléede bé mbéndé ne bad bēmbáá bé dyad bēpédé áwē.

²⁸ Dōo bésēdtéé mō bánken, "Kunze ehéé éwóó ábel nīmén mekan? Nzé-módé abagé-'ε wε ene kunze?"

²⁹ Yesue ankwentén bó áá, "Meésedéd nyé dyam ahóg. Nzé nyékwenténé dō, né me-'ε mēláá nyé kunze eché ríwóó ábel nīmén mekan.

³⁰ Nzéé ambē Jone kunze áduŋen bad? Dyōb-ε ngé baányoŋ?"

³¹ Bēn ne bēn bēmbootéd apentēn bánken, "Nzé dehóbé nēn bán 'Jone eché kunze enhúú ne Dyōb,' né ásedéd syáne aáken, 'Cheé-ō enkōŋ boŋ nyénkéndúbé mō?"

³² Boŋ nzé dehóbé bán, 'Eché kunze ehúú ne baányoŋ?' " (Béwógé'áá bad mbwōg áyale bad bésyāal bēndúbé bán Jone abédeε nkal é'dəədəŋ.)

³³ Né-óó, bēnkwentén Yesue bán, "Séebii'ε." Yesue mō-'ε antimtén bó áá, "Né ké me-'ε ámpē méeláá'ε nyé kunze eché ríwóó ábel nīmén mekan."

12

*Ngan e bebel-bé-nsón
ábe bēbébé nlém á abum*

(Mat 21.33-46; Luk 20.9-19)

¹ Hée Yesue ábóótédé ngan abenled ákalen bó. Anhób áá, "Mod nhóg ankwēl nzag e e'pum é' mēl ábe bēbenléé mīm. Ankág chō, ábel bwāl wéε bémineé ábē e'pum é' mēl ábel mīm, alón-'ε ebem wéε bēdyéé'ε áwēd-te ánan menōn. Ambē ene nzag wéε bad ábe bóbóó békáb mbote áte, áké á alon démpēe. ² Née póndé épédé eché bēpádéé e'pum, ane nwóo-nzag anlóm awé mbaledε wéε ábē bebel-bé-nsón ákobe mō ádē asii dé e'pum.

³ Hée ábē bebel-bé-nsón békóbé ane mbaledε, bēwānēn mō, bésúúd-te mō ámbíd ne mekáá mé ngēn.

⁴ Dōo ane nwóo-nzag álómé mbaledε ampée. Bēnlōŋēn mō á nló, bēwógéd-te mō e'són.

⁵ Nwóo-nzag ambé álóm mbaledε ampée, ábē bad bēnwū ane ámpē. Bēmbēl melemlen ne ekud émpēe, bēbōmé doŋge, bēwū-'ε ábíníí.

⁶ Mod awé anlyag mō álóm abédeε awe mwān-a-mwēnchóm awé ándəŋgé bwāmbwam. Kááŋne á asóg, dōo álóméé ane mwān ne mewēmtēn nēn áá, 'Ngáne ádíí awem mwān, bēbé mō edúbé.'

* 11:25 Doŋge á kálag dé'só abádé nchoo 26: "Nzé nyéélagasán bad bēmpēe mbéb, ké awen Titéé awé adé ámín éelagsinné nyé nīmēn mbéb."

7 Boŋ áde ábê bebel-bé-nsón bényíné néε ane mwān áhúé'ε, dso bēn ne bēn béhóbeé bán, 'Ndyé-a-mbwóg nén, nyéhyag déwúu mós ábel nén eche mbwóg ésuuned syánē.'

8 Héε bekóbé mós, béwūε' mós, bébwém-mε mós ndim ámbíd e e'ké."

9 Héε Yesue ásedtεε aaken, "Boob-pso, cheé nwóo-nzag ábenlé ábê bebel-bé-nsón? Apē awúú bós, ábē-ε ene nzag wéε bebel-bé-nsón bémpēε.

10 Eyale é Dyób éhóbe nén aá,

'Aláá áde belóŋ-bé-ndáb bēnchenεε, dso átímé aláá dé etógnén abé.

11 Sāngwéε mós abelé nén, édé-ε syánē menyáké á díđ-te. Nyééláá'ε nē-ye?"

12 Né-oo, bad bémbáá bé Israel béhédé' áá Yesue akób áyāle bémbíi bán áyāle echáb dso ákalé enén ngan. Boŋ bémbē mbwóg áyāl e ene ndun e mod embé áhed. Né-oo béntédé mós béke.

Nsedtéd tǎngene asaa á tááε

(Mat 22.15-22; Luk 20.20-26)

13 Bénlóm Befarisia ne bad bé epepé éche Herode áke dé aseded Yesue dyam ábel nén bekóben mós awusé.

14 Héε bépédé áwē boŋ belāngē mós nén bán, "A meléed, sébíi nén bán ekale mbále. Weékwoŋnádte modmod. Weebáá-ε bad mesó mé mbom. Boŋ ekonje bad mam mé Dyób ayáged. Mbéndé eche syánē ehóbe nén bán désange' tááε wéε Kaisεε, kǎŋ e Roma-ye?"

15 Boŋ Yesue anchēm mímāb medogké, héε ásedtεε aá, "Cheé nyékagεε mε. Nyéhyiined mε mone mé ekii nǎn mós."

16 Héε bépééné mone mímed boŋ ásedtεε aaken, "Ediidingε éche nzéé chén, díŋ áde nzéé-ε dén?" Bēnkwentén mós bán, "Abe Kaisεε."

17 Dso álāngεé bós aá, "Nyébag-koo Kaisεε éche édé éche Kaisεε, nyébag-ke Dyób éche édé é Dyób." Ade béwógé nē, yāl enkóm bós áte.

Nsedtéd tǎngene mpuu

(Mat 22.23-33; Luk 20.27-40)

18 Besadusia bémpē wéε Yesue. Béndūbē bán mpuu méesaá ámbíd e kwééd. Dso béhóbeé bán,

19 "A-meléed, mbéndé e Mosεε ehóbe nén bán, 'Nzé mod awóo mmwaád boŋ awédé áde bós ane mmwaád bépedεε mwān awále, mwānyāŋ a abum ahóg atāngéné ane nkúd awóŋ ábel boŋ díŋ áde mwānyāŋ déebōō.'

20 Boob-pso, bad bébédé mod saámbé ábe bémbíd abum ahóg. Mod a'so anwóŋ mmwaád boŋ awé áde bós mmwaád ne bépedεε bán awále.

21 Mwānyāŋ awé anhid mós anwóŋ ane nkúd a mmwaád. Mómpe awé áde bós ane mmwaád bépedεε bán awále. Melemem mé dyam mēmbenléd ne awé alónténé beláán.

22 Kááŋ bós mod saámbé asyāál bēnwóŋ ane mmwaád béwé-ε, áde bépedεε mwān awále. Kááŋne á asóg ane mmwaád mómpe anwé.

23 Boob-pso á pónde e mpuu, mmwaád awé nzéé ane mmwaád áchagnédte áyāle bós moosyāál saámbé bēnwóŋ mós?"

24 Héε Yesue átimtanné bós aá, "Nyépane' áyāle nyéesoŋtεneε chóm éche eyale é Dyób éhóbeé, nyéesoŋtεneε-ε ngáne ngíne e Dyób esógé abé.

25 Pónde eché bad bépuú'ε ámbíd e kwééd, mewóŋgé méebaá ámpē. Bad bébē nēngáne ángel éche édé ámn, béwóŋnéε.

26 Boob-pso, tǎngene mpuu, kíné nyééláá'ε á kálag e Mosεε á epepé eché éhóbe áyāle mwā bwel awé ahyáá'áá-ye? Áhed, éténlédé bán áde Dyób álāngεé Mosεε tǎngene Abrahame, Aisige ne Jakobe ábe bēmmad awé, Dyób dénhōb aá, 'Méε ndé Dyób áde Abrahame, Aisige ne Jakobe.'

27 Nē álúmte nén bán bédé á alonjé. Dyób ádíi Dyób á bad ábe bédé á alonjé, saké Dyób á bad ábe béwédé. Nyépane' bwāmbwam."

Mbéndé ébe éche etómténé etógnén abé

(Mat 22.34-40; Luk 10.25-28)

28 Meléede a mbéndé nhóg awé ambé áhed anwóg chóm éche béhóbeé. Adé ányíné aá Yesue abagé Besadusia nkwenten ní bwām, ansedéd Yesue aá, "A meléed, áfinté e mbéndé ésyāál, mbéndé ehéé etómténé etógnén abé?"

29 Yesue ankwentén mós aá, "Mbéndé eché etómténé etógnén abé edii mbéndé eché ehóbe nén aá, 'A-bad bé Israel nyéwóŋlen: Sāngwéé áded Dyób, mwēmpe-εε adé Sāngwéé.

30 Edāŋ Sāngwéé ádon Dyób ne mímōŋ nlem nisyāál, ne échon edāóđāŋ ésyāál, ne mímōŋ mewémten mésyāál, édāŋ-ε mós ne échon ngíne esyāál.'

31 Eché elonténé ébe eché chómpé edé etógnén, edii eché ehóbe nén aá, 'Edāŋ mwānyōŋ nēngáne edás échon yāl.' Mbéndé empée éesaá eché etómténé etógnén abé nāngáne échén ébe."

³² Hée ane meléede a mbéndé álanḡeé Yesue aá, “A-meléed etánḡéné. Ekalé mbále wée Dyöb ádíi ahóg, Dyöb démpée déesaá-’e étóméé mwémpen.

³³ Mod ádāḡ-’e mós ne nímē nímē rísyāāl, ne nímē mewémten mésyāāl, ne eche ngine esyāāl, ádāḡ-’e mwānyan ḡāne ádás eche yāl, atómténé etóḡnén abe tómaa ábe Dyöb mende níme béhyāḡtée ne mende mémpēe.”

³⁴ Ade Yesue ányíné aá ane meléede a mbéndé ahóbné debyéé, anláá mós aá, “Nkamlen rí Dyöb méechabnedéé wé yāl.” Ámbíd enê modmod enkēnchú’ é Yesue dyamdyam asedé ámpē.

Nsedtéd tḡḡene Ane-awë-Béwógté

(Mat 22.41-46; Luk 20.41-44)

³⁵ Yesue ayágté’áá á Ndáb-e-Dyöb. Ahed dós ahóbéé aaken, “Chán bemeléede bé mbéndé béhēle béhābē bán Ane-awë-Béwógté abídé á mbyaa níme kḡḡ Dabidé?”

³⁶ Dabidé mwēn anhób áde Edáádāḡ éche Esáá émbēé mós áte aá,

‘Sāḡ Dyöbe anláá awēm Sāḡwéé aá,

Dyēé áwēm ekáá émbáá

káāḡ ne á póndé echē mébenlé bonḡ

ékógtéd ábōḡ bad bé ekoyí ámín ne mekuu.’

³⁷ Née Dabidé mwēn ásēhpé mós achāḡ aá Sāḡwéé, chán-nō Ane-awë-Béwógté áhēléé abé awe mwān?”

Elébé tḡḡene bemeléede bé mbéndé

(Mat 23.1-36; Luk 20.45-47)

Ndun e mod ewóḡlánnáá Yesue áhed ne menyinḡe bwāmbwam.

³⁸ Ade áyágtéé bós anhób aá, “Nyétéd póndé ne bemeléede bé mbéndé, bédāā’ mengombe níme ríchábé áhyómēn áte. Bédāā-’e bán bad bélente bós ne edúbé ésyāāl á mewbōḡ née á dyān-tē nē.

³⁹ Bédāā-’e metii mé edúbé adyēē á ndáb é mekáne, bédāḡ-’e e’tāl bé edúbé á hóm á ḡānde.

⁴⁰ Bédume’ mwōḡ é bekúd, bédogné-’e bad ntóḡ-ntóḡ mé mekáne. Békúd nkōḡsen níme ríchábé ámín.”

Mende mé nkud a mmwaad

(Luk 21.1-4)

⁴¹ Yesue andyēé benben ne ntyóg níme béhāḡé’áá mōné mé mende áte á Ndáb-e-Dyöb, áñōné’ ḡāne bad béhāḡké mōné áwēd-te. Ekud é behōn bé bad béhāḡé’áá ekud é mōné.

⁴² Dós ntóḡétōke a nkud a mmwaad ápédé, bonḡ áhāḡ mōné mé ekii níme ndé ké bedálee bébe.

⁴³ Hée Yesue áchāḡé ábē bembapee benben bonḡ álanḡē bós aá, “Ne mbále, nlanḡe nyé meé, nímēn ntóḡétōke mé mmwaad ríhédé mōné tómaa ábēn behōn bé bad bésyāāl.

⁴⁴ Mōné níme ábē bad béhédé, ndii mōné níme ríchóbé bós áse, bonḡ anēn mmwaad ne atóg áde ádíi, ahédé mōné rísyāāl níme áwóó, rísyāāl níme ámbēé atōḡnan yāl.”

13

Yesue ahóbé ad

bépanḡtéd Ndáb-e-Dyöb

(Mat 24.1-2; Luk 21.5-6)

¹ Yesue ámbíd á Ndáb-e-Dyöb. Ade ábídeé nē dós awë mbapee nhóg álanḡeé mós aá, “A-meléed nōné’, meláá ne nlonḡtéd rí Ndáb-e-Dyöb mén núbóó bwāmbwam.”

² Yesue ankwentén mós aá, “Enyine’ échén ḡine é nlonḡtéd-é? Aláá ké ahóg déelyāḡké ámín e waáb, bépanḡtéd mós áte mésyāāl.”

E’bébtéd é’ mekan ábe bébenléd

(Mat 24.3-14; Luk 21.7-19)

³ Yesue ankē adyēé á ekone é Menzab mín. Echē Ekone ébédé á müde rí Ndáb-e-Dyöb. Ahed dós Petro, Jemse, Jōne ne Andreyā bépédé bonḡ bēlanḡē mós wée bóbōó bēnpen bébédé bán,

⁴ “Láá sé póndé echē nímēn mam mébenlédté, éláa-’e sé e’chemléd ábe bēlümēd bán póndé echē mébenlédté epedé.”

⁵ Yesue anláá bós aá, “Nyétéd póndé nyéémwāḡ-ke se modmod ádog nyé.

⁶ Bad híin bépē á đin ádēm béhābē bán, ‘Me-éé ndé Ane-awë-Béwógté.’ Bédōḡ-ke bad híin.

⁷ Nzé nyéwógé bán nzum éwante’ kéé nyéwógé nzunze é nzum, nyéētāḡé áte. Nēn átanḡéné ábenled, bonḡ nē déélümteē nēn bán asóg ámáá ape.

⁸ Aloŋ ahóg détyēēmēn ádíníí nzum. Nkamlen nhóg-ke rítyēēmēn nímíníí. Ndóob eénaŋnéd mebwóg ne mebwóg, nzaa-'e ēbē. Nén débē nēngáne mewε mé'so níme mmwaád áwógéé nzé ahede achyáa.

⁹ Nzé nímén mam mébóótédé-'ε abenled, nyétédén yál póndé áyale békób nyé, bébe nyé á mekáá mé bad bé kóte. Béwanén nyé á ndáb é mekáne, nyetyéém-me á nkáásé á'so é' benkamlene ne káŋ é bad á yál echēm. Nén débēnléd ábel nyékale bó nkalaŋ ní bwám.

¹⁰ Bétóŋgéné néε bésébpé nkalaŋ ní bwám akal meloŋ mé nkóŋsé áte mésyāā, boŋ asóg dépē.

¹¹ Nzé békóbé-'ε nyé boŋ bépééné nyé á kóte, nyéētāgē áte, áyale dyam áde nyéhōbpē. Nzé ene póndé epedé, nyéhōb kéchéé echē ébagnéd nyé, áyale dyam áde nyéhōbpē débíd ne Edáádaŋ éche Esáá saké ne nyé.

¹² Bad bēbagé baányan á mekáá mé bad bēmpéé áwúu bó. Besáá-bé-bān bēbēl melelmem ne ábab bān. Bān-ne ámpē békunnén besáá bóobε benyáá yál ábel bēwúu bó.

¹³ Moosyāāl ákós nyé áyāl é dīn ádēm. Boŋ kénzézé awé ákaán nímé metake nlém kááŋ ne á asóg, ákūd e'soósoŋ."

Dyam dé ebébtéd

(Mat 24.15-28; Luk 21.20-24)

¹⁴ "Nyéenyín néε ekúkú é akan éche épεene e'són á'so é' Dyōb édíí wéε énkéntāŋgēnné abé." (Nyé ábe nyeláa' nímén mekan nyésōŋtēn mós bwám.) "Nzé nyényíné nē, bad ábē bédé á Judeya bétóm mehelé, békε bésōom á e'kone mín.

¹⁵ Mod awé adé á nnoŋ ní ndáb mín eétoŋgné akε á ndáb-te átéd chōmchōm.

¹⁶ Mod awé mós-'ε adé á nzag-té, eétmé ámbíd átéd eche sóte.

¹⁷ Ebē ebébtéd ne bebaád ábe bēbē nkog ne ábe bémwāŋtē nímé mesú.

¹⁸ Nyékāne nén bān, nén déebenlād ne nyé á póndé e nkóg áde ahéb ádíí ngíne bwāmbwam,

¹⁹ áyale ndāŋge echē ēbē ábē e'pun, ēbē ndín echē eébédé mbéd bootya Dyōb áhage nkóŋsé ape epun é'chii. Dyamdyam néε ádē déebenléd-taá ámpē mbéd.

²⁰ Boŋ Sāŋgwéé amaa ábē e'pun é' metake asél áte. Nzé énkēmbé nē, né modmod éecheŋgé. Boŋ á etúúí é bad ábe ápwédé, asélé ábē e'pun áte.

²¹ Ene póndé nzé mod aláŋgé nyé aá, 'Nyénone', Ane-awé-Béwógté mōnén' káa, 'Nōné' mōníníí, nyéedúbpé'.

²² Bad híin bēbíd, bó mod té ákalé metóm aá mós módé Ane-awé-Béwógté. Bekal bédáádaŋ bé metóm ámpē bēbíd. Bēbalé menyáké, bélumte-'ε e'chemléd híin. Bēbal nén ábel boŋ bédog bad ábe Dyōb ápwédé, nzé nzii edé ádog bó.

²³ Nyétéd póndé. Nláŋgé nyé nímén mam mésyāāl á'so é' póndé.

Epe é Mwān-a-Moonyoŋ

ne asóg dé nkóŋsé

(Mat 24.29-31; Luk 21.25-28)

²⁴ "Ábē e'pun-ne, áde póndé e ndāŋge ne étómmé tómmén 'etondεε ákwε ehíntén,

ngōn-ne esóg apeŋ,

²⁵ betintine bēbíd ámín bēhūn ásē,

ngíne-'ε éche edé ámín énaŋnéd á e'dii.'

²⁶ Ene póndé dós bényínnē néε Mwān-a-Moonyoŋ áhúé' é á mbag-té ne ngum ne ehúmé é ngíne.

²⁷ Alóm éche ángel á metóŋgé mé nkóŋsé mésyāāl méniin, álad bad ábe Dyōb ápwédé áte, bootya atóŋgé dé nkóŋsé ahóg ápe ádííníí.

Yesuε áá bad bétéd

elāŋsén ne alín á ngəl

²⁸ "Nyétéd elāŋsén ne alín á ngəl. Nzé ngen ébóótédé byaa békāālé abided, nyébele nyébíí bān nchoŋ níde benben.

²⁹ Melelmem nzé nyényíné nímén mekan mésyāāl mébenlad, nyébíí nén bān, Mwān-a-Moonyoŋ akwogé ape, adé-'ε benben.

³⁰ Ne mbále, nláŋge nyé nén meé, enén nyoŋgei e bad édíí ebé ámín boŋ nímén mekan mésyāāl mébenlād.

³¹ Nkoŋ ní mín ne nkóŋsé bémaá boŋ ábēm e'yale bēbē abé ne abé.

Modmod eebíí'ε epun

éche Mwān-a-Moonyoŋ ápe'ε

(Mat 24.36-44)

³² “Modmod eebii’ é epun pen ké’ é pónde eché nímén mam mébenlédté. Ké ángel éche édé ámín éebii’ é, ké Mwán ámpē eebii’ é. Tité mwēmpen mó abii’ pónde eche nímén mekan mébenlédté.

³³ Nyétéd pónde, nyéboṣṣen, áyale nyéebii’ é áde ene pónde épéé.

³⁴ Ebē nēngáne mod awē anléde eke ake, boṅ alyágnéd ábē bembáede ndáb, ábe nhóg-téé níme nsón, aláá-’ é mod awē anone’ mmwe mé e’ ké áá ábele nsón bwám.

³⁵ Né-óó, nyétéd pónde áyale nyéebii’ é pónde eché Sánḡwéé a ndáb ápéé. Ahele ápē ngukél, ké’ é melúde, ké’ é epog é mbwembwe, ké’ é mbwembwe.

³⁶ Nzé apedé taléd eetánḡeneé nēé átáné nēé nyékúneé.

³⁷ Né-óó, saké nyé bēnpen nlanḡeé ádén dyam boṅ nlanḡe moosyáál mēé, ‘Nyétéd pónde.’ ”

14

Béhagke Yesue

(Mat 26.1-5; Luk 22.1-2; Jōn 11.45-53)

¹ Enlyáḡ e’ pun é’ be, Ngande e Nnyíme-ámín ne e Ewele-é-Nḡén ápē áte. Beprise bémháá ne bemeléede bé mbéndé béhágé’ áá mwane ákób Yesue á mesoam-té, áwúu mó.

² Boṅ bēnhōb bán, “Deébēlé nē á mbwe ní ngande áyale né bad bēpēén epuutéd.”

Béwógté Yesue á Betani

(Mat 26.6-13; Jōn 12.1-8)

³ Yesue ámbé á Betani á ndáb wéé Simone awē ankwē nkole mé meləṅ. Ade ádyáḡké ndyééd nē, dōo mmwáád nhóg ápédé ne apom á dyóḡ dé elod é bwám áde dēnləl nkun bwámbwam. Adé dyóḡ bēbénlé dō náđ. Hé dōo ákógté nló mé epom boṅ ásyogé Yesue áde dyóḡ á nló.

⁴ Boṅ doṅge á bad ábe bēbédé áhed bēnlḡ bwámbwam, bésedté nhóg ne aníní bánken, “Cheé ékáá boṅ anén mmwáád ábēbte’ enén ndín e dyóḡ?

⁵ Béhélé’ áá-se bésóm ádén dyóḡ nkun níme ríchábé ámín, bétéd nímé mone bēbē betóótóké bé bad.” Né-óó, bēnhōbēn ane mmwáád bwámbwam.

⁶ Boṅ Yesue anláá bó áá, “Nyéchene mó. Cheé nyétagtéé mó? Abēnlé mé kase e dyam eché eboó bwámbwam.

⁷ Betóótóké bé bad bēbē ne nyé pónde ésyāál, pónde ké ehéé eché nyédáá-’ é bó awōṅgen nyéhele nyéwōṅḡén bó, me pen méebáá ne nyé pónde ésyāál.

⁸ Abelé wéé mekáá mēpédé mó. Asyogé me dyóḡ á nló áboṣṣen níme nímém á’ sō é’ pónde.

⁹ Ne mbále, nlanḡe nyé nēn mēé, kéhéé áde nkalanḡ ní bwám mékanlédté nkōṣé áte nisyāál, bēhōb dyam áde anén mmwáád ábélé ákamtēn mó.”

Judase akwenténe Yesue asóm

(Mat 26.14-16; Luk 22.3-6)

¹⁰ Ámbíd e nē, mbapēe nhóg átinté e bembapēe dyóm ne bēbe awē béhágé’ áá bán Judas Iskariote anké beprise bémháá átán ábel boṅ ásom Yesue áwáb.

¹¹ Beprise bémháá bēmbē menyinḡe ne dyam áde Judase ánlāá’ é bó, bēhōb-pe bán bēbē mó mone. Né-óó, Judase ambootéd nzii áhed ásom Yesue.

Yesue ne abē bembapēe bédyéde

Ndyéed e Nnyíme-ámín

(Mat 26.17-25; Luk 22.7-14, 21-23; Jōn 13.21-30)

¹² Bōob-pōó pónde e ngande e Ewele-é-Nḡén empē. Mbwe mé’ sō áde bēwúf’ áá bán bé ndyōṅ ní mbód áboṣṣen ndyéed e Nnyíme-ámín, bembapēe ábe Yesue béntān Yesue, bésedté mó bánken, “Héé wédanḡe wéé séboṣṣen we ndyéed e Nnyíme-ámín?”

¹³ Dōo Yesue álóméé bembapēe bēbe ne nlyóḡtēn nēn áá, “Nyékaḡ á dyad-té, mod ábomén nyé awē apémé apom dé mendíb, nyéhíde mó.

¹⁴ Nzé nyépedé, nyéláa nwóó-ndáb bán, ‘Meléede ahóbé aaken, Héé toṅ e beken édí eché módyéé ndyéed e Nnyíme-ámín áte ne ábē bembapēe?’

¹⁵ Alúméd nyé toṅ eché ekalé áte eché bémáá áboṣṣen, bēnábpe-’ é áte. Ene toṅ edé ámín á ndáb-te. Nyéboṣṣen syáá ndyéed áhed.”

¹⁶ Héé ábē bembapēe bēhíté boṅ békáḡ á dyad-té. Béntān mekan mésyāál ngáne Yesue ánlāá’ é bó, bēmbōṣṣen-ne ndyéed e ngande e Nnyíme-ámín.

¹⁷ Nēé ngukél épédé Yesue ne ábē bembapēe dyóm ne bēbe bēmpē áhed.

¹⁸ Bédyágé’ áá ndyéed á tébele. Pónde eché bédyáké ndyéed nē, dōo Yesue áhóbeé áá, “Nlanḡe nyé nēn mēé, nyé mod nhóg ábē me á mekáá mé bad bé ekoyí, nyé nhóg awē adyáḡ ndyéed ne me.”

¹⁹ Nēn dēmbēl bembapēe bēnsudén bwámbwam. Bēmbootéd mó aseded nhóg ámbíd e aníní bán, “Ntúbpe méé saké me.”

²⁰ Dóo átímtanné bó aá, “Mod nhóg áfínté nyé bad dyóm-ne-bébe, mod awé súmō sētōdē ewele á díse-tē atade ahóg.

²¹ Mwān-a-Moonyon awē ngáne éténlédé bonj medim ne ane mod awé āsōm mō. Ebágáá bwām ne ane mod nzé bēnkētōgen mō achyáa.”

Ndyééd echē Sāngwéé

(Mat 26.26-30; Luk 22.14-20; 1 Kor 11.23-25)

²² Ade Yesue ne ábē bembapēé bédyákē ndyééd nē, dōo átédé ewele, ásāgnān Dyōb, bonj ákabtáád áte, ábagé ábē bembapēé áhōbē aá, “Nyékob nēn, yāl echēm nēn.”

²³ Ámbid e nē, antéd mbwendé ní mīm, ásāgnān Dyōb, ábagé bó. Bó moosyāól-le bémwág.

²⁴ Dóo Yesue álángeé bó aá, “Mmēm mekií mómén níme nsyógkē á nló ní bad híin. Mmēm mekií médií mekií mé melē mēkōsīlē.

²⁵ Ne mbále, nlánge nyé nēn meé, méemwáá nímén mīm ámpē káōj ne epun éche mémwēē mō ekóólé á nkamlēn ní Dyōb.”

²⁶ Bēnkōn nkāngé mé nsāgnēn. Nēe bémáá akōn, bēnkē á Ekone é Menzab.

Yesue ahōbē ngáne

Petro ábāngē mō á yāl

(Mat 26.31-35; Luk 22.31-34; Jon 13.36-38)

²⁷ Yesue anláá ábē bembapēé aá, “Nyé baasyāól nyéēnyagéd, nyétēdē me. Ayāle éténlédé á kálag e Dyōb nēn bán,

‘Mēwūū nnōn-a-mbód, mbód ésyāól épāntéd áte.’ ”

²⁸ Dóo Yesue áhōbēé aá, “Bonj áde ápuúdté me, mēkē á’sō á Galilia áwed-taá nyétānnē me.”

²⁹ Dóo Petro áhōbēé aá, “Ké moosyāól annyagéd átēdē we, me pen méetēdēé we.”

³⁰ Dóo Yesue álángeé Petro aá, “Ne mbále, nlánge we meé, nkuu nēn dēn, nchóm-a-kúb adēhōb aá mótōo’ ngen ébe wēbān me á yāl ngen éláán.”

³¹ Héé Petro ábádtéé mō áte aá, “Ké nkāj mōó bēsēlēē me, méebāngé we áyāl mbéd.” Bembapēé ábíní bésyāól bōmpē bēnhōb melemlem.

Yesue akánné á Getsemani

(Mat 26.36-46; Luk 22.39-46)

³² Ámbid e nē Yesue ne ábē bembapēé bēnkē á abwóg á hōm áde béchágé’áá bán Getsemani. Ade bēpédé Yesue anláá bó aá, “Nyédyēe hén, me-é ríkáne.”

³³ Ankeén Petro, jemse ne Joné akáne. Ndānge ne metake híin bēmpíí mō á nlém-té.

³⁴ Dóo álángeé bó aá, “Ndānge echē edé me á nlém, ehele-se ewūū me. Nyélyag hén, nyédyēen me epin.”

³⁵ Ansídé á’sō, abwém yāl áse, bonj ákánne’ aá nzé nzii edé echē ene póndé e metake éhéleé se ebāmē mō, ébame.

³⁶ Anhōb aá, “A-Tē, Titéé, ehele ébel kéchéé. Kobén me nímén metuné. Bonj kité nē, bēl ngáne ébōhénéé we, saké ngáne ébōhénéé me.”

³⁷ Ade ámáá akáne, antīm ámbid wēe ábē bembapēé beláán. Antán nēe békúnéé. Dóo álángeé Petro aá, “A-Simōn, ekúne’-é? Cheé ékás bonj wehéle awesen ádyēen me epin ké háwa póg?”

³⁸ Nyédyēe epin, nyékánne’-é ábel nēn Dyōb déemwág-se mekágsen mépiinéé nyé. Nlém rídás ábel bonj ekob é yāl édé mbwóg.”

³⁹ Antīm ámbid ámpē, áke akáne melemlem ngáne ánsēbēē akáne.

⁴⁰ Ade átimé ámbid ámpē, antán nēe békúnéé áyāle e’chó bēmbē bó á díd bwāmbwam. Né-ōó bēnkēmbíí’é chōm éche belāngéé mō.

⁴¹ Ade átimé ámbid ngen éche élónténé éláán dōo álángeé bó aá, “Nyélyagé nyékúne’ nyékómme’-é nyé áte-yē? Nē ákwógé! Póndé epedé echē bēbēé Mwān-a-Moonyon á mekáá mé bad bé mbéé.

⁴² Nyépáde áse dékag. Nyénōne’, mod awé akií me ntúrē mō ahúe’ nēn.”

Békóbé Yesue

(Mat 26.47-56; Luk 22.47-53; Jon 18.3-12)

⁴³ Ehōb éepedéé Yesue amaa á nsāl bonj Judase ápag. Judase abédéé mbapēe nhóg áfínté e bembapēe dyóm-ne-bébe ábe Yesue. Ámpē ne ndun e mod. Ábē bad bēnwālē nkwáté ne mbid. Bepriše bēmbáá, bemeleéde bé mbéndé ne bad bēmbáá bé Israel bóó bēnlóm bó.

⁴⁴ Bōōb-pōó, ntúrē awe Yesue ammād bó e’chemléd ábe aá, “Kénzēé awé méhēē tál, né mod awé nyéhēdēé mōne. Nyékób mō, nyécháá’-é mō bwām bonj nyékeene mō.”

⁴⁵ Judase apedé’-áá pēēn, átmōmē’-é wēe Yesue. Anhōb aá, “A-meléed.” Ahé’-é mō tál.

⁴⁶ Héé ábē bad békóbé Yesue, bēwéd-te mō acháá.

⁴⁷ Dóo mod nhóg áfinté e bad ábe bémbé ne Yesue ádólé nkwaté á abám, née átomté mós, asél-le ntân awé prise ambáambáa etúu.

⁴⁸ Hée Yesue ásedteé bós aá, “Nchíb mós nídi awé nyéééné nkwaté ne mbid ahye dé akób-ε?”

⁴⁹ Epun téé mbédé á Ndáb-e-Dyöb ne nyé, níyágté bad, nyéekóbe me. Bon e’yale é kálag e Dyöb é tângéné alón.”

⁵⁰ Hée dóo bembapee bésyäl bétédté mós, bon bétómé mehélé.

⁵¹ Kódemod póg ebédé áhed, éhídé Yesue ámbíd. Anwáá dásó esón é abad chëmpen. Abé bad bénkóg bán békób mós,

⁵² bon antóm mehélé ne nsób, áchennéd-te bós éché esón é abad.

Bekáádté Yesue

(Mat 26.57-68; Luk 22.54-55, 63-71; Jon 18.13-14, 19-24)

⁵³ Bad ábe bénkób Yesue bënkeén mós wée Prise Ambáambáa. Beprise bémbáá, bad bémbáá bé Israel ne bemeléede bé mbéndé bëmpe bélādēn áhed.

⁵⁴ Áde békeeneé Yesue nē, Petro ahídé aá mós ámbíd mwā etún kásh asól á eyáde éche prise ambáambáa. Andyé áhed ne benon bé Ndáb-e-Dyöb, áwālē muú.

⁵⁵ Bóob-pós, beprise bémbáá ne bad bé káansel bésyäl béhédeé aá bad ábe bébíd mbón é metóm á nló wée Yesue ábel nēn béwúu mós, bon bénkēnkudté ké nhóg.

⁵⁶ Ekud é bad émbíd mós mbón é metóm á yäl, bon bébédeé nsól nhóg.

⁵⁷ Hée donje á bad bétyéémé ámín, bon bébídé mós mbón é metóm bán,

⁵⁸ “Sēnwóg née áhóbé aá, ‘Mēbootéd enén Ndáb-e-Dyöb eché baányon bélóó, nlón empée, áfinté e e’pun é láán eché béélōnēé mekáá.’ ” ⁵⁹ Bon ké nē, échab mbón é metóm énkēmbáá nsól nhóg.

⁶⁰ Dóo prise ambáambáa átyéémé ámín áfinté e bad bé káansel, bon ásedté Yesue aáken, “Weewóó’ é dyamdyam ahób tângene dyam ádē ábén bad béhóbé we á yäl-ε?”

⁶¹ Bon Yesue andyéé mós ngēn, enkēnkobéé dyamdyam. Dóo ene prise ambáambáa ésedtéé mós ámpé aá, “We-εé edé Ane-awé-Béwágté, Mwān awé Dyöb áde bad bébageé edúbé-yε?”

⁶² Hée Yesue ákwentanné aá, “Méé ndé, nyéenyín-ne ngáne Mwān-a-Moonyon ádyéé á ekáá émbáá é Dyöb a Ngum. Nyéenyín-ne née áhúé’ é á mbag-té ámín.”

⁶³ Hée prise ambáambáa ányábé mbóté álúmed nēn aá mólii, bon áhóbé aá, “Mbón éhéé émpēe déhédeé?”

⁶⁴ Nyéwógé née ásyá’ é Dyöb. Cheé nyéhóbé á yäl eché?” Hée bós moosyäl béhóbéé bán atângéné awé.

⁶⁵ Donje á bad bēmbotéd mós meléed asob á yäl, békütān mós mīd, bébómé mós, bélāngē-’ε mós bán, “Láá-’ε sé mod awé abómé we.” Dóo bembalede bétédeé mós, bon bébootéd-te mós abomted.

Petro abáá Yesue á yäl

(Mat 26.69-75; Luk 22.56-62; Jon 18.15-18, 25-27)

⁶⁶ Wée Petro ádyéé áse nē á eyáde-tē, dóo mbalede nhóg a mmwáád awé prise ambáambáa ápéde.

⁶⁷ Anynín Petro awále muú. Dóo ásímné mós bon álāngē mós aá, “Wémpē wembé ne Yesue awé abídé á Nazaret.”

⁶⁸ Bon Petro ambán éché ehób á yäl, aá, “Meebíi’ é, meesón-tán-naá chóm éche éhóbéé.” Amaá-aá ahób nē abíd-te á mmwe. Ene pónde chēn nchóm-a-kúb antón. *

⁶⁹ Dóo ane mbalede ányiné mós ámpé bon ábootéd bad ábe bébédeé benben aláa aá, “Anén mod adé nhóg awé mómpé ahídé’ aá Yesue.”

⁷⁰ Bon Petro ambán á yäl ámpé. Eebeméé áte ámpé dóo bad ábe béntyēem áhed bélāngēé Petro bán, “Mbále chós edé. Edé nhóg awé ahídé’ aá Yesue, áyale ebídé á Galília.”

⁷¹ Bon Petro ambotéd yäl ebómān abe ámwāg-ke melé aá, “Meebíi’ é anén mod awé nyétúbéé dīn nē.”

⁷² Melemlem mé pónde nchóm-a-kúb antón ngen éché élónténé ébe. Hée Petro ákamténé chóm éche Yesue ánlāá’ é mós aá, “Nchóm-a-kúb adéhób aá móto’o’ ngen ébe wēbān me á yäl ngen éláán.” Hée Petro ábánlé awé, ábootéd-te achii.

15

Payledé akáádté Yesue

(Mat 27.1-2, 11-14; Luk 23.1-5; Jon 18.28-38)

¹ Bín é sánjé-’ aá sánjén, beprise bémbáá, bad bémbáá bé Israel, bemeléede bé mbéndé ne bad bé káansel embáa e bad bé Israel békób mbom. Bēnhān Yesue, bébāg-ke mós á mekáá wée Payledé.

* 14:68 Donje á kálag déewóó’ é Ene pónde chēn nchóm-a-kúb antón.

² Hée Paylede ásedteé mó aáken, “Wε-εé edé kâη e bad bé Israel-ε?” Yesue ankwentén mó aá, “Ngáne éhóbé.”

³ Beprise bémbáá bémbān mó ekud é mekan á yāl.

⁴ Hée Paylede ásedteé mó ámpē aá, “Weewóo’ é dyamdyam áhób-ε? Mmōn wógé’ ekud é mekan échē béhóbéé wε á yāl.”

⁵ Boη Yesue enkēnhóbé dyamdyam. Nē dénkōmēd Paylede yāl áte.

Bán Yesue atāηgéné awē

(Mat 27.15-26; Luk 23.13-25; Jōn 18.39-19.16)

⁶ Bōob-pōó, émbē nēn bán á Ngande e Nnyíme-ámín, Paylede ammentén mod a mbwōg nhóg abided á mbwōg. Ane mod abágé’áá mod ké ahée awē bad bēnhēdēnné mó.

⁷ Ene pōndé mod nhóg ambé á mbwōg awē béchágé’áá bán Barabase. Abédé ne bad ábe béntyēemēn nkamlēn ű Roma.

⁸ Dōo ndun e mod épédé wēe Paylede, boη bélāηgē mó bán ábel ngáne áménténé bō abele.

⁹ Hée ásedteé bō aáken, “Nyéhede’ bán, mbídted nyé kâη e bad bé Israel-ε?”

¹⁰ Abii áde ámbii’ é aá kōñjī edé beprise bémbáá áte á yāl wēe Yesue, dōo dénkāη boη ásedéd bō nē.

¹¹ Boη beprise bémbáá békóné’áá ábē bad bán beláa Paylede bán ábídted bō dāsō Barabase.

¹² Paylede ansédéd bō ámpē aá, “Chán-nō nyéhedeé bán mbel ne mod awē nyéchagēé bán kâη e bad bé Israel?”

¹³ Dōo belébpēé e’ saad bán, “Bomé mó á awōg.”

¹⁴ Hée Paylede ásedteé mó aáken, “Ayāle chán? Ebébtéd éhéé ábélé?” Boη bēnnabé abón bán, “Bomé mó á awōg.”

¹⁵ Né-ōó, ngáne Paylede áhédé’áá aá mókōded ábē bad mewēmten, ambídtéd bō Barabase. Ambē kunze aá, sánze ébōm Yesue, boη béke bébome-’ε mó á awōg.

Sánze éwélé Yesue

(Mat 27.27-31; Jōn 19.2-3)

¹⁶ Sánze éntēd Yesue, békēēn mó á eyáde é nkamlēne, belād-te baáb ábinií áte áhed.

¹⁷ Bēnwāād mó mengombe nīme méyáge’ nīme méwagné mengombe mé kâη, belōη-’ε ekóté é mechā, béhé mó á nló. ¹⁸ Dōo bébōótédé mó awel, belénté mó bán, “A-kâη e bad bé Israel, edúbé ébē ne wē!”

¹⁹ Bébómé’áá mó ntōη á nló, bēsobtád mó meléed á yāl, bébwōgkē-’ε mó mebóbōη áwel mó.

²⁰ Ade bémáá mó awel, bēnhūd mó mímē mengombe á yāl, bétimēd mó éche mbóté chēn á yāl. Nēe bémádé nē, bēnkēēn mó áke dēbome mó á awōg.

Bébómmé Yesue á awōg

(Mat 27.32-44; Luk 23.26-43; Jōn 19.17-27)

²¹ Ade békagké nē, dōo bébómmé mod awē ambíd á dyad á Sirine. Dín démbē mó bán Simōne. Simōne abédéé sáá awē Alesandaa bō Refuse. Simōne atómé’áá ásol á dyad-tē. Dōo békóbé mó boη bényāgtē mó bán ápēm awōg áde Yesue.

²² Dōo bēpédé hōm áde béchágé’áá bán, Golgota, awē adé nēn bán, “Hōm dé Ebōngél é Nló.”

²³ Áhed bēmbē Yesue mím nīme beládténé ne bwel ábe béchagēé bán mīa* bán ámwē, boη enkēnkwentēnné amwē.

²⁴ Bēmbomé Yesue á awōg. Bēnsíd mbambú ákab éche mbóté.

²⁵ Mbwēmbwē á ngāη abog dōo bébómmé mó á awōg.

²⁶ Chōm éche bēntenlé á awōg áwe nló mín álúmed nzōm echē bébómmédé mó á awōg émbē nēn bán, “Kâη e bad bé Israel.”

²⁷ Bēmbomé-’ε bechīb bébe bōmpē á awōg, nhóg á pēd e ekáá émbáá eche Yesue, aníní-’ε á pēd e ekáá é emwēd.†

²⁹ Bad ábe bétómé’áá nzii benben ne áhed bébómé’áá nló, bébwēmme-’ε mó nzyāη bán, “Ahá! Wenhób wēe mósbōótēd Ndáb-e-Dyōb, wēe mólōn-’ε chō ámpē áttíntē e e’pun é’láán.

³⁰ Sōη-ā echon yāl bōob, ésud áwé á awōg.”

³¹ Melemlem nē dōo beprise bémbáá ne bemelēede bé mbéndé bēwélé’áá mó. Bēn ne bēn béhóbé’áá bán, “Achōηtē’áá bad, bōob eéheleé eche yāl awōηgen.

* **15:23 Mia:** mébédéé bwel ábē bad bēbēnládtáá ásuded mewē. † **15:27** Donje á kálag dé só ábádé nchoo 28: *Adē nēn ábēnlédé, e’yale ábē e’tēnlédé á kálag é Dyōb bēnlōn. Etenlédé nēn bán, ‘Bēntōη mōmpē á nchoo mé bebel bé mbēb.’*

³² Mó awé ahóóbé aá móó módē Ane-awē-Béwógté, aá móó módē-ε kâñ e bad bé Israel ásud-táó ásē á awóg hē bōob, dényín ábel dédube.” Abé bechib ábe bēmbomēé á awóg nchoo ne Yesue bómpē bésyáá’áá mó.

Kwééd eche Yesue

(Mat 27.45-56; Luk 23.44-49; Jōn 19.28-30)

³³ Ade kád épédé, ehintēn ēnkwē hōm ásyāal, kóón ne á ngāj éláán.

³⁴ Ade ngāj éláán épédé, Yesue anlébé esaád aá, “Elí, Elí, lámá sábatáni.” Nén adé nén bán, “A-Dyōb ádēm, a-Dyōb ádēm, cheé ékásá bon étédte mē?”

³⁵ Nēe donje á bad ábe bēmbē benben béwógé nē, bēnhōb bán, “Nyéwóge’, achēnle Elaijaa aá áhye áwōngēn mó.”

³⁶ Hēe mod nhóg ányágté bon átédé kuchá, átódté’ á ebéntéd é mīm-tē, ásomé’ á ntōñ bon áhāg mó á nsal aá ámwē. Anhób aá, “Nyémwē dényín nzé Elaijaa áhye mó asuded á awóg.”

³⁷ Hēe Yesue áléppé esaád bon ámiē-ε nlém.

³⁸ Ene pónde chēn abad áde dēnkāb Ndáb é Dyōb áte, dēnsalé áte e’ped é’be bootya ámín kóónj ápē-ε ásē.

³⁹ Adé mod ambáá a sánze awē antyéém Yesue á’sō-tē ānōn mó ányíné ngáne Yesue áwédé,‡ anhób aá, “Ne mbáale, anén mod abédéé Mwān a Dyōb.”

⁴⁰ Bebaád behóg bómpē bēmbē nchabnede bēnōne’ mekan mésyāal nīme mébenlad. Afinté e ábē bebaád, Maria Magdalene, Salome ne Maria awē achyáá Jemse asad bō Joseb, bēmbē áhed.

⁴¹ Abén bebaád behídé’áá Yesue áde ámbēē á Galilia, béwōngān-ne mó. Ekud é bebaád émpēe éche bóbō bómpē á Jerusalem chómpē émpē áhed.

Nīme nīme Yesue

(Mat 27.57-61; Luk 23.50-56; Jōn 19.38-42)

⁴²⁻⁴³ Mod nhóg abédé awē béchógé’áá bán Josebe. Ambíd á dyad á Arimatia. Anén mod abédéé mod e edúbé káánsel embáá e bad bé Israel. Mómpē asiné’áá pónde echē nkamlēn ní Dyōb mépēé. Ngáne émbēē mbwē mé mbonšén (néde áde mbwē-mé-nkóme-áte nlyágé nēe chān), hēe ákáá nlém, bon ápag wēe Payledē benben ne ngukéí, álāngē mó aá ábe mó ndim nīme Yesue.

⁴⁴ Ade Payledē áwógé bán Yesue amaá awé, yāl enkóm mó áte. Hēe álómé ane mod a mbáá a sánze achag bon ásdte mó ké Yesue amaá awé.

⁴⁵ Ade ene sánze élanjē mó aá Yesue awédé, dōo ákwénténe aá Josebe áted nīme ndim.

⁴⁶ Josebe anchān mbóm. Antéd Yesue ndim, ákáān mó ene mbóm, alímē-ε mó á sonj-tē echē bepwógé aláá áte. Ambíd ene, antínéd aláá á mbáá ákólen nsal ní sonj.

⁴⁷ Maria Magdalene ne Maria awē anchyáá Josee bēnóné’áá wēe bélimmēé Yesue.

16

Yesue apuúde

(Mat 28.1-8; Luk 24.1-12; Jōn 20.1-10)

¹ Ambíd e mbwē-mé-nkóme-áte Maria Magdalene, Maria awē achyáá Jemse ne Salome, bēnchān dyóg dé elod é bwām áke dé awóged ndim nīme Yesue.

² Mbwēmbwē mé epun é’sō é Sōndé áde enyen étúbéé dōo békíí á sonj.

³ Ade békagkē, dōo bésédteé nhóg ne aníníí bánken, “Nzēé áhūdē syāné aláá á nsal ní sonj?”

⁴ Dōo bésádé did, bon bényínē bán bémáá áde aláá ahúd. Aláá áded dēnkāl bwāmbwam.

⁵ Hēe bésólé á sonj-tē, bon bényínē kódemod edyēé á nkag á ped e ekáá émbáá. Anhé megombe nīme mbéúbe’. Nén dēnkōbéd bō mbwóg bwāmbwam.

⁶ Hēe ene kódemod élanjēé bō aá, “Nyéebáá’, mbíí mēé nyéhede’ Yesue, mod a Nazaret awē bēmbomēé á awóg. Apuúde, eésáá hén. Nyénōne wēe bēnnaádté mó.

⁷ Nyéag-kōs bōob nyéláa ábē bembapēe, tanje Petro, bán Yesue apuúde, ‘Akag-ke á’sō á Galilia. Awed-taá nyényinnē mó ngáne ánlāá’é nyé.’ ”

⁸ Hēe bēbóótédé anəñ ne menyáké nīme bényíné. Bēmbíd á sonj-tē bébootéd-tē anyaged. Béélanje-’áa modmod dyamdyam áyāle mbwóg ménkōb bō.

Nyaa póg echē

Kálag e Makose ésógé*

16.9-20

Yesue alúmté Maria Magdalene yāl

(Mat 28.9-10; Jōn 20.11-18)

‡ 15:39 Awédé: Donge á kálag dé’só áwóó áléppé esaád, awé-ε.

*

16:8 Donge á kálag dé’só déewóó’ é nchoo 9-20.

⁹ Ade Yesue ámáá apuu, epog é mbwembwε é epun é'sō é Sōndé, Maria Magdalene mó ansēbēē yāl alúmed. Anén mmwaád mó Yesue ámbidēdtē e'dáádəŋ bé mbéb saámbe áte.

¹⁰ Héε ane mmwaád ákíí boŋ álāŋgē bad ábe bōbε Yesue bēbágé'áá. Antán née béchyé'ε kwééd eche Yesue.

¹¹ Boŋ áde bēwógé bán Yesue adé á alongé, bán ane mmwaád anyíné-'ε mó, bēnkéndúbéé.

Yesue alúmté abē bad bébe yāl

(Luk 24.13-35)

¹² Ámbid e pónde Yesue anlúmed yāl wéε ábē bad bēmpēε bébe áde bēbídéé á dyad-tē. Boŋ enén ngen anlúmed yāl nyaa émpēε.

¹³ Héε ábē bad bétímé ámbid, béke béléáá baáb ábíníí. Boŋ ké nê, baáb bē bēnkéndúbéé.

Yesue alúmté abē bembapεε

dyóm ne nhóg yāl

(Mat 28.16-20; Luk 24.36-49; Jón 20.19-23; Mbél 1.6-8)

¹⁴ Ámbid e pónde Yesue anlúmed yāl wéε ábē bembapεε dyóm-ne-nhóg áde bēdyágkē ndyééd. Bēnkéndúbéé bad ábe bēnhōb bán bényíne mó áde ámáá apuu. Né-óó, ankáné bō áte áá bēéwóó'ε adúbe, áá bélélé-'ε nlém á abum.

¹⁵ Anláá bō áá, "Nyékag nkōŋsé áte rísyāal, nyékanle bad bésyāal nkalaŋ ní bwām.

¹⁶ Kénzée awē adúbpé boŋ bédusén-ne mó ákūd e'choóchoŋ, boŋ kénzée awē eedúbpε ákūd nkōgsen.

¹⁷ Bad ábe bédúbpé bēwōŋ ngíne ábel mam mé menyáké: bēbídte bad e'dáádəŋ bé mbéb áte á dīn ádém; bēhōbe-'ε mehōb mékōsle.

¹⁸ Békōbēn nyō mekáá, éebenlé bō dyamdyam. Ké bémwε-'ε ké e'wε, ábē e'wε bēebenlé bō dyamdyam. Bēbán bad bé nkole mekáá á yāl, bad bé nkole bē bēdyēε-'ε bwām."

Yesue apūmmé

(Luk 24.50-53; Mbél 1.9-11)

¹⁹ Ade Sāŋgú Yesue ámáá bō nímén mekan aláa, dōo Dyōb ábélé boŋ ápūmē ámín. Andyéé Dyōb á ekáá émbáá.

²⁰ Héε bembapεε bēbídé, boŋ béke bēkalé Eyale é Dyōb hōm tée. Sāŋgwéé ambé ne bō, ábē-'ε bō ngíne ábel mekan mé menyáké, álúmed nén áá chōm éche bēhōbεé édé mbále.

Nyaa empéε eché kálag e Makose ésógé†

16.9-10

[(9) Héε ábē bebaád békíí, boŋ bēlāŋgē Petro ne bad ábe bēmbē ne mó mekan mésyāal níme bēnlyāgtēnnē bō, bēsēlē mó esóŋ-esóŋ. (10) Née nê átómé, Yesue mwēn anlóm bad nkōŋsé áte rísyāal ákal nkalaŋ ní bwām. Mmē nkalaŋ ní bwām níme rísáá, méehəŋlānné. Mmē nkalaŋ nídíi nkalaŋ tēŋgene alongé áde dēbē á ngíndé ne á ngíndé.]

† 16:20 Donge á kálag dé'só ábádé ádén asóg á kálag ámbid e nchoo 8.

Nkalan mí bwám míme Yesuε ngáne

Lukasε átélé

Ndibned ní kálag

Nkalan mí bwám míme Yesuε ngáne Lukasε átélé nílúmte Yesuε ngáne Nsoode awé Dyób dénhōbpé aá mōsōlōmē bad bé Israel. Lukasε ahóbé aá Edaádəŋ é Dyób chōó épwédé Yesuε ápεεn nkalan mí bwám wéε betóótókε bé bad. Mmén nkalan níbude ahób tǎŋgene e'boŋ bé nímé ábε Yesuε álúmtéé bad. A mbooted menyinge ményínnédé áde ehǎŋgé ébídé tǎŋgene epe éche Yesuε, ményínnéd-ε á asóg áde Yesuε ápúmmé ádyób. Mekan míme Lukasε ákóó awéd áte médíi: mekáne, Edaádəŋ éche Esáá, mekan míme bebaád bébélé átínté e nsón míme Yesuε ne alagsen áde Dyób álagsanné bad mbéb.

Lukasε abádé mekan áte wén míme médé áyál e nímmén nkalan mí bwám dēmpεn (Nōn e'ped é'be ne ntóób á nkabted).

Nkabted ní kálag

Ndibned 1.1-4

Echyáa éche Jōne, Ndusεne ne éche Yesuε 1.5-2.52

Nsón míme Jōne, Ndusεne 3.1-20

Edusen ne mekágsen míme Yesuε 3.21-4.13

Nsón míme Yesuε á Galilia 4.14-9.50

Nsón míme Yesuε áde áhídté á Galilia ápe á Jerusalem 9.51-19.27

E'pun bé asóg ábe Yesuε á Jerusalem ne benben ne á Jerusalem 19.28-21.38

Ákáád áde békáádté Yesuε ne eche kwééd 22-23

Mpuu míme Sǎŋgwéé, alúmed áde ánlúmédte bad yál ne míme mpume 24.1-53

¹ A-Tiofilos, mod a edúbé, ekud é bad ékétéd pónédé átel mekan ásé, míme mébénlédé átínté e' syánē.

² Bétéléle melemlen ngáne dénwōgkε wéε bad ábe bényínēn mō díd se á mbooted, békálé-'ε Eyale é Dyób.

³ Né-óó, ntóó nímmén mekan ahéd áte se á mbooted, nnyíné-'ε nén meé ébóó mémpε nítdé pónédé, nítele wε mekan ásé ahóg-ahógε.

⁴ Nén débél wééchem mbále tǎŋgene mekan míme émáá abii.

Angel epíldé Sakaria

⁵ A pónédé eche Herōde abédé kǎŋ e Judeya, mod nhóg ambé bán Sakaria. Sakaria abédéε prise á nchoo míme Abiyaa. Mwaád ambé díŋ bán Elisabete. Mō ámpε abédéε ngōn e túmbé eche Arone.

⁶ Alongé áde bō mwaád dēmbε bwám á'sō é' Dyób. Béhíde'áá mbéndé éche Sǎŋgwéé ésyāāl.

⁷ Boŋ bénkénwáléé mwǎn ké nhóg áyāle Elisabete abédé ekōm. Bō bad bébe bēmmád-ε achun.

⁸ Bōob-óó, áde pónédé e nsón e nchoo míme beprise míme Sakaria bō épédé áte, anké nsón míme prise abel á Ndáb-e-Dyób epun ehóg.

⁹ Mō-'áá bēmpwédté ássl á Ndáb-e-Dyób ábele Sǎŋgwéé, áhyáad e'twé, ngáne nsón míme prise níhédnádttáá.

¹⁰ Ade áhyǎntéé e'twé, ndun e mod embé ámbíd e ebwóg, békánne'.

¹¹ Hē dōó ángel e Sǎŋgú epíldé mō, etyéém mō á ped e ekáá émbáá benben ne menyán mé e'twé.

¹² Anyín áde Sakaria anyíné ángel, yál enkóm mō áte, mbwóg ménkōb-pe mō bwámbwam.

¹³ Dōó ángel élanǵεé mō aá, "A-Sakaria, weebáá'. Dyób áwógé wε mekáne. Né-óó, awōŋ mwaád Elisabete, áchyāá mwǎn. Echuu ane mwǎn díŋ wéé Jōne.

¹⁴ Anén mwǎn áwōgéd wε menyinge. Ndun e mod ámpε éwōg menyinge é echyáa éché.

¹⁵ Ehé nē áyāle ane mwǎn ábε ndāle a mod á'sō é' Sǎŋgú. Eetǎŋgenéé nēé ámwágkε mím míme méwag, káa chōm ké éché éwúú áte. Edaádəŋ éche Esáá élon mō áte se á ncháátén.

¹⁶ Atiméd bad bé Israel nímmé ámbíd wéε Sǎŋgwéé awé adé ádab Dyób.

¹⁷ Abé á'sō boŋ Sǎŋgwéé ápag. Awōŋ-'ε edaádəŋ ne ngíne melemlen ngáne nkal é'daádəŋ Elaijaa a'bōód ánwōŋgε. Achéd bad nímmé á abum, ábel bad bōobe bán bétim ásé. Abél bad ábe bēwúéné Dyób níló áte, béhǎŋlén, bēwōŋ debyéé nēé bad ábe bétyéeme á'sō é' Dyób. Né-'áá ábonsénné epe éche Sǎŋgwéé."

¹⁸ Sakaria ansédéd ángel aá, "Cheé élúmte mε nén bán ádén akan áde éhóbé débénlédé? Mmén mmaá achun. Awém mwaád-ε ámpε amaá kōd atóm."

¹⁹ Dóo ángel éítimanné mó aá, “Ndíí Gabriele, mészénze níme mébenle Dyób nsón. Dyób álómé me áwōŋ, álaa we nímén nlébtéd m̄ bwám.

²⁰ Bóob-póó, ngáne wéédúbpeé dyam áde ríhóbé, wékwé ebóbé kóŋŋ ne póndé eché mam mésyāāl níme rílánǵé we mélōnnē. Mekan mésyāāl mébenléd-te á póndé eché metánǵéné abenled.”

²¹ Ene póndé esyāāl bad bésíné’áá Sakaria ámbíd ebwóg, bényāǵé’ chōm éche ékáá bonj ápē abem á Ndáb-e-Dyób-te nē.

²² Ade ábídé áwed, eéhele’áá dyamdyam ahób áwāb. Dóo béchéme nēn bán, anyíné ndóg á Ndáb-e-Dyób. Mekáá móo álúmtánnáá bós, ésebán ahele dyam ahób.

²³ Póndé e nsón eché Sakaria emaa’-áá áte, asú á ndáb.

²⁴ Ámbíd e póndé mwaád ámbé nkgō. Ankoó yāl á ndáb-te á etún é ngōn étáan.

²⁵ Anhób aá “Kóŋŋ ne á asóg Sǵŋgwéé abēnlé me ádén. Awógé me ngōl, ahúdé’-e me e’són áyál áfínté e ábēm bad.”

Ángel epíde Maria

²⁶⁻²⁷ Adé dyēm áde Elisabete ádíí ngōn ntóób, Dyób dénlōm ángel Gabriele á dyad á Nazaret, á alonj á Galilia, wéé ngōndéré póg bán Maria. Maria enkémbíí’é mwēnchóm. Mod ankií mó awe béchǵé’áá bán Josebe. Josebe ámbíd á túmbé eché Kǵŋ Dabide.

²⁸ Ade ángel étané Maria enhób aá, “A-Maria, nsanj nǵbē ne we! Edíí mmwaád awé akudé mende ne Dyób. Titéé Dyóbe adé ne we.”

²⁹ Nēn déntagéd Maria á mewēmtēn-té bwámbwam. Akōgláádtáá á nlém-té ábii chōm éche ene nyaa e melēntēn éhele élúmté’.

³⁰ Dóo ene ángel élánǵéé mó aá, “A-Maria! Weebáá’, nsimé ní Dyób rídé ne we.

³¹ Ebíí weé, mósōbē nkgō. Wéchyāā mwān a mwēnchóm. Echuu mó dín weé Yesue.

³² Ane mwān ábē ndale a mod. Béchǵŋ mó bán, Mwān a Dyób á Ngum. Titéé Dyóbe mwēn ábē mó atii dé nkamlen áde sáá ámbáá Dabide.

³³ Mó ákamlén abum á ndáb áde Jakobe á ngíndé ne á ngíndé. Nkamlen níme méewōǵéé asóg.”

³⁴ Héé Maria ásedtéé ángel ne aáken, “Chán ríhele nchyáá mwān áde méebíí’é mwēnchóm?”

³⁵ Ene ángel enkwētēn mó aá, “Edáádǵŋ éche Esáá epíi we. Ngum e Dyób ékúdtēn we. Né-óó, mwān awé asáá, awé wéchyāā’é, áchǵnéd bán Mwān a Dyób.

³⁶ Bíí weé, Elisabete, mwānyonj a túmbé póg, mómpé adé nkgō á e’chun-té. Mó awé bēnhōbpē bán adé ekōm, adé dyēm bóob ngōn ntóób.

³⁷ Edé nē áyāle dyamdyam déesaá áde átómé Dyób áte.”

³⁸ Héé Maria áhóbéé aá, “Ndíí mbaledé awe Sǵŋgwéé. Ebē ne me ngáne éhóbé.” Dóo ene ángel étédté mó bonj ékag.

Maria akii wéé Elisabete

³⁹ Mmē mesú mēn, Maria anlād yāl ne mehél mésyāāl, áké á dyad á Juda ahóg áde adé á e’kone-té.

⁴⁰ Ade ápédé áwed, ansól á ndáb eché Sakaria, áléled Elisabete.

⁴¹ Awóg áde Elisabete áwógé Maria níme melēntēn, mwān anhóbnéd Elisabete á abum-té. Edáádǵŋ éche Esáá émpíí mó.

⁴² Dóo-áá álánǵéé Maria ne esaád é ngíne nēn aá, “Nnam nǵbē ne we áfínté bebaád bésyāāl. Nnam nǵbē ne mwān awe wéchyāā’é.

⁴³ Chán ébēnlédé éche memē ríkudé échēn edúbé? Chán nyaa awe Sǵŋgwéé áhele áhye áwēm-é?

⁴⁴ Awóg áde ríwógé nímmōŋ melēntēn, mwān ahóbté me yāl á abum-té ne menyínǵe.

⁴⁵ Dyób ánámté we áyāle edúbé nēn weé, dyam áde Sǵŋgwéé álánǵé we débenléd.”

Ngase eché Maria

⁴⁶ Héé Maria áhóbéé aá,

“Nkémte Sǵŋgwéé ne nlém nímmēm rísyāāl,

⁴⁷ edáádǵŋ échēm ámpé éwógne Dyób menyínǵe. Mó adé awēm mod a e’soosōŋ.

⁴⁸ Áyāle achémé me awé ndé awe mwā mbaledé ngēn. Bootya bóob, áké á’sō, nyongel e bad téé éhōb bán, rídé mmwaád awé Dyób ánámté.

⁴⁹ Dyób á Ngum abēnlé me ndāle a akan. Mó adé ane awe asáá.

⁵⁰ Ngōl eché ébē nyongel ne nyongel e bad téé, ámín e kénzée awe abage mó edúbé.

⁵¹ Abelé ndāle a akan ne éche ekáá chēn. Apuúdtédé bad ábe bédé kúmbe mewēmtēn áte.

⁵² Ahúdé benkamlene áwāb metii mé nkamlen, bonj achǵté bad ábe bésúdté yāl.

⁵³ Akódté bad ábe bétagne nzaa ne kase é bwēm, bonj anané bad ábe bēbúdé awōŋ aá bésūe’ ne mekáá mé ngēn.

54-55 Akámténé álonéd akag áde ámbéé ábéd betaa, bootya Abrahamé ne nímé mbyaa rísyāāl káān ne á ngíndé. Né-óó, awóhngéné ábē bembáledé, bad bé Israel.”

56 Ámbíd e nê, Maria andyēén Elisabete ngon éláán, bon ásuē’ ámbíd.

Echya éche Jone Ndusene

57 Ámbíd e pónéd, e’we é’ mwān bénkōb Elisabete. Anchyáá mwān a mwēnchóm.

58 Túmbé eché ne bad ábe bóbáó bédyéé’ áá abwóg ahóg, bénsōh̄tēn nēn bán Sāngwéé ábagé mós sánkalaa a nsímé, bómpē bēwóg menyíngē.

59 Mbwe mé asōh̄-á-yāl (ámbíd e e’pun waam) áde béhyédé mwān ayag, béhédé’ áá mó d̄in áde sáá achuu bán Sakaria.

60 Dóo nyaá áhóbéé áá, “Aáy! D̄in débēē mó bán Jone.”

61 Héé bétimtanné mó bán, “Modmod eésáá áwōh̄ túmbé-te awē awóó ádé d̄in.”

62 Né-óó bēnhaḡtēn Sakaria á mekáá m̄in áhed áte ngáne ádóó mwān d̄in achuu.

63 Héé áhāgténé ne mekáá áá bēpiined mó abámbé. Antēl áhed áá, “D̄in ád̄ifí mó bán Jone.” Anyín áde bad bényíné nē, menyáké mékōb bó.

64 Ábwōg-ábwōg, ehób énsālē mó á nsəl, ábootéd-te dyam ahób ámpē, ákēmtē-’e Dyōb.

65 Mbwe dénkōbéd bad bēbédé áhed mbwóg, békēné nkalan̄ hōm ásyāāl á myad mé e’kone á alon̄ á Judeya.

66 Mod téé awē anwóg ádēn akan, ankoó dó á nlém-tē. Bésēdté bánken, “Ebál é mod éhéé anēn mwān ábēē-yēē?” Bésēdté’ áá nē áyāle bēmb̄ifí nēn bán Dyōb ádé ne ane mwān.

Ngase echē Sakaria

67 Bāó-póó, Edáádān̄ éche Esáá émpíí sēe mwān, Sakaria. Héé ábóótédé mam ahóbtéd, ahóbé áá,

68 “Mekenag mébē ne Sāngwéé, Dyōb á bad bé Israel.

Béken Dyōb áyāle ahyedé ábē bad anyen áse, akódté-’e bó.

69 Akwógté ngum a mod á abum á ndáb áde awē mbáledé Dabidē, móchoód syānē.

70 Se’ bāóó ansōn bekal bē’dáádān̄, alóm bó áá bēhób bán,

71 Mósōh̄ syānē á mekáá mé bad bé ekōyí ábe syānē, ne bad ábe békóó syānē.

72 Nē dóo Dyōb álúmtéé ngol eche ánh̄ifí’ é ábéd betaa akag. Né-’áá akámténé nímé melē,

73 nédé melē nímé ámmwēē ne awed sáá ambáá Abrahamé.

74 Anhób áá mósmadté syānē ason̄ á mekáá mé bad bé ekōyí ábe syānē,

bon̄ déhel mó abele ésebán debáá’.

75 Dēébenlé mó pónéd eché ne nlém nímé rísáá ne mbeltéd nímé rídé ngáne Dyōb áhedéé, á alon̄gé ádéd ásyāāl.

76 We-óó, a-mwān, bēchāg we bán nkal é’dáádān̄ awē Dyōb á Ngum.

We-’áá wēsēbē Sāngwéé á’ sō, ábon̄sen mó nzii echē ábwēé áte.

77 Wēb̄l ábē bad bēbíí nēn bán, Dyōb áchōh̄tē bó áyāle álágséné bó nímab mébē.

78 Nēn débēnléd áyāle ngol e Dyōb ne ábē e’bon̄ bé nlém.

Ene ngol chós-’áá ék̄ān̄ e nyinēn bé ekíde ábē é’bídé ám̄in̄ é’piinéd syānē e’sóoson̄.

79 Né-óó bad ábe bédé á ehíntēn-tē, ne á nsəl rí son̄, békūd e’nyinēn bé e’kíde.

Syānē-’e déékūd debyéé áde álúmté syānē nzii echē epeene alon̄gé dé nsan̄.”

80 Jone ankwóg, edáádān̄ é Dyōb ébē-’e mó ngine. Andyé é ehýānge káān̄ ne á pónéd eche ábóódtédé eyale é Dyōb akal á ntálé wēe bad bé Israel.

2

Yesue achyáádté á Betlehem

(Mat 1.18-25)

1 Mmē mesú-óó Agóstuse, Kaisēe a Roma antóméd mbéndé áá, moosyāāl awē adé áse e nímé nkamlēn, áke átelēn d̄in.

2 Nēn démbē tóngé e bad e’só. A pónéd eché Kirinuse mó ambé nló mé alon̄ á Siria.

3 Mod téé anké áwē dyad ábel bon̄ bétel mó d̄in áse.

4 Né-óó Josebe mómpē anhidé á dyad á Nazaret á Gallia, achágé á Betlehem, dyad áde Kān̄ Dabidē á Judeya, áyāle ámbíd á mbyaa nímé Dabidē.

5 Anké nē ábel bétōh̄ bó Maria, ngondére eche ánkíí’ é. Maria mó-’e ambé nkog.

6 A Betlehem wē dó-’áá achád ákóbé Maria.

7 Anchyáá mwān a mwēnchóm awē átúbné abum. Ankaán mó e’ped bé mebad, ánāād-te mó á ebwóg éche bédídté’ e’lém áte, ngáne etál ébédéé á ndáb e beken.

Angel építidē ben̄on̄ bé mbód

8 Áped eché, ben̄on̄ bé mbód bēnóné’ áá échāb echon̄ é’ mbód á hōm dé medyé nkuu.

9 Angel e Sāngú empíí bó taléd, ehúmé é Sāngú élan̄néd bó. Mbwóg ménkōb bó.

¹⁰ Hée ángel élan̄geé b́o aá, “Nyéebáá’, mpiínédé nyé k̄æse e nkalan̄ eché éwōgēd bad bésyāāl menyinge bwāmbwam.

¹¹ Nyébbi bán, epun é’chii, Nsoode awēn achyáádté á dyad áde K̄n̄ Dabide. Mó adé Ane awé Dyōb Awōgté. Mó adé Sāngwéé.

¹² E’chemléd ábe níbwageé nyé é’díi bán, nyéētān mwān awe békārné e’ped bé mebad ngáne ánán̄gé á ebwōg eche bédídté e’lém áte.”

¹³ Melemlem mé pōndé echon̄ é ángel émbld eníníi ángel á nkag taléd, ékené Dyōb bán, ¹⁴ “Ehúmé ébē ne Dyōb áde ádē se am̄n, nsañ-’é níbē ne baányon̄ ábe ábágé nsimé á nkōnsé!”

¹⁵ Ambld e nē, échē ángel énsū am̄n. Hée benān bé mbód belāngeé nhóg ne aníníi bán, “Syáá dékag á Betelham, déke dényfn̄ adē akan áde Dyōb á Ngum álúmté syāné áte aá ábēnlédé.”

¹⁶ Dó-’aá békíi á mehélé-te, bon̄ bédibté Maria b́o Joseb ne nkáál ní mwān nēe rínán̄gé á ebwōg eche bédídté e’lém áte.

¹⁷ Bémáá-’aá anyín nē, d́o b́ebóótédé nkalan̄ akal ngáne ángel énlāā’ é b́o t̄n̄gene ane mwān.

¹⁸ Bad bésyāāl ábe b́enwōg nē, menyáké ménkōb b́o.

¹⁹ Maria ankoó nímn̄ mam mésyāāl á nlém-té, ádolé mó áte.

²⁰ Hée benon̄ bé mbód b́etímé ámbld, b́ekēmté Dyōb, b́ekéné-’é mó áyale mam mésyāāl níme b́ewógé, bon̄ b́enyínén-ne d́id n̄ngáne b́enlāā’ é b́o.

²¹ Ambld e e’pun waam, mbwe níme b́eyageé mwān, b́enchuú mó d́in bán Yesue. Adé d́in d́o ángel émmadté mó achag bon̄ nyaa ábē dyēm.

Bépééné Yesue á Ndáb-e-Dyōb

²² Βοῦβ-ρῶς, mbéndé e Mosēe ehedáá bán, ámbld e echyáa b́ebe mendé áwohe nyē mwān b́o s̄e mwān. Ade b́emáde nē, Maria b́o Joseb b́enkēén mwān á Jerusalem álúmed mó á’ s̄o é’ Sāngú.

²³ B́enkē nē nchoo ne ngáne éténlédé á mbéndé e Sāngú bán, Mwān a mwēnchóm téé awé b́etúbne abum, b́ebe mó á mekáá mé Dyōb.

²⁴ B́enkē nē káān̄ne ábe mendé ne álóned mbéndé e Sāngú eché ehóbé bán mod ábe bé éllā b́ebe káa mbāngé ésad ébe.

²⁵ A Jerusalem wē, mod ambé bán Simione. Ane mod anwón̄ abé áde atāngéné á’ s̄o é’ Dyōb, ákongé-’é mbéndé é Dyōb. Edáádān̄ eche Esáá émbē ne mó. Asiné-’áá pōndé eché Dyōb déson̄gé alon̄gé á bad bé Israel.

²⁶ Edáádān̄ eche Esáá émmād-te mó alúmed nén aá, éewáá ésebān anyíné Ane awé Sāngwéé Awōgté.

²⁷ Edáádān̄ eche Esáá émbēl Simione ankē á Ndáb-e-Dyōb. D́o Maria ne Joseb b́epééné awab mwān Yesue áhed, ngáne mbéndé éhédé’áá.

²⁸ Simione ankobén b́o mwān, abwáá mó, bon̄ ákēmté Dyōb nén aá,

²⁹ “A-Sāngú, ngáne élon̄té ádōn̄ akag, téd-t̄s̄ me, níkag ne nsañ.

³⁰⁻³¹ Áyale ml̄d nímn̄m rínýiné awōn̄ mod a e’sooson̄ awe ébōrn̄séné wéé moosyāál anyín.

³² Ábē e’nyínen bé ekide ábe b́ebēl bad ábe b́eesé bad bé Israel ábbi wē, ápēn-ne edúbé wéé ábōn̄ bad bé Israel.”

³³ Josebe ne Maria b́embē menyáké áwóg mam níme b́ehóbé t̄n̄gene awab mwān.

³⁴ Hée Simione ánámté b́o, bon̄ álāngē Maria aá, “N̄oné’, anén mwān awé nyényínéé nén, Dyōb d́o álómé mó. Ábēl bad behóg b́ekud ebébtéd, ábíníi-’é b́ekud e’sooson̄ á alon̄ á Israel. Ábē n̄ngáne e’chemléd é’ Dyōb, bon̄ ekud é bad éfíi mó am̄n, b́etāngān̄ mó.

³⁵ A pōndé eched mod téé níme mbéltéd m̄n mébldēd níme mewēmtēn̄ áwed. Hée ndutul éson̄gé wē á nlém nēe nkwaté.”

³⁶⁻³⁷ Nkal é’ d́eádān̄ a mmwáad̄ nhóg abédé, d́in démbē mó bán Anaa, mwān awe Panuelé awé ábide á túmbé e ASe. Anaa anchūn̄ bwāmbwam. B́o nchóm b́endýeé mwé saámbé á e’wóngé, bon̄ ályāgē mó akúd káān̄ ne á móom mé mwé waam ne mwé rínini. Eésyāngē’áá á Ndáb-e-Dyōb. Akánné’áá nkuu ne m̄tē, ádidé-’é yāl̄ nzaa á mekáne-té.

³⁸ Ade Maria b́o Joseb b́epééné Yesue á Ndáb-e-Dyōb p̄enén, Anaa ambé áhed. Hée ábótdé Dyōb aken, ákanlé-’é bad nkalan̄ t̄n̄gene ane mwān. Ábē bad b́ebédé bad ábe b́esiné’áá pōndé eche Dyōb déwábéé dyad á Jerusalem. Anlāá b́o nyaa e mod eché ane mwān ábē.

Josebe b́o Maria b́etímne mwān ámbld á Nazaret

³⁹ Ade Maria b́o Joseb b́emádné mam mésyāāl ngáne mbéndé e Sāngú éhédé’áá, b́ent̄m áwāb dyad á Nazaret á alon̄ á Galilia.

⁴⁰ Ene pónde mwän mós-ε ákwogé', áwūē' áte, debyéé ákwogé mós, nsimé ní Dyób mós-ε ríhídé mós.

Yesue akil á Ndáb-e-Dyób

⁴¹ Βαῶβ-ᾠός, émbē bán, mwē téé Yesue sáá bós nyan békágé'áá á Jerusalem áyāle Ngande e Nnyime-ámín.

⁴² Ade Yesue apédé dyóm á mwé ne níbe, bóbōó bēnké á ngande ngáne émménténné abé.

⁴³ Ngande emaa-'áá bon nyaá bós sán bésūē' á dyad. Yesue anlyāg ámbíd á Jerusalem ésebán bēbífí.

⁴⁴ Mewēmten mémbe bós nén bán, adé á ehoḅ éche esúé'áá. Bon áde békékeé bootya mbwembwe kááḅ ne ngukél, dós bēbóótédé mós ahed, bésēdté mós wēε bad bé tumbé ne bad ábe bóbōó bébyééné.

⁴⁵ Anyín áde béenyinéé mós, bēntīm ámbíd á Jerusalem áhed mós áwed.

⁴⁶ Alónten e'pun é'láán dós bétímé mós adibed á Ndáb-e-Dyób. Andyéé áttinté e bemeléede, áwōglán bós, ásedtē-ε bós mam.

⁴⁷ Mod téé awé anwóg mam níme Yesue áhóbé'áá, ambé menyáké áyāle nsóḅten níme ánwōngē ne nyaá eché ákwéntánnáá bós.

⁴⁸ Ade nyaá bós sán bényinéé mós, yā enkóm bós áte. Dós nyaá ásedtēé mós áá, "A-mwän, chán-nō ébélé sé nén? Sé sóḅ sékómé wε ahed, sétágé-ε áte."

⁴⁹ Bon Yesue ankwentén bós áá, "Cheé ékásá bon nyéhédé me? Nyénkembífí'ε bán, ntāḅgéné abé á ndáb eché echem Sāḅ-ε?"

⁵⁰ Bēnkēnhēnlé dyam áde áhóbé asóḅten.

⁵¹ Ámbíd e nē, dós Yesue áhídé nyaá bós sán, bon bóbōó bésūē' á Nazaret. Enkēnwúénné bós nló áte. Nyaá-ε ankoó nímén mekan mésyāā́ á nlém-té.

⁵² Ngáne Yesue ákwógé'áá, debyéé dōmpē ákwógé'áá mós. Nsimé ní Dyób ne ní baányon ríhídé mós.

3

Jōne, Ndusenε aboḅsan nzii

(Mat 3.1-12; Mak 1.1-8; Jōn 1.19-28)

¹⁻² A pónde eché nkamlēne Tibēriose, ákēbēε Kaisēε á Roma áyāle dyóm á mwē ne rítáan, Dyób dénlóm Jōne mwän awe Sakaria ne nlébtéd á ehyanḅe wēε ábédé. Ene pónde-ε dós Pontus Payledé mós-ε ábédé Nkamlēne á Judeya, Heróde ákamlán alon á Gallia, mwānyan Filibe-ε ákamlán alon á Ituria ne alon á Trakoniti. Bon Lisanía mós-ε ákamlánnáá alon á Abilēne. Mmē mesú mēn-naá Anasé bós Kaifasé bēbédé beprise bēmbáámbáá.

³ Jōne abwágé'áá mebwóg mésyāā́ níme melāḅḅnéde edíb é Jodan. Akag ákalé eyale é Dyób nēn áá, "Nyétede abel dé mbéb, nyékuḅ edusen ábel bon Dyób álagšen nyé mbéb."

⁴ Nén dénlōnéd chōm-εε étenlédé á kálag eché nkal é dōádōḅ Yesayaa bán,

"Ehāḅgē ébídé á ehyanḅe bán,

nyéboḅšen epe éche Sāḅḅwēé.

Nyéttí eché nzii.

⁵ Nyélonéd nhog té.

Nyéśudéd mbōōd ne ekone té.

Nyéttí mebwóg níme méhyómé.

Nyétaled mebwóg níme médé pwoḅgléd pwoḅgléd.

⁶ Ábel bon moonyon asyāā́l anyín ngáne Dyób ásoó'ε alongé á bad."

⁷ Ndun e mod empē wēε Jōne béhedé bán, ádušen bós. Mós-ε ásedtē bós ááken, "Píí é nyé chén! Nzéé múmós aláḅgē nyé áá nkáásé ní Dyób ríhúe' bon aléb-pe nyé áá nyékúme abāḅḅgē?"

⁸ Nyéchyáá e'pum ábe é'lúmte bán nyétdtē abel dé mbéb, tómaa áhób áwēn nlém-té bán, 'nyédé bán ábe Abrahame, nyéekudtē nkóḅḅšen ní Dyób.' Bon ríláa nyé nén meé, Dyób áhele ábenléd nímén meláá áttímēd mós bán ábe Abrahame.

⁹ Βαῶβ-ᾠός, ehón émáá anaá á nkan ní mēl. Né-ós, bwēl ké é'héé ábe bēéchyāā́ e'pum é' bwām, békweł bós, bēbwēm-me bós á muu-te."

¹⁰ Hé dós, bad bésēdtēé mós bánken, "Chán-nō sébenléd bōōb?"

¹¹ Jōne antimtén bós áá, "Mod awé awóó mbóté ébe, ábe póg wēε ane awé eewóó chōmchōm. Ane awé mós-ε awóó ndyééd, ákabe bad ábe béewóó."

¹² Belad bé tááse ábe bōmpē bēnhyé edusen akud bēnsēdéd mós bán, "A-meléed, cheé sébenléd?"

¹³ Antimtén bós áá, "Nyéésanté tááse tómaa ngáne bétífíde."

¹⁴ Nguse é sánze chós-ε énsēdéd mós bánken, "Chán-náa sé, sébel chán?" Jōne ankwentén áá, "Nyéékobné bad mōné. Nyéebáné-ε bad mekan áyā́l ngēn, bon nyébé menyinḅe ne chōm-εε nyékudeé néε nsábe."

¹⁵ Bɔɔb-pɔɔ, bad ábe bébéde áhed, nímab mewémten mêmbootéd acháge ne e'lyág bé nlém, békɔglád á nlém-té nzé édé bán Jone mó adé Ane-awé-Béwógté.

¹⁶ Héé Jone átimtanné bɔ moosyáál aá, “Ndusan nyé bɔɔb ne mendíb, boŋ mod ahúé’ awé atómé me. Meékwoɣnéé áhune ké nímé nkɔɔd mé metámbé. Adusén nyé ne Edáádəŋ éche Esáá, ádusén-ne nyé ne muú.

¹⁷ Awánlé éché epeben á ekáá, ábel nén, ápeb níme menyán ámín. Nzé amadé, álad mbum é bwám áte, ákɔɔ ch́. Boŋ álad e'pɔɔ, ahyáád bɔ á ebonde é muú éche éédímé’.”

¹⁸ Né-ɔɔ Jone alébé’áá bad ne ekud é pólé émpéé, ákanlé-é bɔ nkalaŋ ní bwám.

¹⁹ Jone anhób káəŋne wéé nkamléne Héɔde aá, abelé mbéɓ ngáne áwóó Héɔdyase, mwaád awé mwányan, nchoo ne e'bébtéd bé mekan bémpéé ábe ámbenlé.

²⁰ Abád-te áyále nímé mbéɓ ńsyáál Héɔde anhé Jone á mbwáɣ.

Bédúséné Yesue

(Mat 3.13-17; Mak 1.9-11)

²¹ Bɔɔb-pɔɔ, áde Jone ámáá ekud é bad adusen, Yesue mó ámpé ampé aá ádusen mó. Ade ámáá mó adusen, ábwɔg-ábwɔg ankáné. Ade ákánneé nē dɔɔ ngob e dyɔb énédnédé.

²² Hé-’aá Edáádəŋ éche Esáá ébíde ngáne éláə, boŋ ésudé mó á nló ḿn. Ehóɓ ch́mpé émbíd ádyɔb nén, “Edíi awem mwán a nlém awé nídáá bwámbwam. Ndé menyínge ne wé.”

Abum á ndáb áde Yesue

(Mat 1.1-17)

²³ Yesue ambé dyam móom mé mwé méláán boŋ ábootád níme nsón. Bad bényíné’áá mó nées mwán awé Josebe. Josebe ambé mwán awe Elie. Elie ambé

²⁴ mwán awe Matate. Matate ambé mwán awe Levie. Levie abédé mwán awe Melekye. Melekye ambé mwán awe Janne. Janne ambé mwán awe Josebe.

²⁵ Josebe abédé mwán awe Matatya. Matatya ambé mwán awe Amose. Amose abédé mwán awe Nahume. Nahume ambé mwán awe Esilye. Esilye ambé mwán awe Nagaya.

²⁶ Nagaya abédé mwán awe Maate. Maate ambé mwán awe Matatya. Matatya ambé mwán awe Simene. Simene ambé mwán awe Joseke. Joseke ambé mwán awe Jodaa.

²⁷ Jodaa abédé mwán awe Joanane. Joanane ambé mwán awe Resa. Resa ambé mwán awe Serubabele. Serubabele ambé mwán awe Salatyé. Salatyé ambé mwán awe Nerie.

²⁸ Nerie ambé mwán awe Melki. Melki ambé mwán awe Adie. Adie ambé mwán awe Kosame. Kosame ambé mwán awe Elamadame. Elamadame ambé mwán awe Ere.

²⁹ Ere ambé mwán awe Josua. Josua ambé mwán awe Elesaa. Elesaa ambé mwán awe Jorime. Jorime ambé mwán awe Matate. Matate ambé mwán awe Levie.

³⁰ Levie ambé mwán awe Simione. Simione ambé mwán awe Judaa. Judaa ambé mwán awe Josebe. Josebe ambé mwán awe Joname. Joname ambé mwán awe Elyakime.

³¹ Elyakime ambé mwán awe Meleya. Meleya ambé mwán awe Mena. Mena ambé mwán awe Matate. Matate ambé mwán awe Natane. Natane ambé mwán awe Dabide. Dabide

³² mwán awe Jese. Jese mwán awe Obede. Obede ambé mwán awe Boase. Boase ambé mwán awe Salmons. Salmone ambé mwán awe Nasoné. Nasoné

³³ ambé mwán awe Aminadabe. Aminadabe ambé mwán awe Ademine. Ademine ambé mwán awe Arenie. Arenie ambé mwán awe Heseɔne. Heseɔne ambé mwán awe Perese. Perese ambé mwán awe Judaa.

³⁴ Judaa ambé mwán awe Jakobe. Jakobe ambé mwán awe Aisige. Aisige ambé mwán awe Abrahamé. Abrahamé ambé mwán awe Tera. Tera ambé mwán awe Nahó. Nahó

³⁵ ambé mwán awe Seruge. Seruge ambé mwán awe Rewee. Rewee ambé mwán awe Pelege. Pelege ambé mwán awe Ebee. Ebee ambé mwán awe Sela. Sela

³⁶ ambé mwán awe Kanane. Kanane ambé mwán awe Apasade. Apasade ambé mwán awe Seme. Seme ambé mwán awe Noa. Noa ambé mwán awe Lameke.

³⁷ Lameke ambé mwán awe Metusela. Metusela ambé mwán awe Henoke. Henoke ambé mwán awe Jaredé. Jaredé ambé mwán awe Mehalele. Mehalele ambé mwán awe Kenane. Kenane

³⁸ ambé mwán awe Enose. Enose ambé mwán awe Seta. Seta abédé mwán awe Adame. Adame-é abédé mwán a Dyɔb.

4

Satané akágé Yesue

(Mat 4.1-11; Mak 1.12-13)

¹ Bɔɔb-pɔɔ, áde Yesue abídé á edíb é Jodan, anlón ne Edáádəŋ éche Esáá. Entimén mó á ehyaŋge.

² Andyéé áwed móom mé e'pun méniin, Devále ákágé mó. Mmé mesú mésyáál enkéndyáá ch́mch́m. Ambíd e né-ɔɔ nzaa ewagáá mó.

³ Dóo Devale álanḡeé mós aá, “Nzé we-éé edé Mwän a Dyöb, kamlén ádén aláá weé, átim ewele.”

⁴ Yesue antimtén mós aá, “Eténlédé á kálag e Dyöb nén bán, ‘Saké ndyééd chēmpen edide moonyon á alonḡé.’ ”

⁵ Héé Devale ákēéné mós á ekone mín, álúmté mós melonḡé mé nkōḡsé mésyāāl áyāle mwä esōḡ é póndé.

⁶ Dóo álanḡeé mós aá, “Nóné’, bēbágé me nkamlen ámín e ábén bwēm é’syāāl. Nwóó-’e kunze ábe mod ké ahéé awe rídás ábe. Mēbē we mós.

⁷ Né-óó nzé ebagé me edúbé, né wée ewóó ábén bwēm é’syāāl.”

⁸ Yesue antimtén mós aá “Eténlédé nén bán, ‘Ebwógke’ Sāḡwéé ádonḡ Dyöb meböbōḡ, ébage-’e mós edúbé. Mwēnpen-naá étāḡḡéé ábele.’ ”

⁹ Héé Satané ákēéné Yesue á Jerusalem. Atyēēmān mós á nzonḡe e Ndáb-e-Dyöb mín, bon álanḡé mós aá, “Nzé we-éé edé mwän a Dyöb, éheb á bwele-mín hén, éhún á ndoob.

¹⁰ Eténlédé á kálag e Dyöb nén bán, ‘Dyöb dékamlén éche ángel áśáb we,’

¹¹ ‘épēm-me we ámín, ábel nén weébōmē ekuu á aláá.’ ”

¹² Yesue-’e antimtén mós aá, “Kálag e Dyöb ehóbe nén aá, ‘Weékāḡé Sāḡwéé, ádonḡ Dyöb áte.’ ”

¹³ Devale amaá-’aá mós akāḡ áte menzii mésyāāl, bon áhidte’, áhāḡ mós mwä etāl.

Yesue aboótédé nsōn á Galilia

(Mat 4.12-17; Mak 1.14-15)

¹⁴ Yesue antīm ámbíd á Galilia. Edáádāḡ éche Esáá émbē ne mós, dīn dós-’e ákanlád mós mbwóg áte ésyāāl.

¹⁵ Ayáḡté’áá bad áwab ndáb é mekáne, moosyāāl ákēmté mós.

Bad bé Nazaret béekobéé Yesue

(Mat 13.53-58; Mak 6.1-6)

¹⁶ Ade ápédé á Nazaret wée ákwógé, ansól á ndáb e mekáne á Mbwē-mé-nkóme-áte, ngáne ámmenténné ábel. Dóo átyéémé ámín, álāḡ eped.

¹⁷ Bēmbē mós nhíbe rí kálag é metelag nime nkal é’dáádāḡ Yesayaa. Anhéné chó áte, ákūnē eped éche ehóbe nén bán,

¹⁸ “Edáádāḡ éche Sāḡwéé édé ne me, áyāle Dyöb ápwédé me aá, nībel ehāḡḡé é nkalāḡ nī bwām wée betóótōkē bé bad. Alómné me ehāḡḡé aá, bad ábe bédé á mehaḡḡé, béhide á mehaḡḡé,

aá, bad ábe békwdé ndím, bényīnēn aá, bad ábē békude metuné á mekáá mé baáb, nhúd bós á metuné-te

¹⁹ aá nībel-le ehāḡḡé nén meé póndé epedé eché Dyöb álúmtéé bad ngāl.”

²⁰ Amaá-aá álāḡ, ádíb kálag áte, ábag chó ámbíd wée mod awē anone ndáb e mekáne. Ankē ádyēé áse, mīd mésyāāl ménóné mós.

²¹ Dóo álanḡeé bós aá, “Echén eped éche nyéwógé, éloné epun é’chii.”

²² Moosyāāl ankéméd mós, menyáké mékób bós áyāle káse e póle eché ebídáá mós á nsāl, bésedté’ bánken, “Kíné saá mwän awē Josebe mós nén-e?”

²³ Yesue ambád bós aláá aá, “Mbíí meé, nyéekalé me ngan bán, ‘A mod a bwele, choód yāl.’ Nyéelāā-’e me bán, mekan nime nyéwógé bán mbelé á dyad á Kapenahum bán, nībel-láa mós áwēm dyad-té hén.”

²⁴ “Nláa nyé nén meé, nkal é’dáádāḡ eewóó’é edúbé áwē dyad.

²⁵ Nyébíí-óó nén bán, á póndé eche Elaijaa, mbúú eechódeé áyāle mwē ríláán ne eped. Nē dēmbēl sāḡkalaa a nzaa ambé alonḡ áte ásyāāl. Bekúd híin bēmbē á mbwóg e Israel hén ene póndé.

²⁶ Bon Dyöb dénkēnlómmé Elaijaa áwāb. Anlóm mós dásós á alonḡ á Sidon á dyad á Sarefa wée nkúd a mmwáád ampéé.

²⁷ A póndé eché nkal é’dáádāḡ Elisha ampé ndun e mod e melāḡ embé á Israel. Bon Elisha enkēnsáádté mod a melāḡ ké nhóg awē ambíd á alonḡ á Israel. Namane, mod awē ambíd á alonḡ á Siria mós ánsáádté.”

²⁸ Ade bad ábe bēmbē á ndáb e mekáne bēwógé-’e nē, ekanḡ énkōb bós áte.

²⁹ Héé bépádté áse, bēhé mós abum ámín, bēkēen mós á asóg á dyad. Ngáne bēnlōḡḡé á ekone mín, bēntimén mós á mbám mé ekone ábel bētíned mós á ekone sé.

³⁰ Bon ansam bós áfínté, ákē-’e mós.

Mod awē edáádāḡ é mbéb émbēé áte

(Mak 1.21-28)

³¹ Yesue ansyogé á dyad á Kapenahum á mbwóg e Galilia, ábootéd ayáged á mbwe-mé-nkóme-áte.

³² Nyaa eche áyágté'áá enkóméd bad yál áte bwámbwam áyále ábē e'yale bémbē ngíne.

³³ A ndáb e mekáne wée áyágté'áá, mod ambé awē edáádan é mbéb ékamlánnáá. Héé ábóótédé abón aá,

³⁴ "Bó! A-Yesu, mod a Nazaret, cheé syánē déwónné? Ehyedé sé awúu-ye? Mbíi we bwám. Edíi mod awē Dyób álómé, awē asáá."

³⁵ Dóo Yesue ákánne éché edáádan é mbéb áte aá, "Lám, bíd ane mod áte!" Héé ébómé ane mod asē áttinté bad, bonj ébidē mós á yál, ésebán élógné mós.

³⁶ Menyáké ménkób moosyáál, bésédte nhóg ne aníníi bánken, "Nyaa e nhóbtéd ehéé nén-e? Chán mod ákamlánné e'dáádan bé mbéb ne kúmbe esyáál, é'wógnē-é mós?"

³⁷ Din dēnké mós mbwóg áte esyáál áyále mekan níme ábélé'áá.

Yesue achójté ekud é bad

(Mat 8.14-17; Mak 1.29-34)

³⁸ Ade Yesue áhídte á ndáb e mekáne, ankē á ndáb wée Simōne. Antán néé Simōne mwaád nyaá ákonléé, ahéb ámbáá dēnsog mós. Bénchān Yesue bán, ádid mós bwám.

³⁹ Dóo Yesue ásídté mós á nkag, awúllén áse, aláá ahéb áded aá, áte de mós. Abwóg-abwóg ahéb dēmmaá mós á yál, ásyāā áse, ákób-pe bós nken.

⁴⁰ Βαῶβ-παῶ, áde enyen ébóótédé asud, bad bésyāāl ábe bēnwōn bad bé nkole ábe békónlé'áá nkole nyaá ne nyaá bēmpēēn bós áwē. Ambán nhóg téé ekáá ámín, ádidé bós bwám.

⁴¹ E'dáádan bé mbéb bómpē é'bidē ekud é bad á yál, é'bōnē' bán, "Edíi mwān a Dyób!" Ankáné bós áte, eémwage' aá-é áa béhōb akan, áyále bémbíi bán, adíi Ane awē Dyób Áwógté.

Yesue akalé nkalanj ní bwám

á ndáb é mekáne é bad bé Israēl

(Mak 1.35-39)

⁴² Mbwe-mbwe pírib, Yesue ansyáá á dyad-tē, ákē á ahángé á hóm. Bad bēmbootéd mós ahēd. Ade bédíbté mós, bēnkēnháá mós etál áke hóm.

⁴³ Dóo álángeé bós aá, "Ntángéné áke á myad mémpēe, ábel nén ríláa bómpē nkalanj ní bwám tǎngene nkamlén ní Dyób. Mmēn nkalanj mós níkáá bonj Dyób álómé me."

⁴⁴ Né-ós akalé'áá nkalanj ní bwám á ndáb é mekáne é mbwóg é Judeya.

5

Yesue apwédé bembapee

(Mat 4.18-22; Mak 1.16-20)

¹ Mbwe nhóg Yesue antyéém á nkin mé edib é Genesarēt. Bad bēnlǎhned mós áwóg eyale é Dyób.

² Héé ányíné bétǎngé myǎle mébe á nkin. Bekób-bé-súu bēnkēmbáá áwēd-te. Béwópé'áá échab mbínzé.

³ Dóo ásolé á bǎle ábe Simōne, aláá mós aá, ásyǎhned mós á nkin. Adyēé'-aá á bǎle-tē, bonj ábootéd bad ayáged.

⁴ Ade ámadé nē, anláá Simōne aá, "Kéén bǎle wée ndib edíi, bonj nyébwēm mbínzé."

⁵ Simōne antúmtén mós aá, "A-Sánj, sékébwēm mbínzé nkuu rísyāāl, sééköbēē chómchóm! Bonj mébēl ngáne éhóbé."

⁶ Dóo bēbwémé mbínzé. Bēnkób ndun e súu kásǎj mbínzé éhape'.

⁷ Bēnlēbē baáb ábe bēbédé á bǎle ábíníi bán béhye bēwōngēn bós. Ade baáb bēpédé, myǎle mésyāāl mébe ménlōn ne súu kásǎj mébootéd asú áse.

⁸ Ade Simōne Petro ányíné nē, ankwe Yesue á mekuu, áhōbē aá, "A Sánjú, sōn! Syáá wée rídíi áyále ndíi mbélé-mbēb."

⁹ Simōne anhōb nē áyále émbē bósbe baáb menyáké bwámbwam ányín ndun e súu eche békóbé.

¹⁰ Menyáké ménkób kásǎjne Jemse bós Jōn, bán ábe Zebēdie, ábe bémbē á echoj é akób á súu. Héé Yesue álángeé Simōne aá, "Weebáá'. Bootya chíi nyéētédé bad nlém á abum áhíd me." ¹¹ Ade bēpéēné nímbab myǎle á nkin, bēntédé chóm ésyāāl áhed, bēbootéd-te Yesue ahíd.

Yesue achójté mod awē melān mékóbé

(Mat 8.1-4; Mak 1.40-45)

¹² Mbwe nhóg Yesue abédé dyad ahóg. Mod awē melān mékóbé yál esyáál ampē áwē. Anyín áde ányíné Yesue, ankwe mós á mekuu, ácháá mós aá, "A-Sánj, nzé edáá ehēle ébēl me nsánj."

¹³ Dóo Yesue ábidtē ekáá, ábānē mó á yǎl bonj álāngē mó aá, “Ndəə, sánj!” Abwōg-ábwōg nímē meləŋ mēmmaá ane mod á yǎl.

¹⁴ Yesue anláá mó aá, eelāngé modmod, aláá-’ε mó aá, “Kǎg éluimed yǎl wée prise, ásimen wε. Ebag-ke mendε ngáne mbéndé e Mosεε éhedeé álúmed bad wée mósāá.”

¹⁵ Ké nēngáne Yesue ánkāngē mó aá eelāngé mod, dīn démbē ákag mó mbwóg áte esyǎl áyále nímē mbeltéd. Nē démbēl ndun e mod éladné mó á nkəg, áwóg chóm éche áhóbeé, ne ábel ádid bó bwám.

¹⁶ Bonj nzé pónde empē mó, ayǎgkē’áá atim á ahǎngé, ákáne.

Yesue achǎnté mod awě awédé eped

(Mat 9.1-8; Mak 2.1-12)

¹⁷ Mbwe nhóg ámpē Yesue ayǎgté’áá bad. Befarisia ne bemeléede bé mbéndé bémbē áhed. Bémbíd dyad ne dyad téé á mbwóg é Galilia ne Judeya, kááŋne á Jerusalem. Ngum e Dyǎb empíi mó, ádid bad bé nkole bwám.

¹⁸ Dó-’aá bad behóg bépeeneé mod á mekále mín awě awédé eped. Béhéde’áá nzii eché bésǎnleé mó á ndáb-te, ánaad mó á’sǎ-te wée Yesue.

¹⁹ Bénkēnkudté etál áyále ndun e mod enlón áhed. Dóo béchǎgké á ndáb mín. Dóo benédttē nnəŋ, bésudéd ane mod bóəbe mekále á etále-té á’sǎ-te wée Yesue.

²⁰ Ade Yesue ányíné adúbe ádē ábe bad béwóó áte anláá ane mod awě awédé eped aá, “Amúé, nłagséné wε mbéb.”

²¹ Dóo bemeléede bé mbéndé ne Befarisia bébóótédé anyoo áte bánken, “Ebál é mod éhéé ésyáá Dyǎb nén? Nzéé ahele se álagsén mbéb ésebán Dyǎb démpen?”

²² Yesue anchem bó mewēmtən áte. Héé ásedtēé bó áaken, “Cheé ékás bonj nyéwǎo’ enén ndín e mewēmtən?”

²³ Ahéé adé dyam ásad, áhób wée, ‘Nłagséné wε mbéb,’ káa áhób wée, ‘Syáá ásé, ébooted akε?’

²⁴ Bonj mēlūméd nyé meé, Mwǎn-a-Moonyonj awóó kunze álagsen mbéb á nkǎrsé.” Héé álāngéé ane mod awě awédé eped aá, “Nłāngε wε nén meé, syáá ásé, étéd nímōŋ mekále, ésué’ á ndáb.”

²⁵ Abwōg-ábwōg ane mod anhidé ásé áfínté e bad, atéd nímē mekále, ásūē-’ε mó á ndáb, ákag ákēmté Dyǎb.

²⁶ Menyáké ménkǎb moosyǎl awě ambé áhed. Héé bébóótédé Dyǎb aken ne mbwóg áte bán, “Sényíné akan dé menyáké chíi nén.”

Yesue achénlé Levie

(Mat 9.9-13; Mak 2.13-17)

²⁷ Ámbíd e nē Yesue ansyáá áhed. Ade ákagké nē, annyín nsaad-a-tááse nhóg bán Levie. Levie andyεé ásé á ndáb eché ákóbáá tááse áte. Héé Yesue álāngéé mó nén aá, “Hídé me.”

²⁸ Dóo Levie átyéémé ámín, áchēnē chóm ésyǎl áhídē-’ε mó.

²⁹ Bǎəb-pǎo, Levie anchǎg sǎŋkalaa a ngande áwe ndáb á dīn áde Yesue. Besaad bé tááse híin ne bad bémpēe bémbē áhed.

³⁰ Héé Befarisia ne ábāb bemeléede bé mbéndé bényonjéé áte wée Yesue ábē bembapeε, bésēdté bó bánken, “Cheé ékás bonj nyáábe besaad bé tááse ne bebel bé mbéb bémpēe nyédyǎg ndyééd, nyé mwǎg-ke mím hóm ahóg?”

³¹ Yesue antimtén bó ne ngan aá, “Bad ábe bédyéé bwám béetǎgnεné mod-a-bwεl. Bad ábe békǎnle’ bóo bétǎgnéné mod a bwεl.

³² Nyébii nén bán, meépedeé áchēle bad ábe békǎbnédé á’sǎ’ Dyǎb, bonj mpedé áchēle bebel bé mbéb meé bésǎg mbéb ábel.”

Nsedtéd tǎngene

adid á yǎl nzaa á mekáne-té

(Mat 9.14-17; Mak 2.18-22)

³³ Befarisia bémbād ahób bán, “Bembapeε ábe jonε béménténé yǎl nzaa adid á mekáne-té. Melemlem né-’aá Befarisia ábāb bembapeε bómpé bébeleé. Cheé ékás bonj ábǎŋ bédyǎg ndyééd, bémwǎg-ke mím?”

³⁴ Yesue ankwentén bó ne ngan aá, “Chán bad ábe bélébpé á ngande e w’wǎngé béhele bédidé yǎl nzaa á mekáne-té áde mod awě akude sómbé ádíi adé ne bó?”

³⁵ Bonj epun épé éche békǎbenné bó mod awě akude sómbé. Eché epun dóo bédidté yǎl nzaa á mekáne-té.”

³⁶ Yesue anláá bó ngan aá, nzé mod ahóbe aá, mǎnabpe’ mbóté, eeséléé eped é abad áyále mbóté ekǎólé bonj ánanbáád mbóté e nchun. Nzé ábelé nē, né asalé mbóté ekǎólé. Ké eped ékǎólé-’ε étǎngánné ne mbóté e nchun.

³⁷ Melemlem nêṅgāne mod éētēdēē mīm mékōālē se ahé mós á nchun mé ntyág, se ápen. Ayāle né abelē nê, né mīm méhōd káāṅ ntyág ntyéd, mīm mémād asyōge, ntyág-ke ámpē mībēb.

³⁸ Bétāṅgēné bēhé mīm mékōālē á apom dékōālē.

³⁹ Bad ábe bós-ε bēmwāg mīm, béemaá'ē mīm mé nchun amwé se bēhéde mékōālē. Bēbēle bēhōb bán, "Saá mé nchun mós mébōó-ye?"

6

*Nsēdtéd tāṅṅene abel dé nsōn
á mbwε-mé-nkōme-áte*

(Mat 12.1-8; Mak 2.23-28)

¹ Mbwε nhóg Yesue ne ábē bembapεε bétómé'áá á nzag e ngun-tē. Nén démbē á mbwε-mé-nkōme-áte. Abē bembapεε bēmbootéd e'sóg é' ngun apád, bépāgke', bédyág.

² Nguse é Befarisia bényíné'-áá nê, bonj bésēdté bós bánken, "Cheé ékásá bonj nyébelé akan áde mbéndé éebagεε kunze ábel á mbwε-mé-nkōme-áte?"

³ Héε Yesue mós-ε ásedtεé bós aáken, "Nédē nyééláá'é á kálag e Dyōb dyam áde kāṅ Dabide ámbenlé áde nzaa ékóbé mós ne ábē bad-ε?"

⁴ Ansól á Ndáb-e-Dyōb mós ne bad ábe bēnwoón mós, atéd e'wεle ábe é'bédé ndε e Dyōb, adyé. Bonj eched mbéndé éebagεε mod ké nhóg kunze ádyε ábē e'wεle étóméé prisε. Mwēn andyé, ábē-ε káāṅne bad ábe bēnwoón mós donṅe."

⁵ Yesue ámbádé bós áte aá, "Mwān-a-Moonyon awóó nkamlen káāṅne ámín e mbwε-mé-nkōme-áte."

Yesue achōṅté mod awē ekáá éwédé

(Mat 12.9-14; Mak 3.1-6)

⁶ Epun émpēe Yesue ankē á ndáb e mekáne. Ambootéd bad ayáged. Nén ámpē démbē á mbwε-mé-nkōme-áte. Mod nhóg-ke ámbé áhed awē ekáá émbáá éwédé.

⁷ Bemeléede bé mbéndé ne Befarisia bēnóné'áá mós chodchod, ányín nze áđíd ane mod bwám á mbwε-mé-nkōme-áte, ábel nén békóben mós awusé.

⁸ Yesue mós-ε anchēm bós mewēmten áte. Héε Yesue álāṅgεé ane mod aá, "Hyé étyéem áfínté hén." Ane mod anwógén mós.

⁹ Dós Yesue ásedtεé bad aá, "Nyéláa me ké éde mbéndé ábel mbonj á mbwε-mé-nkōme-áte, káa ábel mbēb. Edé mbéndé ásonj alonṅé á mod, káa áwúu mós?"

¹⁰ Ahōbe nê, anōne-ε bad á mesó. Dós álāṅgεé ane mod aá, "Sálé ekáá áte." Asále áde ane mod ásanlé ekáá áte, ekáá éndyεé mós bwám ámpē.

¹¹ Nén dénkōbēd Befarisia ne bemeléede bé mbéndé ekanj áte, bēhāgké mós ápid mós mekáá.

*Yesue apwεdé bembapεε bé
nlómag dyóm ne bēbe*

(Mat 10.1-4; Mak 3.13-19)

¹² Ámbíd e pónde Yesue ankē á ekone mún ákáne. Ankáné nkuu rísyāāl káāṅ ne mbwεmbwε.

¹³ Bonj áde bīn é'kénlé, anchélé ábē bembapεε, ápwεdé dyóm ne bēbe áwab fínté, áchagé bós aá, bembapεε bé nlómag. Abē bembapεε bé nlómag bēbédéé,

¹⁴ Simōne awe ámbagké đīn aá, Petro, bós mwānyanj Andreyā, Simōne, Jakōbe, Jōne, Filibe, Batolomyo,

¹⁵ Matyo, Tōmasε, Jemse mwān awē Alfōse, Simōne mod á kán,

¹⁶ Judase, mwān awē Jemse ne Judas Iskariōde awē antīm Yesue asóm.

Yesue ayágté, achōṅté-ε ndun e mod

(Mat 4.23-25)

¹⁷ Dós bósbe bembapεε bésyógké á ekone sé, bépāg á hōm áde átánlé. Béntān bembapεε bēmpēe híin ne ndun e mod áhed. Ene ndun e mod embíd á mbwóg e Judeya-tē esyāál, á Jerusalem, káāṅne á myad mé Tirε ne Sidōn á nkin mé edīb é nkwé.

¹⁸ Bēmpē nē áwóg Yesue eche póle, ne ábel nén ádid bad ábe bēkonle bwám. Adidé'áá bad ábe edáádāṅj bé mbēb é'tágté'áá bōmpē bwám.

¹⁹ Mod téé áhedáá aá mós nsidén mós ngāne émbēē bán, ngīne ebidé'áá mós á yāl eché ebidé'áá bad bwám.

Mekan mé nnam ne mé medīm

(Mat 5.1-12)

²⁰ Héε ábóótédé ábē bembapεε akalēn aá,

"Nnam mībē ne nyé betóótōkē bé bad áyāle nyédé ásε e nkamlen ní Dyōb.

21 Nnam mbê ne nyé ábe nyéde nzaa bɔɔb, áyále Dyöb dékōdēd nyé.

Nnam mbê ne nyé ábe nyélebe bɔɔb áyále nyéwɔɔ.

22 Nnam mbê ne nyé nzé édé bán ngáne nyéhídeé Mwän-a-Moonyon, bad békóó nyé, bébáa nyé á yál, bésyáá nyé, béchage-’ε nyé mìn mé mbéb.

23 Nyéwóge bwám, nyébwεen amín nímé mbwε, áyále nsábe níme nyékudté ádyöb ríchábé amín. Melemlem nê dɔɔ besáá bé’ bɔɔd bɔmpé bésyáá’áá bekal bé’ dɔádɔn.

24 Bonj édé ngól ne nyé ábe nyéde nhon, áyále nyémaá echén ndε akud.

25 Edé ngól ne nyé ábe nyékódé bɔɔb, áyále pónde épé eché nyétaké nzaa.

Edé ngól ne nyé ábe nyéwɔɔ bɔɔb, áyále nyééléb, nyéchl-’ε.

26 Edé ngól ne nyé nzé moosyáál akémte nyé. Nê dɔɔ ábáb besáá békém-táá bekal bé’ dɔádɔn bé metóm.

Nyédɔn bad ábe békóó nyé

(Mat 5.38-48, 7.12a)

27 “Bonj nlanje nyé ábe nyéwóglan mε hén bɔɔb mεé, nyédɔn bad ábe béhεde nyé kəkɔɔ, nyébenle-’ε bad ábe békóó nyé mbonj.

28 Nyénamed bad ábe bésyán-tad nyé, nyékánnad-tε bad ábe bébele nyé nhel mé mekan.

29 Nzé mod abómé wε abén á akag, ékunnéd mó ádíníí ámpé. Nzé mod akóbné wε nímón nkobe, weebán-né mó ké echoj sôte.

30 Kénzée awé achómé wε chóm, beé mós. Mod ké ahée-’ε awé adumné wε bwém, weéhεdné mós bós ámbíd.

31 Kéchée éche édás wεé bad bébel áwón, ébel chó áwáb.

32 “Nzé nyédás bad ábe bédás nyé bēnpen, né mekanag méhéé nyékudté ne nê? Kásɔnne bebel bé mbéb bɔmpé bédás bad ábe bédás bós.

33 Nzé nyébele mbonj dás wεε bad ábe bébenle nyé mbonj bēnpen, né nsyán ríhéé nyékudté ne nê? Kásɔnne bebel bé mbéb bɔmpé bébele nê.

34 Nzé édé nén bán bad ábe nyélyágé nlém bán bɔmpé bēbál nyé bwém bēnpen bós nyébálee bwém, né nsyán ríhéé nyékudté ne nê. Ké bebel bé mbéb bēbálee baáb ngáne bēbí bán bɔmpé bēbál bēbál.

35 Bonj nyédɔn bad ábe béhεde nyé kəkɔɔ, nyébenle-’ε bós mbonj. Nyébálee-’ε bad bwém ésebán nyésine dyamdyam ámbíd e nê. Nê débél Dyöb ábe nyé nsábe níme ríchábé á mìn, nyéchagnéd-tε bán, bán bé Dyöb á Ngum. Nyébii-’ε bán, Dyöb áde ngól ne bad ábe béésagnán Dyöb, ne ábe bēbébé nlém.

36 Nyéwón nlém ní ngól melemlem ngáne awên Titée áwóó nlém ní ngól.

Nyaa eché bad bébidtée mbaku

(Mat 7.1-5)

37 “Nyéekáádté bad, bonj Dyöb dɔmpé déékáádté nyé. Nyéehóbé bad, bonj Dyöb dɔmpé dééhóbé nyé. Nyélagsan bad bonj Dyöb dɔmpé álagsan nyé.

38 Nyébage bad, bonj Dyöb dɔmpé ábage nyé. Akab áde nyékudté, békín dós, bépuméd-tε dós amín, kásɔn ásyogke, bonj bépémtéd nyé. Melemlem mé nhagtéd níme ébénlédé mós Dyöb dɔmpé débénlédte.”

39 Yesuε ankalé bós ngan aáken, “Mod awé akwedé ndim ahele alyágéd waáb mod a ndím-ε? Bós bad bébe bééhúnné ebíi-yε?”

40 Mwän-a-ayáge eetómée mod awé ayágte mós, bonj kénzée awé amadé ayáge áte, abelé abé ndágke eche awe meléede.

41 “Cheé ékás bonj éwámsán mwá píuted anyín á díd á wén, ésebán ehele nkog níme rídé emöj á díd anyín?”

42 Chán éhele-se eláá mwányon wεé, ‘Amúε, mwé, ríhúd wε mwá píuted á díd’, áde wéenyínε nkog níme rídé mmón á díd? A-bedog-bad! Sébé éhúd nkog níme rídé mmón á díd, dɔɔ wétón’ε píuted eché édé mwányon á díd anyín, bonj ehúd-tε chó.

A epum dós bécheméé bwel

(Mat 7.16-20, 12.33-35)

43 “Alín á bwel á bwám déebelée-se áchyáá e’pum bé mbéb. Alín á bwel dé mbéb-pe dééchyáá’ε e’pum é’ bwám.

44 A epum é bwel dós bécheméé alín á bwel. Ebyééné bwám bán, béépādεε ngun á yál e mbisanj káa besabé á yál e mewánj.

45 Mod á bwám abele bwám áyále é’bide mós á nlém-té wεε bwám ékónnéde. Mod á mbéb-pe abele mbéb áyále mbidé mós á nlém-té wεε mbéb nkónnéde. Edé nê áyále, mam níme ríloné mod á nlém-té, mós-áá mébide mós á nsál.

Belónj bé ndáb bébe

(Mat 7.24-27)

⁴⁶ “Chán nyé chagéé me pónde téé bán, ‘A-Sán, A-Sán,’ bon nyé ebēlē dyaam áde rílanḡeé nyé?
⁴⁷ Mod téé awē apedé áwem, awē awógé ábēm e’yale, bon ábelé-’e ngáne ríhóbeé, mēhagtén nyé nyaa e mod echē ákóó abé.

⁴⁸ Adé nēe nlon-á-ndáb, awē anlímé mekon mé ndáb se ásē, ásūmē ene ndáb eláá mfn. Edib énlōnē, éból mós á ndáb-te ne ngine, bon énkēnhēnlé chós apán, áyale ambíí chós alón.

⁴⁹ Bon kénzēé awé awóge ábēm e’yale bon eébele ngáne é’hóbeé adii nēngáne mod awé anlón ndáb ésebán asumme chós. Ade edib ébólé mós á ndáb-te, ene ndáb enkwē melemlém mé pónde, epáá-’e nyaa eche ekamé ahagtén.”

7

*Yesue achōḡtē mbāledē
 awē mod ambáá a sánze*

(Mat 8.5-13)

¹ Bad bésyāāl bēnwōḡ nímén mekan níme Yesue áhóbe’ áá. Ade ámáá mós ahóḡ, ankē á dyad á Kapenahum.

² A dyad-tē wē, mod ambáá a sánze é Roma ambé awē akamlan mbwókēl e sánze. Awē mbāledē nhóg awē ándangé ákónlé’ áá kósḡ áhedé awé.

³ Nēe ane mod ambáá a sánze áwógé Yesue dúu, anlóm belyáged bé dyad áá béchēnled mós Yesue, áhye áhood awē mbāledē.

⁴ Bépédé-’áá wēe Yesue, bon béchāā mós ne nlém nhóg bán, “Hyé éhébe ane mod. Adii mod awé atāngéné nímōḡ nhébe akud.

⁵ Adáá ádéd alon á bad, alóngé-’e syānē ndáb e mékáne.”

⁶ Yesue anwoón bō. Bon áde ákwógé ape á ndáb wēe ane mod ambáá a sánze, dōo mod ambáá a sánze ne álómé baáb wēe Yesue ámpē áá, béléá mós bán, “A-Sán, weetagtē we yāl, mmēn meékwognedéé ákob we nken áwēm ndáb.

⁷ Nén ábélé menkēnhēnlé ké ape áwōḡ e’só. Bon ké eyale chós wēnhōbpē, awēm mbāledē ádyéé bwām.

⁸ Mmēn ndii mod awé adé ásē e nkamlan, mmēn-ne nwóó sánze éche ríkamlanné. Nlāḡe póg méé, ‘Kág’, ékág-ke nē dēn. Nlāḡe empée méé ‘Hyág’, éhyág-ke nē dēn. Nzé nlāḡe awēm mbāledē méé, ‘Bēl échén’, ábelé-’e nē dēn.”

⁹ Ade Yesue áwógé nē, yāl enkóm mós áte. Héé ákúnné e’só wēe ehoḡ é bad éche éhídé’ áá mós, álāḡgé bō áá, “Ne mbále, nlāḡe nyé méé, meényinēē mod á alon á Israel ké nhóg awé awóó nyaa e adúbe echē anén nken-e-mod áwóó.”

¹⁰ Atim áde bad ábe bēnlómme bétímé ámbíd á ndáb, bēntān nēngáne ane mbāledē ámáá bwām adyēe.

Yesue apuúdtē nkúd a mmwáád mwān

¹¹ Eebemé áte* Yesue ankē á dyad áde béchagéé bán Nain. Abē bembapēe bémbē ne mós ne ehoḡ é bad.

¹² Ade ápédé benben ne mmwē rí dyad, bad bémbídēn ndim ní mod níme mémbē mpōm ní mwān níme nyaá. Nyaá abédé nkúd a mmwáád. Ndun e mod echē embíd á dyad-tē, embé ne mós.

¹³ Ade Sāḡgú Yesue ányiné ane mmwáád, ankóbtén mós etyāg. Dōo álāḡgéé mós áá, “Lénéd awé!”

¹⁴ Ansídé á’só, ásitén mekále níme bēmpēmē ndim ní mod ántn. Bepém bēntyéem. Héé áhóbeé áá, “A-kódemod, nlāḡe we nén méé, syáá ásē.”

¹⁵ Dōo ane kódemod echē anwé ésyāḡgé ásē, bon ébootáád dyaam ahóḡ. Héé Yesue ábágé mós wēe nyaá.

¹⁶ Mbwōḡ ménkōb moosyāál, békēmtē Dyōb bán, “Nkal é’ dáōdāḡ ambáá abídé áwēd tntē,” béhōbē-’e bán “Dyōb ápífidé ábē bad!”

¹⁷ Mmēn nkalan tāḡgane Yesue ménwōḡnēd mbwōḡ e Judeya áte esyāál ne meloḡ níme médé benben.

*Jōne, Ndusene alómé ábē bembapēe wēe Yesue
 (Mat 11.2-19)*

¹⁸ Bembapēe ábe Jōne bōmpē bēnwōḡ nímén mam. Héé békíí mós aláa.

¹⁹ Dōo átédé bébe, álómé bō wēe Yesue, áá bésēded mós nén bán, “Wē-éé edé ane awé Dyōb áhóbeé áá mósólóm-ε, ngé sébē sésine’ mod ampée?”

²⁰ Abē bad bépédé-’áá wēe Yesue, bēlāḡgē mós bán, “Jōne, Ndusene alómé sé áwōḡ aáken, ‘Wē-éé edé ane awé Dyōb áhóbeé áá mósólóm-ε, ngé sébē sésine’ mod ampée?” ”

* 7:11 Eebemé áte: Donḡe á kálag dé’só éwóó: Nēe bñn é’sāḡgē.

²¹ Póndé eche bépédé áhed nê, adidé'áá ekud é bad bwám ábe betágnáá nkole nyaa ne nyaa, ábe bènkwè modim ne bad ábe e'dáádəŋ bé mbéb é'bedé áte. Ambəl bad híin ábe bènkwè ndim bényínne'.

²² Héé átímtanné Jone ábē bembapεε áá, "Nyétime' ámbíd, nyéke nyélaá Jone mekan míme nyényinné did ne míme nyéwógé. Nyélaá mó bán, bad ábe bènkwè ndim bényínne', ábe bésyágté'áá békag bwám, ábe meləŋ ménkəbpe bésáá.† Abe bènkwè ndóg béwógne', ábe bənkwè, bépuude', nkaləŋ mí bwám-me ámpē ríkaltē' wée betóótəkē bé bad.

²³ Nnam mbē-ε ne kénzée awé eéħəŋlene nlém á abum tənġene me."

Yesue aləŋgē bad nyaa e mod echē Jone ddii

²⁴ Ade mészénze míme Jone mímaá atim ámbíd, Yesue ambootéd ndun e mod echē embé áhed akale tənġene Jone. Ansedéd bó aaken "Póndé echē nyémbídtē áke dé atán Jone á ehyaŋge, cheé nyéwəmtənné bán nyéenyín? Apab á chyaá áde epub eságtē-ye?"

²⁵ Cheé nyénkéé anəŋ? Mod awé ahédé kəse é mesəŋ-ε? Nyébíi nén bán, bad ábe bəwáá' kəse é mesəŋ, boŋ betəgné-ε yəl, bédyεε dásá á ndáb é kəŋ.

²⁶ Cheé-ə nyénkéé anyín? Nkal é d'áádəŋ móo nyénkéé anyín-ε? Nê dēn! Ne mbále, nləŋge nyé mée, nyényinné mod awé atómé nkal é d'áádəŋ.

²⁷ Jone mó adé ane awé béhóbé'áá áde bételé e'yale ábe Dyəb áhóbé áá, 'Nəné', nlóme mímēm mészénze míme mészēbe wé á'sə, áboŋsən wε nzii.'

²⁸ A mbále mod ké nhóg awé abidé á abum dé mmwáád eetóméé Jone. Boŋ ké nê, mod awé adé ndimten áttnté e bad ábe bédé á nkamlən ní Dyəb, adé etógnén tómaa Jone."

²⁹ (Bad bésyáəl ábe bənwoŋ chóm eche Yesue áhóbé, kəŋne besaad bé tááse bènkwəntən bán ntíi ní Dyəb rítəŋgéné, áyale bènkwè edusen eche Jone.

³⁰ Boŋ Befarisia ne bemeléede bé mbéndé bənchím yəl kəŋne ntíi ní Dyəb áyale bəmbəŋ edusen eche Jone akob.)

³¹ Yesue ambád áhób aaken, "Cheé méħəgtənné nyonġel é bad e'chii? Chán bən békóó abé?"

³² Bédii nēŋgáne bēndem ábe bédyéé á dyad-tē, boŋ bələbpe nhóg ne aníní bán, 'Sétóŋgē nyé e'loŋ, boŋ nyéeságéé.

Sékónné nyé nkəŋgé ní kwééd, boŋ ké nê nyéechyē' é awé.'

³³ Ade Jone, Ndušené ápédé, eéyake'áá ndyééd adyé, eemwáge'áá-ε mím. Nyébootéd áhób bán, 'Edáádəŋ é mbéb édé mó áte!'

³⁴ Mwán-a-Moonyon apedé, ádyag ndyééd, á mwāg-ke mím, nyéhəbē bán, 'Nyénóné mó, adáá ndyééd bwámbwam. Mmwé míme nġén, awonġne belad bé tááse ne bebel bé mbéb.'

³⁵ Boŋ kəŋn ne á asóg, mod tēé awé abíi dyam abelé áhób áá, nzii e Dyəb etəŋgéné."

Mmwáád awé belágséné mbéb

³⁶ Farisia nhóg anlébé Yesue áá ahyé ádyé ndyééd áwe ndáb. Ade ápédé áwed, andyéé áse, ádyé ndyééd.

³⁷ Mmwáád nhóg mó-ε abédé á dyad-tē wé, awé abédé mbelé-mbéb. Awóg áde áwógé bán Yesue adyag ndyééd á ndáb e Farisia, ampéén apom á dyəŋ dé elod é bwám áhed.

³⁸ Anyogén áse bənben ne mekuu míme Yesue, ábootéd achii, ásobtē' mó mekuu ne mészə. Ampíné mó mekuu ne échē esid é nló, ámwáá mó mekuu álumed edúbé, anyónlé-ε mó mekuu ne áde dyəŋ dé elod é bwám.

³⁹ Anyín áde ane Farisia ányíné nê, anhób áwe nlém-tē áá, "Nzé nkal é d'áádəŋ móo anén mod ánkəŋgé abé, né abagé'áá abíe' nyaa e mmwáád eche anén mmwáád awé akidtan mó ádíi ne abé áde áwóó, né abíi-ε nén ané anén mmwáád aníi mbelé-mbéb."

⁴⁰ Héé Yesue áləŋgēé mó nén áá, "A-Siməŋ ndáə wε mwā póle aláa." Farisia ne ankwəntən áá, "A-meléed, cheé édé? Kəg á'sə, élaa me."

⁴¹ Dóo Yesue áhóbéé áá, "Mod nhóg abédé awé abalé'áá bad ngáb. Ane mod akalé'áá bad bēbe melum. Akalé'áá nhóg móom mé e'kálé métaan, aníní-ε e'kálé étáan.

⁴² Bó modmod bənkenhenlé atuε. Né-əo anləgsén bó mod tēé áde álum. Bəəb-pəə, áyale bó bad bēbe, nzé-módé édúbpé wéé áttəmtən mó adəŋ?"

⁴³ Siməne antimtən mó áá, "Ndúbpé mée, ane awé álum déntəmtənné achab ámín." Dóo Yesue áhóbéé áá, "Etəŋgéné."

⁴⁴ Dóo ákunneé wéé ane mmwáád, boŋ áləŋgē Siməne áá, "Enyíne anén mmwáád-ε? Ade rísólé áwəŋ ndáb, wenkəmbaá me mendíb wéé ríwobned mekuu. Boŋ anén mmwáád asəŋtē me mekuu ne míme mészə, apíné-ε mó ne échē esid.‡

⁴⁵ Wenkənháá me təl, boŋ taa mészəl hén, eésógéé me mekuu anyəle.

† 7:22 **Asaad a yəl:** Nzé meləŋ ménkəb mod bételé'áá mó nēε mod awé eesáa. Bébéné'áá mó bán eesíté wéε bad bédii. ‡ 7:44 A mbwóg e bad bé Israel, nzé mod akobé'áá mod nken, antəŋgén mó mendíb abe áwobe mekuu, áhé mó təl, awógéd-tē mó dyəŋ á nló.

⁴⁶ Wenkēnwógédte me dyōg á nló ákob me nken, bon awógté me dyōg dé elod é bwám á mekuu.

⁴⁷ Edanġe é ngíne éche anén mmwaád álúmté, édé nhəgtén ne alagsen áde ákúde áyāle ekud é mekan mé mbéb éche ábélé. Mod-te awé béebudéé mbéb alagsen, eébudéé edanġe álúmed.”

⁴⁸ Héé Yesue álánġeé mmwaád ne aá, “Ekudé alagsen dé mbéb áyāle mbéb nímōn rísyāl.”

⁴⁹ Bad ábe bóbōó bédýágé’áá ndyéed bénsedéd yāl bánken, “Ebál é mod éhéé chén éche éwóó kōġne kunze alagsen mbéb?”

⁵⁰ Yesue anláá mmwaád ne aá, “Adúbe áde éwóó áchōġté wé, kăġ ne nsaġ.”

8

Nguse é bebaád éhide Yesue

¹ Ambíd e nē Yesue ambootéd ake myad ne myad, mémbáá ne mésad. Akagé’áá, ákalé’ nkalaní mī bwám mé nkamlen ní Dyōb. Akééné’áá ábē bembapēē dyóm-ne-bébe.

² Bebaád ábe e’daśdanġe mé mbéb bémbēē áte ne ábe békónlél’áá nkole mémpēē, bon áchōōd bó, bōmpē bémbē á echonġ. Ábē bebaád bébédéē, Maria mmwaád a dyad á Matala awé ánhúdté e’daśdanġe mé mbéb saámbé á yāl,

³ Joanaa, mmwaád awe Kusa, mod awé abédé nló áyāle bembaledé ábe Herōde, Susanaa ne ekud é bebaád bēmpēē. Ábē bebaád bébēnládtáá ábab bwēm bēn, bétōġnán Yesue ne ábē bembapēē.

Ngan e mbál-e-bū

(Mat 13.1-9; Mak 4.1-9)

⁴ Ekud é bad émbíd dyad ne dyad téé áhye dé anyín Yesue. Áde beládné áte nē bōōb, ankalé bó ngan nén aá,

⁵ “Nkwel-é-nzag nhōġ ankē mbál asob á nzag-té. Ade ásobéé mó nē, donġe dénhūn á nzii-té, betóm bé nzii bēmad mó akōġted ámn, menōn mōmpē mémad mó asōmted. ⁶ Donġe dé mbál dénhūn á eláá mín. Mmē ménkōb, bon ménhyēlē áde méepedéé akwog, ngáne édīf bán ndōōb e eláá mín eékoġgéé mendīb.

⁷ Donġe ámpē dénhūn wéē mekōd médíí. Néē bōōbōó békwoġē, mekōd ménkāj ábē bwēm.

⁸ Mbál mémpēē méntān ndōōb e bwám. Ménkwōġ, ríchyáá’-é bwāmbwam. Donġe dé e’śōġ dénwālē mbwókēl é mbum.” Ade Yesue ámadé nē, ambád áte aá, “Kéenzéé awé awóó metúu áwōge’.”

Chōm éche ékōó bon Yesue dkalé’ ngan

(Mat 13.10-17; Mak 4.10-12)

⁹ Ambíd e pōndé, Yesue ábē bembapēē bēnlāá mó bán, átōġned bó ene ngan.

¹⁰ Héé álánġeé bó nēn aá, “Dyōb ábágé nyé kunze ábíi kun é nkamlen ní Dyōb. Bon bad ábe bēlyágé áse, bēwōġ chō nēē ngan ábel nén, bényíne’, bon bēecheméé, bēwōge’, bon bēēsōġtānnē.

Yesue atōġké ngan e nwén-é-mbál

(Mat 13.18-23; Mak 4.13-20)

¹¹ “Bōōb-pōó, rítōġned nyé ene ngan. Mbál rídii Eyale é Dyōb.

¹² Mbál níme ménhūn á nzii-té rílúmte bad ábe bēwōge eyale é Dyōb, bon ámbíd e pōndé Devale áhye ahúd bó chō á nlém-té, ábel nén bēédūbpē Dyōb se bēkūd e’soōsoġ.

¹³ Mbál níme ríhúné á meláá-té rílúmte bad ábe, nzé bēwōge Eyale é Dyōb, békobe chō ne menyínġe, bon éché eyale eēwēnnádté bó á nlém-té. Bédūbpe Dyōb á esōġ é pōndé bon á pōndé é mekōġsen bédol yāl ámbíd.

¹⁴ Mbál níme ríhúné á mekōd-te, rílúmte bad ábe bēwōge Eyale é Dyōb, bon kōśġ ne á asōġ, mpúlé mé nkōġsé, abud á bwēm awōġ, ne menyínġe mé nkōġsé ríkāj bó nlém áte. Nē ákəá’, bēeheléé kəse é e’pum achýáa.

¹⁵ Mbál níme mó’-é méntān kəse e ndōōb, rílúmte bad ábe bēwōge Eyale é Dyōb ne nlém rísyāl, békōō’-é chō á nlém-té. Nē ábele’ bēwesān kōśġ béchyáá e’pum.

Nzé bēchódé etrukāj, bēekoġgéé chō

(Mat 4.21-25)

¹⁶ “Modmod eémāā’-é etrukāj achod se ákōō chō á ebwōġ-sé, káa atíbéd chō á anōġ sé. Ábelé ákēlē chō dāsō ámn, ábel bon kénzéé awé asóle á ndáb, ányíne ekíde.

¹⁷ Dyam téé áde áde á e’koġnéd-te dēbíđ á nhéné. Kéchéé’-é éche énsōóm á e’koġnéđ ébyēen, ébíđ-te á enyēn.

¹⁸ Né-òs, nyétéd póndé ngáne nyéwóglanné. Kénzée awé awóó nsòhṭen ní kun é nkamlen mí mín, Dyòb débad móm nímé nsòhṭen abe. Ane awé mò-ε eewóo, àbàd ké éche áwémṭéné áá mówòò.”

Tumbé eche Yesue

(Mat 12.46-50; Mak 3.31-35)

¹⁹ Bòòb-pòò, áde Yesue nyaá ne baányar béhyédé mó anyín, bénkènhenlé mó ape benben, áyàle etál éébèdèé ngáne ndun e mod ènlàhṭédṭé mó.

²⁰ Dòò bad béléngéé mó bán, “Pón nyoo bòòbe baányar bétyéémé á ebwóg, béhede-ε we anyín.”

²¹ Héε Yesue átimtanné bó nén aá, “Bad ábe béwóge eyale é Dyòb, bébélé-ε ngáne éché eyale éhòbéé, bóò bédé awem nyaá ne àbèm baányar.”

Yesue ahóódté ekukud

(Mat 8.23-27; Mak 4.35-41)

²² Mbwe nhóg Yesue ansól á bôle-té ne àbè bembapεε, aláá bó aá, “Syáá déchabe pεd e edib eníní.” Dòò bébwógké eke.

²³ A eke-té wé, e'chó bénkòb Yesue. Hé dòò ekukud étané bó áttinté e edib. Mendib ménsál bó á bôle-té kóòh, mam mébéén bó ebébtéd.

²⁴ Héε békíí Yesue anyem ásè boṅ béléngé mó bán, “A-Sán, a-Sán, pón syáné dewág-òò!” Dòò anyémmé ásè, ákanné ekukud éched áte, éhóò-ε. Edib éche éhódé'áá áte chómpé énsóg ahod.

²⁵ Dòò áseṭṭéé bó aáken, “Néde nyéedúbpéé me-ye?” Nén dénkòbéd bó mbwóg, yál-le enkóm bó áte bwámbwam béseṭṭéé nhóg ne aníní bánken, “Ebál é mod éhéé chén, éche ékamlan kóòhne ekukud ne mendib, kóòh béwógne-ε mó?”

Yesue achòhṭé mod a Gerasin

awé e'dáòdaj bé mbéb bémbéé áte

(Mat 8.28-34; Mak 5.1-20)

²⁶ Yesue ne àbè bembapεε bènchabé edib, bootya á Galilia, bépé á múde níminí, á mbwóg e Gerasin.*

²⁷ Áde ábidé á nkin ambomén mod a dyad nhóg awé e'dáòdaj bé mbéb bémbéé áte. Ebédé etún é póndé áde ane mod éeháge'aá mbóté. Eédyεε'aá ké á ndáb-te, nzése á soòbade.

²⁸ Anyín áde anyíné Yesue, ankwé mó á mekuu ne esaád á nsál, ábòné aá, “A-Yesu, Mwán a Dyòb á Ngum, cheé sóo déwóhne? Són, weekógsán me.”

²⁹ Né démbé áde Yesue ámaá e'dáòdaj bé mbéb akamlen aá, é'bid mó áte. Ngen ne ngen, nzé e'dáòdaj bé mbéb bénsál mó áte, ké á mehangé dòò ámbéé, apádtádtáá bengobéngòbè ábe béhédé mó á mekuu ne mekáá, boṅ edáòdaj é mbéb ékeene mó á ehyánge.

³⁰ Yesue ansedéd mó aáken, “Chán dín ádíí we?” Ankwentén aá, “Amuteε.” Anhób nēngáne e'dáòdaj bé mbéb híin bénsónlé mó áte.

³¹ E'dáòdaj bé mbéb ábed é'cháá'aá Yesue bán, eehúnté bó á echóg éché éewóo asóg,†

³² Esóg é nguu ebédé áhed édyag medyé á mbám mé ekone. Dòò àbè e'dáòdaj é'cháá'ε Yesue bán áteṭe bésál ké á esóg é nguu-té. Dòò Yesue ábágé bó kunze.

³³ Abíd áde e'dáòdaj bé mbéb bē é'bidé ane mod áte, bénsál éché nguu áte. Dòò nguu éwúbpé ásé, ényagté' á e'láá bé nkin mé edib, éhún á edib-té, éhó-ε.

³⁴ Áde benon bé nguu bényíné nē, béntòm mehéle, békag békanklé bad nkalan á dyad-té ne á mebwóg níme médé benben.

³⁵ Awóg áde bad béwóge-'aá nē, bébwóge-ε ásé áke dényín dyam áde ábénléde. Bépéde-'aá wéε Yesue ámbéé, bényin ane mod awé ánhúdté e'dáòdaj bé mbéb áte ngáne ádyéé mó á akéh, ahédé mbóté á yál, ádyεε-ε bwám. Dòò mbwóg nkòbé bó.

³⁶ Bad ábe bényinēn díd bēnkálé bó ngáne Yesue áchòhṭé ane mod.

³⁷ Héε bad bé mbwóg e Gerasin béléngé Yesue bán ásyəə áwáb ndòòb, áyàle mbwóg ní ngine ménkòb bó. Dòò ásólé mó á bôle-té, boṅ ásuē'.

³⁸ Mod awé bēnhúdté e'dáòdaj bé mbéb áte ancháj mó aá búmò békag, boṅ Yesue antiméd mó ámbíd aá,

³⁹ “Timé' áwón dyad, éke ékanle bad ndále a dyam éché Dyòb ábénlé we.” Ane mod ansú á dyad, ákag, ákanle mod téé dyam áde Yesue ábénlé mó.

Yesue apuidté ngòndéε póg

áchòòd-te mmwaad ampée

(Mat 1.18-25)

* **8:26 Gerasin:** Donge á kálag dé'só áwóó *Gadara*, émpéε-ε éwóó *Gegesa*. † **8:31 Ebii:** Mewēmten mémbē bad bán e'dáòdaj bé mbéb bēbē á mbwóg á ndib e ebíí kóòh né echab póndé e nkógsen epedé.

⁴⁰ Ade Yesue áhúú, ndun e mod enhyē mó aságnen ne menyiŋge ngáne émbēē bán bésiné'áá mó.

⁴¹ Héē mod nhóg awē béchógé'áá bán Jairuse ápédé awē. Jairuse abédé nhóg átínté benkamlenē á ndáb e mekáne. Ankwe Yesue á mekuu, ácháā mó áá, áhye áwe ndáb. Áá

⁴² míme mpòm ní mwán a mmwáád ríhede awē.

Ade Yesue ákagké áwed, bad bēnləŋnéd mó.

⁴³ Mmwáád nhóg ambé áhed awē akónlé'áá nkole míme mekií mébidé'áá mó á yál póndé ésyāēl. Mmē nkole níbéde mó á yál á etún é dyóm-a-mwē ne níbe ésebán modmod ahele mó bwám adid.‡

⁴⁴ Héē ábidé Yesue ámbíd, bonj ásitén Yesue mesó mé nkobe míme ánwā'é. Abwōg-ábwōg mekií ménsōg mó abíd á yál.

⁴⁵ Dóo Yesue ásedteé aáken, “Nzé-módé asidténe me?” Modmod enkēnkwenténné. Dóo Petro áhóbéé áá, “A-Sán, ngómē ndun e mod eləŋnéde we, kóŋh békəŋnéé-é we.”

⁴⁶ Bonj ké nē Yesue anhób áá, “Mod akidténe me, áyāle nwógé ngáne ngíne ebídé me á yál.”

⁴⁷ Ade ane mmwáád ányiné nē bōōb áá móshelēé yál akoo, ámbíd Yesue á'so. Anáó'áá ne mbwōg. Ankwe mó á mekuu. Héē áhóbéé á'so wēē bad bésyāēl chóm éche ékáá bonj ásitén mó, ne ngáne módyéé bwám melemlem mé póndé.

⁴⁸ Dóo Yesue áhóbéé áá, “A-mwán-a-mmwáád, adúbe ádōŋ ádíde we bwám. Kág ne nsan.”

⁴⁹ A póndé eche Yesue áhóbéé nē, dóo mod awē bélómé wēē Jairuse ápédé bonj áhóbē nēn áá, “Weétəgné we Meléede ataged. Awonj mwán amaá mó awē.”

⁵⁰ Yesue awógé-áá nē, bonj áləŋgē Jairuse áá, “Weewógé mbwōg! Dúbé dúbpen, né mwán ádyéé we bwám.”

⁵¹ Ade Yesue ápédé wēē Jairuse áwe ndáb, enkēnháá etəl áá, mod ampée áhíd mó á ndáb-te éetóméé Petro, Jōne ne Jemse, nchoo ne ane mwán sáá bō nyanj.

⁵² Bad béchyé'áá, bélebé'-e. Yesue anláá bō nēn áá, “Nyéechyē". Ane mwán eewédeé, akúne kúnén.”

⁵³ Bad bēmbóoté mó awōō, ngáne bēmbí'é bán amaá awē.

⁵⁴ Héē Yesue áchəŋgé mó ekáá, bonj áchəgé mó áá, “A-mwán, páde áse.”

⁵⁵ Dóo edáədəŋ étímé mó á yál, apádé'-e áse ábwōg-ábwōg. Yesue anláá bō áá, bébe mó ndyééd, ádyé.

⁵⁶ Yál enkóm nyaá bō sán áte bwámbwam, bonj Yesue anláá bō áá, béekanlé modmod dyam áde ábénléde.

9

Yesue alómé bembapēe dyóm-ne-bébe

(Mat 10.5-15; Mak 6.7-13)

¹ Yesue anchélé ábē bembapēe dyóm ne bébe abwōg ahóg. Ambag bō ngíne ne kunze áhúd bad e'dáədəŋ bé mbéb áte, ne ámad nkole nyaa ne nyaa.

² Anlóm bō áá, béke békale nkalanj mé nkamlen ní Dyōb, béchonje'-e bad.

³ Dóo áləŋgéé bō nēn áá, “Nyéewánlé chómchóm á eke, ké ntónj, ké ekwe, ké ndyééd káa ngáb, modmod eewánlé'-e mbóté ébe.

⁴ Ndáb ké ehéé echē nyésólé áte, nyédyee áwed-te kóŋh ne mbwe míme nyésyənŋgé.

⁵ Dyad ké áhéé'-e áde béekobéé nyé nken, nyétéde dó, nyékūd-te ebumbú á mekuu álúmed nēn bán échab ebébtéd énoone bēn.”

⁶ Héē bembapēe bébwōgké áse, békəg dyad ne dyad téé, békale nkalanj mí bwám, bédidé'-e bad bwám hóm ne hóm téé.

Herode atage áte

(Mat 14.1-12; Mak 6.14-29)

⁷ Bōōb-pōō Herode awē akamlánáá alonj á Galilia anwóg mam mésyāēl míme mēmbenléd. Mewēmtēn métágé'áá mó áte áyāle bad behóg béhóbé'áá bán, Jōne apuúde,

⁸ ábiníí bán, Elaijaa atimé ámbíd á nkōŋsé, bēmpēe'-e bán, nkal é'dáədəŋ nhóg a bōōd mó atimé ámbíd á alongé.

⁹ Herode anhób áá, “Mēmbel bésēl Jōne nló. Nzéé ampée níwógéé bán abele míme mekan?” Nē dēmbēl ádəŋ áá mónyín ane Yesue.

Yesue adidté ndun e mod

(Mat 14.13-21; Mak 6.30-44; Jōn 6.1-14)

¹⁰ Ade bembapēe bé nlómag béhúú ámbíd, bēnlāá Yesue mam míme bēbéle. Héē átédéé bō bonj átimné bō á ahəŋgé á hóm á dyad á Betsaida.

‡ 8:43 Donje á kálag dé'só ébádé bán: *Ammad chóm ésyāēl éche ánwōngē abébed wēē bad bé mel.*

¹¹ Ade amute á bad áwógé nê, dénhîd mós áwed, kóáñ bétán mós. Ankob bós bwâm, akanlé bós pôle e nkamlen ní Dyöb, áchonté-é bad ábe behédé'áá bwâm adyee.

¹² Ade ngukél épédé dós bembapæe belânge Yesue bán, "Chené ábén bad, bétime' á myad-tê nîme médé benben, ábel behéd ndyééd ne hóm áde bénaá'ê. Ndyééd eésaa hén, e'nonj-é béesaá wée dedíí nén."

¹³ Héé Yesue álângeé bembapæe aá, "Nyé bós nyébe bós chóm éche bédyee." Dós behóbeé bán, "Séwóó e'wêlé é'táan ne súu ébe. Ene ndyééd eéheléé bad bésyáál akwog."

¹⁴ Mesonggé mé bad ábe bebédé áhed mémbe e'kálé é'táan. Bon Yesue anláá ábè bembapæe aá, "Nyélad bad áte, nyékab bós bon akab téé ábè móom mé bad métaan."

¹⁵ Bénkáb bad áte ngáne ánhóbpè.

¹⁶ Héé Yesue átédé ábè e'wêlé é'táan ne éché súu ébe, ákabé áte, áságnān Dyöb bon ábagé bembapæe aá békabpe bad.

¹⁷ Bad bésyáál bényé, békód-te kóáñ ene ndyééd élyāg ásè, eche beládé áte e'lón dyóm ne é'be.

Nzé-módé Yesue mwèn akós abé?

(Mat 16.13-28; Mak 8.27-9.1)

¹⁸ Mbwe nhóg Yesue anchíb yál áke dé akáne. Bembapæe bēnpēn bós bēmbē áhed. Ansédéd bós aáken, "Nzé-módé bad bós behóbeé bán ndé?"

¹⁹ Bēntimtén mós bán, "Donge á bad behóbe bán, edii Jonē Ndusene. Donge áhóbē bán, Elaijaa, bēmpēe bán, nkal é'dáádāñ a'boód atimé ámbid á alongé."

²⁰ Dós Yesue áhóbéé aá, "Bon nyébēn-ne, nzé-módé nyéhóbeé bán ndé?" Dós Petro áhóbéé aá, "Edii Ane Awé Dyöb Awógté."

²¹ Héé ásíméé bós etúu áte, álāngē-é bós aá béepanlé áte.

²² Ambád aá, "Mwān-a-Moonyon atāngéné ákūd metake hīin, bad bēmbáá bósbe beprise bēmbáá ne bemeléde bé mbéndé bēbāñ-é mós á yāl. Bēwū mós, bon e'pun ábe é'lónténé é'láán, ápuú."

²³ Anláá moosyáál áhed aá, "Kéznéé awé adəə me ahíd ásob yāl mendib, ápēm áde awog mbwe téé, bon áhíde me.

²⁴ Ayāle kéznéé awé ahēde áde alongé ason, ábōd dós. Kéznéé-é awé abódé áde alongé áyāl echēm, ákūd alongé áde déemaá'.

²⁵ Nsyáñ nhéé mod ákúdté nzé akudé nkōñsé nsyáál bon abós, ké'é abódé échē edəədāñ.

²⁶ Kéznéé awé ákwāgēn me ne ábēm e'yale, Mwān-a-Moonyon mómpē ákwāgēn mós á pónde échē ápéé ne ehúmé échē, nédē ehúmé é Sāñ ne ángel échē esáá.

²⁷ Bon á mbále, baahóg bédé nló ámīn bōob, béenyínénné kwééd díd, áde béesēbpeé nkamlen ní Dyöb anyin."

Yāl ehāñléé Yesue

(Mat 17.1-8; Mak 9.2-8)

²⁸ Nēé émadé ké e'pun waam, áde Yesue ámáá ahób nē, ankeén Petro bós Jon ne Jemse á ekone mīn ákáne.

²⁹ Ade ákánneé nē, e'só bēnhāñlén mós á nló, nkobe nīmé mós-é nípúbé féréd, nīmwaá-é áte.

³⁰⁻³¹ Abwōg-ábwōg bad bébe, Mosēe ne Elaijaa, bēmbíden ehúmé é ngum, bébootéd mós akalēn. Békálé'áá ngáne álōnēdtē ntii ní Dyöb tāngene kwééd eche áwēé á Jerusalem.

³² E'chó bēnlōn Petro ne baáb á díd. Ade békábnédé bényīn ehúmé échē ne bad bébe áhed.

³³ Ade ábè bad bébe bétēdtéé Yesue, dós Petro álāngéé mós aá, "A-Sāñ, ébóó ngáne syáá dedíí hén. Délōñ e'bem é'láán, échōñ, éche Mosēe ne éche Elaijaa." Anhób nē ésebán abíí chóm éche áhóbéé.

³⁴ Éepedéé ké amad á nsal, bon mbag ébid, ékúdtén bós. Nén dénkōbēd bós mbwóg.

³⁵ Héé bēwógé ehób ébide á mbag-tē nén, "Mwān awēm mós nén. Mós nípwédé. Nyéwógne mós."

³⁶ Emáá-áá ahób nē dós bényīné Yesue mwēnpēn. Bēnkóó ádén akan ésebán bēkanle modmod dós.

Yesue achōñté kódēmod

eché edəədāñ é mbéb émbēé áte

(Mat 17.14-18; Mak 9.14-27)

³⁷ Ade bīn é'sānggé, Yesue bósbe bembapæe bēnsūd á ekone-sé. Ndun e mod ehye mós abomen.

³⁸ Héé mod nhóg á echon é bad-té wé álēbpeé mós aá, "A-meléed, sōn, ncháa' wē meé, éñon awem mwān á díd. Adii me mpom ní mwān.

³⁹ Edǎǎdǎŋ é mbéb étagte mós. Nzé échǎŋgé-'é mós, abelé abón esaád, ahún ásē, ánuádé kǎŋ mehod mébidē mós á nsal. Elédte mós achene, né émáá mós yǎl ached áte.

⁴⁰ Mempéén mós wéé ábōŋ bembapere, nchán bó mǎé, bébided mós edǎǎdǎŋ é mbéb chē áte, boŋ béeheléé."

⁴¹ Dóo Yesue átimtanné aá, "Wáá, nyé bad bē' chii, mbeléd mímēn méétyeeméé, nyéewóó-áa adúbe. Chán mǎpéé nyé adyēen boŋ nyédúbé mé? Hyēné awoŋ mwǎn hén."

⁴² Ade ane mwǎn áhúé' é nē, edǎǎdǎŋ é mbéb éched émpii ane mwǎn, ébom mós ásē, ánuádé. Dóo Yesue ákǎnné éché edǎǎdǎŋ é mbéb áte, átid ane mwǎn bwám, ábǎg-ke mós wéé sáá.

⁴³ Menyáké ménkób moosyǎl, ányín ndǎle a akan awē Dyōb ábélé.

Yesue akǎnlé eche kwééd ngan ámpē

(Mat 17.22-23; Mak 9.30-32)

Ade bad bélyágé bényágéé nē, áyǎle chōm éche ébénlédé, Yesue anlǎá bembapere nén aá,

⁴⁴ "Nyésōŋtēn dyam áde níhedeé nyé aláa bwám. Bébé Mwǎn-a-Moonyoŋ á mekáá mé baányoŋ."

⁴⁵ Boŋ ábē bembapere béenkēnsōŋtēnné chōm éche ánhōbpē. Embē néē ngan echē elélé bó atoge, bébáá'áá-'é mós asēded.

Nzéé atómténé mod

ambáá abé á'sō é' Dyōb?

(Mat 18.1-5; Mak 9.33-37)

⁴⁶ Bembapere bēmbootéd aswanŋten tǎŋgene mod awē atómténé mod ambáá abé áwab tǎnté.

⁴⁷ Yesue anchēm bó mewēmten áte. Antéd mwǎmpín ní mwēndem, ápēēn mós áwe akéb.

⁴⁸ Dóo álanŋgéé bó nén aá, "Kénzéé awē akobé anén mwǎn á dín ádēm, né akobé mē. Kénzéé-'é awē akobé mē, né akobé ane awē alómé mē. Né-óó, ane awē adé mwǎmpín áwen tǎnté, né mós atómé mod ambáá abé."

Mod awē adé awōŋ

(Mak 9.38-40)

⁴⁹ Jōne anhób aá, "A-Sǎŋ, sēnyín mod abídte bad e'dǎǎdǎŋ bé mbéb áte á dín ádōŋ, sēnlǎá-'é mós bán ásóg abel nē, áyǎle eésáá ne syánē."

⁵⁰ Dóo Yesue álanŋgéé bó aá, "Nyéelánŋgéé mós bán ásóg abel nē. Kénzéé awē eetǎŋgán syánē né adé ne syánē."

Bébdá Yesue nken akob

⁵¹ Bōob-póó, pónde eche Yesue ántǎŋgēnné ake ádyōb embootéd ape. Né-óó, ammad atíi aá, móstǎŋgēnē ake á Jerusalem.

⁵² Hé-'áá álómé mésēnze á'sō. Ménkē á mwá dyad a Samaria nhóg, ábele mós mboŋsén.

⁵³ Boŋ áde ápedé áwed bad bé dyad bénkēnkobpé mós nken áyǎle á Jerusalem dóo ákágé'áá.*

⁵⁴ Ade bembapere, Jemse bó Jōn bényíné nē, dóo bésédte Yesue bánken, "A-Sǎŋ, edǎǎ wéé séchéle muú ádyōb, níhye níhyáad bó-ye?"†

⁵⁵ Boŋ Yesue ankuné áwáb, ákǎnné bó áte.‡

⁵⁶ Héé bóbōó békíí á dyad démpēe.

Bad ábe bēmpon Yesue áhid

(Mat 8.19-22)

⁵⁷ Ade békágké nē, mod nhóg anlǎá Yesue aá, "Mēhíd we kéhéé áde ékagké."

⁵⁸ Dóo Yesue átimtanné mós aá, "E'bubwóg é'wóó ábab e'lóm wéé bésǎléé, menon-ne ámpē méwóó nímbab mūm, boŋ Mwǎn-a-Moonyoŋ eewóó' é hōm áde ábanneé nló."

⁵⁹ Yesue anlǎá mod ampée aá, "Hyǎg, éhíde mē." Boŋ ane mod antimtén mós aá, "A-Sǎŋ, mwě, nísebe níke nílime echem sǎŋ."

⁶⁰ Yesue anlǎá mós aá, "Mwě ndim nílime nímbab ndim ní bad. Boŋ we, éhadne bán, éke ékanle bad nkalaŋ mé nkamlen ní Dyōb."

⁶¹ Mod ampée anlǎá Yesue aá, "A Sǎŋgú, mēhíd we, boŋ mwě, nísebe níke nílyógtēn echem ndáb."

* **9:53** Aloŋ á Samaria démbē átidé meloŋ mé Galilia ne Judeya. Boŋ bad bé Israel bénkēnkobpé bad bé Samaria néē baányan. Né-óó bad bé Samaria béekwēntannaá bad bé Israel ábe bébide'áá á Galilia nken akob nzé békágé'áá ngande achog á Jerusalem. † **9:54** Donŋe á kálág é'só ébáde bán: *nēŋgáne Elaija ámbenlé.* ‡ **9:55** Donŋe á kálág dé'só ébáde bán: *anhōb-pe ad, "Nyéebíí' é edǎǎdǎŋ eche ékanlan nyé. Mwǎn-a-Moonyoŋ eepédeé awúu bad, ápedé dǎsō ásoŋ bǎ."*

⁶² Bonj Yesue anláá mós aá, “Kéńzée awé aboótédé hóm alii, bonj ánoné’ ámbíd, eékwońdée ábel nsón ásé e nkamlen í Dyób.”

10

Yesue alómé bembapεε móom saámbe ne bébe

¹ Ambíd e nê, Sánjwée ampwéd bembapεε bémpεε móom saámbe ne bébe.* Anlóm bós á só bébe bébe dyad téé ne hóm téé áde ámbíí’ é aá mósɔpě.

² Anláá bós aá, “Nzag echyáá bwámbwam, bwém é’hednad apád, bonj bepád béebu’ é áte. Né-ɔó, nyékáńne nén bán, nwoó-nzag álóm bepád.

³ Nyékag-koó, bonj nyébíi bán nlóme nyé nées rídyɔɔj ní mbód áfínté e ngə.

⁴ Nyéewánlé ekwe é ngáb á yál, ké ekwe empée, káa metámbé. Nyéebwág-ke mod aleled á nzii.

⁵ Ndáb ké ehéé eche nyésɔnlé, nyéleled bós nén bán, ‘Nsanj níbê ne nyé.’

⁶ Nzé mod a nsanj adé áhed, né nímmē nsanj mébē ne mós. Nzé eesé, né métimén nyé bēn.

⁷ Ndáb ké ehéé eche nyésólé, nyédyεε áhed. Nyéepenlád ndáb áte. Nyékob-pe kéchéé eche bébagéé nyé ádyé káa ámwé, áyále mod a nsón atánjéńé nées ákudeé níme nsábe.

⁸ Dyad ké ahéé áde nyépédé áte, bonj békob nyé nken, nyédyé kéchéé eche bébágéé nyé.

⁹ Nyéídide bad bé nkole bwám, nyélaa-ε bós nén bán, ‘Nkamlen í Dyób nípédé nyé benben.’

¹⁰ Bonj dyad ké ahéé áde béekobéé nyé nken, nyéke á ntém nzii, nyéhób nén bán,

¹¹ ‘Ké échén ebumbú éche émbé sé á mekuu, sékudé nyé chós, bonj ké nê nyébíi bán nkamlen í Dyób rídé benben.’

¹² Nlánje nyé meé, á epun é nkáásé, nkógsen níme dyad á Sodom dényínné mébē mwámpín tómaa níme bad ábe bédé áde dyad áte békudté.

Éde ngəl ne bad ábe béekunne mbíd

(Mat 11.20-24)

¹³ “A-bad bé Korazin, ébēen nyé ebébtéd! Ebēen nyémpē ebébtéd á-bad bé Betsaida! Ayále nze émbē bán, ndale é mekan éche Dyób ábélé áwēn nyad, émbenléd nê á dyad á Tirε ne dyad á Sidan, né benwāá melebe se etún, bémwagtéd-te mbúmbú áyál álúmed nén bán, béhánjéńé ádab abé dé mbéb.

¹⁴ Bonj mbwε mé nkáásé, nkáá níme bad bé Tirε ne bé Sidan mébē mwámpín tómaa nímmē.

¹⁵ Nyé bad bé Kapenahum ámpε, nyéwémtan bán, nyémaá ape ádyób,

bonj bésudéd nyé kánj se ásé á dü-á-muú.”

¹⁶ Héε álánjεε bembapεε nén aá, “Kéńzée awé awógné nyé, né awógné me, bonj kéńzée awé abáá nyé á yál, né abáá kánjε me. Kéńzée-ε awé abáá me á yál, né abáá kánjε ane awé alómé me á yál.”

Bembapεε Móom saámbe

ne bébe béhúú ámbíd

¹⁷ Ade bembapεε móom saámbe ne bébe ábe Yesue ánlómme béhúú ámbíd, bénlāá mós ne menyínje mésyāal bán, “A-Sánj, kánjε e’dáádánj bé mbéb bēnsudéd yál áwεd e’só, atúb áde sétúbé wε dín.”

¹⁸ Dóo Yesue áhóbéé aá, “Nnyíné Satane ahúné ádyób nēńgáne emwεdmwεd.

¹⁹ Mbagé nyé kunze ádyaa nyó bóobe bengaabobe bé mpwen ámín, ne átóm ngine esyāal eche Satane áte, Satane ne ane awé akóó syáné. Dyamdyam déebenlé nyé.

²⁰ Bonj ké nê ámpε, menyínje níme nyéwógéé méébág nén bán, áyále e’dáádánj éwógné nyé, bonj pen nyéwóg menyínje dásó nén bán, mín métenlédé nyé ádyób.”

Yesue awógé menyínje

(Mat 11.25-27, 13.16-17)

²¹ Ábwāg-ábwāg Edáádánj éche Esáá† éńwógéd mós menyínje bwámbwam, ahób aá, “A-Té, Sánjwée a nkonj ní sé ne ní mín, nságnen níbê ne wε áyále elúmté mpín ní bēndem mam níme ébánjé bad bé debyéé ne bad bé nsóńten. Eε, a-Té, nê dēń dós édáá wéé, ébenled.

²² Nlāá nyé meé, Echem Sánj ebagé mekan mésyāal áwēm mekáá. Mod ké nhóg eékonjéé mwán abíi ésebé Dyób Títéε. Mod ké nhóg-ke ámpε eebíí’ é ngáne Títéé ákóńjé abé ésebé mwán, ne kéńzée awé mwán ádáá aá mólúmed mós.”

²³ Héε ákúnné wéε bembapεε, bonj álánjε bós á kun-té nén aá, “Nsimé ne bad ábe bényíné’ mekan níme nyényínéé nén!

²⁴ A mbále nlánje nyé nén meé, bekal-bé-e’dáádánj híin ne kánj é bad híin bēnwanén ányín mekan níme nyényíné ne áwóg mekan níme nyéwógéé bonj bēnkényínné, bēnkénwóg-kaá.”

* **10:1** Móom saámbe ne bébe: Donje á kálag dé’só áwóó: móom saámbe. † **10:21** Donje á kálag dé’só áwóó Edáádánj éche Esáá; émpée bán, éché edáádánj.

Ngan e mod a Samaria awē aboo nlēm

²⁵ Bɔɔb-pɔɔ meléede a mbéndé anhyě Yesue akag áte aá, “A-meléed, cheé mébenlé bon ríkud alonjé áde déemaá?”

²⁶ Yesue antimtén mó aá, “Chán éténlédé á kálag e mbéndé. Cheé éláá áwēd-te?”

²⁷ Meléede a mbéndé ankwentén aá, “ ‘Etáŋgéné bán édaŋ Sánjwéé ádòŋ Dyòb ne nlém rísyáál, ne edáádàŋ ésyáál, ne ngíne esyáál, ne mewémtén mésyáál.’ ‘Édaŋ-’e mwányon nēŋgáne echon yál.’ ”

²⁸ Yesue anláá mó aá, “Ebíí akwentén. Nzé ebelé áned, né wěkúd alonjé áde déemaá”

²⁹ Ngáne ane mod áhédé’áá aá mósuud yál nzwóm, ansédéd aáken, “Nzé béchagéé wēn nē?”

³⁰ Atimtén mó, Yesue ankál ngan aá, “Mod a Israel nhóg akagé’áá eke, ambíd á Jerusalem, átimé á Jeriko. Ade ápédé á etún-té, bechíb békòb mó, békòbēn mó chòm ésyáál éche ánwálé. Bēmbamtéd mó kóŋj áhédé awé. Dóo béchénné mó á nkag ní nzii.

³¹ Príse póg chómpe esyógk’é’áá melelem mé nzii. Dóo átáné ane mod. Ambamé nkag ní nzii nímíníí.

³² Mod a túmbé e Levi awé abelé’áá nsón á Ndáb-e-Dyòb* awé mómpé ampé áhed, bon anyín mó, ambamé melelem.

³³ Bon mod a Samaria nhóg awe atómé’áá ene nzii, ampé áhed. (Bad bé Samaria bóòbe bad bé Israel béechemtannaá.) Ade ányiné mó, anwóg mó ngol,

³⁴ ákē áhed, ahé mó mel á sii-té, ákanj chò, bon ápēmē mó á ésel mín. Apééné-’áá mó á dyad-té, bon ásónlé mó á ndáb e beken, ábōŋgē mó. ³⁵ Nēe bín é’sánjé ahúd e’kólé é’táan, ábag nwóó ndáb aá, “Téd nēn, étagnan anén mod, kéchéé émpée éche wébēbedte, mētimtéd wē ámbíd á ehúu.’ ”

³⁶ Héé Yesue ásedtéé ane meléede a mbéndé aáken, “Atínté e ábē bad beláán ábe bēntān ane mod awé bechíb bēnlōgēnné, ahéé anlúméd aá módē waáb?”

³⁷ Meléede a mbéndé ankwentén aá, “Ane awé anwóg mó ngol.” Héé Yesue álanjéé mó aá, “Kág-kō, wémpé ébele’ melelem.”

Mataa bó Maria békòbé Yesue nken

³⁸ Yesue ne ábē bembapēe bēmpé mwá dyad nhóg. Mmwaád nhóg awe béchagé’áá bán Mataa ankòb bó nken.

³⁹ Ane mmwaád mwányan abédé òn bán Maria. Maria anhyě Yesue adyēe á nkag, áwóg mekan míme áyágté’áá.

⁴⁰ Bon Mataa anháŋén áte ne nsón ní ndáb-te. Dóo áhyédé Yesue aláa aá, “A-Sánjú, weenyínéé nēn wēé, awem mwányan atēdnédé mmēmpen nsón rísyáál-é? Láá mó wēé, áhye áwōŋgen mē.”

⁴¹ Bon Yesue antimtén mó aá “A-Mata, nlém rítage wē áte áyāle ekud é mekan.

⁴² Bon dyam áde ahóg áde ákóó etógnén abé. Maria apwédé dó, áde-’e bwám. Meéhéé-’aá se míbel se békòbēn mó dō.”

11

Áyáged dé mekáne

(Mat 6.9-13, 7.7-11)

¹ Mbwe nhóg Yesue ambé hóm, ákánne’. Ade ámáá akáne awé mbapēe nhóg anláá mó aá, “A-Sánj, yáged sé ngáne békánneé ngáne Jone án’yáŋgēdté ábē bembapēe.”

² Yesue anláá bó aá, “Nzé nyéhede akáne, nyéhòb bán,

‘A-Tē, edúbé ébē ne ádoŋ òn.

Mmonj nkamlen ríhye rítéd etál.

³ Bāg sé echéd ndyééd e epun é bín* mbwe téé.

⁴ Lagsén sé mímed mbéb,

áyāle sémpé sélagsan mod téé awé apánné sé,

wéemwāg se sēhún á mekágsen-té.”

⁵ Dóo áhòbéé aá, “Nzé ewóó wēn, bon ekii áwē melúde wēé, ‘Amúé, bál mē e’wēle é’láán hē,

⁶ sòn, nkúde nken awé achabé abíd, awem nsón-a-echon apedé áwēm. Meewóo-’áa chòm-éé ríhágtanné mó.’

⁷ Bon ane wēn mó-’e atímténé wē á ndáb-te aá, ‘Weétagtē mē. Mmaá mē ekob adib, syáábe ábē bán sémaá anaá ásē. Méehēnlé apáde áse ábe wē chómchóm.’

⁸ Nláa nyé á mbále mēé, saké ké echon éche nyédíí, chós épád mó ásē. Bon abádnēn áde wébádnēnnē wēn, dóo dékǎŋ bon apádé ásē, ábē wē kéchéé éche éhédéé.

‡ **10:32** Mod a túmbé e Levi: Dyòb dēmpwéd enén túmbé ábel nsón á Ndáb-e-Dyòb. Bēwóngánnáá príse ánabe Ndáb-e-Dyòb áte ne ábòŋsen ntíí ní mēndé. * **11:3** Ndyééd e epun é bín; káa ndyééd e epun éche éhúe’.

⁹ Nlånge nyé nén mээ́, hedén Dyöb, äbë we. Hëd, Dyöb dëbël enyín, kũm ekob, Dyöb dëdibnéd wе.

¹⁰ Ayãle kénzээ́ awë ahëdné Dyöb, äkũd, awë ahedé-’e, änyín. Kénzээ́-’e awë akumé ekob, Dyöb dëdibnéd mó.

¹¹ Nyé besáá bé bãn, nyé ahéé mwãn áhedénné súu, boŋ mó-’e átime ébage mó nyä?

¹² Káa nzé ahëdné we akii á kũb, boŋ we-’e étime ébage mó ngabobe a mpwen?

¹³ Nzé e’bëbtéd é’ bad néé nyé nyébage áben bãn kãse é bwëm, tógétén-naá echen Sáŋ awë adé ámín? Chán-nõ éebaá bad Edáádãŋ éche Esáá ábe béhëdné mó chõ.”

*Yesue eesáá nlatén ne kãŋ e e’daádãŋ bé mbéb
(Mat 12.22-30; Mak 3.20-27)*

¹⁴ Epun ehóg, Yesue ábidé’áá mod edáádãŋ é mbéb áte éche ênkwid ane mod ebóbé. Ade émáá mó ábid áte, ane mod ambootéd dyam ahób. Nén, dénköbëd ndun e mod echë ebédé áhed menyáké bwãmbwam.

¹⁵ Boŋ nguse é bad énhõb bãn “Belzebule, kãŋ e e’daádãŋ bé mbéb móo abage mó ngine ábíded bad e’daádãŋ bé mbéb áte.”

¹⁶ Bëmpëe ábe béhëdé’áá mó akæg áte bénhõb bãn, álumed bó e’chemléd ábe é’huú ádyöb.

¹⁷ Mó-’e ambii mĩmãb mewëmten, né-’ó, anláá bó aá, “Alon ké ahéé áde ákábné áte, boŋ nchemten méesë, dëbëb. Abum á ndáb áde nchemtén-ne méesë, dõmpë dépãntéd áte.

¹⁸ Nzé édé bãn, nkamlen míme Satane ríkãbné áte, chán-nõ mëhenlé atyéem? Nhõbe në áyãle nyéhõbé bãn, mbídté’ bad e’daádãŋ bé mbéb áte ne ngine echë Belzebule.

¹⁹ Nzé ngine eche Belzebule chõó mĩbenladté ábíded bad e’daádãŋ bé mbéb áte, né ngine eche nzé-’õ ábën bad ábe bébídté e’daádãŋ bé mbéb bébenladté? Bën bóó bëkwid nyé nkáá.

²⁰ Boŋ ngáne édíí nén bãn ngine e Dyöb chõó mĩbenladté ábíded bad e’daádãŋ bé mbéb áte, në álumte nén bãn nkamlen rí Dyöb nĩpédé áttinté echen.

²¹ Nzé ngine e mod ebõhséné yãl, enõne adé dyad, échë chõm ké ehóg éekagké hõm.

²² Boŋ nzé mod awë átómé mó ngine, abulé mó áte, abwõgké-’e mó, abelé ákõbën bwëm ábe áwannéé nzum, ákabté-dë bwëm ábe ákõbné mó.

²³ Né-’ó, kénzээ́ awë eesë ne me, né atãŋgan mе. Ane awë eewõŋgan mе álad, apáa páán.

*Nzé edáádãŋ é mbéb étime mod áyãl ámpë
(Mat 12.43-45)*

²⁴ “Nzé edáádãŋ é mbéb ébíde mod áte, ébelé ébwãgë á ehyãnge áhed abwõg áde ákõmméé áte. Nzé éekude, ébelé éhõb aá, ‘Mëtim ámbíd á ndáb eche mémbídté áte.’

²⁵ Ape áde épagké-’e, ébelé étán néé ndáb esáá áte, benãbpë-’e chõ áte.

²⁶ Héé ékagké bõõb, éke épëën e’daádãŋ bé mbéb bëmpëe saámbe ábe é’dé ebëbtéd tómaa mwën, boŋ é’hye é’sól ane mod áte, é’bwõg-ke e’dii áhed. Akën eched, ane mod abãg ebëbtéd tómaa ngáne ánsëbëë abé.”

Menyĩnge mé mbãle

²⁷ Bõõb-põõ áde Yesue áhõbé në, mmwaád nhóg áttinté e bad, ankanéd ehõb ámín aá, “Nnam mĩbê ne abum áde áchyáá wë, ne abii áde ámwãnté wе.”

²⁸ Yesue anhõb aá, “Nnam mébë dásõ né bad ábe bëwõgë’ Eyale é Dyöb, bébelé-’e ngáne éhõbéé.”

*Bad bé’ chii béhãttãë e’chemléd dĩa
(Mat 12.38-42)*

²⁹ Amute á bad dëmbootéd akãl. Héé Yesue áhõbéé nén aá, “Nyõngel e’chii edii nyõngel e e’bëbtéd é’ bad. Béhãde e’chemléd bé menyáké anyín, boŋ bëekudté, nzése e’chemléd bé menyáké ábë Jonaa.

³⁰ Nyaa eche Jonaa ámbëë néé e’chemléd wëe bad bé Ninive, chõó Mwãn-a-Moonyõŋ ábëë wëe enén nyõngel e bad.

³¹ A Mbwe mé Nkáásé, mmwaád awë akamlánnáá alon á Seba, änyemé á soŋ-të, nchoo ne nyõngel e bad bé e’chii. Ábid mbõŋ echë êkwid bó nkáá. Bëkwë nkáá áyãle ambíd se nchabnéde wëe nkõnsé ñsógé, áhye déwõglen mam mé debyéé míme Solomone áyágté’áá. Boŋ chii nén mod adé hén awë átómé Solomone.

³² A Mbwe mé Nkáásé bad bé Ninive bényemé á soŋ-të nchoo ne enén nyõngel e bad. Bébid mbõŋ echë êkwid enén nyõngel e bad nkáá, áyãle bad bé Ninive bëntédé mĩmab mbéb áde Jonaa ánkaléé bó Eyale é Dyöb. Boŋ chii nén mod adé hén awë átómé Jonaa.

*E’nyinën bé ekide é’ yãl e mod
(Mat 5.15, 6.22-23)*

³³ “Modmod eemāā’ē etrukán achod se ákōō chō káa akúdtén chō † á ebwōg-sé. Bonj abelé akélé chō dásō amín, ábel bonj kénzée awē asóle á ndáb, ányinne ekíde.

³⁴ Did dōó áde ngáne etrukán é yāl e mod. Nzé did ákénlé wē áte, echonj yāl esyāál chōmpē ebelé ekélé. Bonj nzé déékēnle, yāl chōmpē ebelé elón wē ne ehíntén.

³⁵ Né-ōó, nyétóó, ábel chōm éche ényínte nyé ekíde, éetimé abé chōm éche étimte’ nyé á ehíntén-té.

³⁶ Nzé édé bán echonj yāl esyāál elóné ne e’nyínen bé ekíde, ésebán ehíntén édé abwōg ké ahōg, né yāl émwaa áte, melemlen ngáne etrukán épenté ekíde.”

Yesue aselé Befarisia ne bemeléede bé mbéndé

(Mat 23.1-36; Mak 12.38-40)

³⁷ A pónde eche Yesue áhóbeé nē, Farisia nhóg, anchélé mó aá, áhye búmō bédyē ndyééd áwe ndáb.

³⁸ Né-ōó ankē, asól á ndáb-te, búmō bédyēé á tébele. Ane Farisia ambé menyáké ányín bán Yesue eéwopéé mekáá ngáne éhédnádtáá, bonj ábootéd ndyééd adyé.

³⁹ Dōó Sǎngwée álangéé mó aá, “Nōné’, nyé Befarisia, nyéwobpe mbwendé ne díse ámbíd e ebwōg, bonj adum á bwēm ne ebébtéd bōó belóné áwēn nlém-té.

⁴⁰ E’dimdim é’ bad ngēn! Mod awē ahagé ámbíd e ebwōg, saá mó ahagé kááñne áte-ye?

⁴¹ Bonj nyétéd bwēm ábe é’de áwēd-te, nyébage’ betóótókē bé bad. Né chōm ésyāál áyál echēn ésañ.

⁴² “Medim ne nyé, Befarisia! Nyétéde ké meseb ne nduu ne byaa ábíníí é’syāál bémpēe, nyébage Dyōb donje nhóg áfínté e monje dyóm. Bonj nyééhēdēé e’bonj bé nlém ne edǎnge é Dyōb alúmed. Nyētǎngēné nímén mésyāál ábel, ésebán nyéchōbte’ mímíníí.

⁴³ “Medim ne nyé Befarisia! Nyédēe metii mémbáá adyēe á ndáb é mekáne, nyédēe-é melentēn mé edúbé akud á dyōn-té.

⁴⁴ Medim ne nyé! Nyédíí néē sonj éche ésóómé, éche bad bétóméé amín, ésebán bebíí.”

⁴⁵ Dōó meléede a mbéndé nhóg álangéé mó aá, “A-meléed, nzé ehóbe nē néde né esyāá’ sémpē.”

⁴⁶ Yesue ankwentén mó aá, “Medim ne nyémpē bemeléede bé mbéndé! Nyépēmtad bad nted níme rílélé apém, bonj nyébēn nyéebanéé ké ekáá ápéméd bō mó.

⁴⁷ Medim ne nyé! Ayāle nēn, bekal bé’daádan ábe besóó bēnwū’ē, nyélóngéé bō sonj.

⁴⁸ Né-ōó, enén nyongel e bad chōó ékūd nkōgsen áyāle bekal bé’daádan bésyāál ábe bekal bé’daádan. Nyé-’aá nyélóngéé bō sonj.

⁴⁹ Ayāle nē, Dyōb ne áde debyéé anhób nēn aá, ‘Mēlōmē bō ábēm bekal bé’daádan ne bembapēe bé nlómag, bēwūú behóg, bēhǎgkē-’é ábíníí.’

⁵⁰ Né-ōó, enén nyongel e bad chōó ékūd nkōgsen áyāle bekal bé’daádan bésyāál ábe mímāb mekií mésyógkē se á mbootéd mé nkōñsé,

⁵¹ mbootéd ne mekií níme Abele átimé’ wēe Sakaria, awē bēnwū’ē áfínté e menyán mé mende ne hōm áde ásaá. A mbále, enén nyongel e bad ékūd nkōgsen áyāle nímé mekan mésyāál.

⁵² “Medim ne nyé bemeléede bé mbéndé! Nyékáá e’kii bé ekob e debyéé. Nyébēn nyéesaá asól, nyékáá-’é bad bémpēe ábe béhéde asól.”

⁵³ Ade Yesue ásyǎngéé áhed áke, bemeléede bé mbéndé ne Befarisia bēmbootéd mó ahób bwám bwam, bésēdté-’é ekud e mekan.

⁵⁴ Bébélé’áá nímén mésyāál áhíined mó melám ábel békōben mó awusé.

12

Elébé tǎngene bad bé elangé

(Mat 10.26-27)

¹ Ámbíd e pónde ndun e mod enladén áte, kááñ etál éebédeé. Dōó Yesue ábóótédéé bō akalen, mbootéd ne bembapēe álangēé bō nēn aá, “Nyétéd pónde ne elangé éche Befarisia, édé nēngáne esultēn.

² Dyamdyam déesaá á e’kōñéd-te áde déebíd áwed. Ké ahóg-ke déesaá, áde ásóómé bonj bán déebyéénné.

³ Dyam ké áhéé-’é áde nyéhóbé á ehíntén-té, déwōgnēd á e’nyínen bé ekíde. Dyam áde nyékálé-’aá á kun-té ámbíd e ekob, dékanléd á nháné.

Ane awē bétǎngéné abáñ

(Mat 10.28-31)

⁴ “Amúē, á mbále, nyéewógéé mbwōg ne moonyonj awē ahéle awúu ekob é yāl ésebán ahéle dyam démpēe ábel. Awáb eetóméé nē.

† 11:33 Donge á kálag dé’só éewóó’é káa akúdtén chā.

⁵ Nláa nyé mæé, mod awe nyétánǵéné abán, adíí ane awé nées áamáá wε pemε e alongé akobεn, awónj-ε ngine eché ábwéméé wε á dù-á-muú. Ne mbále ane móó nyétánǵéné abán.

⁶ Eesaá mbále nén bán, kábpe ébe ngên, chóó béchannéé ndun étáan-nε? Bonj ké nê Dyóð déechatánné ké póg.

⁷ Dyóð ábíí kááǵne mesonǵé mé e'sid ábe é'dé nyé á nló. Né-óó, nyéewógé mbwóg, nyédé etóǵné tómaa ndun, ké émbuú ké áte.

Akob Yesue káa ábáǵ mós áyál
(Mat 10.32-33, 12.32, 10.19-20)

⁸ “A mbále, kénzée awé ábid mε mbónj á'só é' baányon, Mwán-a-Moonyonj mómpε ábid mó mbónj á'só é' ángel é Dyóð.

⁹ Bonj mod awé abáá mε áyál á'só é' baányon, mε-'ε mēbānj mós áyál á'só é' ángel é Dyóð.

¹⁰ Kénzée-ε awé ahóbé eyale é mbéǵ tǵngene Mwán-a-Moonyonj, ákúð alagsεn, bonj kénzée awé ahóbé e'bébtéd é' mekan tǵngene Edááðǵnj éche Esáá éekudté alagsεn.

¹¹ Nzé édé bán bésómné nyé wée belyáǵed bé dyad ne benkamlene, nyéetáǵé áte, ngáne nyékāá'ε káa dyam áde nyéhǵbpē,

¹² áyale nzé pónǵé epedé, Edááðǵnj éche Esáá éyáǵed nyé chǵm éche nyétánǵéné ahób.”

Ngan e eyókél é nhon ní mod

¹³ Afinté e ene ndun e mod, nhóg anláá Yesue aá, “A-meléed, láá mwánned wée ákabe súmó mbwóg áte.”

¹⁴ Bonj Yesue antimtén mós nén aá, “Nzé-módé abánné mε nées mod awé akáadte' bad, ákabe nyé mbwóg áte?”

¹⁵ Dóó álǵǵéé bós moosyáál aá, “Nyétóó, nyéebánné nlém áyale awónj á bwēm, áyale saké nhon móó níǵide moonyonj á alongé.”

¹⁶ Ankalé-'ε bós ngan aá, “Nhon ní mod nhóg mémbe. Anwónj nzag. Ade ene nzag échyáá, embíǵéd medyé nkute ne nkute.

¹⁷ Nhon ní mod mé ménhǵb áwe nlém té aá, ‘Chán mébenlé bǵǵb áde etál éelyáǵéé wée ríkonǵéé medyé?’

¹⁸ Dóó áǵólé áte chónj bonj áhǵbē aá, ‘Nén dóó mébenlé. Mēpānj échem ndáb é e'konǵéd, nlónj émpēe éche ékále áte, bonj nkúm medyé áwéd-te, ne nhon nímmém rísyáál.

¹⁹ A pónǵé eched-taá méláá'ε échēm edááðǵnj mēé, nláǵté yál nhon níme médyéé mwé ne mwé. Bǵǵb-póó mēched yál, rídyág, nímwág, ríchogé-'ε alongé.’

²⁰ Bonj Dyóð dénláá mós nén, aá ‘Edimdim é chǵm chén. Nkuu nén dēn mēkobén wε pemε e alongé. Ábē bwēm é'syáál ábe áamá-'aá alad áte, nzé-módé wélyáǵnǵédté bós?’

²¹ Nê dóó éǵíí ne ké nzé-módé awé akúmmé yál nhon, bonj eésē nhon á'só é' Dyóð.”

Weetáǵé áte á alongé
(Mat 6.25-34)

²² Dóó Yesue álǵǵéé ábē bambapεε nén aá, “Né-óó nyéetáǵé áte á alongé se nyéhǵbē nén bán cheé nyédyéé, ké'ε cheé nyéwáá'ε á yál.

²³ Alongé átómé ndyééd, échen yál-le ámpε edé etóǵné tómaa mbóté.

²⁴ Nyénǵne', nkónéǵn. Mééwēnēé bwēm, méépáǵēé, mééwóo-'áa hǵm áde békonǵéé medyé. Kéné, Dyóð adíǵte mós! Nyéebíí'ε bán nyédé etóǵné bwámbwam tómaa menon-ε?

²⁵ Nzé-módé áwεn tǵnté ahele átáǵ áte kááǵ, abád ké epun ehóg awé alongé áyale átagéé áte?*

²⁶ Nées nyé modmod nyéeheléé mpín mé akan nées nímmé ábel, cheé ékáá bonj nyétagé áte áyale mam níme mélyáǵé áse?

²⁷ “Nyénǵne' mbonja ngáne ékwogéé. Eebeléeé ntú, éebǵǵéé mesanj. Nlǵnge nyé nén mēé, ké kǵnj Solomone ne nímmé nhon rísyáál eewáa'aá mbóté éche épédé échén mbonja ké póg e'bonj.

²⁸ Nzé Dyóð áhelese áwááǵté e'sum ábē é'báǵ chíi bonj chǵn béhé bós á dù, né éetómmé nyé awáad né-ye? Chán adúbe áǵíí nyé mwámpín nén?

²⁹ “Nyéebánné nlém bán, cheé nyédyéé káa cheé nyémwēé. Nê déetagté nyé.

³⁰ Echē nyaa é bwēm chóó bad bé nkǵnsé béchyéé'ε akud. Awēn Títéé mwēn abíí aá nyétóǵnéé ábén bwēm.

³¹ Né-óó, nyésébe nyéhéd mam mé nkamlen rí Dyóð, dóó Dyóð débéé nyé ábíníí bwēm.

Nhon níme níǵé ádyóð
(Mat 6.19-21)

* 12:25 Abád ké epun ehóg áwé alongé káa áchab tómaa ngáne adíí.

³² “A-bānān, nyéewógé mbwōg. Echen Sān awóó mewēmten níme mésáá ábe nyé ngíne e nkamlēn.

³³ Nyésóm áben bwēm, nyébag betóótōkē bé bad mōné. Nyéhéd ekwē é ngáb éche éhélé amaa ásē. Nyéhē nhan nímēn á e'koñéd ábe é'dé ádyōb, wēe dyamdyam déebenlé mō, wēe bechīb béehenlé mō achīb, síi-é éehenlé mō adyé.

³⁴ Nyébíí bán wēe nħon mbággkē mod, áhed dōo nlém-me mbággkē mō.

Mod-téé ábē mboñsēn

³⁵ “Nyépūd abad, nyéchod-te etrukāj,

³⁶ nēngáne bad ábe bésine' echab sāj awē akii á ngande e e'wóngé ábel boñ nzé ahúú húén, boñ akumé ekob, bēnednéd mō ábwōg-ábwōg.

³⁷ E'boñ é' yāl áte ne bembalede ábe echab sāj épéé, boñ atán ngáne bedyéé epin, bésineé mō. A mbále áboñsēn, ádíí bō ásē, atóméd-te bō ndyéé.

³⁸ Ké melúde dōo ámpéé, káa epōg é mbwēmbwē, boñ atán bō melemlē, e'boñ é' yāl áte bélyāg é'tán bō.

³⁹ Nyébíi-é bán, nzé nwóó-ndáb abyéé'áá pónde eche nchīb ápéé, né ádyéé epin, ésebān atēdte aá, bésal mō ndáb.

⁴⁰ Nyémpē nyētāngénē mboñsēn abé, áyāle Mwān-a-Moonyonj āpē á pónde eche nyéewēmtenéé bán āpē.”

*Mbalede awē abele nímē nsón
ne nlém nhóg ne awē eebēlé'*

(Mat 24.45-51)

⁴¹ Petro ansedéd aáken, “A-Sāj, sé bēn pen-éé ékanléé enén ngan-ε, káa bad bésyāāl?”

⁴² Sāngwéé ankwentén aá, “Né-ōó, nyé mod té ábē néē mbalede awē awóó debyéé, awē abele-é mam níme eche sāj álāngé mō aá ábel. Mō adé mbalede awē eche sāj ábānné aá ákamlēn bembalede ábíníí, ányín-ne nén aá békúde ádáb akab á ndyééd pónde eche etāngéné.

⁴³ Nnam mébē ne ane mbalede awē eche sāj áhūú'é, boñ atán nēngáne ábeleéé mam níme ányāgtēnnē mō.

⁴⁴ Ne mbále, nlānge nyé nén meé, ane mbalede eche sāj ábané bwēm é'syāal ábe áwóó áwe mekáá aá ákamlan.

⁴⁵ “Boñ nzé ane mbalede adé mbalede a mbéb, boñ ahóbé áwe nlém-tē aá, 'Ebēm áte boñ echem sāj áhūú á eke-tē.' Né-ōó aboótédé ábíníí bembalede bé bebaád ne bé baachóm ábe bédé ásē échē awanēn, ádyāg bwēm, ámwāg-ke mīm mékóbe mō,

⁴⁶ ane mbalede eche sāj áhūú epun éche éewēmtenéé ne á pónde echē énkémbíí' é aá áhūú. Né bēbwēm mō á ebwóg,† békógsēn-ne mō ne nħel melemlē ne bad ábe bēwúú nló áte.

⁴⁷ Ane mbalede awē abíí ntii mé nsón níme sáá-a-ndáb, boñ eéboñsene, káa eehíde nímé ntii ámbíd, ákud mbéte e ngíne.

⁴⁸ Boñ ane awē enkémbíí ntii, boñ ábelé epandé, békúde mō kúdtén. Mod ké ahéé awē bēbúdé abe, né-'aá bēbudté mō ahēden. Ane-é awe bétómténé abud dé abe, né-'aá bétómēnnē mō abud dé ahēden.

Yesue ad mōpééné nkabén

(Mat 10.34-36)

⁴⁹ “Muú mōó ríhyédé akwéd á nkōñsē. Mendāñ-é meé, né mēmmd akóben.

⁵⁰ Boñ ntāngéné nsébé ríkud edusen é metuné, mēmād-te chō akud boñ nlém mépwiitéd me.

⁵¹ Nyéewēmtan bán, nsāj mōó ríhyédé apēen á nkōñsē-yé? Aáy, saké nsāj, nkabén mōó mípééné.

⁵² Bootya bōob áke á'sō, ndáb echē ewóó bad bétáan ékabén áte, beláán bétāngén bébe, bébe-é bétāngén beláán.

⁵³ Kōkōó ébē.

Sáá átāngēn mwān a mwēnchóm,

mwān a mwēnchóm átāngēn sáá.

Nyaá átāngēn mwān a mmwāád,

mwān a mmwāád átāngēn nyaá.

Nyāñkálé átāngēn mwān a mmwāád,

mod mwān a mmwāád átāngēn nyāñkálé.”

E'chemléd é' bīn

(Mat 16.2-3, 5.25-26)

† 12:46 Bēbwēm mō á ebwóg káa bēsīl mō dte e'són é'be.

⁵⁴ Yesue anláa amute aá, “Nzé nyényíné mbag ébide á mbəŋ, nyébelé nyéhób bán, ‘Mbúú échā bəəb’, ébenléd-te áned.

⁵⁵ Nyényíne-’áa epub éhúe’ á pəd e mbəŋ, nyéhóbə’ bán, ‘Enyen ébənəd mod bəəb’, ébé-ε áned.

⁵⁶ A-bad bé elangé. Néε nyépédé abii ngáne beláa’ é bīn nén, cheé ékásə bonj nyééhələ mam nīme mébenlad nyé á’ō-te chii nén achem?

⁵⁷ “Cheé ékásə bonj nyébən nyééhələ adol áte nén bán, kəse e akan nén eché ehədnad abel?

⁵⁸ Nzé mod ahóbé aá, mókεene wε á kóte, hēd nzii kásəŋ nyúmō bétim āsē á nzii. Esebé nē, nzé ahédé wε á kóte, kóte chō-’ε ébεe wε á mekáá mé plūse, plūse chō-’ε éhε wε á mbwəg.

⁵⁹ A mbále, nlange wε meé, weéhələε-se ebíd á ndáb e mbwəg-té wē kásəŋ né etwedé áđōŋ alúm ásyəəl.”

13

Nyétede abel dé mbéb, nyétimən Dyōb

¹ Ade Yesue ádíi áhóbé nē, dōo nguse é bad éche émbē áhed élangéé mó ngáne Paylede ánwū’ é bad bé Galilia áde bebágé’ áá Dyōb mendε mé e’lém.

² Yesue antimtén bó aá, “Nédē mewēmten médé nyé bán, ábē bad bé Galilia ábe bēnkūd échē eben, bétómé ábíníi bésyāəl ebébtéd abé áyāle bēnwēε ene ndin e kwééd-ε?

³ Aáy! A mbále, nzé nyéētēdte nīmən mbéb se nyétīmən Dyōb, né nyé moosyāəl nyéēwē, nyébōó-ε.

⁴ Chán-náa ábíníi dyōm á mod ne waam ábe ntōŋ-ntōŋ ní ndáb ménkūmtēdtē ámín á dyad é Silom, bonj bēwé? Nédē mewēmten médé nyé bán, béntōmtən ebébtéd abé tómaa bad bésyāəl ábe bēnlōŋ á Jerusalem-ε?

⁵ Aáy! A mbále, nzé nyéētēdte nīmən mbéb se nyétīmən Dyōb, né nyé moosyāəl nyéēwē, nyébōó-ε.”

Ngan e bwel abe béechyáa

⁶ Héε Yesue ákálé ngan aá, “Mod anwōŋ alín á bwel á nzag-té. Ankē epum é bwel áhed áwedé-mín ngen ne ngen, bonj enkēnyínné ké ehóg.

⁷ Héε álāngéé nnən-a-nzag aá, ‘Edé bəəb mwē nílaán áde nípagké á bwel-sé hén mwē téé, bon meenyínéé epum ké ehóg. Kwel bō. Chán é’hele é’madé ahōŋ á ndəəb-té ngēn?’

⁸ Héε nnən-a-nzag átiimtanné mó aá ‘A-sán, tedé bó ké mwē nhóg ámpē. Mēnabé bó ásē, nhíi-’ε bó nkúmbág.

⁹ Nzé é’chyáá e’pum mwē nīme níhúe’, né édé bwám. Nzé-ε béechyáa, né békwlé bó.’ ”

Yesue adidé mmwaád nhóg

bwám á Mbwe-mé-nkóme-áte

¹⁰ Mbwe-mé-nkóme-áte nhóg, Yesue ayágté’ áá bad á ndáb e mekáne póg.

¹¹ Mmwaád ambé áhed awé edəəđəŋ é mbéb émbēε áte á etún é dyōm á mwē ne waam. Embēl mbíd enwūmən mó nyaa eché éehelaá yəl asále áte bwám.

¹² Ade Yesue ányíné mó, anchélé mó, aláá mó aá, “A-nyan, nkole nīme ékonleé nímáá.”

¹³ Ade ábáné mó mekáá á nló, ane mmwaád ansalé yəl áte ábwəg-ábwəg, ábootéd-te Dyōb aken.

¹⁴ Héε mod awé abédé nló á ndáb e mekáne, alíi áyāle adid áde Yesue adidé ane mmwaád bwám á mbwe-mé-nkóme-áte. Alāngé bad aá, “E’pun é’de ntóob ábe mod átāngéné nsōn abel. Nzé nyéədəə bwám adyεε nyépē ábē e’pun, saké á mbwe-mé-nkóme-áte.”

¹⁵ Héε Sāŋgwéé ákwentanné aá, “Nyéđoge bad. Nyé ahéé eéhunné nyag káa ésel á ebem-té se ákēn chō á edīb á mbwe-mé-nkóme-áte?

¹⁶ Anén mmwaád adíi mwān awe Abrahamε. Satanε anhanj mó ne nkole á etún é dyōm á mwē ne waam. Nyélaá me ké mbéb mó níde, áhúd mó á mehangé á mbwe-mé-nkóme-áte?”

¹⁷ Chóm éche ánhōbpē énwōgəd bad ábe bétāngánnáá mó e’són. Moosyāəl anwōg menyīŋge áyāle mam mé ményáké nīme Yesue ámbenlé.

Ngan ébe é nkamlən ní Dyōb:

Ngan e mbəl nīme níchiné

(Mat 13.31-32; Mak 4.30-32)

¹⁸ Yesue anhób aá, “Chán nkamlən ní Dyōb níkóó abé? Cheé níhele níhəgtén mó-yēé?

¹⁹ Ndíi níngáne mbwé e mbəl-e-bū eché mod átédé bonj ásob á nzag-té. Ade ékwógé, étīm bwel bēn, menən méhyé mēlōŋ á ngen-té.”

Ngan e esulten

(Mat 13.33)

²⁰ Yesue ansédéd aáken, “Cheé níhele níhəgtén nkamlən ní Dyōb-é?”

²¹ Ndii n̄ngáne esultɛn éche mmwaád ámutúnédé asii á p̄an é mbumé ní ngun éláán kóǎŋ éšule.”

Asól á ekob éche échiné áte
(Mat 7.13-14, 21-23)

²² Yesue andii ambé á eké-té éche ákágé'áá á Jerusalem. Dyad téé áde átómé'áá, ámbáá ne ásad, ayágté'áá bad.

²³ Mod nhóg ansédéd mós aáken, “A-Sánjú, mesonggé mé bad níme Dyöb désonggé alonggé, mébuú áte káa méebuú'é?” Yesue anláá bad áhed áá,

²⁴ “Nyéwanɛn kóǎŋ nyésól á ekob éche échiné áte, áyále, á mbáale, ekud á bad éwanɛn asól, bonj béehɛnlé.

²⁵ Póndé ɛp̄ɛ échɛ nwóó-ndáb áhidéé áse, bonj áp̄en ekob. Ene póndé d̄óo nyébootédé atyéem á ebwóg, bonj nyékumé' ekob nyéh̄sbé bán, ‘A-Sán, dibnéd sé ekob.’ Mós-ɛ átímtén nyé áá, ‘Meebíí' é wéɛ nyébídé.’

²⁶ Nyé-ɛ nyéh̄sbé bán, ‘Syáné dendyé ndyééd, demmwé-ɛ m̄im hóm ahóg, eyágté'áá-ɛ áwɛd myad.’

²⁷ Atímtén nyé áá, ‘Syáné deewóh̄nɛé dyamdyam. Nyésyáá me á ð̄id-te. E'bébtéd é' bad ngɛn!

²⁸ Ade nyényín̄nɛ Abrahame, Aisigɛ ne Jakobe bóóbe bekal bé'dáádɛŋ bédé á nkamlen ní Dyöb-te, bonj nyé pen nyéchág á ebwóg, achii dé awé ne adyé dé mesonj á nsal, d̄óo déted etál póndé eched.

²⁹ Bad bébid á akuu ne á mb̄onj, á mekonekone ne á mehúléhúlé, bétéd medii á ngande e nkamlen ní Dyöb.

³⁰ A póndé eched, bad ábe b̄enlyəg mbíd bóó b̄étim á'só, bé'só-ɛ bélyəg mbíd.”

Yesue alebe áyále bad bé Jerusalem
(Mat 23.37-39)

³¹ Melemlem mé póndé nguse é Befarisia ɛmp̄ɛ wéɛ Yesue, bélāngɛ mó bán, “Syáá hén, ékag hóm démp̄ɛ, áyále k̄onj Hɛɔde ahede we awúu.”

³² Yesue ankwentén bó áá, “Nyéke nyéláa échɛ esob bán, ‘Chii ne ch̄an m̄h̄ud bad e'dáádɛŋ bé mbéɛ áte, n̄chóó-d-te bad, bonj súú ébe m̄émád m̄m̄em nsón.’

³³ Bonj ké ch̄an éb̄ɛɛ, nt̄angéné abé á nzii chii, ch̄an, ne sú ébe, áyále éeboo' é bán, nkal é'dáádɛŋ áwé hóm démp̄ɛ ešebán á Jerusalem.

³⁴ Wóowó! A-bad bé Jerusalem, nyéwúɛ bekal-bé-e'dáádɛŋ nyéwúɛnné-ɛ bad meláá ábe Dyöb álómé! Nkénw̄an áte ngen ne ngen álad nyé áte n̄ngáne nyaá-kúb ákútanné bán, bonj nyéehédeé etál!

³⁵ Nyén̄one', Dyöb détedé echen ndáb. A mbáale, nl̄angɛ nyé n̄én meé, nyéenyín̄énné me ð̄id ámp̄ɛ kóǎŋ ne á póndé eche nyéh̄sb̄p̄ɛ bán, ‘Nnam ne ane awé apedé á ð̄in á Sánjú.’ ”

14

Yesue achóŋté mod awé melóg mékóbé

¹ Mbwe nhóg Yesue anké ndyééd adyé wéɛ ndale a Farisia póg. Nén démb̄ɛ a mbwe-mé-nkóme-áte. Ade ápedé áwed, b̄énóné'áá mós chodchod.

² Mod mós-ɛ ambé áhed awé melóg mémbid̄t̄é á yál.

³ Héɛ Yesue ásedt̄éé b̄emeléede bé mbéndé ne Befarisia aáken, “Edé kunze ádid mod bwám á mbwe-mé-nkóme-áte, ngé éesaá?”

⁴ Bonj b̄enkénh̄sb̄p̄ɛ dyamdyam. D̄óo ákóbé ane mod awe melóg mébídé á yál á ekaá, ádidé mós bwám, asúúd-te mós á ndáb.

⁵ Ambíd e n̄é d̄óo ásedt̄éé b̄ó aáken, “Nyé ahéé adé awé mw̄an káa nyag éh̄unné echóg, bonj eekag ch̄ó abided ábwóg-ábwóg, ké émb̄ɛ bán á mbwe-mé-nkóme-áte?”

⁶ Bonj b̄enkénwóŋgé dyamdyam áhób.

Ake dé e'ken ne akob dé nken

⁷ Ade Yesue ányiné bad ábe b̄enl̄eb̄ɛɛ ádyé ndyééd b̄esyáal ábe b̄epédé b̄ébóótédé medii mémbáá apwed, ankalé b̄ó en̄ɛn ngan áá,

⁸ “Nzé mod alébp̄ɛ we ngande, weép̄ag-se éh̄edé e'dii é'mbáá, áyále éhele éb̄é né bélébp̄ɛ mod amp̄ɛ awé adelé áte tómaa we.

⁹ Nzé ene nyaa e mod epedé-ɛ, mod awé alébp̄ɛ nyé moosyáál álāā we áá, ‘Béé anén mod atii.’ A póndé eched d̄óo étimeé atii asad atéd ne akwáké.

¹⁰ Bonj nzé epedé ene ndin e hóm, etédéé e'dii ábe é'dé á ah̄angé, ábel n̄én nzé nwóó-ngande anyiné we, m̄óó álāā we áá, ‘Amúɛ, ké édyɛɛ á atii ámbáá h̄íníí.’ A póndé eched d̄óo ékudeé edubé áf̄inté e bad ábe nyááb̄óo nyétédé tébele.

¹¹ Né-óó, nyébbii bán, kénzéé awě achágté yál, Dyöb dėsudéd mós. Kénzéé-’ε awě asúdté yál Dyöb dčhāgéd mós.”

¹² Hε-’áá álāngéé mod awě anlébé mós nén áá, “Nzé ehóbé wεε, móchage’ ngande, weehóbé wεε mólébpε ábonj bēn, káa ábonj baányan, káa echonj túmbé, káa bewónj bé ngáb ábe nyáábō nyébyééné. Nzé ehidé nē, né bómpē bēlébē wε. Nē ábele átım ehéen ne metuuten.

¹³ Bonj nzé echagé ngande, elébé dāsō betóótókē bé bad, ne bad ábe bēhúné eped, bóóbe bad ábe békwdé ndım.

¹⁴ Nzé ebelé nē, né wēkūd nsimé áyāle béehenlé wε asábe ámbíd. Dyöb dėsábé wε áde bad bé bwām bėpuú’ε.”

Ngan e sājkalaa a ngande

(Mat 22.1-10)

¹⁵ Ade mod nhóg awě bóóbe Yesue béntād tébele áwógé nē, dōó álāngéé Yesue áá, “Nsimé ne bad ábe bėdyē ndyédé á ngande e nkamlen ní Dyöb!”

¹⁶ Dōó Yesue álāngéé bó áá, “Mod nhóg anchāg sājkalaa a ngande, ábūd-’ε bad alébe.

¹⁷ Ade pónde e ngande epédé, anlóm awe mbaledε wεε beken ábe ánlēbēē áá, ‘Nyéhyag, mbonsén n̄syāāl n̄máá abé.’

¹⁸ Bonj bó moosyāāl, bēmbootéd mechāngé abe nhógē-nhógē. Nhóg anhób áá, ‘Nchané etúú, ntāngéné chō ake dé anyín. Nchāa wε, méehenlé ahyε.’

¹⁹ Ampée anhób áá, ‘Bōób nén dēn, dōó ncháné nlád ní nyag n̄tāan éche élíε’ nzag. Chōó n̄kagké ahāgten nén. Sōn, méehenlé ape!’

²⁰ Ampée-’ε anhób áá, ‘Nkudé sōmbé ekóólé-ekóólé. Né-óó, méehenlé ape!’

²¹ Ane mbaledε antım ámbíd, áke aláá eche sāj mam mēsýāāl. Dōó ekanj ékóbé eche sāj áte, bonj álōmē ane mbaledε. Anhób áá, ‘Kāg mehélé, ékag á ntēm ní nzii, kóōne á mēte mé nzii mé dyad-tē, éhúen betóótókē bé bad, ne ábe bēhúné eped, ne ábe békwdé ndım, ne ábe béehélé ake.’

²² Eebemé áte ane mbaledε anhúú ámbíd, aláá sáá-a-ndáb áá, ‘A-sāj, mbelé ngáne wēnhōbpē, bonj ké nē, etál élyágé édé.’

²³ Dōó Sáá-a-ndáb áhóbé áá, ‘Kāg á nzii émbáá ne nzii é mehín, échéle kénzéé wεé áhyag ábel bonj ndáb élon.

²⁴ Á mbále, mod ké nhóg awě mēnsēbēē alébe, éewógké chōm ké ehóg á nsāl á ngande-tē hén!’ ”

Abé mbapεε

(Mat 10.37-38)

²⁵ Mbwe nhóg ndun e mod éhídé’ áá Yesue ámbíd. Héε ábóótédé bó aláa nén áá,

²⁶ “Nzé mod ahóbé áá, móhíde me, ésebán achādténé nyaá, sáá, mwaád, bán, baányan, kóōne áde alonjé dēn, ene ndın e mod eékwognedéé ábe awēm mbapεε.

²⁷ Kénzéé awě eepéme áde awōg, bonj áhídnē me, eékwognedéé ábē awēm mbapεε.

²⁸ “Nzé-módé ábē awě áwōnj mewēmten álōnj sājkalaa a ndáb, bonj ewēsébpé adyεε áse, áhāgten nkun nıme ene ndáb étédte mós, ábii ké móshēl chō amad, káa móchenlé?

²⁹ Nzé amaá-’ε ndáb asume, bonj eéhele chō amad, moosyāāl awě anyíné abelé ábootéd mós awel, bēhōbē

³⁰ bán, ‘Mod nhóg ansáá ndáb, bonj eéhele chō amad.’

³¹ “Nzé kāj póg ewēmténé waáb kāj bel akum, abelé asébé yál ahāg á ekáá ké mesonjé mé sánze nıme áwóó dıam dyóm dé ekálé, bēhēl ábe waáb awě awóó sánze dıam móom mé ekálé mébe.

³² Nzé anyiné áá mókwognedéé, abelé álóm belyáged bé dyad á’sō wεε waáb, waáb adépe mós benben, ábel nén békōm nsāj.

³³ Melemlem nē dōó édíí né ké nzéé awě eehúde chōm ásyāāl nłém. Ene ndın e mod eékwognedéé awēm mbapεε ábē.

Nkwē nıme mbódé e’ nyin

(Mat 5.13; Mak 9.50)

³⁴ “Nyébbii bán nkwē nıde chōm é bwām. Bonj nzé mbódé alāj, chán bēhele-se bényınéd mós ámpē?

³⁵ Méesaá dıam dé abelen ámpē. Apım dōó bėpımeé mós. Bad ábe bėwóó metúu, bėsōnjen bwām.”

15

Ngan e ndyōnj nı mbód nıme mēmbōó

(Mat 18.12-14)

¹ Mbwe nhóg belad bé tááse ne bebel bé mbébb bėmpēe, bėmpē wεε Yesue.

2 Dóo Befarisia ne bemeléede bé mbéndé bényongéé áte bán, “Nédé anén mod awonje bebel bé mbéb, bóbóo bédyag-ke ndyééd hóm ahóg.”

3 Héé Yesue ákánlé bó ngan nén aá,

4 “Nzé-módé adé awé áwōn mbwókel é rídyōn ní mbód, boŋ nhóg mbóo, boŋ eétdé ní míníí móom mé rídyōn ní mbód abog ne abog á etún-té, áke dé ahed ní mē nhóg ní mē mbóo kóŋ né adíbté mós?”

5 Adibed áde adibte-’áa mós, áhāg mós á abol ne menyinge mésyāāl.

6 Boŋ néé ápédé á dyad-té álad besón bé echoŋ ne baányān áte, aláá bó aá, ‘Syānē déwōg menyinge áyāle ndíbté ní mē mē rídyōn ní mbód ní mē mémbóo?’ ” 7 Yesue ambád ámpē aá, “melemlem-’áá rílangéé nyé mēé, menyinge métóm abé nē ádyōb ámín e mbelé-mbéb nhóg awé atédé abel dé mbéb boŋ átímné Dyōb tómaa ámín e móom mé bad abog ne abog ábe bésáá, ábe béehednád ahāŋlen.

Ngan e káppe eché embóo

8 “Káa, mūwāad ahéé adé awé áwōn káppe dyóm, boŋ néé póg ébóo, ééchōde’ ekag, boŋ áhedé ndáb áte, atōŋ ahed kóŋ né adíbté chós?”

9 Adibed áde adibte-’áa chós, alade baáb ne baányān áte, aláá bó aá, ‘Nyéwōgen me menyinge áyāle ndíbté ene káppe eché embóo me.’

10 Melemlem-’áá rílangéé nyé nén mēé, menyinge métóm abé nē ádyōb ámín e mbelé-mbéb nhóg awé atédé abel dé mbéb boŋ átímné Dyōb.”

Ngan e mwān awé ambóo

11 Yesue ambád ahób aá, “Mod nhóg ambé, anchyáá bán bé baachóm bébe.

12 Dóo epun ehóg, mwān asad álangéé sáá nén aá, ‘A-sán, beé me ádém akab á mbwóg áde rítāngéé akud.’ Héé sáá átédé chóm ésyāāl éche ánwōngé, boŋ ákabpé bó áte.

13 Nguse é e’pūn etómé-’áa, boŋ mwān asad áladé ní mē nted nísyāāl, ákág á aloŋ démpēe áde áchābnédé. Awed-tāá ápédé boŋ ábootéd aloŋgé á mbaambaa achog, ábēbté ngáb esyāāl eché ánwōngé.

14 Ade chóm ésyāāl émáá mós áyāl né bōob, sánkalaa á nzaa anhún á aloŋ-té wé. Atóg dós-’é ábótédé mós asól áyāl ngíne-ngíne.

15 Héé ákíí kunze e mod póg atán á dyad-té wé, áchóm mwā nsón. Ane mod mós-’é alóm mós aá, áke adítad mós esóg é nguu.

16 Anwōŋ á mewēmtēn aá, mósālōnté abum ké ne medyé mé nguu, boŋ modmod enkēmbáá mós chómchóm éche áhelese adyé.

17 Dóo ádyéé chóŋ, boŋ ákwanlád, áhōbē aá, ‘Nōné’ ngáne bembádele bélóné echem sán á ndáb-te, boŋ ké nē bédyāg medyé méchōbe áse, boŋ me-’é ríwāg nzaa hén!

18 Mésyāo, níke ntán echem sán, nláá mós mēé, A-sán, mbelé mbéb á’sō é’ Dyōb ne á’sō é’bōŋ.

19 Mmēn meekwognedéé áchāgned néé awōŋ mwān ámpē. Téd me ké nāngáne awōŋ mbádele nhóg.”

20 “Hē dōo ápádté áse, boŋ ásūē’ á dyad wéé sáá. Boŋ áde ákwógé ape á ndáb nē, sáá annyín mós mwā etún. Ankóbtēn sáá ngól. Sáá annyāgéd, alúm mwān ámín, ahé mós tál.

21 Dóo mwān álangéé mós nén aá, ‘A-sán, mbelé mbéb á’sō é’ Dyōb ne á’sō é’bōŋ. Meekwognedéé áchāgned néé mwān awōŋ ámpē.’

22 Héé sáá mós-’é áchénlé ábē bembádele, álangéé bó nén aá, ‘Nyéhiinad me nsob ní mē rítómténé adāŋ nē, á mehélé-te. Nyéwāad mós mós á yāl. Nyéhē-’é mós ebōŋ á ekáá, nyéhē-’é mós metámbe á ékuu.

23 Nyétéd nchóm-é-nyag awé dékálté nē, nyékwel mós, ábel nén, syānē moosyāāl dédyé débél-lé apaté.

24 Nyéhíí bán, awem mwān nén ammād awé, boŋ atimé ámbíd á aloŋgé. Ambóo, boŋ abídé áwed.’ Hé-’áá bēbótédéé ngande achog.

25 “Mmēn mésyāāl mēmbenléd áde mwānyān ambáá adíí á nzag-té. Ade áhótú, dōo áwógéé bad békóne, béságe-’é bwēm á ndáb-te.

26 Dóo áchénlé mbádele nhóg, boŋ ásedté mós dyam áde ábenlaad.

27 Dóo mbádele ne álúmtéé mós áte nén aá, ‘Pón mwānyōŋ ahúú ámbíd-óó. Sós akwēnlé mós nchóm-é-nyag ne, áyāle anyínen áde anyínné mós díd ámpē, ésebán dyamdyam ábélé mós.’

28-29 “Awóg áde áwógéé nē, anlīŋ, eekwēntene asól á ndáb-te. Héé sáá abídé á ebwóg, boŋ áhye achāŋ mós. Dóo mós-’é átímtanné sáá nén aá, ‘Nōné’, mēé nkéndyéén wē hén mwē ne mwē áde mibenléé wē ntú mé nsón, ésebán nwúene wē nló áte. Boŋ ké echéd é mbód weébāgēē me wēé, mbel apaté ne ábēm béd.

30 Boŋ ngáne awōŋ mwān á nlém ápédé ámbíd, mós awé amáá echoŋ ngáb esyāāl abébed ne bekwalé, ewúúde mós nyag eché etómténé akal.’

31 Héé sáá álangéé mós nén, ‘A-mwān, wē-éé edé ne me hén pónde ésyāāl. Kéchéé éche ríwóó-’é édíí échōŋ.

³² Embē bwām syánē áchog ngande, áwóg menyĩnge. Nén, mwānyon ammad awé, bon atimé ámbíd á alonjé. Ambóó, bon abidé áwed.’ ”

16

Ngan e mbalede awē abédé mwane

¹ Yesue anláá ábē bembape ampē aá, “Nhon ní mod nhóg mémbē. Bad bēnhye mō aláa bán awē mbalede ambáá abébe mō ngáb.

² Héé nímé nhon ní mod rílóme mbalede awed achæg, bon ásedté mō aá, ‘Ebál é póle éhéé ríwógé áyál echón nén? Lúmed me áte ngáne mesonjé mé bwēm níme mēmbanéé áse echón médíí, áyále éché étál é nsón émááné wē áte.’

³ Dóó mbalede ádólé áte chóón bon áhōbē aá, ‘Chán-nō mébenlé bōob áde echem sán áhédeé me ahúd á nsón? Ngíne eesáa me eché ríkwenlé nzag. Nzé ntimé-’é á nchómbé, né nē dépiinéé me akwágké á ngíne.

⁴ Ahá, nkudé debyéé áde méhægké, ábel bon ké á nsón dóó bēnhúdtē me, bad bēlyǎg békōb me nken áwab mendáb.’

⁵ “Héé áchénlé mod téé awē anwálé sáá alúm, áchægé bó nhógē-nhógē. Ade mod e’só ápédé, ansedéd mō aáken, ‘Mesonjé métān echem sán ékáléé wē?’

⁶ Ane mod aá, ‘Mbwókel é e’kwém é’ mól waam.’ Ane mbalede anláá mō aá, ‘Nōné’, echon kálag e melúm chó nén. Dyéé áse, étel á mehélé-te wéé, mbwókel é e’kwém é’ niin.’

⁷ Ansedéd mod awē alónténé bébe aá, ‘Alúm áde wē mesonjé métān?’ Ane anhób aá, ‘Mbwókel é nkute ní ngun éláán.’ Ane mbalede anláá mō aá, ‘Kōb echon kálag, étel wéé, mbwókel é nkute ébe.’

⁸ Ade nímé nhon ní mod ríwógé nē, ménkēméd éché ekúkú é mbalede aá, ‘Abēnlédé debyéé á bwām.’ ” Yesue ambád áte nén aá, “Nē dóó bad ábe bēhíde mekan mé nkōnsé bédíí. Bédé mehél áhagen échāb nyaa é bad debyéé, tómaa bad ábe bēhíde e’nyínen bé ekíde é’ Dyōb.”

⁹ Yesue ambád aá, “Nláa-’é nyé méé, nyébenled nhon mé nkōnsé, ákōb e’chon, áyále á pónde eche mémaa’ é áte, békōb nyé nken wéé bad bédyee’ é á ngíndé ne á ngíndé.

¹⁰ Ké nzé-módé awē awánlé mpín mé akan bwām, né áwale ámbáá bwām. Kénzée-’é awē eéhele mpín mé akan awále, né éehenlé ké ámbáá awále.

¹¹ Nzé éde-’é bán, weewánléé ngáb e nkōnsé ngáne étāngéné awále, nzé-módé ábē wē nhon ní mbále.

¹² Nēe wéewánléé nhon níme méesē nímōn bwām, nzé-módé ábāg wē nhon nímōn mwēn?

¹³ “Modmod eéhélēē-se abé mbalede a bewón bébe. Alúméd nhóg edānge tómaa aníníí, ké’ é átmēn nhóg, abānge aníníí áyál. Weéhélēē-se ebé mbalede a bad bébe abé ahóg. Weéhélēē-se ebé mbalede a Dyōb se ebé-’é mbalede a mōné.”

Nguse é ngan éche Yesue

(Mat 11.12-13, 5.31-32; Mak 10.11-12)

¹⁴ Befarisia bēnwōg nímē mésyāál, bon ngáne bēmbēē bedān bé ngáb, bēnswēdē mō swédén.

¹⁵ Yesue anláá bó aá, “Nyēdii bad ábe bélúmte bán bésáá á’sō é’ bad, bon Dyōb ábíí nyé nlem áte. Kéchéé éche baányon békémteé, edíí abúú ngēn á’sō é’ Dyōb.”

¹⁶ Yesue ambád bó aláa aá, “Mam níme mēntenléd á kálag é mbéndé é Dyōb, bekal bédáádān bómpē bēnhōb mō káāne á pónde eche jōne. Taase nē, nkalan ní bwām mé nkamlēn ní Dyōb rikanlad, mod téé-’é abune nímé nkamlēn abé áte.

¹⁷ “Ké nēngáne nkon ríse ne ní mín bēhēle bēmaa, atōte ké ahóg á mbéndé e Dyōb déekwaá.

¹⁸ “Kénzée awē anané mwaád, bon awón mwaád ampēé, né akábé asón. Ké nzé-módé-’é awē awóó mwaád awē bēnáné á ndáb e’wóngé, né akábé asón.

Ngan e nhon ní mod ne Lazarose

¹⁹ “Nhon ní mod nhóg mémbē, kase é mebad chóó áwáá’áá á yál. Mwēnze ne mwēnze mō ádyágáá mbwe téé.

²⁰ Ntógétōke ní mod nhóg mō-’é rínāngé’áá áwē mmwē mé e’ké bán Lazarose. E’kwese bēnlōn mō á yál.

²¹ Mewēmten mémbē mō aá, bébe mō píuted é medyé éche éhúné’áá á tébele a nhon ní mod. Mbwé chóó épágé’áá áhed, bon ényāngé mō e’kwese áte.

²² “Ade ntógétōke ní mod mé nīwédé, ángel éntéd mō, ékēēn mō á akéb áde Abrahame. Mmē nhon ní mod mōmpē ménwē, bélime-’é mō.

²³ A mbwóg e kwééd wē, nhon ní mod nībédé á metuné-te. Héé ányéné nló ámín bon anyín Abrahame se wíníí, ne Lazarose áwe akéb.

²⁴ Dóó álēbpeé nén aá, ‘A-Tē Abraham, sōn, wóg me ngol, élóm Lazarose átōde dúu dé e’mii á mendīb-te, áhye áhōded me echém, áyále meewógéé bu á dū-á-muu hén.’

²⁵ Abrahame anláa mós aá, 'A-mwān, ewēmtan á pónde eche wémbēē á nkōnsé ngáne wēnkudé bwēm é' bwām, bon Lazarosé mós-é ákūd bwēm bé mbéb-é? Bōōb-pōō awōge nímé menyinje hén, wēmpē edé á metuné-te.

²⁶ Néē éhúidé nē áte, wée sédii ne wée édíi, sánkalaá a mbān akabé syánē áte, ábel nēn mod eéhēlé asyāē wén se ápe wē. Modmod eéhēlé-'aá ásyāē wē, se ápe áwēd.'

²⁷ Nhon ní mod ménhōb aá, 'Ncháa-ōō, a-Tē mēé, élóM Lazarosé á ndáb eché echem sán.

²⁸ Nlyágé bānned bétáan. Áke álēb bós ábel nēn, bōmpē béepāg á hōm dé metuné hén.'

²⁹ Abrahame anhōb aá, 'Béwóō metelag níme Mosēē ne níme bekal bé'daōdān. Béwōgen chōm-ēē bétélé áse.'

³⁰ Nhon ní mod ménhōb aá, 'Aáy, a-Tē Abraham. Nzé mod akií bós atán awē abíde á mbwóg é kwééd, né bétédé ábel dé mbéb bétimēn Dyōb.'

³¹ Héē Abrahame áhōbēé aá, 'Nzé béekwētēne Mosēē ne bekal bé'daōdān awōgen, né béewōgēnné ké mod awē apuúde á mbwóg e kwééd bonj aláá bós.'

17

Abēled mod mbéb

(Mat 18.6-7, 21-22; Mak 9.42)

¹ Yesue anláa ábē bembapēē aá, "Nyébii bán mekōgsen níme mébelte bad mbéb métāngéné nyé apii. Bonj édé ngol ne kénzēé awē ápēén mós!

² Embē mbonj né bēntāō ene ndín e mod sánkalaá a aláá á nkān, bébwém mós á edib-te, tōmaa mós ábēled ábēn bēndem mbéb.

³ Nyétédēn yāl pónde.

"Nzé mwānyon ábelé wē dyam dé mbéb, échu mós aláá wēé nē déeboō'ē. Nzé achemé-ē áde awusé bonj ahāñléné, élagsén mós.

⁴ Nzé apānné wē ngen saámbé áyāle epun é bín, bonj apedé-ē áwōn ngen saámbé áchóm alagsen aá, 'Nhāñléné', etāngéné mós alagsen."

Adúbe déechinēé

⁵ Bembapēē bé nlómag bēnlāā Sāngwēé bán, "Wéd sé adúbe áte."

⁶ Sāngwēé anhōb aá, "Nzé nyēnwōn adúbe áde áde mwāmpin nēngáne mbál-e-bū, né nyēkamlén ádén alín dé e'sáá bán, 'A-bwēl, wubé áse, éke ésumen á edib é nkwē-te', é'wōgēn-ne nyé.

Abel dé nsón

⁷ "Détéd bán, nyé mod nhóg nyēwóō mbāledé awē akií nzag alii, káa akií ānon rídyon ní mbód. Nzé ahúú á nsón, chán wēlāā' é mós? Wēlāā mós wēé, 'Hyé édyēē áse hén, édyē ndyééd,'

⁸ káa wēé, 'Belé me ndyééd étómted me, étyéem-me á nkōg, kōōn nímad adyé, bonj ámbíd é pónde, wē-ē édyág?'

⁹ Nyéláa me ké wēsāgnān ane mbāledé áyāle ábélé níme nsón?

¹⁰ Né-ōō nyēmpē, nzé nyēmaa chōm ésyāē eche bétiméné nyé ábel, nyéhōb bán, 'Sédii bembāledé ngēn, nímēd nsón-naá sébélé sé ngáne.'

Yesue asānté bad bé melān dyōm

¹¹ Ade Yesue ákagké á JerusaleM, atómé'áá á nchii ní nzii mé alonj á Samaria ne alonj á Galilia.

¹² Asól áde ásolé mwā dyad nhóg, antán bad dyōm ábe melān mékóbé. Bēntyēem nchabnede,

¹³ bélēhpē mós ne esaád bán, "A-Yesu, a-Sán, sōn, wóg sé ngol!"

¹⁴ Ade ányíné bós, anláa bós aá, "Nyékag wēē beprise, nyélúmed bós yāl." Ade békagké nē, yāl é nsán bós*.

¹⁵ Bós mod nhóg, annyín nēn aá módyéé bwām. Héē átímé ámbíd, ákéne Dyōb ne ehōb éche échágké.

¹⁶ Ankwē Yesue á mekuu, ásāgnān mós. Anén mod abééé mod á Samaria.

¹⁷ Yesue ansédéd mós aáken, "Esaá mbāle bán nsānté nyé bad dyōm-ē? Héé ábiní abog bédíí?

¹⁸ Nédē mod ké nhóg ampée eétimeé ámbíd áhye dé abe Dyōb mekenag, éetóméé anén mod á nken-ē?"†

¹⁹ Héē álāngéé mós aá, "Tyéém amín, ékag. Adōn adúbe ádíde wē bwām."

* **17:14 Asaad a yāl:** Nzé melān ménkōb mod bétédé'áá mós néē mod awē eesáa. Bébéné'áá mós bán, eesíté wēē bad bédíí. Prise chōō énwōn kunze ásimen mod melān bonj ébided mbakú nēn bán asáá, bonj ábooted ápe wēē bad bédíí. † **17:18** Bad bé Israel bēntéd bad bé Samaria néē benzinéé. Bōbōó béekagé'áá ké mwāmpin áyāle nyāa e mekan mé mbwóg ne mekan mé alonj. Ké nyāa e ábele á Dyōb ne hōm dé mekáne bēmbē bós nshāñlén.

*Epe é nkamlen ní Dyòb
(Mat 24.23-28, 37-41)*

²⁰ Beparisia bènsédéd Yesue bánken, “Póndé ehéé nkamlen ní Dyòb mépéé?” Yesue anláá bọ́ aá, “Nkamlen ní Dyòb méésaá dyam áde mod ányínnéé òdìd,

²¹ káa dyam áde mod áhòbpé aá, ‘Nóné,’ mòmén,’ káa ‘mòmíníí.’ Aáy, nkamlen ní Dyòb nímáá abé átínté echèn.”

²² Héé álanḡéé bembapée nén aá, “E’pun é’ bín é’ hùe á’sò ábe nyédəḡḡé bán né nyényín ké mbwe nhóg níme Mwän-a-Moonyon álümédṡé nyé yál, bonj nyéenyínné.

²³ Bèlāá nyé á póndé eched bán, ‘Mónén,’ káa ‘Móníníí,’ bonj nyéehántán bọ́.

²⁴ Ayāle, ngáne emwedmwed étóméé, bonj épenté ngob e Dyòb ped póg ne eníníí, nê dáo epun éche Mwän-a-Moonyon ápéé ébēé.

²⁵ Bonj éḡḡé nê, atəḡḡé metuné híin akud. Kónne enén nyonḡe e bad eébanj mọ́ ayāl.

²⁶ Ngáne émbēé á póndé eche Noa, nê dáo ébēé á póndé eché Mwän-a-Moonyon.

²⁷ Bad bédyáḡé’áá medyé, bémwāḡ mím, baachóm bəwó’áá bebaád, bebaád-te békāḡ á mewóḡḡé káonj ne mbwe níme Noa ásolé á bōle é’mbáá-te bonj mbúú echó, mesén mélóné, méhōód ábē bad bésyāāl.

²⁸ Melemlem nê dáo émbēé á póndé eche Lote. Bad bédyáḡé’áá medyé, bémwāḡ mím, békābē dyan, bəwēnē bwēm, bəlōō-é mendáb.

²⁹ Bonj mbwe níme Lote ásyəḡḡé á dyad á Sodom, nímé mbwe dēn muú ne meláá níme méhyāntan, mémbíḡ ádyòb nées mbúú, níwúú ábē bad bésyāāl.

³⁰ Melemlem nê dáo ébēé nímé mbwe níme Mwän-a-Moonyon ányínnédṡé.

³¹ “Eché epun, mod awé adé á nnonj ní ndáb mín áde nnonj rídíí mọ́ á ndáb-te, eéṡḡné asud ásé áhye dé atéd mọ́. Melemlem-’áá mod awé adé á nzag-té, eéṡḡné atim ámbíḡ á ndáb.

³² Nyéwēmten dyam áde dēmbenléd ne Lote mwaád.

³³ Kénzézé awé awóó mewēmten ásonj áde alongé, ábòd dó. Kénzézé-’é awé abódé áde alongé, né asóó dó.

³⁴ Á mbále, bad bēbe bēnaá anonj ahóg nkuu, bétéd nhóg, bétédē aníníí.

³⁵ Bebaád bēbe békḡḡé medyé, bétéd nhóg, bétédē aníníí.”*

³⁷ Dáo bembapée bésedṡéé mọ́ bán “A-Sánj, héé nê dēbenlédṡé?” Yesue antimṡén bọ́ aá, “Wéé ndim níbāḡkē, áhed dáo benhḡḡoné bēladnéé.”

18

Ngan e ngwée e mod bọ́ nkúḡ é mmwaád

¹ Yesue ankalé ábē bembapée ngan álumed bọ́ áte nén aá, bétəḡḡé békānē póndé téé ésebán bēhúnte nlém á abum.

² Anhób aá, “Mod abédé dyad ahóg, awé akáadte’ bad. Ane mod eebáa’áá Dyòb, eébage’áá-’é modmod edúbé.

³ Nkúḡ é mmwaád-te abédé melemlem mé dyad, eémaa’áá’ wée ane mod. Póndé téé álanḡé mọ́ aá, ‘Sé mod séwóḡḡé méhób. Káád sé ésuud me nṡom.’

⁴ Á mbooted ane mod enkénháá mọ́ dúu. Bonj ámbíḡ é póndé anláá yál aá, ‘Ké nēḡḡáne méebagéé Dyòb edúbé, méebāā-’áá modmod,

⁵ ngáne édíí bán anén nkúḡ a mmwaád ahédé me nló, mēkāā níme nkáá ábel rísud mọ́ nṡom. Esebé nê, né káonj ne á asóg éemwaá aá níkún ne epe éche ápagké nén póndé ésyāāl.”

⁶ Héé Sāḡwéé áhóbéé aá, “Nyéwóḡé chóm-éé ekúú é mod awé akáadte’ bad awé eebíi Dyòb éhóbé-ye?”

⁷ Nédé Dyòb déekunné ábē bad ábē ápwédé-ye? Béchye’ne’ mọ́ nwōḡḡen nkuu ne mütte, nédé ákōlén bọ́ metúu póndé téé-ye?

⁸ Nlāá nyé mēé ákun bọ́ mehélé mehélé. Bonj nyédúbpe bán Mwän-a-Moonyon átan adúbe á nkōḡsé-te á póndé eché ápéé-ye?”

Ngan e bad bēbe ábe bēnkē ákáne

⁹ Yesue ankāl ngan empée tənḡene bad ábe bényíné’áá yál nées bad ábe bésáá, bényíné-’é bad bēmpēe nkōḡṡéd.

¹⁰ Anlāá bọ́ aá, “Bad bēbe bēnkē á Ndáb-e-Dyòb ákáne. Nhóg abédé Farisia, aníníí-’é abé nlad-é-tááse.

¹¹ “Ane Farisia antyéém á ámín, ákáne’, áhóbé á nlém-té* áá ‘A-Dyòb, nsāḡḡnéé wé. Ayāle nén, meésáá nēḡḡáne bad bēmpēe, ábe bédume bwēm é’ bad, ábe bēbēbē nlém ábum, ábe békābē mesón á ndáb e e’wōḡḡé. Nsāḡḡnéé wé ayāle meésáá nēḡḡáne anén nlad-é-tááse hén.

‡ 17:35 Donḡe á kálag dé sọ abádé nchoo 36: Bad bēbe bēbe á nzag-té. Bétéd nhóg, bétédē aníníí.

* 18:11 Antyéém ámín, ákáne, áhóbé á nlém-té: donḡe á kálag áwóó atyéém á nkḡḡ, ákannád yál.

¹² Ndé nén, ndide' yál nzaa á mekáne-tê ngen ébe sôndé téé. Chôm téé éche níkudé-é nkabe chô áte monje dyôm, mibagé we akab nhóg.

¹³ "Nlad-é-táase pen antyéem nchabne, eéhele ké mîd anyen ádyôb. Ambán ekáá á nlém, ákánne aá, 'A Dyôb, wóg me ngol. Ndií mbelé-mbéb.'"

¹⁴ Héé Yesue ábádé aá, "Nlâa nyé nén meé, anén mod awé rdímíténé nyé aláa, ansú awe ndáb néé mod awé asáá á'sô é' Dyôb. Ayâle mod ké ahéé awé achágté yál, bésudéd mó. Bonj ane awé asúdté eche yál, béchâgéd mó."

Yesue ne bânban

(Mat 19.13-15; Mak 10.13-16)

¹⁵ Bôob-pôô bad bépééné' aá bëndem wéé Yesue nén bán ábán bó ekáá á yál ánamed bó. Ade bembapée bényiné nê, bénkâné ábê bad áte.

¹⁶ Bonj Yesue anchélé ábê bán, áhóbê aá "Nyéede bânban béhyag áwém. Nyéekáá bó áyâle nén, nyaa e bad néé bó chôó éwóó nkamlen ní Dyôb.

¹⁷ Ne mbále, nlânge nyé nén meé, kénzéé awé eékobe nkamlen ní Dyôb nêngáne mwëndem, éesónlé áwéd-te."

Mod a nkamlen

(Mat 19.16-30; Mak 10.17-31)

¹⁸ Nkamlene nhóg ansédéd Yesue aá, "A-meléed a bwám, cheé mébenlé ábêl nén níkud alongé áde déemaá?"

¹⁹ Dôó Yesue ásedtéé mó aaken, "Cheé ékáá bonj échagé me meléede a bwám? Mod ké nhóg eesaá mod a bwám étóméé Dyôb dêmpen.

²⁰ Ebíí mbéndé éche éhóbê bán, weekábé asón á ndáb e e'wóngé, weewúé mod, weechíbé', weebídé mbónj e metóm, béé sóó ne nyonj edúbé."

²¹ Ane mod a nkamlen antimtéén aá, "A meléed, nhídé échén mbéndé ésyâal bootya se á mwëndemé."

²² Yesue awógé-'aá nê, bonj álânge mó aá, "Dyam ahóg éhedne we. Sóm bwém é'syâal ábe éwóó, étéd nímê mané, ékabe betóótókê bé bad. Nzé ebelé nê, wêkúð nhon ádyôb. Ene póndé éhye éhíde me."

²³ Awóg áde ane mod a nkamlen áwógé nê, anwóg ndutul bwámbwam, áyâle ambé nhon bwámbwam.

²⁴ Yesue anyíné-'aá ngáne á súdné bonj áhóbê aá, "Eléí áte bwámbwam behon bé bad ásól á nkamlen ní Dyôb.

²⁵ Edé mwân e akan sánjalaa a nyam néé kamêl áponj á epón é ndonde, tómaa nhon ní mod ásól á nkamlen ní Dyôb.

²⁶ Bad ábe bénwóg chóm eché Yesue ánhôbpé, bénhób bán nzé néé edíí, né nzéé-ô ahele ákud e'soósonj?"

²⁷ Dôó Yesue áhóbéé aá, "Dyam áde baányonj bényínéé bán álélé áte, déelenledéé Dyôb áte."

²⁸ Héé Petro áhóbé aá, "Nóné", sêtédté ábed bwém é'syâal áhíd we."

²⁹ Dôó Yesue álângeé bó aá, "A mbále, nlânge nyé meé, kénzéé awé atédte eche ndáb káa mwaád, káa baányan, káa sáá ne nyan káa bán, áyâle nkamlen ní Dyôb,

³⁰ ákúð nsyónj ámbíd mbád ne mbád enén póndé. Akud-te alongé áde déemaá' á póndé échê ehúé'."

Yesue akánlé eche

kwééd ne mpuu

ngan ámpé

(Mat 20.17-19; Mak 10.32-34)

³¹ Héé Yesue átimné ábê bembapée dyôm ne bébe kun bonj, álânge bó aá, "Pón nyébíí bán dekap á Jerusalem. Mam mésyâal-le níme bekal bé'dáádaj bétélé áse tângene Mwân-a-Moonyonj mébenléé áned.

³² Eténlédé nén bán bébê mó á mekáá mé bad ábe béese bad bé Israel. Bó-é béwelé mó, béesyâá mó, bésobé-é mó meléed á yál. Bébomtéd mó, béwúú-é mó.

³³ Bonj ámbíd e e'pun é'láán ápuú."

³⁴ Bonj bembapée bó-é bénkénsonjénné dyamdyam áyâle nímén mam mésyâal. Enén ngan entóm bó debyéé áte. Bénkénchemmé chóm éche Yesue áhóbé' aá.

Yesue achôñte mod a ndim

(Mat 20.20-34; Mak 10.46-52)

³⁵ Bôob-pôô áde Yesue ákwógé ape á dyad á Jeriko, mod a ndím nhóg andyéé á nkæg ní nzii, áchômé bwém.

³⁶ Awógé-'aá ndun e mod étóme, bonj ásedté bad dyam áde áde.

³⁷ Dôó bélânge mó bán, "Yesue, mod a Nazaret mó áto me nê."

- ³⁸ Hée ábóné aá, “A-Yesu, Mwän a mbyaa nime Dabide, wóg me ngól!”
- ³⁹ Bad ábe bémbē á’sō bēnkānē mō áte, bēlāá mō bán ádíb nsəl. Bonj mō-’ε ambé ábōnē aá, “A-Mwän a Dabid, wóg me ngól!”
- ⁴⁰ Dóo Yesue átyéémé, bonj áhōbē aá béhyεene ane mod. Ane mod apedé-’aá mō benben, Yesue ásedtē mō aá,
- ⁴¹ “Cheé éhēdē wée, mbele wε?” Mō-’ε anhób aá, “A-Sán, bēl nnyinen ámpε.”
- ⁴² Dóo Yesue-’ε álāngē mō aá, “Nyínén-nō! Adúbe ádōn ádíde wε bwám.”
- ⁴³ Ábwōg-ábwōg ambootéd anyínen, áhídē-’ε mō, ábagé Dyōb mekenag. Ade ene ndun e mod ényíné nē, bōmpē bēmbootéd Dyōb akémed.

19

Yesue atáné nlad a

táds: bán Sakio

- ¹ Yesue ampōn á dyad á Jeriko, bonj atómé’áá tómén.
- ² Mod nhóg-ke abédé áwed bán Sakio, abédé-éé nlad-é-tááse ambáá, abé-’ε nhon mí mod.
- ³ Ahédé’áá aá mōnyín ane mod awe béchagεé Yesue, bonj nzii enkēmbagnédte mō, ngáne amute démbēē áhed, mō-’ε ambé esón.
- ⁴ Hée ányágté á’sō bonj áchágke bwel é’ sikamō ábel bonj ányín Yesue. Yesue ahúé’áá ene ped.
- ⁵ Apedé-’aá áhed, bonj aá mōsad díd ámín, ányíné Sakioε. Dóo álāngεé mō aá, “A-Sakios, súd áse á mehélé-te. Ntángéné nken abé áwōn ndáb chii.”
- ⁶ Hē dōo Sakioε á súdē áse ésebán abéhte pōndé, bonj ákobé Yesue nken ne menyínge mésyāal.
- ⁷ Bad bésyāal ábe bényín nē, bényónge’áá áte bán, “Akií nken abe á ndáb wée mod awe adé mbelé-mbéb.”
- ⁸ Sakioε antyéem ámín, álāngē Sánngwée aá, “Nōné’, a-Sán, mētéd nhon nímém, ríkab mō áte e’ped é’be, mbé eped ehág wée betóótōkē bé bad. Nzé édé-’ε bán nkōbné mod kéchéé á edoké-te, mētímtéd mō chó ámbíd ngen éniin.”
- ⁹ Bonj Yesue mō-’ε anláá mō nén aá “A epun é bín é’ chii, e’sooson é’bágnédé ne enén ndáb. Anén mod mōmpē adíí mwän a Abraham.
- ¹⁰ Mwän-a-Moonyon apedé ábel bonj áhed bad ábe bēbós, áchood-te bó.”

Ngan eche bényāgnédte bembalede ngáb

(Mat 25.14-30)

- ¹¹ Bad bēwóglánáá chōm-ée Yesue áhóbé’áá. Yesue ammad ape benben ne dyad á Jerusalem. Né-ōó bēwēmtān bán nkamlen ní Dyōb mépē ábwōg-ábwōg.
- ¹² Hé-’aá áhóbéé aá, “Kunze e mod póg eladé’áá yāl áke eke á alonj áde áchábnédé ábel nén bēwóged mō kân, bonj ásu’ε.”
- ¹³ Ade ákagké, anchélé ábē bembalede dyóm, ábagé nhóg téé ekálé é kábpe dyóm aá, ‘Nyétéd nén, nyékábe nyonggé káon ne á pōndé eché méhūú’ε.’
- ¹⁴ Bonj áde alonj á bad dénkéndāngé mō. Bēnlōm mēsénze áhíd mō áláa ngómēnaa bán, ‘Séekobéé bán anén mod ábē echéde kân.’
- ¹⁵ “Ké nē bēmbel mō kân, áttim-me ámbíd áwē dyad. Ade áhúú, ábwōg-ábwōg anlóm ábē bembalede ábe ámbagké ngáb achag ábel bonj ábíi nsyān nime békúde á nyonggé-te.
- ¹⁶ A’só ampé ahób aá, ‘A-Sán, échon ekálé dyóm échyáá nsyān nime rídé ngen dyóm.’
- ¹⁷ Ane mod anláá mō aá, ‘Nē ábóó, edíí mbalede a bwám! Ngáne éhélé mekan mesad alyáged ngáne éhēdnadté, mbage wε ngáne ákamlen myad dyóm.’
- ¹⁸ Mbalede awé alónténé bébe mōmpē ampé ahób aá, ‘A-Sán, échon ekálé dyóm échyáá nsyān nime rídé ngen é’taan.’
- ¹⁹ Ane mod anláá ane ámpé aá, ‘Wékamlén myad métāan.’
- ²⁰ “Dóo mbalede ampée apédé bonj áhōbē aá, ‘A-Sán, ábonj e’kálé dyóm wε bén. Menkanj bó á wāngese-té, ríkoo.
- ²¹ Mbáá’áá me ngé, ngáne mbíí bwám meé, échon chōm éhūnēé á ndōob. Weébēlēē bonj edyág, ehúde-’ε wée wéewēnēε.’
- ²² Hée ane mod áttimanné ane mbalede aá, ‘Mmōn nsəl mēn mós méwūú wε. Ebébtéd é mbalede nēε wε. Néε emōn émáá abíi wée, échēm chōm éhūnēé á ndōob, ebíí-’ε wée, meébēlēē bonj rídýág. Néε ebíí wée nhúde-’ε wée méewēnēε,
- ²³ cheé-ōó énkān bonj weehéde echem ngáb á ndáb eché bad békōngéé ngáb, ábel bonj nzé ríhúú ríkob chó ne nsyān ámín?’
- ²⁴ “Hée álāngεé bad ábe bényéem á nkag áhed aá, ‘Nyékoben mō ábē e’kálé dyóm, nyébag bó wée mod awé awóó mbwókel e ekálé.’
- ²⁵ Ábē bad bó-’ε bēnláá mō bán, ‘A-Sán, ane mod amaa mbwókel e ekálé awónj!’

²⁶ Hée ane mod átímtanné bó áá 'Nláa nyé meé, kénzée awé awóó, Dyöb débād mó abe. Boŋ ane awé mó-ε eewóó, Dyöb dékobén mó káñne mwämpín awé awóó.

²⁷ Boŋ bad ábe békóó me, ábe béehede'áá bán míbê echab kâñ, nyéhyeene bó hén. Béwúú bó áwem e'só hén.' "

Yesue asólé á Jerusalem née kâñ

(Mat 21.1-11; Mak 11.1-11; Jón 12.12-19)

²⁸ Yesue amaá-'áá enén póle akal, abwógé áse ámpê, áke á Jerusalem.

²⁹ Ade ákwógé ape á myad mé Betpeg ne Betani á Ekone é Menzab, anlóm bembapeε bébe áá.

³⁰ "Nyéke á dyad áde áde á müde nímíní. Nzé nyépedé á nló ní dyad nyéenyín ngáne bétáñgé mwán a ésel awé mod éédídeε mbéd. Nyéhune mó, nyéhyeene hén.

³¹ Ade mod asédté nyé aáken, cheé ékáá boŋ nyéhunné chó, nyéláa mó nén bán, 'Sáñgwée* atógnéné chó.' "

³² Bad ábe ánlömmé békí-'áá, bétān-ne chó melemlem ngáne ánlāá'é bó.

³³ Ade béhunnéé ésel, bewóñ bénsedéd bó bánken, "Cheé ékáá boŋ nyéhunné éché ésel?"

³⁴ Bó-ε béñhōb bán, "Sáñgwée atógnéné chó."

³⁵ Hée bépééné chó wée Yesue. Béntāl échab mbóté áwedé-mín, boŋ béchāgtē Yesue áwedé-mín.

³⁶ Ade ábóótédé ake, bad bétānlé'áá mó échab mbóté á nzii-tē.

³⁷ Ade ábóótédé Ekone é Menzab asyoge ásol á Jerusalem, ndun e bembapeε embootéd abwεen ámín ne menyinge, békene Dyöb ne esaád áyale ndale é mekan ésyāāl éche bényíné,

³⁸ Béñhōb bán,

"Nnam ne kâñ eché epag á ðín áde Sáñgwée!

Nsañ míbê ádyöb,

Ehúmé ébê-'ε ne Dyöb áde áde se ámín!"

³⁹ Nguse é Befarisia éche énsōblēn amute á bad áte bēnlāá Yesue bán, "A-meléed, láá ábōñ bembapeε bēlām!"

⁴⁰ Mó-ε antimén bó áá, "Ne mbále, nzé ábén bad bédíbe nsəl, né meláá múmó mébootéd abón."

Yesue alebe dyad á Jerusalem

⁴¹ Ade Yesue ápedé á nkag ní dyad á Jerusalem, annyín dyad á'só. Dóó mésod mébóótédé mó abíd á míd, áchye' Jerusalem

⁴² áá, "Embōñ bán nyébii mekan míme mépeene nsañ. Boŋ bōob, nyééhēlēé mó anyín.

⁴³ E'pun é' bín é' hūe nyé á'só á pónde eché bad ábe békóó nyé bélēñnédté nyé nkúmbág nēe e'ké, bēbentēn-ne nyé ped ésyāāl,

⁴⁴ boŋ bēmad nyé, nyáabe áben bán moosyāāl. Aláá ké ahóg déelyagké áse áyale nyénkénchemmé pónde eché Dyöb ápedé áson áðén alonjé."

Yesue apedé á Ndáb-e-Dyöb

(Mat 21.12-17; Mak 11.15-19; Jón 2.13-22)

⁴⁵ Yesue ansól á Ndáb-e-Dyöb, ábootéd bad ábe bésómé'áá bwēm áwēd-te ananted,

⁴⁶ álanjé bó áá, "Eténlédé á kálag e Dyöb nén bán Dyöb áhóbé áá 'Echem ndáb ébē ndáb e mekáne.' Boŋ nyétímté chó mbwog mé bechíb."

⁴⁷ Bootya nē, Yesue ayágté'áá bad á Ndáb-e-Dyöb. Bepriε bémbáá ne bemeléede bé mbéndé bóobε belyágéd bé dyad, bó-ε béhedé nzii eche béwúé'é mó.

⁴⁸ Nzii-ε eebédeé bó ábel dyam áðii dyam, áyale moosyāāl andāñ e'yale ábe Yesue awóg ne kán esyāāl.

20

Nsedtéð tñjgene kunze eche Yesue

(Mat 21.23-27; Mak 11.27-33)

¹ Mbwe nhóg Yesue ambé á Ndáb-e-Dyöb áyāgté bad, ákanlé-'ε bó nkalañ ní bwām. Hée bepriε bémbáá, bemeléede bé mbéndé ne bad bémbáá bé dyad, bépédé áwé,

² boŋ bésédté mó bánken, "Láá sé, kunze ehéé éwóó ábel nímén mekan? Nzé-módé abagé-ε wε enén kunze?"

³ Dóó Yesue átímtanné bó áá, "Mémpe meésedéd nyé dyam ahóg; nyéláa me

⁴ wée kunze eché Jone ádušánnáá bad émbídté, wée Dyöb, káa wée moonyon?"

⁵ Bēn ne bēn bēmbootéd atāññen bán, "Nzé dehóbé bán, 'Jone eché kunze enhúú ne Dyöb,' né ásedéd syáné aáken, 'Cheé-ñ enkāñ boŋ nyénkéndúbé mó?"

* 19:31 Sáñgwée káa nwoñ.

⁶ Bonj nzé dehóbé bán, 'Eché kunze ehúú ne baányon,' né ábén bad bésyāal bēlūm syānē meláá, áyale bēndūbē bán, Jone abédéé nkal é'dáádān.'

⁷ Hē dóó bētímténé mós bán, "Séebíí' é wée ene kunze émbídtē."

⁸ Dóó Yesue álanǵéé bós aá, "Né ké me-'é ampē méeláá' é nyé kunze eché ríwóó ábel nímén mekan."

Ngan e bebel bé nzag ntéd

(Mat 21.33-46; Mak 12.1-12)

⁹ Hée Yesue ákanléé bad ngan nén aá, "Mod nhóg ambé, ankwēl nzag e e'pum é mel ábe bébenléé mím. Ambé ene nzag wée bad ábe bóbōó bēkāb mbote áte, áké eke á alonj démpēe, ábēm-me áwed.

¹⁰ Póndé epedé-'aá eche bépádeé e'pum, bonj álōmē mbalede wée bebel-bé-nsón, ákobe mós adé asii dé e'pum. Hée ábē bebel-bé-nsón bēwānnē ane mbalede, bésúúdtē mós ámbídtē ne mekáá mé ngēn.

¹¹ Anlóm mbalede ampée, bonj bēmbōm ane mómpē, bēwōgēd mós e'són bwāmbwam, bésúúdtē mómpē ámbídtē ne mekáá mé ngēn.

¹² Ambé alóm awé alónténé beláán. Awed bēnlōgēn, bēbwēm-me mós ámbídtē e'ké.

¹³ Hée nwóó-nzag ádolé áte chóónj, bonj áhōbē aá, 'Chán-nō mébenléé bōob? Mēlōm awem mwān awé rídós bwāmbwam. Kapóg bēbe mós edúbé.'

¹⁴ Bonj áde bebel-bé-nsón bényíné mós, bēnnōnén á mesó, bēhób bán, 'Ndyé-a-mbwóg mwēn nén. Déwúú mós, ábel eche mbwóg ésuuned syānē'

¹⁵ Dóó bēbídné mós á nzag-tē, bonj bēwūē-'é mós." Hée Yesue ásedtēé aáken, "Bōob-póó, cheé nwóó-nzag ábenléé bós?

¹⁶ Apē awúú bós, ábē-'é ene nzag wée bebel-bé-nsón bēmpēe." Awóg áde bad bēwógé nē, bēnhōb bán, "Ene ndín e dyam eébenlād mbébl!"

¹⁷ Yesue annon bós á mesó, ásedtēé bós aáken, "Chán nyésórténé eyale é Dyób éche éténléde bán,

'Aláá adé belónj-bé-ndáb bēchenéé

dóó áttímé aláá dé etógnén abé.'

¹⁸ Mod ké ahéé awé álum adé aláá ámín ábōgtēd áte. Bonj mod awé déhūntēdtē ámín, ányōgtēd áte áttím mbúmbú."

¹⁹ Bemeléde bé mbéndé ne beprise bēmbáá bēnhéd nzii eche békóbeé Yesue ábwōg-ábwōg, ngáne bēchemmé bán áyale echáb dóó ákálé enén ngan. Bonj bēmbān bad ábe bēbédé áhed.

Nsedtéd tǵngene asaa á tááse

(Mat 22.15-22; Mak 12.13-17)

²⁰ Né-óó, bemeléde bé mbéndé ne beprise bēmbáá bēhédé'áá kase e etál, ákób mós. Bēmpwēd bad, bésábé bós, bēlóm bós áhíd mós. Abé bad bēntǵngēn ábāntēn nén bán, bēhíde mós ne nlém nhóg, ábel bonj békób mós awusé á nsal, bonj ene póndé bēbé mós á mekáá mé ngómenaa a Roma awé adé á nkamlēn.

²¹ Hée bad ábe bēnlōmmē nē belǵngéé Yesue bán, "A-meléed, sébíí bán ehóbe', eyágte-'é mam níme métǵngéné. Weékwognádtē modmod. Eyágte-'é bad mekan mé Dyób á nyaa eché étǵngéné bwām.

²² Mbéndé eche syānē ehóbe nén bán désange' tááse wée Kaisēe, kǵn e Roma-ye?"

²³ Bonj Yesue anchem bós akwāb. Hée álanǵéé bós aá,

²⁴ "Nyélúmed me mōné mé ekii. Edíidǵngé éche nzéé chēn, dín áde nzéé-'é dēn?" Bēntímtén mós bán, "Dín ne e'só ábe Kaisēe."

²⁵ Dóó Yesue áhóbeé aá, "Nyébag-kóó Kaisēe éche édé éche Kaisēe, nyébag-ke Dyób éche édé é Dyób."

²⁶ Bōob-póó, nzii ké póg enkēmbáá eche bēkōbēnnē mós póle e awusé á nsal. Né-óó, bēndīb nímāb nsal ngáne dyam dénkēmbōngéé bós ahób. Nyaa eche Yesue ántímténné bós enkóméd bós yǵl áte.

Nsedtéd tǵngene mpuu

(Mat 22.23-33; Mak 12.18-27)

²⁷ Donje á Besadusia bēmpēé wée Yesue. Besadusia bēndūbē bán mpuu méesaá ámbídtē e kwééd.

²⁸ Dóó bēhóbeé bán, "A-meléed, mbéndé e Mosēe ehóbe nén bán, 'Nzé mod awóó mmwaád, bonj awédé áde bós ane mmwaád bépedéé mwān awále, mwānyan a abum ahóg atǵngéné ane nkúd awónj, ábel bonj dín áde mwānyan déebōó'."

²⁹ Bōob-póó, bad bēbédé mod saámbé ábe bēmbídtē abum ahóg. Mod a'só anwónj mmwaád bonj awé áde bós mmwaád ne bépedéé bán awále.

³⁰ Mod awë anlóntén bébe anwón ane mmwaád. Mómpe awë ésebán achyáá mwán.

³¹ Ambíd é pónde awë anlóntén beláán mómpe anwón mó, kásh b́ mod saámbe bébom ḿ awón, nhóg ámbíd a aníní. Bon b́ mod ké nhóg bénkénchyáá mwán ne ane mmwaád, kásh b́ moosyáál béwé-é.

³² Káshne á asóg ane mmwaád mómpe anwé.

³³ Bóob-póó á pónde e mpuu, mmwaád awë nzéé ane mmwaád áchagnédté áyale b́ moosyáál saámbe bénwón ḿ?”

³⁴ Dóo Yesue átimtanné b́ aá “A pónde eche dédíí áte nén chii, bebaád ne baachóm béwónne’.

³⁵ Bon bad ábe békwógnédé ábé á mpuu á kwééd bon bésón-le á alongé dékóalé béewónneé.

³⁶ Bébéé nées ángel, béewág-kaá ámpé. Apuu áde bépuú’é, bán bé Dyób b́oó bébéé.

³⁷ Mosée mwén ámpé alúmté áte aá, bad bépuude’. Wée Mosée átélé á Kálag e Dyób aá, mwá bwel akóbé muú, achagé Sánwéé áhed aá, Dyób áde Abrahame, Dyób áde Aisige ne Dyób áde Jakóbe.

³⁸ Dyób ádíi Dyób á bad ábe bédé á alongé, saké Dyób á bad ábe béwédé. Nê den álumte bán ne Dyób, b́ moosyáál bédé á alongé.”

³⁹ Donge dé bemeléede bé mbéndé bénhób bán, “A-meléed, chóm éche éhóbé étáshgéné.”

⁴⁰ Né-óó modmod enkénchu’é mó dyamdyam aseded ámpé.

*Nsedtéd tángene Ane-awë-Béwógté
(Mat 22.41-46; Mak 12.35-37)*

⁴¹ Héé Yesue ásedtéé b́ aáken, “Cheé ékás bon bad béhóbé bán Ane-awë-Béwógté abídé á mbyaa níme kâh Dabidé?”

⁴² Ngómé Dabidé mwén ahóbé á Kálag e Ngáse aá, “Sán Dyóbe anláá awém Sánwéé aá,

‘Dyéé áwém ekáá émbáá,

⁴³ kásh ne á pónde éché mébenlé bon ékógtéd ábón bad bé ekoyí ámín ne mekuu.’

⁴⁴ Néé Dabidé mwén áseppé mó achag aá Sánwéé, chán-nō Ane-awë-Béwógté áhééé abé awe mwán?”

*Yesue abage elébé aá,
bétéden bemeléede bé mbéndé pónde
(Mat 23.1-36; Mak 12.38-40)*

⁴⁵ Bad bésyáál béwógé áá chóm éche Yesue áhóbéé. Héé álángeé bembapee, aá,

⁴⁶ “Nyétéden bemeléede bé mbéndé pónde. Bédáá mengombe ahyómen áte, bédáá-é bán bad bélente b́ á dyón-té ne edúbé. Bédáá metii mé edúbé adyé á ndáb e mekáne ne á hóm á ngande.

⁴⁷ Bon b́oó bédume’ mbwóg é bekúd, bédogé-é bad ne ntón-ntón mé mékáne. Eché nyaa é bad ékúd nkógsen níme níhábé ámín.”

21

*Mende níme nkúd a mmwaád
(Mak 12.41-44)*

¹ Ade Yesue ásadé díí, anyín nées behon bé bad béhágkē mone á ntyóg mé mende.

² Annyín-ne ntógétóke a nkúd a mmwaád nhóg ahág bedálee bébe.

³ Héé áhóbéé aá, “A mbále, nlánge nyé meé, nímén ntógétóke mé mmwaád níhédé mende á ntyóg-te tómaa b́ moosyáál.

⁴ Mone níme ábê bad béhédé, ndii mone níme níhóbé b́ áse, bon anén mmwaád ne atóg áde ádíí ahédé mone nísyáál níme áwóó, nísyáál níme ámbéé atógnan yál.”

*E’chemléd bé asóg dé nkóshé
(Mat 24.1-2; Mak 13.1-2)*

⁵ Bembapee behóg bekálé áá ngáne Ndáb-e-Dyób ébóó, ngáne bélóhne chó kase é meláá, bon bénábé-é chó áte ne mende níme bad bésángé. Héé Yesue áhóbéé aá,

⁶ “Abén bwém ábe nyényínéé nén, pónde épé éché aláá ké ahóg déelyógké ámín e waáb. Bépáhtéd mó áte mésyáál.”

⁷ Bense déd mó bán, “A-meléed, súútán nén débenlédté? E’chemléd é’héé béluméd bán nén áhede abenled?”

⁸ Yesue antimtén b́ aá, “Nyétéd pónde nén mod eépuutád nyé. Ekud é bad épé, á díi ádem, bédogé nyé, mod téé aá móó móde Ane-awë-Béwógté, bénhób bán e’pun bé asóg épéde áte. Bon nyéehídé b́.

⁹ Nzé nyéwógé-’ε bán bel é’wante’, káa bán ekíde épánggé áte, modmod eebáá’. Mmén mekan mésyāāl métāngéné abenled, bonj saké mó méluméd bán, asóg áamáá ape.”

¹⁰ Héε álāngéé bó aá, “Alonj ahóg détyēēmēn ádíńńi nzum. Nkamlēn nhóg-ke rtyēēmēn mímíníi.

¹¹ Ndóob eēnājnéd áse ngíne-ngíne. Nzaa ne nkole bébē hōm ásyāāl. Mekan níme mébānte bad mébē. E’chemléd é’mbáámāa bómpē bébíd ádyōb.

¹² Mmén mésyāāl médébenléd, béhē nyé abum ámín, bétagté nyé. Békeén nyé á ndáb é mekáne, békáád nyé áwed, béhé-’ε nyé á mbwōg. Nyébii-’ε bán, bépeén nyé á’sō é’ kān é bad ne benkamlēne áyāle e dīn ádēm.

¹³ Nē débe nyé etāl pōndé eched, áláa bó mekan mésyāāl níme nyésōntéńé á yāl echēm.

¹⁴ Né-óó, nyémad á nlém tē ngen póg bán nyéetāngēneé atag áte ngáne nyékāá’ε.

¹⁵ Mmēn mébe nyé dyam áde nyéhōbpē ne debyéé áde nyéhōbēnnē dā, nyaa echē áben bad bé ekoyí béehēnlé nyé atyéemēn. Béehēl-laá ahób bán dyam áde nyéhōbēé déetāngēneé.

¹⁶ Kāhne besóo ne benyoó, bóobe áben baányan ne bēn, bēn bépalé nyé áte, béwúú-’ε nyé nguse é bad.

¹⁷ Bad bésyāāl békóó nyé áyāle dīn ádēm.

¹⁸ Ké nē, dyamdyam débeēnlé nyé, ké mbum e esid póg éebóó’ε nyé á nló.

¹⁹ Nyékanj nlém ábel nyékud e’sóosoj.”

Yesue ahóbé ngáne

dyad á Jerusalem dépāá’ε

(Mat 24.15-21; Mak 13.14-19)

²⁰ Yesue anláá bembapee aá, “A pōndé eche nyényinnē sánze éláhñédé dyad á Jerusalem, dāo nyéhíí’ε bán ekíde éhede apānted áte.

²¹ Nzé nyényíné nē, bad ábē bédé á Judeya bétóm mehélé béke bésōom á e’kone mīn. Ane awé adé á dyad-tē wē, ából. Awé mó-’ε adé ámbíd e ebwōg eétoǵné mó asól á dyad á Jerusalem.

²² Áyāle nēn, nímé mesú níme ríhōbēé nē, médíi e’pun bé nkōgsen. Pōndé eched dāo mekan níme meténlédé áse mélōnnē.

²³ Ebē ebébtéd ne bebaád ábe bébē nkog ne ábe bémwāntē nímé mesú. Áyāle nēn, metake híin mébē á nkōǵs-ε, enén nyongel e bad ékúd-ε metuné bwāmbwam.

²⁴ Adén alonj á bad déwε á bel-tē. Békōb nguse é bad nēε betān, békēen bó á melonj mémpēe. Bad ábe béesé bad bé Israel békōgtéd dyad á Jerusalem áte, káān né pōndé echē Dyōb áfínédé bó émaá áte.

Epe é Mwān-a-Moonyonj

(Mat 24.29-31; Mak 13.24-27)

²⁵ “Etondeε bóobe ngōn ne betintine béluméd e’chemléd. Edíb é nkwe édíim áte, étōg nēε ahōbpe dé edíb. Nēn dākōbed bad bé melonj mé nkōǵsε mbwōg káān béébyē’ nēε bébeléé.

²⁶ Bad bépimēn ne mbwōg ní ngíne áyāle ebébtéd éche éhúε á nkōǵsε, ngíne-’ε éche édé ámín eñājnéd á e’dii.

²⁷ Ene pōndé dāo bényinnē nēε Mwān-a-Moonyonj áhúε’ε á mbag-tē ne ngum ne ehúmé é ngíne.

²⁸ A pōndé eche nyényinnē nēε nímén mekan mébóótédé abenled, nyétyéem ámín, nyésād díd, áyāle nēn pōndé e e’sóosoj emaaá nyé ape áte.”

Mel méyǵte syáné debyéé

(Mat 24.32-35; Mak 13.28-31)

²⁹ Héε Yesue álāngéé bó ene ngan, aá, “Nyēnōn alín á ngāl bwām, káa bwel ké é’héé bēmpēe.

³⁰ Abíd áde byaá é’bootadté bó abíd, nyébēn nyébele nyébíi bán nchoj nímáá abé benben.

³¹ Melemlem nze nyényíné nímén mekan mésyāāl mébenlad, nyébíi nēn bán, nkamlēn ní Dyōb ríkwógé ape.

³² Ne mbále, nlānge nyé nēn meé, enén nyongel e bad éemaá’ε káāhne nímén mekan mésyāāl mémáá abenled.

³³ Nkoj mí mīn ne nkōj rísé bémaá bonj ábēm e’yale bébē abé ne abé.

Nyétéd pōndé

³⁴ “Nyétóo nēn nyéetómté echen pōndé esyāāl ádyé ndyééd ne ámwé mīm bwāmbwam. Nyéebúde-’ε atag áte áyāle mekan mé alonjé. Nzé nyébele nē, né éché epun étān nyé taléd nēε melám.

³⁵ Epun éché épíi moonyonj asyāál awé adé á nkōǵsε.

³⁶ Nyétéd pōndé, pōndé ésyāāl. Nyékāne bán nyéwōn ngíne átóm nímén mekan níme mébenléd áte, ábel nēn nyéhēl atyéem á’sō wéε Mwān-a-Moonyonj.”

³⁷ Mmê mesú mésyāal Yesue ayágté'áá bad á Ndáb-e-Dyöb. Nzé ngukél empë, áke ánāā á ekone é Menzab.

³⁸ Nzé hīn bēnsāā sāngén, ekud é bad éhyágáá mó atán á Ndáb-e-Dyöb áwóglēn mó.

22

Békii kun áwúu Yesue

(Mat 26.1-5; Mak 14.1-2; Jōn 11.45-53)

¹ Bōob-pōó, Ngande e Ewele-é-Ngên emmad abé benben. Enén ngande ebédée dīn bán Nnyime-ámīn.

² Beprise bémháá ne bemeléede bé mbéndé bēhédé'áá nzii echē béwúé'é Yesue á mesōm-tē. Bébáá'áá pēn bán bad bēsōjtēn.

Judase akwenténé ásom Yesue

(Mat 26.14-16; Mak 14.10-11)

³ Satane ansól mbapεε awe Yesue nhóg áte, awē béchagéé bán Judase. Dīn démpēe démbē mó bán Iskariode. Ambé nhóg áfinté bembapεε dyōm ne bébe.

⁴ Héé ásyángé boŋ, áke atán beprise bémháá bōobe bekamlēn bé Ndáb-e-Dyöb, ábel ntii ásom Yesue áwáb.

⁵ Nén dénwōgēd bó menyinge bwámbwam. Bóbōo bémpe á nchemtēn. Bénlāā mó bán bēsābē mó mōné.

⁶ Mó-ε ankwentén. Dōo ábóótédé nzii ahed ásom Yesue áwáb ésebán bad bēbii.

Yesue aboŋsan Ngande e Nnyime-ámīn

(Mat 26.17-25; Mak 14.12-21; Jōn 13.21-30)

⁷ Bōob-pōó, epun é ngande e Ewele-é-Ngên áde béwúé'é ndyōŋ ní mbód mé Nnyime-ámīn empē áte.

⁸ Dōo Yesue álóméé Petro bó Jōn áá, “Nyéke nyéboŋsen syāné ndyééd e Ngande e Nnyime-ámīn.”

⁹ Bēnsédéd mó bánken, “Héé wédangé weé séke séboŋsen ádyé chó?”

¹⁰ Dōo ákwentanné áá, “Nyénoné”. Nzé nyépédé á dyad-tē, mod áboméń nyé awē apémé apom dé mendīb. Nyéhíd mó á ndáb ké ehéé eche ášnlē.

¹¹ Nyélāā nwoó-ndáb bán, ‘Awēd meléede aáken, héé toŋ e beken édíí echē módyēē ndyééd e Nnyime-ámīn áte ne ábē bembapεε?’

¹² Bēlūmēd nyé toŋ echē ekalé áte eche bēnābpé áte. Ene toŋ edé ámīn á ndáb-te. Nyébele syāné mboŋsén ní ndyééd áhed.”

¹³ Dōo békii, bétán-ne mekan melemlēn ngáne ánlēbēē bó, bēmbōŋsén-ne ndyééd e Ngande e Nnyime-ámīn.

Ndyéed e Sāngú

(Mat 26.26-30; Mak 14.22-26; 1 Kor 11.23-25)

¹⁴ Ade pónde e ndyééd épédé áte, Yesue andyéé á tébele ne bembapεε bé nlomag.

¹⁵ Héé álangéé bó áá, “Mendāŋ bwámbwam mēé rídyē enén ndyééd e Nnyime-ámīn ne nyé boŋ níkude metuné.

¹⁶ A mbále nlānge nyé mēé méedyáá chó ámpē kásŋ ne á pónde echē Dyöb délōndtē chó mbon á pónde echē mímē nkamlēn mēpéé áte.”

¹⁷ Dōo átédé mbwendé, boŋ ábagé Dyöb mekenag, álangē-ε bó áá, “Nyékob nén, nyémwē, nyétómted nhóg ne aníníí.

¹⁸ A mbále, nlānge nyé mēé bootya bōob áke á'sō, méemwáá nímén mīm ámpē kásŋ né nkamlēn ní Dyöb nípédé áte.”

¹⁹ Antéd kšŋne ewele, ábe Dyöb mekenag, ákabtéđ chó áte, ábē-ε bó chó áá, “Echem yāl nén, ebāgnédé áyāl echēn. Nyébele nén ákamtēn mē.”

²⁰ Ade bémáá ndyééd ádyé ambēl melemlēn ne mbwendé ní mīm. Anhób áá, “Mmén mbwendé ndii melē mékšōlē níme nsógténé ne mekii nímén, níme méšyōgé áyāl echēn.*

²¹ Boŋ nyénoné”, mod awē akii mē ntúrē, ádyág ndyééd ne mē hén.”

²² Mwán-a-Moonyōŋ áwē ngáne éténlédé, boŋ medim ne ane mod awē ášom mó.

²³ Héé bembapεε bēn ne bēn bēbóótédé nhóg ne aníníí aséded, ábii bó mod awē ábēl enén ndín e dyam.

Bembapεε bēswanŋtan tšŋgene

mod awe adé ambáá

²⁴ Bembapεε bēn ne bēn bēmbootédé aselēn, bēhedé ábii bó mod awē adé mod ambáá áwab tīntē.

* 22:20 Donge á kálag dé'só éewóó'ε e'yale ábe Yesue ámbld e Echem yāl nén; á nchoo 19 ne nchoo 20 rísyāal.

²⁵ Dóo Yesue álanḡeé bó aá, “K̄n̄ é meloḡ éluḡmte nḡaḡlen aḡm̄n e bad ábe békamlanné. Benkamlen béchage yál bán, ‘Eboḡ-nlémé.’

²⁶ Boḡ éet̄ḡḡeḡeé abé n̄é át̄nté ech̄n̄. Embon bán ane awé adé mod ambáá át̄nté ech̄n̄, át̄im n̄éé ane awé atómt̄n̄é mp̄in abé. Ane awé mó-‘e alyáḡte’, át̄im n̄éé mbalede.

²⁷ Nzé bad bédé bébe, nhóg adyéé á tébele-ye? Boḡ me, ndé áwen t̄nté n̄é ane awé abenle nyé. Saá ane awé adyéé á tébele-ye? Boḡ me, ndé áwen t̄nté n̄é ane awé abenle nyé.

²⁸ Nyéé nyédé bad ábe béwéséné me á póndé eche níkúde metuné.

²⁹ Ngáne Titéé ábágé me kunze ákamlen, né-‘aá m̄mp̄é mébéé nyé.

³⁰ N̄én déb̄l̄ nyédyé ndyédé, nyémwé-‘e m̄m̄ h̄m̄ ahóg ne me áwem nkamlen-té. Nyé mod té ádyé-‘e á atii dé nkamlen, nyékāadté metúmbé mé Israel dyóm ne mébe.

Yesue ahóbé á’só é’ póndé ad,

Petro ábāḡ mó áyāl

(Mat 26.31-35; Mak 14.27-31; Jon 13.36-38)

³¹ “A-Sim̄on, N̄oné! Satané akudé kunze ák̄ḡ nyé moosyáál, ákab-pe nyé áte. Abane bé bwám ne bé mbéb n̄ḡḡáne mod apebe kón éche bésálté.

³² Boḡ nkánndé we meé adúbe áde éwóó déesudé’. A póndé eché w̄etim̄nné me ámp̄é, éwéd baányon áte.”

³³ Petro anhób aá, “A-Sán̄, ké á mbwḡḡ dóó bétim̄n̄éé we káa á kwééd, mb̄ḡséné we ahíd.”

³⁴ Dóo Yesue álanḡeé mó aá, “Nlāa we, a-Petro, nchóm-a-kúb adéh̄b̄b̄ aá mó’tóo’ nkuu n̄én, w̄ebāḡ me áyāl ngen éláán.”

Póndé e metake ekwogé ape

³⁵ Dóo Yesue ásedt̄éé áb̄é bembapee aá, “A póndé eche ménl̄omm̄é nyé ésebán nyéewánlé ekwe é ngáb, káa ekwe, káa metámbé, nzé-chómé nyént̄ḡk̄é?” Bembapee b̄enk̄w̄ent̄én bán, “Chómchóm.”

³⁶ Dóo Yesue álanḡeé bó aá, “B̄oob-p̄oó, mod awé awóó ekwe é ngáb ké‘e ekwe, áwále áyāl. Ane awé mó-‘e eewóó nkwaté, ásom̄ n̄im̄é nkobe, áchan nkwaté.

³⁷ Nl̄ḡḡe nyé meé kálag e Dyób ehóbé aá, ‘Bébánné mó nchoo nhóg ne bech̄l̄b̄.’ Né-‘aá ébenléd̄t̄é áyāl ech̄m̄. Et̄ḡḡéé ébenléd̄ áned.”

³⁸ Bembapee b̄enlāa mó bán, “A-Sán̄, n̄oné’, séwánlé nkwaté níbe h̄én.” Mó-‘e antim̄t̄én bó aá, “Désob n̄é b̄oob.”†

Yesue akil akáne á ekone é Menzab

(Mat 26.36-46; Mak 14.32-42)

³⁹ H̄é dóo ábidé á ebwóg, áh̄l̄de á dyad-té, ák̄é á ekone é Menzab ngáne ám̄ment̄nné ab̄el. Bembapee b̄o-‘e b̄énh̄l̄d̄ mó ámb̄l̄d̄.

⁴⁰ Ade b̄épédé áwed anlāá bó aá, “Nyékánné’ bán mekáḡsen méepiídé nyé.”

⁴¹ Ansyáó bó á nk̄ḡ, asidé mw̄á nchabnede, akóg mebób̄ḡ, ák̄ánn̄é n̄én aá,

⁴² “A-T̄é, nzé éb̄ḡḡn̄édé we, ék̄ob̄en me n̄im̄én metuné. Boḡ ké n̄é, saké ngáne éb̄ḡḡn̄édé me, boḡ b̄l̄ ngáne éb̄ḡḡn̄édé we.”

⁴³ Ade Yesue ák̄ánn̄éé n̄é, áḡel embid ádyób, éhye ewéd mó áte.

⁴⁴ Anwéd mekáne áte ngáne ámb̄ēē á ndutul-té. Ebábé éche ébidé mó á yál émb̄ē ngáne metóté mé mekií, ét̄ēn̄é’ á nd̄oob taáb, taáb.‡

⁴⁵ Ade ámáá akáne, antyéém ám̄l̄n̄, áke w̄éé bembapee b̄ébédé. Antán n̄éé b̄ékún̄éé áyāl̄e ndutul e nḡine.

⁴⁶ Dóo ásedt̄éé bó aáken, “Cheé nyékún̄éé? Nyépáde áš̄é, nyékánn̄e n̄én mekáḡsen méepiídé nyé.”

Békóbé Yesue

(Mat 26.47-56; Mak 14.43-50; Jon 18.3-11)

⁴⁷ Yesue eépedéé ké amad á ns̄al dóo amute á bad ápédé. Mod awé antóm̄én bó abédéé Judase, mbapee nhóg át̄nté e bembapee dyóm ne bébe ábe Yesue. Apedé-‘aá Yesue á nk̄ḡ ahé mó t̄al.

⁴⁸ Boḡ Yesue ansedéd mó aá, “A-Judas, n̄éd̄e ahé áde éh̄édé Mwān-a-Moonyon t̄al ádii ásom̄ mó-ye?”

⁴⁹ Ade bembapee ábe b̄óobe Yesue b̄ébédé áhed b̄ényín̄é dyam áde áh̄ede abenled, b̄ens̄edéd mó bánken, “A-Sán̄ḡú, séhele séwān ne n̄im̄ed nkwaté-ye?”

⁵⁰ Héé mbapee nhóg átómt̄é nkwaté, ásel̄é nt̄āḡ awé priše ambáá etúu é ekáá émbáá.

⁵¹ Boḡ Yesue anlāá bó aá, “Nyésob n̄é b̄oob!” Ansit̄én mó ene ped e etúu, ádid mó bwám.

† 22:38 Désob n̄é b̄oob; káa N̄é ákwogé. ‡ 22:44 Donge á kálag dé’só déewóó’ nchoo 43 ne nchoo 44.

⁵² Hεε alāngεε beprise bémbáá bóbε benkamlεε bé mésénzε mé Ndáb-e-Dyöb ne belyáged bé dyad, bad ábe bēnhyε mó akób áá, “Nchíb mó nyéhyédé akób, boη nyéwálé nkwaté ne mbid-ε?”

⁵³ Mbwε téε syánε debágáá á Ndáb-e-Dyöb, nyēnkēmbánné με ké ekáá á yāl. Boη echen póndé epedé bób. Ehintén chób édé á nkamlε bób.”

Petro abád Yesuε á yāl

(Mat 26.57-58, 69-75; Mak 14.53-54, 66-72; Jōn 18.12-18, 25-27)

⁵⁴ Hεε békóbé Yesuε, boη békεεné mó, béflmēn mó á ndáb wεε Priε Ambáámbáa. Petro mó-’ε ahidé’áá bó ámbíd mwá etún.

⁵⁵ Bēnkonéd muú áfinté e dyad, bad belādēn áhed. Petro mómpē anhyé adyεε áhed.

⁵⁶ Mbáledε a mmwáád nhóg annyín nεε Petro ádyéé á nkag ní dü. Dób ánóné mó chóón, boη áhóbē’ áá, “Anén mod mómpē ambé ne Yesuε.”

⁵⁷ Boη Petro antāη áá, “A-mwān-a-mmwáád, meebii’ε με mó.”

⁵⁸ Eebemεé áte, mod ampée anchem mó. Anhób áá, “Wémpē edé nhóg áwāb echoη.” Boη Petro anhób áá, “Amúε, weehyāg με ngáne áyāl.”

⁵⁹ Ambid e háwa póg mod ampée ambádnén áá, “Ntāηten ké nhóg méesaá. Anén mod abédé ne Yesuε, áyāle adii mod a Galilia.”

⁶⁰ Boη Petro anhób áá, “A-mod-e-ngé, meebii’ε chóm éche mmōη ékoó’ε ahób.”

Abwōg-ábwōg áde áhóbé nē, nchóm a kúb antōη.

⁶¹ Hεε Sāngwéé ákúnné boη mīd mébómé bó Petro. Dób Petro áwémtné e’yale ábe Sāngwéé ánlāá’ε mó áá, “Nchóm-a-kúb adéhób áá móto’o’ chii nén, wēbāη με á yāl ngen éláán.”

⁶² Hεε ábidé á ebwōg, abálé-’ε awé. Anchii bwāmbwam.

Bébómtédé Yesuε, béwelé-’ε mó

(Mat 26.67-68; Mak 14.65)

⁶³ Bób-b-’pób, bad ábe bēnóné’áá Yesuε bēmbootéd mó awel, bēbómtád mó,

⁶⁴ békāη mó mīd, bésēdté mó bán, “Láá sé, nzé-módé abómé wε?”

⁶⁵ Bésyáá’áá mó nzyāη nyaa ne nyaa.

Bépééne Yesuε wεε belyáged bé dyad

(Mat 26.59-66; Mak 14.55-64; Jōn 18.19-24)

⁶⁶ Nεε bīn é’sāngé, bad bēmbáá bé Israel, beprise bēmbáá ne bemelēede bé mbéndé bēnkób mbom, bēpēēn Yesuε áwāb káánsel.

⁶⁷ Hεε bésdtéé mó bán, “Láá sé nzé wε-εé edé Ane-awē-Béwógté?” Dób Yesuε áhóbéé áá, “Ké menláá nyé, nyéedúbéé με.

⁶⁸ Ké menséded-te nyé akan, nyéekwenténné με.

⁶⁹ Boη bootya bób, Mwān-a-Moonyoη ádyεé á ekáá émbáá é Dyöb á Ngum.”

⁷⁰ Bó moosyáál bēnsédé bánken, “Nédé wε-εé edé Mwān a Dyöb-ε?” Ankwentén áá, “Nyé bēn-εé nyéhóbé bán nεε édii.”

⁷¹ Dób bēhóbé bán, “Nzom ehéé empée déhédeé? Syánε bēn dewóge áwε nsal.”

23

Payledε akáádté Yesuε

(Mat 27.1-2, 11-14; Mak 15.1-5; Jōn 18.28-38)

¹ Hεε belyáged bé dyad bésyáál bétyéémé ámln, boη békεεné mó wεε Payledε.

² Awed-taá bēbóótédé mó mekan abán áyāl bán, “Sékóbé anén mod ngáne ápuutadté sé aloη áte. Ahóbé nén áá, séésānád Kaisε tááse, áhóbē-’ε nén áá, mó mwēn móó móde Ane-awē-Béwógté, nádé ahóbē’ áá móde kāη.”

³ Dób Payledε ásetéε Yesuε aāken, “Wε-εé edé kāη e bad bé Israel-ε?” Yesuε ankwentén mó áá, “Ngáne éhóbé.”

⁴ Boη Payledε álāngē beprise bēmbáá ne amute á bad nén áá, “Meenyínεé atote ké ahóg áde anén mod ákwééne.”

⁵ Boη bēmbē békag á’sō, bēhóbē bán, “Anén mod akóne bad ne mam níme áyágtéé á mbwōg e Judeya esyáál. Ambootéd á Galilia, apedé-’ε hén bób.”

Herōde akáádté Yesuε

⁶ Nεε Payledε áwóge nē, ansédéd ké Yesuε adfi mod a Galilia.

⁷ Bēnlūméd mó áte bán, nē dēn dób édii. Ngáne aloη á Galilia abédé áse e nkamlεn míme Herōde, Payledε anlóm Yesuε áwē. Herōde mwēn ámpē ambé á Jerusalem ene pónde.

⁸ Ayókgé mewémten awōη ányín Yesuε áyāle awóge’áá mó dúu. Ahédé’áá áá mónyfn menyáké míme ábeléé. Né-’ó anwóg menyīnge áde bépééne Yesuε áwē.

⁹ Ansédéd Yesuε ekud é mekan, boη Yesuε enkéntimténné mó dyamdyam.

¹⁰ Beprise bémbáá ne bemeléede bé mbéndé béntyēem ámín, bébántád Yesue mekan áyāl.

¹¹ Hée Herode, bóobe éche sánze bébóótédé mó awəə, béwélé-’ε mó. Dóo béwāádté mó kase é bwēm, bonj álómē mó ámbíd wée Paylede.

¹² Nén dénkānj Herode bó Paylede béntīm ásé éché epun; édé apε nē, búmā bénsēbē ekəyí awonj.

Bébidé mbakú bán béwúu Yesue

(Mat 27.15-26; Mak 15.6-15; Jon 18.39-19.16)

¹³ Hē dóo Paylede áládé beprise bémbáá áte nchoo ne belyáged, ne bad bémpēe,

¹⁴ bonj álāngē bó aá, “Nyēnsébé anén mod apεen áwēm. Nyé bán apuutad bad nló áte. Bəəb-pəə nəhédé áte áyāl éché wée nyébhén nyédíí, bonj meekóbneé mó dyam dé mbéb ké ahóg áde nyéhóbé bán abelé.

¹⁵ Ké Herode ámpē eekóbneé mó awusé ké ahóg, né-’aá ákásá bonj álómē mó ámbíd. Bəəb-pəə dyam dé mbéb ké ahóg déesaá áde ábélé áde álúmté bán atənjéné kwééd.

¹⁶ Né-əə məhəb békúdé mó, rítədē mó, ákag.”*

¹⁷ Dóo amute ásyəəl ábónéé bán, “Téd anén mod, éwúu mó! Bídtéd sé Barabase.”

¹⁸ (Barabase abédéé mod awé bənhəə á mbwəg áyāle bel ábe ámbootédé á dyad-té ne awúu áde áwúé’áá bad.)

¹⁹ Ngáne Paylede ánwōnjē mewēmten átεde Yesue, ambé aláá bó nē ámpē.

²⁰ Bonj bémbē bébōnē’ bán, “Bomé mó á awəg! Bomé mó á awəg!”

²¹ Anláá bómpē ngen éche élónténé éláán aá, “Ayāle chán? Ebébtéd éhéé ábélé? Meekóbneé mó awusé ké ahóg áde átənjéné kwééd. Né-əə, məkúde mó, rítədē-’ε mó, ákag.”

²² Ké nē bémbē bébōnē’ bán ábome mó á awəg. Káənj ne á asóg, échab ehəb énkobnéd.

²³ Paylede ambídéd mbakú aá, māsəəl nēngáne bəhóbé.

²⁴ Antédé mod awé bənhəbpē, awé ambé á mbwəg áyāle bel ne awúu áde áwúé’áá bad, bonj ábagé bó Yesue aá, bétiméd mó ngáne bédás.

Bébómme Yesue á awəg

(Mat 27.32-44; Mak 15.21-32; Jon 19.17-27)

²⁶ Ade sánze ékeεnéé Yesue á hóm dé mpanag, émbomén Siməne, mod a dyad á Sirine. Anén mod ámbíd á mwā dyad awé adé á ahənjé. Hée békóbé mó, bépémtéd mó awəg áde Yesue bán áhídne mó dó ámbíd.

²⁷ Atínté e ndun e mod eché enanáá Yesue ámbíd, bebaad bémbē áwed, béchyé’áá, bélebe-’ε mó.

²⁸ Dóo Yesue ánóné ámbíd, álāngē bó nén aá, “A-bán bé bebaad bé Jerusalem, nyéechyēē’ me, nyéchyε’ échen yāl ne áben bán.

²⁹ Nhóbe nē áyāle nén e’pun é’ bín é’húe, áde bad bəhəbpē bán, ‘Nnam ne ábē ábe bédé ekəm, ne ábē ábe béechyāā’, ne ábē ábe béemwānjte mbéd!’

³⁰ A pónde eched dóo bad bəljəngēē mbəəd bán,

‘kúmtéd sé ámín,’

káa e’kone bán,

‘kútén sé.’

³¹ Nzé bébele’ nímén mésyəəl bəəb, áde bwel é’lyágé é’díí mendíb áte, chán-náa bəbenlé áde bwel békínné-yε?”

³² Bəəb-pəə bənkεén e’bébtéd é’ bad é’be, ápan bó nchoo ne Yesue.

³³ Ade bépédé hóm áde bəchəgε bán Ebənjél é Nló, bəmbomé Yesue á awəg, ne ábē e’bébtéd é’ bad é’be. Bəmbomé nhóg á ekáá é emwεd, aníníí-’ε á ekáá émbáá.

³⁴ Hée Yesue ákánneé nén aá, “A-Sán, lagsén bó áyāle béébíí’ é chóm éche bébeléε.”† Sánze énsíd mbambú, ákab mbóté éche Yesue.

³⁵ Ndun e mod entyém á nkəg, bənoné’ chóm éche ébenlad. Bonj benkamleεné bé Israel béwéláá mó, bəhəbē bán, “Achənjte’áá bad bémpēe, áchood-təə eche yāl, nzé ne mbále mó adé Ane awé Dyəb Apwédé, bonj Awógéd-te.”

³⁶ Sánze chəmpē éwéláá mó. Empiínéd mó ebéntéd é mím,

³⁷ éljāngē mó bán, “Nzé wée edé kənj e bad bé Israel, ésoj ehoj yāl!”

³⁸ Béntél áwe nló ámín nén bán, “Kənj e bad bé Israel chíə nén.”

³⁹ Atínté é ábē e’bébtéd é’ bad é’be ábe bəmbóméé bóəbe Yesue á awəg, nhóg ansyāj mó aá, “Sáa wε edé Ane awé Dyəb Awógté-yε? Sənj-ə éhoj yāl, ésoj-’ε sémpé!”

* 23:16 Donje á kálag dé’só ábádé nchoo 17: Bəəb-pəə, mwé téé, nzé Ngande e Nnyitme-ámin embé, Paylede antənjén bad bé dyad mod a mbwəg nhóg achenned. † 23:34 Donje á kálag dé’só déewóó: Hée Yesue ákánneé nén aá, “A-sán, lagsén bó áyāle béébíí’ é chóm éche bébeléε.”

⁴⁰ Boj aníní mod ankané waab áte aaken, “Weebáá’ē Dyōb-ε? Sóo bad bébe dekadé melemlém mé nkógsen níme mómpē ákúdé.

⁴¹ Boj pen, nkógsen níme dékúdé, rítánjéné ne níme sóo mbéb. Boj anén mod eébeleé dyam dé mbéb ké ahóg.”

⁴² Héε ane mod ábádeé ahób aá, “A-Yesu, sôn, weéchatán me á pónde eche wésnle á nkamlen.”

⁴³ Dóo Yesue álánjéé mó aá, “A mbále, nlánje we meé, chíi nén dēn wēbē ne me á Paradis.”

Yesue awédé

(Mat 27.45-56; Mak 15.33-41; Jōn 19.28-30)

⁴⁴⁻⁴⁵ Bóob-póó bīn bémbē dyam kəd. Etondε andīm, ehintén ékwē-’ε ekide áte ésyāal kóoj ne á ngān éláán. Abad áde dēnkāb Ndáb-e-Dyōb áte dēnsalé áte e’ped é’bε.

⁴⁶ Hē dóo Yesue álébpé esaad aá, “A-Tē, áwōj mekáá dóo rlyágé échem edóádēj!” Amaá-’aá ahób nē, ámīl-’ε nlém, awé-’ε.

⁴⁷ Ade mod ambáá a sánze ányíné nē, ankéméd Dyōb nén aá, “A mbále, anén mod abédé-’ε mod a bwám.”

⁴⁸ Néε ndun e mod eché enhyē anōn, ényíné mekan mé ményáké níme mébénléde, mod téé ambán ekáá á nlém, ásūē’ á ndáb.

⁴⁹ Yesue ábe besón bésyāal ne bebaád ábe bēmbóotéd mó anan ámbíd se á Galilia, béntyēem etūn, bēnōné nímén mekan mésyāal.

Bélimmé Yesue

(Mat 27.57-61; Mak 15.42-47; Jōn 19.38-42)

⁵⁰⁻⁵¹ Bóob-póó mod ambé awé abédé dīn bán Josebe. Anén mod ambíd á dyad á bad bé Israel áde béchagéé bán Arimatia. Abédé mod a edúbé. Abédéε mod a bwám, asān-’ε. Kénéε abédé mod a káánsel enkēnkwenténné mbakú eché ábíní belyágéd bé dyad bēmbídédte áwúu Yesue. Abédé mod nhóg awé anlyóg nlém nén aá epun épē eche Dyōb dékōbpé nkamlen.

⁵² Ankē Payledε achān aá, ábe mó ndim níme Yesue.

⁵³ Néε ákúde kunze, anhúd mó á awōg, ákākān mó kase e mbóm, áke alímé mó á soj eché bépwógé á eláá-tē, éche béésēbpéé mod alíme áte.

⁵⁴ Nén démbē á Mbwe mé mbojsén, áde mbwe-mé-nkóme-áte ríhédé’áá abooted.

⁵⁵ Bebaád ábe bēmbóotéd Yesue anan ámbíd se á Galilia, bēnhíd Josebe, bényín soj, bényín-ne ngáne bēnānté mó ndim á soj-tē.

⁵⁶ Dóo bétímé ámbíd á dyad-tē, bébojsán móg ne mekún níme bēnabnadté ndim. A mbwe-mé-nkóme-áte bēnkāmē áte ngáne mbéndé e bad bé Israel étífidé.

24

Yesue apuidé

(Mat 28.1-10; Mak 16.1-8; Jōn 20.1-10)

¹ A epun é’só, néde á Sōndé mbwambwe pírib, ábē bebaád bēnkē á soj. Bēnwālē mekún mé ndim níme bēmbōjsénné.

² Béntān néε aláá áde bēnkōlēnnē nsəl rí soj ásyāngé á e’dii.

³ Bēnsōl á soj-tē, boj bēnkētānné ndim níme Yesue áwēd-te.

⁴ Nén dēmbóotéd bō ataged á mewēmtēn. Dóo bad bébe bēbídé taléd, bétyéém bó á nkog ne mesān níme mékine’ áte.

⁵ Ne mbwóg bwāmbwam bēnsōj mīd ásē. Héε ábē bad bébe bēlánjéé bó bán, “Cheé ékás boj nyéhédé mod awé adé á alongé áfinté e bad ábe bēwédé?”

⁶ Eésaa hén, apuidé. Nyékamten ngáne ánlāā’é nyé, áde abédé á Galilia,

⁷ aá bétánjéné Mwān-a-Moonyon abε á mekáá mé bebel bé mbéb, bēbōmē mó á awōg. Boj āpuú á e’pun ábe é’lōnténé é’láán.”

⁸ Hé dóo ábē bebaád bēkāmtné ábē e’yale.

⁹ Ade héhúú á soj, bēnkālē bembapεε dyōm ne nhóg ne ábíní bēmpēe mam mésyāal níme bényíné.

¹⁰ Bebaád ábe bēnkālē bembapεε bé nlomag nímén nkalan, bēbédεε Maria Magdalene, Joanaa, ne Maria, nyaá awe Jemse, nchoo ne bebaád bēmpēe.

¹¹ Boj bembapεε bé nlomag bēnwēmtēn bán ene póle edí ngwel. Bēnkēndúbéé chí.

¹² Hé dóo Petro ápádté ásē, boj ányágté á soj. Ade ápédé áwed anwúlén ásē, ánōn soj áte. Anyín dāsō mbóm chēmpēn. Dóo ásúú á ndáb. Mewēmtēn mékógládtáá mó áte tǎngene dyam áde ábénléde.*

* 24:12 Donge á kálag dé’só déewóó’ē nchoo 12.

Yesue apildé bad bébe á nzii e Emos
(Mak 16.12-13)

¹³ Bɔɔb-pɔɔ, échè epun dën, bembapɛɛ ábe Yesue bébe békágé'áá á dyad áde béchagɛɛ bán Emos. Abíd á Jerusalem ápe á Emos ábédé etún dyam máyl saámbé.

¹⁴ Ahé bembapɛɛ békágé'áá békálé nímén mekan mésyāāl níme mékébenléd.

¹⁵ Ade békékanlé káán, dɔɔ Yesue mwën áhyédé bɔ atán, bon áwoɔné bɔ.

¹⁶ Bon pen mĩd mēnkēnnédnédíté bɔ, áchem mɔ.

¹⁷ Héɛ Yesue ásedtɛɛ bɔ aáken, “Póle ehéé nyépagké akal á eke-té nén?”

Hê dɔɔ bétýéémé ne ngɔl esyāál.

¹⁸ Dɔɔ bɔ mod nhóg awe béchagɛɛ bán Klopase, átimtanné mɔ aáken, “Emɔɔn pen-éé edé nken a mod á Jerusalem, áde wéébii mekan níme ríkébenléd nímén mesú-ye?”

¹⁹ Dɔɔ Yesue ásedtɛɛ bɔ aáken, “Mekan méhéé mē?” Bon bɛlāngɛ mɔ bán, “Mekan níme mébenlédé tǎngene Yesue, mod á Nazaret. Ambé nkal é'dáádɔɔn awé ahóbé'áá, ábelé-'ɛ ndale é mekan á'sɔ é'Dyɔb ne á'sɔ é' baányon.

²⁰ Abéd beprise bémbáá ne belyágéd bé dyad bembɛ mɔ á mekáá mé nkamlene, ábided mbakú bán béwúu mɔ. Dɔɔ bɛbómme mɔ á awɔg.

²¹ Bon sɛnlyág nlem bán, mɔ adé ane awé áwɔbɛ bad bé Israel. Néɛ éhúdé nê áte, chii dɔɔ álɔntan e'pun é'láán taa nê ábenlede.

²² Amín e nê ámpɛ, nguse é bebaád áfinté echéd bépéénédé sé menyáké mé póle. Bɛnké á son epɔg é mbwɛmbwɛ,

²³ bon bétāncé ndim níme Yesue. Bénhūú ámbíd, béhōbɛ bán, ángel épíidé bɔ á ndóg-te, élāngɛ bɔ nén bán, Yesue adé á alɔngɛ.

²⁴ Nguse é bad áfinté echéd énké á son, bétán chó melemlen nɛngáne bebaád béhōbɛ, bon bɛényínéé mwën.”

²⁵ Dɔɔ Yesue álāngɛɛ bɔ áá, “E'yókél é' bad bɔɔ nyédíí. Nyéewámsánné mam mésyāāl níme bekal bé'dáádɔɔn béhōbɛ adúbe!

²⁶ Ngómé éhédnádátáá bán, Ane-awé-Béwógté ákud nímén metake mésyāāl, bon ákud éche ehúmé.”

²⁷ Yesue antógnéd bɔ mam mésyāāl tǎngene eche yāl, ngáne méténlédé á Kálag e Dyɔb-te, mbooted ne kálag éche Mosɛɛ ne kálag éche bekal bé'dáádɔɔn bésyāāl.

²⁸ Ade bépédé bɛnbɛn ne dyad áde békágé'áá, Yesue anlúméd byánán eke élyágé édé mɔ á'sɔ.

²⁹ Bon bɛnkɛɔn mɔ bán, “Hyé édyɛɛ áwɛd ngáne bɛn é'máá ahín, pónidé-'ɛ emaa átóm.” Dɔɔ áhídé bɔ ádyɛɛ áwáb.

³⁰ Ade bɔbɔ bédýéé ásé á tébele ádyé ndyééd, antéd ewe, ánāméd chó, ásal chó áte, bon ábagé bɔ.

³¹ Hê dɔɔ mĩd métánlédé bɔ, bon béchemé mɔ. Dɔɔ ányóó bɔ á díd-te.

³² Bénlāá nhóg ne aníní bán, “Ngómé nlem ríhógkáá syānɛ á abum áde ákánlé'áá syānɛ á nzii, bon átānlād syānɛ Kálag e Dyɔb?”

³³ Abwɔg-ábwɔg dɔɔ bésýngɛɛ ásé, bon bétim-me ámbíd á Jerusalem. Dɔɔ bétáné bembapɛɛ dyóm ne nhóg ngáne bɛlādné áte hóm ahóg bɔɔbe bembapɛɛ bɛmpɛɛ.

³⁴ Héɛ bembapɛɛ ábe bétáné á ndáb-te bɛlāngɛ bɔ bán, “Sāngwéé apuúdé ne mbáá, apíidé-'ɛ Simɔne!”

³⁵ Dɔɔ bɔ bad bébe bɔmpɛ béhōbɛ dyam áde ábénlédé bɔ á nzii, béhōbɛ-'ɛ ngáne béchéme mɔ áde ásaléé ewe áte.

Yesue apildé abé bembapɛɛ
(Mat 28.16-20; Mak 16.14-18; Jɔn 20.19-23; Mbɛl 1.6-8)

³⁶ A pónidé eche békáléé nê, dɔɔ Yesue mwën ábided bɔ áfinté, bon álenté bɔ áá, “Nsan mĩbɛ ne nyé!”†

³⁷ Mbwóg mēnkōb bɔ bwāmbwam, bɛwɛmtān bán, bényíné nwú.

³⁸ Dɔɔ álāngɛɛ bɔ áá, “Cheé nyétagɛɛ áte? Cheé nyényágéé á nlem-té.

³⁹ Nyénɔn me mekáá nyénɔn-ne me mekuu, bon nyébii bán mmɛn-éé ndé. Nyékiten me yāl, nyényín nze nwú ríwóó nson ne e'hid ngáne nyényínéé nwóó nén.”

⁴⁰ Ade ámáá ahób nê, anlúméd bɔ níme mekáá ne mekuu.‡

⁴¹ Ade belyágé bényágéé nê ne menyinge mésyāāl, békɔglad-táa á nlem-té, dɔɔ ásedtɛɛ bɔ aáken, “Nyèwóó chóm éche bédýákgé hén-ɛ?”

⁴² Dɔɔ bɛbágé mɔ esón é súu eché bétúmé.

⁴³ Bon ákobé', ádyág-ke chó áwab e'só-te.

† 24:36 Donje á kálag dé'só déewóó'é: *alenté bɔ ad, “Nsan mĩbɛ ne nyé!”* ‡ 24:40 Donje á kálag dé'só déewóó'é nchoo 40.

⁴⁴ Hée álāngēé bó aá, “Mmēn mam mósó rílāngé’áá nyé áde rílyágé ndé ne nyé meé, dyam tée átāngéné alón ngáne éténlédé áyāl echēm á kálag é mbéndé éche Mosēe ne á kálag é bekal bé’daádān, ne á Kálag e Ngāse-té.”

⁴⁵ Dósó ánédte bó debyéé áte, ábel nēn bésōntēn Kálag e Dyōb,

⁴⁶ boŋ álāngē-’e bó aá, “Bétélé á Kálag e Dyōb nēn bán, Ane-awē-Béwōgté atāngéné metake akud, awé, boŋ e’pun ábe é’lonténé é’láán, ápuu.

⁴⁷ Bétélé bán, bad békalé meloŋ mé bad mésyāāl nēn bán, bad bétéde ábel dé mbéb á đin á Yesu, ábel boŋ Dyōb álagsēn bó mbéb. Bébootéd bad rímé nkalaŋ akale á Jerusalem.

⁴⁸ Nyé-’aá, nyédé bad ábe bényinné rímén mekan đíd.

⁴⁹ Mmēn mēlómē nyé chōm éche Titée ánhōbpē aá mósólómē nyé. Boŋ nyélyāg nyédyēe á dyad-té káān né nyékudé ene ngíne eché ebíde ámín.”

Yesu apūmmé

(Mak 16.19-20; Mbel 1.9-11)

⁵⁰ Dósó Yesuē ásyāñnéde bó á dyad-té, ápēné bó benben ne dyad á Betani. Hée ányéné mekáá ámín, boŋ ánámte bó.

⁵¹ Ade ánamteé bó nē, dósó áchēnnē bó, boŋ apūmmé ádyōb. §

⁵² Abē bambapēe bémbwōgē mó mebóbōŋ. Bēntím ámbíd á Jerusalem ne menyīngē mésyāāl.

⁵³ Békāg-ke á Ndáb-e-Dyōb pónde ésyāāl, ákémed Dyōb.

§ 24:51 Donje á kálag dé’só déewóó’ē boŋ apūmmé ádyōb.

Nkalanj mí bwám míme Yesue ngáne

Jone átélé Ndibned n kálag

Nkalanj mí bwám ngáne Jone átélé rílúmte aá Yesue adii Eyale é Dyöb éche édé á ngíndé ne á ngíndé. Echê Eyale éntim moonyonj édyēē-é áfinté e bad. Mmén nkalanj, Jone atelé mós ábel bad ábe beláa mós bédúbe nén bán Yesue, Mwán a Dyöb mós adé Nsoode awé Dyöb dénhábpē aá mósólom. Anlúméd-te aá nzé bad bédúbpé mós béküd e'soóson.

A kálag té wén á mbooted, Jone alúmte ngáne baahóg béndübēē Yesue békwentén-ne áhíd mós, álúmtē-é ngáne bémpēe-é bétáŋgánnáa mós, béekwenténe-é mós adúbe. E'péd 13-17 é'hóbe táŋgene abé áde Yesue ne abē bembapēē bémbeē pónde esyáál kááŋ ne epun éche békóbé mós ne mam míme ánláá' é bós ene pónde esyáál. Jone ahóbé ámpē aá nzé mod adúbpé Krístaa áküd alonjé áde déemaá'.

Nkabted n kálag

Ndibned 1.1-18

Jone, Ndusené ne bembapēē bé'só ábe Yesue 1.19-51

Nsón míme Yesue 2.1-12.50

E'pun bé asóg ábe Yesue á Jerusalem ne benben ne Jerusalem 13.1-19.42

Mpuu míme Sáŋgwéé ne alúméd áde álúmtáá bad yál 20.1-31

Nsógten: Yesue alúmté yál ámpē á Galília 21.1-25

Eyale éntim moonyonj

¹ A mbooted, byánán Dyöb déhäg nköŋsé Eyale émmad abé. Eyale émbē ne Dyöb. Echê Eyale ébédeé Dyöb.

² Kááŋse á mbooted Eyale émbē hóm ahóg ne Dyöb.

³ Dyöb démbeled échê Eyale áhæg bwēm é'syáál. Chóm ké ehóg éesaá éche Dyöb dénhægké ésebé ne Eyale.

⁴ Alonjé ásyáál dénhūu ne Eyale, áde alonjé dós-áa ápiínédé baányonj e'nyínen bé ekíde.

⁵ Abé e'nyínen bé ekíde é'pene' á ehintén-té, ehintén éhēhēē bós abóded.*

⁶ Mod nhóg ampē awé Dyöb dénlómmē. Dín démbē mós bán Jone.

⁷ Jone ampē áláa bad táŋgene abé e'nyínen bé ekíde, ábel nén bad bésyáál béwóg, bédúbe-é.

⁸ Saké mwēn abédé abé e'nyínen bé ekíde. Ampē ábid mbónj táŋgene abé e'nyínen bé ekíde.

⁹ Eyale chós ébéde e'nyínen bé ekíde é' mbále ábe é'nyínte' moonyonj asyáál ekíde. Mós-áa apagé'áa á nköŋsé-te.

¹⁰ Abédé á nköŋsé-te, bonj kénéé Dyöb dénhægké nköŋsé ne mós, nköŋsé ménkénchemmé mós.

¹¹ Ampē áwē dyad bonj abē bad békénkobpé mós.

¹² Ké nē, ambē donje á bad kunze abé bán bé Dyöb. Abé bad bēbédeé bad ábe békob mós ne adúbe áde béndübēē mós.

¹³ Béesaá bán bé Dyöb nyaa echê moonyonj áchyáá'é mwán. Békémbáá bán bé Dyöb byánán moonyonj mós achyáá bós. Dyöb dén dós áde awáb Titéé.

¹⁴ Eyale éntim moonyonj, édyēē áfinté echêd. Anlón ne nsimé, anlúméd-te syáné ngáne mbále e Dyöb ékóó abé. Dennyín échē ehúmé, ehúmé éche sáá ábágé mós néé míme mpom mí mwán.

¹⁵ Jone anhób mam áyál echê, anhósád aá, "Anén mod mós rílánjé'áa nyé meé, 'Mod ahúe' ámbíd echém awé atómé me, áyale bédēchyáá me, né adé ámín.'"

¹⁶ Alón áde alóné ne nsimé ábélé syáá moosyáál dekadé nnam ámbíd e nnam.

¹⁷ Wéé Moseé dós Dyöb démpóódté mbéndé. Bonj nsimé ne mbále béhúú ne Yesu Krístaa.

¹⁸ Modmod eényínēē Dyöb mbéd, éetóméé míme mpom mí mwán awé adé Dyöb abé-é mós á akéb. Mwēmpen mós akidényín mós. Mós abelé bonj Tité Dyöbe abyéen.

Jone, Ndusené ahóbé ad

mósad Ane-awé-Béwógté

(Mat 3.1-12; Mak 1.1-8; Luk 3.1-18)

¹⁹ Baámbáá bé Israel bé dyad á Jerusalem bēnlóm beprise ne bad bēmpēe bé túmbé e Levi wéé Jone, bán béke béseded mós bánken nzé-módé adíí.

* 1:5 Ehintén-ne éhēhēē bós abóded káa ehintén énkénchemmé bós.

²⁰ Enkëmbanǵé ahóǵ, boŋ ampanléd bó áte aá, “Saké me ndé Ane-awë-Béwóǵté.”

²¹ Héε béseǵtéé mó bánken, “Nzé-ǵ edíí? Wε-εé edé Elaijaa?” Ankwentén aá, “Aáy, meésaa mó.” Bënsedéd mó ámpë bánken, “Wε-εé edé nkal é’daádəŋ awe bésinéε-ye?” Antimtén bó aá, “Aáy.”

²² Káǵŋne á asog dóó béseǵtéé mó bánken, “Nzé-ǵ edíí? Láá sé ábel sétim ámbíd aláa bad ábe belómé sé. Nzé-módé wewe ehóǵ wéé módé?”

²³ Héε Jone átimtanné bó ne e’yale ábe nkal é’daádəŋ Yesayaa ánhóǵpë aá, “Méε ndé ehóǵ éche mod awë ahǵŋte’ á ehyánǵe aá, ‘Nyétii nzii eche Sáŋǵwéé.’”

²⁴ Bóǵb-póǵ Befarisia bóó bénlóm ábë bad ábe bémpë wéε Jone.

²⁵ Bënsedéd mó ámpë bánken, “Nzé weésé Ane-awë-Béwóǵté, weésé-’ε Elaijaa káa Nkal é’daádəŋ awe bésinéé, cheé-ǵ éǵusanné bad?”

²⁶ Héε Jone átimtanné bó aá, “Ndusan ne mendíb, boŋ mod adé áǵŋtë echên awë nyéebíí’ε.

²⁷ Mó adé ane awë áǵpë ámbíd echêm. Meékwognedeé áhune ké níǵmé nkóǵd mé metáǵbë.”

²⁸ Mmën mésyǵǵal mëmbenléd á dyad á Betani á múde mé edíb é Jodan níǵmíńí wéε Jone áǵúsannáá bad.

Yesue, Mwǵn-a-Ndyǵŋ mí mbóǵ a Dyǵb

²⁹ Néε bíń é’sǵǵǵé, Jone anyín néε Yesue áhúε’ε níńíí. Héε áhóǵéé aá, “Nyénǵne’, Mwǵn-a-Ndyǵŋ mí mbóǵ a Dyǵb mǵne. Mó ahúde’ mbéǵ mí bad bé nkǵǵsé.

³⁰ Anén mod móǵ níǵǵǵé’áá nyé áde ménhóǵpë meé’ Mod áǵpë ámbíd echêm awë atómé me, áyǵle bédeǵhyáá me, né adé áǵmín.’

³¹ Ké mmën menkëmbíí’ε mó, boŋ mempë níǵúsán bad ne mendíb ábel bad bé Israel bébíí mó.”

³² Héε Jone ábídeé mbóŋ nén aá, “Menyín nēŋǵáne Edáádəŋ é Dyǵb ébídeé ádyǵb néε éǵǵǵ, éǵud mó á níǵó míń, ébé-’ε ne mó.

³³ Ké nē, menkënsǵŋtënné meé mó ne. Boŋ Dyǵb áde déńlóm me aá níǵúsán bad ne mendíb démmáǵ me aláa aá, ‘Mod awë wényínné néε edáádəŋ é Dyǵb éǵúdé á níǵó míń, boŋ étyéém áǵed, móǵdúsné bad ne Edáádəŋ éche Esáá.’

³⁴ Nnyíné níǵmën mekan mésyǵǵal, mbíde-’ε mbóŋ nén meé mó adé Mwǵn a Dyǵb.”

Bembapεε bé’sǵ ábe Yesue

³⁵ Néε bíń é’sǵǵǵé ámpë, Jone ámbé áhed ne ábë bembapεε bébe.

³⁶ Annyín néε Yesue átóméé. Adé ányíné mó, anhóǵ aá, “Nyénǵne’, Mwǵn-a-Ndyǵŋ mí mbóǵ a Dyǵb mǵ ne.”

³⁷ Adé ábë bembapεε bébe béwóǵé nē, bëmbootéd Yesue ahíd.

³⁸ Ade Yesue áǵóné ámbíd boŋ anyín nēŋǵáne béhídeé mó anseǵéd bó aáken, “Cheé nyéhedeé?” Bëntimtén mó bán, “Rabai” (awë adé bán meléede) “Héé édyε’ε?”

³⁹ Anláá bó aá, “Nyéhyǵ, nyényín wéε níǵyε’ε’ε.” Né-ǵó, bënkë anyín wéε ádyε’ε’ε. Ade bépédeé áhed ébédeé éǵéǵé dyam ngǵŋ éńiń é ngukél. Bëndyε-’ε áhed káǵŋ bíń é’híntén bó.

⁴⁰ Áǵŋtë é ábë bembapεε bébe ábe bénwǵǵ dyam áde Jone ánhóǵpë boŋ béhíd-te Yesue, nhǵǵ abédé đń bán Andreya. Andreya abédéε Simǵn Petro mwǵnyǵŋ.

⁴¹ Né-ǵó dyam dé’sǵ, ankë mwǵnyǵŋ Simǵne áhed. Anyíné-’aá mó boŋ áǵǵǵé mó aá, “Sényíné Ane-awë-Béwóǵté” (néde Krístǵ).

⁴² Dóó Andreya áǵééńé Simǵne wéε Yesue. Yesue anǵné-’aá Simǵne chóǵŋ, boŋ áhóǵéé aá, “Edíí Simǵne, mwǵn awë Jone. Béǵǵǵé wε bóǵb bán Σεpase.” (Adén đń adíí melemlen néε Petro, nē áde ndim e aláa.)

Yesue achénlé Filibe bó Nataniél

⁴³ Néε bíń é’sǵǵǵé, Yesue ammáǵ aá móǵǵ á mbwǵǵ e Galilia. Dóó ákíí Filibe atán boŋ áǵǵǵé mó aá, “Hídé me.”

⁴⁴ Filibe abédéε mod a dyad á Betsaida, melemlen mé dyad áde Andreya bó Petro bémbíǵtë.

⁴⁵ Filibe anyín Nataniéle. Héε áǵǵǵé mó nén aá, “Sényíné ane mod awë Moseε ántenlé mam áyǵl eché áwe mbéndé-te. Móǵ káǵŋne bekal-bé-e’daádəŋ bëntenlé mam á yǵl. Adíí Yesue mod a dyad á Nazaret, mwǵn awë Josebe.”

⁴⁶ Héε Nataniéle áseǵtéé mó aáken, “Dyam á bwám áhéé áhale ábíǵ á Nazaret?” Dóó Filibe áǵǵǵé mó aá, “Hyé ényín.”

⁴⁷ Ade Yesue ányíné Nataniéle ahúε’, dóó áhóǵéé áyǵl eché aá, “Nyénǵne, mwǵn a Israel nén sóm-sóm, awë mbǵlédé nítyéémé!”

⁴⁸ Héε Nataniéle áseǵtéé mó aáken, “Chán éǵwédeé me abíí?” Héε Yesue ákwentanné aá, “Filibe adéhóǵ aá móǵǵǵé wε, nnyíné wε á alín á ngǵl sé.”

⁴⁹ Héε Nataniéle áhóǵéé aá, “A meléed, edíí Mwǵn a Dyǵb. Wε-εé edé kǵŋ e bad bé Israel.”

⁵⁰ Yesue antimtén mós aá, “Edúbpe áyale rílangé we meé nnyíné we á alín á ngəl sé. Weényín mam nímé métómé nén.”

⁵¹ Héé ábádéé aá, “Ne mbále, nlanḡe nyé nén meé, nyéenyín néé dyób ánédnéde nyényín-ne néé ángel é Dyób écháḡkéé ésudé-’ε Mwān-a-Moonyonj amin.”

2

E'wóngé á dyad á Kana

¹ Ambíd e e'pun é'be, e'wóngé bémbē á dyad á Kana á mbwóg e Galilia. Yesue nyaá ambé áhed.

² Bénlebē Yesue ne ábē bembapeε bómpé á e'wóngé wē.

³ Mím memmaá áte. Hé dós Yesue nyaá ápédé áwē boḡ alāngē mós aá, “Mím mémáá bós.”

⁴ Héé Yesue alāngéé mós aá, “A-nyan, weetāḡeneé me dyam áde rítāḡéné abel aláa. Echem pónde eépédéé.”

⁵ Héé nyaá akíí bembalede bé ngande bē aláa aá, “Nyébel kéchéé éche alāngé nyé aá nyébel.”

⁶ Bōōb-ōō, mbeé é meláá ébédé benben ne áhed. Echē ndín é mbeé chós bad bé Israel bébēnládtáá áhé mendíb áte á nwobe ní yāl á pónde e mekáne écháb. Ké ehéé etedé'áá dyam mbwókel e líta e mendíb.

⁷ Héé Yesue alāngéé bembalede bé ngande bē aá, “Nyélóned mbeé chē ne mendíb.” Né-ós, bénlōnēd échē mbeé hōōd ne mendíb. ⁸ Dós alāngéé bós aá, “Nyékoḡbe-ós mendíb bōōb, nyékeεn wéε mod awé alyáḡte' mekan mé ncháged.” Né-ós, bémbēl áned.

⁹ Ade ane mod áwóḡlé né nímé mendíb níme mémáá mím atim, enkēmbíí'ε wéε mébídé, (boḡ bembalede ábe bēnké nímé mendíb akōḡbe bémbíí). Dós áchágé mod awé akude sómbé,

¹⁰ boḡ alāngé mós aá, “Mod téé abelé asébe acháḡtén bad mím nímé mébóó. Bad bémaa-’áa mós amwé bwāmbwam, boḡ ábagé bós nímé mééboó. Boḡ we, etimé ekōḡgé níme mébóó kósāḡ ne bōōb.”

¹¹ Mmén menyáké nímé Yesue ábélé á Kana á mbwóg e Galilia mós mébédé ábē e'chemléd é'só. Hé dós-’aá álúmté échē ehúmé, ábē bembapeε bénsūm-me nímab nlém áwē.

¹² Néé nén ámáá atóm, Yesue ansyógé á dyad á Kapenahum nchoo ne nyaá, baányan ne ábē bembapeε. Bēndyéé-’ε áwed nguse é e'pun.

Yesue anané bekáb bé nyongé á Ndáb-e-Dyób

(Mat 21.12-13; Mak 11.15-17; Luk 19.45-46)

¹³ Adé pónde e Ngande e Nnyime-ámín ékwógé bad bé Israel ape, Yesue anké á dyad á Jerusalem.

¹⁴ Adé ápédé áwed, anké á Ndáb-e-Dyób. Antán néé bad békábéé dyon. Bésómé'-’áá nyag, mbód ne mbāḡé, bepεle-bé-mōné-’ε bépenlé mōné.

¹⁵ Héé átédé nkōōd, ámané etāḡú ánanné bós nchoo ne échab mbód ne nyag á Ndáb-e-Dyób wē. Ampāḡtéd mōné nímé bad bépénlé'áá áte, ákūnē-’ε betébele ábe bépénlé'áá nímé mōné ámín mekuu ámín.

¹⁶ Anláá bad ábe bésómé'áá mbāḡé aá, “Nyébíden beləə bén á ebwóg. Nyéētímté ndáb échē echem Sāḡ ndáb e dyon.”

¹⁷ Adé ábē bembapeε bényíné nē, dós békámténé eped é kálag e Dyób éche éhóbe nén bán “A-Sāḡ, kán echē ríwóó áyale echoḡ ndáb éwūū me.”

¹⁸ Héé benkamleε bé bad bé Israel bétímé ámbíd, bésēdté mós bánken, “E'chemléd é'héé éhale eluméd sé ábel sébíí bán ewóó kunze ábel enén ndín e dyam?”

¹⁹ Yesue antimtén bós aá, “Nyépāḡ enén Ndáb-e-Dyób, mēlōḡ chós ámpé áyale e'pun é'láán.”

²⁰ Dós ábē bad béhóbeé bánken, “Enén ndáb échē bétédé móom mé mwé méniin ne mwé ntóób chós éhóbeé wéε mósōḡḡ áyale e'pun é'láán-ε?”

²¹ Boḡ ndáb echē Yesue áhóbe'áá ebédéé dásō eche yāl.

²² Né-ós ámbíd eche Yesue áwédé boḡ Dyób ápūūd mós, dós ábē bembapeε békámténé dyam áde ánláá'ε bós. Béndübē mam nímé méténlédé á kálag e Dyób, bédúbé-’ε e'yale ábe Yesue ánhōḡpé.

Yesue abíí mod asyáál nlém áte

²³ A pónde e Ngande e Nnyime-ámín, áde Yesue ámbēē á dyad á Jerusalem, bad híin béndübē mós ngáne bényínnē menyáké nímé ábeléé.

²⁴ Boḡ ké nē, Yesue enkēsummé nlém áwāb, áyale ámbíí moosyáál áte.

²⁵ Modmod enkētāḡénné mós dyam aláa tāḡene mod ampée áyale mwēn ammāḡ moonyonj asyáál nlém ábíí áte.

3

Yesue bɔ Nikodemuse

¹ Mod nhɔg abedé bán Nikodemuse. Abédée nhɔg awě alyágté'áá bad bé Israel abé-'e epepé é bad bé Farisia.

² Mbwe nhɔg ampě wée Yesue nkuu, álāngē mó aá, "A-meléed, sêchemé nén bán, edii meléede awě Dyɔb álómé. Ayāle nzé Dyɔb déesé ne mod, eéhēlēē-se ábelé mekan mé menyáké nímé ébeléé."

³ Yesue ankwentén mó aá, "Ne mbále, modmod eéhēlēē-se asól á nkamlen ní Dyɔb ésebán achyáádté ámpě."

⁴ Nikodemuse-'e ansedéd mó aáken, "Chán mod awě amaa akwog áhale se achyáád ekóólé-ekóólé? Eesaá mbále nén bán eéhēlēē-se asól á abum adě nyaá ngen éché élónténé ébe ábel béchyáa mó ámpě-ye?"

⁵ Dóo Yesue átímtanné mó aá, "Ne mbále, nlānge we meé, nzé bééchyáa mod ne mendíb ne Edáádəŋ eéhēlēē-se asól á nkamlen ní Dyɔb.

⁶ Ane awě achyáádté ne moonoyŋ a ekob, adíí moonoyŋ. Awě mó-'e achyáádté ne Edáádəŋ é Dyɔb adíí Edáádəŋ.

⁷ Weebág menyáké ngáne n̄hóbé meé 'Mod atāŋgéné achyáád ekóólé.'

⁸ Nzé epub éhóbé bán chɔ étóme', pɛd eché édás aké chɔó ékagké. Ewóge' ntɔgag níme ébeleé bon weebíé'wée ébídéé ké'e wée ékagké. Melelem nē dɔó edíí ne mod ké ahée awě achyáádté ne Edáádəŋ é Dyɔb."

⁹ Héé Nikodemuse áseɗteé mó aáken, "Chán nén áhalese ábenled?"

¹⁰ Yesue ankwentén mó aá, "Née edíí meléede ambáá a bad bé Israel weéhələ' nímén mekan asóŋten-ne?"

¹¹ Ne mbále, nlānge we meé, dyam áde sébíí dɔó séhóbéé. Sébíde-'e mbón ne dyam adě sényíné. Bon nyé modmod nyéekwentenés chóm éche séhóbéé adúbe.

¹² Née n̄lāngéé nyé mekan níme médeé mekan mé nkòŋsé, nyéedúbpe, chán-nɔ nyémweé adúbe nzé nlāngéé nyé mekan nímé médeé mekan me nkoŋ ní m̄n?

¹³ Modmod eékíí'á á nkoŋ ní m̄n étóméé Mwān-a-Moonoyŋ awě abidé áwed bon ápe á nkòŋsé."

¹⁴ Ngáne Moséé ámboméé nyá á akon* bon atíí dɔó am̄n á ehyānge, melelem nē dɔó bétíí'é Mwān-a-Moonoyŋ.

¹⁵ Nén débenléé ábel bon kenzéé awě adúbpé mó ákud alonggé áde déemaá'.

¹⁶ Dyɔb átómténé bad bé nkòŋsé adəŋ. Né-ɔ́ anlóm nímé mpɔm ní Mwān ábel kenzéé awě adúbpé mó eewág bon ákud alonggé áde déemaá'.

¹⁷ Dyɔb dénkēnlómme awe Mwān á nkòŋsé ákáad bad. Alonggé á bad dɔó ánlómmé mó áson.

¹⁸ Kenzéé awě adúbpé mó eékwaá nkáásé, bon kenzéé awě eedúbpe mó, amaa nkáásé akwe áyāle eedúbpeé mpɔm ní Mwān ní Dyɔb.

¹⁹ Nén dɔó mbakú e Dyɔb edíí: E'nyínen bé ekíde é'pédé á nkòŋsé, bon baányŋ bédás éhíntē tómaa e'nyínen bé ekíde áyāle nímāb mbáltéd níde mbéb.

²⁰ Kenzéé awě ábele mbéb, akɔ́ ábē e'nyínen bé ekíde, éepaá-'aá á e'nyínen bé ekíde-té ábán nén nímé mbáltéd mé mbéb méébíde áwed.

²¹ Bon kenzéé awě ábele mam mé mbále, abíde' á e'nyínen bé ekíde ábel nén bad bényín bán kéchéé éché ábeleé awógne Dyɔb.

Mbón eché Jone t̄ŋgene Yesue

²² Ámbíd e nē, Yesue ne ábē bembapee bēnké á mbwóg e Judeya. Bóbɔ́ bēndyēé áwed nguse é e'pun, ádusan-ne bad.

²³ Jone mómpé adusanáá bad á dyad á Anɔn benben ne á dyad á Salim áyāle mendíb mémbe áhed bwāmbwam. Bad békágé'áá áwē, ádusan-ne bɔ́.

²⁴ Nén ábédé byánán béhē Jone á mbwóg.

²⁵ Bɔ́ɔb-pɔ́ɔ, donge dé bembapee ábe Jone bépéntannáá ne mod a Israel t̄ŋgene nwobe ní yál.

²⁶ Dɔó bépédé wée Jone bon bélāngē mó bán, "A-meléed, ekamtan mod awě nyúmɔ nyébédé á pɛd é edib é Jodan eníní? Mod awě éhóbé'áá mam á yál eché. Nóné! Móo adusan bad nííí! Bad híín békagke áwē."

²⁷ Jone ankwentén aá, "Modmod eéhēlēē-se ákud chóm, ésebán Dyɔb ábágé mó chɔ.

²⁸ Nyébēn nyédé me mbón nén bán menhób meé saké me ndé Ane-awě-Béwógté. Dyɔb dénlóm me á'só ábonŋen bad áyāle epe éche Ane-awě-Béwógté.

* **3:14** Nyá eche Moséé ámboméé ebédéé nyá eché ámbenlé. Nē dɔó Dyɔb démbenlé áhood bad ábe nyá énlédte á ehyānge. Nzé bad bēnnɔn ene nyá, bédyēé bwām. Nom 21.9.

²⁹ Mod awë akude sómbé móo awóó sómbé. Boḥ nsón-a-echoḥ a mod awë akude sómbé, awë atyéeme mó á nkag áwóglān mó, abāg menyinḡe nzé awóge mó ehób. Né-óó, nēn dōo ákás boḥ nlón ne menyinḡe.

³⁰ Edúbé échē étāngéné nēe échāgkēé, échēm-me ésude'."

Ane awë abidé ádyōb atómé moosyāál

³¹ Ane awë abidé ádyōb atómé moosyāál. Ane awë mó-’e achyáádté á nkōḡsé adii mod a nkōḡsé, áhōbē-’e mam mé nkōḡsé, boḥ ane awë abidé ádyōb adé ámīn e moosyāál.

³² Chōm éche ányīne ne éche áwóge chóo áhōbēé boḥ ké nē, modmod eedúbpéé mó.

³³ Boḥ kénzēé awë akobé chōm échē áhōbē, né akwēténé ne nlém rīsyāál aá Dyōb áde mbále.

³⁴ Póle e Dyōb chóo mod awë Dyōb álómé áhōbēé áyāle Dyōb déenonéé ámbíd nzé abage’ mod éché Edáádāḡ.

³⁵ Titéé adáó awe Mwān, abagé-’e mekan mésyāál awë mekáá.

³⁶ Kénzēé awë asumé nlém wēe ane Mwān, akudé alongé áde déemaá’. Boḥ kénzēé awë eébéle’ ngáne áhōbē éekudté alongé áde déemaá’, ábē akud nkōḡsen ŋ Dyōb.

4

Yesue ne mmwaád a Samaria

¹ Yesue ambíí aá Befarisia béwóge nēn bán mókude ekud é bembapēe tómaa ne Jon, módušan-ne bó.

² (Kénéé Yesue mwēn éedusannaá bad, ábē bembapēe bóo bédúsannaá bad).

³ Awóg áde Befarisia bēnwōgkē nē dēmbēl Yesue anhidé á mbwóg e Judeya átim ámbíd á mbwóg e Galilia.

⁴ Byánān āpe á Galilia antāngén nēe ápóo a mbwóg e Samaria.

⁵ A mbwóg e Samaria wē ampé á dyad áde béchagēé bán Sika. Adén dyad démbē bēnben ne ndōob echē Jakōbe ámbēe mwān Josebe se e’bóó.

⁶ Ayāle ene ndōob echóg éche bélimé éche bébwéle’áá mendib áte émbē áhed. Echén echóg é mendib ébédeé éche Jakōbe. Ngáne eke énkōmēdtē Yesue andyéé á nkag mé éché echóg é mendib. Nēn ábédé dyam-éé áde kād.

⁷ Héé mmwaád a Samaria nhóg áhyédé mendib abwel. Yesue anláá mó aá, “Hé me mwā mendib mé amwé.” ⁸ Enén pónde Yesue ábē bembapēe bēnkē á dyad-tē áchan ndyééd.

⁹ Héé ane mmwaád átimtanné mó aá “Ebé mod a Israel, me-’e mbé mmwaád a Samaria, échōmē me mendib-’e?” (áyāle bad bé Israel ne bad bé Samaria béechemtannaá.)

¹⁰ Héé Yesue ákwētanné mó aá, “Nzé wembíí mende mé Dyōb, ebíí-’e mod awë áhedne we mendib, né ehēdné me mendib. Né mbagé-’e we mendib nime mébage alongé.”

¹¹ Ane mmwaád ankwētén mó aá, “A-Sāj, ké chōm éche bébwēleé mendib weewóó’ē, echóg é mendib-pe échábé áse, hée wētēdtē nímé mendib nímé mébage alongé.

¹² Eched saá ambáá Jakōbe mōnlyágnéd sé échén echóg é mendib. Mwēn, ábē bán ne ábe e’lém e’syāál, hén-éé bémwágé’áá mendib. Nédē ehóbe bóob weé mótomé Jakōbe-ye.”

¹³ Yesue ankwētén aá, “Kénzēé awë amwédé nímén mendib, píid ébē ekób mó.

¹⁴ Boḥ kénzēé awë ámwē mendib nime mébéé mó píid éekóbpé mó mbéd. Mendib nime mébéé mó, mébē mó áte nēe n’yéle nime méélēnē’. Mmē mendib mébē mó alongé áde déemaá’.”

¹⁵ Héé ane mmwaád álāngēé mó aá, “A-Sāj, bēé me nímé mendib ábel nēn píid eekóbe mémpē, méepāg-ke hén ábwel mendib ámpē.”

¹⁶ Dōo Yesue álāngēé mó aá, “Kāg, éke échag awonḡ nchóm, boḥ étim ámbíd hén.”

¹⁷ Ane mmwaád antimtén Yesue aá, “Mewóó’ē nchóm.”

¹⁸ Dōo Yesue áhōbēé aá, “Ekalé mbále wēé móowóó’ē nchóm. Ayāle ekéwōḡ bechóm bétáan, ké ane mod-te awë nyúmō nyédé bóob eésaá awonḡ nchóm. Dyam áde ehóbé áde mbále.”

¹⁹ Awóg áde ane mmwaád áwóge nē dōo álāngēé Yesue aá, “A-Sāj, nnyīne nēn meé edii nkal é’daádāḡ.

²⁰ A mbōod-mín hén dōo ábēd besáá bébágé’áá Dyōb edúbé, boḥ nyé bad bé Israel nyéhóbe bán á Jerusalem dōo bétāngéné Dyōb edúbé abe.”

²¹ Héé Yesue álāngēé mó aá, “A-mmwaád nēn, sóḡtén chōm éche rílanḡéé we. Pónde ehúe’ echē nyéebaá Titéé edúbé á mbōod-mín hén ké’ē á Jerusalem.

²² Nyé bad bé Samaria nyébage chōm éche nyéebíí’ē edúbé. Boḥ sé bad bé Israel sébage mó edúbé ngáne sébíí mó áyāle nēn e’soóson é’húú dásō ne bad bé Israel.

²³ Boḥ pónde ehúe’, emaa’-’e ne ape, echē bad ábe bébage Titéé edúbé ne nlém nhóg bébéé mó éché edúbé á Edáádāḡ ne á mbále-tē. Echē ndín é bad chóo Titéé áhedéé aá bébage mó edúbé.

24 Dyöb ádíi Edáádəŋ, bad-te ábe bébage mó edúbé bétəŋgéné mó chós abe á Edáádəŋ ne á mbále-tê.”

25 Héε ane mmwaád áləŋgée Yesue aá, “Mbíi meé Ane-awé-Béwógté əpə. Póndé eché ápée, ätənléd sé mekan mésyəəl áte.”

26 Héε Yesue áləŋgée mó aá, “Me awé sóo dekale’ me-ée ndé mó.”

27 Ene póndé chən dóo ábē bembapεε bépédé. Yəl enkóm bō áte ányín néε ákanléε mmwaád. Boŋ bō modmod eésedteé mó aáken, “Cheé éhedeé?” Ké-ε “Cheé nyé ane mmwaád nyékaleé?”

28 Ane mmwaád antedé apom dé mendib, átim ámbíd á dyad-tê, áke aláá bad aá, 29 “Nyéhyag, nyényín mod awé áləŋgée me mam mésyəəl níme níkəmbenlé. Nyé bán, saké Ane-awé-Béwógté awé bésineé nén-ε?”

30 Dóo ábē bad béhídté á dyad-tê áke dé atán Yesue.

31 Ene póndé, bembapεε ábe Yesue bécháá’áá mó bán, “A-meléed dyé ndyéed.”

32 Boŋ Yesue ankwentén bō aá, “Nwóó ndyéed é adyé eché nyéébií’ε.”

33 Héε ábē bembapεε bésedteé nhóg ne aníní bánken, “mod múmó apiínédé mó ndyéed-ε?”

34 Dóo Yesue áləŋgée bō aá, “Echem ndyéed edii ábel nsón níme mod awé alómé me, áhóbé aá mbel, ámad-te mó.

35 Ngómē nyéyóggé ahób bán ámbíd e ngon éniin, né póndé e mbote epedé? Nyéəne’, nlanje nyé nén méε nyékéled did áte, nyényín ngáne mbote émáá mboŋsén abé, ápád á nzag-tê.

36 Ké bəəb mod awé apáde adé níme nsábe akud, alade mbote é alonjé áde déemaá’, ábel nén mod awé awéne bō mod awé apáde bō moosyəəl bébē menyinje.

37 Né-óó ngan eché békaleé nén bán, ‘mod nhóg awéneé, aníní-ε ahúd edé mbále.’

38 Me-ée nlómé nyé mbote áke dé apád éche nyéəwénéé. Bad bəmpée bébéleé nsón, nyé-ε nyétombwan bō nsón.”

Bad bé Samaria hiin bédubpe

39 Bad bé Samaria hiin ábe bémbíd adé dyad béndübē Yesue áyale mam níme ane mmwaád ánlāá’ε bō. Ane mmwaád anlāá bō aá, “Aləŋgée me mekan mésyəəl níme níkəmbenlé.”

40 Né-óó, áde bad bé Samaria bépédé awé, bəŋchəŋ mó bán ádyεε áwāb dyad. Né-óó, andyεε áwed e’pun é’be.

41 Bad hiin bəmpée béndübē mó áyale áde ayáge.

42 Bənlāá ane mmwaád bán, “Saké dyam áde élanjé sé dəmpen dóo ákásə boŋ sédúbé Yesue, boŋ sébən séwógné etúu, sébíi-ε bán mwén-εé akóŋtə Nsoode a nkóŋsé abé.”

Yesue achóŋtə mwān

a mod ambáá a ngómənaa

43 Ámbíd e e’pun é’be Yesue anhidé á mbwóg e Samaria, áke á mbwog e Galilia.

44 Yesue mwén anhób aá, nkal é’dáádəŋ eewóó’ε edúbé awé dyad.

45 Ade ápédé á mbwóg e Galilia, bad bənkob mó. Bənkob mó áyale bémbē á Ngande e Nnyime ámín á Jerusalem, bényín-ne mam mésyəəl níme ámbenlé.

46 Héε Yesue átimé ámbíd á Kana, wée ántimédté mendib níim. Ahed-te dóo mod ambáá a ngómənaa ábédé awé mwān ákónlé’áá á dyad á Kapenahum.

47 Ade ane mod áwógé bán Yesue ábídé á mbwóg e Judeya apedé á mbwóg e Galilia, ampé awé, achəŋ mó aá áchood mwān, awé ambé bənbən ne kwééd.

48 Yesue anlāá mó aá, “Nyé modmod nyéedubpéeé kásəŋ né nyényíné e’chemléd ne menyáké.”

49 Ane mod ambáá a ngómənaa anlāá mó aá, “A-Sán, hyág, dékag kwééd edé ehób bán chós ekóbe awem mwān.”

50 Yesue antimén mó aá, “Kág, awonj mwān ábē á alonjé.” Ane mod andúbé e’yale ábe Yesue, áke-ε.

51 Ade ane mod ádíi adé á nzii e esú dóo ábē bembəlede bəbómné mó, boŋ bəlanjé mó bán, “awonj mwān ábē á alonjé.”

52 Dóo ásédteé bō póndé eché ane mwān ámbootédté bwám abé. Bənlāá mó bán, “Ahéb déntedé mó chán á ngəŋ póg.”

53 Dóo ane mod ákámtnéé aá níme melelem mé póndé móo Yesue ánlāá’ε mó aá, “Awonj mwān ábē á alonjé.” Né-óó, bəəbe eche ndáb béndübē Yesue.

54 Abén e’chemléd bōo bémbē e’chemléd ábe é’lonténé é’be ábe Yesue ámbenlé áde ábídé á mbwóg e Judeya boŋ ápé á mbwóg e Galilia.

5

Yesue achõjté eped é mod

¹ Ambíd e nímén mésyāā, Yesue anké á Jerusalem á ngande e bad bé Israel.
² A Jerusalem wê, benben ne Nsāl mé E'ké mé Ndyon ní mbód, eton ébédé áhed. Echén eton béchágé'áá ch́ó á ehób é bad bé Israel bán Betzata. Enwõj mebepé métaan.

³ A mebepé-te wê, bad bé nkole bénkūmēn áhed, ábe békwédé ndím, ábe bédé e'ped é' bad ne ábe béwédé eped.*

⁵ Mod nhóg abédé áhed awé akékolé á etūn é móom mé mwě meláán ne mwě waam.

⁶ Ade Yesue ápedé áhed annyín ngáne ane mod ánánjé ásē, abíí-é áá nkole mbémé mós á yāl. D́óo áśéd'té mós ááken, "Edáó bwám adyē-ye?"

⁷ Ane mod antimtén mós áá, "A-sáj, meewóo'é mod awe áśōléd me á eton-tē nzé mendíb mépúútédé áte. Nlédte ahób meé rísól, né mod ampée amaa asól."

⁸ D́óo Yesue álánjéé mós áá, "Syáó ásē, étéd échon ebúm, ékag."

⁹ Abwōg-ábwōg ane mod andyě bwám, ányāg échē ebúm áte, ábootéd-te akē.

Epun éche nén dēmbenléd'té ébédéé á mbwe-mé-nkóme-áte.

¹⁰ Né-óó, anyín áde bad bémháá bé Israel bényiné ane mod awé Yesue ándid'té bwám, bēnsédéd mós bánken, "Chii áde mbwe-mé-nkóme-áte, nzé dehidé-é mbéndé échēd, weetānjēé ebúm apém se ébwāgne'."

¹¹ Bon ankwentén áá, "Mod awé adidé me bwám anláá me áá, "Téd échon ebúm, ékag?" "

¹² Héé bēśéd'té mós bán, "Nzé áde ane mod awé álánjé wē áá, étéd échon ebúm ékag?"

¹³ Bon ane mod mwēn enkēnkongé Yesue abíí, ngáne Yesue ámmadté asól á amute-té áde démbē áhed.

¹⁴ Ambíd enē Yesue annyín ane mod á Ndáb-e-Dyób. Ade ányiné mós, anláá mós áá, "Nóné', emaa bwám adyē. Weébēlē mbēh ámpē éśebé né, né wētóm atag ngáne étágé'áá nē."

¹⁵ Hē d́óo ane mod áhídté, bon áke álánjē bad bémháá bé Israel áá Yesue móo adidé mós bwám.

¹⁶ Né-óó, bad bémháá bé Israel bēmbóótéd Yesue mekuu ahíd áyāle achõjté mod á mbwe-mé-nkóme-áte.

¹⁷ Yesue antimtén bós áá, "Echem Sáj ayōgké nsón abel, me-é ámpē ntánjééné nsón abel."

¹⁸ Enén póle échē Yesue ánhōbpē, embēl yāl ennabé bad bé Israel atod áte áwúu mós, áyāle saké mbéndé e mbwe-mé-nkóme-áte, chēmpen ábóó bon achágé Dyób áá Sáá, nēdē álúmté' áá b́ó Dyób bétás.

Ngine e Mwán a Dyób ehúu ne Dyób

¹⁹ Né-óó, Yesue antimtén ábē bad bémháá bé Israel áá, "A mbále, nlánje nyé nén meé, Mwán a Dyób eébēlēē dyam ké ahóg ne mós mwēn. Mekan níme ányinéé Sáá abele' mós mómpē ábēléé. Kéchéé éche Saa ábēléé ch́óo mómpē ábēléé.

²⁰ Ngáne édíí nén bán Sáá adaá Mwán, álúmté mós ch́óm téé éche ábēléé. Alūmēd-te mós ndale é mekan éche étómé nímén, ábel ékómed nyé yāl áte.

²¹ Ngáne Sáá ápuudtēé bad bon ábagé-é b́ó alonjé, melemlen nē d́óo Mwán mómpē ábagéé alonjé wēé kénzēé awé ádás alonjé ábe.

²² Melemlen-áá Sáá éékāadtēē modmod. Abagé Mwán ngine esyāál ákáad bad.

²³ Abélé nē ábel bon bēbage Mwán edúbé melemlen ngáne bēbageé Sáá. Kénzēé awé eébage Mwán edúbé, né eébageé ké Sáá awé alómé Mwán edúbé.

²⁴ Ne mbále, nlánje nyé nén meé, kénzēé awé awógé ábēm e'yale bon adúbé mod awé alómé me, akudé alonjé áde démaa', bēekáad-taá mós. Amaa atóm á kwééd, asólé á alonjé.

²⁵ Ne mbále, nlánje nyé meé, pónédé ehúe', emaa-é ape, échē bad ábe béwédé bēwōgkē ehób e Mwán a Dyób, bad ábe bēwōg-ke ch́ó bēbē á alonjé.

²⁶ Ngáne alonjé áhúu ne Sáá, melemlen nē d́óo ábélé áá alonjé áhúu ne Mwán ámpē.

²⁷ Abagé-é Mwán ngine ákáad bad áyāle Mwán adii ane awé béchágéé bán Mwán-a-Moonyon.

²⁸ Nén déékāmtē nyé yāl áte; pónédé ehúe' échē bad bésyāál ábe béwédé bēwōgkē échē ehób,

²⁹ bēbíd-te á son-tē: Bad ábe bēbélé mbon, bēpuú ábē á alonjé, ábe b́ó-é bēbélé mbē bēpuú békud nkógsen.

Mbónj áyāl wēé Yesue

* 5:3 Donje á kálag ábádé nchoo 3b-4: *Abé bad bé nkole bēmbē áhed ásin bán mendíb mépuuted áte. 4 Ebédé nín bán, pónédé-té ángel eche Sájgwéé ehýagáá asud á eton-tē wē épuuted ch́ó áte. Nzé émbenléd-te nē, mod á nkole ké ahéé awé ansebé asól áwēd-te nkole nímá' áá mós.*

³⁰“Dyamdyam deesaá áde ríhale ríbbel ne mmèn. Ngáne echem Sáj alángé me aá ríkaad nê dáo nkáadte, né-òó mbakú echém etyéémé. Etyéémé áyale meekáádtéé ngáne mmèn rídás, boj nkáadte’ ngáne mod awé alómé me áhadeé.

³¹“Nzé mbídé echem yál mbónj né ene mbónj eché ríbbideé eékobnedé.

³²Boj mod ampée adé awé abíde me mbónj, mbíí-’e nén meé, mbónj eché abídéé me eékobnéde.

³³Nyènlóm bad wée Jone, mós-aá abídé mbónj tângene mbále.

³⁴Eesaá nén bán, moonyonj atângéné me mbónj abíd. Boj nlanggé nyé tângene mbónj eche Jone, ábel nyédúbe me, nyékud e’soosoj.

³⁵Jone abédéé nées etrukánj éche échodné, épenté-’e ekíde. Nyèmbé menyíngé áhíd abé e’nyínen bé ekíde áyale esónj é pónde.

³⁶Boj nwóó mbónj eché etómé ké mbónj eché Jone ámbídté. Nsón míme echem Sáj abágé me aá ríbbel rímad, mmèn ríbbide mbónj nén bán echem Sáj mós alómé me.

³⁷Echem Sáj awé alómé me mwèn ámpé abíde me mbónj. Nyéewógéé mós eháb, nyéenyíné-’aá mós mbéd.

³⁸Nyéédúbpéé ane awé alómé, né-òó nyéémwagké bán éché eyale édye nyé á nlém-té.

³⁹Nyéékídté’ Eyale é Dyób ahed áte áyale nyéwémtan bán nyéékúd alongé áde déemaá’ áwéd-te. Echén Eyale chèn-’é ehábe áyál echém.

⁴⁰Ké nê, nyééhédéé ape áwém ábel boj nyékud alongé áde déemaá’.

⁴¹“Saké edúbé é baányonj ríhedeé.

⁴²Boj mbíí nyaa é bad éche nyédíí, mbíí-’e meé nyéewóhneé Dyób edange á nlém-té.

⁴³Mpedé á dín áde echem Sáj, nyéékobéé me, boj nzé mod ampée apedé á dín adé dèn, nyéékob mós.

⁴⁴Nzé nyékene’ nhóg ne aníníí, nyéwógé bwám, boj nyéébbéé ngáne Dyób dèn dékenné nyé. Chán-nó nyédúbbé me?

⁴⁵Ké nées nyéekobéé me, nyéewémtán bán, me-’éé mēlāā echem Sáj meé nyéékobéé me. Mosee awé nyélyágé nlém awé mwèn-neé akóhnté ane abé awé áhōb aá, nyébelé mbéb.

⁴⁶Nzé nyènkónj Mosee adúbe né nyédúbpé me, áyale nén, áyál echém dáo ántenlé mam míme átélé.

⁴⁷Boj nées nyéédúbpéé mekan míme átélé, chán nyédúbbé abém e’yale?”

6

Yesue adídté ndun e mod

(Mat 14.13-21; Mak 6.30-44; Luk 9.10-17)

¹Ámbíd e mímén mésyāāl, Yesue ne abé bembapée bēnchabé edib é Galilia éche béchagéé bán edib é Tiberia.

²Ndun e mod ehídé’áá mós áyale bényíné’áá menyáké míme abélé’áá ngáne áchóhnté’áá bad bé nkole.

³Héé Yesue ne abé bembapée békíí á ekone-mín boj bédyēé asé.

⁴Pónde é Ngande e Nnyíme-ámin e bad bé Israel embé benben.

⁵Asad áde Yesue ásádé díd annyín ngáne ndun e mod éhúte’ é mós benben. Dáo ásedteé Filibe aáken, “Héé déchanné ndyééd eché débéé ábén bad ádyé?”

⁶Ansedéé mós nê ákag mós áyale mwèn ammad abíí chóm éche ábenlé.

⁷Filibe ankwentén aá, “Étéd tómaa ne mbwókel é kábpe ébe áchan ndyééd éche ékwognéd ábén bad bésyāāl adyé ábel boj mod téé ádyé mwātííd.”

⁸Dáo Yesue awé mbapée ampée, Andreyá, Símón Petro mwányanj áhōbée aá,

⁹“Mwá kódemod adé hén awé awánlé e’wele é’táan ábe bēbénlé ngun é báli, awánlé-’e síu ébe, boj chán enén ndyééd éhēlé-’e ékwōg enén ndun e mod?”

¹⁰Dáo Yesue alángéé ábe bembapée aá, “Nyéláa ábē bad, bédyēé asé.” Nkǎákǎ ambud abé á pēd é adé abwóg a hóm. Né-òó, ábē bad bésyāāl bēndyēé ásé. A amute-té wē, baachóm bēbédé dyam e’kálé é’táan.

¹¹Héé Yesue átédé ábē e’wele, ásāgnān Dyób, boj ábē bembapée békabpé bad. Ambēl melemlem ne éché síu. Mod-téé andyé ngáne áhédé’áá.

¹²Ade bō moosyāāl bémáá akód, Yesue anláá ábē bembapée aá, “Nyélád ndyééd eché elyógéé asé. Ndyééd ké póg eebébé’.”

¹³Né-òó, áde bémáá adyé bēnlád ndyééd eché enlyóg asé, enlón e’lón dyóm ne é’be.

¹⁴Anyín áde ábē bad bényíné mímén menyáké míme Yesue abélé bēnhōb bán “Ne mbále, nkal e’dáádānj awé bēnhōbpé bán āpē á nkóhseé mós nén.”

¹⁵Yesue ambíí aá bēhede mós akób ányágéd mós ábē kǎnj. Né-òó, antím ámbíd á ekone-mín.

Yesue akil á mendīb mín

(Mat 14.22-33; Mak 6.45-52)

¹⁶ Ngukél, bembapɛɛ ábe Yesue bɛnkɛ á edib.

¹⁷ Bɛnsɔl á bɔle-tɛ, béchabpɛ edib, bétimnád á Kapenahum. Ehíntén ɛmmád apɛ áde Yesue ɛɛpédɛɛ wɛɛ bédíí.

¹⁸ Enén pónɔdɛ epub é ngine étómé'áá, épúutád-te mendíb áte.

¹⁹ Bɔɔb-pɔɔ bembapɛɛ bɛmmád akɛ ké máyl méláán ké'ɛ méniin, dɔɔ bényíné Yesue akag á mendíb mɔn, átímnád bɛnɛn ne ábab bɔle. Mbwóg rí ngine ménkɔb bɔ.

²⁰ Bɔn anláá bɔ áá, "Mɛ-ɛɛ ndé, nyéébaá'."

²¹ Hɛɛ bétédé mɔ á bɔle-tɛ ne menyinge, ábwɔg-ábwɔg bɛpɛɛn-ne bɔle á nkin wɛɛ békágé'áá.

Yesue mɔ adé ewele éche ébage' alongé

²² Nɛɛ bɔn é'sáŋgɛ, ndun e mod eché enlyäg á múde mé edib mɔmíníí wɛɛ Yesue ne ábɛ bembapɛɛ bɛmbídtɛ, bɛnchem bán, ngukél eché entóm, bɔle e'hóg bɛnɛn bɔɔ bɛmbɛ áhed. Bɛmbíí-ɛ bán Yesue enkɛnsɔnlé áwɛd-te ne ábɛ bembapɛɛ. Bɛmbíí bán ábɛ bembapɛɛ bɛnɛn bɔɔ bɛnkɛ.

²³ Myɔle mɛmpɛɛ níme mɛmbíd á dyad á Tiberia mɛmpɛ á nkin mé edib bɛnɛn ne hóm áde ene ndun e mod éndyɛɛ e'wɛle ámbíd eché Sáŋgwéé ámáá Dyɔb asáŋnɛn.

²⁴ Ade ene ndun e mod ényíné nɛn bán, Yesue ne ábɛ bembapɛɛ béesaá áhed, bɛnsɔl á myɔle-tɛ wɛ, békɛ á Kapenahum, áke dé áhed Yesue.

²⁵ Ade ábɛ bad bɛpédé á ped e edib eníníí, bényín Yesue. Bɛnsɛdéd mɔ bán, "A-meléed, pónɔd ehéé épédé hɛn?"

²⁶ Yesue ankwɛntɛn bɔ áá, "Ne mbále, nláŋge nyé nɛn mɛɛ, saké menyáké mɔmɛ mbélé ríkás bɔn nyéhɛdɛ mɛ. Nyéhɛdɛ mɛ áyále e'wɛle ábe nyédyéde bɔn nyɛkód-te.

²⁷ Nyéewág ntú áyále ndyéed eché ebɔɔde', bɔn nyéwág ntú áyále ndyéed eché ebág abé ne abé á alongé áde déemaá', chɔ'-áá ébage alongé áde déemaá'. Ene ndyéed chɔɔ Mwán-a-Moonyon ábɛɛ. Mɔɔ Dyɔb Titɛɛ áhédé e'chem áá ábɛl nɛ."

²⁸ Dɔɔ ábɛ bad bɛnsɛdéd Yesue bánken, "Cheé sétáŋgɛné abɛl, ábɛl bɔn sébɛl mekan níme Dyɔb áhédéé áá, sébɛl?"

²⁹ Yesue ankwɛntɛn áá, "Dyam áde Dyɔb áhédéé áá nyébel ádíí ádúbe mɛ awé álómé."

³⁰ Bɛntíntɛn Yesue bán, "Menyáké méhéé wɛbɛnlé níme sényínnɛ bɔn sɛdúbé wɛ. Cheé mɔmɔn wékonjé abɛl?"

³¹ Abɛd betaa béndyɛ mána á ehyáŋge ngáne éténlédé á kálag e Dyɔb nɛn bán, 'Ambag bɔ e'wɛle ábe é'bídé ádyɔb áá bédyé'."

³² Yesue ahób áá, "Ne mbále, nláŋge nyé nɛn mɛɛ, saké Mosɛɛ mɔɔmbɛ nyé ewele éche ehúú ádyɔb, bɔn echem Sán mɔɔmbɛ nyé ewele éche ehúú ádyɔb.

³³ Ayále mɛ-ɛɛ ndé éché ewele éche Dyɔb ábágé, éché ehúú ádyɔb, eché ábageɛ baányon bé nkɔŋsɛ alongé áde déemaá'."

³⁴ Dɔɔ bɛláŋgɛɛ Yesue bán, "A-Sán, bagé sé échɛn ewele pónɔd ésyáál."

³⁵ Yesue anláá bɔ áá, "Mɛ-ɛɛ ndé ewele éche ébage alongé áde déemaá'. Kɛnzéé awé apedé áwɛm, nzaa éekóbpɛ mɔ ámpɛ. Kɛnzéé awé adúbpɛ mɛ, píđ éekóbpɛ mɔ ámpɛ.

³⁶ Nláŋgɛ nyé nɛn mɛɛ nyényíné mɛ bɔn nyéedúbpɛ mɛ.

³⁷ Bad bɛsyáál ábe echem Sán ábágé mɛ, bɛpɛ áwɛm. Kɛnzéé awé apedé áwɛm, méebáŋgɛ mɔ akob.

³⁸ Ayále mee bídɛɛ ádyɔb ábɛl ngáne ébɔŋnédé mɛ. Mpedé ábɛl ngáne ébɔŋnédé echem Sán awé álómé mɛ.

³⁹ Bɔn nɛn ádíí mewɛmɛn níme ane awé álómé mɛ, áá áfíntɛ bad bɛsyáál ábe ábágé mɛ, mee bɔdɛ ké nhóg, bɔn áá nípuud bɔ moosyáál á epun é asóg.

⁴⁰ Echem Sán áhɛde áá moosyáál awé anyíné mwán, adúbé-ɛ mɔ, ákud alongé áde déemaá'. Mɛpuúd-te bɔ á epun é asóg."

⁴¹ Abɛ bad bé Israel bɛmbootéd anyoo áte táŋgɛne Yesue, ahób áde áhóbé áá, "Mɛɛ ndé ewele éche ébídé ádyɔb."

⁴² Hɛ dɔɔ bɛhóbɛɛ bánken, "Saá Yesue, mwán awé Josɛbɛ nɛn-ɛ? Ngómɛ debíí sáá ne nyan? Chán-nɔ áhɛlɛɛ áhábɛ áá móbídɛ ádyɔb?"

⁴³ Yesue anláá bɔ áá, "Nyésóg anyoo áte.

⁴⁴ Modmod ééhɛɛ-sɛ ápɛ áwɛm, ésebán Titɛɛ awé álómé mɛ apɛɛnɛ mɔ áwɛm. Mɛpuúd-te mɔ á epun é asóg.

⁴⁵ Eténlédé ngáne bekal bé'dáɔdɔŋ bɛhóbɛ nɛn bán 'Dyɔb dýyágɛd bɔ moosyáál.' Kɛnzéé awé awógɛ', áyáŋkɛ-ɛ wɛɛ Titɛɛ, apag áwɛm.

⁴⁶ Eesaá nɛn bán, mod ké nhóg akényín Titɛɛ. Ane awé abídɛ wɛɛ Dyɔb mwɛmpɛn mɔɔ akényín Titɛɛ.

⁴⁷ Ne mbále, nláŋge nyé nɛn mɛɛ, kɛnzéé awé adúbpɛ mɛ ákúd alongé áde déemaá'.

⁴⁸ Mɛ-ɛɛ ndé ewele éche ébage alongé.

⁴⁹ Abɛn betaa béndyɛ mána á ehyáŋge, bɔn ké nɛ, bɛnwɛ.

⁵⁰ Bon ewele éche ébidé ádyöb edé nyaa echë kénzée awë adyédé chö éewáá.

⁵¹ Mε-εé ndé ewele éche ébage alongé éche ébidé ádyöb. Kénzée awë adyédé echë ewele, ábē á alongé á ngíndé ne á ngíndé. Echén ewele éche mbéé nyé édií echem yäl echë mbéé ábel bon ríkade alongé dé nkönsé.”

⁵² Ade ábē bad béwógé nē, bēnlīn, bēn ne bēn bébootéd-te mpenten ní ngíne, bésedté bánken, “Chán anén mod áhale atéd eche yäl, ábē syáné aá dédyág?”

⁵³ Yesue anláá bó aá, “Ne mbále, nlánge nyé nén mεé, nzé nyéedyéde yäl e Mwän-a-Moonyon nyémwé-ε nímē mekií, nyéekudté alongé áde déemaá’.

⁵⁴ Kénzée awë adyédé echem yäl, amwé-ε nímēm mekií, ákūd alongé áde déemaá’, mēpuúd-te mó á epun é asóg.

⁵⁵ Ayāle echem yäl chö eköjté ndyééd abé, nímēm mekií-ε mékon mmítéd abé.

⁵⁶ Kénzée awë adyédé echem yäl, amwé-ε nímēm mekií, alyagé adé ne mε, mε-ε nlyagé ndé ne mó.

⁵⁷ Tité awë akāé bon bad bébé á alongé, mó alómé mε, mó akāá-ε bon mbé á alongé. Melemlem néé kénzée awë adyédé echem yäl, mbēnlé abé á alongé.

⁵⁸ Né-óó, mε-εé ndé ewele éche ébidé ádyöb. Meésáá nēngāne ewele éche ábēn betaa bēndyēē, bon ké nē béwé. Bon kénzée awë ádyē echem yäl ábē á alongé á ngíndé ne ngíndé.”

⁵⁹ Yesue anhób nímēn mésyāā áde áyágté’áá á ndáb e mekáne e bad bé Israel á Kape-nahum.

E’yale ábe Yesue é’pεene’ alongé áde déemaá’

⁶⁰ Ade bad híin ábē behídé’áá Yesue béwógé nímēn mekan bēnhāb bán, “Adén ayáge álélé ahíd. Nzéé áhale ákob ene ndin e dyam?”

⁶¹ Yesue ambíí aá, bényonge áte áyāl echë, né-óó anláá bó aá, “Nē áwag nyé á yäl-ε?”

⁶² Chán-nō nyēhābpé áde nyēnyīnnē Mwän-a-Moonyon apumme’ ámbíd ámīn wēε ámbídtē!

⁶³ Edáádān é Dyöb chōó ébage’ alongé. Ekob é yäl éesaa dyamdyam. E’yale ábē rílánge nyé é’dií edáádān ne alongé.

⁶⁴ Bootya ene pónde nē dēnkān bad ábē behídé’áá Yesue ábóótédé ayáged, ambíí bad ábē béedúbé, abíí-ε mod awë ášōm mó.)

⁶⁵ Ambád ahób aá, “Nén dōó ákās bon nláá nyé mεé modmod eéhēlēε-ε ápε awēm kāsān né echem Sān abelé bon ápε áwēm.”

⁶⁶ Bootya ene pónde nē dēnkān bad ábē behídé’áá Yesue bésóg mó ahíd, bétim-mε ámbíd.

⁶⁷ Héε Yesue ásedtéé ábē bēmpāε dyóm ne bébe aá, “Nyémpé nyēhede atim ámbíd-ε?”

⁶⁸ Simōn Petro ankwentén mó aá, “A-Sān, wēε nzéé skéε? Wε-εé ewóó e’yale ábē é’kāé’ bon mod ákūd alongé áde déemaá’.

⁶⁹ Sédúbé sébíí-ε bán, wε-εé edé Ane-awé-Asáá awë abidé wēε Dyöb.”

⁷⁰ Héε Yesue ákwentanné bó aá, “Eesáá mbále bán mpwédé nyé bad dyóm ne bébe-ye? Bon ké nē, nyé mod nhóg adíí mod a Satan.”

⁷¹ Judase, mwän a Simōn Iskariōde móo Yesue áhóbé’áá. Kénéε ámbēē mbapεε nhóg áttinté e bēmpāε dyóm ne bébe, mó anké Yesue ntúré.

7

Yesue ne baányan

¹ Ámbíd e nímēn mésyāā, Yesue akagé’áá mebwóg ne mebwóg á mbwóg e Galilia. Enkēndāngé áke á mbwóg e Judeya áyale bad bé Israel behédé’áá mó awúu.

² Bōōb-ρōó, Ngande e E’bem * e bad bé Israel embé bēnbēn.

³ Héε Yesue baányan belángeé mó bán, “Etángéné ádén abwóg á hōm ahide, éke á mbwóg e Judeya ábel bad ábē behíde wε bényín menyáké nímē ébēléé.

⁴ Mod eébélēē nsón á e’kōnjéd-te, nzé ahede aá móbyēn. Ngāne ébēléé nímēn mekan mésyāā ébel nkōnsé rīsyāā nībíí wε.”

⁵ (Ké Yesue baányan bēnkēndúbéé mó.)

⁶ Héε Yesue álángeé bó aá, “Echem pónde eépédéé. Bon ne nyé, echen pónde edé pónde ésyāā.

⁷ Nkōnsé méehēléé-ε ríkōó nyé. Bon ríkōó mε áyāle mpanlad bó nímāb mewusé áte.

⁸ Nyébó nyékag á ngande. Méekaá áwed áyāle echem pónde eépédéé.”

⁹ Yesue amaá-áá ahób nē, abé abé á Galilia.

Yesue akil Ngande e E’bem á Jerusalem

* **7:2 Ngande e E’bem:** ebédéε ngande echë bad bé Israel bébélé’áá ákamten pónde echë ábāb betaa bēdyéé’áá á e’bem-té áde bébéde á ehyánge, áde behídté á Egipto.

¹⁰ Ambid e pónde áde Yesue baányanj bemaá ake á Ngande e E'bem, mómpē anķé awed. Boj enkēnlúmedté yǎl. Ankē nyaa echē bad bēnkēmbíí'ē ndin e mod echē ádíí.

¹¹ Benkamle ne bé Israel bēhédé'áá mó á ngande-tē, bésēdté bánken, "Héé múmó ádíí?"

¹² Átintē e ndun e mod echē embé á ngande-tē wē, donje á bad bēhóbé'áá bán, "Adii mod á bwám," ábiníí'-ē bán, "Aáy, adoge bad dogén."

¹³ Boj bó modmod bēnkēmbíídédé yǎl áwed áyāle bēbaá'áá bad bēmbáá bé Israel.

¹⁴ Ade ngande ékwógé ape átintē, Yesue anķé asól á Ndáb-e-Dyöb, ábootéd ayáged.

¹⁵ Yǎl enkóm benkamle áte bwámbwam tǎngene áde ayáge. Né-óó, bēnsēdéd bánken, "Chán anén mod ámwédé mímén mam mésyāal abii áde éekii'ē á esukēle é mbéndé?"

¹⁶ Héé Yesue ákwentanné bó aá, "Ayáged áde rí'yágtē déesaá ádēm. Adii áde mod awē alómé me.

¹⁷ Kénzēé awē awémténé abel ngáne Dyöb áhedéé, ábíí ké ádēm ayáge ahúú ne Dyöb ké'ē ahúú ne mmēn.

¹⁸ Kénzēé awē ahóbne echē kunze, abele nē áhede eche yǎl edúbé. Boj mod awē áhedte' mod awē alómé mó edúbé, asáá nlem á abum, eésáá mod á metóm.

¹⁹ Eesaá mbále nén bán, Mosee abagé nyé mbéndé-ye? Ké nē, nyé modmod eehídéé mbéndé éched. Cheé ékás boj nyéhédé me awúú?"

²⁰ Dóó ene ndun e mod ékwentanné mó bán, "Edáádān é mbéb édé we áte. Benzébádé bēhede we awúú?"

²¹ Yesue ankwentén bó aá, "Nsón nhóg nime mbélé, nkómté nyé moosyāal yǎl áte.

²² Mosee ambē nyé mbéndé aá, nyéyage áben bán (kénēé edii bán, saké Mosee mómbbootéd. Abēn betaa bóó bēmbbootéd). Né-óó, nyéyage bad á Mbwe-mé-nkóme-áte.

²³ Nzé béyáge mod á mbwe-mé-nkóme-áte, ábel bēébóó' mbéndé e Mosee, cheé ékás boj nyélijné me áyāle nídidé mod bwám á mbwe-mé-nkóme-áte.

²⁴ Nyéekáádté dyam áde mbélé ngáne nyényiné, nyékáad ngáne éhednadté."

Bán Yesue móde Ane awē bésinē-ye?

²⁵ Héé dóó donje á bad bé Jerusalem bēhóbéé bánken, "Saá mod awē bēhedéé awúú mó nēn-ē?"

²⁶ Nyénōné', akanle bad á tǎl e ékwéé, bad bēmbáá béesaá'-aá mó dyamdyam aláa. Kapóg bēbíí bán ne mbále, móde Ane-awē-Béwógté-yóó!

²⁷ Boj eehelēé-se ébē nē, áyāle debíí bán pónde echē Ane-awē-Béwógté ápeé, modmod eebíí'ē wēé ábidé. Debíí wēé anén mod ábidé."

²⁸ Yesue ambé áyágté' á Ndáb-e-Dyöb. Ade áyágtéé dóó áchágté ehób ámín aá, "Ee, nyébíí me bwám, nyébíí'-ē wēé mbíbidé. Meépedéé hén ne mmēn. Ane awē alómé me adé mbále. Nyéebíí'ē mó,

²⁹ boj me pen mbíí mó áyāle awē dóó mbíbidé, mó'-aá alómé me."

³⁰ Ade áhóbé nē, bēhédé'áá mó akób, boj modmod enkēmbánné mó ké ekáá á yǎl, áyāle eche pónde enkēmpáá.

³¹ Ké nē bad hiin átintē ene ndun e mod béndübē mó. Bēhóbé'áá bánken, "Ade Ane-awē-Béwógté ápeé, ábēl e'chemléd bé menyáké, nime rítómé nime anén mod ábélé-ye?"

Befarisia bēlómé bad akób Yesue

³² Befarisia bēnwög nēe bad bényongéé áte, bēhóbéé mímén mekan tǎngene Yesue. Né-óó bóóbe beprise bēmbáá bēnlōm bembáledé ákób mó.

³³ Héé Yesue áhóbéé aá, "Ndii ndé ne nyé, boj mwámpin mí pónde mēsü ámbid wēé ane awē alómé me.

³⁴ Ambid enē, nyéēhēd me, boj nyéenyínné, wēé mébēē'-ē nyéehēnlé ape áhed."

³⁵ Nē dēmbēl benkamle ne bésēdté nhóg ne anííí bánken, "Héé anén mod múmó áhedéé ake, wēé syānē déehēnlé mó anyín? Ahede ake á alonj á Grikia wēé ábēd bad bédíí á ebwóg áyáged bad bé Grikia-ye?"

³⁶ Ahóbe' aá déēhēd mó boj déenyínné mó. Aá déehēnlé'-ē ape wēé móbēē. Cheé nē álúmtéé?"

E'dib bé mendib mé alonjé áde déemad'

³⁷ Epun é asóg é ngande éche éntómtēn etógnén abé áyāle ene ngande émpē. Yesue antyéém ámín, dóó áchágté ehób ámín, áhóbé aá, "kénzēé awē píid ékóbé áhyag áwēm áhye ámwē mendib.

³⁸ Kénzēé awē adúbpe me, Kálag e Dyöb ehóbe aá, 'e'dib bé mendib mé alonjé bēbidé mó áte é'sobpe.' "

³⁹ Edáádān éche Esáá chóó Yesue áhóbé'áá. Chóó bad ábe béndübē mó bēntāngēnnē akud. Ene pónde né Edáádān éche Esáá éépēdēē wēé ábē bad áyāle ene pónde ne Dyöb déélúmtēē ehúmé éche Yesue.

Bad békábné áte á atón áde Yesue

⁴⁰ Donge á bad áftinté ene ndun e mod ábe bénwōg néε Yesue áhóbéé mímén mekan bénhōb bán, “Ne mbále, anén mod adii nkal é’ dǎádǎj awě ápǎ.”

⁴¹ Bad bémpee béhóbé’áá bán, “Módé Ane-awě-Béwógté awě ápǎ.” Ké nē, bémpee béhóbé’áá bán, “Ane-awě-Béwógté eéhēlē-sē abíd á Galilia.

⁴² Eténlédé á Kálag e Dyōb nén bán, Ane-awě-Béwógté ábid á túmbé e Dabid á dyad á Betlehem wée Dabidé ámbídtē.”

⁴³ Né-óó, bad bēnkabén áte á atón áde Yesue.

⁴⁴ Donge á bad béhédé’áá mó akób boj modmod enkēmbánné mó ké ekáá á yāl.

Baambáá bé Israel béekwentenéé Yesue adube

⁴⁵ Kóōne ášg bembalede bé Ndáb-e-Dyōb bēntim wée beprise bémháá ne Befarisia. Héε beprise bémháá ne Befarisia bésēdtéé bó bánken, “Cheé ékás boj nyéepene mó hén?”

⁴⁶ Héε ábē bembalede béhóbéé bán, “Modmod eéhóbéé ndin é mam éche anén mod áhóbéé.”

⁴⁷ Dóó Befarisia bésēdtéé bó bánken, “Nédē ane mod adogé kóōne nyémpē-ye?”

⁴⁸ Nyékényin néε mod ambáá ké’ e Farisia nhóg ádubpé mó? Ké nhóg eédubpéé mó.

⁴⁹ Enén ndun e mod eebii’ é mbéndé e Mose. Né-óó ebómán édé ne bó.”

⁵⁰ Farisia nhóg awě béchégé’áá bán Nikodemuse awě ansébé Yesue áke dé anyin, anláá bó áá,

⁵¹ “Eche syánē mbéndé eébageé kunze nén dékógsen mod áde déekáadtéé mó, áwóglēn dyam áde ábélé.”

⁵² Ade áhóbé nē, bēntimtén mó bánken, “We ámpē ebíde á Galilia-ye? Héđ áte á Kálag e Dyōb, wēnyin nén wē nkal é’ dǎádǎj eebídeé á Galilia.”

Mmwaad awě akábé asón

⁵³ Ámbid enē moosyáál ansú áwe ndáb.

8

¹ Yesue pen ankē á Ekone é Menzab.

² Néε bín é’ sǎngé mbwembwe, antim ámbid á Ndáb-e-Dyōb. Ndun e mod empē áwē. Andyéé ášē ábootéd bó ayáged.

³ Bemeléede bé mbéndé ne Befarisia bēmpēén mmwaad nhóg áwē, awě békóbé néε ákábéé asón á ndáb e e’wóngé. Béntii ane mmwaad áftinté echáb,

⁴ boj belǎngē Yesue bán, “A-meléed, békóbé anén mmwaad néε ákábéé asón á ndáb e e’wóngé.

⁵ A mbéndé eche syánē, Moseε anhōb áá, enén ndin e mmwaad béltim chó meláá kóōj áwē, chán-nǎ wē-’e éhóbé?”

⁶ Bēnsédéd mó nē áhii mó melám, ábel nén békóben mó awusé. Boj Yesue anwúlén ášē, ábootéd bwēm atel á ndǎob-tē ne ábē e’ mii.

⁷ Ade béhádánéé mó aseded, antii yāl ámin, aláá bó áá, “Nyé ké ahéé awě eébéleé mbéb ábē mod a’ s’ó álúm mó meláá.”

⁸ Anwúlén mó ášē ámpē átelé’ ábē bwēm á ndǎob-tē.

⁹ Ade ábē bad béwógé nē bēmbootéd ahide nhógē-nhógē. Bad bémháá bóó bēnsēbē áke, boj bésad béhíde’. Kóōj ne á asóg Yesue mwēmpen anlyág, ane mmwaad-te ábē atyéém áhed.

¹⁰ Ade Yesue áftidé yāl ámin, dóó ásedteé ane mmwaad áá, “A-mmwaad nén, héé bad ábe bépééne wē hén bédii? Modmod eélyageé hén awě áhóbé áá béwúu wē-ye?”

¹¹ Ane mmwaad ankwentén áá, “A Sǎj modmod.” Héε Yesue álǎngéé mó áá, “Né mēmpē mééhóbpé méé béwúu wē. Kǎg wē, boj weébēleé mbéb ámpē.”*

Yesue módé e’nyinen bé ekide bé nkójsé

¹² Yesue anláá ábē bad ámpē áá, “Méé ndé e’nyinen bé ekide é’ bad bé nkójsé. Kénzéé awě ahíde me, éekaá á ehintén-tē, boj ákud e’nyinen bé ekide ábe é’ bage’ alongé.”

¹³ Dóó Befarisia belǎngéé mó bán, “Ebíde echon yāl mbón, né-óó mbón echón eékobnedéé.”

¹⁴ Yesue ankwentén áá, “Kénéε mmén mbídeé echem yāl mbón, echem mbón édé mbále, áyále mbíi wée mbíde, mbíi-’e wée ríkagké, boj nyé, nyéebii’ é wée mbíde, nyéebii-’áa wée ríkagké.

¹⁵ Nyékáadte bad á nyaa e moonony. Meekáadtéé modmod.

¹⁶ Ké menkáad-te ké káadtén, echem mbakú édé mbále, áyále meekáadtéé ne mmén, boj nkáadte, ne ane awě álómé me.

¹⁷ Néε behúde ké nē áte, á mbéndé echén, éténlédé nén bán nzé bad bébe bēbídeé dyam mbón, boj béhóbé melemlē mé dyam, né ene mbón édé mbón e mbále.

* 8:11 Ekud e kálag é’ s’ó éewóó’ échén eped (7.53-8.11).

¹⁸ Nyébii-òò nèn bán nwóó mbónj ébe, mmèn ne mod awè alómé me, awè adé echem Sánj.”

¹⁹ Héé dáo Befarisia bésedtéé mó bán, “Héé sóó adíí?” Ankwentén bó aá, “Nyéebíí-é me, nyéebíí-áa ké echem Sánj. Nzé nyémbíí me, né nyébíí kóájne echem Sánj.”

²⁰ Yesue anhób ábén e'yale áde áyágtéé á Ndáb-e-Dyòb-te, benben ne wée békonjgéé moné. Bonj modmod enkènkòbpé mó, áyále eche póndé eché békòbée mó enkèmpaá.

²¹ Yesue anláá ábè bad ámpé aá, “Méké, nzé mmaa'-e áke, nyééhèd me, bonj nyéenyínné, né-òò nyéewé awèn mbéb-te. Wée mébèè, nyéehenlé ape áhed.”

²² Héé bad bémbáá bé Israel bésedtéé bán, “Ahóbe' aá, wée mókéé aá syáné déehenlé ape áhed, múmó ahede yál awúu-ye?”

²³ Anláá bó aá, “Nyédíi bad ábe bébíde áse wén, bonj me pen, mbíde ámín. Nyébíde á nkòjse wén, me pen, meebídeé á nkòjse wén.”

²⁴ Né dáo ákás bonj rílangé nyé meé, “Nyéewé awèn mbéb-te. Nzé nyéedúbpe bán, 'Ndíi Mod Awé Ndíi,' né nyéewé-é awèn mbéb-te.”

²⁵ Héé bésedtéé mó bánken, “Nzé-módé edíí?” Dáo ákwentanné bó aá, “Nyaa e mod eché rílangé nyé se á mbooted meé ndé chòó ndíi.

²⁶ Nwóó mam híin ahób tángene nyé, ne ákáad nyé. Bonj mod awé alómé me adíi mod a mbále, mekan rímé rílangé-áa nyé hén á nkòjse médíi mekan rímé ríwógé awé.”

²⁷ Ade Yesue áhóbé nê, bénkènsòpténné bán Sáa awé adé ámín móó áhóbéé.

²⁸ Héé Yesue álangéé bó aá, “Póndé eché nyémadté Mwán-a-Moonyonj abane ámín, dáo nyéebíí-é bán, 'Ndé mod awé ríhóbé meé ndé.' Nyéebíí-é bán, meébéèèè dyamdyam ne kunze echém, bonj dyam áde ríhóbéé adíi dyam áde echem Sánj áyágté me.

²⁹ Ane awé alómé me, adé-é ne me, eétedtéé mmèmpen, áyále mbele' mekan rímé mébónjnéde mó.”

³⁰ Bad híin ábe bènwóg nées Yesue áhóbéé rímén mekan, béndúbé mó.

Nzéé adé sáá awé bad bé Israel?

³¹ Héé Yesue álangéé bad bé Israel ábe béndúbé mó aá, “Nzé nyédíi nyéhíde' adém ayáge, né nyékòjté ábém bembapee abé.

³² Né nyéebíí mbále, né ene mbále éhüd-te nyé á mehanj-té.”

³³ Bènkwentén bán, “Sédíi nchyaátén míme Abrahame. Séébedéé-áa ntánj a mod mbéd. Chán-ná éhele éhóbé wée séebáá á mehanj-té?”

³⁴ Yesue ankwentén bó aá, “Ne mbále, nlange nyé meé, kénzéé awé abele mbéb adíi ntánj a mbéb.

³⁵ Ntánj eebákgé á túmbé-te abé ne abé, bonj mwán a túmbé, adíi mwán a túmbé póndé ésyáál.

³⁶ Né-òò, nzé Mwán ahúde nyé á mehanj-té, né dyamdyam déetedtéé nyé ntánj ámpé.

³⁷ Mbíi meé nyédíi nchyaátén míme Abrahame, bonj ké nê, nyéhede me awúu, áyále nyééhèdèè adém ayáge ahíd.

³⁸ Nlange nyé mekan míme echem Sánj álúmté me. Nyé-é nyébele mekan míme echen sánj álangé nyé.”

³⁹ Bènkwentén mó bán, “Abrahame adíi echéd sánj.” Yesue anláá bó aá, “Nzé nyènkòj bán ábe Abrahame abé, né nyébele' mekan míme Abrahame ábélé' áá.

⁴⁰ Mekan mésyáál míme ríkèmbenlé ndíi áláa nyé mbále eché ríwógé wée Dyòb. Kénê, nyéhede me awúu. Abrahame eébele' aá, enén ndín e dyam.

⁴¹ Nyébele mekan míme echen sánj ábeleé.” Bènkwentén mó bán, “Dyòb dèmpen-éé séwóó nées echéd Sánj, bééchyáa-áa sé á asón.”

⁴² Dáo Yesue álangéé bó aá, “Nzé Dyòb dènkòj echen Sánj abé, né nyédéá me, áyále níbíde wée Dyòb ndé-é hén bóob. Meépedéé ne mmèn, bonj mó alómé me.

⁴³ Nzom eché ekás bonj nyééhèdèè' me ehób awóg, edíi nyééhèdèè ábém e'yale awóg.

⁴⁴ Nyédíi bán ábe echen sánj, Satane, míme mewémtèn mó-áa nyédás ahíd. Se á mbooted, adíi ane awé awúe' bad, eékwógnédeé mbále mbéd, áyále mbále eésaa mó áte. Nzé akale metóm, né abele míme nsón áyále adíi nkal a metóm, abé-é sáá a metóm.

⁴⁵ Nyéedúbpeé me, áyále nkanle nyé mbále.

⁴⁶ Nyé ahéé ahele alúméd aá, mbelé mbéb? Nzé nkanle nyé mbále, cheé-ò ekás bonj nyéedúbpe me?

⁴⁷ Kénzéé awé ahúu ne Dyòb, awóge eyale é Dyòb. Nzom eché ekás bonj nyéewóglán edíi, nyéesaa bán bé Dyòb.”

Bad bé Israel béekobéé ayáge áde Yesue

⁴⁸ Héé ábè bad bé Israel bétúmtanné Yesue bánken, “Eesaa mbále bán, sènkál mbále áde séhóbé bán, edíi mod a Samaria, edaádànj é mbéb edé-é wé áte-ye?”

⁴⁹ Ankwentén bó aá, “Edaádànj é mbéb eésaa me áte. Mbage echem Sánj edúbé, bonj nyépen nyéebággèè me edúbé.

⁵⁰ Mmēn meéhēdtēē yāl edúbé, boŋ mod adé awē ahede' aá ríkud edúbé, mó-'aá, abage mbakú echē etāŋgéné.

⁵¹ Ne mbále, nlānge nyé meé, kénzéé awē abele' chōm-ée r'ýagteé, éewáá mbéd."

⁵² Dóo ábē bad bēlāngeé mó bán, "Bóob dóo sébíí bán, edáádāŋ é mbéb édé wē áte. Abrahamé anwé, bekal bé'dáádāŋ bómpē bēnwē. Boŋ bóob éhōbē wēé mod awē adúbpé wē, éewáá mbéd.

⁵³ Echēd sāj Abrahamé anwé. Ewémtné wēé mótōmē mó-yē? Bekal-bé-e'dáádāŋ bómpē bēnwē. Nzé-módé wēwē ewēmtanné wēé módē?"

⁵⁴ Héé Yesue ákwentanné bó aá, "Nzé nhēdte echem yāl edúbé, né échē edúbé éesáá dyamdyam. Echem Sāj awē nyéhóbé bán mó adé nyé sáá, mó abage me edúbé.

⁵⁵ Nyéēbíí' é mó mbéd, boŋ mbíí mó. Nzé nhóbé meé meebíí' é mó, né ndé nkal a metóm néé nyé. Boŋ mbíí mó, mbele-'e mam níme áhóbéé.

⁵⁶ Echēn sāj Abrahamé ambé menyinge aá, mósnyín epun éche mépéé, annyín-ne chós, abé-'e menyinge bwám bwam."

⁵⁷ Dóo bésēdteé mó bán, "Ade wēpēdēē móom mé mwé métáan, wēé mósnyínē Abrahamé-yē?"

⁵⁸ Yesue ankwentén bó aá, "Ne mbále, nlānge nyé nēn meé, byánán béchyāā Abrahamé, 'Ndé.' "

⁵⁹ Ade abē bad bēwógé nē, dóo bēbóótédé meláá ahēd, álúm mó. Boŋ Yesue ansóom, abíd-te á Ndáb-e-Dyōb.

9

Yesue achōŋté mod awē béchyááné ndím

¹ Ade Yesue átóméé, dóo ányíné mod awē béchyááné ndím.

² Dóo ábē bembapēe bésēdteé mó bán, "A-meléed, mbéb níme nzéé ríkás boŋ béchyáá anén mod ne ndím? Mbéb níme mwēn-ε, káa níme sáá bó nyan?"

³ Yesue ankwentén bó aá, "Saké níme mbéb ríkás, saá-kaá níme sáá bó nyan. Boŋ nēn ábēnlédé ábel ngine e Dyōb ébíd áwed áwē yāl.

⁴ Ngáne ðin é'díi ényínneé ámín, detōngéné débēl nsón níme ane awē álómé me. Ehíntén ékwógé ape áde mod éehēnlé nsón abēl.

⁵ Bóob áde ndíí á nkōŋsé, me-éé ndé e'nyínen bé ekíde bé nkōŋsé."

⁶ Ade Yesue ámáá ahób nē, ansob aléed á ndóob, atób dó boŋ áwōgtē ane mod a ndím á míd,

⁷ álāngē mó aá, "Kág, éwobe e'só á eton é Silom" (ádé ðin ádén bán, "Bélómé"). Né-óó, ane mod ankē, áwōbē-'ε míd. Antím ámbíd, ányínne'.

⁸ Héé bad ábe bēmbíí mó ne bad ábe bényínáá ngáne áchóméé bwēm, bésēdteé bán, "Saá anén mod ayōgkē adyēe ásē, áchōmē bwēm-ε?"

⁹ Donje dénhōb bán, "Módé," ábíníí-'e bán, "Aáy! Awágne mó wágnén." Boŋ ane mod mwēn anhób aá, "Mmēn-εé ndé."

¹⁰ Dóo bésēdteé mó bán, "Chán-nō émwéde abooted dé anyínen?"

¹¹ Ankwentén bó aá, "Mod awē béchōgēé bán, Yesue, antób elóob, awógéd me chós á míd, aláá-'ε me aá ríke á eton é Silom, ríke ríwobe míd. Né-óó, menkē. Awobe áde ríwóbpé míd, míbootéd-te anyínen."

¹² Bēnsédéd mó bán, "Héé ane mod adíí?" Ankwentén bó aá, "Meebíí' é."

Befarisia bēhédé áte ngáne

Yesue achōŋté mod a ndím

¹³ Bēnkēén ane mod awē ankwē ndím wēé Befarisia.

¹⁴ Epun éche Yesue ántōbpē elóob ánēdē-'ε ane mod míd áte, ébédéé Mbwe-mé-nkóme-áte.

¹⁵ Befarisia bēnsédéd ane mod awē ankwē ndím ámpē bánken, "Chán émwéde abooted dé anyínen." Héé álāngēé bó aá, "Antób elóob awógéd me á míd. Ade ríwóbpé e'só, míbootéd-te anyínen."

¹⁶ Hé dóo donje á Befarisia bēhóbéé nēn bán, "Anén mod awē abelé ádén dyam, eéhēlē-se abé mod awē Dyōb álómé, áyāle eékonjéé mbéndé e Mbwe-mé-nkóme-áte." Boŋ ábíníí-'ε bēhóbé'áá bánken, "Chán mod a mbéb áhēlese ábelé' échēn ndín e menyáké?" Nēn démpēén nkabén áftinté echáb.

¹⁷ Né-óó, Befarisia bēnsédéd ane mod ámpē bánken, "Ngáne éhóbé wēé mōbelé boŋ ényínne', cheé éwóó ahób á yāl eché?" Héé ane mod ákwentanné bó aá, "Adíi nkal é'dáádāŋ."

¹⁸ Ké nē, bad bé Israel bēnkēndúbéé bán, ane mod ansébé ndím akwē. Nē démbēl bēnchēlé sáá bó nyan.

¹⁹ Bēnsédéd bó bánken, "Nyéé nyéchyáá anén mod awē nyéhóbé bán, béchyáá ne ndím-ε? Chán-nō ébēnlédé boŋ ányínne bóob?"

²⁰ Dóo sáá bó nyan békwentanné bán, “Sébií bán awed mwän môdé, sébií-ε bán bényháa mó ne ndím.

²¹ Bon séekoo’ é abii ngáne ámwédé anyínen, séebii-’áa mod awé abelé bon anyínne’. Nyésedte mó, eesáa mwéndem, mwèn áháb.”

²² Béháb nê áyale bébáa’ áa bad bé Israel. Bad bé Israel béháb bán, kénzéé awé adúbpe áa Yesue môdé Ane-awé-Béwógté, bénan mó á ndáb e mekáne.

²³ Nê dóo dênkãñ bon sáá bó nyan béháb bán, “Nyésedte mó, eesáa mwéndem, mwèn áháb.”

²⁴ Héε ábê bad bé Israel béchênléε ane mod awé Yesue ándidte bwám ngen éché élónténé ébe, bon bélãngê mó bán, “Kál ehoñ mbále á ðin á Dyöb. Sébií bán anén mod awé achöñté wε adii mod a mbéb.”

²⁵ Dóo ane mod átiimtanné bó áa, “Meebii’ é me ké adé mod a mbéb ké’ε eesáa. Dyam ahóg áde mbíí, áde nén, menkwé ndím bon bõob nnyínne’.”

²⁶ Héε bésedteé mó bánken, “Cheé ámbenlé bon ébootéd anyínen?”

²⁷ Ankwentén bó áa, “Mmaá nyé aláa bon kéné, nyéedúbpeé me. Cheé nyéhedeé bán nílaa nyé ámpê? Nyémpê nyéhede’ ábê bembapeε abé-ye?”

²⁸ Héε bésyáá’ é mó, béhábé bán, “Wε-εé edé mbapeε awé ane mod. Sédií bembapeε ábe Moseε.

²⁹ Sébií bán, Dyöb dénháb wéε Moseε, bon séebii’ é wéε anén mod pen ábidé.”

³⁰ Ane mod ankwentén áa, “Nén adé nkómten ní yál áte. Nyéebii’ é wéε ábidé, bon kéné abelé nnyínne’.

³¹ Debii bán, Dyöb déekwentánné mekáne mé bad bé mbéb, bon akwentan mekáne níme bad ábe bébage mó edúbé, bébelé-’ε mam níme áhedéε.

³² Taase nkõñsé mbóotad mod eéwögéε mbéd, bán mod abelé mod awé béchyáané ndím anyínne’.

³³ Nzé anén mod awé achöñté me enkembé mod a Dyöb, né ééhele’áa-se ábel enén ndin e dyam.”

³⁴ Dóo ábê bad békwentanné mó bán, “Béchyáa wε á mbéb-te, ékwög-ke á mbéb-te, bon bõob éhadé sé ayáged-ε?” Héε dóo bébidte mó á ndáb e mekáne.

Ndim e edáðaj

³⁵ Ade Yesue áwógé bán bébidte ane mod awé ángoódté á ndáb e mekáne, anhed mó. Ade anyiné mó, ansedéd mó aáken, “Edúbpe Mwän-a-Moonyoñ-ε?”

³⁶ Ane mod antimtén mó áa, “A-Sán nzéé adé Mwän-a-Moonyoñ, láa mé ábel nén rídúbe mó?”

³⁷ Yesue anláa mó áa, “Emaá mó anyín, nyúmõ-’áa nyékale’ nén.”

³⁸ Héε ane mod áhábéé áa, “A-sán, ndúbpe!” Abwóg-ke meböbón ábe mó edúbé.

³⁹ Yesue anhób áa, “Mpedé á nkõñsé wén, ákáad bad ábel nén bad ábe békwedé ndím bényínne, ábe bõ-ε bényínne’, békwe ndím.”

⁴⁰ Ade donje á Befarisia ábe bõbe Yesue bémbé áhed béwógé nê, bénsedéd mó bánken, “Sédúbpe bán, weehábéé wéé sémpé sékwedé ndím?”

⁴¹ Yesue anláa mó áa, “Nzé nyénkwe ndím, né mbéb méesáa nyé á yál. Bon bõob áde nyéhóbéé bán nyényínne’, mbéb rídií rídé nyé á yál.”

10

Ngan e Nnon a ndyaj ní mbód ne éche mbód

¹ Yesue anhób áa, “Ne mbále, nlãnge nyé meé, kénzéé awé eépoa á mmwe mé abem á mbód, bon átim achágé ped empée, adii nchíb, abé-ε mod e ewúen.

² Mod awé apoo’ á mmwe mé abem môdé Nnon a ndyaj ní mbód.

³ Mod awé anone abem adibnad mó ekob. Achage mbód téé ne ðin, ábidnê-ε chõ.

⁴ Abidné-’áa chõ, atómén chõ, chõ-ε éhídé mó, áyale ébii éche ehób.

⁵ Bon éché mbód éhídéé nken mbéd. Ebelé’ ébãa’ mó á yál báán, áyale écheméé éche ehób.”

⁶ Yesue ankalé bõ enén ngan bon békñensóñténné.

Yesue ad móo móde

Nnon a ndyaj ní mbód a bwám

⁷ Né-õõ, Yesue ambád ámpê áa, “Ne mbále, nlãnge nyé nén me-εé, méε ndé mmwe mé ekob wéε mbód époo’ é.

⁸ Byánán mëpč, bad bésyáál ábe bésébpé ape bébedéε bechíb ne bad bé ewúen, bon mbód éekñwógténné bõ.

⁹ Mε-εé ndé ekob. Kénzée awé apoo áwêm, äküð e'soosõj. Asõl, abíd-te ésebán mod atagte mós. Äküð-te kéchéé éche áhédeé.

¹⁰ Nchíb apag dásõ áchíb, áwúu ne ábébed. Mpedé ábel boj békud alongé áde álóné mbon.

¹¹ Mε-εé ndé nnõn-a-mbód a bwâm. Nnõn-a-mbód a bwâm adé mbojsén áwé á nló níme éche mbód.

¹² Mod awé bétéde á nsón tédén, ânõn mbód, áde mwën éesaá nnõn-a-mbód, áde éesaá-áa nwóó-mbód, ányíneé nyínén néε ngá ehúé'é, áchené mbód, atóm mehéle. Ene pónde dõo ngá ésogeé mbód, échíníí-'é épántéd áte.

¹³ Ane mod atóme mehéle áyale adii mod awé bétéde á nsón tédén, eewõjnéé éché mbód pónde.

¹⁴ Mée ndé nnõn-a-mbód a bwâm. Mbíí échem mbód, échem mbód-te ébíí me.

¹⁵ Melemlem në dõo Titée ábíí me, me-'é mbíí mós. Mbõjséné-'é áwé á nló níme échem mbód.

¹⁶ Nwóó-'é mbód émpée éche éesé á abem-té wén, ntãngéné chõmpé apεen, chõmpé éwõg échem ehõb, né-õõ, abem débē ahõg, nnõn-a-mbód-te nhõg.

¹⁷ Titée adaá me, áyale mbõjséné áwé ábel níküð ádēm alongé ámbíd ámpé.

¹⁸ Modmod eékobnéé me ádēm alongé, boj mbage dõ ne mmën. Nwóó ngine ábe ádēm alongé, nwóó-'é ngine átéd dõ ámpé. Nén dõo Titée álángé me áá mbél."

¹⁹ Abén e'yale ábe Yesue bẽmpεén nkabén áftnté e bad bé Israel ámpé.

²⁰ Bõ bad hiin behõb'é'áá nén bán, "Edáádãj é mbéb édé mó áte, apedé mún. Chán nyéhεle nyewõglãn mós?"

²¹ Boj bẽmpεe behõb'é'áá bán, "Mod awé edáádãj é mbéb édíí áte eehõb'éé échén ndín e mekan. Edáádãj é mbéb éhεle ébél mod awé akwedé ndím anyínen-ε?"

Bad bé Israel bebád Yesue á yål

²² Ngande e Nnamed ní Ndáb-e-Dyõb ékóbté'áá á Jerusalem. Nén ábéde á pondé éche ahéb ábãgkē bwãmbwam.

²³ Yesue ahyõmmé'áá á abepé á Ndáb-e-Dyõb áde béchágé'áá bán Abepé áde Solomonε.

²⁴ Bad bé Israel hẽnlãjnéd mós, bεsεdté mó bán, "Pónde ehéé wεwε wésõgkē sé abane á edibelónéé-te? Nzé wε-εé edé Ane-awé-Béwõgté, épanléd sé áte."

²⁵ Yesue ankwentén áá, "Mmaá nyé aláa, boj nyéedúbpé. Nsón níme mbéleé á dín áde awém Titée, mën mbíde me mbõj.

²⁶ Boj nyéedúbpéé áyale nyéesaá échém mbód.

²⁷ Echem mbód éwõge échém ehõb. Mbíí chõ, chõ-'áá éhíde me. ²⁸ Mbage bõ alongé áde déemaá', béewáá-'áá mbéd. Modmod eéhẽlẽε-se ásoj bõ áwém mekáá.

²⁹ Chõm eché awém Titée ábágé me étómé chõm ésyãl, * modmod eéhẽlẽε-se ásoj bõ á mekáá níme Titée.

³⁰ Sé Tité sèdíí mod nhõg."

³¹ Bad bé Israel bẽntéd meláá ámpé álúm Yesue.

³² Boj anláá bõ áá, "Nlúmté nyé ekud é nsón ní bwãm éche ébíde ne echem Sãj. Nyéhεde me meláá álúm, áwúu me. Mmë nsón níhéé nyéhεdeé me meláá álúmen."

³³ Dõo békwentanné bán, "Sééhẽdẽε wε meláá álúm áyale nsón ní bwãm níme ébéle. Boj sélúme wε meláá áyale esyãá Dyõb."

³⁴ Yesue anláá bõ áá, "Ngómé éténlédé áwen Kálag e Mbéndé nén bán, Dyõb áhõbé áá, 'Nyédíí myõb.'

³⁵ Debíí nén bán, eyale é Dyõb éekwagké. Dyõb dẽnchãg bad ábe ánlõmẽnné éché eyale áá bédíí myõb.

³⁶ Mε-εé Dyõb ánámté boj álóm-me á nkõjsé, chán-nõ nyéhεle nyéhõbē bán, nsyãá Dyõb áyale ítútmé ahõb meé ndii Mwãn a Dyõb?

³⁷ Nzé meébéle nsón níme Titée, nyéedúbpé me.

³⁸ Boj nzé édé nén bán mbele mó, nyédúbé nímé nsón ké nyéedúbpe mmën, ábel nén nyéhíí nyésõjtεn-ne ngen póg ne ésyãl nén bán, Titée adé me áte, me-'é mbé mó áte ngen póg ne ngen ésyãl."

³⁹ Mmën mam níme ánhõbpé mẽmbél bẽnwanén mó akób ámpé, boj ámbíd bõ á mekáá.

⁴⁰ Ámbíd ené, Yesue antím ámbíd á ped e edíb é Jodan eníníí, á abwõg á hõm wéε Jõne, Ndusene ádúsánnáá bad, ádyẽé áhed.

⁴¹ Ndun e mod epagé'áá áwé. Abé bad behõb'é'áá bán, "Jõne, Ndusene eébele'áá menyáké boj kéchéé éche áhõbé tãjgene anén mod édé mbále."

⁴² Né-õõ, ndun e mod eché embé áhed, endúbé Yesue.

* **10:29** Chõm eché awém Titée ábágé me étómé chõm ésyãl: donje á kálag dé'só áwóó Titée awé abagé me bõ, atómé chõm ésyãl.

11

Kwééd eche Lazarose

¹ Mod nhóg ambé awé béchágé'áá bán Lazarose, akönlé'áá. Lazarose ne baányaj bé bebaád, Maria ne Mataa bédyéé'áá á dyad á Betani.

² Anén Maria awé mwányaj Lazarose ákönlé'áá, mō anwógéd Yesue dyög dé elod é bwám á mekuu, boj apínnéd éché esid.

³ Né-óó, Maria bō Mataa bō bénlōm nsəl wée Yesue bán, “A-Sánj, awonj nsón a nlém akonle’.”

⁴ Ade Yesue áwógé nímén nlébtéd anhób áá, “Mmén nkole méesógké ne kwééd. Nén ábénlédé ábe Dyöb ehúmé, ábel boj Mwán a Dyöb ákud edúbé.”

⁵ Yesue andāj Mataa, Maria ne Lazarose.

⁶ Ké nê, áde áwógé bán, “Eesaá mbále bán müte níwóó dyóm á háwa ne ébe-ye? Bad ábe

⁷ Héé álángeé ábē bembapee áá, “Détim ámbíd á Judeya.”

⁸ Dóó ábe bembapee bélángeé mō bán “A-meléed, kíné saá áwed dóó bad béhédé'áá we meláá awúen súútāj'?”

⁹ Yesue ankwentén bō áá, “Eesaá mbále bán müte níwóó dyóm á háwa ne ébe-ye? Bad ábe békag müte béekwagké áyāle bédé ne ane awé adé e'nyínen bé ekíde bé nkōjsé.

¹⁰ Boj nzé békag nkuu, dóó békwagké áyāle e'nyínen bé ekíde béesaá.”

¹¹ Ade Yesue ámáá ahób nén ámbád ámpé áá, “Awéd nsón Lazarose akúne, boj nkag mō anyem ásē.”

¹² Ábē bembapee bénlāá mō bán, “A-Sánj, nzé akúne né ádyéé bwám.”

¹³ Yesue ahóbé'áá nén áyāle ámbíí áá, Lazarose áwédé, boj ábē bembapee bēnwēmtēn bán, ahóbe áá, akúne kúnén.

¹⁴ Né-óó, Yesue ampanléd bō áte áá, “Lazarose áwédé,

¹⁵ boj á yāl echēn, ndé menyíjge nén meé meebédéé áhed ábel boj nyédúbe. Syānē dékag-kóó áwed bōob.”

¹⁶ Hē dóó Tōmase (awé bēnchuí' é bán, Nhéd) álángeé baáb bembapee áá, “Syānē ámpé dékag áwed ábel boj nzé kwééd chó edé déwē ne Meléede.”

Yesue mō adé mpuu ne alongé

¹⁷ Bōob-póó, áde Yesue ápédé á Betani, antán néé bémáá Lazarose alíme. Ene pónké né nímé ndim níkébē á soj-tē e'pun é'niin.

¹⁸ Bootya á Betani ápe á Jerusalem ábédé dyam máyl mébe.

¹⁹ Ekud é bad bé Israel éhnyē wée Mataa bō Maria áwenned bō áyāle kwééd eche awab mwányaj.

²⁰ Ade Mataa áwógé bán, Yesue ahúé', ankē mō abomen á nzii, boj Maria anlyāg á ndáb.

²¹ Dóó Mataa álángeé Yesue áá, “A-Sánj, nzé wembé hén né mwānned eewédeé.

²² Boj ké nê, mbíí meé ké bōob kéchéé éche ésédte Dyöb, Dyöb débē we.”

²³ Yesue anláá mō áá, “Mwányaj ábē á alongé ámpé.”

²⁴ Mataa antimtén mō áá, “Mbíí meé ápuú á pónké e mpuu mbwe mé asóg.”

²⁵ Dóó Yesue alángeé mō áá, “Me-éé ndé mpuu né alongé. Nzé mod adúbpé me, ké anwé, ábē abé á alongé.

²⁶ Kénzéé awé adé á alongé boj adúbé-'e me, éewáá mbéd. Edúbpé né-ye?”

²⁷ Héé Mataa ákwentanné áá, “Ée, A-Sánj, ndúbpé meé we-éé edé Ane-awé-Béwógté, Mwán a Dyöb awé Dyöb áhóbé áá, ápē á nkōjsé.”

Yesue achii

²⁸ Ade Mataa ahóbé nê, antīm ámbíd, ákē áchāg mwányaj Maria kun, aláá mō áá, “Meléede adé hén, asēdte-'e we.”

²⁹ Ade Maria áwógé nê, anhidé ásē mehélé, áke atán Yesue.

³⁰ Bōob-póó, Yesue enkēmpaá asól á dyad-tē, andíi ambé wée Mataa antānnē mō.

³¹ Ade bad bé Israel ábe bébédé á ndáb-te ne Maria áwenned mō, bényíne néé ábíde á ndáb-te ne mehélé, anyogte á soj, bēnwēmtēn bán, akag achii. Né-óó, bēnhíd mō.

³² Ade Maria ápédé wée Yesue ámbē boj anyín mō, ankwé mō á mekuu, ahób áá, “A-Sánj, nzé wembé hén, né mwānned eewédeé.”

³³ Anyín áde Yesue ányíne néé Maria áchyeé'é, anyín-ne néé bad ábe bēnhíd mō béchyeé'é, ngól enkonné mō, átāg-ke áte á nlém-tē bwámbwam.

³⁴ Ansédéd aaken, “Héé nyélimmé mō?” Bēnkwentén bán, “A-Sánj, hyé ényín.”

³⁵ Yesue anchii.

³⁶ Héé bad bé Israel béhóbé bán, “Néde ankōj mō adāj-óól”

³⁷ Boj bō donge á bad bēnhób bán, “Ngómé ámbēl mod awé ankwē ndím ányinne. Eéhēle'ad-se ábel Lazarose eewág-e?”

Yesue apuúdté Lazarose

³⁸ Ngol enkonned Yesue á nlém ámpē. Né-ɔɔ, ankɛ á sonj. Ene sonj ebédɛɛ sonj eché bépwoǵé aláá áte, bonj békútén chɔ nsal ne aláá.

³⁹ Héɛ Yesue álanǵɛɛ ábê bad aá, “Nyéhúd adé aláá.” Dɔɔ Mataa, mod awɛ awédé mwányanj áhóbɛɛ aá, “A-Sánj, ndim mémád abooted dé achum bɔɔb áyále níkidémbé á sonj-tɛ bɔɔb e'pun é'niin.”

⁴⁰ Dɔɔ Yesue álanǵɛɛ mɔ aá “Meelanǵɛɛ wɛ mɛɛ nzé edúbpé né wɛnyín Ngum e Dyɔb-ɛ?”

⁴¹ Né-ɔɔ, ábê bad bɛnhúd adé aláá á nsal ní sonj. Dɔɔ Yesue ánóné ámín bonj áhóbɛ aá, “A-Tê, nsáǵnéne wɛ áyále éwogé mɛ mekáne.

⁴² Mbíí mɛɛ eyǔǵké mɛ mekáne awóg, bonj nhóbe nán ábel bonj ábén bad ábe bédé hén bédúbe bán, wɛ-ɛɛ elómé mɛ.”

⁴³ Ade ámáá ahób nê dɔɔ áchóǵtɛ ehób ámín bonj áchɛnlé Lazarɔɛ aá, “A-Lazarɔs, bíd áwed!”

⁴⁴ Ane mod awɛ ammád awɛ abíd-tɛ áwed. Mbóm éche bɛnkaánné mɔ mekuu ne mekáá ne tumbɛ eché bɛnkaánné mɔ e'só, émbɛ ébɛ mɔ á yál. Yesue anláá bó aá, “Nyéhune mɔ ábê bwɛm á yál, ákag.”

Béhagke Yesue

(Mat 26.1-5; Mak 14.1-2; Luk 22.1-2)

⁴⁵ Bad bé Israel ábe bɛnkɛ Maria á mewenned bényín mekan níme Yesue ámbɛnlé, bédúbe-ɛ Yesue.

⁴⁶ Bonj bó donǵe á bad bɛnkɛ Befarisia atán, béléáá bó mam níme Yesue ábélé.

⁴⁷ Héɛ beprisɛ bémbáá ne Befarisia béchɛnlé mbom ní káansɛl. Bɛnháb bán, “Cheé débɛnlé bɔɔb? Detánǵéné dyam ábel áyále anén mod ábele menyáké bwámbwam!

⁴⁸ Nzé detédté bán, ákɛɛne nímén mekan á'sɔ né moosyáál ádúbɛ mɔ. Nzé moosyáál adúbpé-ɛ mɔ, né bad bé Roma bépɛ, békɔbɛn-ne syáné eché Ndáb-e-Dyɔb, békɔbɛn-ne syáné ádéd alonj.”

⁴⁹ Dɔɔ mod nhóg áfínté echáb awɛ béchóǵé'áá bán Kaifase, awɛ abédé prisɛ ambáámbáa níme mwɛ, áhóbɛɛ aá, “Nyéebíí'ɛ dyamdyam.

⁵⁰ Nyéenyínéɛ nɛn bán ébóó bán, mod nhóg áwɛ á nló ní moosyáál tómaa alonj ásyáál ábɔɔ?”

⁵¹ Kénɛɛ áhóbɛ'áá nê, saké níme mewɛmtɛn mɛn mɔɔ áhóbne'áá nê. Ngáne ábédé prisɛ ambáámbáa níme mwɛ, áhóbɛ'áá dyam áde débɛnléd, á'sɔ é' pónké, aá Yesue áwɛ á nló ní bad bé Israel.

⁵² Saá-kaá á nló ní bad bé Israel bɛnɛn, bonj káɲne álad bad bé Dyɔb bésyáál ábe bémáá ahentɛ áte hóm ahóg, ábel bɛbɛ mod nhóg.

⁵³ Bootya éché epun bad bémbáá bé Israel bɛmbootéd Yesue ahage, áwúú mɔ.

⁵⁴ Nɛn démbɛl Yesue eebíde'áá á nhéné ámpɛ áfínté e bad bé Israel. Bɔɔbɛ ábê bɛmbapɛɛ bɛnhídé békɛ á dyad áde béchagɛɛ bán Efrem, bédyɛɛ-ɛ áwed. Adé dyad ábédé bɛnɛn ne ehyanǵɛ.

⁵⁵ Pónké e ngande e Nnyíme-ámín émbɛ bɛnɛn. Né-ɔɔ, bad híin bɛmbíd myad ne myad, békɛ á akuu á Jerusalem áwobe échab yál ngáne mbéndé e Mosɛɛ éhédé'áá, ábonɛn ngande e Nnyíme-ámín.

⁵⁶ Abê bad bé Israel bɛmbɛ béhédé Yesue. Ade béléáá á Ndáb-e-Dyɔb bésédté'áá, nhóg ne anííí bánken, “Chán nyéwɛmténé, nyédúbpé bán, áhyɛ ngande-yɛ?”

⁵⁷ Beprisɛ bémbáá ne Befarisia bɛntóméd ehóǵɛ bán, kénzɛɛ awɛ anyíné Yesue áhyɛ aláa bó, ábel bonj békɔb mɔ.

12

Béwóǵtɛ Yesue á Betani

(Mat 26.6-13; Mak 14.3-9)

¹ Ade ngande e Nnyíme-ámín élyóǵé e'pun ntóób, Yesue ankɛ á Betani wɛɛ Lazarɔɛ awɛ ámpuúdté ádyé'áá.

² Bɛmbɛlé Yesue ndyééd áhed. Mataa mɔ antóméd ene ndyééd. Lazarɔɛ ambé nhóg áfínté e bad ábe bɔɔbɛ Yesue bɛbédé á tébelɛ ádyé ndyééd.

³ Héɛ Maria átédé epom é dyǔǵ dé elod á bwám áde álélé nkun bwámbwam. Adé dyǔǵ bɛbɛnlé dɔ nád.* Anwóǵéd Yesue á mekuu, apíné-ɛ mɔ mekuu ne échɛ esid é nló. Elod é bwám énlǔǵ ndáb áte esyáál.

⁴ Dɔɔ Judas Iskariɔde, mbapɛɛ nhóg awɛ émbɛɛ bán mɔ ášóm Yesue áhóbɛɛ aá,

⁵ “Cheé bɛnkɛnsómme ádén dyǔǵ, bétéd nímén mɔnɛ békɛ bɛbɛ betóótókɛ bé bad? Béhélé'áá-sɛ bésóm adé dyǔǵ dyam-ɛɛ áde nsábe ní mwɛ nhóg.”

* **12:3 Nad:** Náde edii mbonja eché ewóó elod é bwám eche bɛbɛnlé mǔǵ mé elod é bwám.

⁶ Judase anhób nê, saké áyāle abédé betóótōkē bé bad ngɔl, boŋ áyāle abédéé nchíb. Ngáne ábédé mod awě awánládtáá bóbɔ ekwe é mané, ayǎgkē'áá mané atéd ámbíd.

⁷ Boŋ Yesue anhób aá, "Tédé mós, ákoo áde ályógé ásē ábel boŋ ábenled dós mbwε níme bélmēē me.

⁸ Betóótōkē bé bad bédé ne nyé póndé téé boŋ me pen méebáá ne nyé póndé ésyāāl."

Béhagke Lazarose

⁹ Ene póndé-ɔ́, bad bé Israel híin bénwɔg bán, Yesue adé á Betani. Né-ɔ́, bēnkē áwed. Saké Yesue mwēmpen mós ankāŋ boŋ békē áwed, boŋ bēnkē Lazarose anyín awě Yesue ámpuúdté.

¹⁰ Né-ɔ́, Beprise bémbáá béhágkē'áá kóŋne Lazarose áwúu mós,

¹¹ áyāle bad bé Israel bétédte'áá bós, bédūbpē Yesue. Béndūbē Yesue áyāle dyam áde dēmbenléd ne Lazarose.

Yesue asólé á Jerusalem nēe kōŋ

(Mat 21.1-11; Mak 11.1-11; Luk 19.28-40)

¹² Néé bīn é'sánǎgē, ndun e mod eché enhyě á Ngande e Nnyíme-ámín bénwɔg bán Yesue apag á Jerusalem.

¹³ Hē dós bésélé e'kikag é' mīi boŋ békāg mós abomen á nzii. Béhágé'áá é'saad bán, "Hosána! Nnam mbē ne ane awě apedé á dīn áde Sánǎgēé. Nnam mbē ne kāŋ e bad bé Israel!"

¹⁴ Yesue ankūd etum é ésel, ádīi'-ε chós. Nēn dēmbenléd ngáne éténlédé á kálag e Dyób nēn bán,

¹⁵ "A-bad bé Zayon, nyéebáá', nyénone' echen kāŋ ehúe', ediídé'-ε etum é ésel."

¹⁶ A póndé eché nímén mekan mébénlédé, bembapεe ábe Yesue bēnkēsónǎtēnné. Boŋ áde Yesue ámpuú'é ne ehúmé é Dyób, dós bēnchemmé bán mam níme mébénlédé tǎŋgene Yesue mós mēntenléd, á yāl eché.

¹⁷ Ndun e mod eché embé ne Yesue áde áchénlé Lazarose á soŋ-tē boŋ ápuudté mós, embé ékalé' nímé nkalaŋ.

¹⁸ Né-ɔ́ ndun e mod enkē Yesue abomen áyāle ábén e'chemléd bé menyáké ábe ámbenléd.

¹⁹ Hēe Befarisia bélǎŋgēé nhóg ne aníní bán, "Nyénone"! Kāŋne bɔɔb deéhééé dyamdyam ábel. Nkōŋsé nisyāāl nhíde mós."

Bad bé Grikia béhede Yesue

²⁰ Donje á bad bé Grikia bémbē áttinté e bad ábe bēnkē ngande e Nnyíme-ámín á Jerusalem, áke dé ábe Dyób edúbé.

²¹ Bēmpē wéε Filibe. Filibe awě ámbíd á dyad á Betsaida á mbwóg e Galilia. Bēnlāá mós bán, "A-Sán, sédǎá Yesue anyín."

²² Filibe ankē Andreyá aláa. Dós bós bad bébe békíi Yesue aláa.

²³ Yesue ankwentén bós aá, "Póndé epedé eché ehúmé é Mwān-a-Moonyon ényínēdté.

²⁴ Ne mbále, nlǎŋge nyé nēn meé, mbum e ngun póg edii mbum e ngun póg, káŋŋ né béwéné chós á ndɔɔb-té boŋ ewé. Ewág-káa, boŋ echyáá mbum é ngun émpēe éche ébúú áte.

²⁵ Mod awě adǎá áde álonǎgē, ábɔd dós. Mod awě mós-ε akós áde álonǎgē, á nkōŋsé-te wén, ákǎá dós á álonǎgē áde déemaá'.

²⁶ Kénzéé awě abenle me, atǎŋgéné awēm mbaledε abé. Ké héé'-ε wéε rídii, awēm mbaledε atǎŋgéné abé áhed. Echem Sán ábē'-ε kénzéé awě abenle me edúbé.

Yesue ahóbé tǎŋgene eche kwééd

²⁷ "Bɔɔb-pɔ́, nlém nítage me áte. Cheé-ɔ́ méhɔbpē? Nhób meé, 'A-Tē, weémwāg-se metake níme méhúé' métán me-ye?" Aáy, méehóbpé nē, áyāle enén póndé é metake chós ekǎá boŋ nǎpag wén.

²⁸ A-Tē, lúmed echōŋ ngum." Hēe ehób ébídéé á Dyób nēn bán, "Nlúmté echēm ngum, mēlúmed-te chós ámpē."

²⁹ Ene ndun e mod eché embé áhed enwóg éché ehób. Béhñb bán dyób dós ákúme áte. Bad bēmpēe bēhñb bán, ángel chós ehóbé áwē.

³⁰ Yesue anláá bós aá, "Áyāle echén dós échén ehób ébídé, saké áyāl echēm.

³¹ Póndé epedé eché Dyób dékǎádté nímén nkōŋsé. Nkamlen níme nkamlεe á nkōŋsé mékwé bɔɔb.

³² Boŋ áde bémadté me anyen ámín, mēdól bad bésyāāl áwēm."

³³ (Yesue anhób nē álúmed ndín e kwééd eché áwēε.)

³⁴ Ndun e mod echê embê áhed enkwentén mós bán, “Sêwógé á mbéndé-te bán Anewê-Béwógté ábê á ngíndé ne á ngíndé. Chán-nò éhóbéé wéé ‘Bétáŋgéné bényên Mwân-a-Moonyon amín.’ Nzéé adé anén ‘Mwân-a-Moonyon?’ ”

³⁵ Dóo Yesue álánŋgé bó aá, “E’nyínen bé ekíde bébê ne nyé á esón e pónde ngên. Nyékag bôob áde e’nyínen bé ekíde é’díí é’díí, ábel bon ehíntén éékòbê nyé. Mod awé akag á ehíntén-té eebýéé wéé ákagké.”

³⁶ Nyédúbe e’nyínen bé ekíde bôob áde é’díí ne nyé, ábel nén nyéê bán bé e’nyínen bé ekíde.”

Bad bé Israel béedli béedúbpéé Yesue

Ade Yesue amáá nímén mekan mésyáál ahób, antedé bó, áke ásóm wéé béenyínné mós.

³⁷ Kénzéé ene ndun e mod ényínné ábén e’chemléd bé menyáké é’syáál ábe Yesue ámbenlé, békéndúbéé mós.

³⁸ Nén dëmbenléd álonéd e’yale ábe nkal é’dáádŋ Yesayaa ánhôbpé aá, “A-Sán, nzéé adúbpé eyale éche sékálé,

nzé-módé akidényín ngum echón áchém-me chós?”

³⁹ Né-óó, béehale’áa-se bédúbe. Yesayaa ahóbé hóm démpéé aá,

⁴⁰ “Dyôb ákwíde bó ndím, ábê-é bó nlem mé aláá, ábel nén nímab míd méényínné’,

béésónŋtanne.

Nzé bébélé-é nê, né bétimén me, né mēchoód-te bó.”

⁴¹ Yesayaa anhób nén áyale annyín ehúmé éche Yesue, anhób-pe áyál echê.

⁴² Ké nê, bad híin béndúbé Yesue, kááŋne donŋe á bad bémbáá. Bon ngáne bébáá’áá Befarisia, békénlúmedté yál, ábán nén bán béébídté bó á ndáb é mekáne.

⁴³ Bébélé’áá nê áyale bëndŋn mekan mé baányon tómaa mé Dyôb.

E’yale ábe Yesue békáad bad

⁴⁴ Héé Yesue áchágté ehób amín áhóbé aá, “Kénzéé awé adúbpé me, eedúbpéé mmëmpen, adúbpé kááŋne ane awé alómé me.

⁴⁵ Kénzéé-é awé anyíné me, anyíné ane awé alómé me.

⁴⁶ Mpedé á nkôŋsé néé e’nyínen bé ekíde, ábel bon kénzéé awé adúbpé me, eélyágé á ehíntén-té.

⁴⁷ Kénzéé awé awógé ábêm e’yale, bon eékonŋe bó, saké me nkáadte mós. Meekáádtéé mós áyale meépedéé ákaad nkôŋsé bon mpedé áson bad bé nkôŋsé.

⁴⁸ Kénzéé awé abáá me á yál bon eékobe-é ábêm e’yale, awóó mod awé ákáad mós. Abêm e’yale bën bó békáad mós á mbwe mé asóg.

⁴⁹ Ebê nê, áyale meehóbéé nímén mésyáál ne echém kunze. Bon Titéé awé alómé me, álánŋgé me chóm éche rítáŋgéné ahób.

⁵⁰ Mbíí meé kéchéé éché álánŋgé me áá ríhób épeene alongé áde déemaa’. Né-óó, kéchéé éche ríhóbéé, nhóbe’ chón gáne Titéé álánŋgé me.”

13

Yesue awôbpé abê bembapéé mekuu

¹ Epun é ngande e Nnyíme-amín ényáŋ néé chán. Yesue ambíí aá eche pónde emaa ape echê mótáŋgéné nkôŋsé atede, áke wéé eche Sán. Andŋn bad bé nkôŋsé ábe béndúbé mós, alúmed-te échê edŋŋe kááŋne á asóg.

² Yesue ne ábê bembapéé bédýágé’áá ndyééd ngukél, Satane-é ammád Judas Iskarióde mwán awé Simónne mewémten mé mbés ásóled áte ásóm Yesue.

³ Yesue ambíí aá eche Sán abagé mekan mésyáál áwe mekáá. Ambíí-é aá móhúú wéé Dyôb mótíme-é ámbíd wéé Dyôb.

⁴ Ade bédýágkê ndyééd nê, Yesue anhidé ásê, ahúd nkob á yál, atád tábele á nkog.

⁵ Héé áhédé mendíb á kúmbe-té, bon ábootéd ábê bembapéé mekuu awobe, ápínnád tábele awé ánwáá’é á nkog.

⁶ Ade ápedé wéé Simón Petro dóo Simónne ásedtéé mós aá, “A-Sán, ehede me mekuu awobe-ye?”

⁷ Yesue ankwentén mós aá, “Weéhélēē-se esónŋtén dyam áde ríbeléé bôob, bon ámbíd e nímén mésyáál dóo wésónŋtēnnē.”

⁸ Héé Petro áhóbéé aá, “Aáy, weéwóbpéé me mekuu mbéd.” Yesue antimtén mós aá, “Nzé meéwoppe we mekuu né wéewóŋgé dyamdyam abelen ne me.”

⁹ Simón Petro anláá mós aá, “A-Sán, né saké mekuu mëmpen-éé wéwobéé me. Wéwobé me kááŋne mekáá ne nló!”

¹⁰ Yesue ankwentén aá, “Mod awé amaá mendíb awog, yál esyáál emaá mó asán, eetáŋge neé mendíb awóg ámpē, étóméé áwobe mekuu. * Nyémaá asán, bonj saké nyé moosyáál nyésáá.”

¹¹ Yesue ammád abii mod awé ášóm mó. Néé dēnkāŋ bonj ahób aá saké moosyáál asáá.

¹² Ade amáá bó mekuu awobe, anhé nímē nkob á yál, átīm ámbíd awé e'dii. Héé ásedtēé bó aáken, “Nyésóŋténé dyam áde mbénlě nyé-ye?”

¹³ Nyéchage me Meléede, nyéchage-ε me Sāŋgwéé. Nyétáŋgéne, áyale nē dēn dáo rídíí.

¹⁴ Né-óó, nzé me awé ndé nyé Sāŋgwéé mbé-'ε nyé Meléede nwóbpé nyé mekuu, né nyémpē nyétáŋgéne nhóg ne aníní mekuu awobe.

¹⁵ Nlúmté nyé eláŋsén eche nyétáŋgéne ahíd ábel nēn nyémpē nyébel ngáne mbénlě nyé.

¹⁶ Ne mbále nláŋge nyé nēn meé, mbáledé eetóméé eche sán, mod awé bélómé-ε eetóméé mod awé alómé mó.

¹⁷ Bóob áde nyébíí nímén mam, nnam mébē ne nyé nzé nyébele mó.

¹⁸ “Meehóbéé nyé moosyáál. Mbíí bad ábe nṗwédé. Bonj e'yale ábe é'ténlédé á Kálag e Dyöb é'táŋgéne alón. Eténlédé nēn bán, ‘Mod awé sümō sédyág ndyééd akúnnéne me yál.’”

¹⁹ Nláŋge nyé nēn bóob, áde éébānlédéé ábel nēn nzé ébénlédé, nyédúbe nēn bán, ‘Ndíí mó Awé Ndíí.’

²⁰ Ne mbále, nláŋge nyé nēn meé, kénzéé awé akobé mod awé rílómé, akobé me. Kénzéé-ε awé akobé me né akobé ane awé alómé me.”

Yesue ahóbé á'só e' pónde ad bésóm mó

(Mat 26.20-25; Mak 14.17-21; Luk 22.21-23)

²¹ Ade Yesue amáá nímén mekan ahób ndutul enlóg mó á nlém-tē, ápanléd-te ábē bembapεε áte aá, “Ne mbále, nláŋge nyé nēn meé, nyé mod nhóg ábē me á mekáá mé bad bé ekóyí.”

²² Héé ábē bembapεε bénónné á mesó, áyale bēnkémbíí'ε mod awé áhóbéé.

²³ Mbapεε nhóg, awé Yesue ándāŋgé, andyē mó á akéb.

²⁴ Dáo Simōn Petro ápebtanné ane mbapεε míd, áhóbē aá, “Sedéd mó mod awé áhóbéé.”

²⁵ Dáo ane mbapεε ásídté Yesue á yál-tē, ásedtē mó aáken, “A-Sán, nzéé éhóbéé?”

²⁶ Yesue ankwentén mó aá, “Mod awé métádéé ewele á díse-tē bonj níbe mó, mó adé ane mod.” Héé átédé ewele, átdtē á díse-tē, ábagé Judase, mwān awé Simōn Iskariōde.

²⁷ Akob áde Judase ákóbé éché ewele, Satane ansól mó áte. Dáo Yesue aláŋgeé mó aá, “Dyam áde éhedeé ábel bēl dō á mehéle-te.”

²⁸ Bonj mod ké nhóg awé bóbōó bedyágé'áá ndyééd enkénsóŋténné chóm-éé ékáá bonj Yesue aláá Judase nē.

²⁹ Ngáne édíí bán Judase mó akóŋge'áá ekwe é mōné, donje á bembapεε bēnwēmētēn bán Yesue aláŋge mó aá áke áchan bwēm ábe bēbenlédte á ngande, kéε chóm éche bēbéé betóótókē bé bad.

³⁰ Ade Judase ákóbé ewele eche Yesue ábagé mó kobén, ámbíd ebwóg. Ehíntēn énkwe.

Yesue abagé mbéndé e ekóólé

³¹ Ade Judase amáá abíd dáo Yesue áhóbéé aá, “Bóob-óó ehúme e Mwān-a-Moonyon ényínnédé. Ehúme é Dyöb-pe ámpē ényínnéd mbwiined ne mwān.

³² Nzé Dyöb ákúde ehúme ámbíd e Mwān, né Dyöb dēn ámpē débēl ehúme é Mwān ényínned. Ábēl-le nē ábwōg-ábwōg.

³³ A-baányan, echem pónde ábē ne nyé, edé esón. Nyééhéd me, bonj ngáne ménlāá'ε bad bé Israel, melemlem nē dáo ríláŋgeé nyé bóob, meé, ‘Wéε ríkagké, nyéehēnlé ape áhed.’

³⁴ Mbage nyé mbéndé ekóólé bóob, nēn nyédāŋ nhóg ne aníní. Ngáne rídás nyé, nyémpē nyédāŋ nhóg ne aníní.

³⁵ Nzé nyédás nhóg ne aníní, né mod téé ábfi aá nyédii ábēm bembapεε.”

Yesue ahóbé ngáne Petro abāŋgē mó á yál

(Mat 26.31-35; Mak 14.27-31; Luk 22.31-34)

³⁶ Simōn Petro ansédéd Yesue aáken, “A-Sán, héé éhedeé ake?” Yesue antímtén mó aá, “Wééhēlē-se ehíd me bóob wéε ríkagké, bonj ámbíd e pónde wéhíd me.”

³⁷ Petro ansédéd mó aá, “A-Sán, cheé ékáá bonj meéhēlē se nhíd we bóob? Mbōŋséné áwé á nló nímōŋ.”

³⁸ Héé Yesue ákwentanné mó aá, “Ekoó abonŋen dé awé á nló nímēm-ε? Ne mbále, nláŋge we meé, nchóm-a-kúb adéhób aá mó'tōo', wēbāŋ me á yál ngen éláán.”

* 13:10 Donje á kálag dé'só déewóó'ε eetóméé áwobe mekuu.

14

Yesue mó adé Nzii e mbále echê epene alongé

¹ Dóo Yesue áhádeé ábê bembapee aláa aá, “Nyéetagté nlém á abum. Nyésum nlém wée Dyöb, nyésum-me kááñne áwêm.

² Toñ ébúú áte á ndáb echê echem Sáñ. Nkag-ke áwed abonşen nyé hóm. Nzé énkémbé nê, né menkênláá' é nyé meé nkag nyé hóm abonşen.

³ Nzé nkii'-e nyé hóm abonşen, měřim ámbíd, řhye ntéd nyé ábê ne me, ábel nyémpê nyébê hóm áde řídí.

⁴ Nyébíi' nzii echê etime' wée řkagké.”

⁵ Héé Tomase álángeé mó aá, “A-Sáñ, séebii' é wée ékagké. Chán-nō sébweé nzii abii echê etime áwed?”

⁶ Yesue ankwentén mó aá, “Mée ndé nzii echê ekag wée echem Sáñ, mbále ehúe' ne me, me'-aá mbage alongé. Modmod éhéřeře-se ápe wée echem Sáñ, éseban abwedé áwêm.”

⁷ Héé Yesue álángeé ábê bembapee aá, “Boob áde nyébii me, nyéřbí kááñne echem Sáñ.* Bootya boob nyényiné mó, nyébii'-e mó.”

⁸ Filibe anláá mó aá, “A-Sáñ, lúméd-te sé Titée. Chóm ésyāāł echê séhedeé éetóméé nê.”

⁹ Yesue ankwentén aá, “A-Filib, nkémbê ne nyé á etún é pónde, chán-nō éhedeé-se ehób weé móbíi' é me? Kéńzéé awé anyiné me né anyiné Titée. Chán-nō éhedeé-se ehób weé ‘Lúméd sé Titée?’

¹⁰ Weedúbpeé weé echem Sáñ adii me áte, me'-e mbé mó áte-ye?” Héé Yesue álángeé ábê bembapee aá, “Mam nime řlángeé nyé méebídeé áwêm dën. Boñ echem Sáñ awé adé me áte mó abele nímé nsón.

¹¹ Nyédúbe me ngáne řihóbé meé echem Sáñ adii me áte, me'-e mbé mó áte. Nzé nyéedúbpe nê, nyédúbé ké áyale mam mé menyáké nime říbeleé.

¹² Ne mbále, nlánge nyé nén meé, kéńzéé awé adúbpe me, ábêł mam nímé říbeleé. Ábêł-le kááñne mekan nime métómé nímén áyale nkag wée Titée.

¹³ Měřel-le kéchéé echê nyésédté á đin ádêm ábel nén ngum echê Titée ényínned ámbíd e Mwán.

¹⁴ Nzé nyésédté me kéchéé á đin ádêm, měřel chó.”

Yesue ad móřlóm Edáđđñ echê Esdá

¹⁵ Yesue ambád ahób aá, “Nzé nyéđáđ me, né nyéřhíd echem mbéndé.

¹⁶ Měřlāā Titée, ábê'-e nyé Nwóngene ampée, awé ábê ne nyé á ngíndé ne á ngíndé.

¹⁷ Ane Nwóngene mó adé Edáđđñ echê ébídte' mbále áwed řánşene Dyöb. Bad bé nkõşé béehedeé-se békob mó, áyale béenyíneé mó, béebii'-aá mó. Boñ nyébii' mó áyale adé ne nyé, ábê'-e nyé áte.†

¹⁸ Nzé nkii, méetedéé nyé menyuu. Měřim ámbíd áwën.

¹⁹ Mwāmpin ní pónde, nkõşé méenyínné me ámpê. Boñ nyéřen nyéenyín me. Ngáne měbēē á alongé, nyémpê nyéřbē.

²⁰ Nzé echê epun épéde, nyéřbíł bán ndé echem Sáñ áte, nyé'-e nyébê me áte, melemlem ngáne me'-e řídí nyé áte.

²¹ Kéńzéé awé akobé echem mbéndé, áhídē'-e chó, mó adé mod awé adáđ me. Kéńzéé awé adáđ'-e me, echem Sáñ mó'-e áđđñ mó. Měmpê měđđñ mó nlúméd-te mó yāl.”

²² Dóo Judase (saké Judas Iskariōde) áhóbéé aá, “Boñ A-Sáñ, chán wélúmédte sé yāl boñ weelúmté nkõşé řen?”

²³ Yesue ankwentén aá, “Nzé mod adáđ me, áhíd ábêm e'yale. Echem Sáñ áđđñ mó, sé echem Sáñ'-e séřpē awé, sédyēē'-e ne mó.

²⁴ Nzé mod eéđáđ me, eehídeé áđđm ayáge. Adén ayáge áde nyéwógé déesaá áđđm. Adii áde Titée awé alómé me.

²⁵ “Nlánge nyé nímén méşyāāł áde řídí ndé ne nyé.

²⁶ Nwóngene, Edáđđñ echê Esáá awé Titée álómmē á đin ádêm, áyāgēđ nyé mekan méşyāāł ábêł-le nyékamtán mekan méşyāāł nime řlángeé nyé.

²⁷ Nşañ móo řilyágnédeé nyé. Mmém nşañ móo nřbageé nyé. Meébagēē nyé mó ngáne nkõşé nřbageé. Nyéetagté nlém á abum, nyéewógé mbwów.

²⁸ Nyénwógé nēe řihóbé meé 'Měředeé nyé boñ měřim ámbíd áwën.' Nzé nyéndđñ me né nyéewógé menyínge bán nkag wée Titée áyale Titée atómé me.

²⁹ Nlángeé nyé nén boob áde éřbenłēēē, ábel nén nzé ébénłédeé, nyédúbe.

* **14:7** Boob áde nyébii me, nyéřbíł kááñne echem Sáñ; đonşe á kálag dé só áwóó nzé nyénkõñ me abii, né nyéřbíł kááñne echem Sáñ. † **14:17** Ábê'-e nyé áte; đonşe á kálag dé só áwóó adē'-e nyé áte.

³⁰ Syánē déebudté pónde awón ákal ámpē, áyāle nkamlēne a nkõjsé ahúé'. Eewóó'é ngine ké póg ámín echēm.

³¹ Bonj kénē mēchennéd mó yāl mbēl ngáne echem Sánj áhóbé aá mbēl, ábel bonj nkõjsé mbii nēn bán, ndáó echem Sánj, Né-'aá ákás bonj mbélé kéchéé éche áhóbé aá mbēl.

"Nyéhyag syáne déhide hén.

15

Yesue mō akoó alín dé epum á bwel abé

¹ "Mē-éé ndé alín dé epum é bwel, alín dé epum é bwel dēn dēn. Echem Sánj-'é abé mbelē-nzag.

² Ahúde' ngen ké ehéé eché edé mē á yāl, eché eechyáá' e'pum, ápagké-'é ké ehéé eché eechyáá' e'pum, ábel bonj ébonj yāl ébude-'é achyáa.

³ Ayáge áde ní'yágté nyé ábélé nyēmaá asánj.

⁴ Nyélyag nyébē ne mē, mémpē mēlyag mbé ne nyé. Ngen chēn eēhēlē-se eechyáá e'pum áde éesaá á alín á bwel. Melemlem néé nyémpē nyēehelē-se nyēchyáá e'pum ésebán nyédé ne mē.

⁵ "Mē-éé ndé alín dé epum é bwel, nyé-'é nyébē ngen. Nzé mod adíí adé ne mē bonj mē-'é ndé ne mó áchyáá e'pum bwám bwam. Nyēēhēlē-se nyébēl dyamdyam ésebé ne mē.

⁶ Nzé mod eésē ne mē, bēhūd mó néé ngen. Ene ngen ebelé ekintéd. Béladéé échē ndín é ngen áte, bēbwém chós á muú-te, éhyánj-'é.

⁷ Nzé nyédíí nyédé ne mē, bonj ádēm ayáge-'é adíí adé nyé áte, kéchéé éche nyésédte, nyēkūd.

⁸ Edúbé éche echem Sánj ényinnad nzé nyébudé e'pum achyáa, nē-'aá débēl nyébē ábēm bembapē.

⁹ Ngáne echem Sánj ádáó mē, melemlem néé mémpē nídáó nyé. Né-óó nyédíí nyébē ne mē ábel bonj mbē nídānj nyé.

¹⁰ Nzé nyéhídé échēm mbéndé, né mēbē nídānj nyé. Melemlem nē dāó níhídéé mbéndé échē echem Sánj, adíí adáó-'é mē.

¹¹ Nlángē nyé nímmén mēsyāal ábel nēn nyémpē nyéwóg nyaa e menyínge eché níwogéé, nímmén menyínge mēlón-ne mbon.

¹² Echem mbéndé edíí nēn, nyédānj nhóg ne aníní melemlem nēngáne nídáó nyé.

¹³ Nzé mod awédé á nló m baáb, né alúmté edānge éche étómténé achab ámín.

¹⁴ Nzé nyēbele' mekan níme nílángé nyé mēé nyébēl né nyédíí ábēm besón.

¹⁵ Mēéchégeé nyé bembáde ámpē, áyāle bembáde bēébyē'é mam níme echab sánj ábeléé. Bonj níchégeé nyé mēé ábēm besón áyāle nílángé nyé mam mēsyāal níme echem Sánj álángé mē.

¹⁶ Nyéépwedéé mē, bonj mē-éé mpwedé nyé, nlóm-mē nyé ábel mekan níme méchyáa e'pum é' bwám. Nyaa é mekan échē ébē abé ne abé. Nzé nyébélé-'é nē, echem Sánj ábē nyé kéchéé éche nyésédte á dín ádēm.

¹⁷ Mmén mam mēsyāal níme nílángéé nyé-óó, médíí nēn mēé, nyédānj nhóg ne aníní."

Bad bé nkõjsé békóó nyé

¹⁸ Yesue ambád ábē bembapē aláa aá, "Nzé nkõjsé níkóó nyé, nyébii nēn bán mēé bésébpé akóó.

¹⁹ Nzé nyēmbé nēngáne bad bé nkõjsé, né nkõjsé métēd nyé nēngáne ábē bad. Bonj mpwedé nyé áfínté e bad bé nkõjsé. Nyéesaá bad bé nkõjsé. Né-'aá ákás bonj nkõjsé níkóó nyé.

²⁰ Nyéwēmtēn ehób éche ménlāā'é nyé mēé 'Mbáde eetóméé eche sánj' Nzé bēmbané mē á metake-té né bēbané nyémpē á metake-té. Nzé bēnhid ádēm ayáge né bēhíd-te ádēm ámpē.

²¹ Bēbel nyé nímmén mekan mēsyāal á yāl á dín ádēm, áyāle bēébii'é ane awé alómé mē.

²² Nzé menkēmpē bonj nláá bō nímmén mam, né nímmab mbéb méenyínnedéé. Bonj bōób, bēewóó'é nzóm ké póg áyāle nímmab mbéb.

²³ Kénzēé awé akoó mē, akoó káájne echem Sánj.

²⁴ Nzé menkēmbel ndín é mam áfínté echáb éche mod ampée eēbēlē mbéd, né nímmab mbéb méenyínnedéé. Bonj bōób bényíné mekan mēsyāal níme níbélé, ké nē bédíí békóó mē, békóó-'é echem Sánj.

²⁵ Nēn adé álóned e'yale ábe é'ténlédé á mbéndé echáb bán, 'Nzóm ké póg enkēmbáá eche békóóné mē.'

²⁶ Nwōngene ábid wéé Tité. Adíí Edáóđānj éche ébele' bonj bad bésónjén mbále. Adé mēbēé ne Tité mēlómé nyé mó, mó-'aá álāá nyé mam tājgene mē.

²⁷ Nyémpē nyēhób mam tājgene mē áyāle nyédé ne mē se á mbooted.

16

1 “Nlånge nyé nímén méşyāāl ábel boŋ nyéetimmé mbíd.

2 Bébíded nyé á ndáb é mekáne. A mbále pónde ehúe’ eche kénzée awě áwū nyé áwemtānnē áá móbenle Dyōb.

3 Bébēl nímén mam áyāle béebíi’ é echem Sāŋ béebíi’-áá me.

4 Nlånge nyé nímén mam méşyāāl ábel boŋ nzé pónde epedé eché nímén mekan mébenlādte, nyéekamtéŋ bán menláá’ nyé.

Nsōn nime Edāōdāŋ ébenlé

“Menkēnláá’ é nyé nímén mekan á mbooted, áyāle membé ne nyé.

5 Boŋ bōōb, nkag wée mod awě alómé me. Ké nē, nyé modmod nyéesedteé me bánken ‘Héé ékagké?’

6 Aláa áde rílånge nyé nímén mekan ábelé ndutul elógé nyé á nlem-tē.

7 Ne mbále, nlånge nyé nēn meé, édé mboŋ nēn bán ríke. Áyāle nzé meekii, né Nwōŋgene éepaa áwēn. Boŋ nzé nkii, mēlōmē nyé mó.

8 Ade ápéé, álūméd bad bé nkōŋsé nēn áá nímab nsōŋten nime bēwānlé tånŋene ábel dé mbéb ne ábel mekan nime mesáá méetånŋeneé. Béesōŋteneé-’e nyaa eché Dyōb ákáadtéé.

9 Mmab nsōŋten méetånŋeneé tånŋene mbéb, áyāle béedúbpéé me.

10 Méetånŋeneé tånŋene ábel dé mekan nime mesáá, áyāle nkag wée Titée, nyéenyín-naá me ámpē.

11 Méetånŋeneé tånŋene nyaa eché Dyōb ákáadtéé, áyāle amaa nkamlēne a nkōŋsé akáad.

12 “Ndii nwóó ekud é mekan áláa nyé boŋ nímé mekan métom nyé áte.

13 Boŋ áde Edāōdāŋ é mbále épéé, ábēl nyébíi mbále esyāāl. Eehóbénné eché kunze chēn. Dyam áde bēláā’ é mó dōo áhōbpé, álāā-’e nyé mam nime mébenléd pónde eché ehúe’ á’ sō.

14 Achāgēd échēm edúbé amín áyāle kéchéé éche áwógé áwēm chōo mó-’e álāā’ é nyé.

15 Kéchéé éche echem Sāŋ áwóó édíi échēm. Nē dōo ákáá boŋ ríhōbē meé Edāōdāŋ étēd kéchéé éche ríhōbē, éláá nyé.”

Ndutul éttm menyĩŋge

16 Héé Yesue ábádéé áá, “Mwāmpĩn ní pónde nyéenyínné me ámpē, mwāmpĩn ní pónde-’e ámbíd enē nyéenyín me.”

17 Dōo donŋe dé bembapēé bésēdtéé nhóg ne anínií bánken, “Cheé áwémtné ahób, áláa syānē áá, ‘Mwāmpĩn ní pónde nyéenyínné me ámpē, mwāmpĩn ní pónde-’e ámbíd e nē nyéenyín me?’ Ahób-pe ámpē áá, ‘Áyāle nkag wée Titée.’ ”

18 Bémbe bésēdté bánken, “Cheé áwémtné ahób, ahób áá, ‘Mwāmpĩn ní pónde?’ Séesōŋteneé dyam áde áhóbéé.”

19 Yesue ammad ábíi áá, bēhede mó dyam asēded. Né-ōó, anláá bó áá, “Dyam áde ríhōbē meé, ‘Mwāmpĩn ní pónde nyéenyínné me ámpē, mwāmpĩn ní pónde-’e ámbíd e nē, nyéenyín me,’ dōo nyésēdtéé nhóg ne anínií-ye?”

20 Ne mbále, nlånge nyé meé, nyéēchií, nyélēb-pe, boŋ nkōŋsé mēwōg menyĩŋge. Nyéēsudēn, boŋ nímé nsuden méttm menyĩŋge.

21 Mmwaád awě ahede achyáá ábelé ásudēn áyāle eche pónde e metake epedé. Boŋ nzé amaa achyáá ábelé áwóg menyĩŋge, áyāle moonŋoŋ achyáádté á nkōŋsé.

22 Nē dōo édíi ne nyé. Nyésūdne bōōb, boŋ mēnyín nyémpē. Ene pónde nímēn nímēn mélōn ne menyĩŋge, modmod éehēnlé-’áá nyé nímé menyĩŋge akoben.

23 Ade eché epun épéé, nyéesēdté me dyamdyam. Ne mbále, nlånge nyé nēn meé Titée ábē nyé kéchéé éché nyésēdté á dīn adēm.*

24 Kóōŋne bōōb nyéēhēdnēē mó chōmchōm á dīn adēm. Nyéhēden mó, nyéēkūd ábel nēn nímēn menyĩŋge mélóg mbon.”

Yesue atómé nkōŋsé áte

25 Yesue ambád ábē bembapēé áláa áá, “Mbēnlédé ngan áláa nyé ekud é mekan. Pónde ehúe’ eché méebenlédte ngan. Mēláā-’e nyé mekan tånŋene Titée, nyaa eché nyésōŋtēnnē.

26 Eché epun, nyéēhēdnēn mó kéchéé á dīn adēm. Méetāgēn-naá mó áláa meé áwōŋgen nyé,

27 áyāle Titée mwēn adáá nyé. Adáá nyé áyāle nyédaá me, nyédúbpé-’e bán mbídé áwē.

28 Membíd wée Titée, nípē á nkōŋsé-te, bōōb-pe ntēdte nkōŋsé, ntime ámbíd wée Titée.”

29 Héé ábē bembapēé bēhōbē bán, “Ehōbe bōōb ngāne séesōŋtēnnē, weēbenlādte ngan.

30 Sébíi bōōb bán ebíi mekan méşyāāl, éehēdnád-tāá bán modmod áseded we dyamdyam. Nēn ábelé sédúbpé bán ebídé wē Dyōb.”

31 Dōo Yesue ákwentānnē bó áá, “Nyédúbpé bōōb-’e?”

* 16:23 Titée ábē nyé kéchéé éché nyésēdté á dīn adēm: donŋe á kálag áwóó Nzé nyésēdté Titée kéchéé, ábē nyé chō á dīn adēm.

³² Nyénəne! Póndé ehúe', emaa'-e ape, áde nyépāntēdté áte. Mod téé atóm mehélé wée ábidé, nyétēdē mmēmpn. Boŋ ké nē, meesaá mmēmpn, Titée adé ne me.

³³ Nlāŋge nyé nímén mekan ábel nén nyébé nsaŋ abé ádé nyédíí ne me. Nyéékúđ metake á nkōŋsé-te boŋ nyéwēđ nlém á abum. Ntómé nkōŋsé áte."

17

Yesue akánnédé eche yāl

¹ Ade Yesue amáá nímén mekan mésyāal ahób, dōo ánóné amín boŋ áhōbē aá, "A-Tē, póndé emaa' ape. Lúmed bad ehúmé échē awoŋ Mwān, ábel nén awoŋ Mwān mómpē álúmed ehúmé échōŋ.

² Ebágé mó kunze ákamlen moosyāal, ábel nén ábe bad bésyāal ábe ebágé mó alongé áde déemaá'.

³ Alongé áde déemaá' ádíí nén bébíí wē, mmōn awē edé Dyōb á mbále, ne ábíí Yesu Krístəə, awē élómé.

⁴ Mbídté échōŋ ehúmé áwed á nkōŋsé amad ádé nímádé nsón níme ebágé me.

⁵ Bəəb-ɔə a-Sāŋ, bídéđ échēm ehúmé áwed, wée mmōŋ edíí. Melemlem mé edúbé níme mēnwōŋgē ne wē, nkōŋsé rídé ahób bán ríbootad.

Yesue akánnédé abē bembapee

⁶ "Mbelé bad bé nkōŋsé ábe ebágé me bébíí wē. Bébédéé ábōŋ, wembē me bó, bébélé'-e ngáne ehóbé wēé bébel.

⁷ Bébíí bəəb bán kéchéé éche ebágé me, ébíđé áwōŋ.

⁸ Nlāŋgé bó mam mésyāal níme élanǵé me wēé rílaa bó, bédúbpé'-e nímé mam. Bébíí ne mbále bán áwōŋ dōo mbíde, bédúbpé'-e bán wē-éé élómé me.

⁹ Nkánnad bó. Meekánnádté bad bé nkōŋsé. Boŋ nkánnad bad ábe ebágé me, áyāle bédíí ábōŋ.

¹⁰ Bad bésyāal ábe bédé ábēm bédíí ábōŋ, ábōŋ'-e bésyāal bédíí ábēm, bébídté'-e échēm ehúmé áwed.

¹¹ Bəəb-ɔə, mwāmpín ní póndé méebáá á nkōŋsé-te ámpē. Boŋ bédíí bédé á nkōŋsé-te. Nhyag áwōŋ, Titée awē Asáá, kəə bó á ngíne e dín áđōŋ, dín áde ebágé mé. Ngíne echē ebágé me ábel nén bébé mod nhóg, melemlem ngáne sóo'-e ámpē dédíí mod nhóg.

¹² Ade ríbedé ne bó, menkəə bó á ngíne e dín áđōŋ, dín áde wēmbéé me.* Nkəŋgé bó, bó mod ké nhóg-ke eebóó'é étóméé mod awē émmádté abé bán ábōo ábel boŋ ébenled ngáne éténlédé á kálag e Dyōb.

¹³ Bəəb-ɔə, nhyag áwōŋ. Nhóbe'-e nímén mekan ngáne ndíí rídé á nkōŋsé ábel boŋ nímāb menyíŋge mélōn mbon, melemlem ngáne nímēm-me melóné mbon.

¹⁴ Nlāŋgé bó mam mésyāal níme élanǵé me wēé rílaa bó. Bəəb-ɔə bad bé nkōŋsé békóó bó áyāle béesaá bad bé nkōŋsé ámpē, melemlem ngáne me ámpē méesaá mod a nkōŋsé.

¹⁵ Meehóbéé mēé éhúđ bó á nkōŋsé-te, boŋ nhóbe' mēé ékəə' bó ábel boŋ Mod e Ebébtéd eébéle' bó mbéb.

¹⁶ Béesaá bad bé nkōŋsé melemlem nēŋgáne méesaá mod a nkōŋsé.

¹⁷ Benléd echōŋ mbále ábel boŋ béhel wē abele. Echōŋ eyale edé mbále.

¹⁸ Nlómé bó á nkōŋsé-te melemlem nēŋgáne wāmpē wénlōmmé me á nkōŋsé-te.

¹⁹ A etútú écháb membē echem yāl ábele wē ábel boŋ bómpē bébe échab yāl ábel boŋ békōŋ wē abele.

Yesue akánnédé bad abē bēedúbé mó bésyāal

²⁰ "Meekánnádté ábēm bembapee bēnpen boŋ nkánnad káŋŋe bad ábe bédúbpé me áyāle mam níme bēwógé áwāb.

²¹ Nkánne' mēé bó moosyāal bébé mod nhóg. A-Tē, bó moosyāal bébé mod nhóg ne sóo, melemlem nēŋgáne edíí ne me, me'-e mbé ne wē. Bébē mod nhóg ábel nén nkōŋsé rídúbe bán wē-éé élómé me.

²² Ehúmé éche ebágé me, me'-e mbagé bó. Mbagé bó ábel boŋ bébé mod nhóg melemlem nēŋgáne sóo dédíí mod nhóg.

²³ Ndé mod nhóg ne bó, wē'-e edé mod nhóg ne me. Nén débēl békōŋ mod nhóg abé. Békōŋ mod nhóg abé ábel boŋ nkōŋsé mbíí bán wē-éé élómé me, bébíí'-e bán edəə bó melemlem nēŋgáne edós me.

²⁴ A-Tē, ebágé me bó, bébé wēé rídíí, ábel boŋ bényín echēm ehúmé. Wembē me ehúmé áyāle wendāŋ me se á mbooted mé nkōŋsé.

* **17:12** Menkəə bó á ngíne e dín áde wēmbéé me: donje a kálag awóó á ngíne e dín ádon ménkəə bad abé ebágé me.

²⁵ A-Tê, wε-εέ ebale mam nímě mészáá. Nkõñsé méebíí'é wε, boñ mbíí wε, ábén-ne ámpě bėbíí bán wε-εέ elómé mε.

²⁶ Mbelé bėbíí wε, mžbłl-le ámpě ábel nén edaņge éché édáá mε ébē bó áte, mε-'ε ámpě młbē ne bó."

18

Bėkóbė Yesue

(Mat 26.47-56; Mak 14.43-50; Luk 22.47-53)

¹ Ade Yesue amáá akáne, bóǝbe ábē bembapεε bėnhidé, bėchábē mwá edib a Kidron amín. Nzag embé áhed, bėnsłl áwēd-te.

² Judase, ntúrē awē Yesue ambíí ádē abwóg á hóm, áyale Yesue ne ábē bembapεε bėmmentén aladen áhed.

³ Né-ǝǝ, Judase antómén echoñ é sánze ne bembalede bé Ndáb-e-Dyǝb ábe beprise bėmbáá ne Befarisa bėnlómme, bėkē wēε Yesue ábédé. Ábē bad bėnchǝd e'kag, bėwále e'trúkáñ ne bwēm é' nzum.

⁴ Yesue ammad mam mészáál níme mébenléd ne mós abíí, ké nē, ambídéd yłl áwed, ásedéd bó aáken, "Nzé nyéhedeé?"

⁵ Bėnkwentén mós bán, "séhede Yesue, mod a dyad á Nazaret." Yesue ankwentén bó aá, "Mε-εé ndé mós." Judase ntúrē awē Yesue ambé áhed ne ábē bad.

⁶ Ade Yesue áhóbé aá, "Mε-εé ndé mós," bėntimén mbíd, bėkwē áse.

⁷ Hē dǝǝ Yesue ásedteé bó ámpě aáken, "Nzé nyéhedeé?" Bėnkwentén bán, "Yesue a dyad á Nazaret."

⁸ Hēε Yesue ákwentanné bó aá, "Nlángé nyé mεé, mε-εé ndé mós. Né-ǝǝ, nzé nyéhede mε, nyétédé ábén bad ábe bédé ne mε, bėkag."

⁹ Nén dėmbenléd álóndé e'yale ábe ánhǝbpě aá, "A-Sáj, áfínté e bad ábe wėmbéé mε, meebǝdéé ké nhóg."

¹⁰ Simǝn Petro anwále nkwaté. Hēε ádólé nímě nkwaté boñ átomtē, áselē etúú é ekáá é mbáá é mbalede awē prise ambáámbáa. Ane mbalede abédé đín bán, Malkuse.

¹¹ Yesue anláá Petro aá, "Timéd nkwaté á abám. Nédé, meetēņgeneé metuné níme echem Sáj áfíínédé mε akud-ε?"

Bėkééne Yesue wēε Anase

¹² Hēε éché echoñ é sánze ne awáb mod ambáá nchoo ne bembalede bé bad bé Israel bėkóbė Yesue béhañ mós.

¹³ Bėnsėbē mós akεen wēε Anase. Anase abédéε sáñ-kálé awē Kaifase awē abédé prise ambáámbáa nímě mwē.

¹⁴ Kaifase ne, mós ambē bad bėmbáá bé Israel elébé aá ébóó bán mod nhóg áwē á nló ní bad bėsyáál.

Petro abáá Yesue d yłl

(Mat 26.69-70; Mak 14.66-68; Luk 22.55-57)

¹⁵ Simǝn Petro ne mbapεε ampée bėhídé'áá Yesue. Prise ambáámbáa ambíí ane mbapεε, né-ǝǝ ane mbapεε ansłl eyáde éche prise ambáámbáa wēε bėnsłlennē Yesue.

¹⁶ Petro pen anlyǝg á mmwε mé e'ké. Dǝǝ ane mbapεε awē prise ambáámbáa ámbłl'ē átimé ámbłd á mmwε, ákálēñ ngǝndéré éché enǝné'áá mmwε boñ ásłltē Petro á eyáde-tē.

¹⁷ Ene ngǝndéré ansedéd Petro aáken "Kíné wėmpě weésáá mbapεε nhóg awē ane mod-ε?" Petro ankwentén mós aá, "Aáy, meésáá."

¹⁸ Bǝǝb-ǝǝǝ, ahėb dėmbē. Né-ǝǝ, bembalede ábe prise ambáámbáa ne bembalede bé Ndáb-e-Dyǝb bėnkonéd muú bėtyéém áhed bėwále'. Petro mǝmpě ambé áhed, atyéém áwále muú.

Prise ambáámbáa akáadte Yesue

(Mat 26.59-66; Mak 14.55-64; Luk 22.66-71)

¹⁹ Prise ambáámbáa esđté'áá Yesue tǝņgene ábē bembapεε ne ádē ayáge.

²⁰ Yesue ankwentén mós aá, "Mam mészáál níme nílángé'áá bad nhóbé'áá mós á nhéné. Ayáged ádēm ásyáál-'ε, ábédé á Ndáb é mekáne ne á Ndáb-e-Dyǝb wēε bad bé Israel bėsyáál bėladné. Meéhóbéé-'ε dyamdyam á kun-tē.

²¹ Cheé-ǝ ésedteé mε ámpě. Sedéd bad ábe bėnwǝg mam níme nílángé bó. Bėbíí mam níme nłhóbé."

²² Ade Yesue áhóbé nē, mbalede nhóg ambǝm mós abén ahób aá, "Chán éhele éhǝbē' nē wēε prise ambáámbáa?"

²³ Yesue antimtén mós aá, "Nzé nhóbé dyam áde dēetǝņgene, ehób dǝ moosyáál áwóg. Boñ nzé édé bán nhóbé dyam áde átǝņgné, cheé ékáá boñ ébǝmé mε?"

²⁴ Dóo Anase áhóbé aá, békεen Yesue wée Kaifase, prise ambáámbáa. Yesue ambé abé á mehanj.

Petro abáá Yesue á yál ámpē

(Mat 26.71-75; Mak 14.69-72; Luk 22.58-62)

²⁵ Bóob-póó, Simón Petro ambé atyéém áhed áwālē muú. Héε bad ábe bémbē áhed bésēdteé mó bán, “Kíné wémpē weesaá mbapeε nhóg awě ane mod-ε?” Petro antánj aá, “Aáy, meesaá.”

²⁶ Mbáledε awě prise ambáámbáa nhóg, mwányanj móo Petro ánsenlē etúu, anchógéd ehób ámín, aláá Petro aá, “Kíné meenyínεé nyúmó á nzag-tē-ye?”

²⁷ Petro antánj ámpē. Abwóg-ábwóg, nchóm a kúb antónj.

Payledε akáádté Yesue

(Mat 27.1-2, 11-14; Mak 15.1-5; Luk 23.1-5)

²⁸ Bad bé Israel bēnhidnéd Yesue á ndáb wée Kaifase békēēn mó á eyáde e nkamlεne ambáá. Nén abédé epog é mbwεmbwε. Bēn bēnkēnsónlē á ndáb-te ábán nēn béenyinnád mbinde á’só é’ Dyób * ábel bédyē Ngande e Nnyíme-ámín.

²⁹ Né-óó, Payledε nkamlεne ambáá a bad bé Roma, ambíd e ebwóg áke atán bó, ásedtē bó aáken, “Awusé áhéé nyéhóbé bán anén mod abelé?”

³⁰ Bēnkwentén mó bán, “Nzé anén mod enkémbé ebébtéd é mod, né séébageé mó áwónj mekáá.”

³¹ Payledε anláá bó aá, “Nyé bēn nyétéd mó, nyébenled mbéndé echēn nyékáad mó.” Héε bad bé Israel belánjεé mó bán, “Séewóó’ε kunze áwúu mod.”

³² Nēn dēmbenléd álóned e’yale ábe Yesue ánhóbpē álúmed nyaa e kwééd eche áwēē.

³³ Payledε ansól á ndáb-te ámpē, áchōg Yesue, ásedéd mó aá, “Wε-εé edé kân e bad bé Israel-le?”

³⁴ Yesue ankwentén aá, “Mmōn-εé ehóbe nē ngé bad bémpēε bóo belánjē wε mam á yál echēm?”

³⁵ Payledε ankwentén aá, “Ndé mod a Israel-le? Abónj bad ne beprise bémbáá bóo bébágé wε áwēm mekáá. Cheé ebélé?”

³⁶ Yesue ankwentén aá, “Mmēm nkamlen méesaá á nkōjsé wén. Nzé nímēm nkamlen mémbe á nkōjsé wén, né ábēm bembáledε béwán, ábel nēn bad béεbagé mε á mekáá mé bad bé Israel. Bonj nímēm nkamlen méesaá mé nkōjsé.”

³⁷ Dóo Payledε ásedtēé mó aá, “Nédé edé kân-ε?” Yesue ankwentén aá, “Wε-εé ehóbé wéé ndé kân. Nzom eché ekáó bonj béchyáá mε, nípē á nkōjsé wén, edlí ábid mbónj e mbále. Mod ké ahéé awě adé mod a mbále awóglan mε.”

³⁸ Payledε ansédéd mó aá, “Cheé edé mbále?”

Bán Yesue atánjéné awé

(Mat 27.15-31; Mak 15.6-20; Luk 23.13-25)

Ade Payledε amáá mó aseded nēn, ambíd á ebwóg ámpē áke atán bad bé Israel, anláá bó aá, “Meekóbnεé anén mod awusé ké ahóg áde méhóbpē mεé béwúu mó.

³⁹ Bonj nyéwóó elem nēn bán, ntánjéné nyé mod a mbwóg nhóg abídted á pónéd e Ngande e Nnyíme-ámín. Nyédás bán mbídted nyé kân e bad bé Israel-le?”

⁴⁰ Bēnkwentén mó ne e’saad bán, “Aáy! Sééhēdēε mó. Bídted sé Barabase.” (Barabase abédé-ε nchíb ambáá.)

19

¹ Dóo Payledε áhóbé aá béke bébōm Yesue.

² Sánze éntéd ngn é mechā belónj ekóté éche émbē néε ekóté é kân, béhē mó chó á nló, béhé-ε mó mengombe nímé méyáge’ á yál, nímē méwágné mengombe mé kân.

³ Bésídté’áá mó benben, béhóbe bán, “A kân e bad bé Israel, edúbé ebē ne wε.” Bébómé’áá mó kóónje mebēn.

⁴ Payledε ambíd á ebwóg ámpē, aláá ábē bad aá, “Nyénone’, mbídtaad nyé mó á ebwóg, ábel nēn nyébíi bán, meekóbnεé mó awusé ké ahóg.”

⁵ Né-óó, Yesue ambíd á ebwóg ne ekóté e mechā á nló, megombe nímé méyáge’ mó-ε mébé mó á yál. Héε Payledε álánjεé bó aá, “Nyénone’ awedé mod-e nēn!”

⁶ Ade beprise bémbáá ne bembáledε bé Ndáb-e-Dyób bényíné mó, bēmbootéd abón bán, “Bomé mó á awóg! Bomé mó á awóg!” Payledε anláá bó aá, “Nyé bēn nyétéd mó, nyébone mó á awóg, áyāle meekóbnεé mó awusé ké ahóg.”

* **18:28** Bad bé Israel bēndubē nēn bán nzé mod assilé á ndáb e mod awě eesé mod a Israel, né awógté yál mbinde. Ne bó, enén ndin e mod ebágáá mbinde á’só é’ Dyób epun saambé. Enén pónéd esyaál ehele’ aá-sε adyε Ngande e Nnyíme-ámín.

⁷ Abé bad bëntimtén Payledé bán, “Séwóó mbéndé eché ehóbe nén bán atánǵéné awé áyále ahóbe aá módíi Mwán a Dyóòb.”

⁸ Ade Payledé áwógé nén, mbwóg mēnnabé mó akób.

⁹ Antim ámbíd á eyáde-té ampē, ásedéd Yesue aá, “Héé ebídé?” Bon Yesue enkēnkádénné mó.

¹⁰ Né-óó, Payledé anláá mó aá, “Weéhēdēē me akwenten-e? Weebii’ē nén weé nwóó kunze áhób meé béchene we, nwóñ-’ē kunze áhób meé bébome we á awog-e?”

¹¹ Yesue ankwentén mó aá, “Weewóó’ē kunze ké póg ámin echēm ésebán Dyóòb ábágé we ene kunze. Né-óó, mod awé abagé me áwóñ mekáá abelé mbéb míme rítómténé achab ámin.”

¹² Ade Payledé áwógé nē anhēd nzii átēde Yesue, bon ábē bad bēnhē e’saád bán, “Nzé etēdté anén mod né weesaá nsón awé Kaisēē. Kénzēé awé ahóbe aá, módé kǵñ né atǵngan Kaisēē.”

¹³ Ade Payledé áwógé nén, ambídén Yesue á ebwóg, ádyēē atii dé nkamlēn. Adé hóm wēē ándyēé’ē béchágé’áá dó bán, Eyáde éche bēnábndé Meláá. A ehób é Hibru béchage bán, Gabata.

¹⁴ Bóòb-póó, nén ábédé á epun é mbonšén é Ngande e Nnyíme-ámin, dyam kǵd. Payledé anláá abé bad bé Israel aá, “Echen kǵñ chō nén!”

¹⁵ Abé bad bēnhē e’saád bán, “Wúú mó! Wúú mó! Bomé mó á awog!” Héé Payledé ásedtēé bó aá, “Mbome echen kǵñ á awog-e?” Beprise bémháá bēnkwentén mó bán, “Séewóó’ē kǵñ empēé étómēé Kaisēē.”

¹⁶ Dóó Payledé ábágé Yesue áwab mekáá ábome mó á awog.

Bébómmé Yesue á awog

(Mat 27.32-44; Mak 15.21-32; Luk 23.26-43)

Né-óó, bēnhidnéd Yesue.

¹⁷ Yesue mwēn ampém áde awog bootya á dyad-té ákēēn dó hóm áde béchagéé bán, “Hóm dé Ebóngél é Nló,” áde béchagéé á ehób é Hibru bán Golgota.

¹⁸ Ahed-taá bēmboméé mó á awog. Bēmbomé bad bébe bēmpēe á awog áhed, nhóg ped póg, aníní-’ē ped eníní, Yesue abé áfinté.

¹⁹ Payledé antél á abámbé aá, “Yesue, mod a dyad á Nazaret, kǵñ e bad bé Israel,” abáde á awog á nló-mín wēē Yesue.

²⁰ Wēē bēmboméé Yesue á awog démbē benben ne Jerusalem. Né-óó, bad hiin bēnlǵñ chóm éche bēntenlé. Chóm éche ántenlé, antel chó á ehób é Hibru, átél é ehób é Latin, ne é ehób é Grikia.

²¹ Beprise bémháá bēnlāá Payledé bán, “Wéétēlé weé ‘Kǵñ e bad bé Israel,’ tēl weé, ‘Anén mod ahóbe aá, me-éé ndé kǵñ e bad bé Israel.’”

²² Payledé anláá bó aá, “Chóm éche rítélé mmaá atel.”

²³ Ade sánze émáá Yesue abome á awog, bēntēd éche mbóté, békabté chó áte monǵe méniin, bó mod té atéd akab ahóg. Bēntēd kóóñne mbóté eche béhágkē áte. Ene mbóté bēnkēmbaá’ē chó hómhóm. Embé bootya ámin ápe áse enkēnwóngé mbom.

²⁴ Héé bēlǵngéé nhóg ne aníní bán, “Syánē deesālé chó. Désid mbambú ányin mod awé áted chó.” Nén dēmbēnléd álonéd e’yale ábe é’ténlédé á Kálag e Dyóòb nén bán, “Bēn ne bēn bēnkǵb échēm mbóté.

Bēnsíd-te mbambú ákab nímēm nsob.”

Né-óó, nē dóó échē sánze émbēnlé.

²⁵ Yesue nyaá, nyaá mwányan, Maria awé abédé Klopase mwaád ne Maria Magdalene bēntyeem benben ne á awog áde Yesue.

²⁶ Ade Yesue ányiné nyaá ne mbapēē awé ádáó bētyéémé áhed, anláá nyaá aá, “A-nyan, mwán we ne.”

²⁷ Héé álǵngéé ane mbapēē mómpē aá, “Nyoó ne.” Bootya ene pónde ane mbapēē antéd Yesue nyaá, átimēn mó áwē ndáb.

Yesue awédé

(Mat 27.45-56; Mak 15.33-41; Luk 23.44-49)

²⁸ Ámbíd e nē, Yesue annyín aá mekan mésyā́l mémáá. Alóned-te ngáne éténlédé á Kálag e Dyóòb anhób aá “Pid ekóbé me.”

²⁹ Kúmbe embé áhed, ebéntéd é míim énlǵg áwēd-te. Né-óó bēntóde kuchá á ebéntéd é míim-té wē, bésóm á ntóñ rí ngen e hísoòb, béhē mó á nsal.

³⁰ Ade Yesue ámwéde ebéntéd é míim ché, anhób aá, “Emáá.” Héé ámógé nló, awé-’ē.

Bésóó Yesue akon á aheb

³¹ Bɔɔb-pɔɔ, échê epun ebédé Mbwe mé mboɔsén mé mbwe-mé-nkóme-áte. Bad bé Israe-le béehede'áá bán ndim mbé mbê á awɔg á mbwe-mé-nkóme-áte, tanɔe ngáne échê epun é nkóme áte étómtənnē edúbé abé. Né-ɔɔ bəntān Payledé bán, ábe bɔɔ kunze ábɔg bad ábe bébómmé á awɔg mekuu ne áhúd bɔ á awɔg.

³² Né-ɔɔ, échê sánze énké ébɔg mekuu nime bad ábe bəmboméé bɔɔbe Yesue á awɔg. Bénsəbē nime nhɔg abɔg, bébɔg-ke nime aníní.

³³ Bɔɔ áde bépédé wée Yesue bəntān nées ámáá awé. Né-ɔɔ, bənkəntɔgənné mɔ mekuu abɔg.

³⁴ Ké nê, sánze pɔg ensonj mɔ akonj á aheb. Abwɔg-ábwɔg mekií ne mendíb bəmbíd.

³⁵ Mod awē annyín nées nímén mekan mébénlédé, abídé mbónj, eche mbónj edé-'e mbále. Abíí nén aá, mókale' mbále, ahóbe-'e nímén mam ábel nén nyémpē nyédúbé.

³⁶ Mmén mam mébénlédé álóned e'yale ábe é'ténlédé á Kálag e Dyɔb nén bán, "Béebɔgké ehíd échê ké ehɔg."

³⁷ Eténlédé á kálag e Dyɔb ámpē nén bán, "Bénɔn ane awē bésóó akonj."

Bélimmé Yesue

(Mat 27.57-61; Mak 15.42-47; Luk 23.50-56)

³⁸ Ámbíd enê, Josebe awē ámbíd á dyad á Arimatia, anláá Payledé aá, ábe mɔ kunze áted ndim nime Yesue. Josebe abédée mbapee awē Yesue, bɔɔ énkəmbídédte yál áwed áyale abáá'áá bad bé Israe-l. Payledé ambē mɔ kunze áted ndim nime Yesue. Né-ɔɔ, ankē Yesue ndim atéd.

³⁹ Nikodemuse awē ansébé Yesue ake dé anyín nkuu, bɔ Joseb bənkē. Bédəkē anwálé mekúle nime bənabnadté ndim nímé bébénlé Mía ne Alɔs.* Adé dyɔg ábédé dyam móom mé kilo meláán ne kilo étáan.

⁴⁰ Béntéd ndim nime Yesue, békáān mɔ mbóm ne nime mekúle. Nén dɔɔ elem é bad bé Israe-l áboɔsən ndim émbē.

⁴¹ Bɔɔb-pɔɔ, nzag embé wée bənwū'ē Yesue. Sonj e ekóólé ebédé á nzag-tê wê, échê bənkəmpáá ndim ké nhɔg abane áte.

⁴² Né-ɔɔ, ngáne échê epun ebédé mbwe mé mboɔsén mé mbwe-mé-nkóme áte, ene sonj-'e ebé bənbən, bəmbané Yesue ndim áwəd-te.

20

Yesue apuudé

(Mat 28.1-8; Mak 16.1-8; Luk 24.1-12)

¹ A Sɔndé, epɔg é mbwembwe, áde ehíntén émbēē ébé, Maria Magdalene ankē á sonj wée bənlímēē Yesue. Ade ápédé áhed, antán nées béhúdé aláá áde bənkɔlənne nsəl n sonj. ² Héé átómé mehélé, bɔɔ áke atán Simɔn Petro ne mbapee ampée awē búmɔ bébédé. Ane mbapee abédée mbapee awē Yesue ándəngé. Dɔɔ Maria álanɔgēé bɔ aá, "Béhúdé Səngwéé ndim á sonj-tê, séebíí-'áa wée bébánné mɔ."

³ Dɔɔ Petro bɔ ane mbapee béhídté bɔɔ békəg á sonj.

⁴ Bɔ moosyáál bényəgté'áá, bɔɔ mbapee aníní anyəgté'áá tómaa Petro. Né-ɔɔ, ansébé ape á sonj.

⁵ Anwúlén áse ásad díd á sonj-tê, anyín mbóm éche bənkaánné Yesue, bɔɔ enkənsónlé á sonj-tê.

⁶ Simone ahúé'áá mɔ ámbíd, apedé-'áá pēén asól-le á sonj-tê. Antán mbóm éche bənkaánné Yesue áhed.

⁷ Antán-ne abad áde bənkaánné Yesue nló. Adé abad déébédéé hóm ahɔg ne mbóm, déndəān áte pəd pɔg.

⁸ Héé aníní mbapee awē ansébé ape á sonj mómpē ásólé áwəd-te. Annyín ábē bwēm, adúbé-'e.

⁹ Ké nê, bənkənsónjənné chóm éche éténlédé á Kálag e Dyɔb nén bán Yesue atəngéné apuu.

¹⁰ Ámbíd é nê, ábe bəmbapee bəntím ámbíd á ndáb.

Yesue alúmté Maria Magdalene yál

(Mat 28.9-10; Mak 16.9-11)

¹¹ Bɔɔb-pɔɔ Maria anlyəg á nsəl n sonj, áchyeé'. Ade áchyeé' nê dɔɔ áwúnlé áse, bɔɔ ásadé díd á sonj-tê.

¹² Ásad áde ásadé díd, annyín ángel ébe. Echê ángel énhē e'púpe é' mbóté, édyēē wée bənnaádté ndim nime Yesue. Nhɔg andyēé á pəd e nló, aníní-'e á pəd e mekuu.

* 19:39 Alas: Abédée mekúle nime bébénládtáá ánabned ndim.

13 Eché ángel ênsedéd Maria bán, “A-mmwaád, chee échyé’é?” Anláá bó aá, “Nchye’ áyále bétédé ndim núme awem Sàngwéé, meebii-’áa wée bebánné mós.”

14 Ade áamá ahóh nê, ankunnéd, anyín née mod átyéémé áhed. Ane mod abédée Yesue boŋ enkembíí’ é aá Yesue mós adé.

15 Yesue asedéd mós aá, “A-mmwaád, chee échyé’é? Nzéé éhedeé?” Maria anwémtén aá mod awé abele nsón á nzag-té wê mós adé. Né-òò, anláá mós aá, “A-sán, nzé we-éé etédé mós ndim, eláá me wée ébánné, ábel boŋ níke rítéd mós.”

16 Héé Yesue áhageé mós aá, “A-Maria!” Dóo Maria ákúnné yál áwê boŋ áhóbé á ehóh é Hibru aá, “Rabóni!” (awé adé nén bán, “Meléede”).

17 Yesue anláá mós aá, “Weésítán me, áyále meétíméé ámbíd wée Titée. Boŋ kág wée ábêm bembapée, ábêm baányan, eláa bó wée, ntime’ ámbíd wée echem Sán, awé adé kóŋne echen Sán. Mós adé Dyób ádém, abé-’é ádén.”

18 Né-òò, Maria Magdalene anké, aláá bembapée aá, mónyínē Sàngwéé. Anláá-’é bó mam mésyáál núme álanjé mós.

*Yesue alúmté abē bembapée yál
(Mat 28.16-20; Mak 16.14-18; Luk 24.36-49)*

19 Eché epun é Sôndé chên, ngukél, bembapée ábe Yesue bēnladén áte á ndáb-te bépēn-ne ekob áyále bebáá’áá bad bé Israel. Yesue ampě, atyéém áfínté echáb, aláá bó aá, “Nsanj níbê ne nyé.”

20 Ade áamá ahóh nê, anlúméd bó nímē mekáá, alúméd-te bó aheb. Bembapée bebédé menyínje bŵámbwam ányín Sàngwéé.

21 Dóo Yesue álanjéé bó ámpē aá, “Nsanj níbê ne nyé. Ngáne Titée álómé me, melelem nê dóo mémpē rílómeé nyé.”

22 Ade áamá ahóh nê, anhébé bó peme, aláá-’é bó aá, “Nyékob Edáádaj éche Esáá.

23 Kénzéeé awé nyélágséné mbéb, né níme mbéb níkúde alagsen. Kénzéeé-’é awé nyéelagséné níme mbéb, né méekudeé alagsen.”

Yesue alúmté Tōmase yál

24 Tōmase mbapée nhóg áfínté e bembapée dyóm ne bébe ábe Yesue, awé béchágé’áá bán Nhéd, enkembáá ne baáb áde Yesue ápédé.

25 Né-òò, áde ahúú baáb bēnlāá mós bán, “Sényíné Sàngwéé.” Boŋ anláá bó aá, “Esebán rínyíné mebanj níme bēmboméé mós tōne á mekáá boŋ ísōm-me e’ mii á mebanj-té áwed, níbíd-te ekáá áwê aheb, méedúbéé mbéd.”

26 Ámbíd e e’pun waam, bembapée bēnladén áte á ndáb-te ámpē. Tōmase mómpe ámbé áhed. Bēmpēn e’kob, boŋ Yesue ampě, atyéém áfínté echáb. Anláá bó aá, “Nsanj níbê ne nyé.”

27 Héé álanjéé Tōmase aá, “Sōm e’ mii á mebanj hén. Nóné’ me mekáá, éhyene-’é ekáá, ébid me chó á aheb. Sóg mod abé awé eedúbpé, dúbé!”

28 Tōmase ankwentén mós aá, “A-Sáá awēm, a-Dyób ádém.”

29 Yesue anláá mós aá, “Saá áyále ényíné me dóo édúbpé-ye? Nnam ne bad ábe béenyíne boŋ kéné, bédúbe.”

Nzom eché ekáá boŋ bētele’ enén kálag

30 Yesue ámbél ekud é menyáké émpée éche ábē bembapée bēmbēé ásé éche béeteleé á kálag-té wén.

31 Boŋ nímén mésyáál méténlédé ábel nén nyédúbe* bán, Yesue mós adé Ane-awé-Béwógté, Mwán a Dyób. Nzé nyédúbpé-’é mós, né nyékudé alongé áde déemaá’ á dín áde.

21

Yesue alúmté abē bembapée yál ámpē

1 Ámbíd e nímén mésyáál, anlúméd ábē bembapée yál ámpē á nkin mé edib é Tiberia. Nyaa eché ánlúméd-té bó yál ebédée nén,

2 epun ehóg Simón Petro, Tōmase (awé béchágé’áá Nhéd), Nataniéle (awé ámbíd á dyad á Kana á mbwóg e Galilia), bán ábe Zebédie, ne bembapée ábe Yesue bēmpēe bébe, bēnladén hóm ahóg.

3 Héé Simón Petro álanjéé bó aá, “Nkag súu akób.” Bēntimtén mós bán, “Sémpē sééhíd we.” Né-òò, bēnhidé béke bésól á bǎle-té. Boŋ nímé nkuu rísyáál bēnkēnkóbpé chómchóm.

4 Ade bín é’bóótédé akéle, Yesue antyéém á nkin mé edib. Boŋ ábē bembapée bēnkēmbíí’ é bán mós adé.

* 20:31 Nyédúbe; donje á Kálag dé e’só awóó nyébē nyédúbe.

⁵ Dóo Yesue asedteé bó aá, “A-běd, nyéékōbēē chōmchōm-ε?” Bēnkwentén mós bán, “Aáy, séékōbēē.”

⁶ Anláá bós aá, “Nyébwēm mbínzé á pēd e ekáá é mbáá é bāle, nyéékōb.” Né-óó, bēmbwēm mbínzé ene pēd. Bēnkēnhēnlé ene mbínzé adol áyāle sūu émbē áwēd-te bwāmbwam.

⁷ Dóo mbapēē awē Yesue ándāngé áhóbéé aá, “Sāngwēé mós adé!” Awóg áde Simōn Petro áwógé bán, Sāngwēé mós adé, anhé megombe á yāl (áyāle anhūd bwēm á yāl). Dóo áhébé á edīb-te.

⁸ Boj ábíníí bembapēē bēmpē á nkin á bāle-tē, bédolé mbínzé. Ene mbínzé enlón ne sūu. Wēē bēmbídēnnē bāle ápe á nkin dēnkēnchabpé, ábédé dyam mbwōkel e méta póg.

⁹ Ade bēpédé á nkin bēntān muú mé mekājled. Sūu ébédé áwēd amín ne ewele.

¹⁰ Yesue anláá bós aá, “Nyéhyēne’ donje á sūu áde nyékóbé bōob.”

¹¹ Né-óó, Simōn Petro ansól á bāle-tē, ádol ene mbínzé á nkin. Sūu émbáá énlón ene mbínzé áte. Ebédé mbwōkel móom métaan ne éláán. Kénéé échē sūu émbuúíé áte, ene mbínzé enkēnsaléé.

¹² Yesue anláá bós aá, “Nyéhyē nyédyē ndyééd.” Abē bembapēē bós modmod enkēnchu’ é mós asēded aáken, “Nzé-módé edíí?” Bēmbíí bán, Sāngwēé mós adé.

¹³ Dóo Yesue átédé ewele boj ábagé bós. Ambēl melellem ne sūu.

¹⁴ Nēn ábédé ngen échē élónténé éláán, échē Yesue álúmté ábē bembapēē yāl á pónké échē amáá apuu.

Yesue asēdté Petro ké adáó mós

¹⁵ Ade bémáá ndyééd adyé, Yesue asēded Simōn Petro aá, “A-Simōn, mwān a Jōn, edáó me tómaa ábēn bembapēē-ye?” Simōne ankwentén aá, “Ée, a-Sāj, ebíí wēé ndáó wē.” Yesue anláá mós aá, “Tógén ábēm bán bé rídyōj ní mbód.”

¹⁶ Yesue ansēded mós ngen échē élónténé ébē aá, “A-Simōn, mwān a Jōn, edáó me-ye?” Petro antímtén mós aá, “Ée, a-Sāj, ebíí wēé ndáó wē.” Yesue anláá mós aá, “Tógén nímmēm rídyōj ní mbód.”

¹⁷ Yesue asēded mós ngen échē élónténé éláán aá, “A-Simōn, Mwān é Jōn edáó me-ye?” Yāl enhós Petro áte áde Yesue asēdté mós ngen échē élónténé éláán aáken, “Edáó me-ye?” Né-óó, anláá Yesue aá, “A-Sāj, ebíí mam mésyāāl. Ebíí wēé ndáó wē.” Yesue anláá mós aá “Tógén nímmēm rídyōj ní mbód.

¹⁸ Ne mbále, nlānge wē nēn meé, áde ébédé etum, mmōn epúdé’áá abad, ékäg-ke kéhéé wēé édás. Boj áde wēchunné wēsād mekáá, mod ampēe awáád wē abad, ákēēn-ne wē wēé wēedá’ é ake.”

¹⁹ (Yesue anhób nē álúmed nyaa e kwééd échē Petro áwēē, álúmed ehúmé é Dyōb.) Ambíd e nē dóo Yesue álāngéé mós aá, “Hídé me.”

Yesue ne mbapēē awē adáó

²⁰ Dóo Petro ánóné ámbíd boj ányínē’ nēē mbapēē ampēe áhídeé bós. Ane mbapēē abédēē mbapēē awē Yesue ándāngé. Mós andyéé Yesue á akéb á pónké échē bédyágé’áá ndyééd ngukél, boj ásdēd Yesue aá ken, nzé-módé ášōm mós.

²¹ Anyín áde Petro ányíné-’aá mós, anhób aá, “A-Sāj, chán-náa anén mod?”

²² Yesue ankwentén mós aá, “Nzé nhede meé ábē á alongé kóáñne pónké échē mépēé, chán nē ánóné wē? Hídé me.”

²³ Né-óó, ékanléd áfínté e bad ábe bēhídé’áá Yesue hōm ásyāāl nēn bán ane mbapēē éewáá, kénéé Yesue énkēnhóbpé aá, éewáá. Anhób dásó aá, “Nzé nhede meé ábē á alongé kóáñne pónké échē mépēé, chán nē ánóné wē?”

²⁴ Ane mbapēē mós ábide mbój áyāl e nímmēm mekan, mó-’aá atelé mós ásē. Debíí-ε bán, kéchéé échē áhóbé édé mbále.

Asóg á kálag échē Jōne

²⁵ Ekud é mam émpēe édé échē Yesue ábélé. Nzé bēnhōb bán bētele’ mésyāāl ásē, ahóg ámbíd e ádíníí, nwēmstan meé né nkōñsé méekwogké échē kálag ahé áte.

Kálag e Mbɛltéd níme bembapɛɛ bé nlomag Ndibned n kálag

Mod awe atelé kálag e Lukase mó atelé-ɛ kálag e Mbɛltéd. Mekan níme enén kálag mékoo'ɛ alúmed áte médií aláa bad ngáne Edáádəŋ éche Esáá énwōŋgɛnnɛ bad ábe behídé'áá Yesue ákal nkalan ní bwám tɛŋgene Yesue á Jerusalem, á mbwóg é Judeya ne Samaria ne á mesóg mé nkōŋsé. Elúmtɛ ngáne adúbe á bad bé Krísto ábédé álóned chóm éche bad bé Israel béndúbɛɛ. Enén kálag elúmtɛ ngáne adúbe á bad bé Krísto ábóótédé á Jerusalem ámbíd e mpume níme Krístəə ne ngáne ákíí mebwóg mémpɛe. Atón áde áde etógnɛn áde enén kálag elúmtɛ ámpɛ ádií nsón níme Edáádəŋ éche Esáá ébɛléɛ. Empɛ ne ngine ámín e bad ábe bédúbɛpɛ á mbwɛ ní Pentekos.

Nkabtéd n kálag

Abonŋen bad ábe békale nkalan ní bwám 1.1-26

a. Póle e asóg eche Yesue ne ábɛ Bembapɛɛ 1.1-14

b. Mod awé atédé Judase échɛ etál nɛŋgáne mbapɛɛ 1.15-26

Nkalan níme Yesue níkálté á Jerusalem 2.1-8.3

Nkalan níme Yesue níkálté á Judeya ne á Samaria 8.4-12.25

Nsón níme Paale 13.1-28.31

a. Eke é'só áke dé abel nsón 13.1-14.28

b. Mbom níme bembapɛɛ bé nlomag ne belyáged bé mwembé á Jerusalem 15.1-35

c. Meke níme mélóntɛné mébe áke dé abel nsón 15.36-18.22

d. Meke níme mélóntɛné méláán áke dé abel nsón 18.23-21.6

e. Paale adé á mbwóg á Jerusalem, á Kaisaria ne á Roma 21.17-28.31

Titɛ Dyəbɛ ad mǝlǝm

Edáádəŋ éche Esáá

¹ A-Tiofilos, mod a edúbé, á kálag echɛ nísebpɛ atel, mentɛl mekan ásɛ níme Yesue ámbenlé ne níme áyágtɛ'áá bad. Ámbɛl nímén mekan bootya á pónDé echɛ ámbóótédé níme nsón,

² káŋne, á pónDé eche Dyəb dɛmbenlé bon ápúmɛ. Byánán ápumɛ, ámbenlé ngine e Edáádəŋ éche Esáá, aláa bad ábe ámpwɛdtɛ nɛŋgáne ábɛ bembapɛɛ bé nlomag mekan níme bétáŋgɛné abel.

³ Bootya áde Yesue áwédé, ápe móom mé e'pun méniin, anlúmed ábɛ bembapɛɛ bé nlomag yál ngen ne ngen, álúmed nɛn áá ne mbále módɛ á alongé. Bénýinnáá mó díd ákanlé-ɛ bó tɛŋgene nkamlen ní Dyəb.

⁴ PónDé póg áde bǝbǝ bédýáŋkɛ ndyééd, ansím bó etúu áte aláá bó áá, “Nyééhídtɛ á dyad á Jerusalem. Nyésine' nde echɛ Titɛ awɛm áláŋgé nyé áá móhǝbɛ áá móšbɛ nyé. Ene nde chíó ménláá'nyé.

⁵ Jonɛ adúsánnáá bad ne mendíb, bon ámbíd e ngune e e'pun bǝb, bédusɛn nyé ne Edáádəŋ éche Esáá.”

Yesue apümmɛ

(Mak 16.19-20; Luk 24.50-53)

⁶ PónDé póg bembapɛɛ bé nlomag bǝbɛ Yesue bɛnladɛn hóm ahóg. Héɛ bésɛdtɛ mó bánken, “A-Sán, láá sé. Mmén mesú dǝo wɛbenlé bon bad bé Israel bəwón ngine ámpɛ ákamlen echab yál-ɛ?”

⁷ Héɛ Yesue átimtanné bó áá, “Titɛ mó abenlad eche ngine átti pónDé ne mekag níme kéchéé ébenlédtɛ. Nyéewó'ɛ kunze ábíi pónDé eche nímén mekan mébenlédtɛ.

⁸ Bon áde Edáádəŋ éche Esáá épii'nyé nyé nyéékúd ngine, hé-'áá nyékanléɛ bad mekan níme nyényiné tɛŋgene me á dyad á Jerusalem, á mbwóg é Judeya, ne e Samaria ésyǝl káŋ nyéɛ á metóŋgé mé nkōŋsé mésyǝl.”

⁹ Yesue amaá'áá bó aláa nɛ, dǝo Dyəb ábélɛ bon ápúmɛ ámín. Ade bédii bɛnɛnɛ mó nɛ, mbag énkütɛn mó, bɛnkɛnnyín-naa mó ámpɛ.

¹⁰ Bembapɛɛ bɛmbɛ bétánɛ míd áte bɛnɛnɛ' ngáne Yesue ákagké ámín, dǝo bad bébe ábe behédé mbóté éche épúbe' bɛbíde tǝléd, bétýéém bó á nkag. ¹¹ Héɛ ábɛ bad bébe bésɛdtɛ bó bánken “A-bad bé Gallia, cheɛ nyétyéémɛ hɛn, nyénɛnɛ ámín? Anén Yesue awé Dyəb ábélɛ bon áhídɛ áfíntɛ echɛn, ápúmɛ ámín, átti ámbíd melemlɛm ngáne nyényiné akag ámín.”

Matiasé atédé etál éche Judasé

¹² Hée bembapεε bé nlomag béhídté á Ekone é Menzab, bétím ámbíd á Jerusalem. Eché ekε ebédé dyam eped é Máyl ehóg.

¹³ Ade bésólé á dyad-té, bēnkē bēsól á tonj eche bédyēé'áá áte. Ene tonj ebédé á esón é ndáb éche édé ámín. Abé bembapεε bé nlomag bēbédéε Petro, Jone, Jemse ne Andreyá, Filibε ne Tomase, Batolomyo ne Matyo, Jemse, mwán awe Alfase ne Simone awé anwój kán e alonj, ne Judasé mwán awé Jemse.

¹⁴ Abén bembapεε bēyógkē'áá aladen áte hóm ahóg ákáne nchoo ne bebaád, Maria, Yesue nyaa, ne Yesue baányan.

¹⁵ Mmē mesú mēn, bad ábe bēndūbē Yesue bēnladén áte. Bēbédé dyam mbwókel ne móom mé bad mébe. Héε Petro átyéémé ámín áfínté echáb bonj áhōbē áá,

¹⁶ "A-baányan, mekan míme méténlédé á kálag e Dyōb métāngéné alón. Edaōdānj éche Esáá énhōb á'sō é pónké á nsal míme Dabidε tāngene Judasé awé antómén bad ábe bēnkē Yesue akób.

¹⁷ Judasé abédé nhóg áfínté e syánē. Yesue ampwéd mó ábel nímén nsón melemlen nēngáne ámpwēdté syánē.

¹⁸ (Mōné míme ánkudté áyāle ebēbtéd éche ámbenlé, anchanén mó etúú. A etúú-te wē dēn-naá ánsongé dúu, awé-ε, abum ákán mó, mmii mbíd-te mó áwed.

¹⁹ Bad bésyāal á Jerusalem bēnwōg ádén akan, né-ōó bēnchāg ádé hóm áwab ehōb-te bán Akeldama, nēdē, 'Ndaōb e mekií.')

²⁰ Petro ambád ahōb áá, "Nén ábēnlédé ngáne éténlédé a kálag e ngase é Dyōb nēn bán, 'Ade hóm átim e'bwōgn modmod eelóó' áhed.'

Eténlédé-ε nēn bán,

'Mod ampée átéd eche etál é nsón.'

²¹ "Né-ōó, éhēdne' nēn bán dēpweđ mod nhóg. Ane mod atāngéné abé mod awé abágáá ne syánē pónké bésyāal eche echē Sāj Yesue ne syánē dékágé'áá mebwóg ne mebwóg,

²² bootyaa á pónké echē Jone ádúsánnáá bad ápe á pónké echē Dyōb dēmbenlé bonj Yesue áptimē. Mōmpē atāngéné abé mod awé ambé mbōnj áde Yesue ámpuú'ε."

²³ Hé dōo bēpwédé bad bébe, Josebe awé bēpwāntánnáá bán Basabase (béchógé'áá mómpē bán Justuse) bō Matiasé.

²⁴ Dōo békánneé bán, "A-Sāj ebíi mod asyāal nlém áte. Lúmed sé mod awé épwédé áfínté e ábén bad bébe,

²⁵ átéd etál néε mod a nlomag, éche Judasé átédte bonj mwēn átimé' éche eped éche ébonjnéde mó."

²⁶ Né-ōó, bēnsíd mbambú álúmed bō mod awé bēpwēdté. Dōo mbambú élúmté bō ápwēđ Matiasé. Né-ōó, bēmbād Matiasé á mesongé mé bembapεε bé nlomag ábíníi dyōm ne nhóg.

2*Epe éche Edaōdānj éche Esáá*

¹ Ade ngande e Pentekōs épédé, bad ábe bédúbpé Krístā bésyāal bēnladén áte hóm ahóg.

*

² Abwōg-ábwōg esaád émbíd ámín. Ebédé néε ekukud é ngine éche étóme'. Eché esaád énlōn ene ndáb esyāal áte echē ábē bad ábe bédúbpé bēmbēε áte.

³ Hé dōo bényíné bwēm nēngáne muu nímē nwágné néε e'chéh rítýéémé mod-téé á nlómín.

⁴ Edaōdānj éche Esáá émpíi bō moosyāal, mod-téé ábootéd mehōb mé bad bēmpēe ahōb nímē bēsebpeε ayōge. Edaōdānj chíó élyágté'áá bō áhōb kéchéé éche bēhōb'áá.

⁵ Enén pónké bad bé Israel ábe békánnáá Dyōb bēbédé á Jerusalem. Abén bad bēmbíd mebwóg ne mebwóg á nkōnsé.

⁶ Awóg áde bēwógé échéh esaád, ndun e mod enladén áte wée ábē bad ábe bédúbpé bēbédé. Yāl enkóm bō áte bwāmbwam áyāle ngáne bad ábe bédúbpé bēhōb'áá ábíníi bán bō mod-téé ácheme' éche ehōb.

⁷ Ne nkōmtēn ní yāl áte, bēnsédéd bán, "Kíné saá á mbwóg e Galilia ábén bad bésyāal bēbídé-yε?

⁸ Chán-nō ébēnlédé bonj syāá mod-té áwōgē' ngáne bēhōbεé éche ehōb.

⁹ Áfínté e syánē, baahóg bēbídé á melonj mé Patia, Média ne Elam; melonj mé Mesopotemia, Judeya ne Kapadosia; melonj mé Ponto ne mé Esia,

* 2:1 Nzé móom mé e'pun métáan méntōm ámbíd e ngande e Nnyíme-ámln dōo enén ngande ébágáá. Eché epun chíó bad bé Israel bédýágé'áá ngande e mpád ní bwēm.

¹⁰ meloŋ mé Frigia ne Pamfilia, aloŋ á Egipto ne mebwóg mé aloŋ á Libia, benben ne Sirine syánē bad behóg debídé á dyad á Roma.

¹¹ Atíntē e ábén bad bésyāāl donge achyáádté ne bad bé Israel, ábíníí-’ē bad ábe béésē bad bé Israel ábe béhíde’ adúbe á bad bé Israel. Syánē bad behóg debídé á aloŋ á Kret ne á aloŋ dé Arabia boŋ kéné, syánē mod téé awóge ngáne behóbēé áwe ehób-te ndále é mekan éche Dyób ábélé.”

¹² Yāl enkóm bō áte bényāg-ke bwāmbwam, bésēdté nhóg ne aníníí bánken, “Chán nén ádíí-yē?”

¹³ Kéné, donge á bad béwélé’áá bad ábe bédúbpé, behóbē bán bémáá mīm amwé.

Póle eche Petro

¹⁴ Héε Petro átyéémé amín atíntē e ábíníí bembapεε bé nlomag dyóm ne nhóg, áchāgtē ehób, álāngē ndun e mod échē embé áhed aá, “A-baányan bé Israel ne nyé baasyāāl ábe nyédyεε á Jerusalem, nyélám metúu rílaa nyé ngáne nén ádíí.

¹⁵ Abén bad béemwédeé mīm ngáne nyéwémwanné. Bín é’díi bōob ngāŋ abog é mbwεmbwε ngén.

¹⁶ Boŋ nén ábénlédé ntíined ne e’yale ábe nkal é edaádāŋ Joel ánhōbpé aá,

¹⁷ Dyób áhóbé nén aá,

‘A e’pun bé asóg,

mēlóm échēm Edaádāŋ éche Esáá épíí moosyāāl.

Abén bán bé bebaád ne bé baachóm behóbē mam míme mébenléd á’sō é pónde.

Echēn kódébad ényíne ndóg éche éhúu ne mε,

ábēn bechun bé bad-te bēnangé nló.

¹⁸ Nē dēn-εé mébenlé.

Mēlóm échēm Edaádāŋ nímē mesú, épíí ké ábēm bembalede, bebaád ne baachóm,

boŋ behóbē mam míme ríhúu ne mε, míme mébenléd á’sō é’ pónde.

¹⁹ Mēlūmēd menyáké ádyób

nlúmed-te e’chemléd á nkōŋsé.

Mekíí mēsyoǵé, muú ríchoden, mwēntud-te ríbide’.

²⁰ Etondeε ákwe ehíntén,

ngon-ne éyag néε mekií.

Mmán mekan mébenléd epun embáá é ehúmé é Sánjú édéhób bán épag.

²¹ Ene pónde kenzéé awé akwēnténe aá Yesue adé mó Sánǵwéé ákúid e’soosoj.’ ”

²² Petro ambád ámpē aá, “A-bad bé Israel, nyélám metúu nyéwóglēn chōm éche ríhedeé ahób. Dyób dēmbēl Yesue mod a Nazaret ábēl ndále é mekan mé menyáké ne e’chemléd álúmed nyé nén aá mó mwēn-neé mólómē mó. Nyébēn nyébíí nē bwám áyale nén atíntē echēn dōo nē dēmbenlédte.

²³ Dyób dēmmad abíí, ámad-te atíí nén aá nyéεwūu Yesue abe áde nyēmbε mó á mekáá mé bad bé ekoyí, boŋ bebōmē-’ε mó á awog.

²⁴ Boŋ kéné, Dyób dēmpuúid mó, ahúd mó á metuné mé kwééd, áyāle kwééd eéhele’aá-se éhan mó.

²⁵ Dabide anhób tāŋgene mó aá,

‘Nnyíné’áá Sánǵwéé áwém á’sō-te pónde ésyāāl.

Adé mé á ekáá émbáá, né-ōó, meétagēε áte.

²⁶ Nē ábélé nlóné ne menyínge

nkale-’ε póle ne menyínge mēsyoāl.

Echem yāl-le ámpē éwālē e’lyóg bé nlém abé áde rídíí á alongé.

²⁷ Ayāle wéemwaá-se edaádāŋ échēm émāānéd á mbwóg e kwééd,

wéemwaá-’ε wē ndim míme awōŋ mbalede ríboó á soŋ-tē.

²⁸ Elúmté mε menzii míme nírεene’ alongé, abé áde wébēε-’ε mε á akéb mēbē menyínge.’ ”

²⁹ Petro ambád ámpē aá, “A-baányan, nlānge nyé ne aláa dēn nén meé Dabide awesyánē sáá ambáá, anwé. Bénlímé mó, eché soŋ edé-’ε hén káóŋne chíí.

³⁰ Dabide abédeε nkal é’dāsdāŋ, ambíí-’ε chōm éche Dyób dénhōbpé aá móóε mó. Dyób démmwε melē nén aá móóted mwán á mbyaa míme Dabide móbēl mó kāŋ melemlēn nēngáne Dabide ámbēε kāŋ.

³¹ Dabide ammád anyín á’sō é’ pónde, dyam áde Dyób débenlé, né-ōó, anhób mam tāŋgene mpuu míme Ane-awē-Béwógté. Anhób aá,

‘Dyób dénkēmmwaá aá ámaaned á mbwóg e kwééd,

ndim ménkēmbōó-aá mó á soŋ-tē.’

³² Ane Yesue mó-’áá Dyób ápuúdté, sé moosyoāl séde-’ε mbóŋ bán apuúde.

³³ Dyöb ábagé mós atii dé edúbé áwe ekáá émbáá. Abagé-é mós Edáádəŋ éche Esáá éche ánhöbpé áá mósəbé mós. Yesue mós-é ábagé sé échə Edáádəŋ, chós-áá ékásə bonj nyényinē, nyéwögē-é kéchéé échə ébenlad chii.

³⁴ Debíí nən bán Dabidə enkəmpuméé, bonj kénə anhób áá, 'Sánj Dyöbə anláá awem Sánjgwéé áá, Dycé áwəm ekáá émbáá,

³⁵ kásəŋne á pónéd echə mébenlé bonj ékəgtéd ábōŋ bad bé ekóyí ámín ne mekuu.' "

³⁶ Petro ambád ahób áá, "Né-ós, nyé bad bé Israel bésyāāl nyékoŋ abíí nən bán anən Yesue awé nyébómme á awəg mwən-naá Dyöb dēmbenlé ábē Sánjgwéé mós-áá adé Ane-awé-Béwógté."

³⁷ Awóg áde ábē bad béwógé pále eche Petro, entagéd bós á mewəmtən-té bwám bwam. Héé bésédteé Petro ne abíníí bembapəe bé nlómag bánken, "A-baányan, chee-ō sətəŋgíné abel?"

³⁸ Petro antimén bós áá, "Nyémód-téé nyétimən Dyöb, nyéte de alongé dé mbéb bonj nyékud edusen á dín áde Yesu Krístəá, ábel nən Dyöb álagsən nyé mbéb Dyöb débē-é nyé echə nde, Edáádəŋ éche Esáá.

³⁹ Nyébíí nən bán chōm eche Dyöb áhóbé áá mósəbe nyé édíí áyāl echən ne áben bán ébē-é ké áyāl e bad ábe bédé nchabnede. Edé ne moosyāāl awé Sánjgwéé áde de Dyöb, áchénlé ábē ne mós."

⁴⁰ Petro anléb bós, aláá-é bós mekan mémpəe híin. Ansím bós etúu áte ahób áá, "Mod-téé ásonj áde alongé, ésebé nē, né Dyöb dékəgsən nyé melemlem ngáne ákəgsənnē enən nyonjel e ebébté."

⁴¹ Bad híin béndübē dyam áde Petro ánhöbpé bédusén-ne bós. Mmē mbwə mesonjé mé bad níme mémbad ámín e bad ábe béndübē, mébédé dyam e'kálé é'láán.

⁴² Bēmbanē nlém áyáge mekan níme bembapəe bé nlómag béyágté'áá bós, bēbē-é nlatén ne bad ábe bédübpé Krístəá. Bósəbō békánnē', bédyag-kə ndyééd hōm ahóg.

Nlatén ní bad ábe bédübpé

⁴³ Bembapəe bé nlómag bēbélé'áá menyáké, bélümtē-é e'chemléd híin. Kénzéé awé annyín antágé nsəl áte.

⁴⁴ Bad bésyāāl ábe béndübē Yesue bēmbē békəene' nlatén á'sō. Chōm-té-é éche mod ánwōŋgē ébédé é moosyāāl.

⁴⁵ Bésómáá-áá bwēm, békāb ne mod-té ngáne ántōgnənnē.

⁴⁶ Béyógkē'áá aladen hōm ahóg epun-té á Ndáb-e-Dyöb ákáne. Bédyágé'áá ndyééd hōm ahóg áwāb mendáb ne nlém nhóg ne menyinje mésyāāl.

⁴⁷ Békéné'áá Dyöb, bad bésyāāl bēwóón-ne bós nlém ní bwám. Epun-té-é Dyöb ábádáá bad ábe békúdé e'soosonj ámín e mesonjé mé bad ábe bédübpé.

3

Petro achōŋtə mod awé awéde epəd

¹ Mbwə nhóg Petro bós Jōn békágé'áá á Ndáb-e-Dyöb. Nən ábédé á ngəŋ é'láán é müte, pónéd echə bad béyógkē'áá aké á mekáne.

² Mod nhóg mós-é ambé á mmwə mé eyáde é Ndáb-e-Dyöb. Béchágé'áá níme mmwə bán, Mmwə níme Mbóó. Ane mod anwé epəd se áde béchyáá mós. Epun-té bépémé'áá mós, bēbānē mós á mmwə hē, áchōmē mənē wəe bad ábe békágé'áá á Ndáb-e-Dyöb.

³ Anyín áde ányíné Petro bós Jōn bésóle' á Ndáb-e-Dyöb-te, anchóm bós nde.

⁴ Dsō bənənēé mós chósōŋ, bonj Petro áhōbē áá, "Nənē' sé!"

⁵ Héé ane mod ánóné bós ne mewəmtən nən áá mósókúd chōm áwāb.

⁶ Dsō Petro áhōbēé áá, "Meewóó' é mənē ké nhóg bonj chōm éche níwō chós mébéé wə. Á dín áde Yesu Krístəá a Nazaret, hidé ášə, ékag!"

⁷ Dsō Petro áchəŋgé ane mod ekáá émbáá, bonj áwōŋgān mós átyéem ámín. Abwəg-ábwəg mekuu ne mekóge níme ane mod ménwədned.

⁸ Anhéb, atyéem ámín, ábootéd-té aké. Ansíl á Ndáb-e-Dyöb ne Petro bós Jōn, ákag, áhebé' ámín, ábagé-é Dyöb mekenag.

⁹ Bad bésyāāl ábe bēbédé áhed bényín néé ákagké ákəmtē-é Dyöb.

¹⁰ Bēnchem mós bán mós abédé mod awé adyēé'áá á Mmwə níme Mbóó ní Ndáb-e-Dyöb áchōmē bwēm. Yəl enkóm bós áte, bēbē-é menyáké ne dyam áde ábénlédé ne mós.

Pále eche Petro áhóbé á Ndáb-e-Dyöb

¹¹ Yəl enkóm bad bésyāāl áte ábe bēmbē á Ndáb-e-Dyöb. Né-ós bēnnyagéd békə bétán Petro bós Jōn á abebpé á Ndáb-e-Dyöb áde béchágé'áá bán Abebpé áde Solomonə. Ene pónéd ane mod awé Petro bós Jōn bēnchoódté, ambé áhídé bós.

¹² Ade Petro anyiné ábê bad, anláá bó aá, “A-bánned bé Israel, cheé ékásá boŋ nén ákámte’ nyé yál áte? Chán-nō nyénāné sé nē? Nyēwēmtan nén bán éched ngine chēn, ké’ é asánj ádē sésáá á’só é’ Dyōb dōo ákásá boŋ sébel anén mod ábootéd akē-ye?”

¹³ Dyōb áde Abrahamē, Aisigē ne Jakōbe bēbenléé, nédē Dyōb áde ábēd betaa, álúmté ehúme éche awe mbālede Yesue. Nyēmbē mō á mekáá mé benkamlēne, nyēbāŋ-’é mō áyāl á’só wēe Paylede. Ké áde Paylede ánwēmtēnnē mō atēde, nyēmbē nyēbāŋ mō áyāl.

¹⁴ Abédé mod awē asáá, abē-’é ane awē abele mekan nīme métāŋgéné, boŋ nyēmbāŋ mō áyāl. Nyētīm nyécháá’ Paylede bán áchenned nyé mod awē awúe’ bad.

¹⁵ Né-ōō nyēnkāŋ bēwúú mod awē apiinad bad alonjé á mbāle, boŋ Dyōb dēmpuúid mō. Sēbēn sēnyīnnē nūmē mekan dīd.

¹⁶ Anén mod awē nyényīnéé nén, awē nyēbīi-’é bwām, ngine echē dīn áde Yesue áwóó ne adúbe áde áwóó ne adúbe áde áwánlé áyāle ádē dīn, dōo ábágé anén mod awē anwē eped ngine, ádíid-te mō bwām. Nyé bēn nyényīné-’é.

¹⁷ “Bōob-pōō, a-baányan mbīi nén mēé, kéchéé éche nyāābe áben belyāged nyēmbenlé Yesue, nyēmbēl chō áyāle nyēnkēmbīi’ é chōm éche nyēbēléé.

¹⁸ Kénéé ébēnlédé-’áá nē, Dyōb dēn dōo álónté ábē e’yale se’ bōōd áde ánlāá’ é bekal bé’daáđāŋ bēsýāā áá bēhōb bán Ane-awē-Bēwōgté ákūd metake.

¹⁹ Né-ōō, nyétede áden abē dé mbēb, nyētīmen Dyōb ábel boŋ ábōded nyé mbēb.

²⁰ Nzé nyēbēlé nē, né pōndé épē echē Sāngwēé áhōódté nyé nlēm. Ene pōndé-’áá álōmēē nyé Ane-awē-Bēwōgté, nédē Yesue, awē ápwédte nyé.

²¹ Yesue atāŋgéné asēbe dé adýēe adýōb kāsāŋ pōndé épē echē Dyōb déhāŋlénne mekan mēsýāā boŋ métim ekāsólé. Nén dōo Dyōb dēmbenlé se’ bōōd áá bekal bé’daáđāŋ ábe bēsáá bēláa bad.

²² Mosēe mwēn anhōb áá, ‘Sāngwēé awē adé áden Dyōb ápwedé nyé nkal é’daáđāŋ áfīnté e ábēn bad melelem nēe mē. Nyēbēl chōm ésyāā éche álāngé nyé áá nyēbēl.

²³ Kénzēé awē eewōgne ane nkal é’daáđāŋ, Dyōb déhūd mō áfīnté e bad bé Dyōb ábōdéd-te mō.’

²⁴ Bekal bé’daáđāŋ ábīnīí ámpē bootya Samwēle ne ábe bēmpē ámbīd echē, bó moosýāā bēnwāle nlébtéd, bēhōb-pe mekan nīme mēbenléd nīmēn mesú.

²⁵ Dyam áde Dyōb dénhābpē mbwiined ne bekal bé’daáđāŋ ábēdéé áyāl echēn, nyēmpē nyēwóó-’é akab áyāle melē nīme Dyōb démmwēe ne áben betaa. Dyōb dénlāā Abrahamē áá, ‘Mēnaméd moonyoŋ asýāā á nkōŋsé mbwiined ne nīmōŋ nchýáátén.’

²⁶ Né-ōō, Dyōb dēmpwéd awē mbālede. Ade ápwédé mō, áwēn dōo ánsēbēē mō álóm ánamed nyé ábel áde ábenlé boŋ nyétedé nīmēn mbeltéd mé mbēb.”

4

Kóte ekáádté Petro bó Jōn

¹ Petro bó Jōn bēdīi békánlé’áá bad mekan, dōo nguse é beprise ne mod ambáá a plūse a Ndáb-e-Dyōb, ne nguse e Besadusia bēpédé wēe bēmbēē.

² Bēnlīŋ áyāle ábē bembapee bé nlōmag bēbe bēyōgté’áá bad bán Yesue apuúidé, éche élúmtē nén bán bad ábe bēwédé bēbē á alonjé ámpē.

³ Bēnkōb Petro bó Jōne bēhé bó á mbwōg. Ngāne bīn bēmmadté ahīn, bēmbē áhed kāsāŋ ne mbwēmbwē.

⁴ Kénéé bēnkōbpē Petro bó Jōne, ndun e mod eche enwōg mam nīme békánlé’áá bó, endúbe. Mesonjé mé bad ábe bédúbpē ménchāgē mēpē dyam e’kálé é’ bad é’taan.

⁵ Nēe bīn é’sānggé, benkamlēne bé Israel, bad bēmbáá bé dyad ne bemelēede bé mbéndé bēnladén áte á Jerusalem.

⁶ Anase awē abédé prise ambáambáa ambé áhed, ne Kaifase, Jōne, Alesandaa ne bad bēmpēe ábe bédé á túmbé echē Prīse Ambáambáa.

⁷ Bēntīi Petro bó Jōne áwab e’só-te, boŋ bēsēdté bó bánken “Chán nyémwédé anén mod awē anwē eped bwām adid? Ngine ne dīn áde nzéé nyēbēnlédé?”

⁸ Hée Edááđāŋ éche Esáá épīdíde Petro, élón-ne mō áte. Dōo áhōbēé áá, “A-benkamlēne ne bad bēmbáá bé dyad,

⁹ nyēchāgé sé hén chíi ákáad sé áyāle mboŋ nīme sébēnlé anén mod awē anwē eped ne ngāne ámwédé bwām adýēe.

¹⁰ Nyé bad bé Israel nyēbīi-ōō nén bán anén mod awē atýéémé nyé á’só-te adýēé bwām á ngīne e dīn áde Yesu Krīstāe, mod a Nazaret. Nyēmbomé mō á awōg boŋ Dyōb dēmpuúid mō.

¹¹ Mō adé ane awē étēnlédé á kálag e Dyōb áyāl echē nén bán, ‘Aláá áde belōŋ bé ndáb bēnchenéé dōo áfīmé aláá dé etōgnén.’

12 “E’soosoj béesaá ne mod ampée éetóméé Yesue, áyale dín démpée déesaá á nkòrsé-te wén áde Dyòb ábágé moonoyoj áde átàngéné syánè asoj.”

13 Βοῶb-πῶs, yǎl enkóm bad bé kóte áte ányín nén bán Petro bós Jone béhóbé ésebán mbwóg ké nhóg rídé bós áte. Bénsontēn-ne nén bán bédii bad bé ngèn ábe béeyággké kálag embáá. Dóo béchéme nén bán bóo bébágé’áá póndé ésyāal ne Yesue.

14 Bonj ngáne bényinnè née mod awè Petro bós Jone bènchoódté átyéémé áhed ne bós, dyam dénkembongé bós ahób.

15 Né-ῶs, bēnlāá bós bán bēbíd á ndáb e kóte. Bēbídé-’áá bós, bēn ne bēn bēbootéd akal, 16 bēsēdté bánken. “Chán dēbēnlé ábén bad? Moosyāal á Jerusalem abii áá bóo bēbélé enén ndale e menyáké. Deéhālēē-se dehób bán bēbēléé.

17 Bonj detàngéné ábén bad etúu asím áte nén bán bēsóg bad akale tǎngene Yesue, ábel bonj nímén nkalanj méekanlád se nkag á’sō.”

18 Dóo béchénlé bós ámbíd ámpē bonj bēsímē bós etúu áte bán bēhedéé awóg ámpē mbéd néé béhóbéé ké’ε bēyágtéé á dín áde Yesue.

19 Bonj Petro bós Jon bēntimtén bós bán, “Nyé bēn nyéhób chóm-ée étàngéné á’sō é’ Dyòb. Awógen nyé káa áwógen Dyòb?

20 Áyale sé pen sééhālēē-se sédīb nsəl bán séekanlé mam níme sé bēn sényínné díd séwógén-ne etúu.”

21 Bad bé kóte bēnlyǎg bēsím bós etúu áte ngíne ngíne. Ámbíd enē bēnchené bós, áyale bēnkényinné nzii eché béhele békógsén bós áyale bad bēsýāal békémté’áá Dyòb tǎngene dyam áde ábēnléde.

22 Mod awè menyáké mēmbēnlédté áyāl bonj ádyēē bwám antóm móom mé mwē méniiin.

Bad ábe bédúbpé békánne bán

Dyòb ábe bós e’wéd bé nlém

23 Áde bad bé kóte bētédte Petro bós Jone, bēnkē echoj é bad bé Krísto atán, bēláá bós mam níme bepríse bēmbáá ne bad bēmbáá bé kóte bēlángé bós.

24 Áde ábē bad bé Krísto bēwógé nē, bēnlád nsəl ákáne. Bēnlāá Dyòb bán, “Titée, wε awè ehagé nkoj ní mín ne ní sé, edíb é nkwxé ne bwém é’syāal ábe é’dé bós áte,

25 wenlóm Edáádəj éche Esáá wée echəd sánj ambáá Dabide, awóŋ mbələde wεé ébəl áhób ábén e’yale nén áá,

‘Cheé ékás bonj bad ábe béesē bad bé Israel bēlie’ bwámbwam?

Cheé ékás-’ε bonj bad bēbélé e’haké ngèn?

26 Kǎŋ é nkòrsé élade yǎl, benkamlene-’ε ámpé békóbe mbom

átàngen Sánj Dyòbe ne Ane-awè-Áwógté.’

27 Ebēnléde nē dēn. Hεrəde bós Pontus Paylede bēnkób mbom á dyad-té hén ne bad ábe béesē bad bé Israel ne belyáged bé bad bé Israel. Bēmbel nē áhage Yesue awóŋ mbələde awè Asáá awè Ewógté.

28 Bēnkób mbom ábel mam níme mmóŋ wēmmdaté atii ne echoj ngíne á’sō é’ póndé mébēnléd.

29 A-Sánj, βοῶb-πῶs, mmōn énon akím áde békíméé, ébe sé ábòŋ bembələde nlém ákal échòŋ eyale ésebán séwóge mbwóg.

30 Lúmdé echoj ngíne édíde bad bwám. Ebel-le séhəl e’chemléd ne menyáké ábel á dín áde Yesue, awóŋ mbələde awè asáá.”

31 Bémáá-’áá akáne, hóm áde bēnladénné áte ánaŋned. Bós moosyāal bēnlōn ne Edáádəj éche Esáá bébootéd-te eyale é Dyòb akal ésebán mbwóg rídé bós áte.

Bad ábe bédúbpé bēbele mekan née mod nhóg

32 Bad bēsýāal ábe bédúbpé bēnwōŋ nlém nhóg ne mewēmten mehóg. Modmod eehóbé’áá áá móo mówōō échén ké’ε échínii bonj bwém é’syāal bēmbē bós ntéd.

33 Bembapeε bé nlómag bēmbē békale’ ne ngíne esyāal nén bán bédé mbóŋ nén bán Dyòb ápuúdté Sánjú Yesue. Dyòb-pe démbād bós nsímé ábe ámín e nsímé.

34 Modmod eetóge’áá chóm áfinté echáb. Póndé ne póndé té bad ábē bēnwōŋ e’túu ké’ε ndáb bēsómé’áá chós, bépēēn nímé moné,

35 bēbē bembapeε bé nlómag, bós-’ε bétédé’áá békáb ne mod-téé ngáne ántògnēnē.

36 Nē dóo Josεbe, mod á túmbé e Levi awè béchyáá á alonj á Sayprus ámbēnlé. Bembapeε bé nlómag bēchágé’áá mó bán Banabase, (néde mod awè awéde bad nlém á abum.)

37 Ansóm etúu, atéd nímé moné, ábe wée bembapeε bé nlómag.

¹ Mod nhóg abédé bán Ananiase, mwaád-te bán Safiraa. Bómpē bénsōm donje á bwēm ádáb.

² Bonj ankoó donje á mōné ámbíd, mwaád-te ámpē ambíi. Ananiase ampeén mōné níme mēnylóg ásē wée bembapeε bé nlómag.

³ Hée Petro álanǵeé mó nén aá, “A-Ananias, cheé ékás bonj ehé Satane etál wée asol we á nlém-té. Bōb-pōs, abelé we ekánlé Edaádəŋ éche Esáá metóm akoo áde ékóngé epeé é mōné níme ésomné bwēm.

⁴ Edēhōb wē másōme’ etúú ébédée échon, áde émáá-’e chó asóm ámpē, mōné nímed mbédée nímōŋ. Cheé ékás bonj etíí áwōŋ nlém-té wée mōbel enén ndín e akan? Saké moonyon ekánlé metóm bonj Dyōb dōo ékánlé metóm!”

⁵ Awóg áde Ananiase áwógé nén, anhún ásē, awé-’ε. Mbwóg ní ngíne ménkōb bad bésyāal ábe bēnwōg ádén dyam.

⁶ Kódébad émpē áhed, bétéd mó ndim, békanj mó béke bélíme.

⁷ Dyam háwa élaán ámbíd enē, Ananiase mwaád ampē, enkémbíi’ε pen dyam áde ábnléde.

⁸ Petro ansedéd mó aá, “Láa me, mōné rísyāal mén níme nyékúde áyāl e etúú éche nyé awonj nchóm nyénsōmmē-yε?” Safiraa ankwentén mó aá, “Eε, rísyāal mē.”

⁹ Dōo Petro álanǵeé mó aá, “Cheé ékás bonj nyékagé’ Edaádəŋ éche Sǵngwée? Nōnē’, bad ábe bélímmé awonj nchóm bōs bédé á mmwe nínií, bétéd-te wémpē ndim hē bōob.”

¹⁰ Abwōg-ábwōg ane mmwaád anhún ásē á’sō-te wée Petro, awé-’ε. Eché kódébad énsōl á ndáb-te bényín bán amaá awé. Dōo bébídné mó ndim á ebwōg béke bélíme á nkag ní sonj wée nchóm.

¹¹ Mbwóg ní ngíne ménkōb mwembé rísyāal ne bad bésyāal ábe bēnwōg ádén dyam.

Bad bé nlómag bébéle menyáké hīn

¹² Bembapeε bé nlómag bébéle’áá e’chemléd ne menyáké hīn áfinté e bad. Bad ábe bédúbpé-’ε béyóǵké’áá abom néε mod nhóg á Abepé á Solomonε á Ndáb-e-Dyōb.

¹³ Kénée bad béchágé’áá bó dín á bwām, bédíi bébáá’áá bó alaten.

¹⁴ Bonj kéné, ekud é bebaád ne baachóm ábe bédúbpé Sǵngú Yesue, bésólé’áá áwāb nlatén, mesonǵé mé bad ábe bédúbpé ríhǵǵke’.

¹⁵ Mekan níme bembapeε bé nlómag bébéle’áá ménkǵŋ bad bépēmē bad bé nkole bébanné’ bó á nkag ní nzii á menōŋ ne á e’búm mín. Bébéle’áá nē ne mewémten nén bán, nzé Petro atóme’ ké tómén échē edaádəŋ ehūn bó á yāl bédyēε bwām.

¹⁶ Ekud é bad émbíd kǵǵŋne á myad níme médé benben ne dyad á Jerusalem. Bēnwālē ábāb bad bé nkole áyāl ne bad ábe e’dáádəŋ bé mbéb é’táǵté’áá. Bembapeε bé nlómag bēndíd moosyāal bwām.

Béhédé bembapeε bé nlómag á mbwōg

¹⁷ Ene pónde-’sǵ prise ambáámháa ne échē echon é bad nédē, bad bé epepe é Besadusia bémbē kǵŋji bwāmbwam ne bembapeε bé nlómag.

¹⁸ Bénkōb bembapeε bé nlómag, béhé bó á ndáb e mbwōg níme rídé á dyad tē.

¹⁹ Bonj níme nkūu, ángel e Sǵngú enhyé ekob é mbwōg adibe ebídéd-te bó. Enláá bó aá,

²⁰ “Nyékag á ndáb e Dyōb, nyélanǵe’ bad mam mésyāal tǵŋǵene ádén alongé dékǵǵlē.”

²¹ Bembapeε bé nlómag bēnwōǵen ene ángel. Bín é’sǵŋǵé-’áá, béke bésól á Ndáb-e-Dyōb, bébootéd bad ayóǵed.

Ene pónde-’áá prise ambáámháa ne échē echon é bad, bēnchēlé mbom ní mbwōg níme ménlād belyǵed bé Israel bésyāal. A mbom hē dōo belómé nlébtéd á mbwōg nén bán bēpeen bembapeε bé nlómag áwāb.

²² Bonj áde sǵnze epédé á ndáb e mbwōg, bēnkéntánné bembapeε bé nlómag áwēd-te. Né-sǵ bēntím ámbíd, béke beláá ábē bad á mbom bán,

²³ “Sépedé á ndáb e mbwōg, sétáné ngáne bépéné chó hōm ásyāal. Bad ábe bēnōne’ mbwōg-ke bó moosyāal bédé wée mod-té ánoñeé mmwe mé e’kē. Bonj ádē sédíbpé ekob, séetánéé mod ké nhóg áwēd-te.”

²⁴ Ade mod ambáá a plūse é ndáb e Dyōb ne beprise bémbáá bēwógé nē, bényǵ, bánken “Chán nén ádíi?”

²⁵ Hē dōo mod nhóg ápédé áhed bonj álanǵē bó aá, “Nyéíi nén bán bad ábe nyénhēé á mbwōg, bédé á Ndáb-e-Dyōb béyǵte’ bad.”

²⁶ Dōo mod ambáá a plūse é Ndáb-e-Dyōb ábíde ne ábē bad, bonj béke békōbē’ bembapeε bé nlómag, bēpeené’ bó. Bonj pen bēnkénkóbénné bó ewanǵe áyāle bébáá’áá bán bad ábe bēmbē áhed bēlūm bó meláá.

²⁷ Bénsǵlēn bó á ndáb-te, bétíi bó á’sō é’ mbwōg. Hē dōo prise ambáámháa ábóótédé bó akáad, álanǵe bó nén aá,

²⁸ “Sênsím nyé etúu áte nén bán nyéekéne’ ayáge áde anén mod á’sò ámpē. Βααβ-ρῶς, Nyénane’ chóm-és nyébelé. Nyébelé moosyáál á Jerusalem awógé adén ayáge. Nyéhede-ε kwééd echê abán áwed nló.”

²⁹ Hée Petro ne ábíní bembapeε bé nlómag bétimanné bó bán “Dyòb dáo sétàngéné awógen, saké baányon.

³⁰ Ade nyémáá Yesue abome á awog, nyewúú-’ε mós, Dyòb áde ábēd betaa, dēmpuúđ mós.

³¹ Dyòb dénchāgēđ mós, ábānē-’ε mós á ekáá é mbáá nées Nlyáged ne Nsoode. Ambēl nē ábel bonj álúmed bad bé Israel nzii eche béchenéé ádab abé dé mbéb bonj Dyòb álagsén bó.

³² Sébēn sēnyinné nímén mekan did. Edáádān eche Esáá chómpē ébide’ mbónj. Chó-’áá édé nde echē Dyòb ábāgēé bad ábe béwógne mós.”

Elébé eche Gamaliel

³³ Ade mbwóg eche endyεé ásē éwógé nē, bēnliŋ bwāmbwam káān béhede-’ε bán béwúu bembapeε bé nlómag.

³⁴ Bonj mod a mbwóg nhóg áftnté echāb, awē béchāgē’áá bán Gamaliel antyéém ámin. Anén mod abédée Farisia, abé-’ε meléede a mbéndé awē bad bésyāāl bebāgē’áá edúbé bwāmbwam. Anhób áá bésébe bébiden ábē bembapeε bé nlómag á ebwóg.

³⁵ Dáo álāngēé bad bé mbwóg áá, “A-baányan bé Israel, nyétéd pónđé ne chóm-és nyéhedeé abén bad abel.

³⁶ Eechābēé áte áde mod awē béchāgē’áá bán Tiodase ábídáá dúu, ákumé’ ekáá á tál áá mósde mod. Bad ábe bēnhíd mós ámbíd bebédé dyam mbwókel éniin. Bonj káān ne á asóg bēnwúú mós, ábē bad-te bépāntéd áte, échē epepé chó-’ε ébós.

³⁷ Ámbíd e pónđé, mod awe béchāgē’áá bán Judase mod a Galilia mómpē ámbíd á pónđé e tōngé. Ambēl ndun e mod enhíd mómpē bonj káānne á asóg bēnwúú mós, ábē bad-te bépāntéd áte.

³⁸ Βααβ-ρῶς, áyale adén dyam, nlānge nyé nén mēé nyétede abén bad békag, nyéebēlē bó dyam. Ayāle nzé édé nén bán nímén ntíi ké’ε adén dyam áhúú ne moonyon, né dēn dékwē.

³⁹ Bonj nzé édé bán áhúú ne Dyòb, né nyéehenlé bó dyam abel, né káānne á asóg nyéenyín bán Dyòb dáo nyétānganné.”

Bad bé mbwóg bēnkōb elébé eche Gamaliel

⁴⁰ Hée béchēnlé bembapeε bé nlómag bán bésōl á ndáb. Bēnkūdē bó, bésím-mε bó etúu áte bán béehedeé awóg ámpē nées bétúbéé đin áde Yesue. Dáo bétédte bó bán békag.

⁴¹ Bembapeε bé nlómag bēnysáá á’sò é’ mbwóg. Bēmbē menyinge ányín nén Dyòb ányíné áá békwoǵnédé ákud akwáké á đin áde Yesue.

⁴² Epun ne epun-té békāgē’áá á ndáb e Dyòb ne á ndáb é bad, bēyāgtē bad, békale-ε nkalanj nime Yesue, Ane-awē-Béwógtē.

6

Mwembé mēpwéde bad saámbé áwóngen

¹ Βααβ-ρῶς, ngáne mesongé mé bad ábe bédúbpe méchāgkē’áá acháge ne acháge, nswāntēn mēmbíd áftnté e bad bé Israel ábe bēhóbé’áá ehób é Grikia ne ábe bēhóbé’áá ehób é dyad. Bad ábe bēhóbé’áá ehób é Grikia bēhóbé’áá bán ábāb bekúd bēekudéé akab á mōné áde békābpáá bekúd epun-téé.

² Hée bembapeε bé nlómag dyóm ne bébe bēladeé bad ábe bédúbpe bésyāāl áte bonj bēlāngē bó bán, “Eeboo’é nén bán sétēde akal dé eyale é Dyòb ábel bonj séhíde nkabteđ ní mōné ámbíd.

³ Né-ós, a-baányan nyépwed bad saámbé áftnté echēn, ábe bēwóó edúbé, ábe Edáádān eche Esáá élyāgtēé, bēhii-’ε akan, ábel nén sébane nímén ntíi áwab mekáá.

⁴ Ene pónđé sēlbé echad yāl esyāál ákáne ne ákal nkalanj ní bwám.”

⁵ Moosyáál anwóg menyinge ne dyam áde bembapeε bé nlómag bēnhōbpē. Né-ós, bēmpwēđ Stefanuse. Abédēε mod awē andúbé bwāmbwam. Edáádān eche Esáá-’ε élyāgtē mós. Bēmpwēđ káānne Filibe, Prokoroε, Nikanós, Timōne, Pamenase ne Nikolause. Nikolause abédēε mod awē ámbíd á dyad á Antyóg, eebédeé mod a Israel bonj antimén adúbe á bad bé Israel.

⁶ Bēmpēén abén bad á’sò wée bembapeε bé nlómag. Bembapeε bé nlómag bēnkānnēđ bó bēbán-ne bó mekáá á nló.

⁷ Né-ós, eyale e Dyòb émbē ékanlád mbwóg áte esyāál ékág á’sò. Mesongé mé bad ábe bēndúbé á Jerusalem méchāgkē’áá acháge ne acháge. Ekud é beprise chómpē émbóotéd nkalanj ní bwám ahíd.

Bekóbe Stefanuse

⁸ Βααβ-ρῶς Stefanuse abédé-εé mod awē áde alongé álúmté’áá nsimé ní Dyòb bwāmbwam. Awóŋ ngíne ábel ndale é mekan é menyáké áftnté e bad.

⁹ Boŋ baahóg bêmbootéd mó apentén. Abê bad bébédé bad ábe bémbíd á echoŋ é bad éche émméntén aké á ndáb e mekáne eche béchágé'áá bán ndáb e mekáne e betán ábe békémbé betán ámpē. Abê bad bébédé bad bé Israel ábe bémbíd á myad mé Sirinē ne Alexandria. Bóobē bad bé Israel bémpēe ábe bémbíd á mbwóg e Silisia ne e Esia, bêmbootéd aswanŋen ne Stefanuse.

¹⁰ Boŋ Edáádāŋ éche Esáá émbē mó nyaa e debyéé eche nzé anhób dyam, béehēle'áá dó apele.

¹¹ Né-óó bénsəl baahóg áte bán béhób nén bán “Séwógé néé Stefanuse ásyáé'é Mosee, ásyā-é Dyób.”

¹² Né-áá bêmbeulé boŋ békón bad bé dyad, békón bad bémbáá bé dyad ne bemeléde bé mbéndé. Héé békóbé Stefanuse boŋ békéené mó á'só é' bad bé mbwóg.

¹³ Hé-áá bépééné bad ábíd mó mbón é metóm. Abê bad bénhób nén bán, “Anén mod ahóbe' mekan mé mbēb pónde ésyāal tŋŋene Ndáb-e-Dyób échē esáá ne tŋŋene mbéndé eche Dyób ábágé syānē.

¹⁴ Séwógé néé áhóbéé áá ane Yesue, mod a Nazaret, ápāŋ Ndáb-e-Dyób áhŋŋlén-ne e'lem ábe Mosee ályógnédé syānē.”

¹⁵ Bad bésyāal ábē bébédé á ndáb e mbom bénsüm mīd wéé Stefanuse. Bényŋŋn néé e'só é'peneé mó néé e'só é' ángel.

7

Stefanuse abēnlédé myanŋó m bad bé Israel ákáá

¹ Priše ambaámbáa ansédéd Stefanuse ááken, “Mmén mekan mésyāal níme ábén bad béhóbé wē áyāl, méde mbále-ye?”

² Dóó Stefanuse ábóótédé bad bé káánsel póle akale. Anhób áá, “A-baányan ne besáá ábēm, nyélám metúu. Dyób dé ehúmé dēmpíí eched sán Abrahamē áde ábédé á mbwóg e Mesopotemia, adéhób áá mókag adyēe á dyad á Haran.

³ Dyób dénlāá mó áá ‘Tédé echoŋ túmbé, étēde-é ádōŋ aloŋ ékag á ndoob eche mélūmédte wē.’

⁴ Né-óó, Abrahamē antédé ndoob e Kaldeya áhye ádyē á dyad á Haran. Ámbíd e kwééd eche Abrahamē sáá, Dyób dēmbēl Abrahamē áke ádyē á ndoob eche nyédíí áhed nén bōob.

⁵ Ene pónde Dyób dénkēmbáá Abrahamē ké abēn á ndoob eche ándāāsēnnē mó. Boŋ pen Dyób dēnhób nén áá ene ndoob ésuunéd bō níme mbyaa. Pónde eche Dyób dénlāá-é Abrahamē nē, eenkēnwáléé mwān ké nhóg.

⁶ Dyób dénlāá mó nén áá, ‘Mmōŋ mbyaa mébē beken á aloŋ á bad bémpēe. Áwed-taá bébē betán, békūd-te metuné etūn é pónde éche éde dyam mbwókél é mwē éniin.

⁷ Boŋ mēkōgsēn áde aloŋ á bad áde bébenléé néé betán. Ámbíd enē, nímmōŋ mbyaa mébíd á aloŋ-tē wē, bétīm áyāl e ádén abwóg á hōm, békānnē á dīn ádēm áhed.’

⁸ Héé Dyób ábélé boŋ Abrahamē ápē á nchemtēn ne mó tŋŋene ngáne béyagē bad, nēŋgáne e'chemléd bé melē níme Dyób ámwédé ne ábē bad. Né-óó, Abrahamē an'yág awe mwān Aisigē ámbíd e e'pun saámbe áde béchyáá mó. Aisigē mó-é an'yág awe mwān Jakóbe, Jakóbe mó-é áyág ábe bán dyóm ne bébe ábe bédé ábēd betaa.

⁹ “Ábē betaa bēnwōōn mwānyan nhóg, Josebe kónjí á nlém-tē. Né-óó, bénsóm mó nēŋgáne ntāŋ. Bad ábe bénsōmmé mó áwāb, bēnkēn mó á aloŋ á Egipto. Boŋ Dyób démbē mó ámbíd,

¹⁰ ábēl-le atóm metake mésyāal áte. Dyób démbēl Farao kāŋ e Egipto anwógén Josebe menyŋŋe ábē-é Josebe debyéé, áde ápédé áwe á'sō. Nén dēmbēl Farao ambē Josebe atii á ngōmenaa ámin e aloŋ ne ámin e ábē bwēm é'syāal.

¹¹ Ámbíd enē, nzaa e ngine empē á aloŋ á Egipto ne á aloŋ á Kanahan. Ene nzaa empeén metake mé ngine, ábēd betaa bēnkēnwōŋ-áá ndyééd eche bēdyágke.

¹² Né-óó, áde Jakóbe áwógé bán ndyééd éde á Egipto, anlóm ábe bán áwed. Nédé ábēd betaa. Nē dōó ábédé bō ngen e'só áke áwed.

¹³ Ade bán ábe Jakóbe békíí á Egipto ngen éche élónténé ébe, Josebe ampalé yāl áte wēe baányan. Hē dōó Farao ásonjténé tŋŋene túmbé échē Josebe.

¹⁴ Né-óó, Josebe anlyágtén baányan áá béléá sáá Jakóbe, áhyag ne eche túmbé esyāal á Egipto. Bō moosyāal bébédé móom mé mod saámbe ne bétáan.

¹⁵ Dóó Jakóbe bō moosyāal békíí á Egipto. Áwed-taá mó ne ábe bán, betaa ábe syānē bēndyēé'é káŋ bēwé-é.

¹⁶ Ámbíd e nē, bēntéd bō ndim bēsūēn ámbíd á dyad á Shekem, bēlímé mó áwed á ndoob échē Abrahamē áchanénné mōné wēe bán bé túmbé e Hamō.

17 “Ade pónđé ékwógé ape eché Dyöb dëlönědtě dyam áde anlāā'é Abrahamē aá mósǒbēl, mesonǵé nıme ábēd bad ábe bēbédé á Egipto mēm̄mād acháge bwāmbwam.

18 Káǵne á asóg, kǵn empée eché enkēmbíi myanǵó nıme Josebe, empé á nkamlēn.

19 Anwón akwáb tǵngene ábēd betaa átagtē-ε bó. Ankǵn bétédé ábab bǵn á ebwóg, ábel bonj bēwē.

20 Mmē mesú dǵo bēchyáá Moseε. Abédēε mwǵn awē ambōn bwāmbwam. Bēntǵgén mǵ á ndáb wēε sáá á etún é nǵon éláán.

21 Ambíd enē dǵo bétédťé mǵ á ebwóg-te. Héε mwǵn a mmwáád awē Farao ádíbté mǵ, átédē mǵ ngáne awē mwǵn, átagné-ε mǵ kǵǵn ákwogé'.

22 Bēn'yǵgēd Moseε debyéé á bad bé Egipto ásyāāl kǵǵn abé ndale e mod á nhǵbtéd ne á mbeltéd.

23 “Ade Moseε ápédé móom mé mwē méniiin, mewēm̄tēn mēm̄pii mǵ áke dényín baányanj bé Israel.

24 Antán ngáne mod a Egipto átagtēε mwǵnyanj nhǵg. Dǵo ákíi áhed átimtēn. Anwǵngén mǵ áwúé-ε ane mod a Egipto.

25 Moseε anwēm̄tēn áá ábē bad bēchem nēn bǵn Dyöb áhede mǵ abenled áhúd bó á mekáá mé bad bé Egipto, bonj bēnkēnyinné nē.

26 Epun éche ébádtén, antán ábē bad bé Israel bēbe bēn ne bēn bēwane'. Anhēd nzii eche áyālēε bó ákóm nsaj. Dǵo álanǵéε bó áá, 'Tesaá mbále bǵn baányanj bóǵ nyédíi-ye? Chán-nǵ nyé mod-té áhedéε waáb alǵgen?'

27 Bonj ane mod awē áhedé'áá waáb alǵgen nē, antínéd Moseε á nkǵg ásedťé mǵ áaaken, 'Nzé-módé abagé kunze áá ékamlan ne ákáád sé?'

28 Ehedé mēm̄pē awúu ngáne éwúu mod a Egipto chǵn-ε?'

29 Awóg áde Moseε áwógé nē, ansǵb ákē á mbwóg e bad bé Midian. Awed-taá ádyéé kǵǵn bonj áchyáá ábe bǵn bé baachóm bēbe.

30 “Ambíd e móom mé mwē méniiin dǵo ángel épíídé Moseε á ehyánge. Empii mǵ a muú-te, nıme démbēn mǵá bwel. Nēn ábédé bēnben ne mbǵod e Sinai.

31 Ade Moseε ányíné ádén akan, menyáké ménkǵb mǵ. Ansídé bēnben áá mǵtǵn anǵn bwám, dǵo áwógé ehǵb éche Sǵngwéé nēn áá,

32 ‘Méε ndé Dyöb áde ábōn betaa, Dyöb áde Abrahamē, Aisige ne Jakǵbe bēbēnlé'áá.’ Ne mbwóg nı ngáne Moseε enkēnchu'ε anǵn áhed.

33 Héε Sǵngwéé álanǵéε mǵ áá ‘Húd metámbé á mekuu áyāle abwóg á hǵm áde étyéémé nēn ádíi hǵm áde ásaá.

34 Nnyíné ngáne ábēm bad ábe bédé á alǵn á Egipto békudeé metake bwāmbwam. Nwógé ngáne bēwennadťé dǵo nhyéde bó awǵngēn. Bǵb-pǵǵ hyǵg, mēlǵm wε á Egipto.'

35 Anén Moseε mǵo bad bé Israel bēmbǵngé á yǵl bonj bēsedťé mǵ bǵnken, 'Nzé-módé abagé wε kunze ákamlan ne ákáád sé?' Mǵ-áá Dyöb dénlǵmmé ákamlan ne ásonj ábē bad. Nēn démbēnléd áde ángel émpii'ε mǵ áde bwel bēnkǵbpē muú.

36 Moseε awed mǵo ambídēn bad bé Israel á Egipto. Ambēl ne e'chemléd áwed ne á Eyake é edíb é nkwē. Ambēl-le menyáké ne e'chemléd áde bēbédé á ehyánge á etún é móom mé mwē méniiin.

37 Anén Moseε mǵo anláá bad bé Israel áá, 'Dyöb dēlǵmē nyé nkal é' dǵǵdǵn awē ábíđ áftinté echēn melemlem nēngáne álómé me.'

38 Melemlem mé Moseε mǵobédé nlatēn ne ábēd bad á ehyánge. Abédé áwed ne ábēd betaa áde ángel eche Dyöb dénlǵmēnné nlébtéd á Mbǵod e Sinai énhǵbpē áwáb. Mmēn nlébtéd nıme Moseε ánkudťé wēε ángel mǵo syáne dédíi déhídéε.

39 “Ábēd betaa bēnkēnwógēnné Moseε, bonj bēmbǵn mǵ á yǵl, bétimé bēwēm̄tǵn átim ámbíd á Egipto.

40 Ade Moseε ályǵgé adé á mbǵod e Sinai dǵo bad bé Israel bēlanǵéε mwǵnyanj Arǵne bǵn, 'Bélé sé bwēm ábe bēbē nēngáne myǵb ábe bēlyǵgēd sé áyāle séebii'é dyam áde ábēnlédé ne Moseε awē ambídé sé á Egipto.'

41 Héε bēbélé chǵm éche éwǵgné mwǵn a nyag bonj bēbootéd e'lém awúu ábe chǵn mende. Bēmbēl kǵǵne ngande, áwóg menyǵnge ne chǵm éche bēbēnlé nımab mekáá.

42 Dǵo Dyöb ákúnnédé bó mbíd bonj áchenné' bó ákǵnned ngume éche édé ámin. Ebēnlédé ngáne éténlédé á kǵlag e bekal bé' dǵǵdǵn nēn bǵn, 'A-bad bé Israel, áde nyēmbēε á ehyánge á etún é móom mé mwē méniiin saké meé nyékwēnlé'áá káa nyétúmmé'áá e'lém ábe mende.

43 Tēndé eché dyöb áde bēchǵgēε bǵn Molek mǵo nyémpēm̄mē. Edíđǵngē-ε éche tintine a dyöb áde bēchǵgēε bǵn Rǵfan chǵs nyéhyǵmnáá. Mmēn myǵb mǵo nyébēnlé mekáá bonj nyébwǵgkē mebǵbǵn. Né-ǵ, mēbēn nyé, nlóm nyé hǵm áde áchǵbnédé tǵmaa alǵn á Babilǵn.' ”

⁴⁴ Stefanuse ambé abád ámpē aá, “Ade ábēd betaa bébédé á ehyánge bēnwōr Ebem é Dyōb échē élūmte nēn bán Dyōb ádé ne bō. Bēnlōj chō nyaa echē Dyōb dénlāá’ é Mosee aá álōj chō. Nsáaned nīme Dyōb délūmēdtē Mosee mōs ánhídtē.

⁴⁵ Ambid e pōndé ábēd betaa bēnkōb ene tēndé á mekáá nīme ábab besáá. Bēnwālē chō áyāl áde bōbē Josua bēkōbné melon ndōob echē Dyōb dénnanéé bō bad áte. Ene tēndé embé ebé áhed kááñne á pōndé eché Dabide.

⁴⁶ Nsimé ní Dyōb ríhídé’ áá Dabide. Né-ōs, anchánj Dyōb aá ábe mó kunze mólōo Dyōb áde Jakōbe ábēnlé’ áá ndáb.

⁴⁷ Boj Solomone, Dabide mwān, mōs antīm Dyōb ene ndáb alóo.

⁴⁸ Boj kénē Dyōb á Ngum éēdyē’ é á ndáb eché baányonj bēlōjnē mekáá. Edé nēn ngáne nkal é’ dáádāñ nhōg ahōbé aá Dyōb áhōbé aá,

⁴⁹ ‘Nkoj nīmīn mōs rídé ádēm atii dé nkamlēn, nkōh’sé-’ é nībē wēē nībannéé mekuu.

Nyaa e ndáb ehéé nyéhēle-se nyélóo me?

Ké’ é héé mékōmmēé áte?

⁵⁰ Mmēn meémaa’ é ábēn bwēm abel-ε?’ ”

⁵¹ Stefanuse ambád ahōb aá, “Nyēdii bad ábe bēwúu nló áte. Nyēlēlé nlém á abum. Nyékólé metúu áyāl é eyale é Dyōb. Nyēdii melemlē nējngáne ábēn betaa, nyētāñgan Edáádāñ éche Esáá.

⁵² Nkal é’ dáádāñ ké nhōg alyagé áse awé enkénkūd metake á mekáá nīme ábēn betaa-ye? Bēnwūu mēsénze mé Dyōb mésyāāl nīme se’ bōód mēmbēl ehāñgé áyāl é epe éche Ane awé abele mekan nīme métāñgéné. Nyé-’ é bōob nyēsómé mō, nyēwúu-’ é mō.

⁵³ Nyé bēn-naá nyékudé mbéndé éche Dyōb álómé mbwiined ne éche ángel boj kénē nyēehídé chō.”

Bélumé Stefanuse meláá

⁵⁴ Ade bad bé mbwóg bēwógé mekan nīme Stefanuse áhōbé, bēnlīj bwāmbwam kááñ yāl ésoǵē bō áte.

⁵⁵ Stefanuse-’ é Edáádāñ éche Esáá énlōn mó áte. Nēē ánóné ámīn ányīnē’ ehúmé é Dyōb, ányīnē’ Yesue ngáne átyéémé Dyōb á ekáá émbáá.

⁵⁶ Dōo áhōbēé aá, “Nyénōne’, nnyīne’ nēē dyōb ánédndé, Mwān-a-Moonyonj átyéémé Dyōb é ekáá émbáá.”

⁵⁷ Héé bad bé mbwóg bēhédé esaád é ngīne békútēn-ne metúu ne mekáá boj bō moosyāāl bēbōnlád mō. ⁵⁸ Bēndol mó bēsýāñéd mó á dyad-tē, bēbootéd mó meláá alúm. Bad ábe bēntyēēm mbōj ákōgsen Stefanuse bēnhūd nīmāb nkob áyāl bēke bēbānē á’sō-te wēē kōdemod póg bán Sōale ánoñe bō. *

⁵⁹ Ade bēlúmeé Stefanuse meláá nē, ankáné aá, “A-Sánjǵú Yesu, mīmōj kōb échēm edáádāñ.”

⁶⁰ Dōo ábwógé mebóbōj boj ákantē ehōb ámīn aá, “A-Sán, lagsén bō nīmén mbéb nīme bēbēléé.” Amaá-aá ahōb nē, awé-’ é.

8

¹ Sōale abédé ásē ákwentēn-ne aá bēwúu Stefanuse.

Metuné mēbélé Ebese epāñtédé áte

Eché epun chēn mwembé mé Jerusalēm mēmbootéd metake mé ngīne akud á mekáá mé bad bé Israel. Bad ábe bédúbpé bēsýāāl bēmpāñtéd áte á mbwóg e Judeya né e Samaria ésyāāl. Boj bembapee bé nlomag bēnpēn-éé bēnlyǵ.

² Nguse é bad ábe bēmbanē nīmāb nlém rýsyāāl ábele Dyōb bēnlīmē Stefanuse. Béchyεε’, bēlébē-’ é mō.

³ Boj Sōale mó-’ é ahēdáá mwembé abóded. Ahúé’ áá enēn ndáb átimé eníníí, ábídtē bō á ebwóg, bebaád ne baachóm, ahág-ke bō á mbwóg.

Filibē akalé nkalaj ní bwām á Samaria

⁴ Bad ábe bédúbpé bēmpāñtéd áte, békag bēkalé nkalaj ní bwām.

⁵ Filibē mó anké á dyad ambáá á mbwóg e Samaria ákanlé bad tāñgene Ane-awé-Béwógté.

⁶ Ade ndun e mod éwógé mam nīme Filibē áhōbēé bényīn-ne e’chemléd bé menyáké ábe ábélé, bēntōj metúu atále áte áwóg dyam áde áhōbēé.

⁷ Filibē ambēl e’ dáádāñ bé mbéb é’ syāñgé’ áá ekud é bad áte ne e’ saád é’ ngīne, ekud é bad-’ é yāl énwēē eped ne ábe bēsýágté’ áá bēndyēé bwām.

⁸ Nēn dēmbēl bad bēsýāāl á dyad-tē wē bēwóg menyīñge bwāmbwam.

* **7:58** Atinté e bad bé Israel émbé nēn bán ábe bēbídé mbōj bán mod abelé awusé bōs bēbágé’ áá bad bé’ sō alúm mō meláá.

⁹ Bɔɔb-pɔɔ, mod nhóg abédé adé dyad áte bán Simɔne, akumé'áá ngaj eche ekómté'áá bad bé Samaria yál áte bwám bwam. Akumé'áá ekáá á tál aá modmod eépedéé mɔ.

¹⁰ Bad bésyā́l á dyad, ndale é bad ne bekwékwé bé bad bēmbané nlém áwē, bēhōbē-ε bán, “Anén mod adii ngumε e Dyōb echē bēchágεé bán, Ngum embáá.”

¹¹ Bēmbané nlém áwē áyāle á etún é pónde ankōŋ bad yál akómed áte ne echē ngaj echē ákúme'áá.

¹² Boŋ áde bédúbpé nkalaj níme Filibe ánkáléé bó tǎŋgene nkalaj ní bwám mé nkamlén ní Dyōb ne tǎŋgene Yesu Krístə, bēnkūd edusen, bebaad ne baachóm.

¹³ Simɔne mwēn ámpé andúbé, ákūd-te edusen. Ambootéd Filibe ahíd kéhéé áde ákagé'áá. Yál enkóm mɔ áte áde ányíné mbeltéd mmé menyáké níme Filibe ábélé'áá.

¹⁴ Bembapεε bé nlomag bēnwōg á Jerusalem bán bad bé Samaria békóbé eyale é Dyōb, hεε bélómé Petro bó Jone áwed.

¹⁵ Ade bépédé áwed bēnkānnéd bad ábe bédúbpé nén bán békud Edáádəŋ éche Esáá.

¹⁶ Bēnkānnéd bó áyāle bēnkēmpaá Edáádəŋ éche Esáá akud. Bēndusen bó dásɔ á dín áde Sǎngú Yesue.

¹⁷ Dɔɔ Petro bó Jone bēbáné bó mekáá á nló bó-ε békudé' Edáádəŋ éche Esáá.

¹⁸ Ade Simɔne ányíné aá nzé bembapεε bé nlomag bēbáné mod ekáá á nló akude' Edáádəŋ éche Esáá, ambídéd mōné ábe Petro bó Jon,

¹⁹ áhōbē aá, “Nyébag mémpé enén ngine ábel boŋ kénzée áwē níbáné ekáá á nló ákud Edáádəŋ éche Esáá.”

²⁰ Petro antimtén mɔ aá, “Nzé ewémténé wéé móhale-se móchānēn nde e Dyōb mōné, nyáabe nímōŋ mōné nyékag á dū-á-muú.

²¹ Weewóó' é akab ké ahóg áyāle e nímed nsón áyāle nímōŋ nlém mééboo' é áte á'só é' Dyōb.

²² Kunnéd-te mbíd étimen Dyōb, áyāle nímén mewémtēn mé mbéb níme éwóó áte, ékáne' wéé Sǎngwéé álagsen we áyāle awémtēn áde ewémténé enén ndin e akan.

²³ Mmaá anyín nén mεé, kán emaa wε akób áte, mbéb-pe níhédé wε á mehangé-te.”

²⁴ Héε Simɔne álǎŋgéé Petro bó Jon aá, “Són, nyékānnéd me wéé Sǎngwéé, ábel boŋ nímén mésyā́l níme nyéhóbé ké ahóg déebenlád ne me.”

²⁵ Ade Petro bó Jon bémáá mam mésyā́l ahób tǎŋgene Yesue, bémād-te nkalaj níme Sǎngwéé akal, bēntim ámbíd á Jerusalem. A nzii á esú békálé'áá nkalaj ní bwám níme Yesue á myad mé mbwóg e Samaria híin.

Filibe bó mod e alon dé Etoopia

²⁶ Mmíní mbwe ángel e Sǎngú enláá Filibe aá, “Ladé yál, ékag á ped e mbəŋ wéé nzii echē ebíde á Jerusalem áke á Gaza étóméé” Bēbenládte enén nzii ámpé.

²⁷ Filibe abōŋséné-'ad ákág-ke. Héε ábomné soŋ e mod á nzii ngáne ásué' é áwē alon. Anén mod abédéé ndale e mod awé akamlánáá, ánoné-'é ngáb eche Kandese, mmwaad awe akamlánáá alon dé Etoopia. Ane mod anké á Jerusalem.

²⁸ A ehúu ámbíd échē, andyéé á ebambam. Ngáne ákagé'áá, aláá'áá kálag echē nkal é'dáádəŋ Yesayaa.

²⁹ Héε Edáádəŋ éche Esáá élangéé Filibe aá, “Kǎg á ebambam hē, ébē chíó benben.”

³⁰ Filibe annyagéd áhed, dɔɔ áwógé ngáne ane mod aláá' é kálag e nkal é'dáádəŋ Yesayaa. Dɔɔ ásedtée mɔ aaken “Esōŋtan chíóm éche éláá-é-ye?” ³¹ Ane mod antimén mɔ aá “Chán mémwéé asōŋtēn áde mod éétānledéé me áte?” Né-ɔɔ, anchéléé Filibe aá áchége á ebambam, bómmó bédyēé áhed.

³² Epéd éche ane mod ákóó'áá alán ébédéé nén,

“Abédéé nēŋgáne nídyoŋ ní mbód níme békagké awúu, ambé-'ε ngáne mwān á nídyoŋ ní mbód awé béseléé nyoŋ boŋ eéchyεε', enkēnhóbpé dyamdyam.

³³ “Bēnsudéd mɔ edúbé, békōbēn-ne mɔ kunze.

Nzé-módé átūb níme nchyáátén dín áde édíf bán bēnhūd mɔ ámin á nkōŋsé.”

³⁴ Ane mod ansédéd Filibe aaken, “Nzé-módé ane nkal é'dáádəŋ áhóbcé, eche yál chēne ké'ε mod ampée?”

³⁵ Héε Filibe álǎŋgéé mɔ nkalaj ní bwám níme Yesue, átānlád mɔ mekan áte, mbooted ne échén epéd.

³⁶ Ade békagké nē, bēmpē hōm áde mendib médíí. Héε ane mod áhóbcé aá, “Mendib mɔó mén. Weédūsānnē me ngen póg-ε?”*

* 8:36 Donje á kálag dé'só ábádé nchoo 37: Filibe anláá mɔ ad, “Nhele nídūsēn we, nzése edúbpé Yesue ne nlém nhóg.” Ane mod ankwentēn ad, “Ndúbpé nén méé Yesu Krístə adii Mwān á Dyōb.”

³⁸ Ane mod anhób aá bétii ebambam. Dóo bó Filibe bésúdé ásé bésól á mendib-te bonj Filibe ádusán mó.

³⁹ Béhídé-'aá á mendib-te bídén, Edáádəŋ é Sánjú ékēēn-ne Filibe. Ane mod eenyíne' aá mó ámpē bonj ambé ákág, alón-ne ne menyinje.

⁴⁰ Filibe annyín yál á dyad á Azotus ábooted-te aké dyad ne dyad té, ákalé' nkaləŋ m' bwám, kóəŋ əpə á dyad á Kaisaria.

9

Səle atimé Yesue adube (Mbel 22.6-16; 26.12-18)

¹ Bəəb-pəə Səle ambé ákíme' áwúu bembapee ábe Sánjwée. Anké wée prise ambáambáa, ² aláá mó aá átel kálag éché ábée belyáged bé ndáb é mekáne é Damaskəs, ábel nén áwəŋ kunze eché nzé anyíne bad ké behéde ábe behíde' nzii é Yesue áwed, áhar bó, ken bebaád-'é ké'ε baachóm, akób bó, ákēēn bó á Jerusalem.

³ Dóo Səle áhídté bonj ákag. Á nzii é Damaskəs wē, áde ádíi bənben ne dyad, emwedmwed émbid ádyəb, épen mó yál esyáál.

⁴ Anhún á ndəəb. Dóo áwógé ehób élanjé mó aá, "Á-Səəl, á-Səəl, cheé ékás bonj étagté me?"

⁵ Səle ansedéd aaken, "Á-Sánj, nzé-módé ne?" Dóo éché ehób étimtanné mó aá, "Me-éé ndé Yesue awé étagtéé.

⁶ Bəəb-pəə, hidé ásé, ékag á dyad-té, áhed dóo bəlāā-'é wε chóm éche étəŋjéné abəl." ⁷ Bad ábe bəəb Səle bənwəŋ bəntyéem, dyam déeboo bó ahób. Bənwəŋ ehób bonj bənkənnýinne mod awé ahóbe'.

⁸ Səle anhidé ásé, ánēdē mīd áte, bonj eenyíne' aá ekíde. Né-əə, bənchəə mó é ekáá, békēēn mó á dyad-té á Damaskəs.

⁹ Andyéé e'pun é'láán áde eenyíne' ekíde. Ene pónde esyáál-le eemwédeé, eedyéde-'áa chómchóm.

¹⁰ Á Damaskəs mod abédé awé andúbé Yesue, béchágé' áá mó bán, Ananiase. Annyín ndóg. Á ndóg-te wē, Sánjú Yesue anchəŋ mó aá, "Á-Ananias." Ananiase ankwentén aá "Me nén, a-Sánj."

¹¹ Dóo Sánjwée álanjéé mó aá, "Bonjén, éke á nkoŋ ní nzii níme béchəŋéé bán Ntyéémé. Wəpē á ndáb wée Judase. Nzé epedé áhed, ésədéd mod awé abídé á dyad á Tasus, béchəŋe mó bán Səle. Adé áhed bəəb akáanne'.

¹² Anyíne-'ε ndóg. Á ndóg-te wē, Anyíne' mod awé béchəŋéé bán Ananiase, abáné mó mekáá á nló ábel bonj anyínen ámpē."

¹³ Ananiase antimtén mó aá "Á-Sánj, nkénwəŋ ane mod dúu bwám bwam ne nhel ní mekan níme ákébenlé ábəŋ bad áyál á Jerusalem.

¹⁴ Apedé-'ε á Damaskəs hén ne ngíne eché beprise bémháá bəbágé mó ákób bad bésyáál ábe békáanne' á dín ádəŋ."

¹⁵ Bonj Sánjwée anláá Ananiase aá, "Kág, áyale nén mpwedé anén mod ábele me. Mó ábəl bad ábe béesé bad bé Israel, échab kəŋ é bad, ne bad bé Israel bėbíí me.

¹⁶ Mmən mēlūméd-te mó metake níme ákudté áyál echēm."

¹⁷ Né-əə, Ananiase anké, asól á ndáb eché Səle ámbəē áte, abán mó mekáá á nló, álanjé mó aá, "Á-mwánned Səəl, Sánjwée mó alómé me, nédé, Yesue mwən awé ampíi wε á pónde eche éhyagké wén. Alómé me áwəŋ ábel nén ényínen ámpē élon-ne ne Edáádəŋ éche Esáá."

¹⁸ Ábwəŋ-ábwəŋ bwəm bémbid Səle á mīd ábe bédé nənŋáne e'kíd é' sūu, ábooted-te anyínen. Héé ápádté ásé bonj bédusán-ne mó.

¹⁹ Andyé ndyééd, amaá-'aá ndyééd adyé bonj yál étimé mó áte.

Səle akalé eyale é Dyəb á Damaskəs

Səle andyéé á Damaskəs nguse é e'pun ne bad ábe béndübé Yesue.

²⁰ Anké á ndáb é mekáne ésebán abéhte pónde ákanle bad tənŋene Yesue, aá mó adé Mwán a Dyəb.

²¹ Yál enkóm mod téé áte awé anwóg mó póle á nsəl. Bésədté bánken, "Saá anén mod mó awúé' áá bad ábe bétúbé' áá dín áde Yesue á Jerusalem-e? Eesaá mbále nén nzəm eché ápééné hén edii ákób bó átimen-ne bó ámbíd wée beprise bémháá-ye?"

²² Bonj Səle ambé ákalé' níme nkaləŋ ákág á'sə ngíne ngíne. Metəte níme ámbéé álumed nén bán Yesue mó adé Ane-awé-Béwəŋgté, méntənŋən nyaa eché bad bé Israel ábe bėbédé á Damaskəs bənkənwəŋgé dyamdyam ahób.

²³ Ámbid e e'pun hiin bad bé Israel bənladén áte áhəŋe Səle ngáne bəwū-'é mó.

²⁴ Bonj Səle anwəŋ ntii níme bėbélé. Bėnóné' áá mmwε mé e'ké ní dyad nkuu ne mūte ábel bėwúu mó.

²⁵ Boŋ nkuu nhóg Sòale ábē bembapεε béntéd mó, béhé mó á elón-tê, bébidéd mó á epɔn é eséd bé e'ké ábe bēnɔnɛd dyad, boŋ bésúdéd mó ámbíd e ebwóg.

Sòale atimé ámbíd á Jerusalem

²⁶ Sòale ankē á Jerusalem. Ade ápedé áwed, anwanén aá móbē ne bad ábe bédúbpé Yesue boŋ ábē bad bébaá'áá mó áyále bēnkéndúbéé bán mómpé adúbpé Yesue.

²⁷ Héε Banabase áchāngé mó á ekáá boŋ ákεené mó wεε bembapεε bé nlomag. Anchemtéd bó áte ngáne Sòale anyíné Sāngwéé á ndóg-te á nzii ne chóm éche Sāngwéé álangé mó. Anláá-ε bó ngáne Sòale álangé'áá bad mam tāngene Yesue á Damaskos ésebán abáa' dyamdyam.

²⁸ Né-óó, Sòale ámbé ne bó, ákag mebwóg mésyāál á Jerusalem ákalé' nkalaj ní bwám á ðín áde Sāngwéé ésebán abáa' dyamdyam.

²⁹ Akánlé'áá kásāne bad bé Israel ábe béhóbé'áá ehób é Grikia áswantán-ne ne bó. Dóó bébóótédé nzii ahéd áwúu mó.

³⁰ Ade bad ábe bédúbpé Yesue bésónténé bán béhéde Sòale awúu, béntéd mó bésyognéd mó á dyad á Kaisaria boŋ belómé mó á dyad á Tasus.

³¹ Né-óó, ene pónde esyāál bad ábe bēndúbē Yesue á mbwóg e Judeya esyāál, á Galilia ne á Samaria bémbē ne nsaj, béwón-ε mbwóg ní Dyöb áte nē ábēl béwúu áte, Edáádaj éche Esáá éwōngān-ne bó.

Petro akil a myad mé Lida ne Jopa

³² Petro akagé'áá mbwóg áte esyāál. Ebédé pónde póg eche akíi bad bé Dyöb ábe bébédé á dyad á Lida aleled.

³³ Ade ápedé áwed, antán mod awē béchāgεε bán Aniesε. Esón é mekuu énwε mó, átfimēn ndáb mwε waam.

³⁴ Petro anláá mó aá, "A-Anies, Yesu Krístəə áðíd wε bwám hén bəəb. Pádé ásē é nabe ádon anən." Abwōg-ábwōg Aniesε ampádé ásē.

³⁵ Ade bad bésyāál ábe bédyéé'áá á Lida ne Sharɔn bényíné néε ane mod ádyéé bwám, bēmbootéd Sāngú Yesue adúbe.

³⁶ Mwaád nhóg abédé á dyad á Jopa awē béchágé'áá bán Tabitaa, andúbé Yesue. (Ðín á Tabitaa á ehób é Grikia ádíi bán Ðakase néde e'sél.) A alongé áde ásyāál mboŋ mó ne móó ábéláá áwōngān-ne betóótókē bé bad.

³⁷ Mmē mesú-óó, ankwε nkole awé-ε. Bēnwobé mó ndim betéd mó bébané á toŋ e ndáb eché ebédé ámin.

³⁸ Bəəb-póó dyad á Jopa dénkēnchabnédté dyad á Lida áyál. Né-óó, áde bad ábe bédúbpé Yesue béwógé bán Petro adé á Lida, bēnlōm bad bébe áwē, ne mechāngé nén bán, "Són hyág á mehélé-te."

³⁹ Né-óó Petro amboŋsén, bósɔbóó béké-ε. Ade ápedé áwed, bēnchāgnéd mó á toŋ e ndáb eche ebédé ámin. Bekúd bé bebaád ábe bēnɔnɛd mó, béchyéé', bēlūmté-ε mó mbóté ne nkobe níme Ðakase ámbajnédté bó áde abédé á alongé.

⁴⁰ Petro ámbídéd bó moosyāál á ebwóg, akóg mebóbón ábootéd-te akáne. Dóó ákúnné yál á ndim boŋ áhóbé aá, "A-Tabita, páde ásē!" Tabitaa andibé míd áte. Anyín áde anyíné Petro, ampádé ásē.

⁴¹ Petro ansād ekáá, awōngén ányen mó ásē. Dóó áchénlé bad ábe bēndúbē Yesue, ne bekúd bé bebaád ábe bémbē áhed, boŋ álūmté bó Tabitaa áde ádíi á alongé.

⁴² Mmēn nkalaj mēnkanléd á dyad á Jopa áte ásyāál á etún é pónde, ekud é bad édúbé-ε Sāngú Yesue.

⁴³ Petro andyéé á Jopa nguse é e'pun. Andyéé á ndáb e mod awē abelé'áá nsón mé e'kob é' nyam, awē béchágé'áá bán Simɔnε.

10

Petro akil wεε mod awē eεε mod á Israel

¹ Mod á Roma nhóg abédé á dyad á Kaisaria bán Kɔneliəse. Akámlánnáá ehoŋ é mbwókel e sánze éché béchágé'áá bán, "Ehoŋ é mbwókel e sánze é Italia."

² Kɔneliəse abédé mod awē ahidé'áá mekan mé Dyöb ámbíd. Mwēn ne eche ndáb esyāál bébēnlé'áá Dyöb. Ansálé ekáá áte, áwōngān betóótókē bé bad bé Israel, ákannε-ε pónde ésyāál.

³ Ebédé dyam ngān éláán müte nhóg, anyín ndóg. Á ndóg-te wē ankōŋ ángel e Dyöb anyín. Enchəg mó aá, "A-Kɔneliəs."

⁴ Annon ángel ne chóón, ne mbwóg, boŋ áseɔté nén aá, "A-Sāj, cheé éde?" Ángel enkwenɛn mó aá "Dyöb áwógé nímdōŋ mekáne, anyíné-ε ábōŋ e'boŋ bé nlém. Adé-ε mboŋsén ákwentən wε mekáne.

⁵ Bəəb-póó, lóm bad á Jopa, békē béchéle mod nhóg awē ðín ádíi mó bán Simɔn awē béchāgεé bán Petro.

⁶ Adé nken á ndáb e mod nhóg awé akínte' e'kob é' nyam awe béchagéé bán, Simone. Simone ne adyee' á nkag mé edib é nkwe'."

⁷ Dóo ángel eched éhídté, bon Koneliosé áchenlé ábē bembaledé bé ndáb bébe, ne sánze póg echē chompé ehídé' áá mekan mé Dyōb ámbíd, ebé'-ε sánze echē enoné' áá Koneliosé.

⁸ Alángé-¹ áá bó dyaam ádē ábēnlédé, alóm-me bó á Jopa.

⁹ Ade békagké, néε bín é'sángé, áde békwógé ape á Jopa, Petro anchágé á ndáb mín ákáne. Né ábédé dyaam kad.

¹⁰ Nzaa enkób mó, ádān-¹ε ndyééd adyé. Ade bébonšanné ndyééd, anyín ndóg.

¹¹ Anyín ngáne ngob e dyōb énédnédé. Chóm émbíd nēngáne sánkalaa a abad, ébé néε béchángé dó mekéb méniin, bésudté dó áse.

¹² A abad-té wē, ndín é nyam ésyāāl émbē áwēd-te; éche ékεεne' mekuu méniin, éche édole abum áse ne menon mé ahín. ¹³ Héε áwógé ehōb élanže mó nén "A-Petro, syáá áse, éwúu échén nyam, édyág."

¹⁴ Bon Petro anhōb áá, "A-Sán, meéhēlēε se mbēl ene ndín e dyaam. Meedyédéé chōmchōm mbédé éche mbéndé éhōbē áá béedyág, ké'ε éche éesáa á'sō é' Dyōb." *

¹⁵ Echē ehōb émbād mó aláa nén áá, "Weetédé chōm ké ehōg éche Dyōb áhōbē áá éesáa, wéε éesáa'ε."

¹⁶ Nén dēmbenléd ngen élaán. Dóo bétímné ádē abad ámbíd ádyōb.

¹⁷ Petro adolé' áá áte ábíi chōm éche ene ndóg élúmté. Ene pónké dōo bad ábe Koneliosé ánlōmmé bédíbté wéε ndáb eche Simone édíi. Bényēm a mmmwe mé e'ké.

¹⁸ Héε belébpéé ehōb bánken, "Nken adé áte wē awé béchagéé Simōn Petro-ye?"

¹⁹ Ade Petro ádíi adólé áte ásonjten chōm éche ndóg élúmtéé dōo Edáádan éche Esáá élanžeé mó áá, "Wóglén! Bad beláán bépédé, béhede we.

²⁰ Né-óó lád yāl, ésud á ndáb mín, weebáá bó ahíd áyale meé nlóme bó."

²¹ Né-óó, Petro ansūd áse, áke atán ábē bad, álanžē bó áá, "Méé ndé ane mod awé nyéhedeé. Cheé épídé nyé hén?"

²² Béntímtén mó bán, "Mod ambáá a sánze, Koneliosé móo alómé sé. Adii mod a bwām awé abenle Dyōb. Bad bé Israel bésyāāl-le bébage mó edúbé éche échábé ámín. Angel e Dyōb élanžeé mó nén áá álébe we áwē ndáb, ábel nén áwóg dyaam ádē étánžéné mó aláa."

²³ Petro awógé-¹ áá nē, asóléd bó á ndáb, ábe-¹ε bó e'non.† Bon Petro ansóléd ábē bad á ndáb kénéε bébébedéé bad bé Israel. Néε bín é'sángé, Petro anlād yāl, ahíd ábē bad. Nguse é bad ábe bédúbpé Yesuε á Jopa bāmpé bēnwóon bó.

²⁴ Epun ehóg ámbíd e nē, Petro bēmpé á Kaisaria. Koneliosé mwēn, ádē abum á ndáb, ne ábē besón bé echoj ábe ánlēbēε, bésíné' áá Petro bó.

²⁵ Ade Petro áhedeé asól á ndáb, Koneliosé anké mó atán, ákwe mó á mekuu, ábwāām-me áse ábe mó edúbé.

²⁶ Bon Petro annyen mó áse ahōb áá, "Tyéém ámín. Mémpé ndii moonoyon ngēn."

²⁷ Petro ambé ákanlé Koneliosé ádē bésóleé á ndáb-te. Antán néε ndun e mod éladné á ndáb-te.

²⁸ Héε álanžeé bó nén áá, "Nyé bēn nyébíi bwām nén bán edé mod a Israel mbéndé áwoon mod awé eesé mod a Israel ké'ε asól áwe ndáb. Bon Dyōb álúmté me nén áá meéchagé modmod meé adé mod awé eesáa ké'ε néε mod awé adé mbinde á'sō é' Dyōb.

²⁹ Né-óó, áde élóme me achag mempádé áse ábwōg-ábwōg, menkénhōbpé meé méehyaá. Bōob-óó, nseidte we, cheé ékás bon élóme me achag?"

³⁰ Héε Koneliosé ákwentanné mó áá, "Sú élaán chíi, néε bōob, nkánné' áá áwēm ndáb-te á ngán élaán é' müte. Dóo mod awé awáá mesaj nímé mémwaa' áte átyéémé me á'sō-te taléd.

³¹ Bon áhōbē áá, 'A-Konelios, Dyōb áwógé we mekáne, anyíné-ε ábōn e'bon bé nlém.

³² Lóm mod á Jopa, áke áchéle Simone awé béchagéé bán Petro. Adé nken á ndáb wéε mod nhóg awé akínte' e'kob é' nyam awé béchagéé bán Simone. Simone ne adyee' á nkag mé edib é nkwe'."

³³ Né-óó menlóm we atéd ábwōg-ábwōg. Ebélé-ε bwām ngáne épédé. Bōob-óó sé moosyál sédé hén, Dyōb ádē-ε ne syánē. Sésine' áwóg dyaam ké ahéé áde Sán Dyōbe álanžeé we áa élaa sé."

Petro akánlé Koneliosé nkalanj m bwām

³⁴ Dóo Petro áhédeé póle á nsəl áá, "Bōob dōo mbíi meé Dyōb átédé moosyál nyaa póg.

³⁵ Akobe kenzéé awé abage mó edúbé awé abele-ε mekan míme métánžéné, ké alon áhéé ane mod ábídté.

* **10:14** Bad bé Israel bēnwōn mbéndé éche énkēmbē bó kunze ádyé donje á bwēm. † **10:23** Bad bé Israel béésilte' áá mod awé eesé mod a Israel áwab ndáb.

³⁶ Nyébíí nkalanj níme Dyòb dénlòmēē bad bé Israel. Mmē nkalanj níbedéē t̄ngene ákal nkalanj ní bwám mé nsanj níme nípedé mbwiined ne Yesu Krístā. Mò adé S̄ngwéé á moosyā́l.

³⁷ Nyébíí-ē dyam áde dēmbenléd mbwóg e Judeya áte esyā́l mbooted ne á Galilia. Nén dēmbē áde ǝne ámáá bad aláa t̄ngene edusen.

³⁸ Nyébíí nén bán Dyòb dénwōgéd Yesuē, mod a Nazaret, ábe mó Edáád̄an̄ éche Esáá ábē-ē mó ngine. Yesuē akagé'áá hóm t̄é ábelé mbonj. Ngáne Dyòb dēmbēē-áá ne mó, adidé'áá bad bésyā́l ábe bēmbē ášē e ngine e Satan bwám.

³⁹ Sé bēn sēnyínné mekan mēsýā́l níme ámbenlé á alonj á bad bé Israel ne á Jerusalem díd. Bēnwū́ mō, abome áde bēmbomēé mó á awog.

⁴⁰ Bonj Dyòb dēmpuú́d mó ámbíd e e'pun é'láán, ábel-ē bad bényín mó.

⁴¹ Saké bad bésýā́l bényín-ne mó. Bad ábe Dyòb dēmmatdē apwēd, bós bényín mó. Nédē sé ábe sēndyē ndyēéd sēmwe-ē mmíttéd ne mó.

⁴² Anlyágtén sé aá sékanle bad nkalanj ní bwám, sébide-ē mbonj nén bán mó móde Ane awē Dyòb ápwédé, ákaad bad ábe bédé á alongé ne ábe bēwéde.

⁴³ Bekal bé'dáád̄an̄ bésýā́l bēnhōb t̄ngene mó bán, mod ké ahéé awē adúbpe mó, Dyòb délagsén mó mbéb. Nén débenléd á ngine e ádē dín."

⁴⁴ Áde Petro ádíi áhóbēé nē, Edáád̄an̄ éche Esáá énsūd ášē, épfi moosyā́l awē áwoglánáá níme nkalanj.

⁴⁵ Bad bé Israel ábe bēndūbē Yesuē, ábe bósbe Petro bēmbíd á Jopa bēmbē menyáké bwámbwam ányín nén bán Dyòb ábágé echē nde e Edáád̄an̄ éche Esáá kóǝne wēe bad ábe béesē bad bé Israel.

⁴⁶ Bēnwōg ngáne bēhóbēé mehób mémpēe, bēbagé-ē Dyòb ehúme. Dós Petro áhóbēé aá,

⁴⁷ "Abén bad békúde Edáád̄an̄ éche Esáá melemlem ngáne sémpē sēnkudté. Né-ós, nzé-móde ahēle-se ahób aá bēedusán bó ne mendíb?"

⁴⁸ Hé-'aá áhóbé aá bēdusen bó á dín á Yesu Krístā. Dós ábē bad bēlángé mó bán ádyēe ne bó nguse é e'pun.

11

Petro áhóbé t̄ngene chóm éche ábélé

¹ Bembapēe bé nlomag ne bad bēmpēe ábe bédúbpe Yesuē á mbwóg e Judeya-tē esyā́l, bēnwōg bán bad ábe béesē bad bé Israel bōmpē békóbé eyale é Dyòb.

² Ade Petro átimé ámbíd á Jerusalem, bad ábe bēhóbé'áá bán bétāngéné bad ábe béesē bad bé Israel ayag, bēmbootéd mó ahób bán,

³ "Cheé ékáá bonj ékáǝ wēe bad ábe bésē bad bé Israel, bad ábe béeyagéé bonj nyáábō nyédyāg-ke kóǝne ndyēéd hóm ahóg?"

⁴ Hé-'aá Petro áhédé nkalanj á nsal, aláá bó mekan mēsýā́l ngáne mēmbenlédte se á mbooted.

⁵ "Mbédé á mekáne á dyad á Jopa bonj nínyíné ndóg. Chóm émbíd á ádyòb nēngáne s̄nkalaá a abad, ébē née bēchóngé dós mekéb méniin, bésudté dós ášē. Bēnsudéd dós áwēm e'só-te.

⁶ Ade nínné áwēd-te menyín nyam éche éde á abad-tē, nyam é mehín, nyam éche édole abum, ne menon mé ahín.

⁷ Héé níwógé ehōb élange me nén aá, 'A-Petro, syā́l ášē, éwúe' échén nyam, édyāg.'

⁸ Bonj me-ē menhób meé, 'A-Sán meehālē-se níbel ene ndín e dyam. Chómchóm éche mbéndé éhóbé aá bēedyag ké'ē éche éesáá á'sō é' Dyòb éesālē me á nsal mbéd.'

⁹ Ehōb émbíd ádyòb ámpē nén 'Weetédé' chóm ké ehóg éche Dyòb áhóbé aá esáá, wēé éesáá' é.'

¹⁰ Nén dēmbenléd ngen éláán. Dós bétímné chóm esýā́l ádyòb.

¹¹ Ene pónde chén dós bad beláán ábe bēbídé á dyad á Kaisaria ábe belómé áwēm, bēpédé á ndáb echē ndyēé'áá áte.

¹² Edáád̄an̄ éche Esáá énlā́ me aá syā́bō sékag, aá meebáá bó ahíd. Abē bad ntóob ábe bédúbpe Krístā ábe bēbídé á Jopa bōmpē bēnhíd me á Kaisaria. Syā́bō moosyā́l sēnkē sēsól á ndáb wēe Kōneliōse.

¹³ Kōneliōse anláá sé ngáne anyíné ángel etyéomé áwe ndáb bonj ene ángel eláá mó aá, 'Lóm mod á Jopa áke áchag mod awē m̄n mēsýā́l médíí bán Simón Petro.

¹⁴ Nzé apedé aláá nyé póle eche ébēl bonj Dyòb ásonj ádōn alongé, ásonj-ē ádōn abum á ndáb.'

¹⁵ Ámbíd enē, mbootédé-'aá dyam ahób, Edáád̄an̄ éche Esáá épiidé bó melemlem nēngáne émpíí sé á mbooted.

¹⁶ Dóo níkámtnéne dyam áde Sánḡwéé anhōbpē. Anhōb aá, 'Jōne adūsánnáá bad ne mendib boḡ bédusén nyé ne Edaádəḡ eche Esáá.'

¹⁷ Enyínnad nén bán Dyōb ábágé ábén bad ábe béeseḡ bad bé Israel melemlen me nde míme ámbéé syáné áde dedúbpe Sánḡú Yesu Křístəə. Nzéé-ḡ nídí ákəḡ ntíi ní Dyōb?"

¹⁸ Ade béwógé nē, bénsōḡ Petro mekan ahōy áyāl, bébootéd Dyōb akən. Béhōbé'áá bán, "Dyōb ábágé káḡḡne bad ábe béeseḡ bad bé Israel etál áte de mítab mbéb átimen Dyōb, ákud-te alonḡé áde déemaá'."

Mwembé mbóótédé á dyad á Antyōḡ

¹⁹ Bəəb-ḡəḡ, áde béwúú Stefanuse, bad ábe bémpāḡtəd áte áyāle metake míme békúdáá, bō donḡe á bad bēnkē káḡḡse á Fonia, donḡe ákē á Saiprus, ábíníi-'e békē á Antyōḡ. Békágé'áá, békānlé dásō bad bé Israel bēnpen nkalaní mí bwām.

²⁰ Boḡ bad bémpēe ábe bēndúbē Yesue ábe bēmbíd á myad mé Saiprus ne Sirine, bēnkē á Antyōḡ, békānlé káḡḡne bad bé Grikiá, bēlāḡḡe-'e bō nkalaní mí bwām tāḡḡene Sánḡú Yesue.

²¹ Ngine e Sánḡú embé ne bō. Ndun e mod endúbē, étimēn-ne Sánḡwéé.

²² Mmē myanḡó mēmpē á metúu mé bad bé mwembé ní Jerusalem. Né-ḡəḡ, bēnlōm Banabase á dyad á Antyōḡ ákē dényín bō áwed.

²³ Ade ápédé áwed boḡ anyín ngáne Dyōb ánámte bad, anwōḡ menyḡḡe, ambē-'e bō élébé aá béhíde' Sánḡwéé ne nlem nhōḡ.

²⁴ Banabase abédé mod á bwām, Edaádəḡ eche Esáá émbē ne mó, adúbe dénwūi-'e mó áte bwāmbwam, ekud é bad-te éndúbē.

²⁵ Dóo Banabase ákíi á dyad á Tasu áhəd Səəle.

²⁶ Ade ányíné mó, ampēén mó á Antyōḡ. Né-ḡəḡ á etún é mwē nhōḡ, bō bad bébe bēbómé'áá ne bad bé mwembé. Bēn'yāḡəd-te ndun e mod. Á Antyōḡ wē dōo bésébpé bad ábe bédúbpé Yesue dín achuu bán bad bé Křístə.

²⁷ Mmē mesú dēn, donḡe á bekal bé'daádəḡ bēnhíde á Jerusalem bēke á Antyōḡ.

²⁸ Bō mod nhōḡ awē bēchágé'áá bán Agabuse antyéém ámín. Á ngine e Edaádəḡ éché Esáá, anhōb aá, "Nzaa e ngine ekwógé ape, ébē-'e nkōḡse-te n̄syāāl." Nén dēmbenléd-te á pónde eche Kladios ábédé á nkāmlen.

²⁹ Bembapēe bēntíi nén bán bō mod téé bēlōmē nwōḡḡen wēe bad ábe bédúbpé Yesue á mbwōḡ e Judeya ngáne bō mod téé áhenlé akud.

³⁰ Nē dēn-naá bēmbenlé. Bēnlād mané, bēlómén Banabase bō Səəl ábe wēe belyáḡed bé mwembé.

12

Herəde ádii apiinad bad ábe bédúbpé metake

¹ Bēnben ne ene pónde chēn, kəḡ Herəde ambootéd donḡe á bad bé mwembé ahé á meséb.

² Ambēl bēnkōb Jemse, Jōne mwānyan, bēwúén mó nkwaté.

³ Ade ányíné nén aá nē áwóḡté bad bé Israel menyḡḡe, ankē á'sō, ábel békōb Petro. Nén dēmbenléd á pónde e Ngande e Ewele é Ngēn.

⁴ Ade bémáá Petro akōb, anlōm mó á mbwōḡ. Bēmbané e'choḡ é' sánze é'niin ánan mó. Echoḡ téé énwōḡ sánze éniin. Herəde anwōḡ mewēmten ákáad mó á'sō é' mbwōḡ nze Ngande e Nnyíme ámín etómé.

⁵ Né-ḡəḡ bēmbane Petro á mbwōḡ. Boḡ bad békánné'áá Dyōb ngine ngine áyāl eché.

Ángel ebídté Petro á mbwōḡ

⁶ Herəde ahédé'áá Petro apēen á'sō é' bad mbwembwē. Mmē nkūu mēn míme Herəde ánwōḡḡe mewēmten apēen Petro á'sō é' bad chán ábíníi, Petro akúné'áá áfinté e sánze ébe. Bēnhē mó bengóbéngōbē pəd ébe, sánze empēe ébe énoné mmwē ní ndáb e mbwōḡ.

⁷ Dóo ángel e Sánḡú ebíde taléd, ndáb e mbwōḡ epéné áte. Ángel ne ensáḡéd Petro á ekáḡél, ényem mó áse, élanḡé mó aá, "Pádé áse á mehélé-te." Abwōḡ-ábwōḡ bengóbéngōbē bēnhunnéd mó á mekáá.

⁸ Dóo ángel élanḡéé mó aá, "Wéd ngáḡ atád, étád-te nkōod mé metámbé." Petro ambēl áned. Dóo ángel élanḡéé mó aá, "Hé mbóté á yál, éhíde me."

⁹ Petro anhíd chō, bēbíd á ndáb e mbwōḡ. Boḡ kēnē enkēmbíí'ké dyam áde ángel ébeléé dēn ákoo abenled. Anwēmten aá mónyíne' ndóg.

¹⁰ Bētóm echoḡ e sánze é'só ámín, bētóm-me éche élónténé é'be káḡḡ ne á asóḡ bēmpē á mmwē mé e'ké bé e'kii nímé mbíde'áá á dyad-té. Nsəl mé e'ké méndibné ne mó mwēn. Héé bēbídé boḡ bēhíde nzii. Ade békagké nē dēn dōo ángel ne étédté Petro ábwōḡ-ábwōḡ.

¹¹ Héé debyéé ápédé Petro boḡ áhōbē aá, "Bəəb dōo mbíi meé dyam dēn dōo ákoo' abenled. Sánḡwéé alómé eche ángel, asoó-'e me á mekáá míme Herəde, abelé-'e mbíde mekan mésyāāl áte míme bad bé Israel bēnwēmtenné me ábel."

¹² Achemé'áá dyam áde ábenlad ne mós, dós akíí á ndáb wée Maria, awé achyáá Jón Makose. Ndun e mod enladén áhed békánne'.

¹³ Ade Petro ápedé ankũm ekob éche édé á ebwóg-te bonj mbaledé a mmwaád nhóg bán Rodaa, áhye ánoné mod awé akume ekob.

¹⁴ Anchem Petro ehób. Dó'-áá ne menyinje mésyāāl áchādtēn ekob adibe, atóm mehélé ámbíd á ndáb-te bonj áke aláá bad áá, "Petro atyéémé á ebwóg-te."

¹⁵ Bénlāā mós bán, "Epag mĩn!" Bonj ambé álāngē bó áá chóm éche móhóbeé édé mbále. Dós behóbeé bán, "Né eche ángel chós édé."

¹⁶ Ade nímén mésyāāl mébenladdé Petro ambé ákumé' ekob. Kásñne á asóg bēndibé ekob. Bényíné'-áá mós, yāl ekóm bó áte bwāmbwam.

¹⁷ Ampebtēn bó ekáá áá belām ehób, bonj álũmtē bó áte ngáne Sāngwée ábídte mós á mbwóg. Anláá bó áá, "Nyélāā Jemse ne bad ábíníí ábe bómpe bédúbpé Yesue nímén mekan." Dós átedté bó bonj ákag hóm dēmpēe.

¹⁸ Ade bĩn é sāngé, sánze éche énoné'áá Petro ěmpuutéd á mewēmten bwāmbwam áyāle bēnkēmbíí é chóm éche ébēnlédé Petro.

¹⁹ Herode anlóm bad áá behéd mós bonj bēnkēnhenlé mós anyín. Héé ákáádté éché sánze bonj ábagé mbakú áá bēwúu bó. Ade nímén mésyāāl métómé Herode anysá á Judeya áke ádyēē á Kaisaria á esón é pónde.

Herode awédé

²⁰ Ene pónde Herode anwóón bad bé myad mé Tirē ne Sidon melingá nĩme méchábé ámĩn. Né-ós, bad bēmbíd nímé myad mébe áke dényín mós. Mod awé bēnsēbēē áke dētán ábel bóóbe kñh bétim áse abédēē Blastuse. Blastuse abédēē mbaledé á ndáb e kñh. Bēmbel nē áyāle á alonj wée Herode dós nĩmab medy'é mébídé'áá.

²¹ Epun éche Herode ántĩí' é épédé'-áá áte, awáá megombe mé kñh, ádyēē atii dé nkamlen bonj ábootéd bó mam aláa.

²² Ade amáá ahób, ábē bad bēmbootéd abón bán, "Dyób dēn dós áhóbe' saké moonjonj."

²³ Abwóg-ábwóg ángel e Sāngú embēl Herode ankwē nkolé áyāle enkēmbáá Dyób edúbé. E'ken bé abum bēndyē mós áte, awé'-e.

²⁴ Eyale é Dyób chós'-e émbē ékanláád ékag á'só.

²⁵ Banabase bó Sool bēmmád nĩmab nsón behídē'-e á Jerusalem. Ade behídtéé, bēnwāle Jón Makose áyāl.

13

Edáádñj éche Esáá épwédé, belómé'-e Banabase bó Paale

¹ A mwembé mé Antyog, donje dé bekal bé'dáádñj ne bemeléede bēbédé áwed. Abē bad bēbédēē Banabase, Simionē (awe béchágé'áá bán Ehíndēē), Lusiosē (awe ambíd á Sirinē), Manahēne (awe bó Ngómenaá Herode békwoógé hóm ahóg) ne Soolē.

² A pónde échē bēbenléé Sāngwée bēdidé'-e yāl nzaa á mekáne-tē, dós Edáádñj éche Esáá élanjéé bó nēn áá, "Nyébanned me Banabase bó Sool ábel bonj bébele me nsón nĩme nĩpwédé bó meé bébel."

³ Abē bekal bé'dáádñj ne bemeléede bēnkānē, bēdid-te yāl nzaa á mekáne-tē, bēbán Banabase bó Sool mekáá á nló bonj belómé bó bán bēkag.

Banabase bó Paal bétané

nkum-é-nganj, Elimasē

⁴ Né-ós, Edáádñj éche Esáá énlóm Banabase bó Paale. Dós békíí á dyad á Selusia. Áhed-taá bēsýāngé bonj békāg á mbwóg e Saiprus eche mendíb melāñnédé.

⁵ Ade bēpédé á dyad á Salamis, békálé'áá eyale é Dyób á ndáb é mekáne. Bēnwālē Jón Makose áyāl áwónjēn bó.

⁶ Bēnkē áde alonj áte áde mendíb melāñnédé kásñ bēpē á dyad á Pafos. Ade bēpédé áhed, bēntán mod a nganj nhóg awé béchágé'áá bán Báá Yesu. Abédēē mod a Israel awé anchag yāl áá módíi nkal é'dáádñj a Dyób.

⁷ Báá Yesue abédēē nsón a echonj awé Sēgyus Paoluse. Sēgyus Paoluse mós abédé nkamlenē a ene mbwóg échē mendíb mēnlāñnédte. Abédēē mod awé anwónj debyéé bwāmbwam. Ane ngómenaá anchélé Banabase bó Sool áyale áhedé'áá eyale é Dyób awóg.

⁸ Bonj anēn mod awé dīn démbēē á ehób é Grikia bán Elimase enkēnháá bó etál. Áhedé'áá áá nkamlenē a mbwóg eedúbpé nkalanj ní bwām.

⁹ Dós Soolē awé béchágé'áá ámpē bán Paale, ngáne ánlōnnē ne Edáádñj éche Esáá, ánoné ane mod a nganj á mĩd-te,

¹⁰ ʙoŋ áhšbē aá, “A-mwān a Satan! Ekóš dyam ké ahéé áde áde áde ʙwám. Mwane mé mbéb mwēn-éé ríloné we áte. Póndé ésyāal ebélé éhéde wéé móhəŋlən mbále eche Səŋgwéé mótímed chó metóm.

¹¹ Səŋgú Dyóbe ákšgsēn we ʙəəb nén dēn. Wěkwě ndím, wéenyínēnné-é á esón é póndé.” Ábwəg-ábwwg Elimase onwəg nēŋgáne mbag ékwédé mó á mīd-te, ábootéd-te ahyóm áhəd mod awe áchāš mó á ekáá.

¹² Ade ngómēnaa ányíné dyam áde ábēnlédé, andúbé Yesue. Yšl enkóm mó áte ʙwámʙwam áyāl e ayáge áde Paale bó Banabase býyágté’áá təŋgene Səŋgú Yesue.

Paale bó Banabase bépédé

á dyad á Antyog

¹³ Paale bóəbe baáb bēnsəl a Stíma a Pafos béke káəŋ bépē á dyad á Pega á mbwóg e Pamfilia. ʙoŋ Jəŋ Makose anlyág bó áwed asú mó ámbíd á Jerusalem.

¹⁴ Bēnsyáá á Pega bépē á dyad á Antyog á alon á Pisidia. A mbwe-mé-nkóme-áte, bēnkě á ndáb e mekáne bēdyēē áse.

¹⁵ Bēnwóg néé beláá eped á kálag e mbéndé eche Mosēe ne á kálag e metelag mé bekal bē’dəádəŋ. Ade bémáá alán dōo belyáged bē ndáb e mekáne bélébpeé Paale bó Banabase nén bán, “A-baányan, nzé nyéwóó póle eché eéwəd bad nlém á abum, nyéhób chó.”

¹⁶ Dōo Paale átyéémé ámín, apebtán bó ekáá áá belám ehób, ʙoŋ abootéd dyam ahób. Anhób aá, “A-baányan bē Israel ne bad bēmpēe ábe nyéde hén ʙəəb ábe nyēbenle Dyób, nyéwóglen me.

¹⁷ Dyób á bad bē Israel dēmpwəd ábəd betaa ábēl-le ábē bad bēbūu áte á póndé eche bēbédé néé beken á alon á Egipto. Ámbíd enē, ámbēnléd eche ngine eché echabé ámín ábided bó a Egipto.

¹⁸ A etún é móom mé mwě méniin, anwesén bó á ehyánge.

¹⁹ Dyób dēmbēbəd melon saámbe á ndəəb e Kanahan, ábē-é echáb ndəəb wéé ábē bad.

²⁰ Mmēn mēsýāal mēmbēnléd á etún é dyam mbwókel e mwě éniin ne móom mé mwě métáan. Ámbíd enén, Dyób dēmbē bó bad ábe bēkáádté káəŋne á póndé eché nkal é’dəádəŋ Samwele.

²¹ Ade bēhéde kəŋ, Dyób dēmbē bó Səəle, mwān awe Kishe. Ámbíd á túmbé e Benjamin, abéde kəŋ á etún e móom mé mwě méniin.

²² Dōo Dyób áhúde Səəle á atii. Ahúde-’áá mó, átiméd Dabide. Anhób təŋgene Dabide aá, ‘Nkudé nyaa e mod eche rídáá, Dabide, mwān awe Jesē. Adii mod awé ábēl mam mēsýāal níme ríhedeé meé ábel.’

²³ Yesue mó-é awé abídé á nchyáátén níme Dabide móš Dyób dēmbēnlé Nsoode a bad bē Israel, ngáne ánhəbpe aá móšbēl.

²⁴ Byánán Yesue ábootéd níme nsón, Jəŋe álánge’áá bad bē Israel aá békunned mbíd, bétéde nímbab mbéb, békud-te edusen.

²⁵ Ade Jəŋe ákwógé níme nsón amad, ansedéd bad aaken, ‘Nzé-móde nyéwémtné bán ndé. Saké me ndé ane awé nyésineé. Nyénəne’, Ahúe’ ámbíd echém, mmēn meékwognedé áhune mó metámbe á mekuu.’ ”

²⁶ Paale ambád ahób aá, “A-baányan bē mbyaa níme Abrahame ne bad ábe bēbenle Dyób hén ʙəəb, syánē-éé belómme nímén nkalaŋ mé e’sooson.

²⁷ Bad ábe bēdyéé’áá á Jerusalem ne ábab belyáged bēnkēmbíí’é bán Yesue móó adé Nsoode. Bēnkēsónjtén-naa metelag mé bekal bē’dəádəŋ níme beláá’áá á mbwe-mé-nkóme-áte tēé. Kénē bēmbēl mekan níme bekal bē edəádəŋ bēnhəbpe ménlon, ahób áde bēnhəbpe bán bēwúu Yesue.

²⁸ Kénēe bēnkēnkudté nzəm eché bētómēdté mbakú nén bán átəŋgéné awé, bēnlāá Payledé bán ábel bēwúu Yesue.

²⁹ Ade bémáá mekan mēsýāal ábel ngáne méténlédé á kálag e Dyób təŋgene mó, bēnsudéd mó á awəg, bēbānē mó á soŋ-té.

³⁰ ʙoŋ Dyób dēmpuúd mó. Ámbíd e né,

³¹ anlúmed yšl ngen ne ngen wéé bad ábe bəšbšə bēnwōŋ bootya á Galilia ápe á Jerusalem. ʙəəb ábē bad bóó bēkanle’ bad bē Israel dyam áde bēnyínne.

³² ʙəəb-pəš nímén nkalaŋ ní ʙwám móó sépínédé nyé. Mmē nkalaŋ rídii nén bán dyam áde Dyób dénhəbpe aá móšbē ábəd betaa alónté dō ne syánē.

³³ Alónté dyam áde ánhəbpe ne syánē awé dedé nchyáátén nímbab, apuud áde ápuúdté Yesue. Né-’áá étenlédé á kálag e Ngase e Dyób eché elónténé ébe bán,

‘Edii awem mwān,
chii ndii Sóó.’

³⁴ Dyób dēmpuúd mó ésebán atime ámbíd á ndəəb se ábəə. Dyób dénhəb təŋgene nē aá, ‘Měbē we nnam ní nŋəŋgú, níme méehídté áse, níme ménhəbpe meé měbē kəŋ Dabide.’

³⁵ Né-'aá áhóbé pɛd empée wée éténlédé bán,

'Wéekwenténné wée awōŋ mbalede awē abenle wɛ ne nlém nhóg ábōó á soŋ-tê.'

³⁶ Debíí nén bán áde kâŋ Dabidɛ ábédé á alongé, aběnlé'áá Dyōb ngáne Dyōb áhédé'áá. Ambíd e nê, anwé, bélimé mó wée bėnlīmɛ́ ábē betaa, ábōó-ɛ.

³⁷ Boŋ ane awé Dyōb dɛmpuúdté, enkėmbōó-ɛ.

³⁸ Bōob-pōó, a-baányan, nyétāngéné abii bwám nén bán, Yesue mó akáá boŋ bėkanlé nyé bán Dyōb álagsan bad mbéb.

³⁹ Nyébii-'ɛ nén bán kénzée awé adúbpe mó akōbnédé á'só é' Dyōb nées mod awé atāngéné. Mbéndé e Mosɛ eéhele'áa-se ébel ákobnéd.

⁴⁰ Né-óó, nyétéd pōndé ábel boŋ dyam dé ebébtéd áde bekal bė'dáádəŋ bėnhōbpé déebnláád ne nyé. Bėnhōb bán,

⁴¹ 'Nōné', nyé bad ábe nyéwele Dyōb! Yāl ěkām nyé áte, nyéewē-'ɛ,

áyale nén, dyam áde mébenlé nímén mesú,

ádii dyam áde nyéedúbéé ké mod anlúmed nyé áte.' "

⁴² Pōndé eché Paale bō Banabase bėbídé á ndáb e mekáne, bad bėnlāá bō bán bėpe ámpé á mbwɛ-mé-nkóme-áte níme nɦúe' áhye dɛlāá bō nímé mekan ámpé.

⁴³ Ade bad bémáá ahide á mekáne, bad bė Israel híin ne bad híin bėmpéé ábe bėnwōŋ adúbe á bad bė Israel bėnhíd Paale bō Banabase. Paale bō Banabase bėnkalén ábē bad, bėwéd-te bō nlém á abum bán bėbē bėkude nímé nsimé níme Dyōb ábágé bō.

⁴⁴ A mbwɛ-mé-nkóme-áte níme mémbādtɛn, bɛnbɛn ne baásyā́l ábe bėbédé á dyad-té wé, bėmmaá ámbíd, áhye dɛwóg eyale éche Sāngwéé.

⁴⁵ Ade bad bė Israel bėnyiné ene ndun e mod, kōŋjí embé bō áte bwāmbwam. Dyam tée áde Paale áhóbé'áá, bėhóbé'áá bán ádii metóm, bėhōbē-'ɛ mó mekan mé mbéb á yāl.

⁴⁶ Paale bō Banabase bėmbé bėhōbē bōob ésebán bėbáa' dyamdyam. Bėhóbé'áá nén bán, "Nyé bad bė Israel nyée séntāngenné eyale é Dyōb asébe dé akale. Boŋ ngáne nyébáá chó áyāl, nyéetédé-áa yāl nées bad ábe bėkwógnédé ákud alongé áde déemaá', né-óó, séétedé nyé, séke wée bad ábe béesé bad bė Israel.

⁴⁷ Dyam áde Dyōb áhóbé áá débel ádii, nén,

'Mbānné wɛ nées e'nyinen bė ekíde é' bad ábe béesé bad bė Israel ábel boŋ bad bė nkōŋsé bėsyā́l bėkud e'soosōŋ awōŋ mbíd.' "

⁴⁸ Ade bad ábe bėbédé bad bė Israel bėwógé nê, bėmbē menyinge, bėkɛné-'ɛ nkalan níme Sāngwéé. Bad ábe bėpwédnédé nén bán bėkūd alongé ádē déemaá' bėndúbē Sāngú Yesue.

⁴⁹ Moosyā́l awé ambé ene pɛd e mbwóg anwóg nkalan níme Sāngwéé.

⁵⁰ Boŋ bad bė Israel bėnkōn baámbáá bė dyad ne bebaád bėmbáá ábe bėbėnlé'áá Dyōb. Bėchódé-'áa Paale bō Banabase yāl áte, bėnān-ne bō áwab mbwóg.

⁵¹ Ade bėhédéé ake, bėnkūd ebumbú á mekuu álúmed ábē bad nén bán nkógsen ne bō. Ade bémáá ábel nê bėnké á dyad á Ekōniom.

⁵² Bad ábe bėndúbē Yesue á dyad á Antyog bėnlōn ne menyinge bėlōn-ne ne Edáádəŋ éche Esáá.

14

Nkalanŋ ní bwám nípédé á dyad dé Ekōniom

¹ Ade Paale bō Banabase bėpédé á Ekōniom, bėnké á ndáb e mekáne. Bėnkāl nkalan níme Yesue áwed, nyaa eché bad híin bė Israel ne ábe bėebéde bad bė Israel bėndúbē Yesue.

² Boŋ bad bė Israel ábe bėnkėnkobé adúbe, bėnkōn bad ábe béesé bad bė Israel, bėhé bō mewémtɛn mé mbéb áte tāngene bad ábe bėndúbē Yesue.

³ Paale bō Banabase bėmbém áhed, bėkalé nkalan tāngene dyam á bwám áde Dyōb ábėnlé bad ésebán bėbáa' dyamdyam. Sāngú Yesue ambé bėnlúméd e'chemléd, bėbél-le menyáké híin, álúmed nén bán mam nímé ábē bembapɛɛ bėkálé'áá tāngene nímé nsimé médé mbále.

⁴ Nkabén mémbē áfinté e bad bė dyad. Doŋge á bad bėntimén bad bė Israel ábíní-'ɛ bėtīmɛn bembapɛɛ bė nlómag.

⁵ Dōó bad ábe béesé bad bė Israel ne bad bė Israel nchoo ne ábáb benkamlɛne bėtífidé bán bėtagéd Paale bō Banabase bán bėlúm-me bō meláá.

⁶ Ade Paale bėsóŋténé nê, bėnsōb bėké á mbwóg e Likonia bėsól á myad mé Lистра ne Debe ne abwóg áde ábédé bɛnbɛn.

⁷ Bėkálé'áá nkalanŋ ní bwám nímé mebwóg mésyā́l.

Mam níme mébėnlédé ne Paale bō Banabase

⁸ Mod abédé á dyad á Lистра, mekuu ménwé mó. Nê dōó bėnchyaá'é mó, eékii-'áa mbéd.

⁹ Ade Paale ákaleé nkalanŋ ní bwám, ambé áhed áwōglān. Paale annyín áá awóó adúbe áá móhele módyéé bwám, dōó Paale ánóné mó chóŋ,

¹⁰ bonj áchāgtē ehōb amīn aá “S̄yāō ásē, étyéem amīn.” Ane mod ahebé-’aá amīn, ábootéd-te ake.

¹¹ Ade ndun e mod echē ebédé áhed ényíne dyam áde Paale ábélé, bēnhē e’-saad á ehōb é Likonia bán, “Myōb mēsúdé ásē métimé baányon, áhye dé awōngēn sé.”

¹² Bēnchāg Banabase bán mó adé dyōb áde bēchāgēé bán Zeuse bēchāg-ke Paale bán mó adé dyōb áde bēchāgēé bán Hēmeše áyāle mó ahōbpe’áá bómō.

¹³ Abón áde bēbēnlé’áá dyōb áde bēchāgēé bán Zeuse áte ábédé ámbíd e dyad. Né-ōō, prise awē Zeuse ampēén nyag ne mbonja á mmwe mé e’ké é’ dyad. Ambel nē, áyāle bōōbe ene ndun e mod bēhédé’áá Paale bō Banabase mende abe.

¹⁴ Ade Banabase bō Paale bēwógé dyam áde ábē bad bēhēdeé abel, bēnsalted mbóté á yāl, bēnyāgēd bēsól áttinté e ene ndun e mod bēbōnē bēhābē bán,

¹⁵ “Cheé ékōō bonj nyēbelé nēn? Sēmpē sēdii baányon melemlem ngāne nyēē nyédíí. Sēpedé hēn, ákale nyé nkalanj ní bwām níme Yesue, ábel bonj nyéchene ábēn bwēm ábe bēesé dyam dé abēlen, nyéhíde Dyōb dé alongé áde áhāgé nkonj ní mín, ní sé ne edib e nkwe ne bwēm é’syāal ábe é’dé áwēd-te.

¹⁶ Bōōd Dyōb dēntedé bad bēsýāal ábel kéchéé éche bédás.

¹⁷ Bonj kéné, alúmte e’chemléd nēn aá módé, abel áde ábēléé mekan mé bwām. Alómme nyé mbúú echē ebíde ádyōb, ábagé-’e nyé mbote á pónde eche etāngéné. Abage nyé medyé, áwōgte-’e nyé menyinge.”

¹⁸ Ké nēngāne Paale bō Banabase bēnhābpe nímmén mekan mēsýāal, éebédéé bō mwān e akan ákāj bad ábe mende níme bēhédé’áá abe.

¹⁹ Donge á bad bé Israel bēmbíd á dyad á Antýōg á mbwóg e Pisidia, bēbíd-te á dyad á Ekoniom bēpē á Listra. Bēnté ene ndun e mod nlém á abum, bōōbō bēlúm Paale meláá, bédol mó ásē, bēbided mó á dyad-té ne mewēmtēn nēn bán awédé.

²⁰ Bonj adé bad ábe bédúbpé bēpédé bonj bēlāngéd mó, anhidé ásē áttim ámbíd á dyad-té. Néé bīn é’sāngé, dōō bō Banabase békíí á dyad á Debe.

Paale bō Banabase bétimé ámbíd á Antýōg

²¹ Paale bō Banabase bēnkāl nkalanj ní bwām á dyad á Debe, bēmbēl bad híin bétim bēbé bembapee ábe Yesue. Ámbíd enē, bēntim ámbíd á myad mé Listra, Ekoniom ne Antýōg á mbwóg e Pisidia.

²² Hōm ké áhéé áde bēmpēé, bēyāgté’áá bad ábe bédúbpé Yesue bēwēde-’e bō nlém á abum, ábel bētyéem á adúbe-té. Bēyāgté’áá bō bán “Detāngéné metake akud bonj deēsāl á nkamlēn ní Dyōb.”

²³ Mwembé ké ríhéé níme bēmpēé, bēpwédáá bad ábe bēyāgte’ níme mwembé. Nzé bēnkānē, bēbíd-te yāl nzāa á mekáne-té, bēbē belyāged á mekáá níme Sāngwēé awē bēsúmmé nlém á yāl.

²⁴ Ade bēmadé mbwóg e Pisidia áte, bēmpē á mbwóg e Pamfilia.

²⁵ Bēnkāl eyale é Dyōb á dyad á Pēga, bonj bēsýōgké á dyad á Atalia.

²⁶ Áhed-tāá bēsýāngé bonj bēchābpé edib, bétimé ámbíd á Antýōg, wēe bēnkānnēdté bō bán nsimé ní Dyōb rilyāged bō áyāle nsōn níme bēmadé hōōb.

²⁷ Ade bēpédé á Antýōg, bēnlād bad bé mwembé áte, bēlāá bō mekan mēsýāal níme Dyōb ábélé mbwiined ne bō. Bēnlāā-’e bō ngāne Dyōb ánēdté nzii echē bad ábe bēesé bad bé Israel bédúbpéé Yesue.

²⁸ Bēnkoód-te mwā adýeé áwed ne bad ábe bédúbpé Yesue.

15

Mbom nkóbté á Jerusalem ámad ehōb á mwembé-te

¹ Bad behōg bēmbíd á mbwóg e Judeya bēpē á Antýōg. Bēmbootéd bad ayāged nēn bán, “Nzé béeyage mod ngāne mbéndé e Mose éhēdeé, né éekudté e’soōson.”

² Nēn dēmbēl Paale bō Banabase bēsýāntānnáá ngine ngine kōāj bōōbō bétíí bán Paale bō Banabase ne nguse é bad émpēe bēké á Jerusalem, bēké bēnyín bembapee bé nlomag ne belyāged bé mwembé tāngene áde atōn.

³ Bad bé mwembé bēnyāgēd bō á nzii. Bēmbwē á mbwóg é Fonisia ne Samaria bēlāngé bad ngāne bad ábe bēesé bad bé Israel bédúbpé Dyōb. Mmēn nkalanj ménwōgēd bad ábe bédúbpé Yesue menyinge.

⁴ Ade Paale bō Banabase bēpédé á Jerusalem, mwembé níme médé áwed, bembapee bé nlomag ne belyāged bé mwembé bēnkob bō nken. Paale bō Banabase bēnlāā bō mekan níme Dyōb ábélé mbwiined ne bō.

⁵ Bonj donje á bad ábe bédúbpé Yesue ábe bémbē epepé éche Befarisia béntyēēm amín, béháb bán, “Bétáŋgéné bad ábe béésē bad bé Israel ábe bédúbpé Yesue ayag, béléáá-’e bó bán bétáŋgéné mbéndé éche Mosēe ahíd.”

⁶ Dóo bembapēe bé nlómag ne belyáged bé mwembé békóbe mbom ánon adé akan áte.

⁷ Ade bélébé aswan̄ten dóo Petro átyéémé amín bonj áhōbē aá, “A-baányan, édé etún é póndé bōob áde Dyōb ápwédé me áfinté echēn, ákale bad ábe béésē bad bé Israel nkalan ní bwám ábel nēn bēwōg mō bédúbe-’e.

⁸ Dyōb áde ábíí-’e moosyáál nlém áte, álúmté aá móbagé bad ábe béésē bad bé Israel kunze ádúbe, abe áde ábágé bō Edáádān éche Esáá melemlem ngáne ábágé syánē ámpē.

⁹ Dyōb dénkéntédé bō aá bédé nhājlēn ne syánē ké mwámpín. Anlágēsén bō mbéb áyāle adúbe áde bēnwālē.

¹⁰ Bōob-páá, cheé ekáá bonj nyéhēdē’ Dyōb akāg, ápemed bad ábe bédúbpé Yesue nted níme ábād betaa bēnkēnhēnlé apēm níme ké syánē déehelēé apēm?

¹¹ Eebo’é nē! Dedúbpé dekadé-’e e’sóoson mbwiined ne nsimé níme Sāŋgú Yesue, melemlem ngáne bōmpē békúde.”

¹² Moosyáál anlám ehób bēwōglān Banabase bō Paal. Banabase bō Paal békánlé’áá bō e’chemléd ne menyáké níme Dyōb ábélé mbwiined ne bō áfinté e bad ábe béésē bad bé Israel.

¹³ Ade bémádné, dóo Jemse áhōbēé aá, “A-baányan, nyéwōglēn me!

¹⁴ Simōne alúmté syánē áte hén bōob ngáne Dyōb ábootédé ábē e’bonj bé nlém alúmed wée bad ábe béésē bad bé Israel, átéd áde átédé bad áfinté echáb ábē ábē bad.

¹⁵ Nēn dēn ábélé e’yale ábē nkal é’dáádān é’lóné. Eténlédé nēn bán,

¹⁶ ‘Me Sāŋgwéé nhóbé meé, nzé nēn amáá atóm, mēpē ámpē,

mēlōn ndáb echē Dabide ámpē echē empáa.

Mēlōn chōm ésyāāl éche émpāntēd áte nítmēd-te chō ngáne énsēbēé abé.

¹⁷ Nē débēl bad bé nkōnsé bésyāāl bépē áwēm,

nípwédé bad ábe béésē bad bé Israel ábē ábēm bad. Me Sāŋgwéé meé nhōbe.

¹⁸ Mēe mbelé bonj nímén mekan mebyéén se’ bōód.’ ”

¹⁹ Dóo Jemse ákagké á’só aá, “Ne me, nímēm mewēmten médé nēn meé deétagté bad ábe béésē bad bé Israel ábe bétímné Dyōb.

²⁰ Chōm éche détáŋgéné ábel édii átele bō kálag nēn bán béedyāg medyé nímē bébágé myōb mémpēe nēe mende, áyāle nímē medyé méésáa’é, béékābē mesón, béedyāg nyam echē béésēlé nkān, béedyāg-ke mekií.

²¹ Debíí nēn bán se’ bōód béléáá’áá mbéndé éche Mosēe á ndáb é mekáne á mbwe-mé-nkómē-áte. Békale-’e ábē e’yale dyad ne dyad tēé.”

Béténlé bad ábe béésē bad bé Israel kálag

²² Dóo bembapēe bé nlómag ne belyáged bé mwembé, ne bad bé mwembé bésyāāl bényíné nēn bán ébóó bán bépweđ bad áfinté echáb, bélóm bō á Antyōg nchoo ne Paale bō Banabase. Bēmpwēđ Judase awé béchágé’áá bán Basabase bō Sailas, bō bad bébe ábe belyágté’áá áfinté echáb.

²³ Kálag eche bēnlómēnnē bō á Antyōg, ebédé nēn, “Sé bembapēe bé nlómag, ne belyáged bé mwembé, áben baányan, sēlómme nyé melēntēn. Nyé ábe nyédé bānned ábe nyéésē bad bé Israel. Nyé ábe nyédyēe á dyad á Antyōg ne á mbwōg é Siria ne Silisia.

²⁴ Sēsōnténé nēn bán bad behóg ábe bēbídé áwēđ, bēmpē áwēn, bēpuutád nyé nló áte ne mam níme bēhóbé’áá. Bonj nyébii nēn bán sēnkēmbagké bō kunze ábel nē.

²⁵ Né-óó, sédyéé áse moosyáál sētífidé nēn bán ébóó sépwed donje á bad álóm bō áwēn. Bēwoón Paale bō Banabase ábe sédás bwāmbwam.

²⁶ Bō bad bébe bēbagé yāl ábele echēđ Sāŋ Yesu Krístāé ésebán bēbáa’ kwéed.

²⁷ Né-óó, sēlómme nyé Judase bō Sailas, bēlāā nyé melemlem mé mekan níme sēténlé nyé.

²⁸ Edáádān éche Esáá élyágté sé átií nēn séetagté nyé ne mekan mémpēe étómēé nímén mekan níme médé etogén.

²⁹ Nyéedyág medyé níme bēbágé myōb mémpēe nēe mende, nyéedyág mekií, nyéedyág nyam ké póg echē béésēlé nkān, nyéékābē-’e mesón. Nzé nyéēbēlé nímén mekan né ébōj. Dényínne’ ámpē.”

³⁰ Ade bémáá ene kálag atel, bēnlyāgēđ ábē bad á nzii, bēké-’e á Antyōg. Ade bēpédé áwed, bēnlád bad ábe bédúbpé Yesue bésyāāl áte bonj bébe bō kálag.

³¹ Ade ábē bad béléáá ene kálag, bēmbē menyīŋge bwāmbwam áyāle nkalān mé e’wéd bé nlém níme nībédé áwēđ-te.

³² Judase bō Sailas bēbédēé bekal bē’dáádān, bēnkalēn-ne bō áyāle e etún é póndé, bēnhōdēđ bō mewēmten bēwēđ-te bō nlém á abum.

³³ Ade bélébé mwá adyεε áwed, bad ábe bédúbpé Yesue bényāgēd bós ne nsan̄ bon̄ bétim ámbid wée bad ábe bēnlōm bós.*

³⁵ Paale bós Banabase bēndyēé á Antyog mwá etún é pōndé. Býāgtē, bēkalé-ε eyale éche Sāngwée nlatén ne ekud é bad émpēe.

Paale bós Banabase békābné dte

³⁶ Eebeméé áte ámbid enē, dō Paale álāngēé Banabase aá, “Détim ámbid, déke dénōn ábēd baányan̄ bé Krīsto dyad-té áde dékálé nkalan̄ nīme Sāngwée, bon̄ déhed-te áte ngáne mekan mékéneé bós.”

³⁷ Banabase anwōn̄ mewēmten̄ áwále Jon̄ Makose áyāl,

³⁸ bon̄ Paale annyín̄ aá éetāngeneé, áyāle Jon̄ Makose ansébé bós achene á nzii áde béēpídē nsón̄ á asóg. Antédé bós á dyad á Pamfilia átim ámbid.

³⁹ Mpentēn̄ ní ngíne mēmpē áfintē echáb kóñ békāben̄ áte. Banabase antéd Makose béchābē edib bēké á alon̄ á Saiprus.

⁴⁰ Paale ámpē ampwēd Sailase. Baányan̄ bé Krīsto bēnkānnēd bós bán nsimé nīme Sāngwée rilyágte bós.

⁴¹ Paale ambwēn̄ Sailase á mbwóg e Siria ne Silisia békag bēwēdē mwembé áte.

16

Timotiē awōñné Paale bós Sailas

¹ Paale bēnkē á myad mé Debe ne Listra. Mod nhóg abédé áwed awē béchāgē'áá bán Timotiē. Nyaá abédéé mmwaád á Israel, mōmpē andúbé Yesue, bon̄ sáá abédéé mod a Griika. ² Bad ábe bédúbpé Krīstə á myad mé Listra ne Ekoniom bésyāāl bēnhōb mam mé bwām tāngene Timotiē.

³ Ngáne Paale áhédé'áá Timotiē awále áyāl, an'yag mós. Ambel̄ nē áyāle bad bé Israel ábe bēdédé nīme mewwóg bēmbī bán Timotiē sáá adii mod a Griika.

⁴ Paale bós Timoti békāgē'áá myad ne myad bēlāngē bad ábe bédúbpé Krīstə mekan nīme bambapεε bé nlomag ne belyāged bé mwembé bé Jerusalem bétíídé, bēlāngē-ε bós bán bēhíde mímé mekan.

⁵ Né-ós, mwembé rísyāāl mēmbootéd awúu áte á adúbe-tē meson̄gé mé bad-te méchāgkē epun-téé.

Paale anyíné ndóg

⁶ Paale bōobe baáb bēmbwē á mbwóg e Frigia ne Galesia áyāle Edəədan̄ éche Esáá énkēnkwenténné aá bēkal nkalan̄ ní bwām á mbwóg e Esia.

⁷ Ade bēpédé á nchií mī mbwóg e Misia bēnwānēn̄ asól á mbwóg e Bitinia, bon̄ Edəədan̄ éche Yesue énkēmwaá aá bēsól.

⁸ Né-ós, bēntōm á Misia, bésyōgē kóñ bēpē á dyad á Troas.

⁹ Mmē nkuu Paale annyín̄ ndóg. A ndóg-te wē, mod a mbwóg e Masēdonia antyēém áchāā mós aá, “Hyág, á Masēdonia, éhye éwōngēn̄ sé.”

¹⁰ Paale amaa'-aá ndóg anyín̄, dō séládé yāl áke á Masēdonia áyāle séndōl áte nēn bán Dyōb áchénlé sé ákal nkalan̄ mī bwām áwāb.

Mmwaád nhóg awē béchāgēé

bán Lidia adúbpe

¹¹ Sēnsól á Stíma á Troas, séké á Samotras ésebán sētyéeme á nzii. Néé bīn̄ é'sāngé sétimé' á Niopoli.

¹² Sébídé'-aá áhed, séke a Filipi. Filipi adii dyad ámbáá á mbwóg e Masēdonia. Abédé kóñne dyad áde mbéndé é Roma chēmpen̄ chōó bēbēnládtáá. Sēdyεé áhed nguse é e'pun.

¹³ A Mbwe-mé-nkōme-áte, sēnsyāó á dyad-té séké á nkin mé edib. Sēnwémtēn̄ bán séētān̄ abwóg á hōm áhed wée bad bé Israel békānnēé. Sēndyεé áhed ne bebaád ábe séntānnē néé bēlādné áhed, syāābōó sékale'.

¹⁴ Afinté e ábē bebaád mmwaád nhóg abédé áhed awē béchāgē'áá bán Lidia awē ámbid á dyad á Tiatira. Akábé'áá nyon̄gé, ásōmē' mebad nīme méyāge' nīme mēlélé nkun. Ane mmwaád abēnlé'áá Dyōb. Sāngwée ankéléd-te mós nlém á abum áwōglēn̄ chōm éche Paale áhōbēé.

¹⁵ Bēndusēn̄ mwēn̄ ne eche ndáb esyāól. Ámbid enē, anlébé sé áwe ndáb. Anhōb aá, “Nzé édé bán nyétédé mē nēñgáne mod awē akoó Yesue adúbe, nyéhye nyédyεε áwēm ndáb.” Ámbádnēn̄ sé kóñ séké-ε.

Béhédé Paale bós Sailas á mbwóg

* 15:33 Donge á kálag dé'só ábádé nchoo 34: 'Bon̄ Sailase pen̄ antii aá mōslyōg áhed.'

¹⁶ Epun ehóg-kòò, sènkě á abwóg dé mekáne, dòò ngòndéré e ntàñ póg étáné sé. Edàádàñ é mbéb émbé mó áte, ébélé'áá álàngē bad mam míme mébènléd á'sò é pòndé. Ene nganj éché ákúme'áá embēl bad ábe bènchan mó ntàñ békudé ndun e moné.

¹⁷ Hée ábóótédé syáábe Paale ahíd, ábòñé áá, “Abén bad bédii bembàde ábe Dyòb á Ngum. Béhyédé nyé aláa ngáne nyémwéé e'soóson akud.”

¹⁸ Ene ngòndéré elébé abel nē, epun ne epun-té. Kóñne á asóg Paale anññ, dòò ákúnnédé bonj álàngē' éché edàádàñ éche émbē ene ngòndéré áá, “A òin á Yesu Krístə, nkamlan we nēn méé, bíd enén ngòndéré áte!” Abwóg-abwóg éché edàádàñ émbíd mó áte.

¹⁹ Ade bad ábe bènchàn ene ngòndéré ntàñ, bényíné bán nzii e ngáb ekònlédé bó, bēntl Paale bó Sailas bédolé bó, békēñ bó wée benkamlene ábe bēbédé áfinté e dyad.

²⁰ Bēmpēñ bó wée benkamlene bé Roma, bēlàngē bó bán, “Abén bad bédii bad bé Israel, bonj bépédé áwēd hén, bépēñé mpongé.

²¹ Bényágte bad e'lem bé mbéb ábe mbéndé éche syáné éehedéé. Syáné bēn dedii bad bé Roma, né-òò, deéhēlē-se dékob nē, deéhēlē'-e-se dehid nē.”

²² Amute dómpe dénsl áte ábònléd Paale bó Sailas. Dòò benkamlene bé Roma bésáltédé bó mbóté bēhúd-te bó chí á yál. Dòò bēlómé bad bán béswádted bó e'tanjú.

²³ Bémáá'-áá bó awanen bwám bonj bēhág bó á mbwóg, bēláá'-e nnóné mbwóg bán eehúde bó òid á yál.

²⁴ Bēlàngē'-áá nnóné mbwóg nē, ahé bó á tonj e ndáb e meláá echē edé áte. Anhé bó e'pwóg á mekuu.

²⁵ Dyam melúde mé nkuu, Paale bó Sailas békánné'áá békōñne'-e Dyòb ngəse. Bad bé mbwóg ábíní bésyāal bēwóglánnáá bó.

²⁶ Abwóg-abwóg dòò ndəob éñáñnéde ásē ngine-ngine. Ndáb e mbwóg éñáñnéde se á mekon. Melemlem mé pòndé e'kob é'syāal bēndibnéde, bengəbengəbē ábe bēmbē bad bésyāal áyāl bēnhunnéd.

²⁷ Ade nnóné mbwóg ápádté ásē bonj anyín ngáne e'kob é'syāal é'nédnéde, anwémtn áá bad bé mbwóg bésyāal bémáá asob. Hée átéde páá áá mósóo' yál.

²⁸ Dòò Paale áchágté ehób ámín bonj álēbpē áá, “Weewúé yál! Sé moosyāal séde hén!”

²⁹ Hée nnóné mbwóg áhóbé áá bēpiined mó etrukán, asl á ndáb-te, ákwē Paale bó Sailas á mekuu ánəə' ne mbwóg ní ngine.

³⁰ Dòò ábidné bó á ebwóg bonj ásedtē bó aáken, “A besán, cheé ntàñgéné abel ákud e'soóson?”

³¹ Bēnlāá mó bán “Dúbé Sánjú Yesue, bonj ékud e'soóson, ádòñ abum á ndáb dómpe dékúð.”

³² Bēnkale mó ne moosyāal awē ambé mó á ndáb nkalanj ní bwám míme Sánjúwéé.

³³ Ene pòndé chēn, mímé nkuu, ane nnóné mbwóg antéd bó, áwòbē bó síi áte. Hē òen bēndusēn mó ne eche ndáb esyāal.

³⁴ Dòò ásnlé Paale bó Banabase á ndáb-te bonj ábagé bó ndyéed. Mwēn ne áde abum á ndáb bēmbē menyinge áyāle adúbe.

³⁵ Néé bñ é'sánge, benkamlene bēnlòm plúse ne nlébtéd nēn bán, “Nyéchene ábē bad békag.”

³⁶ Hée nnóné mbwóg álàngēé Paale áá, “Benkamlene bēlómé nlébtéd nēn bán béchene nyé Sailas. Né-òò, nyébid nyékag ne nsan.”

³⁷ Dòò Paale álàngēé éché plúse nēn áá, “Béswádtédé sé e'tanju á nhéné áde séebelé dyamyam, áde sédí'-áá bad bé alonj á Roma, bēhé'-e sé á mbwóg. Bonj bəob bēhedé sé ábidé á mesəom-tē-ye? Eeheléé-se ébé nē. Abé benkamlene bé Roma bēn bétáñgéné ape béhye bēbídéd sé.”

³⁸ Plúse énkē benkamlene bé Roma aláa ngáne Paale áhóbé. Ade ábē benkamlene bēwógé bán Paale bó Sailas bédii bad bé Roma, mbwóg menkób bó.

³⁹ Né-òò, bēnkē Paale bó Sailas achán, bēbídéd bó á mbwóg bēláá'-e bó bán ébonj bán bésyāə áwáb dyad.

⁴⁰ Paale bó Sailas bēmbíd á ndáb e mbwóg, békē á ndáb wée Lidia. Ade bépédé áhed, bēntān bad ábe bédúbpē Krístə. Paale bó Sailas bēnlāá ábē bad e'yale ábe é'wéde bó nlém á abum. Bémáá'-áá bó aláa bonj bésyāngé.

17

Paale bó Sailas bēkti á Tesalonika

¹ Paale bó Sailas bēmpōñj á myad mé Amfipolis ne Apolonia, bēpē á dyad á Tesalonika. Ndáb e mekáne e bad bé Israel émbé áhed.

² Paale ammentén áke á ndáb e mekáne, né-òò ankē áwed. Andyé áwed sòndé éláán. A Mbwe mé Nkóme áte téé, akánlé'áá bad nkalanj ngáne mbídé á kálag e Dyòb.

³ Atógnádtáá bós mam níme ákanlé'áá bós, álúmtē-'e bós áte nén aá Ane-awē-Béwógté atángéné nēe ákúdé metake apūū-'e ámbíd e kwééd. Alángé'áá bós aá "Anén Yesue awē rílánjéé nyé nén, mós adé Ane-awē-Béwógté."

⁴ Donje á bad béndübē bán chóm éche Paale áhóbé'édé mbále, né-óó, bēntimén Paale bós Sailas. Bad bé Grikia híin ábe béndübē Dyób ne ndale é bebaad bé dyad híin bómpe bēntimén Paale bós Sailas.

⁵ Bon donje á bad bé Israel bésídé'áá Paale bós Sailas. Né-óó, bēnlád donje á bad bé mpongé áte, ábe bēbédé á dyad-tē. Bēmbuú áte bēpēēn-ne etóggé é ngíne. Bēmpēēn epuutéđ dyad áte ásyāāl, bēból á ndáb wēe Jasene ábel bon békób Paale bós Sailas bēbídén bós á tál e ékwéé.

⁶ Bon áde bēnóné Paale bós Sailas bon bēenyíne bós, bēndól Jasene ne bad bēmpēe ábe bédúbpe Yesue, bēpēēn bós á'sō é benkamlene bé dyad. Bēbóné'áá bán, "Abén bad bēpēēné epuutéđ hóm ásyāāl. Bóob-óóó, bēpédé kóáñne áwe syáné dyad.

⁷ Jasene ákōō-'e bós áwe ndáb. Bébóo' mbéndé eche Kaisēe. Béhóbe nén bán kōñ empēe edé eché béchágéé bán Yesue."

⁸ Mmén mekan níme bēnhōbpē mēmbēl ene ndun e mod ne benkamlene bé dyad bēpuuted.

⁹ Benkamlene bé dyad bēmbēl Jasene ne bad ábe bédúbpe ábe bēnkōbpē, bós bōó bésábé mōné ábel bētede bós, bon bētedé bós.

Paale bóobe baab békúde metake á Beria

¹⁰ Bín é'híné-'aá hínén, bad ábe bédúbpe Yesue bélóm Paale bós Sailas á Beria. Ade bēpédé áwed bēnké á ndáb e mekáne.

¹¹ Bad bé Beria bēnwōñ nlém áwóglēn eyale é Dyób tómaa bad bé Tesalonika. Epun-té, bēláá'áá kálag e Dyób ásoñten ányín ké mekan níme Paale bós Sailas bēhóbé'áá mēdé mbále.

¹² Ekud é bad éndübē. Ndále é bebaad bé Grikia híin ne baachóm bé Grikia híin bómpe béndübē.

¹³ Bon áde bad bé Israel bé Tesalonika bēwógé bán Paale akalé eyale é Dyób kóáñne á Beria, bēmpē áwed, bēbōótéd ekud é bad asól áte ápēen epuutéđ.

¹⁴ Abwōg-ábwōg dóo bad ábe bédúbpe Yesue bélómé Paale á nkin mé edíb é nkwe, bon Sailas bós Timoti pēn bēnlyóg á Beria.

¹⁵ Bad ábe bēnké Paale alyágéd, bēnkēén mós kóáñ bēpēēn mós á dyad á Atens bon bétimé ámbíd á Beria. Ade bétiméé ámbíd, Paale anlyágtén bós aá bēláa Sailase bós Timoti nén bán béhye bétán mós á Atens ésebán bēbēbte póndé.

Paale akanlé bad bé Atens

¹⁶ Paale andyē á Atens ásiné' Sailase bós Timoti. Ngáne ásiné'áá bós, nlém mēmbēb mós á abum bwámbwam áyāle annyín nén aá myób mēmpēe níme bēbageé edúbé mēlóné dyad áte ásyāāl.

¹⁷ Né-óó anké á ndáb é mekáne ákanlé bad bé Israel ne bad ábe bēesē bad bé Israel ábe bēbage Dyób edúbé. Akagé'áá kóáñne áfnté e dyad epun téé ákanlé kénzēé awé ampé áhed.

¹⁸ Bóobe bad ábe bēbédé á e'pēpé ábe bēchágé'áá bán Epikurian ne Stóik bómpe bēpētánnáá. Donje ásédté'áá bán, "Cheé anén mod awé abíde dúu múmós áhóbé'áde éebíí' é dyamdyam?" Bēmpēe bēhóbé'áá bán "Edé kabyánán ahóbe tñngene myób mēmpēe." Béhóbé'áá nē, áyāle alángé'áá bós tñngene Yesue ne mpuu.

¹⁹ Dóo bētédé Paale bēkēēn mós á káánsel e mbwóg eche bēchágé'áá bán Ariopagus.* Bēnhób bán "Sédaá ádén ayáge dékōōlē áde élánjéé bad ásoñten.

²⁰ Donge á mam áde éhóbé'áde sé nken á etúu, séédāñ-'e mós ásoñten."

²¹ Bad bé Atens bésyāāl ne beken ábe bēbédé áwed, bēbēbté'áá echab póndé esyāāl ákal ne áwóglēn nkalan tñngene dyam dékōōlē-té.

²² Dóo Paale átyéémé ámín á'sō é káánsel é Ariopagus bon áhóbé nén aá, "A-bad bé Atens nnyíne' nén méé, nyébage myób edúbé bwámbwam.

²³ Nhóbe nén áyāle áde rítóméé nyé á dyad-té, nnóné mebón níme nyébageé myób edúbé. Nnyíne abwóg ahóg áde nyétélé áhed nén bán, 'Hóm áde dyób áde déebyéene.' Adé dyób áde nyébageé edúbé kénéé nyéebíí' é dós, dóo rílánjéé nyé bōob.

²⁴ Dyób áde áhágé nkōñsé ne chóm ésyāāl éche éde áwed-te, mós adé Sánjwéé a nkonj mí mín ne rísé. Eédyéé' é á ndáb é myób éche baányonj bēlónjné mekáá,

²⁵ ééhēdē-'aá chómchóm éche déhele débe mós abale áde débēnléé mós. Ngáne edíí nén bán mwēn-éé abage alongé, ábage pemē ne kéchéé éche déhédeé.

* 17:19 **Ariopagus:** Abédéé káánsel e mbwóg á dyad á Atens.

²⁶ Mod nhóg mós ánsēbēē ahəg boŋ metúmbé mé nkòŋsé mésyāāl mébíd mbwiined ne ane mod nhóg. Abelé bédyēē-ē nkòŋsé áte rísyāāl. Adēhób áá mshəge bó ammad pónde atii ne mebwóg wēē bédyēē-ē.

²⁷ Ambel nēn, ábel boŋ bēhed mós, nzé bēhédé-ē mós bēhele-se bényín mós awóg áde bėwógé mós áyāl. Kénē, Dyöb déechabnedéé syānē modmod áyāl.

²⁸ Edé nēŋgáne mod nhóg áhóbé áá, 'Abé áde dédíí ne mós, dedé á alongé, dekag, dedé-ē chöm éche dédíí.'

Edé-ē ámpē ngáne bekal bé ngan bēhóbé bán, 'Syānē ámpē dedíí ábe bán.'

²⁹ Ngáne dédíí-áá bán bé Dyöb, deetāŋgeneé néé dékamtannē nēn bán Dyöb ádíi nēŋgáne chöm éche bėbēnlé gól, sílva ké'ē aláá áde baányon bėbēnlédé ádab debyéé boŋ bėlóón mekáá.

³⁰ A pónde eche bad bėnkėmbíí'ē Dyöb, Dyöb dénkėntédté mbėb nímab nēŋgáne dyam. Boŋ bəob aláŋge' moosyāāl hóm-té áá bėtēde nímab mbeltéd mé mbėh.

³¹ Amaá-ē epun é bín atii, éche ákáádté mod-téé nkòŋsé áte rísyāāl nyaa eché etāŋgéné. Apwedé mod awē ákáád nímé nkáá. Alúmté-ē moosyāāl áá ane mod akwóŋgnédé, apuud áde apúúdté mós á kwééd."

³² Ade ábē bad bėwógé Paale ahóbé tāŋgene mpuu, donje á bad bėwéláá mós boŋ bó donje á bad bėnhób bán, "Sēhede bán ékale sé nímé nkalanj ámpē."

³³ Ámbíd e nē, Paale anhidé áfínté echáb.

³⁴ Kááj ne á asóg, nguse é bad éntimén Paale bėdúbé-ē Yesue. Atínté e ábē bad, mod abédé áhed awē bėchágé'áá bán Dionesiose. Abédé mod á káánsel é Ariopagus. Mmwaád ámpē abédé áhed awē bėchágé'áá bán Damarise ne bad bėmpēe.

18

Paale akii á dyad á Kōrinto

¹ Ámbíd enē, Paale anhidé á dyad á Atens ákē á dyad á Kōrinto.

² Ade ápédé áwed antán mod á Israel nhóg awē bėchágé'áá bán Akwilaa. Bėnchyāā mós á Pontus. Mmē mesú mēn dōó bó mwaád, Prísilia bėmbídtē á Italia. Bėmbíd á Italia áyāle Kaisē á Roma, Kladiose antóméd ehāŋgé áá bad bé Israel bėsyāāl bėsyāā á dyad á Roma. Paale ankē Akwilaa bó mwaád anyín.

³ Andyēén bó bōsbōó bėbele nsón. Bōmpē, bėlóó'áá tēnde ákud mōne nímé bėtōgnanné yāl melemlem nēŋgáne mōmpē ábélé'áá.

⁴ Mbwē mé Nkóme áte téé, Paale akagé'áá á ndáb e mekáne, ákanlé bad bé Israel ne bad bé Grikia ábel bėdúbe mam níme áhóbéé.

⁵ Ade Saílase bó Timoti bėbíde á Masēdonia boŋ bétán Paale, ambē eche yāl esyāāl ákal nkalanj m bwám. Alúmté'áá bad bé Israel áte áá Yesue mós adé Ane-awē-Bėwógté.

⁶ Boŋ bėpéntánnáá mós, bėhōbē-ē mós mekan mé mbėb áyāl. Nē dēmbēl Paale ankūd ebumbú á yāl álúmed bó nēn áá nkòŋsen rí Dyöb rísine' bó, aláá-ē bó áá, "Nzé nyēbōó, né nyēbēn-ē nyēbélé. Meésáá me áte. Bootya bəob, nkag nkalanj m bwám akal wēē bad ábe bėesē bad bé Israel."

⁷ Né-ōó Paale antédé bó áke ádyéé' wēē mod nhóg awē bėchágé'áá bán Titus Justuse. Tituse abagé'áá Dyöb edúbé, ndáb embē-ē mós benben ne ndáb e mekáne e bad bé Israel.

⁸ Krispuse awē alyágté'áá ndáb e mekáne mōmpē andúbé Sāŋgwéé nchoo ne adé abum á ndáb ásyāāl. Bad híin-ne ábe bėmbē á dyad á Kōrinto, bėnwóg nímé nkalanj, bėdúbe, bėkūd-te edusen.

⁹ Ebédé nkuu nhóg Paale annyín ndóg. A ndóg-te wē, Sāŋgwéé anláá mós áá "Weebáá', kanlé bó ékag á'só, weétimné mbíd.

¹⁰ Bii nēn wēé ndé ne wē, modmod ééhēlēē wē dyamdyam abel, áyāle ábēm bad híin bédé á dyad-té hén."

¹¹ Né-ōó, Paale andyéé áwed mwē nhóg ne eped, áyāgté bad eyale é Dyöb.

¹² Ade Kaisēe ábélé Galio nkamlenē ambáá á mbwóg e Akaya, bad bé Israel ábe bėmbē áwed bėnladén, bėkób Paale, bėkēēn mós á kóte.

¹³ Bėnhób nēn bán "Anén mod atéde bad nlém á abum áá bėbēnle Dyöb, nyaa eché etāŋgene ngáne mbéndé éhóbéé."

¹⁴ Ade Paale áhóbé áá mshób dyam, dōó nkamlenē Galio álanjéé bad bé Israel áá, "Nzé ádén akan dēmbē néé awusé ké'ē dyam dé ebébtéd áde mod ábélé, né nwóó nzom áwóŋŋen nyé bad bé Israel.

¹⁵ Boŋ ngáne édíí bán ádíi dyam dé mpentēn tāŋgene e'yale, mīn ne échen mbéndé, nyēbēn nyēmad dō. Meekáádtéé échē ndin é mehób."

¹⁶ Nén dëmbël Galio anan bô á ndáb e kóte.

¹⁷ Héé bô moosyaál bétólé mod awé alyágté'áá ndáb e mekáne awé béchágé'áá bán Sæstene, boŋ bébómé mós á'sô é' kóte. Boŋ nén dénkëmbenlé Galio dyamdyam.

Paale atimé ámbid á Antyoŋ

¹⁸ Paale ankoód mwá adyee á Korinto ne bad ábe bédúbpé Kristæ. Dóo átédté bô, boŋ asól á stíma, áchabpé edib é nkwe ákág á mbwóg e Siria. Adêkë, ankë ne Prisilia bô Akwilaa. Adêhidé á dyad á Senkria, ankæon nló áyåle melé níme ámmwëë.*

¹⁹ Bëmpé á Efesus. Ade bépédé áwed, Paale antedé Prisilia bô Akwilaa, ákë á ndáb e mekáne bôobe bad bé Israel békale'.

²⁰ Abé bad bënlaá mós bán bôbôo békood mwá adyee ámpë, boŋ enkënkwenténné.

²¹ Boŋ adé áhidté, anláá bô áá "Nzé ntii ní Dyöb mós ndé, né mëtüm ámbid áwën." Né-óó, ansól á stíma áhildë-é á Efesus.

²² Ade ápédé á dyad á Kaisaria, ankë á Jerusalem, ákë áléled bad bé mwembé, boŋ ákág á Antyoŋ.

²³ Ade ákëlébpe mwá adyee áwed, anhidé, ákë á mbwóg e Galesia ne Frigia ábagé bad ábe bédúbpé Yesue bésyääl elébé áwéd bô nlém á abum.

Apolose akalé eyale é Dyöb á myad mé Efesus ne Korinto

²⁴ Ámbid ené, mod a Israel nhóg awé béchágé'áá bán Apolose awé bënchyäá' é á dyad dé Alesandria ampë á Efesus. Anén mod abyéé'áá dyam ahób bwámbwam, ansóntén-ne kálag e Dyöb bwám.

²⁵ An'yágé mekan mé nzii e Sánjú. Akalé'áá, áyágtë-é bad mekan níme Yesue nyaa eche etánjéné ne kán esyáál. Boŋ pen edusen eche Jone chëmpen chós ámbil'í.

²⁶ Ambootéd póle akal á ndáb e mekáne ésebán abáa' dyamdyam. Ade Prisilia bô Akwilaa béwógé mekan níme áhóbéé, béntéd mós, békëen mós wée bédyéé'áá. Hé-'áá bélúmté mós mekan mé nzii e Dyöb áte nyaa eché etánjéné.

²⁷ Apolose antíí áá mókag á alon á Akaya. Né-óó, bad ábe bëndübé á Efesus bënwöŋgën mós. Béntelé bad ábe bédúbpé Yesue á Akaya nén bán nzé apedé, békob mós nken. Ade ápédé áwed, anwöŋgën bad bënwbwam ábe bëndübé Yesue áyåle nsimé ní Dyöb níme békúdé.

²⁸ Ne mpenten ngíne, antóm bad bé Israel áte ántinté e bad. Abenlád metón níme mébidé á kálag e Dyöb álúmed nén bán Yesue mós adé Ane-awé-Béwógté.

19

Paale akil á Efesus

¹ Apolose ambé abé á Korinto, dóo Paale ápóó ene ped e mbwóg áte boŋ ápag á Efesus. Antán nguse é bad áwed ábe bédúbpé Yesue.

² Dóo ásedtéé bô áá "Ade nyéndübëë nyënküd Edaðáŋ eche Esáá-ye?" Bëntimtén mós bán, "Aáy, séëwögëé ké wógën bán chöm édé eche béchágéé bán Edaðáŋ eche Esáá."

³ Paale ansedéd bô áaken, "Nyaa e edusen ehéé-ó nyënkudté?" Bënkwentén bán, "Nyaa e edusen eché Jone áhóbé'áá."

⁴ Paale anláá bô áá, "Nyaa edusen eché Jone áhóbé'áá ebédéé áyåle bad ábe bétédte abel dé mbéb, Jone álanjë-é bad bé Israel áá bédúbe ane awé ápe ámbid eché, nédë Yesue."

⁵ Ade ábë bad béwógé chöm eche Paale áhóbé, bëndusen bô á dñn áde Sánjú Yesue.

⁶ Paale ambán bô mekáá á nló, Edaðáŋ eche Esáá épií-é bô. Dóo bébóótédé mehób mëmpëe ahób níme bad béesóntánne, békale-é nkalon ní Dyöb.

⁷ Abé bad bébéde dyam dyóm ne bébe.

⁸ Paale andyë áwed dyam ngön élaán. Póndé-té akagé'áá á ndáb e mekáne, ákanlé bô ésebán abáa' dyamdyam. Bôbôo bépéntánnaá, áwané-é áte ábel bédúbe nén bán chöm eche áhóbéé tãngene nkanlen ní Dyöb édé mbále.

⁹ Boŋ bô donje á bad bënwlü nló áte, béekoppe adúbe, béhōbe-é mekan mé mbéb tãngene Nzii e Sánjú á'sô é bad bésyääl. Né-óó, Paale antedé bô, ákëen bad ábe bédúbpé. Epun-té* bôbôo bépéntánnaá á ndáb e ayáge eché meléede Tiranuse.

¹⁰ Paale ambel nén á etún é mwë nibe. Nê dëmbël bad bé Israel ne bad ábe béesë bad bé Israel ábe bédyéé'áá á mbwóg e Esia bënwöŋ eyale é Dyöb.

Bán ábe Skeva bëwänné ábided bad e' dæðáŋ bé mbéb áte

¹¹ Dyöb dëmbël Paale ábelé mam mé menyáké níme bad bënkëmmënténné anyín.

* **18:18** Bad bé Israel bënwöŋ elem nén bán, nzé mod amwédé melé boŋ alsógté nímé melé átánjéné néé ákánjné nló.
* **19:9** Donje á kálag dé'só ábádé nchoo bootya dyóm á ngön ne pág e' mbwembwe ápe ngön éniin é' ngukél.

¹² Bad bétédé'áá ké betumbé ké'ε bewángεε ábe Paale ábénlédé, békεεn wεε bad bé nkole, bébenlád bó ámad bó nkole, bébídtε-ε bó e'dáádεn bé mbéb áte.

¹³ Donje á bad bé Israel ábe bómpé békágé'áá mebwóg ne mebwóg bébídté bad e'dáádεn bé mbéb áte, bómpé bεnwanén ábenled dín áde Sánjú Yesue ábel mímén nsón. Bélángé'áá e'dáádεn bé mbéb bán, "Nkamlan nyé á dín áde Yesue awé Paale ákanléé bad, nén méé nyébídt ane mod áte."

¹⁴ Prisε ambáábáa a bad bé Israel nhóg abédé awé béchágé'áá bán Skeva. Anchyáá bán bé baachóm saámbé. Abé bán bóó bébélé'áá nê.

¹⁵ Bonj póndé póg, edáádεn é mbéb énláá bó nén áá "Mbíí Yesue, mbíí-ε Paale, benzéé nyé-ε nyédíí?"

¹⁶ Héε ane mod awé edáádεn é mbéb ébédé áte, ábónlédé bó ne ngine esyáál, atóm-mε bó áte. Bédéhób bán bétóme mehélé né amaa bó alógen, ámad-tε bó mbóté anyabted.

¹⁷ Bad bé Israel ne bad ábe béesé bad bé Israel ábe bédyéé'áá á Efesus bεnwóg ádén dyam. Ade béwógé dó, mbwóg ménkób bó bwámbwam. Dín áde Sánjú Yesue dó-ε éenküd edúbé éche échábé ámín.

¹⁸ Bad híin ábe béndübé, bεmpé á nhéné, bépanlé yál áte, béhóbé' mekan mé mbéb níme békébenlé.

¹⁹ Bad híin ábe békúmé'áá ngan béntéd échab kálag éche bébénládtáá ákum ngan, bεpεn chó, béhyáád chó á nhéné. Kálag ésyáál éche bεnhyáádtε éhíáá-se ébe nkun dyam móom mé mílín métáan.

²⁰ Mmén mekan mésyáál níme mébenládtáá ménkán bad híin béndübé eyale éche Sángwéé, nímé nkalan ríkanlád-tε ngine ngine.

Mpongé mpédé á dyad dé Efesus

²¹ Ade nímén mekan mémáá ábenled, Paale ammad áwé nlém-té áá móóporj á mbwóg é Macedonia ne á Akaya bonj ákag á Jerusalem. Dóó áhóbeé áá, "Nzé mbidé á Jerusalem ntánjéné áke á Roma."

²² Né-óó, anlóm bad bébe ábe béwóngánáá mó, Timotiε bó Erastus á Macedonia, mwén-ne ályág á mbwóg e Asia, ádyεε ámpé mwá esón é póndé.

²³ Enén póndé chεn dóó mpuutéé nín ngine mbédé á Efesus tánjene Nzii e Sánjú eché bad béhíde'áá.

²⁴ Mod nhóg abédé bán Demstruse. Alúé'áá bwém bé e'kii. Abelé'áá bwém ábe bεnwágεn bwém é' ndáb e dyób áde béchágé'áá bán Atemise. Mmén nsón nípínádtáá ábe bad bé nsón nsyánj níme ríchábé ámín.

²⁵ Anlád abé bad bé nsón áte ne bad ábe bómpé bébélé'áá ene ndín e nsón, álángé bó áá, "Amúé, nyébíí nén bán níme syáne nhon rísyáál ríhúú ne mímén nsón níme débéleé nén.

²⁶ Bóob-póó, nyébén nyényine', nyéwóge-ε chóm éche anén Paale ábéléé. Áhóbe nén áá myób níme bébénlé mekáá méesaá myób ne abé dεn. Abelé-ε bad híin ábe bédé á Efesus ne á mbwóg esyáál e Asia, bédúbpe bán mam níme áhóbeé méde mbále.

²⁷ Né-óó mbáa' nén méé, nyongé eche syáne ébeb dín. Saá-kaá nê dεmpen, mbáa' méé kááne ndáb e ndale e dyób, Atemise chómpé éebáá dyam dé abelen ámpé. Bad béenyinné mó ámpé néε dyam, áde édíí-áá bán adíi dyób áde bad bé Esia bésyáál ne bad bé nkójsé bésyáál bébenléé."

²⁸ Ade ene ndun e mod éwógé nê bεnlinj bwámbwam, bébootéd-tε abón bán, "Atemise, dyób dé Efesus adé ngum tómaa myób mésyáál."

²⁹ Mmé mpuutéé ménkonnéd dyad áte ásyáál. Ene ndun e mod entól Gayεε bó Aristakuse ábe bεmbíd á Macedonia ábe bóobe Paale bεnwónj. Béntómεn bó mehélé, békεεn bó á ndáb e mbom e bad bé dyad.

³⁰ Paale mwén ambonjén ábíd ene ndun e mod á'só, bonj bad ábe bédúbpe Yesue bεnkékwenténné.

³¹ Nguse é bad ábe béhóbpaá mbwóg ábe bóobe Paale béwóó'áá, bómpé bεnlómé mó nlébtéd, ne mechángé nén bán eékáge' áá mókag bad atyéem á'só wεε beládné.

³² Ene póndé, epuutéé émpé á mbom-té. Donje á bad bébóné' áyale dyam ahóg, ábíníí-ε bébóné áyale ádíníí, áyale bó bad híin bεnkémbíí' é ké atón áde áladé bó áhed.

³³ Ngáne édíí nén bán Alesandaa móó bad bé Israel bεntómédte á'só, bad behóg bélángé'áá mó bán mó atónjéné bad mekan alúmed áte. Héε Alesandaa álúmté ekáá áá bad bélám ehób. Ahédé'áá bad alúmed áte nén áá saké bóobe ábε bad békáá bonj mpuutéé mbé.

³⁴ Bonj áde bad béchémé nén bán Alesandaa adíi mod a Israel, bó moosyáál bεmbootéd abón bán, "Atemise, dyób dé Efesus adé ngum tómaa myób mésyáál." Bεmbón nén áyale háwa ébe.

³⁵ Kóáŋ ne á asóg, mod a mbwóg nhóg mós ambéd bad áte. Anhób aá, “A-baányan bé Efesus, moosyál abíí-é aá dyad dé Efesus dós anone ndáb e mekáne eche Atemise, eche syánē ndale e dyöb. Moosyál abíí-é aá adén dyad dós anóne kóáŋne aláá á nŋeŋgú áde ábidé ámin.

³⁶ Ngáne nyé moosyál nyébíí-áá nén bán modmod eéhēlē-se ahé nímén mekan nswan, éebo’-é bán nyépeen mpongé ké nhóg.

³⁷ Ké nŋgáne nyébéé né ábén bán had hén, béechibéé chómchóm á ndáb é myöb, bééhóbeé-é áded dyöb mekan mé mbéb áyál.

³⁸ Né-óó, nzé Demetruse ne ábē bad bé nsón béwónné mod mehób, bébii nén bán e’pun é kóte é dé, bad bé mbwóg-ke bédé ábe békáadte. Béhele-se bésómén ane mod áhed.

³⁹ Nzé-é chóm émpēe édé éche nyékoo’-é áhed né mbom mí bad bé dyad, mós mēyālē, ngáne mbéndé ékalé.

⁴⁰ Nhóbe nén áyale dyam áde ábénléde chii, ngómenaa a Roma áhōb aá syánē depēéné mpongé. Nzom ké póg eesaá eché débēléé nímén mpuuted’ rísyāā. Nzom e bwām ké póg-ke eesaá eché dehele débēe bós áyale nímén mpuuted’.

⁴¹ Ade ámáá ahób nē anláá bad aá mod téé asúe’ áwe ndáb.

20

Paale akil á Masēdonia ne á Grikia

¹ Ade mpuuted’ nímáá bon ekide émad ahós áte, Paale anlād bad ábe bédúbpé Yesue áte, ályāgtān bós ne e’yale ábe é’wéde bós nlém á abum. Ade ámáá bós alyāgtēn dós áhídtē, bon ákág á Masēdonia.

² Akagé’áá échē mbwóg, álāngē bad nkalan hii nímē ríwéde bós nlém á abum. Dós ápédé á Akaya.

³ Andyéé-é áhed á etūn e nŋon éláán. Abōhsánáá áke á alon á Siria, dós ásoŋténé aá bad bé Israēl béhagke mós áwúu mós. Héé átiídé aá mósōtīm ámbíd mósbwē á Masēdonia.

⁴ Bad hii bēnwoón mós. Bébéé Sopataa, mwān awe Piiruse awé ámbíd á Beria, Aristakuse bós Sekundus ábe bēmbíd á dyad a Tesalonika. Gayose awé ámbíd á dyad a Debe, Timotie, ne Tikikusé bós Trofimus ábe bēmbíd á mbwóg e Esia.

⁵ Ábén bad bēnkē á’sō, bésiné’ sé á dyad á Troas.

⁶ Ade Ngande e Ewele é Ngēn étómé, sēnsál bōle á dyad á Filipi, bon ámbíd e e’pun étáan sēntán bós a Troas.

Paale adimténe ake á Troas

⁷ A Satedé ngukél,* sēnladén áte hōm ahóg ádyé ndyééd álúmed edŋge é Sáŋgú. Paale akānlé’áá bós póle. Akaláá akal ne akal, kóáŋne melúde mé nkuu, ngáne édíí nén bán antāŋgēn ake néē bíñ é’sāŋgé.

⁸ Bēnchōd e’trúkāŋ hii á tonj ámin wēe sēnladénné.

⁹ Kódemod póg ébéde eché béchágé’áá bán Yutikusé andyéé á wínde, e’chó é’kééné’áá mós mwātííd tííd ngáne e’chó bēmbēé mós á díd. Achabed áde Paale ánbabédte póle áte, dēnkāŋ ansól á e’chó-te bwāmbwam. Dós ápódté á tonj ámin á ndágke éláán, ahún á ndōob. Békíí-áá mós atéd, bētānē amaá awé.

¹⁰ Paale ansūd á ndáb mín wē, akúidén mós ámin bon áseb mós. Dós álāŋgēé bad aá “Nyéētāgē áte, eewédeé, adii adé á alongé.”

¹¹ Dós Paale átimé ámbíd á ndáb mín, ásál ewele áte bon bósbe bad ábe bédúbpé Krístāe bédyāg. Bósōbō bēnkoód adyéé, bēkalé’ póle kóáŋ bíñ é’sáa, bon ákag.

¹² Bēnlyāgēd ene kódemod á ndáb áde mwēn ádíí alongé. Ábē bad bēmbē menyīŋge bwāmbwam.

Paale bēsýāŋgé á Troas, bēkii á Miletus

¹³ Sēmbé á’sō sēsól á stíma-tē, sēpōŋ á edib é nkwe, séké á dyad á Asos. Awed dós sēntāŋgēnnē Paale apém. Anhób aá sébē á’sō áyale nzii e dyad-tē chós ánkéénné.

¹⁴ Ade átáné sé á dyad á Asos, sēmpém mós á stíma-tē bon syāābō sékág á dyad á Mitilene.

¹⁵ Sēhídté-’áá hē bon néē bíñ é’sāŋgé sékag kóáŋ sēpāg á nkin ní dyad á Kios. Bíñ bán bēsāā ámpē é’sāŋnéd sé á nkin ní dyad á Samos, epun éche émbāten sēpāg á nkin ní dyad á Miletus.

¹⁶ Paale antíí nén aá sētóm dyad dé Efesus ámin ábel bon sébébté pōndé á mbwóg e Esia. Áhedé’áá aá mós wāmsen ape á Jerusalem epun é Pentekos édhób bán chós épāg áte.

Paale alyāgténé belyāged bé mwembé bé Efesus

¹⁷ Ade sēpédé á dyad á Miletus, Paale anlóm nsəl wēe belyāged bé mwembé bé Efesus, aá bētán mós á Miletus.

¹⁸ Bépédé-’áá bon álāŋgē bós nén aá “Nyébēn nyébíí ngáne nímédé ne nyé bootya epun é’sō áde rísúmē mekuu á mbwóg e Esia.

* 20:7 Donje á kálag áhéde nén bán: *á epun é’só é sēndé.*

¹⁹ Mbënlé'áá Sánḡwéé ne asuded á yál ásyáál, níkudé ndutul ne mekásgen áyale ahəge áde bad bé Israel béhágké'áá me.

²⁰ Nyébën nyébii bán áde níkanlé'áá nyé nkalaj ní bwám, ní'yágtē-'é nyé á nhéné, ne áwēn mendáb, menkēnkonjédtté nyé dyamdyam áde déntāngēn nyé awōngēn.

²¹ Melemlem nēngāne mēnsimmē bad bé Israel etúu áte nē dō-'áá mēnsimmē bad ábe béesē bad bé Israel meé bétēde ádāb abel dé mbéb, bétimēn Dyōb, bédúbé-'é awed Sánḡwéé, Yesuē.

²² Bōob-pōó, Edāádān éche Esáá élúmte me áte áá ntāngéné ake á Jerusalem, meebii-'áa chōm éche ébenléd ne me áwed.

²³ Mbíi pen nēn meé dyad-té áde níkagké Edāádān éche Esáá emáá me etúu asim áte nēn áá mbwōg ne ndutul bōo bésine me.

²⁴ Bōn meetédeé ádēm alongé nēe dyam, nhede meé nípid nímmēn nsón á asóg, nímad-te nsón míme Sánḡu Yesuē ábágé me áte. Mímēm nsón nídii ákal nkalaj ní bwám tāngene nsimé míme Dyōb álúmté baānyon.

²⁵ "Mbédé áfinté echēn, níkanlé nyé nkalaj tāngene nkamlēn ní Dyōb. Bōob-pōó mbíi nēn meé nyé modmod nyéenyinné me ámpē.

²⁶ Né-óó, nkoo' nyé aláa chíi nēn meé, nzé nyé mod ké ahéé abódé áde alongé, nyébii nēn bán meesáá me áte,

²⁷ áyale nēn dyamdyam déesaá áde níbáá nyé aláa tāngene mekan mésyāál míme Dyōb áfítidé áá mósbēl.

²⁸ Nyétédēn yál pónde, nyénāne-'é abem á bad áde Edāádān éche Esáá ebánné áse echēn, bwám. Nyébē nēe benōn bé mbód ānōn bad bé Dyōb. Abelé nímmē mwembé níde nímmē, mbwiined ne kwéed echē Mwān awédé á awōg.

²⁹ Mbíi nēn meé, nzé mmaá ake, bad bēpē áfinté echēn melemlem nēngāne esob ésólé á abem á mbód. Béehidé-'áá áde bēébēbtéé nyé mwembé.

³⁰ Pónde ēpē áde bad bēbítē áfinté echēn dēn, bēnabpē metóm, ábel bad ábe bédúbpē Yesuē béhíde bō.

³¹ Né-óó, nyétéd pónde nyékamtan-ne nēn bán ní'yágté'áá nyé moosyāál nkuu ne múte á etún é mwē níláán á metake-tē.

³² Bōob-pōó, nlyáge nyé á mekáá mé Dyōb meé mwēn ānōne nyé. Nkalaj míme nílāngé nyé tāngene nsimé ní Dyōb méwōngēn nyé. Nwóó ngine áwéd nyé áte, mēbē-'é nyé nsimé míme Dyōb ákōngédé ábe bad.

³³ Menkēnwōngé nlēm áte áted mod sílva, ké'ε gól ké'ε mbóté.

³⁴ Nyébën nyébii bán nímmē mekáá mēn móó níbenlé nsón bōn ngáb eche syáábe ábēm bad ábe sébelé'áá nsón séhānné'áá kéchéé éche séntōgnēnnē.

³⁵ Nlúmté nyé á menzii mésyāál nēn meé nyéwéd yál áte ábel nsón ngāne níbélé'áá, ábel bōn nyéwōngan bad bé nkole, nyékamtan-ne e'yale ábe Sánḡu Yesuē ánhōbpē áá, 'Edé nnam mod ábe tómaa ákob.' "

³⁶ Paale amaá-'áá ahób nē, bōobe ábe bad bēbwóg mebóbōn békāne.

³⁷ Bō baasyāál béchyé'áá áde bōsbōo béhéneé tál bésōmmē-'é ályágtēn mó.

³⁸ Chōm éche émbud bō ndutul awóged ébédéé ahób áde Paale ánhōbpē áá béenyinné mó ámpē mbéd. Dōo békíi mó alyáged á stíma.

21

Paale akii á Jerusalem

¹ Sēnyágtēn bō séké-'é. Sēnsól á stíma. Sēnchabé edib ésebán sētyéeme hōmhōm káōn sépē á dyad á Kos. Nēe bīn é'sāngé, sémpē á dyad á Rodes. Sēsýāngé-'áá hē, sékag á dyad á Patara.

² Awed dōo sétáné stíma echē ekag á Fonisia. Sēsálé-'áá bōn sébwōgkē' eke.

³ Sémpē á abwóg á hōm áde sēnyínáá alonj á Saiprus áde áde á mendíb-te. Sēmbamé dō sésyōgké á mbōn sétimé á mbwóg e Siria. Sēnsūd á dyad á Tíre áyale áhed dōo stíma éntāngēnnē nted asuded.

⁴ Sēntán donje á bad áwed ábe bédúbpē Yesuē, sémbé-'é ne bō áyale e'pun saámbe. Edāádān éche Esáá ényāged bō beláá Paale bán eékag á Jerusalem.

⁵ Bōn áde echēd pónde emáá áte séntédé bō séké. Abé bad bēsýāál, ne ábab bebaád bōobe bán bēnhýe sé alyáged káōn syáábōo sébíd á dyad-tē, sépē á nkin mé edib. Syáábōo moosyāál sémbwóg mebóbōn, sékāne'.

⁶ Sēmaá-'áá akāne dōo syáábōo sélyágtēné, sēsále á stíma bōn bō-'é bétimé ámbíd á ndáb.

⁷ Sēnhidé á dyad á Tíre, sékéneé échēd eke á'sō, sépē á dyad á Tolēma. Ade sépédé áwed, sēnléd bad ábe bédúbpē Yesuē, sédyē-'é ne bō epun ehōg.

⁸ Née bīn é'sángé sēnhidé á Toléma sékē á dyad á Kaisaria. Ade sépédé áwed sēnkē á ndáb echē nkal-é nkalaj mī bwām nhóg awē béchágé'áá bán Filibe, sédyē áhed. Filibe abédé nhóg áfinté e bad saámbe ábe bēmpwēdté née benwōngene á mwembé rí Jerusalem.

⁹ Anchyáá bán bé bebaád bēniin ábe bēnkēmbíi mwēnchóm. Béhóbé'áá mam míme ríhúú ne Dyōb.

¹⁰ Ade sédíí áwed, dōo nkal é edaádaj nhóg awē béchágé'áá bán Akabuse ábidé á mbwóg e Judeya bonj ápe.

¹¹ Apedé-'áá wēe sémbēē bonj átédē ngás awē Paale, átádnē nímē mekuu ne mekáá bonj áhōbē áá, "Edaádaj éche Esáá éhóbē áá, nēn dōo bad bé Israel bétádtē mod awe awóó anēn ngás á Jerusalem, bēbē-'é mó á mekáá mé bad ábe béesē bad bé Israel."

¹² Ade séwógé nēn, syáábe bad bēmpēe sēnchánj Paale bán eekāg á Jerusalem.

¹³ Dōo Paale áhóbē áá, "Cheé nyébeleé nē, nyéebíi' é bán nzé nyéchye' nyéhúnte me nlém á abum-é? Saké átád me á Jerusalem dēmpen-éé mbóhōnséné, mbóhōnséné ké awé, ábele áde mbēnléé Sāngú Yesue."

¹⁴ Sēnkēnhēnlé mó nlém ahājlen á abum, né-óó sēnchené séhób bán, "Ebenled ngáne Dyōb átiídé."

¹⁵ Sēndyēé á Kaisaria nguse é e'pun, dōo séládé yāl bonj sékág á Jerusalem.

¹⁶ Donje á bad ábe bédúbpé Yesue ábe bēbidé á Kaisaria bōmpē bēnwoón sé. Bēnkeén sé á ndáb e mod nhóg wēe séntāngēnnē adyēe. Béchágé'áá ane mod bán Naasine. Ambíd á dyad á Saiprus, abédé-'é nhóg awē anlyǎg Krístāe adúbe.

Paale akil Jemse anyin

¹⁷ Ade sépédé á Jerusalem, bad bé Krísto ábe bédé áwed bēnkob sé nken ne menyinge.

¹⁸ Née bīn é'sángé syáábe Paale sēnke Jemse anyin. Belyógéde bēmwembé bēbédé áhed.

¹⁹ Paale anléléd bō. Ade ámáá bō aleled, anhidé bō chóm ésyāal éche Dyōb ábélé áfinté e bad ábe béesē bad bé Israel mbwiined ne nsón míme mó Paale ábélé.

²⁰ Ade bémáá chóm éche Paale áhóbé awóg, bēnken Dyōb. Dōo belāngēé Paale bán, "Mmōj enyíne' née mekan médíí á Jerusalem hēn. E'kálé ne e'kálé é' bad bé Israel bédúbpé Dyōb bōob. Bēhíde-'é mbéndé e Mosēe. Bán elānge bō wēe béeyagé ábab bán, wēe bēhíde-'é elem éche syānē.

²¹ Belāngé-'é bō nēn bán eyǎgte bad bé Israel bésyāal ábe bédé melonj mémpēe nēn wē bēhíde' mbéndé e Mosēe. Bán elānge bō wēe béeyagé ábab bán, wēe bēhíde-'é elem éche syānē.

²² Bétāngéné-'é awóg bán epedé. Chán-nō débēnlé bōob?

²³ Né-óó, éhíd ngáne sēlāā' é wē. Bad bédé hēn bēniin ábe bēmwédé melē mé Dyōb.

²⁴ Wēhíd bō nyāábōo nyéke á nwobe, esábned-te bō kéchéé éche bēhédnē bō. Ene pónéd dōo béhele békāān nló. Nēn débēl moosyāal ábīl áá dyam ké áhéé áde bēhóbē wē á yāl déesáá mbále. Bēbīl-'é bán mmōj ámpē ebele mekan ngáne mbéndé éche Mosēe éhedéé.

²⁵ Bonj pen sélómmé bad ábe béesē bad bé Israel ábe bédúbpé Krístāe kálag nēn bán béedyág ndyééd echē bēbágé myōb mémpēe née mende, bēēmwāg mekií, bēedyág nyam eche béesinnéé nkāj, bēékābē-'é mesón."

²⁶ Né-óó, née bīn é'sángé Paale antéd ábē bad, bōóbōo bēkē á nwobe. Dōo asólé á Ndáb-e-Dyōb, ahób e'pun é'tāj nwobe métédte bō. Ambíd enē-'é dōo bēbēé mende á nló míme bō mod-té.

Békóbé Paale

²⁷ Ade e'pun saámbe bé nwobe é'kwógé ape á asóg, dōo nguse é bad bé Israel ábe bēmbíd a mbwóg e Esia bényíné Paale á Ndáb-e-Dyōb. Héé bépééné mpuutéd bonj bēsālē bad áte, békóbē Paale.

²⁸ Bēmbootéd abón bán, "A-bad bé Israel nyéhyag sé hēn-e! Anēn mod mó akag hōm-té áyǎgtē bad áá bad bé Israel, mbéndé éche Mosēe, bōobe Ndáb-e-Dyōb, béesaá chōmchóm. Ké bōob dēn apééné donje á bad ábe béesē bad bé Israel á Ndáb-e-Dyōb-te, nē ábélé-'é enēn ndáb e Dyōb eesáá' é ámpē."

²⁹ (Chóm éche énkāj bonj bēhóbē nē édíí áyāle bēnyín Trofimuse, mod a dyad dé Efesus bō Paal bēwóó á dyad-té. Né-óó, bēnwēmtēn nēn bán Paale asónlé mó á Ndáb-e-Dyōb.)

³⁰ Dyad ásyāal dēmpuutéd áte, bad bésyāal bēbid áwed bēhē Paale abum ámín, bédolé mó káāj bēbidén mó á Ndáb-e-Dyōb. Abwāg-ábwāg bēdíb-pe ekob é Ndáb-e-Dyōb.

³¹ Ade ábē bad bēhēdeé Paale awúu nē, dōo bad behóg bēkíí mod ambáá a sánze a Roma aláa bán mpuutéd rídé dyad á Jerusalem áte ásyāal.

³² Abwāg-ábwāg mod ambáá a sánze eebébtē pónéd. Ampwēd sánze émbáá ne esad ásyōgnéd bō á dyad té wēe bad bēnkaánné. Bad bényíné-'áá ahúene sánze dōo bēsógé Paale abōmted.

³³ Dōo mod ambáá a sánze asídté wēe Paale ábédé akób mó, ahób áá béhaan mó bengōbēngōbē bébe. Héé ásedteé aáken, "Nzé-módé nēn? Cheé ábélé?"

³⁴ Bad bëmbootéd abón. Baahóg béhōbē échén, ábiníí béhōbē échíníí. Mpuutéé rúbédé nyaa eche mod ambáá a sánze énkénhénlé chōm éche ékóó abenled ahed áte. Né-óó, anláá ábē bad áá békēen Paale á ndáb e meláá.

³⁵ Bēnkēēn mō kááj bēpēēn mō wēē mbwóg ébédé á mmwe ní ndáb e meláá. Bon áde bēpédé ásal, bēmpēm mō ámín pémén áyāle amute dēmmād ayāg.

³⁶ Ábē bad bēsýāál béhíídé'áá bō ámbíd, bēbōnē bán, “Béwúu mō!”

Paale alúmté áte ad mōōkwedé nkáá

³⁷ Áde béhōbē bán békēene Paale á ndáb e meláá, dōó álānggē mod ambáá á sánze nēn áá mōwóó mwā dyam áláa mō. Dōó ane mod a mbáá a sánze áhōbēé áá, “Nédē ehōbe ehōb é Grikia?

³⁸ Nédē saké we edé ane mod a Egipto awē ampē hén pónédé póg bon ábootéd mpuutéé. Anlád e'kálé é sánze é'niin, bad bé ewūen, ákēēn bō á ehyānge.”

³⁹ Hēe Paale álānggē mō áá, “Ndíí mod a Israel awē abíídé á dyad á Tasus á mbwóg e Silisia. Mod awē abíídé á dyad áde áde etógnén. Sōn émwē ríláa ábén bad akan.”

⁴⁰ Mod ambáá á sánze ambe mō kunze áá áhōb akan. Né-óó, Paale aniyéem á'sō é' ndáb, alúméd ekáá, ekíde énhōó baám! Dōó ábóótédé bō akalen á ehōb é Hibru.

22

¹ “A-besán ne baányan ábēm, nyéwóglēn mē. Nhēde nyé alúmed áte nēn mēé meékwedé nkáá.”

² Awóg áde bēwógé née Paale áhōbné bō ehōb é Hibru, bēntōj metúu atále áte. Hēe Paale ákagké á'sō áhōbē áá,

³ “Ndíí mod a Israel. Béchyáá mē á dyad á Tasus á mbwóg e Silisia, bon á dyad á Jerusalem hén dōó ríkwógé. Mbédé mwān a esukéle awē Gamalia. Awe mekáá dōó rítóó mekan mé mbéndé nūme ábēd betaa béhíídé'áá ayāge. Mémpē mbēnláá Dyōb ne kán esyāál melemlen ngáne nyémpē nyébenlé mō.

⁴ Bad ábe béhíídé'áá Nzii é Krísto menhé bō á meséb, kááj donje áwāg. Nkóbé'áá bebaád ne baachóm ríhāg-ke bō á mbwóg.

⁵ Prise ambáámbáa ne káánsel e bad bēmbáá esyāál béhele bēbid mē mbōj bán mbále chōó ríkaleé. Menkob kálag áwāb eché béténlé bānned bé Israel ábe bédé á dyad á Damaskos. Né-óó, menké áwed ákób ábē bad, áhanj bō, ápēen-ne bō ámbíd á Jerusalem ábel békógsen bō.

Paale ahōbē ngáne ámwédé Yesue adúbe

(Mbel 9.1-19; 26.12-18)

⁶ “Ade ríkagké, née rípedé benben ne dyad á Damaskos, emwēdmwed é ngíne émbíd ámín taléd, épēn mē yál esyāál. Nēn dēmbēnlé dyam kəd é' mūte.

⁷ Dōó ríhúné á ndōob bon ríwōgē ehōb élanje mē áá 'A-Sool, á-Sool, cheé ékáá bon étágté mē?”

⁸ Dōó rísedté mō mēé ken 'Nzézé édíí A-Sánj? Bon áhōbē áá, 'Mē-éé ndé Yesue á Nazaret awē étágtéé, awē éhéde á meséb.’

⁹ Bad ábe syāábōó sēbédé bēnyín éché emwēdmwed bon bēnkénwóóké ehōb éche mod awē áhōbē'áá áwēm.

¹⁰ Dōó rísedté mēé, 'A-Sánj cheé rítāngéné abel? Dōó Sāngwéé álānggē mē áá, 'Hidé áse ékag á dyad té á Damaskos. Nzé epedé áwed bēlāá we chōm esyāál éche Dyōb átíídé áá ébel.’

¹¹ Eché emwēdmwed é ngíne émbēl meéhele'áá anyínen. Né-óó, bad ábe syāábōó sēbédé bēnchōó mē á ekáá békēēn mē á dyad té á Damaskos.

¹² “Mod abédé á Damaskos awē béchágé'áá bán Ananiasē. Abédēe mod awē abēnlé'áá Dyōb, áhíídé-é mbéndé éche syánē bad bé Israel. Anwōj edúbé bwāmbwam áfnté e bad bé Israel ábe bédé á Damaskos.

¹³ Ananiasē ampē áwēm, atyéem mē á nkæg, bon áhōbē áá, 'A-mwānned Sool, bootéd anyínen ámpē.' Abwōg-ábwōg membootéd anyínen ámpē, rínōné-'e mō.

¹⁴ Anhōb áá, 'Dyōb áde ábēd betaa ápwédé we ábíí nūme nttí, anyín awē mbáledé awē abele mekan nūme métāngéné, áwóg-ke ane mbáledé ehōb á nsal.

¹⁵ We-éé wēbíd mō mbōj áláa bad bēsýāál chōm éche ényíné ne éche éwógé.

¹⁶ Bōob-pōó, cheé-ō esíné? Pádé áse, ékwēnten wēé Yesue mō adé we Sāngwéé bēdusen we. Nēn débél Dyōb déwōbe mímōj mbéb.’

Paale ad Dyōb dlómé mō wēe

bad ábe béesē bad bé Israel

¹⁷ “Mentīm ámbíd á Jerusalem. Ade ríkánneé á Ndáb-e-Dyōb mennyín ndōg.

¹⁸ A ndōg-te wē mennyín Sāngwéé. Anláá mē áá, 'Belé mehélé éwamsen ahíde á Jerusalem áyāle bad ábe bédé á Jerusalem hén bēekobpé chōm éche wēhōbē tāngene mē.’

¹⁹ Dóo me-’e ríkwentanné Sánjwéé nén meé, ‘A-Sánj ábén bad bébíi bwám nén bán nkgé’ áá á ndáb é mekáne ríkóbē, ríwanné-’e bad ábe bédúbpé we.

²⁰ A pónde eche béwúé-’é Stefanuse awé ahóbé’ áá mam tǎngene we, mmén membé áhed, ríkwentén meé béwúu mó, me-’áá menwále nkobe nímé bad ábe bénwúu mó.’

²¹ Dóo Sánjwéé álǎngeé me áá, ‘Kǎg, áyǎle mǎlóm we nchabnede, wéé bad ábe béese bad bé Israel.’ ”

²² Abé bad bémbē béwóglan Paale kǎǎne á pónde eche átúbé dín áá mókag wéé bad ábe béese bad bé Israel. Hé dóo ábē bad bébóótédé abón bán “Nyémaden mó! Nyéwúu mó! Éékwognedé ábē á alongé.”

²³ Béboné’ áá bépebté mbóté ámín, bépumté-’e ebumbú ámín.

²⁴ Héé mod ambáá á sánze álǎngeé éche sánze áá bétéd Paale békeen mó á ndáb e meláá. Anláá-’e bó áá béswádted mó e’ tangú ábel bonj áhób nẓam eché ekǎǎ bonj bad bé Israel bétóǎké mó.

²⁵ Bonj áde béháá mó ábel béswádted mó e’ tangú, dóo Paale ásedté sánze eché embé mó benben aáken, “Mbéndé ebagé kunze nén bán béswádted mod awé mbéndé e Roma ébélé mó mod a Roma e’ tangú áde béekáadté mó-ye?”

²⁶ Ade ene sánze éwógé nē, ankē wéé mod ambáá á sánze ásedté mó aáken, “Cheé wewe ébeleé? Ane mod adii mod a Roma.”

²⁷ Dóo ane mod ambáá á sánze ákíi wéé Paale bonj ásedté mó aáken, “Láá me, mod a Roma móó édíi-ye?” Dóo Paale ákwentanné áá, “Ée.”

²⁸ Héé mod ambáá á sánze áhóbéé áá, “Nsábpé nkúú ní mǎné bonj ngómena a Roma ákwentén áá mbē mod a Roma.” Dóo Paale áhóbéé áá, “Me pen ndé mod a Roma se á nchyaátén.”

²⁹ Ade bad ábe béhédé’ áá Paale awanen béwógé nē, ábwǎg-ábwǎg bēntédé mó, bésidé ámbíd. Mbwóg ménkób ane mod ambáá á sánze áde ádíbté nén áá Paale adii mod a Roma áá móhédé-’e mó á mehanj áde mǎnkéntǎngénné.

Paale atyéémé á nkááse á’ sǎ é’ káánsel

³⁰ Mod ambáá á sánze ahédé’ áá akonj dé ahéd áte ásonjten chóm éche bad bé Israel béhóbé bán Paale ábelé. Né-’óó, néé bín é’ sǎngé, anhób áá béhúd Paale bengóbéngǎbē á mekáá, anlábé-’e beprise bémbáá ne káánsel esyǎál áá bǎǎbǎó békób mbom. Dóo átéde Paale bonj áttíde mó á’ sǎ ábáb.

23

¹ Paale annón ábē bad bé káánsel á mǎd mé mbóm, bonj áhóbē áá “A-baányan, kǎǎne e’ chii, nlém rísáá me á abum bwámbwam nyaa eché ádém alongé ádíi á’ sǎ é’ Dyób.”

² Héé prise ambáámbáá, Ananiase, álǎngeé bad ábe bébédé benben ne Paale áá bébóm mó abén á nsól.

³ Dóo Paale áhóbéé áá, “Dyób ámpé débóm we. Ehóhó é chóm chén! Edyce hé ebenlad mbéndé ákáad me, bonj ké nē, mmón ebóó’ mbéndé ahób áde éhóbé wéé bébóm me.”

⁴ Héé bad ábe bémbē benben ne Paale bélǎngeé mó nén bán, “Esyǎǎ’ prise ambáámbáá a Dyób.”

⁵ Paale ankwentén bó nén áá, “A-baányan, menkémbíí’ é meé mó adé prise ambáámbáá. Eyale e Dyób éhóbé áá, ‘Mod eetǎngeneé mod awé akamlan bad mekan mé mbéh ahób áyál.’ ”

⁶ Ade Paale anyíné áá áttínté e echonj é bad éche ébédé áhed, baahóg bédé bad bé epepé é Sadusia ábíníi-’e bédé bad bé epepé é Farisia, anchágéd ehób aláá bad bé káánsel áá, “A-baányan, ndii mod a epepé é Farisia mbé-’e mwán a mod a epepé é Farisia. Ndé á nkáásé hén áyǎle nén nsumé nlém nén meé bad ábe béwédé bēpuú ámpé.”

⁷ Ahób áde áhóbé nē, bad bé epepé é Farisia ne bé epepé é Sadusia nēmbóótédé aselen. Echonj é bad éche ébédé áhed énkabén áte.

⁸ (Nén dēmbenléd áyǎle bad bé epepé e Sadusia béndübē nén bán nzé mod awédé eépuudéé ámpé, bédúbé bán ángel éesaá, bédúbé-’e nén bán e’ dáádǎn béesaá. Bonj Befarisia pen béndübē bán nímén metón mésyǎál méláán méde.)

⁹ Ehób émbē échǎǎké ábē bad ngíne ngíne dóo donje dé bemeléede bé mbéndé ábe bémbē á epepé é Befarisia bétyéémé ámín, bébootédé abón ngíne ngíne bán, “Séenyínnéé anén mod awusé ké ahóg. Kapóg né edǎádǎnj ké’ é ángel ekoó mó dyan aláá!”

¹⁰ Mmē mpentén ménehǎgē nyaa eché nlém ríhúné’ áá ane mod ambáá á sánze áá béhele bényáb Paale áte. Né-’óó, anláá éche sánze áá béke á amute-té wē, béhúd Paale á mekáá níme ábē bad bonj békeen mó á ndáb e meláá.

¹¹ Mmē nkuu dēn, Sánjwéé antyéém Paale á nkǎg, aláá mó áá, “Weebáá’, ngáne ébídé me mbónj á Jerusalem, wébid me mbónj ámpé á Roma.”

Béhágké Paale

12 Néε bín é'sángé mbwembwe, nguse é bad bé Israel bém̄bóm bébel ntii, bémwε melé nén bán béedyáá chómchóm, béemwáá-'aá chómchóm kááj ne béwúú Paale.

13 Bó bad ábe bém̄bel nímén ntii béntóm móom ménii.

14 Dóo békíí wée beprisε bém̄báá ne belyáged bé dyad bonj bēlāngē bó nén bán, "Sémwédé melé ne amwé dēn nén bán séeháá chómchóm á nsal kááj né séwúú Paale.

15 Né-óó, nyáábe bad bé káánsel nyélóme mod ambáá á sánze á bad bé Roma nsal nén bán ápiined nyé Paale. Nyébám̄tan nén bán nyékoo' mam mémpée ahead áte áyāl eché. Bonj sé pen séébe mbon̄sén áwúú mó adéhób aá mōpag hén."

16 Bonj Paale mwányaŋ a mmwaád mwán anwóg ntii nime bébélé áwúú Paale. Né-óó, anké á ndáb e meláá áke aláá mó.

17 Dóo Paale áchágéé sánze póg bonj álāngē chó aá, "Kεené' enén kódemod wée mod ambáá á sánze awóó dyam aláá mó."

18 Héε ene sánze étédé ene kódemod bonj ákeεné mó wée mod ambáá á sánze. Héε ene sánze élangéé mod á mbáá á sánze aá, "Paale awé adé á mbwog mó achágé me aá nípeεn enén kódemod áwón áyale enén kódemod ewóó dyam aláá wε."

19 Dóo ane mod ambáá á sánze áchāngé mó á ekáá bonj ásídnād mó á nkag ásedtε mó áá "Cheé éhedeé me aláá?"

20 Dóo ene kódemod élangéé mó aá, "Bad bém̄báá bé Israel bétíídé nén bán bēlāā wε bán épeεn Paale á'sō é' káánsel, ne mbám̄tan nén bán káánsel ehede mam mémpée atónj dé ahead áte tāngene Paale.

21 Bonj weewóglán bó áyāle bad bédé tómaa móom ménii ábe bésóóm ásin mó. Bémwédé melé nén bán béedyáá chómchóm béemwáá-'aá chómchóm kááj né béwúú mó. Bémáá abon̄sen, bésine-'ε chóm éche wéhōbpē."

22 Dóo ane mod ambáá á sánze álāngéé mó aá, "Weelāngé modmod wée mólāngé me ádén dyam." Amaá-'aá ahób nē dóo álāngé ene kódemod aá ákag.

Békéé Paale wée nkamlene, Feligsε

23 Dóo ane mod ambáá á sánze áchénlé éche sánze émbáá émpée ébe bonj álāngē bó nén aá, "Nyétéd mbwókel é sánze ébe, nyébon̄sen chó áke á Kaisaria nchoo ne sánze móom saámbe éche ékeεne hóse ne mbwókel é sánze ébe éche éwanne mekonj. Nyáábóo nyébon̄sen nyéhíde dyam ngáŋ abog nkuu.

24 Nyéhede-'ε Paale hóse eche ékeén mó. Nyélyáged mó nyépeεn mó wée nkamlene Feligsε ésebán dyam dé mbéb ábenlédé mó."

25 Bédéké antel kálag eche bēnwālē eché ehóbe nén aá,

26 "Me, Kladios Lisiasε me-εé ntenle wε, nkamlene á edúbé ambáá, Feligsε. Nlēté wε.

27 Bad bé Israel bēnkōb anén mod bēhedé-'ε mó áwúú. Nsōŋténé-'aá meé adii mod á Roma, dóo syáábe échém sánze sékíí mó ahúd áwab mekáá.

28 Nhédé'áá meé mbíí chóm éche bēhóbé bán abelé. Né-óó, menkeén mó á káánsel.

29 Nhédé áte nyíné nén meé eébeleé dyam áde álumte nén bán atāngéné awé ké'ε atāngéné áke á mbwóg. Mam mésyāāl nime bēhóbé bán abelé médíi mam nime ménone échab mbéndé.

30 Bēlāngé-'aá me bán bad bé Israel bēhagke mó áwúú mó, dóo rílóme mó áwón ábwóg-ábwóg. Nlāngé-'ε bad ábe bēhíde mó mekuu meé, bēhyε bēláá wε chóm éche bēhóbé bán abelé."

31 Eché sánze émbēl ngáne bēnlāā' é bó bán bébel. Béntēd Paale békēēn mó nkuu ne nkuu kááj bēpēēn mó á dyad á Antipatris.

32 Néε bín é'sángé, sánze éche ékéénáá mekuu éntím ámbíd á ndáb e meláá, bétēd sánze éche ékééné'áá hóse ákeεn Paale.

33 Bēnkeén mó á dyad á Kaisaria. Ade bépédé bēmbē nkamlene ene kálag bēbē-'ε Paale áwe mekáá.

34 Ade ane nkamlene aláá ene kálag ansedéd Paale aáken mbwóg ehéé ábíde. Ade ásoŋténé aá Paale ábíde á mbwóg ε Silisia,

35 anhób aá, "Mēwóg kéchéé éche éwóó ahób nzé bad ábe bēhíde wε mekuu bépédé." Héε álāngé sánze aá békēεn Paale á ndáb e kāŋ eche kāŋ Heróde ánlōngé, bēnōne-'ε mó áhed.

24*Paale atyéémé á nkáásé á'sō wée Feligsε*

1 Ámbíd e e'pun é'taan, prisε ambáámbáá Ananiase, anké á Kaisaria nchoo ne donje á bad bém̄báá bé dyad ne mod á mbéndé nhóg awé bēchágé'áá bán Tεtuluse. Bēmpé á'sō wée nkamlene Feligsε, bēhób mekan nime bēhóbé bán Paale abelé.

²Dóo béchágé Tetuluse bonj ábootéd Paale mekan ahób á yál, aá, “A-nkamlen Feligs, we awé edúbé échábé amín. Debyéé áde ébenladté ákamlen ápéénéde syáné nsaŋ á etún é pónde. Ebelé-’e nħəŋlén ħiín nĩme nĩpééné mbonj áwəd alon-té.

³Sékobé-’e nē ħōm ásyāal ne pónde ésyāal. Séságnan-ne we bwám bwam.

⁴Meéhādē nēn mēé nĩbud we pónde abébed bonj pen ndáá achán nēn mēé ébenled ábon e’bonj bé nlém, éh sé mwá etál, éwóglen mwá dyam awé séwóó ahób.

⁵Sényíné nēn bán anén mod adé ekun é mbéb átínté e bad. Apééné epuutéd átínté e bad bé Israel nkōnsé áte nĩsyāal, adé-’e nlyáged nhóg a epepé e Naazarin.

⁶Aponé edúbé é ndáb e Dyób asuded, dóo sékóbé mó. *

⁸Nzé esédté mó, mekan nĩme aláá’é we mmōŋ wényín nēn weé chōm éche séhóbéé édé mbále.”

⁹Bad bé Israel ábe bémbé áhed, bōmpē bénsōl áte béhób bán mekan nĩme Tetuluse áhóbéé médé mbále.

Paale akádéd nkád d’só wée Feligs

¹⁰Héé dóo nkamlene, Feligsé ábágé Paale etál aá áhób akan, bonj Paale ábootéd ahób aá, “A-sán, mbíí nēn mēé ekékāād nkáásé á alonj té ħén á etún é pónde, né-’ó ndé menyinje ákáa nĩmēm nkáá áwoŋ e’só.

¹¹Nzé ehedé áte, mmōŋ wényín nēn weé éétōmēē dyōm dé e’pun ne é’be áde níkí á Jerusalem ábe Dyób edúbé.

¹²Ké epun bad bé Israel béetáneé nēé sé mod sépentanné á Ndáb-e-Dyób, béētāne-’áa nēé nĩpuutadté bad, ken á ndáb e mekáne ké’ e kéhéé á dyad té.

¹³Béewóó-’é chōmchōm éche élūmte nēn bán mam nĩme béhóbé bán mbelé médé mbále.

¹⁴Bonj nkwentan pen nēn mēé, mbenle Dyób áde áhəd betaa bébēnlé’áa, ahíd áde nĩhídeé Nzii eché etāŋgéné. Ndūbpé káŋŋe mam mésyāal nĩme méténlédé á mbéndé e Mosēe ne á kálag é bekal bé’dáádəŋ.

¹⁵Mémpē nsumé nlém ne Dyób melemlen nēé ábén bad bēn ámpē, nēn mēé bad bésyāal bēpuú, bé bwám ne bé mbéb.

¹⁶Nē dó-’aá ákás bonj nwané áte pónde ésyāal ábel bonj nlém nĩsán me á abum á’só é’ Dyób ne á’só é baányonj.

¹⁷Mensyōg ake á Jerusalem nguse é mwě, né-’ó menkě áwed áwánled ábēm bad mwá mōné ne ábe Dyób mendé.

¹⁸Ade nĩhídeé nĩmēm mekan ámbíd, dóo ábén bad bétáné me á Ndáb-e-Dyób, áde nĩmáá mekún me nwobe amad. Ndun e mod eebédeé áhed, mpuutéd-te ménkēmbáá.

¹⁹Bonj bad bé Israel bébédé áhed ábe bémbíd á mbwōg e Esia. Ké bad bébágé’áa bēpag áwōŋ aláa we dyam áde mbélé né bōo bēntəŋgēn ape, nzé émbē nēn bán membēl dyam.

²⁰Ké’ e ábén bad ábe bédé ħén, bēn bēláa we dyam dé mbéb áde mēmbenlé áde bēnkāadté nĩmēm nkáá á’só é’ káánsel.

²¹éetōmēé dyam ahóg áde mēmbenlé. Menchágéd ehób nēn mēé ‘Békáadte me chii nēn áyāle ndūbpé nēn mēé bad ábe bēwédé bēpuú.”

²²Feligsé abédeé mod awé ammad Nzii e mbále asōŋten. Dó-’aá áhúdé nkáásé áse. Anláá bó aá, “Nzé nkamlene Lisiasé apedé, dóo mébídēdté nĩmēm nkáá mbakú.”

²³Hé-’aá álāŋgé sánze e mbáá eché enoné’áa Paale aá átéd Paale, ábē ánone mó. Aá, bonj pen ábe mó mwá kunze áhē-’e etál nēn besón ábe Paale béhyenad mó kéchéé éche átōgnéné.

Paale atyéémé d’só wée Feligsé bō Drusilia

²⁴Nguse é e’pun ámbíd enē, Feligsé ampeén mwaád Drusilia. Drusilia abédeé mwán a Israel. Feligsé anlóm Paale achəg, áwóglen nkalanj nĩme Paale álāŋgéé mó tēŋgene adúbe á Yesu Krístəə.

²⁵Paale aboótédé-’aá mó akale, álāŋgē mō ngáne mod átāŋgéné abé á bwám awále, ngáne mod átāŋgéné yál acháə bwám, ne Epun é nkáá eche éhúé’. Dóo mbwōg níkóbé Feligsé. Héé áhóbéé aá “Sébé ekag bəəb. Nzé nkudé etál ámpē méchēlé we.”

²⁶Mewēmten mébédé mō ámpē aá Paale ábe mō mwá mōné ámbíd-ámbíd, nēn dēmbēl alómé’áa mō achəg pónde té ákanlé mō.

²⁷Nēn dēmbenléd áyāle mwě nĩbe, dóo Pokus Festuse átédé etál éche Feligsé nēé nkamlene. Ngáne Feligsé áhédé’áa aá bad bé Israel bēwógen mō bwám, antedé Paale á mbwōg.

25

Paale aá Kaisēe mūmó akádád mó

* **24:6** Donje á kálag dé’só ébádé nchoo 6b-8a: *Sentil bán sékadte mō ngáne eché mbéndé éhóbé. 7 Bonj mod ambáa a sánze, Lisiasé, ámpé akōbēn sé mō ne epame. 8 Dóo Lisiasé áhóbéé ad bad ábe bēwógné mō dyam bēpe áwōŋ e’só.*

¹ Festuse ampé á mbwóg e Kaisaria átéd atii dé nkamlén. E'pun é'láán ámbíd enê, ámbíd á mbwóg e Kaisaria ákè á Jerusalem.

² A Jerusalem wê, beprise bémbáá ne bad bémbáá bé Israel bénlāa Festuse mekan níme behóbé bán Paale abelé. Béchāḡ Festuse

³ bán áwōngén bō ábel bépeen Paale á Jerusalem. Bénlāa mó nê áyāle bēnhəg áwúu mó á nzii.

⁴ Festuse antimtén bó aá, "Paale adé á mbwóg á Kaisaria, mmēn-ne mētīm ámbíd áwed mwāmpīn ní pōndé.

⁵ Né-óó, nzé édé nēn bán Paale abelé dyaam dé mbéb, ábēn bad bémbáá behíd me á Kaisaria, bésómēn mó."

⁶ Festuse andyēé á Jerusalem ampē dyaam e'pun waam ké'ε dyóm bonj átimé' á Kaisaria. Néε bīn é'sángé, andyēé áse ákáad nkáá. Anhób aá bépeen Paale á kóte.

⁷ Ade bépééné Paale, bad bé Israel ábe bémbíd á Jerusalem béntyēēm mó benben bébootéd e'bebédé é' mekan ahób, ábe behóbé bán abelé, bonj bēnkēnhenlé alúmed nēn bán akoó níme mekan abel.

⁸ Paale anhób aá mekan níme behóbéé mó áyāl méesaá mbále. Anhób aá, "Meébeleé dyaamdyaam áde alúmté bán ntāngan mbéndé e bad bé Israel, ké'ε Ndáb-e-Dyób ké'ε Kaisere a Roma."

⁹ Festuse ahedé'áá aá mókud dīn á bwām á'sō é' bad bé Israel. Né-óó, anseédé Paale aá, "Ebōḡsēné ake á Jerusalem ábel nēn níkáad we áwed tāngene nímén mam níme behóbéé we á yāl-ε?"

¹⁰ Paale anhób aá, "A kóte eche Kaisere a Roma dōó nítyéémé nēn, áhed dō'-áá bētāngéné me akáad. Meébeleé bad bé Israel dyaam dé mbéb ké ahóg, mmōn ámpē ebīi nē bwām.

¹¹ Nzé édé nēn bán mbóó mbéndé eché ekwōgnéde mbakú e kwééd, né nkweñténé awé. Bonj nzé édé nēn bán mam níme behóbéé me áyāl méesaá mbále, né modmod eewóó'ε kunze ábe me áwab mekáá. Né-óó, nhóbe nēn meé Kaisere múmó ákáad me."

¹² Dōó Festuse álānténé nló ne ábē bad ábe bélébé mó, bonj ákwentán aá, "Ngáne émáá ahób wē Kaisere mókáad we, etāngéné ake wéε Kaisere."

Festuse alúmté kāḡ Agripa nkáá níme Paale áte

¹³ Nguse é e'pun ámbíd enê, kāḡ Agripa bó Benise, bēmpē á Kaisaria ákob Festuse nken.

¹⁴ Ade bémádé áwed nguse é e'pun, Festuse anlúmed kāḡ Agripa ehób éche Paale áte. Anlāá mó aá, "Mod adé hén awé Feligse ánchenéé á mbwóg.

¹⁵ Ade nípedé-ε á Jerusalem, beprise bémbáá bé Israel ne bad bémbáá bé dyad bēnhōb mam níme behóbé bán abelé, bēchāḡ-ε me bán nkwid mó nkáá.

¹⁶ Bonj me-ε menlāá bó meé bad bé Roma bēwóó elem nēn, bēheléé-se bēbídéd mbakú nēn bán mod akwedé nkáá, ésebán asēppé akáádé níme nkáá á'sō wéε bad ábe bésómné mó. Bētāngéné mó etál ábe ákáa níme nkáá.

¹⁷ Né-óó, áde bēpédé hén, menkēmbébédte pōndé. Néε bīn é'sángé sáγγén, mendyē áse á kóte nhōb-pe meé bépeen mó.

¹⁸ Bad ábe bésómné mó béntyēēm ámīn ahób mam níme ábélé, bonj bēnkēnhōbpé bán abelé dyaam dé mbéb ké ahóg áde ménwēmētēnnē meé bēhōb bán abelé.

¹⁹ Ehób ésyāāl ébédéε nswaḡ níme bēnwōḡgē ne Paale tāngene adúbe ádāb ne dīn á mod nhóg awé bēchāgēé bán Yesue awé amaá awé bonj Paale ahóbe aá adé á alongé.

²⁰ Menkēnkongé abii ngáne rīhéláá-se rīhēd nímén mekan áte, né-óó, mensedéd Paale nzé áđāḡ ake á Jerusalem ábel bonj békáad mó áwed tāngene mekan níme behóbé bán abelé.

²¹ Bonj Paale anhób aá bēbé bēbane mó á mbwóg káḡ ne á pōndé eche Kaisere ábídédte níme nkáá mbakú. Né-óó, menhōb meé sánze ébē énoḡe mó káḡ ne á pōndé eche mélōmmé mó wē Kaisere."

²² Héε kāḡ Agripa álāγγéé Festuse aá, "Mmēn mēđəḡ anén mod awóglēn." Festuse antimtén mó aá, "Wēwóglēn mó chán."

²³ Néε bīn é'sángé, Agripa bó mwānyāḡ Benise bēmpē ne edúbé ésyāāl ne esimo. Bēnsāl á ndáb eche mbwóg éladné'áá nchoo ne sánze é mbáábáa ne bad bémbáá bé dyad. Festuse anhób aá béke bétéd Paale bépeen mó.

²⁴ Dōó Festuse áhóbeé aá, "A-kāḡ Agripa ne bad bésyāāl ábe syāābōó séde hén. Anén mod awé nyényíneé hén nēn, adii mod awé bad bé Israel, ábe bédé wén ne ábe bédé á Jerusalem bépééné ehób áwēm bán ábele mekan mé mbéb. Béhāg e'saád nēn bán eetāngeneé abé á alongé.

²⁵ Bonj mmēn meenyíneé dyaamdyaam áde anén mod ábélé áde átāngéné kwééd. Ngáne édíí'-áá bán mwēn-εé anhób aá Kaisere mwēn-εé ákáad níme nkáá, né-óó, nhóbé meé mélōm mó áwed.

²⁶ Ké nê, meékoo'ê dyam awónj áde mételélé Kaisere áyāl echê. Né-òó, mpeéne mó hén á'sò é' bad, bwám bwam á'sò ábónj, a-kâñ Agripa, ábel bonj nzé mmaá éche ehób ahed áte, ríwónj chóm éche métenlé.

²⁷ Ayále nén éebáá bwám me álóm mod á mbwóg ešebán nlúmté áte bwám dyam áde ákóó ábel."

26

Paale akáádé míme nkáá d'sò wée kâñ Agripa

¹ Dóo kâñ Agripa álángeé Paale áá, "Ewóó kunze bóbó áhób dyam." Paale ansalé ekáá áte, bonj ábootéd akáá. Anhób áá,

² "A-kâñ Agripa, ntédé nén meé yál eboó me áte ányín nén ntyéémé áwónj e'só chíi ákáá áhúd mekan mésyáál áyál míme ábén bad bé Israel béhóbé bán mbelé.

³ Nhóbe nê áyále nén, mbíí nén meé edíí mod awé asónténé e'lem é' bad bé Israel, ne wée nswanjen núbideé bó. Né-òó ncháa we nén méé éched yál, éwóglén me.

⁴ Ábém bad bé Israel bébíí alongé ádém se á mwéndemé áde níbéde á Jerusalem.

⁵ Bélyógé me abíi. Nzé bédáá-é, né bèn béhelé bébid mbónj nén bán se á mbooted, mbédé mod á epepé éche éhíde' níméd mekan mé Dyób ámbíd nyaa eché ewúú áte. Nhíde' ngáne mod á epepé é Befarisia átánjéné ábel.

⁶ Bóbó-póó, nzé ntyéémé á nkáásé hén chíi, né edíí áyále e'lyág bé nlém ábe níwóó nén meé Dyób débélé ábéd betaa chóm éche ánhóbpe áá móbélé bó.

⁷ Adén dyam dá-áá níméd metúmbé dyóm ne mébe mésumé nlém áyál bán békúd, ábe áde bébageé Dyób edúbé nkuu ne múte. Bonj ábén e'lyág bé nlém bèn-naá é'káá bonj bad bé Israel béhóbé' me mam mé mbéb á yál, a-kâñ.

⁸ Cheé ékáá bonj nyé bad bé Israel nyééhélé adúbe nén bán Dyób ápuudte bad ámbíd e kwééd?

⁹ Mmèn ámpé menwémtn meé ntánjéné néé níhédé nzii ésyáál ábébed dín áde Yesue, mod á Nazaret.

¹⁰ Né-áá mémbenlé á Jerusalem. Menkúd kunze wée beprise bémbáá, nhé-é bad bé Dyób híin á mbwóg. Nzé bémbíded-te mbakú nén bán betánjéné awé, mémpé nkwenáánaá.

¹¹ Memmentén bó akógsen á ndáb é mekáne ésyáál, níhédé nén meé béhób Yesue mam mé mbéb áyál. Ekanj énkób me áte áyál echáb nyaa eché níkágé'áá á myad mé melonj mémpéé átaged bó.

Paale ahóbé ngáne ámwéde Yesue atimen

(Mbel 9.1-19; 22.6-16)

¹² "Enén nzóm chóó ekáá bonj níkáá á Damaskos ne kunze ne ekag éche beprise bémbáá bémbéé me.

¹³ A-kâñ, á nzii wê, dyam kəd, dó-áá nínyíne e'nyínen bé ekíde ábe é'pene' tómaa enyen, é'bídé ámín é'lənjéd me ne bad ábe syáábóó sənwónj.

¹⁴ Sé moosyáál sən хүн áse. Héé níwógé ehób élanje me á ehób é Hibru áá, 'A-Soól, á-Soól, cheé ékáá bonj ehé me á meséb. Nzum eché éwannéé me edíi nēngáne mwán ákwagléé abíi ányan. Eché yál chēn-éé ábeleé mbéb.'

¹⁵ Dóó rísédte mó meé 'A-Sánj, Nzé-módé edíí?' Dóó Sánjwéé átimtanné me áá, 'Me-éé ndé Yesue awé éhāgkē á meséb.

¹⁶ Bóbó-póó, híde áse étyéem ámín. Mpiídé we ápwed we nēngáne áwēm mbaledé. We-éé wēlāá bad ábe belyágé áse chóm éche ényíne chíi ne éche mélómédte we á pónde eché ehúé' á'só.

¹⁷ Mēsōñ ádōñ alongé á mekáá mé bad bé Israel ne á mekáá mé bad ábe béese bad bé Israel ábe mélómme we áwab.

¹⁸ We-éé wēnedé bó mūd ábel béhide á ehíntén-té, békud e'nyínen bé ekíde, béhíde-é áse e nkamlen ní Satan bétim á nkamlen ní Dyób. Nê débél békúd alagsen dé mbéb, bébé-é hóm ahóg ne bad ábe Dyób ásanjté ne adúbe áde bédúbpé me.'

Paale ahóbé chóm éche ékáá

bonj bad bé Israel bésmén mó

¹⁹ "Né-òó, a-kâñ Agripa, ndóg eché ményínné eché ehúú ádyób, menkémbánjé chó ahíd.

²⁰ Bootya hē, membootéd nkalanj ní bwám akal, membootéd á dyad á Damaskos, níke á Jerusalem bonj rítimé' á mbwóg e Israel esyáál, ne á mbwóg e bad ábe béese bad bé Israel. Nkánlé'áá bó meé bétede nímáb mbéb bétimen Dyób, bébele-é mekan míme mélúmté' nén bán bétédte nímab mbéb.

²¹ Akal áde níkalé'áá nímén nkalanj dóó dénkāñ bonj bad bé Israel békób me áde níbéde á Ndáb-e-Dyób bépōn-ne me awúu.

²² Boŋ káŋne baob, Dyöb dën dso ákewöŋgēn me. Né-ɔs, ntyéémé hén ákale nyé moosyáal mbáale. Ken bad ábe bédé etógnén ké'ε ábe béese etógnén. Mekan níme ríhóbéé médii melemlém mé mekan níme bekal bé'daádəŋ ne Mosεε bēnhōbpē bán mēbenléd.

²³ Bēnhō bán Ane-awē-Béwōgté atāŋgēné ákūd metake, abē-ε mod a'so apuu. Akalé bad aá e'nyínen bé ekíde é'pente' ábēd bad bé Israel ekíde baob é'pente'-ε bad ábe béese bad bé Israel."

²⁴ Nyaa eche Paale ánkāá'ε embēl Fεstuse ankáné mó áte aá, "A-Paal weesáa'ε-ye? Adōŋ ayáge ámbáá áhede we mīn apid-ε?"

²⁵ Paale ankwentén aá, "A-kāŋ e edubé, meépagké mīn. Chōm éche ríhóbéé édé mbáale nhóbne-ε debyéé.

²⁶ Mēpanléd kāŋ nímén mekan mésyāal áte áyāle mbíi meé asōŋténé nímén mekan. Ndúbpé nén meé mwēn asōŋténé akan téé áde ábenlédé, áyāle dyam áde ábenlédé déebenlédéé á e'konéd-te.

²⁷ A-kāŋ Agripa, edúbpé mekan níme bekal bé'daádəŋ bétélé áse-ye? Mbíi meé edúbpé mós."

²⁸ Agripa antimtén Paale aá, "Ayā e anén mwā esōŋ á pónde dso éwémtené weé móhele móbēl nímēn adubé á Krístəə?"

²⁹ Paale ankwentén aá, "Ebē ké á esōŋ é pónde ké'ε pónde eche echabé áte, nkānne' Dyöb nén meé, we ne moosyáal awē awóglan me, ábē ngāne rídi. Boŋ pen meekánneé meé béhē nyé bengobéngōbē ngāne béhédé me nén."

³⁰ Dso kāŋ, nkamlene Fεstuse, mwānyan a kāŋ, Benise ne bad bésyāal ábe bēbédé áhed béhídté áse áke.

³¹ Bémáá-'aá abíd, áde békagké nē dso bēbōótédé akal nén bán, "Anén mod eébéléé dyamdyam áde ákwógnédé áhób bán béwúu mó ké'ε béhē mó á mbwōg."

³² Héε Agripa álāŋgēé Fεstuse aá, "Nheláá-se rítédé anén mod nzé enkēnhób aá Kaisεε mós mād níme nkáá."

27

Paale ahídté áke á Roma

¹ Ade bémáá atii bán sēsōl á stíma áke á alon á Italia, bēmbē Paale ne bad bé mbwōg bēmpēe á mekáá wēε mod á mbáá á sánze awē béchágé'áá bán Juliōse. Juliōse akamlánnáá echoŋ é sánze éche béchágé'áá bán "Echoŋ é sánze é Kaisεε."

² Sēsōl stíma á dyad á Adramitium. Ene stíma emmad abonŋen áke á nkin mé edib é nkwē á mbwōg e Esia. Dso sébwōgké eke. Sédé áke sēnwálé Aristakuse. Aristakuse abédéε mod á mbwōg á Masedonia, awē ambíd á dyad á Tesalonika.

³ Néε bīn é'sāŋgé, sēmpē á dyad á Sidōn. Juliōse amboōn Paale nlém. Antédé aá áke ányín baab, béε mó kéchéé éche atógnéne.

⁴ Sēnhidé hē, sébwōgé eke. Boŋ ngāne édii bán epub é ngīne échómmé'áá sé á'so-te, sēmbamé epub, sébwē benben ne mbwōg e Saiprus ped eche epub énkēmbáá ngīne. Saiprus abédéε mbwōg echē mendīb mēnləŋnédte.

⁵ Héε sétédte nkin á ped e mbwōg e Silisia ne mbwōg e Pamfilia boŋ sēsél á edib é nkwē-te sépag á dyad á Mira á mbwōg e Lisia.

⁶ Awed mod ambáá á sánze anyín stíma eche ebídé á Aleksandria etime' á Italia dso áhédé sé áwēd-te.

⁷ Bootya hē, stíma ekeéné sé mwāləŋləŋ e'pun híin bó-ε é'tóme' sédēhób bán sépag á dyad á Sinidus. Ngāne édii bán epub échómmé'áá sé á'so-te, sēnkēnhenlé áke á'so ene ped. Né-ɔs sēmbamé sépōŋ á ped e mbōŋ wēε epub éebude'áá atóm. Sētóm á Kep Salmōn sépē á mbwōg e Kret echē mendīb mēlāŋnédé.

⁸ Sēmbamé nkəg mé edib mēn ne mēn, sédēhób bán sépag á hōm áde béchəgēé bán Sef Habəs. Adē hōm déechabnedéé dyad á Lasi áyā.

⁹ Sēndyεé áwed bwāmbwam káŋ ényínéd nén bán nzé sékii á'so né dyam dé mbéb áhele ábenléd sé, áyāle ene pónde mwē mēmmāđ ape á asóg. Epub é ngande e abe dé mende mé Alagsen dé mbéb chō-ε emmad atóm. Né-ɔs, Paale ambe bó elébé aá,

¹⁰ "Amúē, nnyíne nén meé bootya hén baob éhele ébēēn syāné ebébtéd ákeεn échén eke á'so. Nted mēbēb bwāmbwam, stíma ebéb, nló m bad-te ríhele rítóm."

¹¹ Boŋ ane mod á mbáá á sánze andubé dásō chōm éche mod ambáá á stíma ne mod awē awó stíma bēnhōbpē, enkéndubéé chōm eche Paale ánhōbpē.

¹² Adé abwōg á hōm áde stíma émbēε áhed, dénkēmbáá hōm áde mod áhele ádyεε á pónde echē ekukud étómé. Né-ɔs, bad ábe bēndəŋ nén bán békag á'so béwanen bēpe á dyad á Fonis bóo bēmbuú áte. Fonis abédéε hōm áde bébanneé stíma á mbwōg e Kret áde ánōne' á akuu ne á mbōŋ. Áhed-taá béhéle'áá-se bēdyē á pónde é ahéb á ngīne.

Ekukud étáné Paale bó á edib é nkwe-te

¹³ Mwá epub awé abidé á mbəŋ ambootéd atóm. Dóo abé bad békámténé bán béhele békəən nímab ntíi á'só. Né-óó, béhñd ekii eche bébwəgnéé stíma, bonj bébammé' nkin mé edib ní mbwóg e Kret.

¹⁴ Bonj béepedéé ké ake bonj epub é ngine éche béchəgeé bán "Epub é ped e akuu" ébidén ekukud á Kret ébootéd atóm ne ngine.

¹⁵ Eché epub éntíndé stíma. Nzii enkəmbáá áke á'só wée epub ébidéé. Né-óó, sənsóg yál awaned áte akəen stíma á'só, sétədē nén bán epub cháchá ékəene' chó ped eche édáá chó akəen.

¹⁶ Ade sépóó á ped e mbəŋ e mwá dyad awé adé á mendib-te awé béchəgeé bán Kauda, sənkuđ mwá etál wée epub éebude'áá atóm. Ahed dóo séwánné káəŋ bonj sənabpé bəle ábe sédólé'áá ámbid e'dii, ábel bonj béesanlé áte. Sédé aməd ábel nē chóm émaā sé á yál.

¹⁷ Bəndöl bəle, bésłéd bó á stíma-té, bəbíd-te nkəod á stíma séwəd bó atád. Bəbáá'áá nén bán béhele bétómén nló, bəhún á nsíi-te á nkin mé edib á alonj á Libia, né-óó, bənsudéd abad* áse áde ábele bonj stíma ékag mehéle, bétədē bán epub chó ne chó ékəen stíma.

¹⁸ Ekukud émbə étómne' ngine. Bín é'sáŋgé-'áá bonj bébootéd donje dé nted ahúd bəbwəmə' á mendib-te.

¹⁹ Néé bín é'sáŋgé ámpə, bébootéd donje á bwəm atéd ábe bəbénlé'áá ádol stíma, bəbwəmé á edib-te. Bən bənkəŋ ábel nē.

²⁰ E'pun híin bəntóm ésebán sənyíne' enyen ké'ε betintine, epub-pe émbə étome' ne ngine esyáəl. Káəŋ ne á asóg, sənहुd yál nlém bán sémádné.

²¹ Səmadé e'pun híin ésebán mod ahele ké ndyééd adyé. Hē dóo Paale átyéémé ámín áfínté e bad bəsyáəl bonj áhəbē áá, "A-baányan, nyəmbé nyéwənglan me áde ríhəbē meé deéhidté á Kret. Nzé nyənəwógén me, né deékuđéé nímén metake ne enén mbłən échē dékuđéé nén bəob.

²² Bəob-pəó, ncháa nyé nén meé nyéwəd nlém á abum, nló ní mod méetómme, stíma chəmpən chəó ébēb.

²³ Nhəbe nē áyále nén nkuu nime rítómé nén áŋgel e Dyəb áde áwóó me áde níbenle-'áá empíi me, eláá me áá,

²⁴ 'A-Paal, weewógé' mbwóg, etəŋgéné atyéem á'só wée Kaisə. Nlém ní bwám nime Dyəb áwóŋné-'áá we, mbéle asó alonjé á bad bəsyáəl ábe nyáábəó nyéde.'

²⁵ Né-óó, a-baányan, nyéwəd nlém á abum, áyále nén ndúbpə meé mekan mésyáəl mébenléđ ngáne bəłəŋgé me.

²⁶ Epub étəŋgéné néé étínté syáné á nkin."

²⁷ Ámbid e e'pun dyóm ne é'niin nkuu, áde sédii sédii á edib é nkwe é Adria, dóo dyam melúde mé nkuu, bad ábe bédole stíma békámténé bán kapóg syáábəó səkwođe abíd á nkin.

²⁸ Héé bétédé nkəod nime bétádé chóm eche édelé áyál bonj bəbwəmə é edib-te ányín ngáne edib épédé achab áse. Dóo bédíbté bán e'che bē edib áse é'dé móom mé méta méniin. Mwámpín ní pónđe ámbid e nē, bəmbwəmə ámpə, bényín bán e'che bē edib áse éde móom mé méta meláán.

²⁹ Bəwógé'áá mbwóg nén bán stíma éke ebúl á meláa-té, né-óó, bəntəd e'kii ábe bébwəgnadté stíma é'niin, bəhúnəd bó ámbid bonj bébootéd akáne nén bán bín é'sáa mehéle.

³⁰ Héé bad ábe bédole' stíma, bəbóótédé nzii ahəd ásob. Bənsudéd bəle á mendib-te, bəbámtn bán békag ekii eche bébwəgnadté stíma asudé á'só é' stíma.

³¹ Dóo Paale áłəŋgé mod ambáá á sənze ne sənze éche élyágé áse áá, "Nzé ábén bad ábe bédole stíma béesé á stíma-té hén, nyéelyágé nlém nén bán nyéébe á alonjé."

³² Né-óó, éché sənze énsł nímé nkəod nime ménchəə bəle bétədē bó é'hoó'.

³³ Ade bín é'kwógé asáa, Paale anchánj bó moosyáəl áá bédyé mwá ndyééd. Anláá bó áá, "Nyékédyé bəob, dyóm dé e'pun ne é'niin, ene pónđe esyáəl-łe nyéedyédeé chómchóm.

³⁴ Ncháa-óó nyé nén meé nyédyé ndyééd. Moonyonj atəŋgéné ndyééd adyé ábē ámín. Ké mbum e esid póg éebóó'é."

³⁵ Ade Paale ámáá ahəb nén, antéd ewele á'só wée bó moosyáəl, aságnén Dyəb, ásál áte bonj ábootéd adyé.

³⁶ Nén dénwəd bó nlém á abum, bó mod-téé adyé-'ε mwá ndyééd.

³⁷ Mesonjé mé bad bəsyáəl ábe sébédé á stíma-té, níbédé mbwókel ébe móom saámbé ne ntóób.†

³⁸ Ade moosyáəl ámáá akód, bənsyóg ngun éche ébédé á stíma-té á edib-te ábel bonj stíma éhéle áte.

* 27:17 Donje á kálag dé'só áwóó, ekii eche ébwogke stíma á mendib-te. † 27:37 Donje á kálag dé'só áwóó mbwókel ébe móom saámbé ne ntóób, donje-'ε móom saámbé ne ntóób donje-'ε áwóó mbwókel ébe móom saámbé ne rítáan.

Stíma epángé áte

³⁹ Ade bín é'kénlé, bad ábe bédole' stíma bénkénchemmé nkag mé edib wée bébédé. Bon bényin nkin wée stíma éhele etyéem. Dóo bétífíde nén bán nze stíma ehele ápe áhed, né bébél áke áson yál áhed.

⁴⁰ Bénsél nkóod níme ménchāā e'kii ábe bébwōgnéé stíma, béhúnéd bó á mendib-te, béhūnē-é besākalaa bé e'ped bé mebámbé ábe é'hyōmte stíma. Héé bépódté abad áte á ped e'só e stíma ábel bon epub étūte stíma á'sō. Héé sébóótédé áke á nkin.

⁴¹ Bon áde sékagké nē, dóo stíma ébómé yál á akúd dé nsíí á mendib sé. Atyág áde ped e'só e stíma étyágé-'áá nē, stíma enkēnhēnlé áke ámpē, bon ped e mbíd embootéd apānted áte áyāle mendib méhuéné'áá ngine mébōmē yál áhed.

⁴² Sānze émbel ntii bán bēwūū bad bé mbwōg bésyāā, ábel nén bó modmod béenyalé' á nkin se bésob.

⁴³ Bon mod a mbáá a sánze ahedé'áá áá mōson Paale alonjé, né-ōó, anlāá sánze áá éebelé nē. Antim anlāá moosyāā áá bad ábe béhele anyal bóob bésébe behéb á edib-te bényal kékag á nkin.

⁴⁴ Áá ábe bó-é belyágé áse, béchāhned e'ped é' stíma béhíde bó ámbíd. Né-'áá, sébélé bon sé moosyāā sépē á nkin ésebán dyamdyam ábele sé modmod.

28*Paale bédyéé á Malta*

¹ Ade sémáá ape á nkin ésebán dyam dé mbéb ábélé sé modmod, dóo sésōjténé nén bán ene mbwōg echē edé á edib-te wée sébédé, béchāgéé chō bán Malta.

² Bad bé dyad ábe sétáné áhed bēnwōhngēn sé. Mbúú embootéd achó, ahéb-pe ábé, né-ōó, bēnkonéd muú bán séwāle', békōb-pe sé nken.

³ Paale anlād ngen é lōn áte á mbág. Ade áhāgkē chō á dū, dóo píí e nyō ébidé á mbág ní lōn-té áde muú nínáné chō, bon ekób mō á ekáá etyág-ke áhed.

⁴ Ade áhé bad bé dyad bényíné ene nyō ekēnléné Paale á ekáá dóo bēlāhngēé nhōg ne aníní bán, "Anén mod adii mod awē awúe' bad. Aponé kwééd á edib-te bon kēné nkāásé ní Dyōb nídíí níkóbé mō."

⁵ Bon Paale answág ekáá ahúnéd ene nyō á dū-te ésebán ene nyō ebele mō dyamdyam.

⁶ Bésíné'áá bán ábootéd achíd, ké'ε áhūn áse mpātepēm áwē. Bon néε békésinné kāsōh ésebán dyamdyam ábenlad mō, dóo bēhāhngēné mewēmtēn bon bétimé ahób bán, "Anén mod adii dyōb."

⁷ Nzag ébédé benben ne wée sémbēē nē. Mod awē anwōh echē nzag bēchāgé'áá mō bán Publíose. Mō ábédé nkamlēε ambáá a ene mbwōg echē ebédé á edib-te. Ankob sé nken achāgéd-te sé bwām.

⁸ Publíose sáá ábédé á anōh dé nkole, ahéb dēnsog mō, ekwaglēε-ε akób mō. Paale ankē áwē ton-tē, akáne', abán mō mekáá á nló, ádíid-te mō bwām.

⁹ Ade bad bēwōgé nē bad bé nkole bēmpē ábe bēbédé á dyad-tē wē, bēmpē wée Paale ádíid-te bó bwām.

¹⁰ Bēmbé sé ndē híin. Ade sébwōgké eke, bēnhīí sé bwēm á stíma-tē ábe sébenlédte á nzii.

Paale bēbidé á Malta bēpédé á Roma

¹¹ Sēmadé á mbwōg e Malta ngōn éláán bon sēsōlē stíma echē embíd á Alesandria. Bēchāgé'áá ene stíma bán, "Myōb níme medé Nhéd." Sédé asyāā né ene stíma ekédyéé ádé hōm ene pōndé e ahéb á ngine esyāā.

¹² Sēnkē, sépē á dyad á Sirakus. Sēmūd áwēd e'pun é'láán.

¹³ Bootya hē dóo sékíí bon sépāg á dyad ámbáá á Regium. Nēε bín é'sāngé epub émbóótéd abíd á ped e mbōh. Ámbíd e e'pun é'be sémpē á dyad á Putioli.

¹⁴ Sēndibéd bad áwēd ábe bēdūbpé Krístā. Bēnlāā sé bán sébē ne bó sōndé pōg. Nēε sékíí bon sépāg á Roma.

¹⁵ Bānned ábe bēdūbpé Krístā bēnwōg bán séhúe', né-ōó, bēmpē kāsōhse á hōm áde bēchāgé'áá bán Dyōn á Apíōs, donje-ε bésíné sé hōm áde bēchāgé'áá bán Ndáb é Beken Eláán. Ade Paale ányíné bó, ansāgnēn Dyōb, nlém níwēdnéd-te mō á abum.

Paale apedé á Roma

¹⁶ Ade sépédé á dyad á Roma bēntéde Paale bán ábé ne mō mwēn bon bēmbané sánze bán énoe mō.

¹⁷ Ámbíd e e'pun é'láán Paale anchélé bad bēmbáá bé Israel ábe bédé á dyad-tē wē á mbom. Ade bēpédé anlāá bó áá, "A-baányān bé Israel, menkēmbēnlé ábēd bad dyam dé mbéb ké ahōg, menkēmbēl-laá dyam dé mbéb ké ahōg tāhngene e'lem ábe ábesyānē betaa belyágké syānē. Bon kēné, ábēd bad bēnkōb me á Jerusalem bēbē-ε me á mekáá me benkamlēε bé Roma. Né-ōó ndé hén néε mod a mbwōg.

¹⁸ Ade benkamlene bé Roma bémáá me akáad, béhédé'áá me achene, áyale bénkênkudté nzoṃ ké póg eché elúmte nén bán ntàngéné kwééd.

¹⁹ Boṅ bad bé Israel bénkênkwenténné bán bétéde me, né-óó, menhób meé Kaisere mósmād mímém nkáá. Kénê-'é ménkênwóngé dyamdyam dé mbéb áhób tângene ábém bad.

²⁰ Nén dó-'áá ákásá boṅ ríchēnlé nyé ábel boṅ syánē dékal. A mbále ndáá mezé nyébíi nén bán nzé bengobéngóbé bédé mé á mekáá, né édíi áyale mod awé bad bé Israel bésúmé áyál bán ápě."

²¹ Héε ábē belyáged béláŋgeé Paale bán, "Séékúdeé kálag ké póg eché ebídé á Judeya áyál echóŋ. Mod awe syánē ké nhóg-ke eébidēē áwed se apēēn nlébtéd ké nhóg ké'ε ehób é mbéb áyál echóŋ.

²² Boṅ séédǎŋ mímóŋ mewémten awóg, áyale sébíi nén bán hóm-téé bad béhóbe mam mé mbéb tângene echén epepé éche édíi áte."

²³ Né-óó, bóobe Paale béntfí akag áde béhyé mó awóglēn. Eché epun épédé-'áá ndun e mod épē-'ε wéε Paale ádyéé'áá. Paale ambootéd bó mekan mé nkamlēn rí Dyób akale bootya mbwēmbwē kóŋŋ ne ngukél. Anwanén ábel bédúbe Yesue. Abēnládtáá e'ped ábe é'bidé á kálag e mbéndé e Mose ne á metelag mé bekal bé'dáóđǎŋ ábel bédúbe nén bán Yesue mó adé Krístæ.

²⁴ Bó donge á bad béndübē mó, boṅ donge dénkéndübéé bán chóm éche áhóbeé édé mbále.

²⁵ Né-óó, bémbootéd apentēn áde békagké. Bédéké, Paale anláá bó áá, "Edáóđǎŋ éche Esáá éntāŋgēn áde éláŋgé nkal é'dáóđǎŋ Yesayaa mekan áá áláa ábēn betaa áá,

²⁶ Kág, éláa ábē bad wéé,

nyéewóg nyéwóg-ke ámpē boṅ nyéesóŋténné mbéd,
nyéēnǎn nyénǎn-ne ámpē boṅ nyéenyínné mbéd.

²⁷ Nhóbe né áyale ábén bad bélélé nlém á abum,

békólé nímab metúu,

bédíbé-'ε nímab mǐd.

Nzé enkémbé nē, né nímab mǐd ményínne'

nímab metúu méwógne'

nímab nlém-me nísóŋtēn.

Né bétimén me

né mēchoód-te bó.' "

²⁸ Héε Paale ásógtéé nén áá, "Nyébíi-óó nén bán nkalaŋ mé e'choóchoŋ níme Dyób álómé, álómé mó bóob wéε bad ábe béesě bad bé Israel. Béwóglēn-ne mó." *

³⁰ Paale andyéé áwed mwé níbe á ndáb eché mwēn ásápé'áá. Bad bésyāā ábe béhyagé'áá áwē akobé'áá-'ε bó nken.

³¹ Akalé'áá nkalaŋ mé nkamlēn rí Dyób áyāgté-'ε bad tângene Sánjú Yesu Krístæ éseban abáa' dyamdyam, modmod enkénkǎŋ-'áá mó áhób dyam.

* **28:28** Donje á kálag dé'só ábádé nchoo 29: Ade Paale dhóbé nén bad bé Israel ábe bébédé áhed, bēnhidé bēn ne bēn, bebóótéd-te apentēn bwámwam.

Kálag echë Paale áténlé Baá Roma Ndibned ní kálag

Kálag echë Paale áténlé bad bé Roma ebédée ábonşen bó áyāl e epe éche ántíí' é ápe á mwembé níme níde áwed. Enén kálag elúmte chóm éche adúbe á Krísto ne ngáne alongé á bad bé Krísto átánǵéné abé. Paale akoó ahób áwédte aá, "Nkalanj ní bwám rílúmte nyaa eche Dyób ábeléé bonj bad békobnéd áwe e'só. Adúbe dós ákæá bonj bad békobnéd á'só é' Dyób" (1.17).

Paale alúmté áte aá éhædnad bán bad béşyāā́l békobnad á'só é' Dyób áyāle bó moosyā́al bédé áse e ngine embéb. Aá mbwiined ne adúbe áde bédúbpé Yesu Krístæá dós nê ábenladté.

Paale alúmté áte ámpé aá mod akude alongé dékššlē abé áde ádíí mod nhóg ne Krístæá. Ene ndín e mod ábelé abé nsanj ne Dyób, Edæádæj é Dyób-pe ébelé éhúd mós áse e ngine e mbéb ne e kwééd. Asógté ne elébé éche ábágé bad ne mekæmag níme ábágé Dyób.

Nkabté d ní kálag

Ndibned ne atón áde kálag ékoo' é ahób 1.1-17

E'soóşonj é'hædnad ne moosyā́al 1.18-3.20

Nzii e Dyób ákud e'soóşonj 3.21-4.25

Alongé dékššlē abé ne Krístæá 5.1-8.39

Bad bé Israel ne ntíí ní Dyób 9.1-11.36

Abé á mod á Krísto 12.1-15.13

Nsógten ne melenten 15.14-16.27

Paale alómé melenten

¹ Me, Paale, mbæde awé Yesu Krístæá, me-é ntelé enén kálag. Dyób ápwédé me ábé awé mbapee a nlómag, ábē-'e me nsón ákal níme nkalanj ní bwám.

² Mmē nkalanj mós Dyób dénhōbpé á'só é' pónde aá mōšbē ábē bad. Anláá bekal bé'dæádæj mam tånǵene níme nkalanj ngáne bétélé mós áse á Kálag e eché Esáá.

³ Mmēn nkalanj rídíi tånǵene awe Mwán. A nyaa e moonyonj, ane Mwán anchyáád á mbyaa níme Dabidē.

⁴ A nyaa e Edæádæj, Dyób dénlúmēd á ngine e Edæádæj éche Esáá aá mós adé Mwán a Dyób, apuud áde ámpuúdté mós. Ane Mwán adíi awed Šånǵwéé, Yesu Krístæá.

⁵ A dín adé dós Dyób ábágé me nsímé ábēl-le me mbapee a nlómag ábēl bonj bad ábe béese bad bé Israel bédúbe, béwōgne-'e Krístæá. Nén débēl áde dín déwōnj edúbe.

⁶ Nyémpé ábe nyédé á alonj á Roma, nyédé áftínté e bad ábe Dyób ápwédé aá bēbē bad ábe Yesu Krístæá.

⁷ Né-šš, ntenle nyé moosyā́al awé adé á Roma. Nyédíi bad ábe Dyób ádáá, apwedé-'e nyé, ábē ábē bad.

Nsímé ne nsanj níme níhúú ne Dyób, Titéé awéd ne Šånǵú Yesu Krístæá níbē ne nyé.

Paale aságnan Dyób

⁸ Dyam dé'só, nságnan adém Dyób áyāle nyé moosyā́al á dín áde Yesu Krístæá. Nságnan mós áyāle adúbe áde nyédúbpé Yesue ákanlaad nkōņsé áte ríşyā́al.

⁹ Dyób áde níbenlé e ne nlem nhóg akal áde ríkaleé nkalanj ní bwám tånǵene awe Mwán, adé me mbónj nén aá nkamtan nyé akamten ne akamten,

¹⁰ pónde téé nzé nkánne'. Nkánne' nén meé Dyób ábēl níhel nyé ahye dényín, nzé nê ábōņnéde mós.

¹¹ Ndæá bwámbwam meé rínyín nyé ábēl bonj nzé mpedé, ríwéd nyé áte ne nnam níme Edæádæj é Dyób ébágé me.

¹² Dyam áde níhōbēé ádíi nén meé, syānē mod-té áwéd nhóg ne aníníí nlem á abum. Adúbe ádēn áwéd me nlem á abum, adém-me ámpé áwéd nyé.

¹³ A-baányanj, ndæá meé nyébíi bán nkénwōnj mewémten ngen ne ngen áhye dényín nyé, bonj kšáñj ne bōšb nzii eénednédeé. Ndæá meé nípe wē ábēl nsón áftínté echēn níme méchyaā́ e'pun melemlen ngáne níbélé áftínté e bad ábe béese bad bé Israel bēmpēe.

¹⁴ Nsón níme níwóó rídíi ákale bad béşyā́al nkalanj ní bwám, ken bad bé dyad-ε, ké'ε bad bé ahín. Ntánǵéné mós akal wēε bad ábe béwóó debyéé ne ábe béewóó.

¹⁵ Nē dš-áá ákáš bonj nwōnj nlem bwámbwam ákale nyémpé ábe nyédé á Roma nkalanj ní bwám.

Nkalanj ní bwám níwóó ngine

¹⁶ Meekwágéé ákal nkaɓɓ ní bwám áyale mās rídé ngíne e Dyòb eché epiínédé moosyáál awé adúbpé mós e' soóson mbooted ne bad bé Israel átímé' wée bad ábe béese bad bé Israel.

¹⁷ Mmén nkaɓɓ ní bwám ríúmte' syáné nyaa eche Dyòb ábeleé boɓ bad békobnéd áwe e'só. Bad békobnad á'só é' Dyòb adúbe áde bédúbpé. Adúbe dás ákaa' boɓ bad békobnéd á'só é' Dyòb. Nén áde ne ngáne éténlédé á kálag e Dyòb nén bán, "Mod awé akóbnédé á'só é' Dyòb adúbe áde adúbpé, ábe á alonjé."

Moonyon asyáál abelé mbéb d'só é' Dyòb

¹⁸ Dyòb álúmte' nímé melingá. Mébíde ádyòb tãngene mbéltéd mé mbéb nímé bad bébeleé ne e'bébtéd é' mekan ábe bad bébeleé. Mmè mbéltéd mé mbéb ríkáa' bad áhíd mbále.

¹⁹ Dyòb álúmte' bós nímé melingá áyale nén bébíí mam mésyáál nímé bad bétãngéné abíi tãngene Dyòb bwám áyale Dyòb dén álúmte' bós.

²⁰ Se á mbooted áde Dyòb dénhagké nkóɓsé, bwém ábe áhágé é'lúmte bad bwám nén bán mam mé Dyòb nímé mod éenyínnéé díd médé ne mbále. Enyínnad-te nén bán eché ngum edé á ngíndé ne á ngíndé, adé-ε amín e bwém ésyáál. Né-óó béewóó'ε mbãmten ké nhág ákud alagsen.

²¹ Kénéé bébíí bán Dyòb ádé, béebagéé mó edúbé néé Dyòb, béesãgnãn-naá mós. Boɓ pen rímab mewémten mêmbootéd mam nímé méese dyamdyam akamtén, ehíntén ékáá-ε bós mewémten.

²² Béhábe bán béwóó debyéé, boɓ bétímé e'yókél é' bad.

²³ Bésóbé Dyòb áde ádé á ngíndé ne á ngíndé edúbé abe, bétímé bébage bwém ábe bad béhãgné mekáá á nwágén ní bwém ábe é' wág, bwém néé moonyon, menon, nyam ké'ε nyá.

²⁴ Né-óó, Dyòb átédte' aá esíí é mekan mé ekob é yál ékamlan bós ábel mbinde é mekan éche esudte bós edúbé.

²⁵ Bétédte' mbále éche edé tãngene Dyòb béhíde' metóm. Bétédte' ábe Dyòb áde áhágé bwém ésyáál edúbé, bétímé bébage bwém ábe áhágé. Dyòb dós-aá bétãngéné mekenag abe á ngíndé ne á ngíndé. Ebé nê.

²⁶ Né-óó, Dyòb áhúde' bós míd áyál, atédte' bós aá béhíde échab esíí ábel mekan mé mbinde. Bebaád bélyáge' bechóm anaɓned, bénaɓnad baachóm bémpée, áde béetãngeneé abel nê.

²⁷ Baachóm bómpe' bélyáge' bebaád anaɓned ngáne étãngéné abé, béwóó' esíí é ngíne anaɓned baáb baachóm. Baachóm bébele mekan mé e'són ne baachóm bémpée. Nê ábele' békudat yál nkóɓsen nímé bétãngéné akud áyale nímén mekan nímé bébeleé.

²⁸ Ngáne édíí-aá nén bán ábén bad béewóɓnéé Dyòb pónké á alonjé ádá, Dyòb áhúde' bós míd áyál aá békéene rímab mewémten mé mbéb á'só, bébele mam nímé béetãngeneé abel.

²⁹ Mbéltéd mé mbéb rísyáál ríkáá bós nlém áte. Bébébé nlém, bédé ngoód, bélúmte e'beb bé nlém, bédé kónjí, béwúe bad, bédás kókó, bédás edogké, bédé akwáb, bédás bad ahób ámbíd.

³⁰ Bédás bad mam ahób á yál ábébed bós dín, békós Dyòb, bésyáá bad, bédé epame, bédé kúmbe, bédáa' ebébtéd ahag, béewóɓnéé ábab besáá ne benyaá.

³¹ Bédé eyókél, béélontéé akag, béewóó'ε edãnge á nlém-té, béewóó'-aa nlém rí ngól.

³² Bébíí nén bán Dyòb áhóbe nén aá bad ábe bébele' éché ndín é mekan bétãngéné awé, boɓ kénê bédíi bébele nímé mekan. Saá-kaá nê dẽmpen, békẽmte bad ábe bébele éché ndín é mekan káɓɓne kẽmtén.

2

Bad bé Israel béehídéé mbéndé

¹ Né-óó, nyé mod ké ahéé awé akáadte bad bémpée, ábê kénzéé, eewóó'ε mbãmten ké nhág ákud alagsen. Áyale nén nzé ekáadte bad áde mmón ámpé ébeleé melemlem mé akan nímé ekáadteé bós, né ekwide' káɓɓne echon yál nkáá.

² Debíí nén bán mbakú eché Dyòb ábídeé tãngene bad ábe bébele' éché ndín é mekan étãngéné.

³ Bóob-póó, nzé nyé mod ké ahéé ábíde mbakú áyál e mod ampée, boɓ mwén abele melemlem mé akan, awémte'né aá móhale móbíid mbakú e Dyòb áte-ye?

⁴ Ké'ε abon áde Dyòb ábóó nlém bwãmbwam, áchábtédé nyé é'kád áte, áwãsén-ne nyé, nyéetédéé dós néé dyam. Nyébíi nén bán e'boɓ bé nlém ábe Dyòb áwánlé áyál echên, é'díí ábe nyé etál áte'áde áden abé dé mbéb.

⁵ Nyélelé nlém á abum, nyéehédéé-aá Dyòb atimen, né-óó, nyéladte yál nkóɓsen rí Dyòb áte. Akóɓsen-ne nyé á Epun é nkáásé. Eché Epun Dyòb délúmed nímé melingá, alúmed-te aá mókáadte' nyaa eché étãngéné.

⁶ Asábé mod téé nchoo ne nsón nímé ábélé.

⁷ Bad ábe bépéné mekuu ábel mam nímé métãngéné ne áhad ehúmé ne edúbé, bébé á alonjé á ngíndé ne á ngíndé. Eché ndín é bad Dyòb débe bós alonjé áde déemaá'.

⁸ Bad bémpēe-’ε bédé ábe bétōntan dásō échab yāl, béebeléé mam níme métāngéné, bétíme bébele dásō e’bébtéd é’ mekan. Eché ndín é bad, Dyōb délūméd bō nímē melingá akógsén-ne bō.

⁹ Baasyāal ábe bébele mbéb, Dyōb débēl bétāg bwāmbwam, béwóg-ke ndutul, mbooted ne bad bé Israel átimé’ wée bad ábe béesē bad bé Israel.

¹⁰ Boŋ ne bad ábe bébele bwām, Dyōb débē bō ehúmé, edúbé ne nsaj, mbooted ne bad bé Israel átimé’ wée bad ábe béesē bad bé Israel.

¹¹ Nyébii nén bán Dyōb déekwognádté modmod.

¹² Bad ábe béewóo mbéndé é Moseε, bébele mbéb. Dyōb dékāād-te bō ésebán abenlad mbéndé, bébōō’ε. Bad bé Israel-ε, bō ábe béwóo mbéndé é Mose, bébele mbéb, Dyōb débēnléd mbéndé ákáad bō.

¹³ Saké awóg áde mod áwógé mbéndé dōō ákəə’ boŋ ákobnéd á’sō é’ Dyōb, ahíd áde mod áhídéé éché mbéndé dōō ákəə’ boŋ ákobnéd á’sō é’ Dyōb.

¹⁴ Bad ábe béesē bad bé Israel, béewóo’ε mbéndé, boŋ pónéd ké ehéé échē bébēnlédé nímab mewémtan boŋ bébel chōm éche mbéndé éhóbé, né bélúmte nén bán kénεε béewóo’ε mbéndé, áwab nlém-té bébii nhəŋlén áftinté e mboŋ ne mbéb.

¹⁵ Mmāb mbeltéd nlúmte nén bán chōm éche mbéndé éhédεé éténlédé bō á nlém-té, bébii-’ε nén bán nímab nlém rilāŋge bō bán édé nē. Mmab nlém rilúmte bō ké dyam áde bébélé áde mbéb ké’ε ábóó.

¹⁶ Né-ōō, á Epun é nkáásé, Dyōb dékāād bad béesyāal nchoo ne chōm éche békámtné ké’ε éche bébélé ké á kun-té. Abε Yesue ene kunze ákáad bad. Adén akan dōō rilāŋgeé bad nzé nkale’ nkalanj mī bwām.

Bad bé Israel ne échab mbéndé

¹⁷ Bōab-pōō, nyé ábe nyéchəge yāl bán bad bé Israel, nyésumé nlém áyāl e mbéndé éche Moseε, nyékumé-’ε ekáá á tāl bán Dyōb ádii áden Dyōb.

¹⁸ Nyébii chōm éche Dyōb áhédεé áá nyébel, nyébii-’ε nén bán nyétāngéné néε nyéhíde chōm éche étāngéné, ngáne nyéyákgé mbéndé.

¹⁹ Nyétédé yāl nén bán nyéε nyéyágte bad ábe békwdé ndím abii áde béebii’ε Dyōb, nyédúbpé bán nyéε nyédé néε etrukāŋ éche bad ábe bédé á ehíntén-té.

²⁰ Nyétédé yāl néε bad ábe bélébe’ e’yókél é’ bad. Bán nyé-’áá nyéyágte’ bad ábe béebii dyamdyam. Nyétédé yāl nē áyale nyéwémtan bán ngáne nyébii mbéndé é Dyōb bwām, nyébii mekan mésyāal, nyébii-’ε mbále.

²¹ Bōab-pōō, ngáne édii bán nyéε nyéyágte bad bémpēe, cheé ekás boŋ nyéeyágté échən yāl? Nyékanle bad bán bééchilbē’, nyé bēn nyééchibéé-yε?

²² Nyé ábe nyélāŋge bad bán béékābē mesón á ndáb e w’wóngé, nyébēn nyéekábéé mesón-ε? Nyékōō abele á myōb mémpee, boŋ nyéekāgké á mebón mé myōb nyéchilbē bwēm-ε? *

²³ Nyékume ekáá á tāl bán nyéwóo mbéndé é Mose, boŋ nyésudte Dyōb edúbé abóó áde nyébóo’ε éche mbéndé.

²⁴ Eténlédé á kálag e Dyōb nén bán, “Bad ábe béesē bad bé Israel béhóbe’ Dyōb mam mé mbéb á yāl áyale mekan níme nyébeleé.”

²⁵ Nzé nyéhíde’ mbéndé, né ayag áde nyéyagéé bad ákóó etógnén abé á’sō é’ Dyōb. Boŋ nzé nyéehíde mbéndé, né ayag áde béyagéé nyé, déesaá dyamdyam.

²⁶ Bōab-pōō, nzé édé bán mod awé béeyagéé abele ngáne mbéndé éhédéé, né Dyōb dékob mō néε mod awé béyágé.

²⁷ Né-ōō, bad ábe béhíde mbéndé kénεε béeyagéé bō, bélúmte nyé bad bé Israel bán mekan níme nyébeleé méetāngenεé. Béyágé nyé, nyéwóo-’ε mbéndé éche éténlédé á kálag, boŋ nyéehídeé chó.

²⁸ Nyébii-ōō nén bán, saké bad ábe bétōmte’ mekún álúmed nén bán bédé bad bé Dyōb bōó békóó bad bé Israel abé. Saá-kaá ayag áde béyágé mod á ekob é yāl éche ényínnad dōō ákəə’ boŋ mod ákōŋ mod á Israel abé.

²⁹ Boŋ mod awé akōŋté mod á Israel abé adii mod awé adé mod á Israel á nlém-té, nédé, mod awé béyágé á nlém-té. Edəəđəŋ é Dyōb chō-’áá ébele nímən nsón, saké ahíd áde mod áhídé mbéndé éche bétélé ášē. Dyōb dōō ákəne’ ene ndín e mod, saké baányoŋ.

3

Dyōb ábele ngáne áhóbé

¹ Nsyājŋ nhéé-ōó rídé ábé mod á Israel? Ké-’ε nyaa e nsyājŋ ehéé édé áyag mod álúmed bán adé mod á Dyōb?

² Nsyājŋ rídé bwāmbwam. Dyam dé’só, áwab mekáá dōō Dyōb démbεé échē eyale.

* 2:22 Mebón níme bad bé’ bōód mébédεε ndáb éche énwōŋ bwēm áte ábe é’lélé nkun.

³ Ngáne édíí bán b́ bad behóg béebale'áá ngáne Dyöb dénhábpē áá bébél, nédē Dyöb d́mpē déebenlé chóm éche ánhábpē áá mósábel-ε?

⁴ Eesaá nē. Kénεε moonoyon asyáál ádíí nkal a metóm, Dyöb ádé mbále pónde ésyáál. Eténlédé á kálag e Dyöb nén bán,

“Nzé ehóbé dyam, bad bétáŋgéné anyín nén bán dyam áde éhóbé áde mbále.

Nzé békáadte wε, ekáa nyaa eché étáŋgéné.”

⁵ Bonj nzé édé nén bán mam mé mbéb ńme débélεé mélúmte bwám bán Dyöb déekwognádté modmod, chán-nō déhábpe? Nédé dehele dehób nén bán Dyöb ábélé awusé ákógsen syánē áyále mbéb ńme débélε-yε? (Debyéé á moonoyon d́o ŕhóbnεé nén.)

⁶ Eesaá nē. Nzé émbē nén bán nyaa eche Dyöb ákáadteé edé awusé, né chán-nō áhele akáád nkóŋsé?

⁷ Bonj nzé édé nén bán dyam dé metóm áde níkalé álúmte ngáne Dyöb ápédé mbále abé nyaa eché bad bébage-'áá mós ehúmé, né cheé-ε ékás bonj Dyöb abé ákáádté mε néε mod áwé abélé mbéb?

⁸ Cheé-ε syánē dééhábēē nén bán, “Syánē débél mbéb ábel bonj mbonj ŕnyínndé?” Donje á bad béhóbe syánē mam mé mbéb áyál bán dehóbe ádé akan. Dyöb dékógsen ábē bad ábe béhóbe nē nyaa éche étáŋgéné.

Modmod eébélēε ngáne Dyöb áhedeé áá débél

⁹ Chán-nō syánē déhábpe? Nyéwémténé bán syánē bad bé Israel detómé bad ábe béesé bad bé Israel-le? Eesaá nē. Mmaa álúmed nén mεε ngine e mbéb ekamlan bad bé Israel ne bad ábe béesé bad bé Israel nyaa póg.

¹⁰ Eténlédé á kálag e Dyöb nén bán,

“Modmod eesaá áwe abele ngáne Dyöb áhedeé. Mod ké nhóg eesaá.

¹¹ Mod eesaá awé asóŋténé mbále táŋgene Dyöb, modmod eesaá-'áá awé awane áte ábíi Dyöb.

¹² Moosyáál abáá Dyöb á yál.

B́o moosyáál bétímé béwóó abé dé mbéb.

B́o modmod eébélēε dyam áde átáŋgéné. B́o mod ké nhóg mwén eesaá.

¹³ E'yale ábe é'bíde b́o á nsál é'dii néε sonj eché béékútenεé.

Bébenlad échab echém é nsál ádog bad. E'yale ábe é'bíde b́o á nsál é'dii néε kem e píí e nyá.

¹⁴ Mbon é mehób ne e'bébtéd bé mehób b́en ne b́en b́oó é'bíde b́o á nsál.

¹⁵ Mekuu méhēnle b́o áse ásyog mekií.

¹⁶ Kéhéé áde bétóméé ebébtéd ne metake b́oó b́elyágeé.

¹⁷ Béébií'ε nsaj.

¹⁸ Bééwóo-'áa mbwóg ŕi Dyöb ké nhóg áte.”

¹⁹ B́oob-póó, debíí nén bán mekan ńme bétélé á kálag e mbéndé, ménone bad b́esyáál ábe bémbéé éché mbéndé. Né-óó modmod ééhēlēε-se ádíbε nsál áte áhób áá mósúu nzom. Ken mod á Israel, ké'ε mod awé eésē mod á Israel. Moosyáál átyēem á'só é' Dyöb.

²⁰ Nyébií nén bán modmod ééhēlēε-se ákobnéd á'só é' Dyöb áyále áhídeé mam ńme mbéndé éhóbεé. Mbéndé edii dásó álúmed bad bán bébélé mbéb.

Adúbe d́oó ákəə bonj bad békobnád á'só é' Dyöb

²¹ Bonj b́oob d́oó Dyöb álúmté syánē nzii eché bad békobnadté áwe e'só. Ene nzii eewóó'ε dyamdyam ábel ne mbéndé é Mose. Eché mbéndé ne bekal bé'daádəŋ béhóbé mam táŋgene ene nzii se' b́oód.

²² Ene nzii edii nén, mod ké ahéé awé adúbpé Yesu Krístəə, mós akobnad á'só é' Dyöb. Nhəŋlén ké nhóg méesaá ken mod adé mod á Israel-le, ken mod eesaá.

²³ Moosyáál abélé mbéb, modmod eékwognedeé ákud ehúmé é Dyöb.

²⁴ Nsimé ŕi Dyöb níbélé Dyöb átéde bad néε bad ábe békóbnédé áwe e'só. Abagé ńmε nsimé ngén. Ábelé né akode áde Yesu Krístəə ákódté bad ábe bédúbpé mós.

²⁵ Dyöb d́embē mós néε mende áá áwé áwen nló. Bad békúd-te alagsen dé mbéb áyále bédúbpé mós. Dyöb ábélé nē, ákonj bad b́esyáál álúmed nén áá móbele mekan nyaa eché étáŋgéné. Ngen e'só Dyöb awésánnáá bad, eekógsan-naá bad ábe bébélε'áá mbéb.

²⁶ B́oob-póó enén pónde, álúmte bad áá móbele' mekan nyaa eché étáŋgéné, álúmte-'ε bad áá móókób kénzéé awé adúbpé Yesue.

²⁷ Ngáne édíí-'áá nē, cheé-ε dékumneé ekáá á tál? Nē dééhεdnεé. Mbéndé ehéé ehóbé nē? Dekume' ekáá á tál áyále déhídeé mbéndé-yε? Aáy. Deékúmēē ekáá á tál áyále nén, adúbe áde d́edúbpé Yesue d́oó ákəə bonj dékud e'soósonj.

²⁸ Syánē denyíne nén bán mod akobnad á'só é' Dyöb adúbe áde adúbpé Yesu Krístəə saké áyále ahíd áde ahídeé mbéndé.

²⁹ Ké-'ε nyéwémtan nén bán Dyöb ádíi Dyöb á bad bé Israel d́empen-ε? Saá mós adé káŋne Dyöb á bad ábe béesé bad bé Israel-le? Eε, mós adé káŋne Dyöb á bad ábe béesé bad bé Israel.

³⁰ Dyòb ádíi ahóg. Né-óó, átéd bad ábe béyágé née bad ábe békóbnédé áwe e'só nzé bédúbpé Yesu Krístæ. Melemlem née átédte bad ábe béeyagéé nzé bómpé bédúbpé Yesu Krístæ.

³¹ Chán-nō déhōbpé ɓɔɔb? Nédē dehōbe nēn bán atéd áde Dyòb átédé bad née bad ábe békóbnédé áwe e'só, adúbe áde bédúbpé Yesu Krístæ álúmte nēn bán bad bééhíde mbéndé ámpé-ye? Aáy, éesaá nē. Boŋ pen chōm éche mbéndé éhōbéé chōó syánē débánéé mekáá.

4

Adúbe dōo dēnkōŋ boŋ Dyòb akob Abrahamε

¹ Chán-nō déhōbpé tāŋgene taa awēd, Abrahamε? Cheé émbenléd á pónéd eché?

² Nzé ankobnéd á'só é' Dyòb áyāle mekan nīme ámbenléd, né anwōŋ dyaŋ áde ákumneé ekáá á tāl. Boŋ eéhele'aa-se awōŋ dyaŋ ké ahóg áde ákumneé ekáá á tāl á'só é' Dyòb.

³ Eéhele'aa abel nē. Kálag e Dyòb ehóbe nēn aa "Abrahamε andúbé Dyòb, né-óó, Dyòb déntéd mó née mod awē akóbnédé áwe e'só."

⁴ Nzé mod abelé nsón, bébelé bésábé mó áyāle nsón nīme ábelé. Mmē nsábe méébagkē nde. Ndii chōm éche átāŋgené akud áyāle ebábé éche ásálté.

⁵ Boŋ nzé mod eébelé nsón boŋ asumé nlém nēn aa adúbe áde módúbpé Dyòb dōo débēl boŋ mókóbnéd á'só é' Dyòb, né Dyòb áde ábele boŋ bad ábe bébelé mbéb békóbnéd áwe e'só, déntéd mó née mod awē akóbnédé áwē e'só adúbe áde adúbpé mó.

⁶ Melemlem nē dōo Dabide ánhōbpé tāŋgene nnam nīme rídé ne bad ábe Dyòb átédé aa békóbnédé áwe e'só, kénéé edíi bán béebeléé nsón ké nhóg.

⁷ Dabide anhób aa, "Nnam ne bad ábe Dyòb álágséné nīmab mewusé boŋ abódéd nīmab mbéb.

⁸ Nnam ne mod awē Sáj Dyòbe éetúbpé nīmē mbéb dīn ámpē."

⁹ Nédé bad ábe béyágé bēnpen bōó békúd nīmē nnam nīme Dabide áhóbé, ngé bad ábe béeyagéé bómpé békúd mó? Demaa ahób nēn bán kálag e Dyòb ehóbe aa, "Abrahamε andúbé Dyòb, né-óó, Dyòb déntéd mó née mod awē akóbnédé áwe e'só."

¹⁰ Pónéd ehéé Dyòb déŋchágké mó aa adé mod awē akóbnédé áwe e'só? Ade béeyagéé mó, ngé áde bémáá mó ayag? Nē dēmbenléd áde béeyagéé mó.

¹¹ Bēn'yag mó áde Dyòb ámáá mó akob. Ayag áde bēn'yagké mó démbē e'cheŋléd ábe é'sógtan nēn bán akóbnédé á'só é' Dyòb adúbe áde adúbpé, kénéé edíi bán áde ánkóbnédé á'só é' Dyòb bēnkēn'yagké mó. Nē ábédé ábel boŋ Abrahamε ábē sáá a bad béesyāl ábe béeyagéé, ábe békóbnédé á'só é' Dyòb adúbe áde bédúbpé Dyòb.

¹² Nē ábédé ámpé ábel ábē-ε sáá a bad ábe béyágé ábe bómpé bédúbpé Dyòb melemlem ngáne Abrahamε eched sáj andúbēé á pónédé eche béeyagéé mó.

Adúbe dōo ákæ' boŋ mod ákud chōm éche Dyòb áhóbé

¹³ Dyaŋ démpēé áde débíi ádíi nēn bán, se' bóód Dyòb dénlāā Abrahamε ne nīme nchyaátén aa móóbe nkōŋsé áwab mekáá. Dyòb dénkēnhōbpé nēn áyāle Abrahamε áhídé'aa éche mbéndé. Dyòb dénhōb nē áyāle Abrahamε andúbé mó, Dyòb átéd-te mó née mod awē akóbnédé áwe e'só.

¹⁴ Nzé émbē nēn bán bad ábe béhíde mbéndé bóó békúd chōm éche Dyòb áhóbé aa móóbe, né adúbe áde bad bédúbpé Dyòb adé ngēn. Né chōm éche Dyòb áhóbé-ε aa móóbe éesaá dyaŋdyaŋ.

¹⁵ Chōm éche mbéndé ébeleé edíi dásō ápiined bad melingá mé Dyòb. Boŋ nzé mbéndé eése, abóó á mbéndé déébagkē.

¹⁶ Nē dō-'aa ákás boŋ Dyòb álāŋgē dásō bad ábe bédúbpé mó aa móóbe dyaŋ áde móhóbé. Abelé nē ábel boŋ ényined nēn bán nīmē nsimé móó níkáá boŋ álāŋgē nchyaátén nīme Abrahamε ngen póg ne ngen ésyāl aa móóbelé bó dyaŋ áde móhóbé. Saké bad ábe béhíde mbéndé bēnpen bōó ámbéé akag. Ámbé káŋŋe bad béesyāl ábe bédúbpé Dyòb ngáne Abrahamε andúbēé. Abrahamε ádíi sáá awē syánē moosyāl.

¹⁷ Eténlédé á kálag e Dyòb nēn bán Dyòb dénlāā Abrahamε aa, "Mbélé wε sáá a meloŋ híin." Né-óó, Abrahamε mó adé syánē sáá á'só é' Dyòb. Dyòb áde Abrahamε adúbpé dōo adé Dyòb áde ábage bad ábe bēwédé alongé, dō-'aa áhóbé' boŋ mekan nīme méesé mébé.

¹⁸ Abrahamε andúbé Dyòb ásūm-mε nīme nlém áwē, kénéé edíi bán á mīd mé moonyoŋ, nzom ké póg enkēmbáá eché elúmte bán mam nīme Dyòb dénhōbpé aa mébenléd mébenléd-te. Andúbé aa móóbe "Sáá a meloŋ híin" ngáne Dyòb dénlāā'ε mó aa, "Mmōŋ nchyaátén mébuu áte née betintine."

¹⁹ Ade Dyòb álāŋgē Abrahamε nē, ámbé dyaŋ mbwókel e mwē. Ámbíi aa móólyagéé moonyoŋ ámpé, abíi-ε aa mwaad Seraa adé ekōm. Boŋ ké nē, adúbe dénkēnsudté mó.

²⁰ Nlém méehúne'áá mós tãngene dyam áde Dyöb dénhõbpē áá mósõbelé mós, boŋ adúbe dénwed mós áte, ábagé Dyöb ehúmé.

²¹ Ammäd áwe nlém-té nén áá Dyöb débēl chõm éche áhõbé áá mósõbēl.

²² Né-õs, adúbe áde Abrahamē dēnkõŋ Dyöb déntēd mós nēe mod awē abele mekan ngáne Dyöb áhedéé.

²³ Bõõb-põs, e'yale ábe é'ténlédé nén bán, "Dyöb déntēd mós nēe mod awē abele mekan ngáne áhedéé" bëesaá áyale Abrahamē mwẽmpen.

²⁴ Abē e'yale é'dé áyāl e syánē ámpē. Dyöb déntēd syánē ámpē ábe dedúbpē nēe ábe bad, mós apuúdté Yesu Krístæ, Sãngwéé awēd.

²⁵ Krístæ mós Dyöb dēmbéé áá áwē áyale mbéb nímēd. Dyöb apuúdté mós ábel boŋ dékud nzii ákobned á'sõ é' Dyöb.

5

Depedé á nchemten ne Dyöb

¹ Né-õs, ngáne édíi bán adúbe áde dedúbpē ábélé Dyöb átédé syánē nēe bad ábe békõbnédé áwe e'sõ, syánē dedé nsan ne Dyöb. Echēd Sãŋ, Yesu Krístæ mós akáá boŋ debé nsan ne Dyöb.

² Mós-áá adĩbnédé syánē nzii echē adúbe áde dedúbpē ábélé boŋ syánē debii nsimé ní Dyöb. Né-õs, dedé menyinŋe bwãmbwam áyale desumé nlém nén bán dēékũd ehúmé é Dyöb.

³ Dedé menyinŋe ámpē áyāl e metake nĩme dékudeé, debii nén bán metake mépẽene' e'wéd bé nlém.

⁴ E'wéd bé nlém-me é'bele dewõŋ abé áde ákobnad ne Dyöb. Adē akobned áde dékobnadté-'e á'sõ é' Dyöb dõ-'áá ábele boŋ dewõŋ e'lyág bé nlém nén bán Dyöb débēl chõm éche áhõbé áá mósõbelé syánē.

⁵ Nzé delyáge-'e nlém, déebídté mekáá mé ngēn áyale nén, Dyöb álúmté syánē ngáne ápedé syánē adan abel áde ábélé boŋ echē edanŋe ésl syánē á nlém-té. Abelé nén abe áde ábágé syánē echē Edáõdanŋe éche Esáá.

⁶ Ade dēnkēnwõngé ngĩne ké póg áwõngēn éche syánē yāl, Krístæ anwé á nló nímēd, bebel bé mbéb á pónde eche Dyöb déntii'.

⁷ Elélé áte mod áwé á nló ní mod awē abele' mekan nĩme métãŋgéné á'sõ é' Dyöb. Kapóg-ke mod ahele ákwentēn áwé á nló ní mod a bwãm.

⁸ Boŋ Dyöb álúmté syánē áá módáá syánē áyale nén ambēl áá Krístæ áwé á nló nímēd áde dédíi débédé bebel bé mbéb.

⁹ Dekõbnédé á'sõ é' Dyöb áyale mekií nĩme Yesue nĩme mēsýõgké á nló nímēd. Nzé mekií nĩme Yesue nĩme mēsýõgké á nló nímēd mebélé dekõbnédé á'sõ e' Dyöb, nén déelúmtē syánē bán Krístæ átõm syánē ason nē ášē e melinŋá mé Dyöb-ε'?

¹⁰ Ade débédé bad bé ekõyí bé Dyöb, kwééd echē awe Mwãn áwédé embēl dépē á nchemten ne mós. Ngáne édíi-'áá bán depedé á nchemten ne Dyöb, abé áde awe Mwãn ádíi á alõngé, á asóg, áson syánē.

¹¹ Saá-kaá nē dẽmpen, boŋ dewõge menyinŋe áyale Dyöb ábélé syánē dedé ábē bad, mbwiined ne echēd Sãŋ Yesu Krístæ, mós awē akáá boŋ debé á nchemten ne Dyöb.

Nhãŋlén nĩme níde átĩnté e Adame bõ Krístæ

¹² Mod nhõg mós ambēl boŋ mbéb nĩpe á nkõŋsẽ-te, mbéb mós-'áá nĩpēéné kwééd. Né-õs, moosyáal awág áyale moonyõŋ asyáal abelé mbéb.

¹³ Dyöb ádēhõb áá mósbage bad mbéndé, né bad bēbele mbéb á nkõŋsẽ-te. Boŋ kēhéé wēe mbéndé eesaá, modmod éehēlēē-se ahõb áá mod abóó mbéndé.

¹⁴ Boŋ kēnē, bootya á pónde eche Adame ápe á pónde eche Mosẽe, pónde eche Dyöb ábágé mbéndé, kwééd enwõŋ ngĩne ámĩn e moonyõŋ asyáal. Bad bēwágáá kēnē bēnkēmbóó'ē mbéndé e Dyöb melemlen ngáne Adame ámbõõ'.

Adame abedé á nwágēn nĩme ane awē antãŋgēn ape, nédē Krístæ.

¹⁵ Abē bad bēbe bëesaá nyaa póg, áyale nén nde echē Dyöb ábágé bad ngēn, eche Yesu Krístæ ápēéné, eesaá melemlen nãngáne dyam áde mbéb nĩme Adame mēmpẽenné. Edé mbále bán bad híin bēwédé áyale mbéb nĩme mod nhõg ábélé. Boŋ nsimé ní Dyöb ríchábé ámĩn bwãmbwam tómaa nímé mbéb. Bad híin békúde nde e Dyöb ngēn nyaa echē echabé ámĩn, ámbid e mod nhõg, Yesu Krístæ.

¹⁶ Nde e Dyöb-pe ámpē eesaá melemlen nēe dyam áde mbéb nĩme Adame ámbenlé dēmpẽenné. Mmē mbéb nhõg nĩme Adame níkáá moosyáal akwedé nkáá á'sõ é' Dyöb. Boŋ ene nde ekáá Dyöb átédé bad nēe bad ábe békõbnédé awē e'sõ, kēné édíi bán bad bēbéle mbéb abel ne abel.

¹⁷ Edé mbále bán mbéb níme mod nhóg Adame ámbenlé, níbélé bad bésyāal bédé ásē e ngine e kwééd. Bon akan áde aniní mod nhóg, Yesu Krístāe ábélé, átómténé ngine abé. Nén débēl bad bésyāal ábe békudé nsimé ní Dyōb níme ríchábé ámin békobnéd-te áwe e'só békūd alongé áde déemaá', bówōn ngine ámin e chōm ésyāal.

¹⁸ Né-ò, nímé mbéb nhóg níme Adame ámbenlé, mēmbēl Dyōb dēnkwid baásyāal nkáá. Melemlem nē dōo dyam á bwām ahóg áde Krístāe ábélé dēmbenlé bad bésyāal békobnéd á'sō é' Dyōb, békūd-te alongé.

¹⁹ Awógen áde mod nhóg, Adame, énkēnwóginné Dyōb dēmbēl moonyon asyāal ambé mod a mbéb. Melemlem nē dōo awógen áde mod nhóg, Krístāe áwógné Dyōb, ábélé bad hīn békobnéd é á'sō é' Dyōb.

²⁰ Dyōb dēmpēn mbéndé ábel abel dé mbéb ákag á'sō. Bon kéhéé wēe abel dé mbéb ákagké á'sō, nsimé ní Dyōb mbelé níkag á'sō tōmaa nē.

²¹ Né-ò, ngáne mbéb níwóó ngine ápēen kwééd, nē dōo nsimé ní Dyōb mómpe níwóó ngine ábel bon bad békobnéd á'sō é' Dyōb, békūd alongé áde déemaá' mbwiined ne Yesu Krístāe, Sāngwéé awéd.

6

Mbéb níwúú syānē bon Yesu apuúdté syānē

¹ Chán-nō déhōbpē bōob? Edé bán débē débēle mbéb ábel bon nsimé ní Dyōb ríchágke-é?

² Aáy éesaá nē. Syāa dewédé, deewóó'é dyaamdya abel ne mbéb ámpē. Chán-nō déhéle debé débélé' mbéb?

³ Nyéebíí' é nēn bán áde dékudé edusen bon debé mod nhóg ne Krístāe denwé ne mó-ye?

⁴ Edusen éche syānē dēnkudé, élúmtē' bán syānē dewédé, béliímé-'é syānē ne mó. Nén dēmbenlé ábel bon déwōn abé dékōlē. Nén áde melemlem ne ngáne Titēe apuúdté Krístāe ne éche ehúmé á alongé dékōlē.

⁵ Nzé syānē dedé nhóg ne mó áyāle e eche kwééd né syānē débē nhóg ámpē ne mó áde apuú' é.

⁶ Debíí bán áde bēmboméé Krístāe á awōg, bēmbomnéd mó abé áde dēnwōngē bōód. Abel bon ngine eché áde abé dé' bōód áde ábéltaá syānē mbéb ébōo ne abōo ásyāal. Nén débēl mbéb méetédte syānē ntān ámpē.

⁷ Nzé mod awédé, mbéb méekamlánné mó ámpē.

⁸ Bōob-póó, ngáne déwédé ne Krístāe, dedúbpē bán débē á alongé ne mó.

⁹ Syānē dedúbpē nē áyāle debíí bán Krístāe apuúde, éewáá-'aa ámpē. Kwééd eewóo-'aa ngine ké póg ámin eché ámpē.

¹⁰ Awé áde awédé, mbéb méewóó' é dyaam ké ahóg abel ne mó ámpē. Alongé áde ádíí-'é áte bōob ádíi alongé áde ádíí ne Dyōb.

¹¹ Melemlem nē dōo nyémpē nyétāngéné yāl anyín nēe bad ábe bēwédé, ábel bon mbéb méekamlán nyé ámpē. Nyényín-ne yāl nēe bad ábe bédé á alongé ne Dyōb mbwiined ne Yesu Krístāe.

¹² Né-ò, nyéemwāg se mbéb níkamlán echen yāl e moonyon eché éwāg. Nē débēl nyéehidéé mekan mé esíí mé ekob é yāl ámpē.

¹³ Nyéetāngéné-'é nēe nyétédte echēn ped e yāl ké póg á mbéb-te se nyébenléd chō ábel mekan mé mbéb. Bon pen, nyébe yāl wēe Dyōb nēe bad ábe bēbídte á kwééd-te, bon bēbe bó alongé dékōlē. Nyébe echen yāl esyāal á mekáá mé Dyōb ábel bon ábenlad nyé ábel mekan níme métāngéné á'sō é' Dyōb.

¹⁴ Mbéb méetāngéné nēe níkamléné nyé. Nyéesaá ásē e mbéndé bon nyédé ásē e nsimé ní Dyōb.

Débē betān ábel mekan ngáne Dyōb áhedéé

¹⁵ Chán-nō déhōbpē bōob? Ngáne dédíí ásē e nsimé ní Dyōb, nēdē débē débēle mbéb áyāle deesaá ásē e mbéndé ámpē-ye? Aáy, éesaá nē.

¹⁶ Nyéebíí' é bán nzé mod abagé yāl nēe ntān ásē e mod ámpē, ábel kéchéé éche ane mod áhōbēé, né adíi ntān awé ane mod-é? Bad ábe bēbágé yāl ábel mekan mé mbéb, chōm éche békudé édíi kwééd. Bon mod awé abagé yāl ábel ngáne Dyōb áhedéé, abág mod awé ábele mekan níme métāngéné á'sō é' Dyōb.

¹⁷ Nságnen níbē ne Dyōb. Nyé ábe nyémbé betān ásē e mbéb, nyétimé nyéhíde mbále e mekan mésyāal níme báyágté nyé ne nlém nhóg.

¹⁸ Bōob-pe áde Dyōb áhúde nyé ásē e ngine e mbéb nyétime betān, ábel mekan ngáne Dyōb áhedéé.

¹⁹ Nhōbe nímén mésyāal á nyaa e moonyon áyāle nēn nyé nēngáne baányon, nsōntēn méechabéé nyé ámin. Ngen e'só, nyémbē echen yāl esyāal nēe betān, nyébalé mbinde é mekan ne e'bébtéd é mekan, nyébalé-'é ebébtéd chēn ne chēn, nyékag á'sō. Bōob-póó

nyêtàngéné echen yäl esyáál abe née betân, ábel mekan ngáne Dyöb áhedéé, nén débêl alongé áden désän.

²⁰ Ngen e'só áde nyébédé betân ásë e mbéb, nyênkênwóngé dyam abelæn mekan míme Dyöb áhedéé aá nyébêl.

²¹ Nsyán nhéé nyênkudté áde nyébéláá mekan míme mékwágte nyé bɔɔb. Chöm éche míme mekan mépéneé édíi kwééd.

²² Boŋ bɔɔb, Dyöb áhúde nyé ásë e ngíne e mbéb, betân bé Dyöb-paá nyédíí. Nsyán míme nyékudeé rídii nén bán Dyöb ábélé nyésáá ngáne ábê bad betàngéné asán. Nê débêl nyéékud alongé áde déemaá'.

²³ Nyébíi nén bán nsábe míme mbéb mípéneé rídii kwééd. Boŋ ndé echê Dyöb ábageé bad ngên edii alongé áde déemaá'. Dekude dó, abé áde dédíí ne Yesu Krístəə, Sánŋwéé awéd.

7

Bad bé Krísto béesaá ásë e mbéndé ámpë

¹ A-baányan, nyédii bad ábe bébíi mbéndé. Nyéebíi' é bán mbéndé ekamlan mod dásó á pónde eche ádíí á alongé-yé?

² Détéd elánŋén áyál e ehób é e'wóngé. Nzé mmwaád awóó nchóm, mbéndé ehóbe nén bán atàngéné abé ne nchóm pónde esyáál eche nchóm ádíí á alongé. Boŋ nzé nchóm awéde, mbéndé e e'wóngé eekóbéé mós ámpë.

³ Né-ɔɔ, nzé adyééné mod ampée áde nchóm ádíi ádíí á alongé né bēchəg mós bán adii nkáb-a-meson. Boŋ nzé nchóm awéde né awóó kunze á'só é' mbéndé, nzé awóó-ε nchóm ampée, ene pónde, né eekábeé asón.

⁴ A-baányan, né dóó édíi ne nyémpë. Mbéndé eekamlánné nyé ámpë áyale awé áde Yesue áwéde, nyémpë nyéwéde. Bɔɔb-pɔɔ, nyédii bad ábe mod ampée, Yesue awé Dyöb ápuúdté, ábel boŋ nyébele Dyöb bwám.

⁵ Áyale á pónde eche áded abé á moonyon ákamlánnáá syánē, mbéndé epuúdté'áá syánē esíí é mekan mé ekob é yäl áte. Nén ábéláá débêl' mekan mé mbéb míme mépéne' kwééd.

⁶ Boŋ bɔɔb dehídté ásë e mbéndé, awé áde déwéde. Né-ɔɔ, mbéndé echê ekamlánnáá syánē née betân eekamlánné ne syánē ámpë. Nén ábélé dehíde dásó nzii ekóólé bɔɔb ábele Dyöb. Debenle mós nyaa echê Edəəđəŋ é Dyöb élanŋéé syánē, saké nhíden ne mbéndé éche bétélé ásë.

Mbéndé e Dyöb chò elúmte' syánē níméd mbéb

⁷ Chán-nō déhɔbpë bɔɔb? Nédé déhɔb bán mbéndé edé mbéb-ε? Aáy, deéhēlē-εε dehɔb nē. Boŋ mbéndé chò ekáá boŋ mbíi chöm éche mbéb rídii. Nzé mbéndé enkênhób aá mod eesííde chöm é mod, né meebíi' é nén meé ásíi chöm é mod áde mbéb.

⁸ Boŋ ene mbéndé enryém me mewemten mé mbéb ásë, ébel míbootéd bwēm é' bad asii nyaa ne nyaa. Nzé mbéndé eesē, né mbéb méesaá dyamdyam.

⁹ Pónde ebédé echê ménkembíi' é mbéndé. Boŋ á pónde echê mbíi mbéndé, esíí é abel dé mbéb émpuú me áte, nwé'-ε.

¹⁰ Mbéndé eche Dyöb ábágé aá chɔɔ epéne alongé chóchó éfim me awúu.

¹¹ Mbéb ménkud etál ámbíd e mbéndé, rídɔg me, mbél mbéb. Né-ɔɔ mbéb mós ríwúú me.

¹² Né-ɔɔ, denyíne nén bán mbéndé chēn esáá, chöm-εε mbéndé ehóbeé esáá, étàngéné, édé-ε bwám.

¹³ Nédé nē álúmte nén bán chöm éche édé bwám étimé me nē kwééd apiined-ε? Aáy, éesaá nē. Saké mbéndé chò epíinédé me kwééd, mbéb mós nípóó ámbíd e mbéndé, chöm echê edé bwám, ápiined me kwééd. Nén dēmbenléd ábel nén bad bényín ngáne mbéb rídii. Né-ɔɔ, mbéndé e Dyöb ebele' mbéb rílúmte eche ngíne bwámbwam.

Nzum echê ewante' moonyon áte

¹⁴ Debíi nén bán mbéndé eche déhóbéé edii chöm é edəəđəŋ. Boŋ ndii moonyon á ekob. Ndií née mod awé bésómé ásë e mbéb née ntāŋ.

¹⁵ Meesóŋtánné mbeltéd nímém. Mam míme ríhedéé abel, meébēlēé mós. Mam míme ríkóó mós rítiméé abel.

¹⁶ Bɔɔb-pɔɔ, abel áde mbéleé chöm éche méehédéé abel, nén álúmte bán nkwēténé meé mbéndé edé bwám.

¹⁷ Boŋ á mbále saké mmēn nkoo' abel, mbéb míme rídé me áte mós mbélte me nē.

¹⁸ Mbíi meé dyam á bwám ké ahóg déesaá me áte, nédé, ne nlém ní moonyon míme ríwóó, kénéé édíi bán nlém rídé me áte ábel dyam á bwám, meéhēlēé dó abel.

¹⁹ Meébēlēé dyam á bwám áde rídás abel, boŋ dyam dé mbéb áde méehédéé abel, dóó rítiméé abel.

²⁰ Bɔɔb-pɔɔ abel áde mbéleé dyam áde méehédéé abel, nén álúmte nén bán saké mmēn nkoo' nímé mam abel ámpë. Boŋ mbéb míme rídé me áte mós mbélte me mós.

²¹ Né-óó, nnyíne nén mæé mbéndé edé eché ekamlan me. Póndé téé áde ríhedeé dyam á bwám abel, mbéb mós ríwámsan me ekaa ape.

²² Awem nlém-té, mbéndé e Dyöb chós rídás ahíd ne nlém rísyāál.

²³ Bon nnyíne nén mæé mbéndé empée edé eché ekamlan échém ekob é yāl, eché ewane nzum ne mbéndé eché nímém nlém rídás. Ene mbéndé ehaá me, ebelé-é ndé ntān a mbéb. Mmē mbéb mós-áá nkamlan échém ekob é yāl.

²⁴ Ebál é etyag éche étáné me! Nzé-móde ášōn me á mekaa mé échén ekob é yāl, éche épiinad me kwééd?

²⁵ Nságnen mbé ne Dyöb. Asoó adém alongé mbwiined ne Mwān, awed Sāngwéé, Yesu Krístaa. Né-óó, mmēmpen ndé mbíd ébe, nímém nlém rílanje me ahíd mbéndé é Dyöb bon échém ekob é yāl éhíde mbéb níme ríde me áte.

8

Alongé áde Edáádān é Dyöb ébagéé

¹ Bōōb-pōó, Dyöb déekwidéé modmod nkáá awé adé nhóg ne Yesu Krístaa.

² Mbéndé e Edáádān eché épiinad syānē alongé, abé áde dédíí ne Yesu Krístaa, ehúde me á mehan mé mbéndé e mekáb ne á mekaa mé kwééd.

³ Mbéndé enkēnhenlé mbéb amad áyāle nén baányon bēnkēnwóngé ngíne ahíd chs. Né-óó, Dyöb ábélé dyam áde mbéndé enkēnhenlé abel. Anlóm awe Mwān ne ekob é yāl e moonyon éche ébele mbéb, ábóded ngíne e mbéb. Abel áde Dyöb dēmbenlé nén dēmbōdéd ngíne e mbéb ámín e moonyon a ekob.

⁴ Dyöb dēmbel nē ábel bon bad ábe bééhídē mam ne ngíne e moonyon bon bétimé' bēhídē mekan ne ngíne e Edáádān é Dyöb, bēbel mekan nyaa eché etāngénē melelem ngáne mbéndé ehóbeé aá bēbel.

⁵ Bad ábe bébele mekan ngáne écháb ekob é yāl élanjéé bō, bēbelé bésun nímab nlém áyāl e mekan mé ekob é yāl. Bon bad ábe bébele mekan ngáne Edáádān é Dyöb élanjéé bō, bēbelé bésun nímab nlém áyāl e Edáádān é Dyöb.

⁶ Nzé mod asumé nlém áyāl e mekan mé ekob é yāl, né awē. Bon nzé mod asumé nlém áyāl e mekan mé Edáádān né Dyöb débe mó alongé áde déemaá' ne nsañ.

⁷ Nzé mekan mé ekob é yāl mékamlan mod, ane mod abelé ákōó Dyöb áyāle eehídéé mbéndé é Dyöb, eéhelé-áá chs ahíd ne ahíd dēn.

⁸ Nén álúmte bán bad ábe béhíde échab esíí é mekan mé ekob é yāl, béeheléé Dyöb menyinge awóged.

⁹ Bon ne nyé, nyéēbēlēē mekan ngáne ekob é yāl éhedeé aá nyébel. Nyébele' dāsō ngáne Edáádān éhedeé aá nyébel, nzé édé bán ne mbále Edáádān é Dyöb édé nyé áte. Kénzéé awé Edáádān éche Krístaa éesaá áte, né éesaá ne Krístaa.

¹⁰ Bon nzé Krístaa adé nyé áte, nyéde á alongé áyāle Krístaa abelé nyékōbnédé á'sō é' Dyöb kénéé édíí bán échēn ekob é yāl éwē áyāle mbéb níme nyébelé.

¹¹ Nzé Edáádān éche Dyöb áde dēmpuúdí Yesue édé nyé áte, né ké échēn ekob é yāl éche éwāg émmad awé, né Dyöb áde ápuúdté Krístaa dépuúdí chs. Abel nén á ngíne e Edáádān éche édé nyé áte.

¹² Né-óó, A-baányan, dyam adé áde détanjénē ahíd déesaá dyam dé ekob é yāl, saké ábē ngáne ekob é yāl éhedeé.

¹³ Áyāle nzé nyébele ngáne ekob é yāl éhedeé né nyéēwē. Bon nzé á ngíne e Edáádān é Dyöb nyéwúú mbeléd mé mbéb níme nyébeleé, né nyéēkúú alongé.

¹⁴ Dyam áde áde ádíí nén, bad bésyāal ábe Edáádān é Dyöb élyágtéé, bēdíí bán bé Dyöb.

¹⁵ Edáádān éche Dyöb ábágé nyé éebeleé-se nyébé néé betān, nyébé á mbwóg-te. Bon pen Edáádān é Dyöb ébélé nyékoó bán bé Dyöb abé. Ngíne eché éché Edáádān chs-áá ekóó bon déléhpé Dyöb bán, "A-Té! Echem Sání!"

¹⁶ Edáádān é Dyöb ébélé syānē debíí á nlém-té nén bán dedíí bán bé Dyöb.

¹⁷ Bōōb-pōó, ngáne dédíí ábe bán, deékúú nnam níme Dyöb ákōñnéde ábē bán, syānē deékúú-te bwēm ábe Dyöb ákōñnéde mó, nzé ne mbále syānē dekwēténē átag ne Krístaa ábel syānē ámpē dékúú ehúmé éche Dyöb débeé mó.

Ehúmé éche bad bé Dyöb békudté

¹⁸ Nnyíne' nén mæé, metake níme dékudeé bōōb méesaá dyamdyam nzé bēhāgténē mó ne ehúmé éche bēlúmedté syānē á póndé eché ehúé á'sō.

¹⁹ Bwēm ábe Dyöb áhágé á nkōñsé é'sine' ne e'lyág bé nlém, póndé eché Dyöb délúmtānnē ábe bán. Abél né ne ehúmé ésyāal.

²⁰ Embē nén bán bwēm ábe bēhágé é'díí ehóhó ngēn. Saké ábē bwēm bēn bōó bēntíí bán ébē nē bon Dyöb dōó déntíí. Ambel nē ne e'lyág bé nlém aá epun épé éche

²¹ mshúdtē ábē bwēm bēn á mehan mé ngine echē ebəodte bwēm, bómpē békūd-tē kunze ákud melemlem mé ehúmé éche Dyōb ábagéé ábē bán.

²² Debíí nén bán kásh ne' bəab, bwēm é'syāāl é'kəne' ne e'wə ábe bəwógéé ábe é'dé nēngáne e'wə bé achád.

²³ Bon saké nhəgtéd mwēmpen ríkəne'. Syānē bēn awé dewóó Edəəđəŋ éche Dyōb ábágé syānē nēngáne ndé e'só, syānē ámpē dekané' á nlém-tē. Debānné nlém rísyāāl ásin pónéd echē Dyōb débēnlé bon dékōŋ ábe bán abé, ahúd syānē yāl esyāāl á mehan-tē, ábe syānē yāl ékšāl.

²⁴ Taasē dekude e'soosōŋ delyágé nlém bán deékūd chōm éche Dyōb áhóbé aá mšəbēl. Bon pen nzé denyíne chōm éche delyágé nlém bán deékūd, né saké e'lyág bé nlém bəo é'kóó abé nē. Nzé-módé ahele alyág nlém áyāl e chōm éche ámáá akud?

²⁵ Bon, dechedé yāl ásin chōm éche déēnyínē, dekoó-é chó ásin.

²⁶ Melemlem nē dšó Edəəđəŋ é Dyōb éwōŋganné syānē áyāle deewóó'é ngine. Deebíí'é ngáne déťəŋgéné akáne bon Edəəđəŋ chēn chšó ékännad syānē ne nheemed níme rítómé e'yale bé nsəl.

²⁷ Dyōb ánəne syānē nlém áte, abíí-'é mewēmtēn mé Edəəđəŋ áyāle Edəəđəŋ ékännad bad bé Dyōb nyaa eche áhedeé.

²⁸ Debíí nén bán dyam-té áde ábenlad Dyōb ábele dšó á mbon ní bad ábe bédšó mš, * ábe áchénlé ábel ngáne áhedeé.

²⁹ Dyōb dēmmad atí nén aá bad ábe mšmmadté apwəd ádāb abé ábē nēngáne abé áde awe Mwān ábel bon ane Mwān ábē Mwān á'sō áťnté e baányan.

³⁰ Né-šš, bad ábe Dyōb dēmmadté apwəd, anchélé bš ábē ábē bad. Abe áchénlé-'é ahóbé aá békóbnédé áwe e'só, ábe bš-'é békóbnédé áwe e'só, abagé bš éche ehúmé.

Dyōb ádšó syānē mbwiined ne Yesu Krīstəə

³¹ Nzé denóné nímén mekan mésyāāl áte, cheé déhele dehób? Nzé Dyōb ádē ne syānē, né nzé ahele atəŋgén syānē?

³² Néé Dyōb déebāŋnéé ké awe Mwān. Antéd mš, ábe mš aá áwé á nló níme syānē moosyāāl, né éebaá syānē kéchéé émpēe éche déhédné mš-yé?

³³ Nzé-módé áhšb aá bad ábe Dyōb ápwédé békwdéé nkáá? Dyōb dēn dšó áhšbē nén aá dedíí bad ábe békóbnédé áwé e'só.

³⁴ Nzé-módé-š áhšb aá dekwédé nkáá? Yesu Krīstəə awédé, ápuu, adyéé-'é é ekáá émbáá é Dyōb, áhed-taá ákännadté syānē.

³⁵ Nzéé-š ahele ábēl bon Krīstəə asóg syānē adəŋ? Mekan níme melénlédé syānē áte, ké'ε ndutul, káa ahé áde bad béhāgké syānē á meséb? Nzəə, káa awōŋ áde déwóó'é mbóté? Nzé-'é akíme áde bad békímméé syānē? Ké'ε awúu áde bad béhedeé syānē awúu?

³⁶ Kálag e Dyōb ehóbé aá,

"Pónéd téé bad bəwúe sé áyāl echōŋ.

Bényíne sé nēngáne rídyōŋ ní mbód níme békagké awúu."

³⁷ Mmén mekan mésyāāl mébenlad bon detómé mš áte, mbwiined ne Krīstəə, mš awé adəš syānē bon áwōŋgān-ne syānē.

³⁸ Mbíí bwām nén méé chōmchōm éesaá éche éhele-se epán edəŋge éche Krīstəə ádšó syānē. Ken kwééd-é, ké'ε alongé. Ken áŋgel-é, ké'ε benkamleŋe, ké'ε ngine éche édé ádyōb. Ken pónéd eche dedíí áte nén, ké'ε pónéd echē ehúe.

³⁹ Ké ngine e nkoŋ nímín, ké'ε e nkoŋ rísé, chōmchōm éesaá áťnté e nhəgtéd rísyāāl éche éhele epán edəŋge éche Dyōb áwōŋné syānē mbwiined ne Yesu Krīstəə, awəd Səŋgwéé.

9

Dyōb ne abē bad bé Israel

¹ Nkale' mbále nēngáne mod awé adúbpé Krīstəə, meékālēé metóm. Mmém nlém níme Edəəđəŋ éche Esáá élyágtéé, rílanŋe me nén aá chōm éche ríhóbéé édé mbále.

² Ndulut e ngine ne metake mé ngine bédé me á nlém-té

³ áyāl e ábēm bad, ábēm baányan ábe syāābšó sédé mekíí mehóg. Ayāl echáb nhede' nén meé né Dyōb dēmbē me ebómán, ábēl-le meebág ne Krīstəə.

⁴ Ábēm bad bédíí bad bé Israel. Dyōb áhóbé aá mótédē bš néé ábē bán, alúmté-'é bš éche ehúmé. Dyōb dēmpé á nchemten ne bš, ábe-'é bš mbéndé. Anlúmed bš ngáne bétəŋgéné mš edúbé abe, bš-'aá ánlāā'é aá mššbelé chōm éche ánhəpē aá mššbēl.

* **8:28** Dyam-té áde ábenlad Dyōb ábele dšó á mbon ní bad ábe bédšó mš; donŋe á kálag áwóó mam mésyāāl mébenlad á mbon níme bad ábe bédšó Dyōb.

⁵ Bédii bad bé mbyaa míme ábēd betaa ábe bémbē se á mbooted. Ade Krístəə áchyáádté-’aá, mǎmpē nēe moonyon, áwāb mbyaa dǎo ámbídtē. Mekənaɡ mébē ne Dyōb á ngíndé ne á ngíndé, mǎ awē ákamlan chǎm ásyāāl. Ebē nē.

⁶ Meehǎbēé nēn mēé Dyōb déebēnlé chǎm éche ánhǎbpē aá mǎǎbēl. Edé bán saké bad béesyāal ábe bébidé á mbyaa ní Israel bédé bad bé Dyōb.

⁷ Saá-kaa bán béesyāal ábe Abrahamé bédé bán bé Dyōb. Dyōb dénlāā Abrahamé aá, “A mbyaa míme awon mwān Aisiɡe dǎo bán ábe rǎhǎbē mēé mēbē wē bēbídtē.”

⁸ Nēn álúmtē nēn bán bán ábe béchyáá á nyaa e moonyon béesaá bán bé Dyōb. Boŋ bán ábe bēnchyaa’ é nhídtēn ne ngáne Dyōb dénlāā’ é Abrahamé aá mǎǎbēl, bǎo békoo’ é atǎn nēngáne bán bé mbyaa míme Abrahamé.

⁹ Ade Dyōb dénlāā’ é Abrahamé aá mǎǎbēlé mǎ dyam áde mǎhǎbē, Dyōb dénhǎb aá, “Mēǎtm ámbíd á pǎndé eche rǎfídé. Ene pǎndé Seraa áwālē mwān a mwēnchǎm.”

¹⁰ Saá-kaa nē dēmpēn. Sáa nhǎɡ mǎo Rebekaa ábe bán bé baachǎm bēbē bēnwǎngē. Ane saá abédēe awesyánē taa, Aisiɡe.

¹¹⁻¹² A pǎndé éche bēechyaa’ é ábē bán, áde bēebíí’ é ábēl dé mbēb kē’ e mboŋ, Dyōb dénlāā Rebekaa aá, “Mwān ambáá ábē mbáledē awe mwān asad.” Dyōb dēmbēl nēn ábēl ényínned nēn bán míme mewēmtēn mǎǎ ámbēnlédtē ábēl mwān nhǎɡ ábē áse e aníní. Embonǎd mǎ ápwēd mod awē ádǎs ápwēd, saké áyále dyam áde ane mod ábēlé.

¹³ Eténlédé á kálag e Dyōb ngáne Dyōb áhǎbē aá, “Mēdǎŋ Jakǎbe boŋ rǎkǎǎ Esao.”

¹⁴ Chán-nǎ déhǎbpē bǎob? Nédé dēéhǎb bán Dyōb ákwognad baahǎɡ-ε? Aáy, éesaá nē.

¹⁵ Se’ bǎod, Dyōb dénlāā Mosé aá, “Mēwǎɡ kénzéé ngǎl awē rǎdǎs ngǎl awǎɡ, mēlǎméd-tē e’boŋ bé nlém wēe kénzéé awē rǎdǎs álúmed.”

¹⁶ Né-ǎǎ, mpwēdyéd ní Dyōb méewǎo’ é dyamdyam ábēl ne chǎm éche bad bēhédé bán ébēnléd kē’ e éche bēbēlé. Dyōb dǎo ábēnlad ábē e’boŋ bé nlém ábēl kéchéé éche áwémténé ábēl.

¹⁷ Eténlédé á kálag e Dyōb nēn bán Dyōb dénlāā Farao aá, “Mpwēde wē kǎŋ ábēl boŋ nǎbēnléd wē álúmed echem ngíne ne ábēl boŋ ádēm dǎn ákanled nkǎnsé áte rǎsyāāl.”

¹⁸ Né-ǎǎ, Dyōb álúmtē’ ábe e’boŋ bé nlém wēe kénzéé awē ápwédé, áwēdē-’ é kénzéé nló áte awē ápwédé aá áwúu nló áte.

Meliŋɡá mé Dyōb ne e’boŋ bé nlém é’ Dyōb

¹⁹ Kapǎɡ nyé mod nhǎɡ nyéesédéd mē bánken, “Nzé nē dǎo edíí, cheé ékǎs boŋ Dyōb ábē áhǎbē’ aá bad bēbélé mewusé? Debíí bán modmod eéhēlē-se áhǎb aá mǎǎbēnlé dyam áde Dyōb áhǎbē aá ábēl.”

²⁰ Boŋ wē moonyon, nzé-módé edíí áseded Dyōb dyam? Mbeé e mǎɡ eéhēlē-se esedte’ mod awē ábēlé chǎ aá, “Cheé ékǎs boŋ éhǎɡé mē nyaa eché éhǎɡé mē?”

²¹ Nyébíí nēn bán ntumé-mbeé, awǎo kunze ábēlēn hyǎɡ ábe ábēnléé mbeé nyaa eché ádǎs. Nzé adǎs, áhelesé atéd hyǎɡ ábēlēn mbeé ébē; pǎɡ ebé mbeé e edúbé, eníní-’ é ebé mbeé eché bēbēnladte pǎndé ésyāāl.

²² Kapǎɡ Dyōb áhédé’ aá nímē meliŋɡá álúmed, áhédé-’ é aá bad bényín eche ngíne. Boŋ anched yǎl bwǎmbwam áwesēn bad ábe bēmbēl boŋ áliŋ. Ábe bad bēntǎŋgēn-ne nkǎgsēn akud.

²³ Kapǎɡ-ke Dyōb dénwēmtēn-ne álúmed éche ehúmé é ngíne ámín e bad ábe álúmté e’boŋ bé nlém. Amaá ábē bad abonŋsen ákud éche ehúmé.

²⁴ Syáné dedé-’ é áfínté e ábē bad ábe áchēnlé. Saá-kaa áfínté e bad bé Israel dēmpēn dǎo áchēnlé syáné. Achēnlé syáné donɡe á bad kǎŋne áfínté e bad ábe béesé bad bé Israel.

²⁵ A kálag e Hoseya, Dyōb áhǎbē nēn aá,

“Bad ábe bēnkēmbé ábēm bad, mēchǎɡ bǎ mēé bédé’ Ábēm bad.’

Alon áde ménkēndǎŋɡe mēchǎɡ dǎ mēé ádíí ‘Alon áde rǎdǎs.’

²⁶ Melemlem mé hǎm wēe ménlāā-’ aá bǎ mēé ‘Nyéesaá ábēm bad’, áhed-taá méchǎɡké bǎ mēé bédíí ábēm bán, bán bé Dyōb áde ábage’ alongé.”

²⁷ Nkal é’ dǎsdǎŋ Yesayaa anhǎsd tǎŋɡene bad bé Israel aá, “Ké mesonɡé mé bad bé Israel mēmbuú áte nēe nsíí nímé rídé á nkǎɡ mé edíib é nkwe, nguse chēmpēn chǎo ékúđ e’sooson.

²⁸ Sǎŋɡwéé éebébdéte pǎndé ábēl mekan mésyāāl nímé átomté mbakú aá mǎǎbēl á nkǎnsé.”

²⁹ Nēn áde nēngáne Yesayaa ánhǎbpē aá, “Nzé Sǎŋ Dyōb á Ngumē enkēnlýǎɡnéđ syáné donɡe dé nchyáátēn, né debǎɡáá nēe myad mé Sodom ne Gomora.”

Paalé akánnédé bad bé Israel

³⁰ Chán-nǎ déhǎbpē bǎob? Bad ábe béesé bad bé Israel bétímé békǎbnédé á’só é’ Dyōb mbwiined ne adúbe áde bédúbpé Krístəə, kénéé edíí bán bēewane’ aá áte ákobned á’só é’ Dyōb.

³¹ Boŋ bad bé Israel béwáné'áá áte béhéde bán béhíd mbéndé ábel boŋ békobned á'sō é' Dyōb, boŋ bénkênhenlé.

³² Cheé ékás boŋ bénkênhenlé? Bénkênhenlé áyale nén béwáné'áá áte ákobned á'sō é' Dyōb áyale nsón míme bèn bébéle saké áyale adúbe áde bédúbpé Dyōb. Bénkód ekuu á aláá áde bad békódeé ekuu, békwe'-é.

³³ Eténlédé á kálag e Dyōb tângene nê, nén bán, "Nyénone', mbanne aláá á Zayon áde débél boŋ bad békóde ekuu, aláá áde débél boŋ bad békweg. Boŋ kénzéé awé adúbpé mó éehúú'é ne mekáá mé ngên."

10

¹ A-baanyan, ndás ne nímém nlém rísyāal nén meé ábém bad bé Israel békud e'sooson, nkannad-te bó meé nê abenled.

² Mbíde bó mbón nén meé bédás Dyōb abele ne nlém rísyāal. Boŋ béekoo'é asóŋten ngáne betángéné mó abele.

³ Béesóŋtenēē ngáne Dyōb ábeleé boŋ bad békobned áwe e'sō. Bétímé béhéde nzii echáb chèn eché ebél boŋ békobned á'sō é' Dyōb. Né-óó, béesudteé yál áhíd nzii eché Dyōb átíídé ábel bad békobned áwé e'sō.

⁴ Krístæ abelé nsón míme mbéndé éntāngēnnē abel, né-óó, kénzéé awé adúbpé mó, akobnad á'sō é' Dyōb.

E'sooson é'bagnéde ne metumbé mésyāal

⁵ Se' bód, Mosee antél tângene akobned áde mod ákobnadte á'sō e' Dyōb áyale áhídeé mbéndé. Anhób áá, "Kénzéé awé abele chóm ésyāal éche mbéndé éhóbeé, ákúd alongé áde déemaá'."

⁶ Boŋ éténlédé á kálag e Dyōb bán nyaa eche adúbe ábeleé boŋ mod ákobned á'sō é' Dyōb edii, "Weehóbé awonj nlem-té nén weé, nzé-módé ákě ámín, ádyōb." (Nédē, áhúd Krístæ ámín, ásuded mó ásē.)

⁷ Ké'-é "Nzé-módé ákě ásē á echóg éche éewóo asóg?" (Nédē áhúd Krístæ á echóg éche éewóo asóg ápēen mó ámbíd á alongé.)

⁸ Chóm-ēē kálag e Dyōb éhóbé edii nén áá "Eyale é Dyōb edé we benben. Edé ekale ch́, edé-é we á nlem-té." Mmē nkalanj ndii nkalanj míme sékaléé nén bán nyétāngéné adúbe awónj.

⁹ Nzé ehóbné nsal nén weé, Yesue adii Sāngwéé, edúbpé-é awónj nlem-té nén wē Dyōb dēmpuúd mó, né wēkúd e'soosonj.

¹⁰ Áyale nén nzé edúbpé á nlem-té, Dyōb abele' ékobned áwe é'sō. Nzé ehóbné nsal ne weé módúbpé, ebelé ékúd e'soosonj.

¹¹ Kálag e Dyōb ehóbé nén áá "Kénzéé awé adúbpé mó, éehúú'é ne mekáá mé ngên."

¹² Nén áde ne moosyāal, ken mod áde mod a Israel, ken mod eesaá mod a Israel. Dyōb adii Sāngwéé a moosyāal nyaa póg, abude-é kénzéé anamed awé ahédné mó nwōŋgen.

¹³ Kálag e Dyōb ehóbe áá, "Kénzéé awé achagé dín áde Sāngwéé áá ásonj mó, ákúd e'soosonj."

¹⁴ Boŋ chán béhele béchag mó bán ásonj ádab alongé áde bédúbpéé mó? Chán-ne béhele bédúbé mó, nzé béewóge nímé nkalanj? Chán-nō béhele béwóg nímé nkalanj nzé bad béekanle bó mó?

¹⁵ Chán-ne bad béhele béke békánlé bad nímé nkalanj áde mod éelóméé bó? Eténlédé á kálag e Dyōb nén bán, "Nzé mod apééné nkalanj ní bwám, ébelé épēen enyinge."

¹⁶ Boŋ saké moosyāal akobé nkalanj ní bwám. Nkal é'dáádāŋ Yesayaa mwén anhób tângene nē áá, "A-Sán, bó ahéé adúbpé nkalanj nímé sékálé?"

¹⁷ Né-óó, adúbe ápag ne awóg áde mod áwógé nkalanj, bad betángéné-é nkalanj míme Krístæ akal boŋ bad bédúbé mó.

¹⁸ Boŋ ndás aseded nén meé ken, edé mbále nén bán bénkênwóggé nímé nkalanj-e? Bénwóg mó bwám. Eténlédé á kálag e Dyōb nén bán,

"Ehób éche bad ábe békálé'áá nímé nkalanj énwōgnéd nkōŋsé áte rísyāal. Ábāb e'yale bēmpē mesóg mé nkōŋsé áte mésyāal."

¹⁹ Ndás aseded nén meé ken, bad bé Israel bénkēnsóŋtēnnē nímé nkalanj-e? Mosee mó asébpé ahób nén áá Dyōb áhóbé áá,

"Mēnaméd bad ábe béekoo along abé, ábel boŋ nyéwóon bó kónj.

Mēnaméd bad ábe bédé eyókél ábel boŋ nyélinj."

²⁰ Nkal é'dáádāŋ Yesayaa mómpē ankwentén ahób ngáne Dyōb dénhōbpē. Anhób á tál e ékwéé áá,

"Bad ábe béehede'áá me bényiné me.

Menlúmed yál wéé bad ábe béesēdte'áá me."

21 Boŋ Yesayaa anhób t̄ngene bad bé Israel aá Dyöb áhóbé aá, “Bootya mbwembwε kóáŋ ne ngukél, nlyágé mekáá meé abém bad bétim ámbíd áwém, boŋ béwúú nló áte, béewógné-’áá me.”

11

*Dyöb déebáa’ é abé bad bé
Israel á yál ne abán ásyāāl*

¹ Bɔɔb-pɔɔ, ndáé aseded nén meéken, Dyöb ábáá abé bad áyāl-ε? Eesaá nē. Mmēn ndii mod a Israel awé abidé á mbyaa nime Abrahamε, á túmbé e Benjamín.

² Dyöb déebáa’ é abé bad áyāl. Bédii bad ábe ápwédé se á mbooted. Nyébíi chóm éche éténlédé á kálag e Dyöb ngáne Elaijaa ácháá’ áá Dyöb, álan̄gē mó mekan nime bad bé Israel bébélé’ áá.

³ Anláá Dyöb aá, “A-Sán, ábén bad béwúú áboŋ bekal bé’ dáádáŋ bésyāāl, bépán̄téd-te nímōŋ menyán mé mende. Mmēmpen-εé nlyágé, béhede-’ε mēmpē awúú.”

⁴ Chán Dyöb dēnkwenténné mó? Ankwentén mó aá, “Mbánné bad ekálé saámbé ábé abém bad. Bédii bad ábe béebagé Baale, dyöb dé metóm, edúbé.”

⁵ Nē dáo édíí kóáŋ ne bɔɔb. Nguse é bad bé Israel édíí édé ábe Dyöb ápwédé ne nímē nsimé.

⁶ Apwεd áde ápwédé bó ádíí áyāle nímē nsimé saké áyāle mekan nime bébélé. Nzé émbē nén bán dyam áde bad bébélé dáo ákæ boŋ Dyöb ápwεd bó, nédē né saké nsimé móó ápwédné bó.

⁷ Cheé-ó nén álúmtéé? Bad bé Israel bēnkēnkudté chóm éche békóó áhed. Bad ábe Dyöb ápwédé bēnkūd chóm éche béhédé’ áá, boŋ ábiníí, nlém mēnl̄l bó á abum.

⁸ Eténlédé á kálag e Dyöb nén bán

“Dyöb dēmbel bó edimdim.

Kóáŋne e’ chii, béēnȳinnē, béewógné-’ áá.”

⁹ Dabide mómpé anhób aá,

“Nkánne’ nén meé ébel bwēm ábe é’ wógte bó menȳinge, bóbó é’ bē bó néε melám.

Nkánne nén meé, békwe, Dyöb ákógsen-ne bó, áyāle mekan nime bébéléé.

¹⁰ Nkánne nén meé Dyöb ákwid bó ndim ábel boŋ béehelé anȳinen.

Nkánne nén meé ápēmted-te bó nted nime rídélé nime ményag bó mbíd pónde ésyāāl.”

¹¹ Né-ó, nsedte nén meé ken áde bad bé Israel bēnkódté ekuu boŋ békwe, bēnkwē ne akwe ásyāāl-ε? Aáy éesaá nē. Abel áde bémbenlé mbéb dēmbēl Dyöb dēmbē bad ábe béésé bad bé Israel étál ákud e’ soosōŋ, ábel boŋ bad bé Israel bébē kónjí.

¹² Akwe áde bad bé Israel bēnkweé, ápiínédé bad bé nkōŋsē ábiníí bésyāāl nsimé hiin. Abé-’ε áde bad bé Israel bémbēé atóg áyāl e mekan mé edáádŋ dēmpiínéd bad ábe béésé bad bé Israel nsimé ní Dyöb. Nzé Dyöb áhele ápē bad ábe béésé bad bé Israel anamed nē, áde bad bé Israel bébélé mbéb, né chán-nō nnam mápéé abé nime ábēé áde bad bé Israel bésyāāl békudté e’ soosōŋ.

Bad ábe béésé bad bé Israel

béébāg kumbe áyāle békudé e’ soosōŋ

¹³ Chóm éche níhedeé ahób nén bɔɔb, nyé bad ábe nyééš bad bé Israel, nyéé rilāŋgēé. Ndií mbapεε a nlómag a bad ábe béésé bad bé Israel, né-ó mbage’ nímēm nsón edúbé ésyāāl.

¹⁴ Kapóg nhelé níbēl bánned bé Israel bébē kónjí bó don̄ge á bad bómpe békud e’ soosōŋ.

¹⁵ Abán áde Dyöb démbāŋgē bad bé Israel á yāl dēmbēl Dyöb dēt̄im ásē ne bad bé nkōŋsē bésyāāl. Bɔɔb-pɔɔ, chán-nō ébēé áde Dyöb dékóbpé bad bé Israel ámbíd ámpē néε abé bad? Ebē byánán bad ábe bēwédé bépuúde ámbíd.

¹⁶ Nzé bébágé Dyöb eped é ewεle é’ sō néε mende, nē alúmté bán éché ewεle ésyāāl édíí éché. Nzé bébágé-’ε Dyöb nkan ní bwel, né ngen chómpe edii éché.

¹⁷ Bépágké don̄ge á ngen á bwel é menzab ábe bēwéné, bébádté á ngen é bwel é menzab ábe é’ kwoge’ á ahín-tē. Nyé bad ábe nyééš bad bé Israel nyédii nēŋgáne éché ngen é bwel bé ahín éche chómpe ekude mendib nime mébidé á nkan ní bwel é’ bwām.

¹⁸ Ngáne édíí-’ áá nē, nyéétāŋgené néε nyédii kúmbe se nyénōné échíníí ngen éche bésélé, nkōŋtéd. Nzé nyédé kúmbe nyééchatán nén bán saké nyé nyéchéŋgē nkan boŋ nkan móó níchéŋgē nyé.

¹⁹ Nyéhele nyékume’ ekáá á tál bán bēhúde éché ngen ábel boŋ bébáde nyé áhed.

²⁰ Nē áde mbále. Béhúde bó áhed áyāle bēnkēndúbéé, nyé-’ε bétimté nyé áhed áyāle nyédúbpé. Boŋ nyéebāg kúmbe. Boŋ pen nyébē mbwóg.

²¹ Néε Dyöb dēnkēmbāŋgē bad bé Israel ákógsen, bó ábe bédé nēŋgáne ngen éche énsébē abé, nyéwēmtan bán ábāŋ nyé ákógsen-ne?

²² Nyényine nén bán, ped póg Dyöb ábóó nlém, ped eníní-'ε alélé áte. Alélé áte wée bad ábe bépáné nzii bonj abónné nyé nlém nzé nyédé nyéhíde' eche nzii. Bonj nzé nyéehídé chí, né áhúd nyémpē.

²³ Nzé bad bé Israel ámpē bétédte ábab e'wúu bé nló áte bonj bétimné Dyöb, Dyöb déted bó ámbíd ámpē. Awóó ngine ábel nē.

²⁴ Nyé bad ábe béesē bad bé Israel, nyé ábe nyédé nēngáne ngen e bwel bé ahín-té, née Dyöb áhélé nyé ahúd á bwel bé ahín-té, abádé nyé á bwel ábe béwéné, nyéwémtan bán ééhēē-se atéd bad bé Israel áttiméd bó ámbíd áhed ámpē-ye? Bad bé Israel bóó bédé nēngáne ngen e bwel eché ensébé abé áyál e ábē bwel.

Dyöb áwogé' moosyál ngól

²⁵ A-baányaj, nhe de meé nyésónten dyam áde kááñne bóob modmod éésóñtēē, ábel bonj nyéwémtan bán nyétómténé debyéé awónj. Nhe de meé nyésónten bán e'lel bé nlém á abum ábe donje á bad bé Israel bēbē kááñ né bad ábe béesē bad bé Israel ábe bédúbē bésyāl, bédúbē.

²⁶ Nén débēnléd ábel bonj bad bé Israel bésyāl békud e'soosoj. Eténlédé á kálag e Dyöb nén bán,

“Nsóode ábíd a Zayon.

Abōdēd abé dé mbēb áde mbyaa nime Jakōbe n'wóó.

²⁷ A pónde eché mbēbōdēdte nímab mbēb dōo mēpéé á nchemten ne bō.”

²⁸ Bad bé Israel bédé bad bé ekoyí bé Dyöb bóob áyale bēédúbpeé nkalanj m' bwām, nén ábēnlédé ábel bonj nyé bad ábe nyéesē bad bé Israel nyékud e'soosoj. Kénéé edíí nē Dyöb ápwédé bad bé Israel, adíi adāá-'ε bó áyale melē nime ámmwēē ne ábāb betaa.

²⁹ Nén áde áyale nzé Dyöb ápwédé mod bonj anámté mó, né ápwédé, anámté-'ε mó.

³⁰ Bóod, nyéē nyénwúén Dyöb nló áte, bonj bóob awúen áde bad bé Israel bēwúéné Dyöb nló áte, ábélé Dyöb áwogé nyé ngól, awóngén-ne nyé áwógen mó.

³¹ Né-óó bóob, bad bé Israel híin bēwúéné Dyöb nló áte. Dyöb déwōg bó ngól, awóngén-ne bó áwógen mómpē. Ábel nē ábel bonj áwōg bómpē ngól melelem ngáne ánwōgkē nyé bad ábe béesē bad bé Israel.

³² Dyöb ábélé e'wúu bé nló áte é' bad é'dé née é'hédé bó á mbwōg ábel bonj áwōg bó baásyāl ngól.

Bad béé Dyöb mekenag

³³ Nyénone' ngáne Dyöb ápédé nhon abé! Nyénone' ngáne ábíí mam mésyāl, awónj-'ε debyéé áde áchábé ámín. Modmod ééhēē-se asóñtén ngáne Dyöb ábeléé mam. Modmod ééhēē-se asóñtén-ne nyaa eche Dyöb ábeléé mam.

³⁴ Eténlédé á kálag e Dyöb nén bán

“Nzé-módé ahele se abíí mewémten mé Dyöb.

Nzé-módé ahele aléb Dyöb.

³⁵ Nzé-módé akébé Dyöb chōm ábel bonj Dyöb ásábe mó ámbíd.”

³⁶ Dyöb dōo áhágé bwēm ésyāl. Mó akáá bonj ábē bwēm é'syāl é'bé. Mó-aá awóó ábē bwēm é'syāl. Ehúmé ébē ne Dyöb á ngíndé ne á ngíndé. Ebē nē.

12

Nyaa eché éhednadté bán

alóngé á bad bé Krísto ábē

¹ Né-óó, a-baányaj, ngáne Dyöb áwogé syánē ngól bwámbwam, ncháá' nyé meé nyébē née mende nime méde á alóngé. Mmē mende méšan, mékobned-te ne Dyöb. Nén dōo áde nyaa eché éhednadté bán nyébage Dyöb edúbé.

² Nyéehídé' mbeltéd ní bad bé nkōñsé. Bonj nyémwe Dyöb áhanjen nyé nlém á abum, ábel nén nyéwōñ abé dékōñlé. Nē débēl nyéēsóñten nyéhíde-'ε mam ngáne Dyöb áhedeé. Nyéēbíí mbonj, nyébíí mam nime méwōgte Dyöb menyinge, nyébíí-'ε mam nime métáñgéné.

³ Ne nsimé nime Dyöb ábágé me, nlánge nyé nén meé, nyé modmod eenyíne yál áá móótómtēné abé tómaa ngáne módíí. Bonj mod-té ányín yál ngáne ákóó abé. Mod-té ányín yál nchoo ne nde eché Dyöb ábágé mó née mod awé adúbpé.

⁴ Yál e moonyonj edíí póg, ewóó pág ne pág, pág téé-'ε ewóó nime nsón.

⁵ Melelem nē dōo edíí ne syáá bad bé Krísto. Debuú áte bonj dedíí yál póg ne Krístā, syáá modmod eesáá ne mó mwēn.

⁶ Dyöb ábēnlé nime nsimé ábe syánē mod té eché nde, ékábné-'ε áte. Nzé Dyöb ábágé mod nde áhób mekan á dín á Dyöb, ane mod áhōbē' nímé mekan nchoo ne adúbe áde áwóó.

⁷ Nzé mod awóó nde ábele bad, ábenle bó. Mod awe mó-'ε awóó nde áyaged, áyagte bad.

⁸ Mod awě awóó nde áwéd bad nlém á abum, áwéde bós nlém á abum. Mod awě awóó nde ábided chóm á ekáá áwónggen bad, áwónggan bad, eéñōñē ámbidi. Awě awóó nde ályáged bad, ályágte bad nyaa echě etáñgéné. Mod awě mó-ε awóó nde áwóg bad ngol, áwóge bad ngol ne menyinje.

⁹ Mod téé ákorj bad adaj. Mod téé ákoo ebébtéd. Mod téé ásum mekuu ábel dyam á bwám.

¹⁰ Mod téé ádaj mwányaj ne nlém rísyāā. Mod téé ábage waáb edubé tómaa ngáne ábageé eche yāl.

¹¹ Mod eéchēde yāl ábel nsón. Mod téé áwéd mekáá áte, ábenle-ε Sǎngwéé ne nlém rísyāā.

¹² E'lyág bé nlém ábe mod téé awóó ábēen bós menyinje. Mod téé áched yāl á metake-té. Mod téé áwēen-ne á mekáne-té.

¹³ Atíntē e nyé bad bé Krísto, nzé nyé mod nhóg atógé chóm, waáb awě awóó chós awónggen mós. Kénzēé awě apedé áwēn, nyékōb mós nken bwám.

¹⁴ Nyékāne nēn bán Dyōb ánamed bad ábe béhédé nyé á meséb. Nyéekānné nēn bán bekud ebómán, nyékāne dās bán Dyōb ánamed bós.

¹⁵ Nyéwóg menyinje ne bad ábe béwógé menyinje, nyéleb-pe ne bad ábe bélebe'.

¹⁶ Nyébē nsal nhóg ne nhóg ne aníní. Nyéenyēné dúu ámín. Nyébē echorj ne bad ábe béésē dyamdyam. Mod eewémtán áá mótómtēnē debyéé awónj.

¹⁷ Nzé mod ábelé wē mbéb weétímtán mós mbéb. Bonj pen etáñgéné éwémtán ábel mbonj á'sō é' bad bésyāā.

¹⁸ Mod téé áhed nzii ábē nsaj ne moosyāā.

¹⁹ A-baányaj, nzé mod ábelé nyé dyam dé mbéb, nyé bēn nyéetímtán mós. Nyééde Dyōb dēn ákōgsen mós. Nhóbe nēn áyāle, éténlédé á kálag e Dyōb nēn bán, Dyōb áhōbē áá, "Me-éé ntímtán mbéb ké ríhée rímē mod ábélé. Me Sǎngwéé me-éé nhóbe'."

²⁰ Eténlédé á kálag e Dyōb hóm dēmpēe pen bán, "Nzé nzaa ewag ábōj bad bé ekoyí, ehé bós ndyéed, nzé píde ekóbé bós, ébe bós chóm eche bémwákē. Nzé ebelé nē, ekwágte bós, béhēde-ε nzii eche béhanjanné."

²¹ Mod eémwág-se mbéb ríkamlán mós. Bonj rímēn mbonj rítóm mbéb áte.

13

Nyébage benkamlene edúbé

¹ Mod téé áwógne benkamlene ábe békamlán mós. Áyāle nkamlen ké nhóg méesaá ríme Dyōb déetúdeé. Dyōb dō-áá ábánné benkamlene bésyāā á atii.

² Né-ōó, kénzēé awě eewógné' mod awě akamlán mós, né eewógnéé ntii ní Dyōb. Bad ábe bébele nē, béhēde yāl nkōgsen.

³ Bad ábe bébele bwám, bééwógēē benkamlene mbwóg. Bonj bad ábe bébele ebébtéd bós béwóge benkamlene mbwóg. Nzé weéhēde wēé móbán nkamlene, ébelé mekan mé bwám. Nzé ebelé nē, né ákēmté wē.

⁴ Nkamlene adii mbāledé a Dyōb awě Dyōb ábánné áwónggen wē. Bonj nzé ebele mekan mé mbéb étáñgéné mós abánj, áyāle ngine echě áwóó ákōgsen bad eesaá ngén. Adii mbāledé a Dyōb awě Dyōb ábánné ákōgsen bad ábe bébele mekan mé mbéb.

⁵ Né-ōó, mod atáñgéné benkamlene awógen, saké áyāle ábāá'ε nkōgsen dēmpen, bonj káōjne áyāle ábii nēn áá ríme nlém rílánggé mós áá mótāñgēnē ábel nē.

⁶ Né-áá, nyétáñgéné tááse ámpē asaa, áyāle Dyōb dōo bad ábe bésante tááse bébenléé.

⁷ Nyésápe mod téé chóm eche nyétáñgéné mós asábe. Ken tááse-ye, kéε mōné ké ríhée ríme bélánggé nyé bán nyésábe áyāle bwēm ábe nyéwóó. Nyébáa bad ábe nyétáñgéné abánj, nyébage-ε bad edúbé ábe nyétáñgéné edúbé ábe.

Nyéđaj nhóg ne aníní

⁸ Mod eewánlé modmod alúm. Alúm áde nyé mod téé átáñgéné awále adii áđaj nhóg ne aníní. Kénzēé awě adáá waáb, né alónté mbéndé esyāā.

⁹ Mbéndé édé nēn bán, "Mod eekábé asón á ndáb e e'wónggé. Mod eewúé mod, mod eechibé. Mod eesíde chóm é mod." Echén mbéndé ne échíní esyāā chós éladné bonj ébé mbéndé póg. Ene mbéndé edii nēn bán, "Đaj mwányonj ngáne edás echorj yāl."

¹⁰ Nzé mod adáá mwányaj eébēlēé mós mbéb. Né-ōó, edānje élónté mbéndé esyāā.

¹¹ Ngáne nyébíí-ε nēn bán pónde emáá ape echě nyétáñgéné akábned, nyétáñgéné akábned, áyāle pónde e'esoosoj eche syáné édé benben tómaa ngáne énsēbēé ábē áde dédúbpé Krístā dúbpán.

¹² Ehíntēn emáá ape, bín é'kwógé asáa. Né-ōó, déte de mbeltéd mé mbéb ríme débélé'áá. Déwáa bwēm é' nzum áwan nzum e e'nyínen bé ekide.

¹³ Déwále ábē á bwám nés bad ábe bédé á e'nyínen bé ekide. Nyéekāg á ngande éche bad bémwákē mím bonj mékōbē bós, nyéekábé mesón. Nyéébēlē-ε e'tongé é' mekan. Nyééenslé', nyéebág-ke kónjí.

¹⁴ Bon nyéwōn abé áde Sǎngú Yesu Krístæ. Nyéebāgē mekan mé esíí mé ekob é yǎl etál, nyéebǎle ngáne échǎn ekob é yǎl éche ébǎle nyé mbébé éhedeé aá nyébel.

14

Mod eekáadté waáb

¹ Nyékobe bad ábe ádab adúbe déewúú' é áte. Nyéepēntān-ne tǎngene mam níme béwémténé nǎn bǎn bétǎngéné ábel, ké' é bétǎngeneé ábel.

² Adúbe áde donge á bad ábágé bó etál ádyé kéchéé bon bad ábe adúbe déewúú' é áte, béedyáké donge á bwēm.

³ Bad ábe bédyág kéchéé béenyīnē bad ábe béedyág donge á bwēm nkóntéd. Bad ábe bó' é béedyág donge á bwēm béekáadté bad ábe bédyág kéchéé áyale bó moosyǎl békóbnédé ne Dyób.

⁴ Nzé-módé edíí ákáad mbǎlede a mod ampée? Eche Sǎn chǎn chǎo etǎngéné ahób aá dyam áde ábélé áde bwām ké' é deesaa bwām. Bon Sǎngwée eche ngíne éwōngǎn ane mbǎlede ábel dyam á bwām.

⁵ Bad behóg bétédé donge dé e'pun bǎn áde etógnén tómaa ábíníí e'pun. Bad behóg-ke bétédé nǎn bǎn e'pun é'syǎl é'díí nyaa póg. Mod-té átéd nǎn aá kéchéé éche mǎwémténé, etǎngéné ne mǎ.

⁶ Bad ábe bétédé bǎn epun ehóg édé etógnén tómaa ábíníí e'pun, bébele nē ábe Sǎngwée edúbé. Bad ábe bó' é ampé bédyág kéchéé, bǎmpé bébele nē ábe Sǎngwée edúbé áyale bésǎgnan Dyób áyale é ene ndyééd. Bad ábe bó' é béedyág donge á bwēm, bǎmpé bébele nē ábe Sǎngwée edúbé, bésǎgnan-ne Dyób.

⁷ Syáné modmod eesaa á alongé ne mǎ mwēm, modmod eewág-kaá ne mǎ mwēm.

⁸ Nzé dedé á alongé, né dedé á alongé ábel ngáne Sǎngwée áhedeé. Nzé dewédé-é né dewédé áwóged Sǎngwée menyīnge. Né-óó, ken dedé á alongé, ké' é dewédé, á mekaa níme Sǎngwée dǎo dedíí.

⁹ Nzǎm eché ekǎó bon Krístæ awé, ápuú'-é, abé á alongé, edíí ábel bon ábē Sǎngwée awé bad ábe béwédé ne ábe bédé á alongé.

¹⁰ Cheé-ǎ ékǎó bon ékáadté mwǎnyon? Ké' é, cheé ékǎó bon ényīnē mwǎnyon nkóntéd? Ebíí nǎn wéé syáné moosyǎl deétyēm á nkáásé á'só é' Dyób.

¹¹ Eténlédé á kǎlag e Dyób bǎn, "Dyób áhóbé aá, ngáne ndíí á alongé, moosyǎl atǎngéné me mebóbón abwóge, moosyǎl ákēnē-é me aá me-éé ndé Dyób."

¹² Né-óó, syáné mod téé deétyēm á'só é' Dyób, álaa mǎ chǎm té eche débélé.

Mod eebélté mwǎnyon mbébé

¹³ Né-óó, syáné modmod eekáadté waáb, bon pǎn mod téé ámad awé nlém-té aá mǎotǎngeneé dyam ábel mbéd áde débél bon mwǎnyon ákǎd ekuu káa ahún á mbébé-te.

¹⁴ Abé áde ndíí mod nhóg ne Sǎngú Yesue, ábélé nkoó abíí nǎn meé ndyééd ké póg eesaa eché eesaa á'só é' Dyób. Bon nzé mod adúbpé aá ndyééd edé eché eesaa á'só é' Dyób, eedyág chǎ.

¹⁵ Nzé edyág chǎm ké éhéé bon nē ábele' mwǎnyon aníníí ebébtéd, né weewǎnleneé mwǎnyon edǎnge. Weémwǎg-se chǎm éche edyágké ébédé alongé áde mod awé Krístæ áwédé awé nló.

¹⁶ Weémwǎg-se kunze eche éwóó néé mod awe adúbe áwúú áte, ébél mod ábel mbébé, ábel bon bad béhǎbē' wé mekan mé mbébé áyál.

¹⁷ Saké adyé á ndyééd ne amwé á mǎm dǎo áde etógnén á nkamlǎn íí Dyób. Mekan níme méde etógnén médíí áwón abé áde atǎngéné á'só é' Dyób, ábē nsǎn ne ábē menyīnge níme níhúú ne Edǎádǎn éche Esáá.

¹⁸ Kénzéé awé abenle Krístæ nē, akobnad á'só é' Dyób, bad ampé bébelé béhób bǎn abele dyam á bwām.

¹⁹ Né-óó syáné déwéd yǎl áte débele mekan níme mépǎene nsǎn, ne níme méwōngǎn syáné áwéd nhóg ne aníníí áte.

²⁰ Ehób é ndyééd éebelé-se nyébébéde nsón níme Dyób ábélé. Ndyééd ésyǎl ésáá á'só é' Dyób. Bon édé awusé ádyé kéchéé eche ébél bon mod ampée ákwé.

²¹ Ebóó mod eébéle' chǎm éche éhale-se ébél bon mwǎnyon ákǎd ekuu. Ken ádyé nyam-é, ké' é ámwé mǎm, ké' é ádyé kéchéé émpée.

²² Kéchéé éche edúbpé tǎngene nímén mekan, edíí átínté e nyé Dyób. Nnam ne mod awé abíí aá mǎbéléé dyam áde áde mbébé tǎngene dyam áde ámáá alúmed aá ábóó.

²³ Bon kénzéé awé nlém níkgladté á abum nǎn aá mǎotǎngeneé nyaa e ndyééd póg adyé bon átim chǎ adyé, né Dyób déhób aá ábélé mbébé áyale eébenledéé áde adúbe ábel chǎm

éche átáŋgéné abel. Nzé mod abelé dyam áde nlém ríkagladté mó á abum áá átáŋgéné káa déetáŋgené, né abelé mbé.

15

Awoged bad menyinge, sake échéd yál

¹ Syáné awe adúbe áwúú áte, detáŋgéné néé déwóŋgéné bad ábe adúbe déewúú' é áte. Deébéle mekan dásō nyaa eché ebóŋnéde syáné bēn.

² Syáné mod téé átáŋgéné néé ábeléé mam nyaa eché ewógte mwányan menyinge, áwéd mó adúbe áte.

³ Ké Krístā mwēn eébele' áá mam dásō nyaa eché ewógte' mwēn menyinge. Boŋ abelé' áá ngáne éténléde á kálag e Dyób nēn bán "Nzyáŋ ésyāā́l éche bad bésyáá' áá we, étímméde me."

⁴ Mam mésyāā́l níme bēntenlé á kálag e Dyób se' bōód, bēntel mó áyáged syáné. Nē démbē ábel déwōŋ e'lyág bé nlém ábe é'huú ne eyale é Dyób éche ébele boŋ déwesán, éwēde-é syáné nlém á abum.

⁵ Nkánne nēn mēé Dyób áde ábele boŋ déwesán, áde áwēde-é syáné nlém á abum, ábel nyébé á nchemtan ne nhóg ne aníní ngáne nyéhídeé Yesu Krístā,

⁶ ábel boŋ nlatén níme nyédíí mbél nyébé nsal nhóg áken Dyób, Sáá awé awed Sánjú Yesu Krístā.

Nyékob nhóg ne aninii

⁷ Né-óó nyékob nhóg ne aníní melemlem ngáne Krístā ákóbé nyé ábel boŋ bad békene Dyób.

⁸ Nlānge nyé nēn mēé Krístā atímé mbáleda e bad bé Israel, ábel boŋ álóned akag áde Dyób démbéé betaa. Nē dénlüméd-te nēn bán Dyób ákale mbále.

⁹ Ampē-é ábel boŋ bad ábe béesé bad bé Israel, bébe Dyób mekenag áyāle ngal eche awógé bó. Né-áá éténléde á kálag e Dyób nēn bán, "Né-óó mēkēn we áfinté e bad ábe béesé bad bé Israel, mēkōn-ne nkāŋgé áken ádoŋ dīn."

¹⁰ Éténléde ámpē nēn bán, "Nyé bad ábe nyéesé bad bé Israel, nyéwógen bad bé Dyób menyinge."

¹¹ Éténléde-é ámpē bán, "Nyé bad ábe nyéesé bad bé Israel, nyékene' Dyób, bad bé nkōŋsé bésyāā́l-le békene mó."

¹² Nkal é' dāádāŋ Yesayaa mómpē ahóbé ngáne éténléde bán, "Mod ábíd á nchyaátén níme Jesé awé ápé ákamlen bad ábe béesé bad bé Israel.

Awē-áá bad ábe béesé bad bé Israel bésummé nlém."

¹³ Nkánne nēn mēé, Dyób áde ábage' e'lyág bé nlém ábel nyélōn ne menyinge mésyāā́l nyébé-é nsan áyāle adúbe áde nyédúbpé. Nē débéll ngíne e Edāádāŋ éche Esáá ébéll áden adúbe dékwogé' akwog ne akwog.

Nzom eché ekáá boŋ Paale átelé' enén kálag

¹⁴ A-baányan, mmēn mbíí bwám nēn mēé nyé bēn nyéwóó nlém ní bwám ábel mam níme Dyób áhedéé áá nyébel, nyésóŋténé-é mam bwám, nyékwoŋnéde-te áyáged nhóg ne aníní.

¹⁵ Boŋ kéné, donje á mekan áde áde ríténlé nyé á kálag-té wén. Ntelé mó, ákamten nyé nímén mekan mésyāā́l éseban mbáá' dyamdyam. Nsimé níme Dyób ábágé me móó mbéle boŋ rítelé nímén mekan.

¹⁶ Dyób ábágé me nímé nsimé ábe mbáleda awe Yesu Krístā, ákale bad ábe béesé bad bé Israel nkalan ní bwám. Mbále nímén nsón néé prise ákal nkalan ní bwám níme ríhuú ne Dyób, ábel nēn bad ábe béesé bad bé Israel bébé mende níme mbágé boŋ mékobnéde á'só é' Dyób. Dyób dékōb bó áyāle Edāádāŋ éche Esáá ébéle bésáá á'só é' Dyób.

¹⁷ Né-óó, ngáne rídíí ne Yesu Krístā, nwóó nzom ákum ekáá á tál áyāle nsón níme mbēnléé Dyób.

¹⁸ Mééhēlē-é ne nhób dyamdyam démpēe éetóméé áhób táŋgene nsón níme Krístā ábéle boŋ ríhēl abel, ábel bad ábe béesé bad bé Israel bébele ngáne Dyób áhedéé áá bébel. Mekan níme ríhóbé ne níme mbéle móó méde mekan níme bétáŋgéné áhób níme bétáŋgéné-é abel.

¹⁹ Membél nímé mam á ngíne e e'chemléd ne menyáké, ne á ngíne e Edāádāŋ é Dyób. Nēn démbēl menkál Nkalan ní Bwám níme Krístā bwám ngáne ríkágé' áá bootya á Jerusalem ápe á mbwóg e Ilirikum.

²⁰ Nkénwōŋ nlém ákal Nkalan ní Bwám mebwóg níme modmod éépēdēé mbéd átúb dīn áde Krístā. Membél nē ábel boŋ meékāg wéé mod ampée ámaa nsón abooted.

²¹ Nēn áde ngáne éténléde á kálag e Dyób nēn bán,

"Bad ábe béewógé néé béhóbé áyāl eché, bényln,

ábe bó-'ε béēwōgē áyāl echē mbēd, básōhtēn."

Paale abelē ntií áke á dyad á Roma

²² Mmēn meke níme ríkágé'áá mós mékás bonj meéhēlē ape áwēn.

²³ Bonj bōab, ngáne nímádé nsón échēn pēd é mbwóg, nwóó nlém áte bwámbwam ápe áwēn, ngáne ríkénwōngē mwě ne mwě.

²⁴ Mēbwě áwēn nzé nkağ á alonj á Spen. Nwóó mewēmtēn meé mēnyīn nyé nzé nkağ, meé nyéwōngēn-ne me áke áwed. Bonj pen, mēdyéé ne nyé mwámpīn, dehódéd nhóg ne aníní nlém, bonj ríkag.

²⁵ Bonj bōab, ndé á nzii áke á Jerusalem áke déwōngēn bad bé Dyób ábe bédé áwed.

²⁶ Bad bé Krīsto ábe bédé á mbwóg e Masedonia ne á mbwóg e Akaya bényíné nén bán ébōj bán bēlad mōné bēlōme betóótōkē bé bad ábe bédé áfnté e bad bé Dyób ábe bédé á Jerusalem.

²⁷ Bényíné nén bán ébóó bēbel nē, bán bētāngéné bó áwōngēn. Ngáne edíi bán nnam níme Dyób ábágé bad bé Israel, bēbenlad mós ne bad ábe béesē bad bé Israel, ébóó bán bad ábe béesē bad bé Israel bōmpē bēwōngēn bad bé Israel bwēm nēngabe meyé, mōné ne mbóté.

²⁸ Nzé nímádé nímén nsón á Jerusalem, áde nímáá bó mōné abe níme bēladté bós, mēhidé áke á alonj á Spen. Ene pónde dós-áa mátyēēmmē ányīn nyé.

²⁹ Mbíi-'ε meé nzé mpedé, échēm epe ébēl nyéēkūd nnam níme Krīstāe níme rílóné mbon.

³⁰ A-bānned, á dīn áde Sāngú Yesu Krīstāe, ne áyāle edānge éche éhúú ne échē Edāádān, ncháa nyé nén meé syānē délad mekáá déwéd me akānned nén bán Dyób áwōngēn me.

³¹ Nyékānne nén bán Dyób ánōn me ábel nén bad ábe bēédúbpe Krīstāe bēbēlé me dyam dé mbéb ké ahóg nzé ndé á Judeya. Nyékānne-'ε nén bán mōné níme mékiinédte betóótōkē bé bad áfnté e bad bé Dyób á Jerusalem, bēkob mós.

³² Ambid enē dós mépēé áwēn ne menyīnge, nzé Dyób áhede áá ébē áned, ábel bonj ríkōme áte nzé ndé ne nyé.

³³ Dyób dé nsāj ábē ne nyé moosyāal. Ebē nē.

16

Paale alómmé baab melentēn

¹ Ndāó meé nyébíi bán awe syānē mwānyān a mmwāád Fibii, awē awōngēn ábel nsón á mwembé níme ndé á dyad á Senkria, abele nsón ní bwām.

² Nzé apedé áwēn nyékob mós nken á dīn á Sāngú ngáne bad bé Dyób bētāngéné abel. Nyébe-'ε mós nwōngēn ké ríhée níme áhádne nyé. Nyébíi bán mōmpē akéwōngēn ekud é bad, awōngēn-ne me ámpē.

³ Nyéented me Priskaa bós nchóm Akwilaa ábe syāábōó sébēlé' nsón níme Yesu Krīstāe.

⁴ Bēnkwentēn awē á nló nímēm. Nsāgnan bós. Saá-kaá mwēmpen nsāgnan bós, bonj kóōjne mwembé nímé bad ábe béesē bad bé Israel rīsyāal, bōmpē bēsāgnan bós.

⁵ Nyéented me kóōjne bad bé mwembé níme rībome' áwab ndáb.

Nyéented me awem nsón-a-nlém, Epanetuse, adii mod awē abédé mod a'só ádúbe Krīstāe á mbwóg e Esia.

⁶ Nyéented me Maria, akébel nsón bwámbwam áfnté echēn.

⁷ Nyéented me kóōjne Andronikuse bós Junia, ábe syāábōó sēdé bad bé Israel, bēmbē-'ε á mbwóg ne me. Bébyééné bwām áfnté e bembapēé bé nlomag, bēndúbē-'ε Krīstāe bonj médúbē.

⁸ Nyéented me Amplatuse, adii mod awē adé awem nsón-a-nlém awē rídás á dīn á Sāngú.

⁹ Nyéented me kóōjne Úbanuse awē syāábōó sébenle' Krīstāe nsón. Nyéented me kóōjne Stakise, awem nsón-a-nlém.

¹⁰ Nyéented me Apelēse, awē nímē mbeltéd ní bwām rīnyinnédé nén bán ríkōbnédé ne Krīstāe. Nyéented me kóōjne bad bé abum á ndáb áde Aristobuluse.

¹¹ Nyéented me Herodyone, awē adé awem mwānyān a Israel. Bad ábe bédé abum á ndáb áde Nasisuse ábe bēdúbpe Krīstāe, nyéented me bós á dīn á Sāngú.

¹² Nyéented me Trifane bós Trifosa, bebaád ábe bēbenle' Sāngwéé nsón. Nyéented me Pesise awem nsón-a-nlém, awē akébel nsón bwámbwam á dīn áde Sāngwéé.

¹³ Nyéented me Rufuse, awē Sāngwéé ápwédé ábele mós. Nyéented me kóōjne nyaá, atédé me nēe awe mwān.

¹⁴ Nyéented me Asinkrituse, Flegone, Hemese, Patrobase, Hemase, bānned bé Krīsto ábe bósōó bēbome'.

¹⁵ Nyéented me Filologuse bós Julia. Nyéented-te me bānned bé Krīsto bé baachóm, Olimpase bós Neriuse ne mwānyān a mmwāád ne bad bé Dyób bēsyāal ábe bédé ne bós.

¹⁶ Nyéhé nhóg ne aníní tál ne edānge é Krīstāe. Mwembé rīsyāal rílómmé nyé melentēn.

Nlyógtēn mé asóg

¹⁷ A-baanyaŋ, nchaa nyé me-éé nyétéd pónidé ne bad ábe bépæene' nkabén átinté echên, ábe bépante bad nzii. Bényágte nyé ayáge áde ápentan ayáge áde nyénsébèè ayáge. Nyéehidé ábè bad.

¹⁸ Nyéehidé bó áyale saké awed Sǎngú Krístæa bébenléé bon pæn mam nime mébónnéde bèn móó bébeléé. Bényinte' nsal áte, béhóbé-'é mekan átéd bad ábe béèsòŋtǎn bwám nlém á abum.

¹⁹ Bad bésyāā́l béwógé nyaa eche nyésúme mekuu áhíd nkalaŋ ní bwám. Né-óó, mbéééné nyé menyinge. Bon nhede nén meé nyébii ábel mekan mé bwám, ríhede-'é nén meé nyéebíé' dyamdyam tǎŋgene abel dé mbéb.

²⁰ Dyób dé nsan ákwógé Satane ahinten áwēn ekuu-sé. Nsimé nime awed Sǎngwéé, Yesu Krístæa nǎbè ne nyé.

²¹ Timotie awé súmā sébele nsán, alómmé nyé melentēn. Lusiose, Jasene, ne Sosipataa, bǎnned bé Israel bómpē bélómmé nyé melentēn.

²² Me, Tetiuse awé ntenle' Paale enén kálag, mémpē nlómme' nyé melentēn néé awen mwānyaŋ a Krísto.

²³ Gayose alómmé nyé melentēn. Awe ndáb dōó sédíí, áhed-taá mwembé nǎboméé. Erastuse, nkoó-mané a dyad, ne Kwatuse, awed mwānyaŋ bómpē belénté nyé. *

Mekane mé asóg

²⁵ Syáné débe Dyób ehúme áyale nén áwóó ngíne áwéd nyé adúbe áte. Nè dō-'aá ménlāá'é nyé áde ríkánlé nyé Nkalaŋ ní Bwám tǎŋgene Yesu Krístæa. Mmè nkalaŋ nííí mbále eché Dyób dénkóó'é se etún, ekénlúmedté bad.

²⁶ Bon bōob alúmté syáné. Abídté mó áwed bōob ne mekan nime bekal bé' dǎádǎŋ bēntenlé á kálag e Dyób. Abelé nē ábel bon bad bé melon mésyāā́l béwógne mó. Nén ábénlédé ngáne Dyób dénhōbpē aá ébenléd. Mó adé á ngíndé ne á ngíndé.

²⁷ Dyób dēmpen dōó áwóó debyéé ásyāā́l. Débe mó mekenag áyale chōm éche Yesu Krístæa ábélé, á ngíndé ne á ngíndé. Ehé nē. †

* **16:23** Donje á kálag dé'só ábádé nchoo 24: Nè, nsimé nime awed Sǎngú Yesu Krístæa nǎbè ne nyé badsyāā́l. Ehé nē. Kálag émpēé ébádé nímén nchoo ámbid e nchoo 27. † **16:27** Donje á kálag áwóó nchoo 25-27 hén ne ámbid e nchoo 14.23; émpēé éwóó mó ámbid e nímén nchoo mwēmpen 14.23; donje áwóó mó ámbid e nchoo 15.33.

Kálag e'só echê Paale áténlé Baá Kōrinto Ndibned n kálag

Kálag e'só eche Paale átélé, bad bé Krísto ábe bédé á mwembé n Kōrinto bóo ántelée chō. Paale átélé enén kálag tângene ndutul eche bad bé mwembé békúdáá á alongé ádab, békudé-ε ndutul tângene ádab adúbe. Póndé echê Paale átélé enén kálag, dyad á Kōrinto dōo ábédé nló n dyad á mbwóg e Akaya á póndé e nkamlen e bad bé Roma. Adé dyad démbyēēn bwámbwam áyāl e mekan nēngáne nyongé echê etómnádtáá áwed, mekan mé mbwóg nímáb bémbēēn mō kúmbe, abel dé mekan mé mbinde déntōm áte áwed, bébēnlé'áá-ε nyōb híin.

Mekan níme Paale ákóó awéd áte médii nkabén ne mbinde e mekan eche édé á mwembé-te. Ahōbe káñne tângene nyaa echê bad bēnāneé e'wóngé, nlém níme bad bētāngéné awōñ átii ké dyam ábóó káa déeboó'ε, nyaa echê Edāsdāñ eche Esáá ébageé bad nde ne tângene mpuu. Akoó alúmed áte chōm eche nkalañ n bwām rñhōbēé tângene nímén mekan.

A eped dyóm ne e'láán Paale ahōbe tângene edāñge. Echê eped chō-'áá bad bétómténé abii átínté e enén kálag esyāól.

Nkabted n kálag

Ndibned 1.1-9

Nkabén níme ridé a mwembé-te 1.10-4.21

Mekan mé mbinde ne alongé á túmbé 5.1-7.40

Mbēltéd n Bad bé Krísto ne bad ábe bēedúbpe Krístā 8.1-11.1

Alongé á mwembé ne abele á Dyōb 11.2-14.40

Mpuu níme Krístā ne n bad bé Krísto 15.1-58

Nde eche bēládté bad bé Krísto bé Jerusalem 16.1-4

Mekan níme ménone bad bēn ne nsógtēn 16.5-24

¹ Mē Paale, awē Dyōb ápwédé ábe mbapēe a nlomag awē Yesu Krístā ngáne Yesu Krístā apwédé mē ábe awē mbapēe ngáne Dyōb déntí'é, mē ne Sōstēne, awe syāñē mwānyañ, sēē sētēnlé nyé enén kálag.

² Mwembé n bad bé Dyōb ábe bédé á dyad á Kōrinto, nyēē ntenlé enén kálag. Dyōb áchēnlé nyé ábe ábe bad ábe bēsáá. Asāñté-ε nyé abé áde nyédii ne Yesu Krístā. Melemlem nē dōo ápwédé bad bēmpēe ábe bédé hōm-téé, ábe bēbenlad dīn áde awe syāñē Sāñgwéé, Yesu Krístā. Adii awab Sāñgwéé, abé-ε awe syāñē.

³ Nsimé ne nsañ níme rñhúú ne Dyōb, Titēe awéd ne níme Sāñgú Yesu Krístā, nñbē ne nyé.

*Paale aságnan Dyōb áyāl e
mwembé n Kōrinto*

⁴ Nságnan Dyōb póndé téé áyāl echēn, áyāle nsimé níme ábágé nyé mbwiined ne Yesu Krístā.

⁵ Abé áde nyédii mod nhóg ne Yesu Krístā ábélé Dyōb ábágé nyé chōm esyāāl nyaa echê elóné mbon. Abelé nyékale nímē nkalañ nyaa eche ehēdnad, nyēsōñtēn-ε mam mēsýāāl bwām tângene nímē mekan.

⁶ Nén álúmtē bán nkalañ tângene Yesu Krístā níme sékánlé nyé nókóó nyé asól á nlém-té.

⁷ Né-ōó, nyéetógéé nde ké póg ábele Dyōb, ngáne nyésineé póndé eche Sāñgú Yesu Krístā álúmedtē yāl.

⁸ Sāñgú Yesu Krístā mwēn-εe ábēl adúbe áwíúú nyé áte káñne á asóg dé nkōñsē ábel nēn á epun eche ápēé ákáad bad, bad bēēhōbē bán dyam dé mbēb ké ahóg áde áde nyébéle.

⁹ Dyōb ábele' ngáne áhōbē áá mōsbēl, mō apwédé-ε nyé ábe mod nhóg ne awe Mwān, Yesu Krístā.

*Paale ad nkabén méebāg
átínté e bad bé Dyōb*

¹⁰ A-baányañ, ncháa' nyé á dīn áde Sāñgú Yesu Krístā nēn mēé, nyé moosýāól nyépe á nchemten áyāl e kéchéé eche nyéhōbēé ábel boñ nkabén méebāg átínté echēn. Boñ pen nyébé mod nhóg á mewēmtēn ne áyāl e kéchéé eche nyéhōbē bán nyébéle.

¹¹ A-baányañ, nhōbe nēn áyāle bad ábe Kloo bēlāngé mē bán nyé bēn ne bēn nyēsēnle'.

¹² Chōm eche rñhōbēé édií nēn, átínté echēn, baahóg bēhōbē bán "Ndií mod awē ahíde ayáge áde Paale", donje bán, "Ndií mod awē ahíde ayáge áde Apolose", ábiníí bán, "Nhíde ayáge áde Petro", bēmpēe-ε bán "Ndií mod awē ahíde ayáge áde Krístā."

¹³ Nédé nyéhede ahōb bán Krístā akābné áte-yε? Mē Paale-εe bēmboméé á awōg á nló nímén'ε? Kéε á dīn ádem, mē Paale, dōo bēndusénné nyé?

¹⁴ Nságnan Dyòb nén mée menkëndusénne nyé modmod éetóméé Krispuse bó Gayos.

¹⁵ Né-òò, nyé modmod nyéehelēē se nyéhób bán nyékudé edusen á òin àdēm.

¹⁶ (Mendusén kóōne abum á ndáb áde Stefanuse. Méeekāmtānnē pen me ndūsénē mod ampée.)

¹⁷ Krístāa enkēnlómme me ádusen bad. Boŋ pen anlóm me ákal nkalan ní bwām, menkāl-
le mó ésehán mbenlad e'yale ábe é'lúmte debyéé á moonyoŋ. Nzé mbenlenlé e'yale ábe
é'lúmte debyéé á moonyoŋ né nkalan tãngene kwééd eche Yesue áwédé á awog, méebáá
dyamdyam.

Paale aá Krístāa adli ngine ne debyéé á Dyòb

¹⁸ Dyam áde ríhóbeé ádli nén, nkalan tãngene kwééd eche Krístāa áwédé á awog rídii chòm
éche éde eyókél wée bad ábe béké á dù á muú. Boŋ ne syánē bad ábe békūd e'soósoŋ, níme
nkalan rídii ngine e Dyòb.

¹⁹ Eténlédé á kálag e Dyòb nén bán Dyòb áhóbé aá,

“Mēbel debyéé áde bad ábe béwēmtan bán béwóó debyéé ányínnēd nén déesaá dyamdyam,
mélúmēd-te nén mée bad ábe béwēmtan bán bébii dyam, béebii' é dyamdyam.”

²⁰ Né-òò, é'lúmte nén bán mod á debyéé eesaá dyamdyam, meléede a mbéndé a bad bé Israel
eesaá dyamdyam. Bad ábe belãnge bad mekan ne debyéé enān pónde béesaá dyamdyam.
Dyòb á'lúmte aá debyéé dé nkõsē ádli eyókél ngēn.

²¹ Ngāne édíí bán Dyòb ábēnlédé áde debyéé ábel boŋ bad bé nkõsē béebenlād ádab
debyéé ábii mó, mó Dyòb amaá atii aá mōsõõŋ alongé á bad ngāne bédúbpe nkalan níme
sékaléé tãngene Krístāa. Kénéé bad ábe béebii Dyòb bétédé nén bán póle e' yókél é' bad chõ
sékaléé.

²² Bad bé Israel bédāa bán bényin e'chemléd é' menyáké boŋ bédübē, bad bé Grikia-
é béhede debyéé áde áchábé ámín.

²³ Boŋ sé pen, sékale nén bán Krístāa, Ane-awē-Béwógté, anwé á awog. Ne bad bé Israel,
níme nkalan rídii dyam áde bēnkēndāngé awóg ne awóg dēn, ne bad ábe bó-é béesē bad bé
Israel, níme nkalan rídii eyókél ngēn.

²⁴ Boŋ Dyòb áchénlé donje á bad ábe ábē bad. Bó donje á bad bédii bad bé Israel, ábiní-
é bad bé Grikia. Ne ábēn bad níme nkalan níme sékaléé rídii Krístāa, mó adé ngine e Dyòb,
mó-'aá adé debyéé á Dyòb.

²⁵ Chòm éche ényínnad nēe eyókél é Dyòb étómé debyéé á moonyoŋ. Eche chõ-
é ényínnad nēe ewōmwōm é Dyòb, étómé ngine e moonyoŋ.

²⁶ A-baányan, nyékamten nyaa é bad éche nyébédé á pónde eche Dyòb áchénlé nyé ábē
ábē bad. Bad bé nkõsē bényin nyé nguse é bad nēe bad ábe béwóó debyéé. Nyé nguse é
bad nyébédé benkamlenē. Nyé nguse é bad nyēmbíd á túmbé é benkamlenē.

²⁷ Boŋ Dyòb ápwédé bad ábe bad bé nkõsē bēntēdtē nēe e'yókél é' bad. Abelé nē ákwáged
bad ábe béchágé yál á nkõsē-te nén bán béwóó debyéé. Dyòb dēmpwēd-te bad ábe nkõsē
ményínnē nēe bad ábe béesē etógnēn. Ambel nē ákwáged benkamlenē.

²⁸ Dyòb dēmpwēd bad ábe bad bé nkõsē bényínnē bán bédé nkõntéd, ápwēd ábe
bényínnē bán béesaá dyamdyam, bad ábe bényínnē bán béesaá dyam dé abelen. Dyòb
dēmbel nē á'lúmed nén aá mam níme bad bé nkõsē bényiné bán médé etógnēn, méesaá
chõmchõm.

²⁹ Ambēl nē ábel boŋ modmod eékūmē' ekáá á tãl á'só é' Dyòb.

³⁰ Chòm éche ábēnlé nyé chõ ékásá boŋ nyébé mod nhõg ne Yesu Krístāa. Mekan níme Yesu
Krístāa ámbēnlé, ne syánē, debii bán ádii debyéé á Dyòb. Néde, Yesu Krístāa mó abelé boŋ
syánē débēlé mekan níme métãngéné, debé bad ábe besáá, mó-'aá akõdté syánē á mbéb-te.

³¹ Né-òò, éténlédé á kálag e Dyòb nén bán “Kénzēé awē akume ekáá á tãl, ákume' ekáá á
tãl dāsō áyale dyam áde Sãngwéé ábēnlé mó.”

2

*Paale abēnlédé ngine e Dyòb
ákal nkalan tãngene kwééd eche Yesu*

¹ A-baányan, áde nípedé áwēn ákale nyé nkalan níme ríhóbe mam tãngene Dyòb,*
meébenlād-taá e'yale é'mbáá ké' debyéé ámbáá.

² Mēbel nén áyale áde níbédé áfinté echēn memmād á nlém-tē nén mée méebenlé dyam
dēmpé éetóméé ákal nkalan tãngene Yesu Krístāa ne kwééd echē áwédé á awog.

³ Áde níbédé ne nyé menkēnkwognédte mmēn ábel nsón, mbwóg níbédé me áte, nlém
ríhūnē-é me á abum.

* 2:1 Mam tãngene Dyòb; donje á kálag dé'só áwóó: mam tãngene mekan mé e'kojnéd mé Dyòb.

⁴ Ade ní'yágté'áá nyé, níkanlé'-é nyé, póle eché nílangé'áá nyé eebédeé póle eché etéde bad nlém á abum eché edé debyéé ámbáá áte. Meékanlé'áá'-é nyé ne debyéé ámbáá ábel nén nyédúbe chóm éche nílangéé nyé. Bon pen áde níkanlé'áá nyé nkalaj ní Dyöb, mekan níme níhóbé'áá mélumté'áá bán ngíne e Edáádaj é Dyöb edé áwéd-te.

⁵ Meéhede'áá meé nyédúbe nkalaj ní Dyöb áyale mod ábénlédé debyéé ámbáá ákale nyé mós. Bon nheadáá meé nyédúbe níme nkalaj ngáne Dyöb den ábénlédé eche ngíne ábel nyédúbe.

Debyéé áde ahúú ne Dyöb

⁶ Kéné'-é ámpé, nzé sédé ne bad ábe bémáá awúu áte á adúbe-té, sébelé sébenlád debyéé nzé sékanle bós póle. Adé debyéé pen déébagké debyéé áde mod a nkònsé ábenlادتé. Déesaá-'áá debyéé áde ké benkamlene bé nkònsé bé' chíi bébenlادتé. Abé benkamlene bédii bad ábe nímbab nkamlen mébéé á esón é pondé.

⁷ Debyéé áde sébenlادتé ádíí debyéé áde Dyöb ábágé sé. Sékale ntíi ní kun níme Dyöb ábénlédé áde debyéé ábel. Ngen e'ós Dyöb dénkénlumédte modmod nímén ntíi áte. Mmén ntíi níme Dyöb áfídé ahóbé áá syáné ámpé dèbè áse e eche ehúmé á pondé eché ehú'. Dyöb déntíi áá mósbelé syáné nē se áde ééhággé nkònsé.

⁸ Nkamlene a nkònsé ké nhóg enkénsònténné áden debyéé á Dyöb. Áyale nzé bénsònten chóm éche Dyöb ábéláá, né bénkénwúú'é Sàngwéé a edúbé abome áde bémboméé mós á awóg.

⁹ Bon kéné'-é ámpé, éténlédé á kálag e Dyöb nén bán, "Mam níme Dyöb ábònséné ábele ábè bad ábe bédáá mós, médíi mam níme modmod éenyínéé mbéd, níme modmod éewógéé mbéd, níme modmod éékámtenéé-'áá áwe nlém-té mbéd."

¹⁰ Mmén mekan mós Dyöb álumté syáné. Eché edáádaj chós ánlómme áluméd syáné nímén mekan. Edáádaj énonne mekan mésyáál áte, ébíí'-é mekan mésyáál, kásíjne mekan mé Dyöb níme mod éehelée-se awámsén asònten.

¹¹ Modmod eebéé'é mewémten mé mod ampée. Edáádaj éche édé mod áte chós ébyéé' níme mewémten. Melemlem nē dós modmod éebíí'é mewémten mé Dyöb, étóméé Edáádaj é Dyöb.

¹² Edáádaj éche syáné déwóó éhúú ne Dyöb. Deewóó'é edáádaj é nkònsé. Dyöb ábágé syáné échén Edáádaj ábel désònten mam mésyáál níme ábééné syáné níme nsímé.

¹³ Né-ós, séébenlادتé e'yale ábe moonoyaj ábenlادتé áde debyéé áyáged bad. Bon sébenlad e'yale ábe Edáádaj é Dyöb élyágté sé áhób. Sébenlad e'yale ábe Edáádaj élangéé sé tângene níme mekan.

¹⁴ Mod awé eewóó Edáádaj é Dyöb áte eedúbpéé mekan níme Edáádaj é Dyöb élangéé bad áyale anyíne mós eyókél. Ééhéléé'-é mós asònten áyale Edáádaj éche Esáá chémpen chós éwóŋgan bad ádol mekan mé Dyöb áte bwám.

¹⁵ Mod awé awóó Edáádaj áte ádol mekan mésyáál áte bwám. Bon modmod ééhéléé-se asòntén mewémten níme ane mod.

¹⁶ Edé nén ngáne éténlédé á kálag e Dyöb nén bán,

"Nzé-módé abíí mewémten níme Sàngwéé?"

Nzé-módé ahele se aléb-pe mós?"

Bon syáné dewóó mewémten níme Křístáa.

3

Paale áá bembáde bé Dyöb bós bós moosyáál bédii

¹ A-baányaj bé Křísto, meéhele'áá sé nláá nyé mekan ngáne nílangéé bad ábe adúbe ádáb áwúú áte áyál e mekan mé Dyöb. Bon nílangé'áá nyé mam ngáne nílangéé bad ábe béwóó mewémten mé moonoyaj a ekob. Nyébédé néé nkásál, mentéd nyé néé bad ábe bémbóotéd ábè mod nhóg ne Křístáa.

² Abíi dós nkásál nímwáá'é, eedyágké ndyééd eché elélé. Né-'áá me'-é mémbootédte nyé mam níme méelele áte tângene nkalaj ní Dyöb ayáged. Menkényágédte nyé mam níme méwúú áte, áyale ene pondé nyénkénkwogké ákob mós. Ké bós-pe nyéékwógéé ákob mós.

³ Áyale nyédii nyéhíde' mekan mé ekob é yál, nyéwánléné nhóg ne aníníí kónjí, nyé bèn ne bèn nyéswanján-ne. Bós áde nyédii nyébeléé nímén mekan éelumtéé bán nyédii nyéhíde échén esíí é mekan mé ekob é yál-e? A mbále, nyébeleé néé bad ábe béwóó dás nsònten ní moonoyaj.

⁴ Chóm éche ékás bon níhábé nén édíi nén, áfínté echén bad behóg béhóbe bán, "Ndíi mod awé ahíde ayáge áde Paale," ábííí'-é bán, "Ndíi mod awé ahíde ayáge áde Apolose." Enén ndín e mbéted élumté' bán nyéwóó dás nsònten ní moonoyaj.

⁵ Bɔɔb-pɔɔ, nzéé Apolose ádíí? Nzéé me, Paale-’e rídíí? Bembaledé bé Dyòb ngên bóó sédíí. Sèwóngéné nyé ádúbe Krístæ. Sé mod téé abele nsón míme Sàngwéé ábágé mó aá ábel.

⁶ Ndíi mod awé awéné mbál-e-bù, Apolose-’e mó adé mod awé asyógé’áá ene mbál mendíb áyál, boŋ Dyòb dáó dèmbǎl boŋ mbál ríkwoge’ saké sé.

⁷ Né-ɔɔ, mod awé awéné ne mod awé asyógé mendíb bó modmod béesaá etógnén. Mod awé adé etógnén adíi Dyòb. Mó abele boŋ mbál ríkwoge’.

⁸ Mod awé awéné ne mod awé asyógé mendíb bébeléé nsón nhóg, Dyòb désábē-’e bó mod téé nchoo ne nsón míme ábélé.

⁹ Bembaledé bé Dyòb ábe bébele nsón nhóg bóó sédíi. Nyé bad ábe nyédúbpé-’e nyédíi nêngáne nzag eché Dyòb áwóó. Nhele rihágtén-ne nyémpé ábe nêngáne ndáb eché Dyòb álóó’é.

¹⁰ Mbênlédé nsimé míme Dyòb ábágé me ábel nsón nêngáne nlóó-ndáb awé awóó debyéé álóŋ ndáb. Mésáá nsón ní Dyòb áfinté echên, bembaledé bémpée békeené nsón míme rísáádé á’só. Boŋ kénzée awé álóó’ atáŋgéné atéd pónké ngáne álóó’ é ámín e nsón míme bémáá asáa.

¹¹ Ayále modmod éhélfē-se ábel nsáaned mémpée éetóméé míme mímáá abel. Mmê nsáaned rídíi ayóge áde ní’yágté nyé tãngene Yesu Krístæ nén meé, Dyòb ásoo’ áded alongé mbwiined ne Yesu Krístæ.

¹² Donge dé bembaledé bébenlad bwēm nêngáne gól, sílva ne meláá mé etógnén ákeen mímé nsón á’só. Bembaledé bémpée-’e bébenlad bwēm bé nsón bémpée ábe é’bídé áyál e mel, ne ábe é’dé byáá, ákeen nsón á’só míme bésáádé.

¹³ Pónké épé eché moosyáál ányínné nyaa e nsón eché mod téé ápédé abel. Ayále á epun éche Yesue ápéé ábídéd mam mésyáál áwed. Ebē nêngáne mod awé ahédé bwēm á dù, boŋ muú mbél anyín éche éhele-se éhyán ne eche éhelé-se éhyán.

¹⁴ Nzé nsón míme mbaledé ábélé ámín e nsón míme bémáá asáa méehyáa, né ákud nsábe. ¹⁵ Boŋ nzé nsón míme mbaledé ábélé ámín e nsón míme bémáá asáa ríhyáá, ane mbaledé éekudté chómchóm, boŋ kéné, mwèn ádíi abé mod nhóg ne Krístæ. Boŋ pen ábē nêngáne mod awé ábidné mehélé á ndáb-te eché ehyáa. Adíi abé á alongé boŋ chóm ésyáál éche áwóó émad ahyán.

¹⁶ Ndúbpé meé nyébíi bán nyédíi abón áde Dyòb ádye’é áte. Edáádəŋ é Dyòb édé áfinté echên.

¹⁷ Kénzée awé abébté abón á Dyòb, Dyòb débébed ane mod, áyale nén wée Dyòb ádye’é ádíi hóm áde áde ngəŋgú. Nyébên-naa nyédé áde hóm áde áde ngəŋgú.

¹⁸ Modmod eédógé yál. Kénzée awé awémténé áfinté echên aá mówóó debyéé á nkòŋsé-te wén, átimed yál eyóké é mod ábel boŋ ákoŋ debyéé awóŋ.

¹⁹ Nlãŋge nyé nén áyale, dyam áde bad bé nkòŋsé bényíneé bán áde debyéé dáó Dyòb ányíneé née eyóké é akan. Debíi bán nén áde mbále áyale étenlédé á kálag e Dyòb nén bán, “Bad béwémtan bán béwóó debyéé boŋ Dyòb ábenlad ádab debyéé dèn ákób ádab akwáb.”

²⁰ Etenlédé ámpé nén bán, “Sàngwéé abíi aá bad ábe béwémtan bán béwóó debyéé ádab debyéé déesaá dyamdyam.”

²¹ Né-ɔɔ, modmod eékúmné baányoŋ ekáá á tâl, áyale nyéé Dyòb ábágé bwēm é’syáál.

²² Dyòb álómé me, Apolose ne Petro áwóngen nyé. Bwēm é’syáál ábe Dyòb áhágé á nkòŋsé, abagé nyé bó ábenléd. Ké nyébé á alongé ké’ e nyéwé, Dyòb ábélé nē á mboŋ mímén. Mekan-ne míme mébenlad ne nyé bɔɔb ne míme mébenléd ne nyé á pónké eche ehúe’ á’só, médíi á mboŋ mímén. Abén bad bésyáál ne abén bwēm é’syáál Dyòb ábágé nyé bó.

²³ Nyédíi bad ábe Krístæ, Krístæ mó-’e abé ane awé Dyòb áwóó.

4

Paale ad Dyòb ápwédé bó ábele Krístæ

¹ Nyétéd sé nêngáne bad ábe bébenle Krístæ, ábe Dyòb ábélé aá belãŋge bad mekan mé e’koŋnéd.

² Chóm éche éhadnad bán eché ndín é bembaledé bébel édíi ábel nsón bwám míme echab sãŋ ábágé bó aá bébel.

³ Boŋ me meewóó’ é pónké ábel ne kéchéé éche nyé ké’ e mod ampée áwóó áhób tãngene nsón míme Dyòb ábágé me aá mbel. Ké mmén meehóbéé tãngene nsón míme mbelée, ké mbóó ké’ e mééboó’ é.

⁴ Meenyíneé awusé ké ahóg áyál e nsón míme mbelée boŋ nē déélúmtē nén bán chóm ésyáál éche mbelée étãŋgéné. Sàngwéé mwěmpen mó abíi nsón míme mbelée, ké rítãŋgéné ké’ e méétãŋgené.

⁵ Né-ɔɔ, nyéehóbé bán mod abelé nsón mí bwám ké’ e abelé nsón mé mbéb áde pónké éepédē ábel nē. Ene pónké épé áde Sãŋgú Yesu Krístæ ápéé. Ade ápéé, ábídéd bwēm

ábe é' bédé á ehíntén-té á e'nyínen bé ekíde abídéd-te bad mewémten áwed níme modmod énkémbíí' é. Ene pónké dō-áa Dyōb dékenné mod téé ngáne ápedé nsón abel.

⁶ A-baányan bé Krísto, nhóbe' nímén mésyāal áyāl echém ne Apolose áwōnggen nyé ásoñten. Ntéde sé bad bébe nēngáne elánsén ábel nyéyáge e'yale ábe behóbeé nén bán "Mod ábele dāsō mekan níme méténlédé." Modmod ekumné mod nhóg ekáá á tál se ányíné aníní nkóñtéd.

⁷ Dyōb áhágé mod nhóg etógnén tómaa aníní-ye? Cheé mod ádíí éche Dyōb déebeléé bon abé? Cheé-ō mod ákuménné ekáá á tál, áde édíí bán kéchéé éche mod ádíí Dyōb dōo ábélé mós?

⁸ Bōob nén nyélúmte byánán nyéwóo chōm ésyāal éche nyétógnéné. Nyélúmte byánán nyésudé nhan. Nyétédte sé bembalede, nyé bēn nyéwémten bán nyédíi kāñ. Mendāñ nén meé nyékoñ kāñ abé ábel bon sémpē sékamlan ne nyé.

⁹ Nwémten nén meé Dyōb ábélé áá sé bembape bé nlomag sébē nēngáne bad ábe béese etógnén áfínté e bad. Sédíi nēngáne bad ábe bétómté mbakú bán béwé. Nhóbe nén áyale bad bésyāal bēnne sé ányín chōm éche ébenlad ne sé. Saá-kaa bad bēnpen bon káñ ne ángel éñone sé.

¹⁰ Bad bényíne sé nēe e'yókél é' bad áyale sébenléé Krístā. Bon nyépen nyéwémten bán nyéwóo debyéé áyale nyédíi nhóg ne Krístā. Bad béwémten bán séewóo' é ngíne ábel dyamdyam bon nyéwémten bán nyéwóo ngíne eché ehúú ne Dyōb. Bad béebagéé sé edubé bon bébage nyé edubé.

¹¹ Káñne ne bōob, séewóo' é chōm éche sédyággē ne eche sémwággē. Séewóo' é mbáté éche ékwógé sé ahé. Séyággē mbéte akud á mekáá mé bad. Séewóo' é wéé sédyéé' é.

¹² Sébele ntù ní ngíne ábel bon sékud chōm éche séwōnganné echéd yāl. Nzé bad bésyāa' sé sēlānge bó bán mekan mébéen bó bwām. Nzé bad bébele sékude metake, séwesan.

¹³ Nzé bad behóbe sé mekan mé mbéé áyāl, séhóbe bó mekan mé bwām áyāl. Ké bōob bad bédíi bényíne sé mbinde áwab díd-te. Séesaá dyam dé abelen áwab.

¹⁴ Ntele nén saké áwóged nyé e'son bon ntenle nyé áléb nyé tāngene mekan níme nyétāngéné abíi. Áyale nyédíi nēngáne ábém bán ábe nídóo.

¹⁵ Kénée édíí bán nyéwóo bemeléde bé Krísto híin, mod nhóg mwēmpen mó adé nēngáne sáá awēn. Apēen áde nípínédé nyé nkalanj ní bwām ábélé ndíi nēngáne sáá awen á Krístā.

¹⁶ Né-ō, ncháa nyé nén meé nyébele mekan níme mémpē mbéleé.

¹⁷ Nén dōo ákás bon nílomé Timotie áwēn. Adíi nēngáne awem mwān á dín á Sāngú. Ndóo mó, ayággē-é mekan abel ngáne éhēdnadté. Nzé apedé ákamtén nyé nyaa e alonjé eche níwóo nēngáne mod á Krísto. Ene nyaa e alonjé edé nchoo ne chōm éche ní'yággē mwembé ké ríhée níme níkaggé áte áyáged.

¹⁸ Nyé donje á bad nyédé kúmbe, nyéwémten bán méepaa áwēn.

¹⁹ Bon nzé Sāngwée akwēnténe, nkwojé ape áwēn. Ene pónké-áa méhēdté áte abíi chōm éche ábē bad ábe bédé kúmbe békoo' é abel. Mébíí ké békōñté ngíne awōñ eché ehúú ne Dyōb ké' e nsəl ngēn mōo bébeléé áte.

²⁰ Nkamlan ní Dyōb méesaá chōm éche édé á nhóbtéd, bon nídíi ngíne eché elúmte' á mbeltéd.

²¹ Ahée abōñnéde nyé, nyédaá bán nzé mpedé áwēn níkógsan nyé áyāl e kúmbe eche nyédíi ké' e nyédaá bán nzé mpedé nílúmed nyé nílem mé edānge, níchedne nyé yál?

5

Paale ahóbe tāngene akab dé mesón á mwembé ní Korinto

¹ Nwógé nén bán mod nhóg áfínté echēn akábe asón, nyaa e asón eché ké bad ábe béebíi Dyōb béehelée sé bekāb. Chōm éche níhóbeé édíi nén meé, mod nhóg áfínté echēn akábe asón ne sáá mwaád.

² Chán-nō nyéhele nyébe kúmbe áde édíí bán ane mod níme mbéé nítāngéné nyé dāsō ndutul awóged. Mó awé abele enén ndín e dyam, nyétāngéné nēe nyénáné mó áfínté echēn.

³ Nhóbe meé nyébel ní áyale kénée méesaá ne nyé, nkamtan nyé pónké téé. Nhóbe byánán ndé ne nyé nén meé mmaa mbakú atómed,

⁴ ne kunze eche Sāngú Yesu Krístā ábágé me, nhóbe nén meé nyékógsen ane mod awé abéle níme mbéé. Nzé nyeládné, ébē byánán ndé ne nyé, awed Sāngú Yesu Krístā ábe nyé ngíne ábel kéchéé éche nyéwémtné abel.

⁵ Nhēde meé nyébe ane mod á mekáá níme Satane ábel bon Satane ábēbed échē ekob é yāl. Kénée édíí bán Satane ábēbēd échē ekob é yāl, Yesue ásoñ échē edáadāñ á epun éche apéé ákáad.

⁶ Nyéetàngeneé kúmbe abé. Nyébíi nén bán mbumé ní ngun rísonle' nzé behédé mwá esulten áwéd-te, melemem nê dáo ane mod awé abelé nímé mbéb áhèle ábel bad bémpée bébel mbéb.

⁷ Nyéhúd esulten é nchun ésyāā, ábel bon nyébé nēngáne mbumé mékōōlē nime méewóo esulten, né-'áá nyékóó abé. Nyédé nén áyāle Krístā anwé á nló nímēd. Mó ambé nēe Mwān-a-Ndyon ní mbód awé bémbeé nēe mende mé ngande e Nnyime-ámín, áyāl e mbéb ní bad.

⁸ Né-ōō, nyéwóg menyinge ne ene ngande, esulten é nchun éébāg ámpē. Abé ádād ábē pónké ésyāā nēngáne abé á bad bé Dyōb, deébélē e'bébtéd é' mekan, deebébé-'e nlem á abum. Bon pen déwōn abé dékōōlē, déhíde Krístā ne nlem nhóg, dékale-'e mbále.

⁹ Kálag eché mēntelē nyé menláá nyé mēé nyéēhōnē' bad ábe békábe mesón.

¹⁰ Saké bad ábe béedúbpe Dyōb bōō nḥóbáá, kénēé edíí bán bō donje á bad békábe mesón, bédé ngoód, bédé bechílb, donje ábenlé-'e myōb mé metóm. Weéhēlē-se ebán échén ndín é bad á yāl kóñjé né ehíté á nkōñsé.

¹¹ Bon bad ábe mēntelē nyé mēé nyéēhōnē bédii bad ábe béchágé yāl bán bédii bad bé Krístō bon békābē mesón, bēbé ngoód, bēbagé myōb mé metóm edúbé, bēhōbē bad mekan mé mbéb á yāl, bémwāg mím bwāmbwam mékōbē bō, bēbé-'e bad ábe béchíbe'. Nyéedyág kē ndyééd ne échén ndín é bad.

¹² Meewóó' é kunze ké póg áhób mēé békógse bad ábe béese bad bé Dyōb. Bad ábe bédé á mwembé-te bōō nyétàngéné akógse.

¹³ Dyōb dáo dékáād bad ábe béese á mwembé-te. Eténlédé á kálag e Dyōb nén bán, "Nyéhúd mod awé abele mbéb áfínté echén."

6

Mod eesómné mwányan

wéé bad ábe béedúbpe Krístā

¹ Nzé nyé mod ké ahéé awánléné mwányan a Krístō dyan, éékāg wéé mod awé eedúbpe Krístā áá akáād bō. Bon pen áke wéé bad bé Dyōb ábel bétimed bō áse.

² Nyébíi nén bán bad bé Dyōb bōō bēkáād bad bé nkōñsé. Né-ōō, ngáne edíí bán nyéēkāād bad bé nkōñsé, nyétàngéné nēe nyékáadte mpíntéd mé mekan.

³ Nyébíi bán syáne-ēé dékáād ángel. Nēe edíí-'áá nē, chán-nō déehelēé baá mam ábe bétoge mbóó áfínté echén mbwe-téé amad?

⁴ Né-ōō, nzé eché ndín é mam épédé áfínté echén, nyéēfím chó nēe atéd, nyéekēn wéé bad ábe mwembé méétédēē nēe dyan bán bōbó bémade nyé chó-ye?

⁵ E'són ne nyé. Nédé modmod eesáá áfínté echén awé awóó debyéé ákóm nsañ áfínté e mod bō mwányan ábe bewánléné-ye?

⁶ Bon mod atime mwányan akēen á kóte, bad ábe béedúbpe Dyōb bēkáadte-'e búmō.

⁷ Asómēn áde nyésómneé nhóg ne aníníí á kóte álúmte bán nyékwédé ne akwe dēn. Edé mbon mwányan ápanen we tómaa we ákēen mó á kóte.

⁸ Bon nyétime nyépanne, nyédoge-'e nhóg ne aníníí, nyébele nē kóñjé wéé baányon bé Krístō.

⁹ Nyébíi nén bán bad ábe bébele e'bébtéd é' mekan béebáá á nkamlen ní Dyōb. Modmod eédōgē nyé. Bad ábe békábe mesón, bad ábe bébenle myōb mé metóm, bad ábe békábe mesón á ndáb e e'wóngé, baachóm ábe bēnanjad baáb baachóm bémpée, áben bad bésyāā bō modmod béebáá á nkamlen ní Dyōb.

¹⁰ Bad ábe béchíbe', bad ábe bédé ngoód, bad ábe bēbágé yāl á amwé á mím, bad ábe bēhōbe bad mekan mé mbéb á yāl ne bad ábe bédumne bad bwēm bō modmod béebáá á nkamlen ní Dyōb.

¹¹ Nyé donje á bad nyébēláá échén ndín é mekan. Bon á dín áde Sāngú Yesu Krístā ne á Edāādāñ éche ádēd Dyōb, bēhúdé nyé nímén mbéb á yāl, nyédé bad ábe bésáá, Dyōb ábánné nyé nēe bad ábe bésáá, nyékbndé-'e á'so é' Dyōb.

Nyēbnlad échén yāl ábe Dyōb edúbé

¹² Nyé mod nhóg áhèle ahób áá, "Nwóó kunze ábel kéchéé éche rídás abel." Nē áde mbále. Bon pen saké chóm ésyāāle mod ábeléé éwōngan. Mod áhèle ahób áá "Nwóó kunze ábel kéchéé éche rídás abel." Bon chóm ké éhéé éetàngeneé nēe étédéé me ntāñ.

¹³ Mod ampée áhèle ahób áá "Bébélé ndyééd áyāle abum, bébēl-le abum áyāle ndyééd." Nē áde mbále. Bon Dyōb débēl ábē bwēm bēpē á asóg. Dyōb déebelēé alongé á moonyon áá bēbenle mbinde é mekan bon abelé dō áá bēbenle Sāngwéé, Sāngwéé mó-'áá atagne yāl e moonyon.

¹⁴ Dyōb dēmpuúd Sāngwéé, nē dō-'áá ábenlédte eche ngine ápuud syáne.

¹⁵ Nyéebíi' é nén bán échén yāl chóó édé pág éche ebélé yāl eche Yesue-ye? Né-ōō, nhele ntéd pág é yāl éche Krístā bon ríke rílatén ne yāl e akwale-ye? Eetàngeneé abé nē mbéd!

¹⁶ Ké'ε nyéebíí'é bán mod awé atédé eche yál bonj álatén yál e akwaleε abelé búmō bétímé yál póg-ε? Eténlédé á kálag e Dyōb nén bán, "Echē yál ébe étim yál póg."

¹⁷ Bonj mod awé mós-ε adé nhóg ne Sánjwéé abele átím mod nhóg ne mó á edáádān.

¹⁸ Nyéewóó'é dyam dé abel ne mbinde é mekan. Mbébé ké rihéé mémpēe míme mod ábeléé méenāné eche yál. Mod awé akábé asón abelé mbébé tǎngene eche yál.

¹⁹ Nyéebíí'é bán échen yál édíi abón áde Edáádān éche Esáá édyεε'é áte-ye? Dyōb dōo ábágé nyé échen yál. Saké nyé nyéwóó chós, Dyōb dōo áwóó nyé.

²⁰ Dyōb ácháné nyé ne nkun míme ríchábé ámín. Né-ōó, nyébenled échen yál ábe Dyōb edúbé.

7

Paale alébe bad tǎngene e'wóngé

¹ Bōob-pōó, mēlāā nyé tǎngene mekan míme nyétélé á kálag echē nyéténlé mε. Ebóó bán mod eewóó' mmwaád.*

² Bonj ngáne édíi bán akáb dé mesón ábúti áte bwámbwam, ébóó bán mwENCHÓM téé áwōŋ awé mmwaád, mmwaád téé-ε áwōŋ awe nchóm.

³ MwENCHÓM téé átǎngéné ábelé' mekan míme mwENCHÓM átǎngéné mwaád abele, mmwaád téé-ε átǎngéné ábelé mekan míme mmwaád átǎngéné nchóm abele.

⁴ Mmwaád mwēn eékamlánné eche yál, nchóm mó akamlan mó, melemlem nē dōo mwENCHÓM eékamlánné eche yál, mwaád mó akamlan mó.

⁵ Nyé ábe nyéwōŋné, mod ké nhóg eebáŋné waáb e'noŋ é'sē, éetóméé né nyé bēn nyéchém-téné bán nyébel nē á esón é pónde, ábel bonj nyéwōŋ pónde e bwám ákáne. Bonj pen ámbíd e nē nyétǎngéné abé ámpē ngáne nyénsēbēē abé, ábel bonj Satane eépiinád nyé mekǎsen ákáb asón.

⁶ Meehóbéé nén mεé nnyágte nyé ábel nē, bonj nhóbe mεé nē dōo ébóó bán nyébel.

⁷ Mendāŋ pen mεé bad bésyāāl bēbē áde béewōŋnéé nēε mε. Bonj mod téé áwóó ndε eche Dyōb ábágé mó. Abelé donje á bad áá béwōŋ mewém-tan áwōŋ mmwaád ké'ε nchóm, ábēl-le ábínií áá béewōó'.

⁸ Bōob-pōó nláŋge nyé bad ábe béewōó bebaád ké'ε bechóm ne ábe bédé bekúd mεé, ébóó bán nyéewóó bebaád ké'ε bechóm ngáne mε-ε méewóó'ε.

⁹ Bonj pen, nzé nyéehel yál akób, mod-téé áwōŋ mmwaád ké'ε nchóm. Nhóbe nén áyāle édé mbonj mod áwōŋ mmwaád ké'ε mmwaád áwōŋ nchóm, tómaa áwōŋ esíí é ngíne áte wεé né móonwōŋ áde wéewóó'ε.

¹⁰ Bōob-pōó, ne bad ábe béwóó bebaád ké'ε bechóm, saké mε nhóbe' pen, Sánjǔ Yesue mó ahóbe'. Ahóbe nén áá mmwaád eetǎngeneé nchóm atade.

¹¹ Bonj nzé édé bán atédte nchóm, átǎngéné adyεε ésebán awóó' nchóm ampée, ké'ε bó nchóm bétím ášē. MwENCHÓM-mε eetǎngeneé nēε ánané mwaád á e'wóngé.

¹² Bōob-pōó, ne nyé bad ábe nyélyágé ášē, mε-εé nhóbe' saké Sánjǔ Yesue. Nhóbe nén mεé, mod awé adúbpé awé áwóó mmwaád awé eedúbpε bonj ákwentén áá búmō bédyεε, ane mod eéñānē' ene ndín e mmwaád á e'wóngé.

¹³ Nzé mmwaád, awé mó-ε adúbpé awóó mod awé eedúbpε awé akwenténé mó awōŋ, ane mmwaád eetǎngeneé ane mod atade.

¹⁴ Nhóbe nē áyāle nzé mod awé eedúbpε awóó mmwaád awé adúbpé, ákobnéd á'sō é' Dyōb, abé áde ádíi mod nhóg ne mmwaád awé adúbpé. Melemlem, nzé mmwaád awé eedúbpé awóó mod awé adúbpé, ane mmwaád ákobnéd á'sō é' Dyōb abé áde ádíi nhóg ne mod awé adúbpé. Nzé énkémbé nē, né bán ábe ábén bad béchyáá'é béekobnádté á'sō é' Dyōb. Bonj édé nén bán békobnad á'sō é' Dyōb.

¹⁵ Bonj pen nzé mod awé adúbpé awóó mod awé eedúbpε, bonj awé eedúbpε ahóbe áá e'wóngé é'maa nyétédé, é'maa. Nzé nē ábénlédé, mod awé adúbpé awóó kunze ádyεε nē ésebán bényágte mó ádyεε á ndáb e e'wóngé. Dyōb áhede áá syáné débē nsar ne nhóg ne aníníí.

¹⁶ Wε, mmwaád awé adúbpé Yesue, kapóg ehele ésonj alonjé áde awōŋ nchóm awé eedúbpε. Melemlem ne wε mwENCHÓM awé edúbpé, kapóg ehele ésonj alonjé áde awōŋ mmwaád awé eedúbpε.

Paale áá bad bēbē ngáne Dyōb dēmpwēdté bó

¹⁷ Bonj pen Sánjǔ Yesue amaa atíi ngáne alonjé áde syáné mod téé átǎngéné abé. Né-ōó, syáné mod téé ábē nyaa echē ámbēē áde Dyōb dēmpwēdté syáné áá débē ábē bad. Adén dyam dōo nláŋgéé mwembé té.

* 7:1 Eewóó' mmwaád, donje á kálag áwóó: eéñānád mmwaád.

¹⁸ Nzé edé mod awè bēmmad̄tē ayag boŋ ámbíd e pónđé Dyòb ápwēd wē, weéťmē e'chemléd ahíd ábe é'lúmte nén bán bēn'yág wē. Melemlem, nzé edé mod awè bēnkēn'yagkē boŋ Dyòb ápwēd wē, weémwāg-se bēyāg wē.

¹⁹ Ké bēyágé mod ké'ε béeyagéé má, nē déesaá etógnén. Chóm éche edé etógnén edii ahíd mbéndé é Dyòb.

²⁰ Mod téé ábē nyaa eché ámbēē áde Dyòb dēmpwēdtē mó.

²¹ Nzé wembé ntāŋ á pónđé eché Dyòb dēmpwēdtē wē, nén déetagtē wē. Boŋ nzé echon sán ahóbé aá wéebáá ntāŋ ámpē, ékòb áned.

²² Mod awè ambé ntāŋ Dyòb adéhób aá máp̄wēde mó adii néε kunze áyāle Sánjú Yesue ahúdé má á mehaŋ. Melemlem ne mod awè enkēmbé ntāŋ Dyòb adéhób aá máp̄wēde mó. Apwēd áde Dyòb ápwēdé má ábélé adii ntāŋ awè Krístəə.

²³ Dyòb ácháné nyé ne nkun nime ríchábé amín. Né-óó, nyéewóglán bad ábe belānge nyé mekan nime nyétāŋgéné abel.

²⁴ A-baányan, nhede meé mod téé áwòŋ alongé áde ánwōŋgē áde Dyòb ápwēdé mó.

*Paale ahóbé t̄ŋgene bekiú
ne bad ábe béewóo bebaád ké'ε bechóm*

²⁵ Bəəb-pəó, t̄ŋgene bad ábe béewóo bebaád ké'ε bechóm, Sánjú Yesue eelāngéé me chóm éche rítāŋgéné nyé aláa t̄ŋgene ádén atón. Boŋ ké nē, awōŋgen áde Sánjwéé áwōŋgéné me ábē mod awè bad bésúme nlém áyāl, mēlāā nyé dyam áde mbíí meé átāŋgéné.

²⁶ Nnyiné nēn meé ngáne ndutul edii enén pónđé, ébóó bán mod adyεε ésebán awóó' mmwaád ké'ε nchóm.

²⁷ Nzé mod amaá mmwaád awóŋ, eéťēdtē mó. Nzé mod eewóo mmwaád, eéhēde mmwaád awè áwóó'.

²⁸ Boŋ nzé mod awóó mmwaád, eébeleé mbéb. Nzé mmwaád-te awóó nchóm eébeleé mbéb. Ké nē-'ε bad ábe béwóó bebaád ne bebaád ábe béwóó bechóm békudé metake híin á alongé ádáb. Nzom eché ekás boŋ ríhób nē edii, nhede meé békudé nímén metake.

²⁹ A-baányan, chóm éche ríwémténé nyé aláa edii nén, pónđé eché déwóó á nkòŋsé edé esóŋ. Né-óó, bootyá bəəb mod awè awóó mmwaád ábíí nén aá mmwaád eésaá chóm éche étómténé etógnén abé áwē alongé.

³⁰ Melemlem ne bad ábe bésudne', bééťédé nē néε dyam áde átómténé etógnén abé. Ábe bó-'ε bédé menyinge, bééťédé nē néε dyam áde átómténé etógnén abé. Bad ábe béchane bwēm bééťédé bán bwēm ábe béchaneé bəó é'tómténé etógnén abé á alongé ádáb.

³¹ Bad ábe behíde mekan mé nkòŋsé ámbíd, béebanné nlém á yāl e nímé mekan. Áyāle mekan mésyāal nime débéléé á nkòŋsé-te chíi, mēpé á asóg.

³² Nhede meé dyamdyan déetagtē nyé nlém á abum. Mod awè eewóo mmwaád, Sánjwéé mšo ákamtanné pónđé ésyāal, ngáne ábenlé-'ε boŋ awóged Sánjwéé menyinge.

³³ Boŋ mod awè awóó mmwaád mekan mé nkòŋsé mwēn ne mwēn mšo ákamtanné pónđé ésyāal. Pónđé téé akamtan ngáne átāŋgéné mwaád menyinge awóged.

³⁴ Né-óó, akamtan mekan mébe akamtan ahóg. Mmwaád-te awè eewóo nchóm, ké'ε mwān a mwaád awè eébíí mwēnchóm, Sánjwéé mšo ákamtanné ne ngáne ábeléé mó. Mekan mésyāal nime ábeleé nime nlém rísyāal mbág áhed ábel ásanj á'só é' Dyòb. Boŋ mmwaád awè awóó nchóm mekan mé nkòŋsé mwēn ne mwēn mšo ákamtanné. Pónđé téé akamtan ngáne átāŋgéné nchóm menyinge awóged.

³⁵ Nhóbē nímén mekan mésyāal ábel boŋ méwōŋgen nyé. Meehóbéé meé nyétāŋgéné mó ahíd. Boŋ nhede meé ríwōŋgen nyé ahíd chóm éche étāŋgéné ábel boŋ nyébenle Sánjwéé ne nlém nhóg.

³⁶ Nzé mod anyiné aá mšoehnlé yāl akób ásin kóŋ mšwōŋ mmwaád awè ahóbé aá mšwóó', ákag á'só áwōŋ mš ngáne nímé mewēmtēn mēlāngé mš. Nē déesaá mbéb.

³⁷ Boŋ nzé mod amaá atii áwe nlém-tē, áde béēnyāgteé mš boŋ akóbé yāl, amadé-'ε á nlém-tē aá mšwōŋgē ane mmwaád awè ahóbé aá mšwōŋ, né abelé dyam áde áde bwām.

³⁸ Né-óó, nzé mod awóó mmwaád né abelé dyam á bwām. Mod awè mš-'ε akóbé yāl boŋ eewóo mmwaád abelé dyam áde ábóó bwāmbwam.

³⁹ Mmwaád awè awóó nchóm átāŋgéné abé ne nchóm á alongé áde ásyāal. Boŋ pen nzé nchóm awédé, awóó kunze áwōŋ mod awè ádóó. Ane mod pen átāŋgéné abé mod awè adúbpé Sánjwéé.

⁴⁰ Boŋ ne me, nnyiné meé mmwaád awè nchóm awédé, ábē menyinge nzé adyεé nē áde éewóó' nchóm ampée. Mbíí nén meé Edaádəŋ é Dyòb chóó élyágte me áhób nímén mekan.

8

*Paale ahóbé t̄ŋgene medyé
nime bébageé e' diidŋge*

¹ Βῶοβ-ρῶῶ, nhóbe tãngene medyé nĩme bad bébageé e' diidinge née mende. Edé mbále ngáne éhóbnédé nén bán "Syánē moosyál debíi dyam." Ene ndin e e' bii bé akan ebele mod abãg kũmbé. Boŋ edãnge éwéde syánē áte.

² Nzé mod awẽmtan aá móbíi dyam, ane mod eebíí' é dyam ngáne átãngéné abii.

³ Boŋ nzé mod adáṣ Dyõb, Dyõb ábelé ábii mó.

⁴ Βῶοβ-ρῶῶ, rĩhõb tãngene adyé dé medyé nĩme bébageé ediidinge née mende. Debíi nén bán e' diidinge, nédé myõb nĩme bébénlé mekáá, méesaá dyamdyam. Dyõb ahõg dẽmpen dõṣ adé.

⁵ Bad béhõbe bán myõb mémpẽe nĩme béchãgẽé bán myõb médé á nkoŋ ní mín ké'ε á nkoŋ rísé. Edé-ε mbále bán myõb nĩme bad bẽn bébénlé mekáá ne besãngwéé bé nkõŋsé hiin bédé.

⁶ Boŋ kénē debíi bán Dyõb ahõg dõṣ adé. Mó adé Titéε awé ahãgẽ chõm ésyãl, mó akáá-ε boŋ debé á alongé. Sãngwéé nhõg mwẽmpen-naá adé. Mó adé Yesu Krĩstã. Mbwiined ne mó dõṣ béchãgẽ chõm ésyãl. Mbwiined ne mó dõ-áá dédíí á nkõŋsé.

⁷ Boŋ saké moosyál abii nĩmẽn mekan. Doŋge á bad pen béménténé ábē e' diidinge edúbé abe nyaa eche káŋŋ ne chii nzé bédyãg medyé, bédii béwẽmtan bán bébage nĩmẽ myõb edúbé. Nlém méewúú' é bõ á abum, né-ṣṣó béwẽmtan bán nĩmẽ medyé mébele béesaá' é á' sõ é' Dyõb.

⁸ Ndyééd ééhẽlẽ-ε ébẽl bad bésãŋ á' sõ é' Dyõb. Deéhẽlẽ-ε debé bad bé mbéb nzé dedyéde chõ ké'ε debé bad bé bwãm áde déedyédeé chõ.

⁹ Nyétéd pøndé pen ngáne nyébẽnladté kunze echẽ ebãgnédé nyé bad bé Krĩsto. Nyébẽnlad chõ nyaa eche nyéebẽnlé se ábẽn baãnyãŋ bé Krĩsto ábe nĩmab nlém méewúú' é á abum béhún á mbẽ-te.

¹⁰ Nzé mod awé nlém méewúú' é á abum anyíné nyé ábe nyéhõbé bán nyébíi akan nyedyãg medyé á abõn áde nĩmẽ myõb, nyéebíi' é bán nén dètéd mó nlém á abum ádyé medyé nĩme bébãgẽ ábē e' diidinge née mende-ye?

¹¹ Né-ṣṣ, wε awé echãgẽ yãl wéé mod awé abii akan, ehede wéé mwãnyõŋ awé Krĩstã áwéde áwe nló áwé áyãle ábõŋ e' bii bé akan-ε?

¹² Nzé ebelé mbéb wéε mwãnyõŋ, né Krĩstã móṣ ébélé mbéb áyãle ebelé mwãnyõŋ a Krĩsto ebébtéd, ebébté-é mó nlém á abum.

¹³ Né-ṣṣ, nzé ndyééd eche ndyãgkẽ ebele mwãnned a Krĩsto ahúne' á mbéb-te, né méedyáá ene ndyééd ámpẽ mbéd, ábẽl boŋ, éébẽl se mwãnned ahún á mbéb-te.

9

Kunze e bembapεε bé nlomag ne nsõn nĩme bétãngéné abel

¹ Με, Paaε ndii mod awé awóo kunze nẽngáne bad bẽmpẽe ábe bédúbpé. Ndíi mbapεε a nlomag. Nnyíné Yesuε, Sãngwéé awéd. Nyéé nyéde nẽngáne mbakú áyãl e nsõn nĩme Sãngwéé ábélé mbwiined ne me.

² Ké bad bẽmpẽe béenyíné me nẽngáne mbapεε a nlomag, nyépen nyékobé me nén bán ndii mbapεε a nlomag. Abé áde nyédíi ne Sãngwéé nyé bẽn nyéde née e'chem ábe é'lũmte bán ndii mbapεε a nlomag.

³ Mekan nĩme nĩbelé rĩlãngẽ bad ábe béhõbe me mam áyãl médíi nén:

⁴ Séewóó' é kunze bad ábe sé ndyééd ne mmítéd áyãl e nsõn nĩme sébèle-ye?

⁵ Séewóó' é kunze átéd mmwãd awé adúbpé Krĩstã áhoon sé áke meke melemlem ngáne ábinií bembapεε bé nlomag bébele-ye? Saá nē dõṣ Sãngwéé baãnyãŋ ne Petro bébele-ye?

⁶ Sé Banabãse bẽnpen-εé sètãngéné nsõn abel átõgn echẽd yãl-ε?

⁷ Sãnze ehéé ébelé nsõn boŋ mwẽn átõgné eche yãl? Nzé-módé áwõŋ nzag e besabé boŋ eedyãg ké epum é sabé ehõg? Nzé-módé adé awé abõŋge nyag ésebãn aminε' chõ mbéii ákud mĩfĩg?

⁸ Saké á nsõŋten ní moonõŋ dẽmpen rĩhõbẽé nĩmẽn mam, mbéndé e Mose chõmpẽ ehõbé melemlem.

⁹ Ehõbe nén aá, "Weetádé nyag nsal eche esãlte ngun." Βῶοβ-ρῶῶ, nén álũmte nén bán Dyõb átédé nyag etõgné-ε?

¹⁰ Saá syánē bẽn-εé ákoŋtẽé ahõb-ε? Syánē bẽn-εé dekáṣ boŋ átélé nē. Mod awé akwεle nzag abele aá mõskũd mbote, mod awé mó-ε asãlte ngun abele nsõn aá mõskũd ngun.

¹¹ Sé bembapεε bé nlomag séwéné mekan mé e'dãdãŋ áfĩnté echẽn. Edé mbéb nzé séhẽdné nyé mekan mé nkõŋsé-ye?

¹² Nzé bad bẽmpẽe béwóo kunze áhẽden nyé bwẽn, né séwóó' é kunze áhẽden nyé bwẽn tómaa bõ-ye?

Boŋ seébenledéé enén kunze. Sékwénténé metake mésyāāl, ábel boŋ nén déékāā' akal dé nkalanj m' bwām nme sékaléé t̄ngene Krístā.

¹³ Nyébíí bwām bán bad ábe bébele nsón á Ndáb-e-Dyöb, áhed dōo bō'-é békudéé echab ndyééd. Melemlem nē dōo bad ábe bébele nsón ábe mende á menyán mé mende, áhed dōo bébelé békud akab dé mende.

¹⁴ Melemlem nē dōo Sāngwéé áhóbé aá bad ábe békale nkalanj m' bwām békud ntogén wée bad ábe békankléé nímé nkalanj.

¹⁵ Kénée edíí nē, meébenledéé enén kunze ké póg. Saá-kaá nē ákás boŋ rítelé' enén kálag ábel boŋ bébenle me nímén mésyāāl. Mēkwéntén áwé tómaa mod ábel meewóó' nzom ákum ekáá á t̄l t̄ngene nímém nsón.

¹⁶ Meewóó' é kunze ákum ekáá á t̄l áyale nkalanj m' bwām níme ríkaleé. Dyöb dēn dōo áhóbé aá mbel nímén nsón. Medim ne me nzé meékale nkalanj m' bwām.

¹⁷ Nzé mmñ-éé mempweéd nímén nsón níme ríbeleé, né nsine nsábe. Boŋ ngáne meépweéé mō, Dyöb dēn dōo ábágé me mō aá mbel.

¹⁸ Nsábe ríhée-ṽ ríkudéé? Nsábe níme ríkudéé rídii nén, nzé nkale nkalanj m' bwām meéhédné bad nsábe, meébenlādte kunze echē rítāngéné abenled akal áde ríkaleé nkalanj m' bwām.

¹⁹ Ndé ne mmñ, meésaá ásé e mod. Boŋ mbelé yāl ntāŋ a bad bésyāāl ábel boŋ bad híin bétim bad ábe Krísto.

²⁰ Ade ríbeleé nsón ne bad bé Israel, mbele mam née mod a Israel ábel boŋ bétim bad bé Krísto. Kénée edíí bán mmñ meésaá ásé e mbéndé éche Mosee, ndé byánán nhíde chō áde ríbeleé nsón áfinté e bad ábe béhíde chō. Mbele nén ábel boŋ bétimen Krístā.

²¹ Melemlem nzé mbele nsón áfinté e bad ábe béésé ásé e mbéndé é Mose, mbelé ríbelé' mam née bō. Mbele nén ábel boŋ bétimen Krístā. Nén déesaá bán meehídéé mbéndé é Dyöb. Mmñ nkoó abé ásé e mbéndé e Krísto.

²² Nzé ndé ne bad ábe ádab adúbe déewú' é áte, mbelé mbé née bō ábel boŋ bétimen Krístā. Né-ṽ, ntimé abé ngáne éboŋnédté mod téé. Mbenlad nzii ké ehéé ábel boŋ rísonj alongé áde bō donje á bad.

²³ Mbele nímén mésyāāl áyale nhede meé nkalanj m' bwām ríkanlad, ábel boŋ ríkud nnam níme nímé nkalanj nípeneé.

²⁴ Nyébíí bán bad híin bényagte mehélé boŋ mod nhóg abelé atóm baáb, ákūd-te nsábe. Né-ṽ, nyényagte ábel boŋ nyékud nsábe.

²⁵ Mod ké ahéé awé aboŋsan ányagde mehélé abelé ásūdéd yāl. Abele nén ábel boŋ béwáad mō ekoté é edúbé e mbonja. Echē ekoté éebemeé, ébēb. Boŋ nsón níme sébeleé, sébele mō ákud nsábe níme mébē á ngíndé ne á ngíndé. ²⁶ Nē ákás meényagtéé kéchán, meeluméé-é ábēm e'chog kéchán.

²⁷ Né-ṽ, nwéde yāl áte, nsudte-'é chō ábel boŋ ébel kéchéé éche ríhedeé me ébel. Mbele nén ábel boŋ meémaā bad bēmpēe nkalanj m' bwām akale boŋ mmñ meékūde nsábe.

10

Paale aá bad bébenlād myöb mé metóm

¹ A-baányan, ndāó meé nyékamten ábēd betaa ábe Mosee ályágté'áá áde bébidé á Egipto. Dyöb dénlómē bō mbag echē élyágté'áá bō. Bō moosyāāl bēmpōŋj á edíb é nkwe te ésebán béhóó'.

² Aponj áde bēmpōŋgé á edíb é nkwe-te ne abé áde bémbēé ásé e mbag dēmbēl bēnkūd edusen, béhíde-'é Mosee.

³ Bō moosyāāl bēndyē ndyééd e edāódaŋ eche Dyöb dénlómē bō mbwiined ne menyáké.

⁴ Melemlem bēmmwē-é mmítéd mé edāódaŋ níme Dyöb dénlómē bō mbwiined ne menyáké. Bēmmwē mendíb níme Dyöb dēmbenlé boŋ mébid á ndim e aláá-te echē embé ne bō. Ene ndim e aláá ebédéé Krístā. *

⁵ Boŋ kénē Dyöb dénkēnwógēnné bō bad híin menyinje. Nē dénkāŋ anwúú bō, ndim ríhéntéd bō áte á ehyánje.

⁶ Bōob-pōó, nímén mekan mésyāāl médii nēngáne eláŋsén ásim syánē etúu áte, nén deewóó nlmé ábel mbéb ngáne bébelé'áá.

⁷ Nyéébnlé myöb mémpēe ngáne bō donje á bad bébenlé'áá. Eténlédé á kálag e Dyöb nén bán, "Abé bad bēndyē ásé, bēdyāg bwēm, bēmwāg mīm, bébelé-'é mbinde é mekan."

⁸ Syánē deekábé mesón ngáne bō donje á bad bébelé'áá. Nén dēmbēl Dyöb dénkāgsēn bō, bō bad móom mé e'kálé mébe ne e'kálé é'láán bēwé epun ehóg.

⁹ Syánē deekāgē Sāngwéé ngáne ábēd betaa bēmbenlé boŋ nyō éwúú bō.

* **10:4** Ene ndim e aldá ebédéé Krístā: Bad bé Israel bēmbíí bán ndim e aláá embé ne bō ngáne békáge'áá á ehyánje. Paale aá ene ndim e aláá ebédéé Krístā, Krístā-'é abédé ne bō.

¹⁰ Syánê deenyonñád Dyöb áte ngáne bós donje á bad bébéle'áá. Dyöb dénlöm ángel e kwééd ewtúú bós.

¹¹ Mmén mam mésyāal mēmbenléd ábel mébê nēngáne elánsén wée bad bémpēe, bēntēl-le mós ášé áším syánē etúú áte. Syánē dedé bōb á póndé echē nkōñsé nkwógé apé á asóg.

¹² Né-ós, mod a Krísto ké ahéé awē awémténé áá mótyēēmē á adúbe-tē átéd póndé ábel boñ eékwāg.

¹³ Mekāgsen ké méhéé níme métáné wē, médií nyaa e mekāgsen echē etáne bad bémpēe. Boñ Dyöb áwóó nlém nímé bad béhele-se bésúm mós nlém á yāl, éemwaa'áa'-e áá ékud mekāgsen níme métómé wē. Póndé echē mekāgsen mépéé, ábēl ebíd mós áte, abe áde ábéé wē ngíne átóm mós áte.

*Paale ad bad béetāngeneé
ake á ngande é myöb mémpēe*

¹⁴ Né-ós, a-baányan, nyéēbenlé myöb mé metóm.

¹⁵ Nhósbe áwēn nēe bad ábe mbíí mēé bēwóó debyéé. Nyébēn nyédol áte chōm éche nlanggé nyé.

¹⁶ Póndé eche syánē ábe dedúbpé démiidēé mbwendé mí mīm nhóg, debage Dyöb nságnén níme Krístaa. Melemlem ne ewele éche débelé déladné ádyé, debelé dedyé yāl echē Krístaa.

¹⁷ Ngáne édií bán ewele édií ehóg, kénéé syánē débúú áte, dedíí yāl póg, áyāle melemlem mé ewele móó déqyāgkē.

¹⁸ Nyéñone bad bé Israel, bad ábe bédyāg medyé níme bébágé nēngáne mende á menyán, bōmpē bēlatan á menyán mé mende ábe Dyöb edúbé.

¹⁹ Cheé ríko'o'é ahób hén? Nhósbe mēé e'diidinge ábe bad bébágéé mende, ne nímé mende níme bébágéé, bédé dyam-e?

²⁰ Aáy, chōm éche ríhóséé édií nén mēé, mende níme bébágéé á menyán níme bad ábe béedúbpe Dyöb, saké Dyöb dáó bébágéé mós, e'daádan bé mbéb bós bébágéé. Meéhēdēē mēé nyéwōñ dyamdyam abel ne e'daádan bé mbéb.

²¹ Nyéēhēlē-se nyémíidē mbwendé níme Sāngwéé nyémíidē-ē níme e'daádan bé mbéb. Nyéēhēlē-se nyéladné' ádyé ndyééd á menyán mé mende níme Sāngwéé, nyéladné-ē ádyé á menyán mé e'daádan bé mbéb.

²² Dehede Dyöb kónjí ahé áte-ye? Dewēmtan bán dedé ngíne tómaa mós-ye?

Kéchéé éche débēlé débēl chós ábe Dyöb edubé

²³ Bad béhósbe nén bán "Dewóó kunze ábel kéchéé éche dédáás abel." Nē áde mbále, boñ saké chōm ésyāal ébóó abel. "Dewóó kunze ábel kéchéé éche dédáás abel", boñ saké chōm ésyāal épēene nsyāñ.

²⁴ Nyé modmod eēhēdē chōm éche épiinad mwēmpēn bwám boñ nyéhede chōm éche éwōñgan bad bémpēe.

²⁵ Nyéwóó kunze ádyé kéchéé éche nyéchéané á dyon-tē áde nyéesedteé dyam áde débēl boñ nlém nkāgléd nyé á abum tāngene éche chōm éche nyéchéané.

²⁶ Eténlédé á kálag e Dyöb nén bán, "Nkōñsé ne chōm ésyāal éche éde áwēd-te bédíí ábe Sāngwéé."

²⁷ Nzé mod awē eedúbpe Dyöb alébpé wē áhye dé adyé ndyééd, boñ etíidē wéé mókag, edyé kéchéé éche ábágé wē ésebán esedte mós dyamdyam tāngene ene ndyééd. Nlém méekāglád wē á abum áseded dyam tāngene ene ndyééd.

²⁸ Boñ nzé mod alángé wē áá "Enén ndyééd bēmbē chós nēe mende wéé e'diidinge," weedyāg chós áyāl echē ne ábel boñ nlém méekāglád modmod á abum.

²⁹ Nédē, saké ngáne nē débēnlé boñ nlém nkāgléd wē á abum boñ bwāmbwam ngáne nē débēnlé boñ aníñí mod átagé áte á nlém-tē. Cheé ékōñ boñ nlém nímé nkāglád mod ampéé á abum mbēl boñ meēbnlad kunze echē ebāgnédé mē?

³⁰ Nzé mbágé Dyöb meságnen áyāle ndyééd echē ábágé mē, chán édií bán mod ampéé ahele áhābē mē mam mé mbéé áyāl, áyāle mbágé meságnen.

³¹ Né-ós, kéchéé éche mod ábéléé, ké ádyāg ké ámwāg, ábele chós ésyāal nyaa echē ebage Dyöb edúbé.

³² Nyébele chōm téé nyaa echē éepeénné mpuutéd, ken wéé bad bé Israel, bad ábe béesé bad bé Israel, ké'ē mwembé ní Dyöb.

³³ Nyébele mam melemlem ngáne mbéleé. Nwane áte áwóged mod asyāal menyñge áyāl e chōm téé éche mbéleé. Meébēlē chōm éche ébōñnéde mē boñ mbele chōm éche ébōñnéde moosyāal, ábel boñ Dyöb ásonj alonjé á moosyāal.

11

¹ Né-ós, nyéhíde' nímēm mbéltéd ngáne mē-ē ríhídeé mbéltéd níme Krístaa.

Paale ahósbe tāngene akúten dé nló á mwembé-te

² Bɔɔb-pɔɔ, nkene nyé áyále nyékamtan me pónde ésyáál, nyéhide-'e elem éche mén'yágēdtē nyé.

³ Boŋ ndáa méé nyésòŋten nén bán Krístaa mó adé nló ámín e baachóm bésyáál, mwénchóm-me abé nló ámín e mwaád. Dyòb dɔ-'aa adé nló ámín e Krístaa.

⁴ Mwénchóm ké ahéé awé akáñne' ké'e ahóbe mekan á òŋ á Dyòb boŋ akútén nló, awógte Krístaa awé adé nló ámín eché e'són.

⁵ Mmwaád-te awé akáñne' ké'e ahóbe mekan á òŋ á Dyòb boŋ eekútene nló, awógte nchóm awé adé nló ámín eché e'són. Nhəŋlén ké nhóg méesaá áfinté ene ndín e mmwaád ne mmwaád awé akáñné nló.

⁶ Mmwaád awé eekútán nló, émbē mboŋ né ankəŋ mó ngen póg. Ngáne edíí-'aa dyam dé akwágké mmwaád ákəən nló ké'e áseŋen nyon, bebaád békútan mímab nló.

⁷ Mwénchóm eetəŋgeneé nló akúten ngáne edíí bán ahəg áde Dyòb áhəgé mó á nwágén míme álumte éche edúbé. Boŋ ahəgé mmwaád álúmed edúbé é mwénchóm.

⁸ Dyòb dénkənhəgénné mwénchóm mmwaád, boŋ anhəgén mmwaád mwénchóm.

⁹ Saá-kaa mmwaád ankəŋ boŋ Dyòb áhəgé mwénchóm boŋ mwénchóm mó ankəŋ boŋ Dyòb áhəgé mmwaád.

¹⁰ Ayál e enén nɔwɔm mmwaád átəŋgéné nées áwóó e'chem á nló ábel boŋ ángel ényín.

¹¹ Kénē-'e, ngáne dedíí nhóg ne Səŋgwéé, mmwaád éhəŋlén-se abé ésebán mwénchóm, mwénchóm-me éhəŋlén-se abé ésebán mmwaád.

¹² Edé nē áyále Dyòb dénhəgén mmwaád mwénchóm, nē dɔ-'aa mmwaád-te áchyáá'é mwénchóm. Boŋ bwēm é'syáál é'huú ne Dyòb.

¹³ Nyébēn nyénon áte, mmwaád átəŋgéné akáne á elad é bad bé Dyòb áde éékuteneé nló-ye?

¹⁴ Nyaa eche Dyòb áhəgé bad chēn eelúmtéé nén bán edé akwágké mwénchóm áte de esid ékwog mó á nló bwəmbwam-e?

¹⁵ Boŋ nzé esid échábé mmwaád ébele aboŋ. Dyòb ábəgé mó esid nées ekúten é nló.

¹⁶ Nzé mod ahéde ádén bán nyam apentén, chóm ésyáál éche níwóó ahób edíí nén méé, syáné ne mwembé ní Dyòb ísyáál, deewóó'é nyaa empée eche débéléé nímén mekan, mwembé ní Dyòb-pe méewóó'é.

Ndyéed e Səŋgú

(Mat 26.26-29; Mak 14.22-25; Luk 22.14-20)

¹⁷ Boŋ təŋgene nímén mekan míme nílanŋeé nyé bɔɔb, mééhəŋlén-se níkené nyé áyále nzé nyébómé ábele Dyòb, mekan mé mbéé móo nyébéléé saké mé bwám.

¹⁸ Dyam dé'sò, nwógé bán nzé nyébómé nées mwembé, nkabén míbeléé mbé áfinté echēn, ndúbpe-'e nén méé kapóg nē adé mbále.

¹⁹ Nkabén nítanŋéné abé áfinté echēn pen, ábel boŋ bad ábe békoo Dyòb ahíd bényínned.

²⁰ Né-ɔɔ nzé nyébómé nəngáne elad é bad bé Dyòb, saké Ndyéed e Səŋgú nyédyágke.

²¹ Ayále nzé nyébómé ádyé Ndyéed e Səŋgú, mod téé adyág eche ndyéed ésebán asine waáb, nē ábele baahóg bébág nzaa, ábíní-'e mím mékób bɔ.

²² Nédé edé nén bán nyéewóó'é nímen mendáb míme nyétəŋgéné medyé adyé nyémwəg-ke mím áte-ye? Ké'e nyenyíne' bán mwembé ní Dyòb méesaá dyamdyam, nyékwəgtē-'e bad ábe béewóó chóm éche bédyágkē? Cheé nyéhedeé bán nílaa nyé təŋgene ádén akan? Nyéhede bán níkene nyé-ye? Meéhəŋlén-se níbel nē.

²³ Nhóbe nén áyále chóm éche Səŋgwéé án'yəgēdtē me chɔɔ me-'e nílanŋé nyé nén, nímé nkuu dēn áde békíí Səŋgú Yesue ntúré, antéd ewele,

²⁴ asəgnén Dyòb, ákáb chɔ áte, áhəbē aá, "Echem yál nén, ebəgnédé ayál echēn. Nyébele nén ákamten me."

²⁵ Ade bémáá ndyéed adyé ambəl melemlen ne mbwendé ní mím. Anhób aá, "Mmén mbwendé ní mím ndíí melé mékɔsɔlé mé Dyòb míme nímem mekíí mósgténé. Nyébele nén pónde téé ákamten me."

²⁶ Nén álumte nén bán pónde téé eché nyédyágkē échén ewele nyémwəg-ke nímén mím, nyékale kwéed eche Səŋgwéé káŋŋ ne á pónde eche ápeé.

²⁷ Né-ɔɔ, kénzée awé adyág échén ewele, ámwəg-ke nímén mím nyaa eche éebəgé Səŋgwéé edúbé né abelé mbéé təŋgene yál ne mekíí míme Səŋgwéé.

²⁸ Né-ɔɔ, mod téé ásebe ásimen yál boŋ ádyé ewele, ámwē-'e mím míme Səŋgwéé.

²⁹ Nyébel nē áyále kénzée awé adyág éché ewele ámwəg-ke nímé mím, boŋ eékoo ahé á nílé-té aá yál eche Səŋgwéé chɔ edé, ákudtéd yál nkógsen adyé áde adyágkē éché ewele, ámwəg-ke nímé mím.

³⁰ Nē dɔɔ akás boŋ nyé bad híin nyéchiitéd, nyékonlé-'e, donŋe-'e bəwédé.

³¹ Boŋ nzé syáné desébpé yál akáaad, né Dyòb déekógsénné syáné.

³² Bonj Sánjgwéé akáadte, akógsan-ne syánē áyāle mewusé nīme débélé ábel bonj eebáá syánē áyāl áde akáádtē nkòñsé.

³³ Né-òó, a-baányan, nzé nyèlādne ádyé ndyééd e Sánjú, désinē nhóg ne aníníí.

³⁴ Nyé ké ahéé awè nzaa ékóbé, adyé ndyééd á ndáb, ábel bonj nzé nyèlādne weébélé akan áde débél bonj Dyób akáád we. Tāngene mekan mémpēe, nzé mpedé, dáo mélāā'ē nyé ngáne nyétāngéné ábel.

12

Nde eche éhúú ne Edáádān eche Esáá

¹ Bóob-póó a-baányan, ndáá meé nyébii mbále tāngene nde eche Edáádān eche Esáá ébageé.

² Nyébii nēn bán áde nyenkembíí'ē Dyób, béntéd nyé nlém á ábum, bépānéd nyé nzii ábele myób nīme mééhābē akan.

³ Né-òó, ndáá meé nyébii nēn bán modmod awè Edáádān é Dyób élyágtē, ééhēlē-ē-se ahób aá, "Ebómán ne Yesue." Nē dō-'aá modmod ééhēlē-ē-se ahób aá, "Yesue adii Sánjgwéé," étómēé nē Edáádān eche Esáá élyágtē mō.

⁴ Nde édé nyaa ne nyaa, bonj melemlēm mé Edáádān mōó mébage échē nde.

⁵ Nyaa eche déhéle débél nsón í Dyób édé nyaa ne nyaa, bonj melemlēm mé Dyób mōó bébēnlé.

⁶ Ngude eche débēnlé nsón édé nyaa ne nyaa, bonj melemlēm mé Dyób mōó débēnladté áde debyéé ábel nsón.

⁷ Mod-téé akudé chóm eche Edáádān élyágtē mō ábel, nē ádé-'e á mbonj í moosyáál.

⁸ Edáádān élyágtē mod nhóg áhób dyan ne debyéé, melemlēm mé Edáádān mélyágtē aníníí mod áyáged bad ne debyéé.

⁹ Melemlēm mé Edáádān nīme mébele bonj mod nhóg awónj adúbe aá Dyób débél dyan áde áhóbé aá ábel bóob ábēl-'e dó, nīmē melemlēm mé Edáádān mōó mébage aníníí mod ngíne áchood bad.

¹⁰ Echē Edáádān ébage mod nhóg ngíne ábel mekan mé menyáké, ábēl-le aníníí álāngē bad mekan á dīn á Dyób. Cháo ébágé-'e bad bēmpēe debyéé ásoñtēn ké chóm eche mod áhóbéé ké'e ábēlé éhúú ne Edáádān é Dyób ké'e éehúu'ē. Melemlēm mé Edáádān mébage mod nhóg debyéé áhób mehób mémpēe, ábē-'e aníníí debyéé átóge mehób nīme ábē bad béhóbéé.

¹¹ Melemlēm mé Edáádān mōó mébele nīmēn mekan mésyáál, ábage mod téé echē nde ngáne ádásá.

Elad é bad bé Dyób édii nēe

yāl póg eche ewóó pág hīn

¹² Yāl édii póg bonj ewóó pág hīn. Kénéé édii-'aá bán yāl édé pág ne pág, edii yāl póg. Melemlēm nē dáo édii ne Krístā.

¹³ Melemlēm nē dáo syánē moosyáál, bad bé Israel ne bad ábe béesē bad bé Israel, betān ne kunze, Edáádān ehóg ébélé dekudé edusen bonj debé pág eche ébélé ene yāl póg. Dyób áhédé-'e syánē melemlēm mé Edáádān á nlém-té.

¹⁴ Saké pág póg chó ebelé yāl e moonyon, bonj pág hīn.

¹⁵ Nzé ekuu éhele-se éhób aá, "Ayāle nēn meésaá ekáá, meésaá á yāl e moonyon," nēn déélúmté bán éesaá á yāl e moonyon.

¹⁶ Nzé etúu-'e éhele-se éhób aá "Ayāle meésaá did, meésaá á yāl e moonyon," nēn déehelé-se álúmed bán éesaá áyāl e ene yāl.

¹⁷ Nzé yāl esyáál embé did dēmpēn, né chán ámwagké dyan awóg? Nzé yāl esyáál embé etúu chēmpēn, né chán ámwagké chóm elod awóg?

¹⁸ Bonj édé nēn bán Dyób ábānné pág téé á yāl e moonyon ngáne ádásá.

¹⁹ Nzé pág póg chó yāl e moonyon émbēē, ne béechagké chó bán yāl.

²⁰ Edé nēn bán pág édé hīn bonj yāl póg chó ewóó chó.

²¹ Né-òó, did déehelé-se áláá ekáá aá, "Meetógnēé we." Nló-'e méehelé-se ríláá mekuu aá, "Meetógnēé we."

²² Etímé anyínned pēn nēn bán pág é yāl eche dényíné bán éesaá dyan dyan chó étómténé etógnén ábē.

²³ Pág é yāl-le eche dényíné bán éewóó'ē edubé chó débageé edubé bwāmbwam. Eche dényíné-'e bán éeboó'ē álúmtēn, chóó dékoo'ē anōn.

²⁴ Pág échē ébóó álúmtēn chó-'e étógnēé échén pág. Dyób ábélé yāl e moonyon nyaa echē pág eche ényínnad byánán éesaá etógnén, chóó débageé edubé bwāmbwam.

²⁵ Ábélé nē ábel bonj nkabén méébāg á yāl e moonyon, bonj pēn pág téé éwōngan waáb.

²⁶ Nzé pág e yāl póg etage, échíníí esyáál chómpé ébélé étage'. Nzé pág póg ekudé mekanag, échíníí ámpé ébélé éwógnén mō menyíngē.

²⁷ Né-òó, nyé moosyáál nyédii yāl échē Krístā, nyé mod téé-'e nyédii pág échē ene yāl.

²⁸ Dyòb ábágé bad nsón á mwembé-te nyaa ne nyaa. Asébpé abelé baahóg bembapɛɛ bé nlómag, ámbíð ené, ápwɛdɛ bekal bé'daádɛn boŋ apwɛdɛ-ɛ bemeléede. Ampwɛd-ɛ bad ábe ámbɛé ngíne ábel menyáké, ápwɛd bad ábe ábágé ngíne áhood bad, ápwɛd bad ábe béwɔŋgan bad, ápwɛd bad ábe ábágé debyéé ályáged bad, ápwɛd-ɛ bad ábe ábágé debyéé áhób mehób mé bad bémpɛe.

²⁹ Saké bad bésyáál bédé bembapɛɛ bé nlómag, saké bad bésyáál bédé bekal bé'daádɛn, saké bad bésyáál bédé bemeléede, saké bad bésyáál bédé bebel bé menyáké.

³⁰ Saké bad bésyáál Dyòb ábágé ngíne áhood bad, saké bad bésyáál Dyòb ábágé debyéé áhób mehób mémpɛe. Saké bad bésyáál Dyòb ábágé debyéé átóge mehób mémpɛe.

³¹ Nyébane nlém áyál e nde éche etómténé etógnén abé.

Kénɛ-ɛ meéðíi nlóméd nyé nzii empée eché etómténé aboŋ tómaa échíníí.

13

Edé etógnén ádɛn bad

¹ Nzé nhóbe mehób mé baányoŋ ne mé ángel boŋ meédəə baányoŋ, ehób échəm éðíi néé nkán níme níbele ntɔgag ké'ɛ ngán eché békuméé.

² Nzé mbyéé' nkalaf ní Dyòb akal, nzé nsòŋtan mekan mé e'koŋnéð mésyáál, nwóó debyéé ásyáál, nwóó-ɛ adúbe áde níhele-se nhób meé mbəəd ehəŋɛn e'dii, boŋ meédəə bad, né meésáá dyamdyam.

³ Nzé mbage bad chòm ésyáál éche níwóó, nkwěnténé-ɛ ábe echem yál meé béhyád, áde méedəə'ɛ baányoŋ, bwám é'héé né ábélé me?

⁴ Mod awé adaás bad, abelé áwəsán, álúmté-ɛ e'boŋ bé nlém. Eesíðéé bad, eésáá kúmbe.

⁵ Mod awé adaás bad, eebággé ewaŋge, eéhədtɛɛ eche yál chəmpɛn bwám, eewámsánné alíŋ, eékoŋgé-ɛ mekan mé mbéb á nlém-té.

⁶ Mod awé adaás bad, eewógnéé mekan mé mbéb menyíŋge, mekan níme métəŋgné mɔ́ áwógné menyíŋge.

⁷ Mod awé adaás bad, akobe mekan mésyáál, adúbpe mekan mésyáál, awóó' e'lyág bé nlém pónðé ésyáál, ákaá-ɛ nlém pónðé ésyáál.

⁸ Edəŋge ééwɔ́'ɛ asóg. Ahób dé mehób á ðín á Dyòb dépɛ́ á asóg, ahób dé mehób mémpɛe, ámaa, debyéé-ɛ áde mod áwóó'ɛ, ápɛ á asóg.

⁹ E'bíi bé akan ábesyáné béélónéé mbon, akal áde sékaléé nkalaf ní Dyòb, séélónéé mbon.

¹⁰ Boŋ áde mekan níme melóné mbon mépɛé, mekan níme méelone mbon mépɛ́ á asóg.

¹¹ Ade níbédé mwéndem nhób'áá néé mwéndem, níwém mewémten mémbɛɛ mewémten mé mwéndem, ndolé-ɛ akan áte néé mwéndem. Boŋ bəəb áde níðíí mod ambáá, ntéðtɛ́ abé á mwéndem.

¹² Denyíne chòm bəəb nɛŋgáne á ebudbud-té á dyené-te. Boŋ ámbíð e pónðé, syáné dényín Dyòb, syáné ne mɔ́ dénonné-ɛ e'só ne e'só. Meébudeé Dyòb asòŋtan bəəb bwám, boŋ pónðé eche ehúé' mészòŋtan mɔ́ melemlen ngáne mɔ́mpɛ́ ásòŋtənné me bwám.

¹³ Né-ə, metəte meláán médé; áwóŋ adúbe, áwóŋ e'lyág bé nlém ne áwóŋ edəŋge. Boŋ atəte áde átómténé etógnén abé áfínté e níwém meláán, ádíí áwóŋ edəŋge.

14

Nde empée eche ehúú ne Edəədɛn

¹ Nyéwan áte ádɛn bad, nyéwɔŋ-ɛ nlém áte ákud mende níme Edəədɛn ébageé nyé, bwámbwam áláa bad mekan á ðín á Dyòb.

² Mod awé ahóbe mehób mémpɛe eehóbéé wée bad boŋ wée Dyòb dɔ́o áhóbéé. A mbále, modmod eesòŋtənné mekan áde áhóbéé. Kénéé ngíne e Edəədɛn élyágtɛ́ é mɔ́ áhób mekan, bad ábe álanɡéé níwéméé, ne bɔ́, níwéméé mekan médíí mekan níme mod eesòŋtənné.

³ Mod awé ahóbe mekan á ðín á Dyòb, ahóbe mɔ́ áwóŋgen bad áwúu áte, áwéd bad nlém á abum ne áhóðed bad nlém á abum.

⁴ Bad ábe behóbe mehób mémpɛe béwɔŋgan échab yál boŋ bad ábe behóbe mekan á ðín á Dyòb behóbe mɔ́ áwóŋgen mwembé nísyáál.

⁵ Ndə́ meé nyé moosyáál nyéhóbe mehób mémpɛe, boŋ métómtən adəŋ meé nyéhóbe mekan á ðín á Dyòb. Mod awé ahóbe mekan á ðín á Dyòb, atómé mod awé ahóbe mehób mémpɛe, éetóméé né atókke' chòm éche áhóbéé ábel boŋ áwóŋgen mwembé.

⁶ Né-ə, a-baányan, nzé mpedé áwɛn boŋ nhóbe mehób mémpɛe, né chán méwóŋgənné nyé? Meéhélɛɛ-se nwóŋgné nyé ké mwátiíd, nzé meépeene dyam áde Dyòb álúmté me, ké'ɛ dyam áde níbíí, ké'ɛ áhób mekan á ðín á Dyòb, ké'ɛ dyam áde méyágedtɛ́ nyé.

⁷ Déttéd elon ne ndíŋgé, bwém ábe béesé á alongé ábe bébenladtɛ́ ákum mesíke. Chán mod áhele se abíí nkánɡé níme békónéé nzé béekumé mɔ́ bwám.

⁸ Nzé mod ahede elonj atónj éche élad bad áke á bel, bonj eetóo chó bwám, né chán áhèle ábel bonj bébõnsen áke á bel?

⁹ Nê dáo édíí ne nyé ámpê. Nzé nyéhede mehób mémpêe ahób bonj nyéhóbe mekan nime méewóo nsõnten, nzé mod eebíi dyam áde nyéhóbeé, né nyéhóbe nêngáne epub éche étóme’.

¹⁰ Mehób médé á nkõns-te nyaa ne nyaa, ké ehóg-ke éesaa éche éewóo nsõnten.

¹¹ Bonj nzé meebíi ehób éche mod áhóbeé, mod awé ahóbe chó ábê nken áwém, me-’é mbé nken áwê.

¹² Ngáne nyéhedeé bán nyébele mekan nime Edaádaj é Dyób élyágteé nyé ábel, nyéwane áte nyébele’ nime mébele bonj mwembé ríkwogé bwám.

¹³ Né-óó, mod awé ahóbe mehób mémpêe atánjéné akáne ábel bonj Dyób ábel mós átóge chõm éche áhóbeé.

¹⁴ Ayále nzé nkãnné’ ne ehób émpêe, échêm edaádaj chós ékãnné, bonj mmên meebyéé’é chõm éche ríhóbeé.

¹⁵ Chee-õ rítánjéné ábel? Ntánjéné akáne ne échêm edaádaj, nkáne-’é ne nímém nlém. Mëkõnê nkánjé ne échêm edaádaj, ríkõnê-’é ne nímém nlém.

¹⁶ Nzé ebenlad échõj edaádaj ábe Dyób mekenag, chán mod a ngên awé adé ásé, áhõbpé aa, “ébé nê” áde éesõnteneé dyam áde éhóbeé.

¹⁷ Ehele-se ékené Dyób bwám bonj dyam áde éhóbeé déewõngãn mod awé alyagé ásé ne awõngen dên.

¹⁸ Nságnan Dyób nén méé nhóbe mehób mémpêe tómaa nyé bad bésyãl,

¹⁹ bonj kénê, nzé dedé á mwembé-te, mëdãj méé ríhób metote métaan nime máwõj nsõnten, ábel bonj bad béyáge, tómaa áhób metote ekálé dyóm nime méewóo nsõnten.

²⁰ A-baányaj, nyéewóó’ mewémten mé bëndem. Nyébê pen néé bëndem ábe béebíi chõm éche mbé rídíi. Bonj á mewémten nyébê néé bad ábe békwógé.

²¹ Eténlédé á kálaj e Dyób nén bán me Sãngwéé nhóbe nén méé,

“Mëbelén bad ábe béhóbe mehób mémpêe ahób wée ábém bad.

Mëbelén e’bêb é’ beken bé bad, bonj ké ábém bad béewógénné me.”

²² Né-óó, ahób dé mehób mémpêe ádíi e’chemléd ne bad ábe béedúbpe, saké ne bad ábe béedúbpe. Ahób-pe mekan á ðín á Dyób ádíi e’chemléd ne bad ábe béedúbpe, saké ne bad ábe béedúbpe.

²³ Nzé bad bésyãl béhóbe mehób mémpêe áde bédíi á mwembé-te, bonj donje á bad ábe béesõntene mekan mé Dyób ké’é bad ábe béedúbpe Krístæ béssólé, béehóbpé bán nyèpag mìn-é?

²⁴ Bonj nzé bad bésyãl béhóbe mekan á ðín á Dyób, bonj donje á bad ábe béesõntene chõm éche béhóbeé ké’é bad ábe béedúbpe Krístæ béssólé, awóg áde béwõgkê nkalanj rí Dyób, débêl bébíi bán bébele mbé, békwédé nkáá á’sõ é Dyób.

²⁵ Mmê nkalanj mhũd bó mekan nime bènkoó’ é á nlém-tê. Békwe-’é ásé, bébagé Dyób edúbé béhóbe nén bán, “Ne mbále, Dyób adé áfinté echên.”

Paale ad mpuutéé mébãg á mwembé-te

²⁶ A-baányaj, chõm éche ríkoo’ é ahób édíi nén, nzé nyélãdné á mwembé-te, mod nhóg ábelé awõj nkánjé, ampée-’é awõj chõm éche áyágteé, ampée awõj dyam áde Dyób álúmte mós, ampée awõj dyam áde áhõbpé á ehób émpêe, ampée-’é abé awé atógke mehób mémpêe. Nyébele nímén mésyãl áwõngen mwembé.

²⁷ Nzé bad béhóbe mehób mémpêe, bad béehóbé tómaa beláán, bó mod téé áhóbé ámbíd eche waáb ámáá ahób. Mod-te atánjéné abé awé atógke chõm éche béhóbeé.

²⁸ Bonj nzé mod eésé awé atógke’, mod awé ahóbe mehób mémpêe, atánjéné néé ádíbé nsal, áhóbé áwe nlém-tê ne wée Dyób.

²⁹ Ade bad bébe ké’é beláán belãngeé bad mekan á ðín á Dyób, ábíníi bad betánjéné béwõglãn ábíi ké chõm éche béhóbeé étánjéné.

³⁰ Bonj nzé mod adé á mwembé-te awé akudé nkalanj nime Dyób álúmte mós, mod awé ahóbe akan ásóg ahób.

³¹ Nyé moosyãl nyélãnge bad mekan á ðín á Dyób nhógé-nhógé ábel bonj mod téé áyáge, nê áwéde-’é mod téé nlém á abum.

³² Nde echê Edaádaj ébageé bad áláa bad mekan á ðín á Dyób, edii nde éche mod awé ahóbé nímé mekan áhèlese ákamlén.

³³ Dyób déesaa Dyób áde ápeene mpuutéé, nsalj móó ápeeneé.

A mwembé m bad bé Dyób rísyãl,

³⁴ bebaád bédib nsal nzé bédé á mwembé-te, betánjéné abé ásé e baachóm ngáne mbéndé e Mose éhóbeé.

³⁵ Nzé dyam áde áde bédáá abii, bésédéd ábab bechóm á ndáb. Ayāle éde akwágkē mmwaád áhób dyam á mwembé-te.

³⁶ Nyé bad bé Kōrinto, áwēn dōo eyale é Dyōb émbídtē-yē? Awēn dēmpēn-éé eyale é Dyōb émpēé-yē?

³⁷ Nzé mod anyīne yāl áá módē mod awé alānge bad mekan á dīn á Dyōb, ké'ε áá móswōō nde eché ehúú ne Edáádān, átāngéné abii áá dyam áde rītenléé nyé ádíi dyam áde Sāngwéé áhóbé áá nyébel.

³⁸ Bōn nzé ahóbe áá móshídté nīmén mekan nyéhúd mó mīd áyāl.

³⁹ Né-ōó, a-baānyan, nyébane nlém áláa bad mekan á dīn á Dyōb, bōn nyéekáá bad áhób mehób mémpēe.

⁴⁰ Nyébele mekan mésyāāl bwām, nyébele-'ε mó nyaa eché etāngéné.

15

Mpuu nīme Yesu Krīstāa

¹ Bōōb-pōó, a-baānyan, nkamtan nyé nkalan mī bwām nīme mēnkáléé nyé. Nyēnkob mó, mībélé-'ε nyésūmnédé áyāl e adúbe áde nyéwóó.

² Nzé nyédii nyéchānnédé áyāl e nīmē nkalan nīme édíi bán móo nīpēene e'soóson, né nyéēkūd e'soóson, éetóméé né adúbe áde nyédúbpé Krīstāa, dō-ε áde ngēn.

³ Menkalé nyé nkalan nīme mēnkudté, mó-'áá rītóméné etógnén abé. Mmē nkalan, rīde nēn bán Krīstāa anwé á nló nīmēd ngāne éténlédé á kálag e Dyōb.

⁵ Anlúméd Petro yāl, bōn ámbíd e pōndé anlúméd-te ábíníi bembapēe yāl.

⁶ Ámbíd enē, tómaa mbwókēl é bad étāan ábe béhíde'áá mó anlúméd bō yāl alúmed ahóg. Ábē bad híin bédii bédé á alongé chii, donje-'ε bémáá awé.

⁷ Ámbíd e pōndé anlúméd Jemse yāl, bōn alúméd-te ábíníi bembapēe bé nlómag bésyāāl yāl.

⁸ Káāne á asóg anlúméd mémpē yāl, kénéé édíi bán ndii mod awé bēnchyāā'ε á pōndé eché bad bēnkēmbíi'ε bán bēchyāa.

⁹ Nhóbe nēn áyāle áfnté e bembapēe bé nlómag bésyāāl, méé ndé mbapēe awé éesē etógnén. Meékwoonedéé áchāgned ké néé mbapēe a nlómag áyāle menhé bad bé mwembé rī Dyōb á meséb.

¹⁰ Bōn nsimé rī Dyōb mībélé ndé chōm éche rīdíi. Mmē nsimé nīme Dyōb ábagé-'ε me, méesaá ngēn. Bōn pēn mbelé nsón tómaa ábíníi bembapēe bé nlómag, kénéé édíi bán saké mmēn mbélé'áá nīmē nsón, nsimé rī Dyōb móo mībédé ne me.

¹¹ Né-ōó, ké émbē bán méé nkanlé nyé nīmén nkalan, ké'ε bembapēe bé nlómag ábíníi bōo békálé mó, chōm ehóg chōo syāábōo moosyāāl sékaléé, mó-'áá nyédúbpé.

Paale áá ngāne Dyōb dēmpuúdté Krīstāa, bad bé Krīsto bōmpē bēpuú

¹² Bōōb áde sékale-'áa nēn bán Krīstāa apuúde, chán-nō nyé donje á bad nyéhele nyéhōbē bán bad ábe bēwédé bēpuú'ε?

¹³ Nzé ahób áde nyéhōbēé nēn bán mpuu méesaá ámbíd e kwéed áde mbále, né élūmte bán Krīstāa enkēmpuú'ε.

¹⁴ Nzé Krīstāa enkēmpuú-'ε, né nkalan nīme sékanléé nyé méesaá dyamdyam, né áden adúbe ámpē déesaá dyamdyam.

¹⁵ Né nē álūmte nēn bán sékale Dyōb metóm áyāl ahób áde séhōbēé bán apuúdté Krīstāa. Bōn nzé éde mbále nēn bán bad bēpuúdeé nzé bēwédé, né Dyōb dēnkēmpuúdté Krīstāa.

¹⁶ Nzé bad ábe bēwédé bēpuúdeé, né káāne Krīstāa eēpuúdeé.

¹⁷ Nzé Dyōb dēnkēmpuúdté Krīstāa, né adúbe áden déesaá dyamdyam, né nyédii nyédé-'ε á mbéb te.

¹⁸ Né élūmēd-te bán bad ábe bédúbpé Krīstāa ábe bēwédé, bēbōó-'ε.

¹⁹ Nzé e'lyág bé nlém ábe séwóó áyāl wēe Krīstāa é'sógé áyāl e áden alongé dēmpēn, né bad bētāngéné se ngal atómten dé awóg tómaa nyaa eché béhele bēwóg bad bēmpēe.

²⁰ Bōn éde mbále nēn bán Dyōb ápuúdté Krīstāa. Mó abédé mod a'só ápuu áfnté e bad ábe bēwédé.

²¹ Dyam áde mod nhóg ábélé dōo ákás bōn bad bēwāg. Melemlem nē dōo dyam áde mod nhóg ábélé ákás bōn bad bēpuúdeé.

²² Bad bésyāāl bēwē abé áde bédii mod nhóg ne Adame, melemlem nē dōo Dyōb dēbenlé bad bésyāāl bēpuu abé áde bédii mod nhóg ne Krīstāa.

²³ Mod téé ápuú eche pōndé eché átāngéné apuu. Krīstāa, mó awé adé mod a'só ápuu, áde ápēé ámpē, bad ábe bédé ábe Krīsto bōmpē bēpuú.

²⁴ Ambíd ené, asóg dépě. Ene pónde e'dáádəŋ ábe é'kamlan, benkamlene ne ngine é nkõŋsé, Krístəə ámad echab ngine. Dó-'áá ábée nkamlen wée Dyób Titée.

²⁵ Krístəə ábē á nkamlen káŋŋ Dyób ábēl atóm ábē bad bé ekoyí áte, ábānē-'e bó ásē echē.

²⁶ Mod a ekoyí awē ádimténne atóm áte adii kwééd.

²⁷ Edé nēŋgáne eténlédé á kálag e Dyób nēn bán, “Dyób ábánné mekan mésyāal ásē echē.” Elúmte bwám pen nēn bán mekan mésyāal nime Dyób áhóbé áá mábánné ásē e Krístəə, Dyób dēn déesaa áwed-te.

²⁸ Ade bwēm ésyāal bémadté abé ásē e nkamlen nime Krístəə, mwēn-ne Mwán a Dyób, ábē ásē e Dyób. Dyób dō-'áá ábánné bwēm é'syāal ásē echē, ábēl bonj mwēn Dyób-pe ákamlen bwēm é'syāal ngen póg ne ngen ésyāal.

²⁹ Bəəb-pəə, chán-nō déhəbpē áyāl e bad ábe békúdé edusen á nló ní bad ábe bémáá awé? Nzé bad ábe bəwédé bēetəgné apuu, chee ékás bonj bédusan bad á nló ní bad ábe bémáá awé?

³⁰ Chee-ŋ ékás bonj sébāg á nsāl ní kwééd pónde tée?

³¹ A-baányan, mbág á nsāl ní kwééd epun tée. Kúmbe eche mbééné nyé abé áde dédíi mod nhóg ne Yesu Krístəə, Sāŋgwéé awēd, chō ekás bonj ríhəbē nēn.

³² Nzé nnənē chō á nyaa e moonyon, nsyāŋ ké nhóg méesaá né nzum éche syāabe e'loo nyam séwánáá á Efesus. Bonj nzé édé nēn bán bad ábe bəwédé bēepuú'ē, né dēéhəb bán, “Dédyág, démwāg-ke, áyāle chán mod áwē.”

³³ Nyéedəgnād, “E'chonj bé mbéb é'bēbte abé á bwám.”

³⁴ Nyéewóó mewēmten ámpē nēe e'yókél é' bad, nyésóg-ke mbéb ábēl. Nyé donje á bad nyéebii'ē Dyób. Ngáne ríhóbēé nēn, nēn átəŋgéné nyé akwāgké akóbéd.

Ngáne bad ábe bəwédé bēpuú'ē

³⁵ Bonj mod ásedéd aaken, “Chán Dyób áhele ápuúd bad ábe bémáá awé? Yāl éhéé bəwōŋgē?”

³⁶ Eyókél é chóm, nzé ewenē mbál-e-bū éēbēlē-se ewé bonj ekág-e?

³⁷ Chóm éche bəhágké á ndəəb édíi mbál ngēn, saké alín á bwēl ásyāal áde ákwoge' bəwēnéé, bonj mbum, kapóg mbum e ngun ké'ε mbum empée.

³⁸ Dyób dēn dōo ábēle' ngáne ádás bonj mbál tée níwōŋ yāl eche níwóó. Abage mbál tée yāl eche éttəŋgéné.

³⁹ Yāl é bwēm é'syāal ábe é'dé á alongé éesaá nyaa póg. Baányonj bəwóó echab ndin e yāl, nyam éwóó echáb, menən méwóó echáb, síu-'ε éwóó echáb.

⁴⁰ Bwēm é'dé ábe é'dé á nkoŋ nímín, é'bē-'ε ábe é'dé á nkoŋ rísé. Bwēm bé nkoŋ ní mín é'wóó ábāb e'bonj ábe bwēm bé nkoŋ rísé bēéwóó'ē. Bwēm bé nkoŋ nsé-'ε é'wóó ábāb e'bonj ábe bwēm bé nkoŋ ní mín bēéwóó'ē.

⁴¹ Etondəe awóó ábē e'bonj, ngən ewóó ábē, betintine-'ε bəwóó echáb nyaa e e'bonj. Káŋŋne áttínté e betintine, e'bonj ábe bəwóó é'dé nyaa ne nyaa.

⁴² Nēn dōo ébēē ne bad ábe bēpuú. Yāl echē bēlímmeé edii yāl eche ebébe', echē Dyób ápuudté edii yāl echē eebébé' ámpē.

⁴³ Yāl eche bēlímmeé eebágké elóon, eewúē-'áá áte. Nzé Dyób ápuúdté chō eboo' elóon bwāmbwam, ewúē-'ε áte.

⁴⁴ Ade bēlímmeé chō ebágké yāl e ekob, bonj nzé Dyób ápuúdté chō ebágke yāl e edəádəŋ. Yāl e ekob edé, yāl e edəádəŋ-'ε ámpē edé.

⁴⁵ Eténlédé á kálag e Dyób nēn bán “Mod a e'só, Adame, Dyób dēnhəg mós abé nhəgtéd nime níwóó alongé.” Bonj Adame a ndimten adii Edəádəŋ éche ébage alongé.

⁴⁶ Saké mod a edəádəŋ mós asəhpé abé. Mod a ekob mós asəhpé abé bonj mod a edəádəŋ mós-'ε ábág.

⁴⁷ Mod a só ambíd á nkõŋsé, bēnhəgén mós ndəəb. Awe mós-'ε ampē ámpē, ádyób dōo ábidé.

⁴⁸ Bad ábe bédé á nkõŋsé te, bédé nēŋgáne Adame awé bēnhəgēnné ndəəb. Abe bós-'ε bédé bé dyób, bédé nēŋgáne ane awé ábidé ádyób.

⁴⁹ Ngáne déwāgné mod awé bēhəgné ndəəb, melemlem nē dōo déwāgēnné ane awé ábidé ádyób.

⁵⁰ A-baányan, chóm éche ríhóbēé edii nēn, chóm éche édé á nhəgtéd ní yāl e ekob ne mekií éehelée-se ékūd bwēm bé nkamlen ní Dyób. Eche chós-'ε éebé abé ne abé éehelée-se ékūd bwēm ábe bēbē abé ne abé.

⁵¹ Nyélám metúu nyéwóg dyam áde nílanjéé nyé áde bad bēebíí'ē. Syané bad bésyāal déewáá', bonj pen Dyób déhəŋlén syané baasyāal

⁵² á esóŋ é pónde. Mmē nhəŋlén mébē á mehélé-te, nēŋgáne mod áhelese ápēbéd díd. Nēn débenléd áde bétŋgē elon é asóg. Ade bétŋgē elon, bad ábe bəwédé bēpuú, bēewáá ámpē, Dyób déhəŋlén-ne syané baasyāal.

⁵³ Ene yäl eche ebɔɔde' ɛ̄tīm yäl eche éebɔɔ ámpē, yäl eche chɔ́-'ε ewág ɛ̄tīm yäl eche eewág ámpē.

⁵⁴ Póndé eche yäl echē ebɔɔde' ɛ̄tīmme yäl echē eebɔɔde', ne áde yäl eche ewág ɛ̄tīmme yäl echē eewág, ɛ̄lón ngáne ɛ̄ténlédé á kálag e Dyɔb nén bán, "Kwééd eesaa ámpē ne abé dēn, Dyɔb átómé chɔ́ áte."

⁵⁵ "A-kwééd, héé echon ngine átóm mod áte ɛ̄díí? A-kwééd, héé echon ngine áwóged mod e'we ɛ̄díí?"

⁵⁶ Mbéb mɔ́o níkáá bon kwééd ewón ngine áwóged mod e'we, ngine e mbéb-pe ehúú ne mbéndé.

⁵⁷ Bon séságnan Dyɔb, mɔ́ abelé bon sétóm mbéb áte mbwiined ne echɛd Sán, Yesu Krístæ.

⁵⁸ Né-ɔ́, a-baányan bé edáŋge, nyésunen bwám, dyamdyam dééhɔ́btē nyé mekuu ásē. Nyéhē nyékene nsón nime nyébenlé Sáŋgwéé á'so. Nyébíí nén bán nsón nime nyébenlé Sáŋgwéé ké nhóg méesaá ngēn.

16

Bésáŋgé mɔ́né áwóŋgen bad

¹ Bɔɔb-pɔ́ɔ, níláa nyé tãŋgene mɔ́né nime nyénladtē áwóŋgen bad bé Dyɔb. Ngáne ménláá'é mwembé nime níde á Galesia mæé bébel, melemlem nê dɔ́o nyémpē nyétãŋgéné abel.

² Sëndé téé nyé mod téé áhúd mwá mɔ́né ákoo. Nén abé nchoo ne mod téé nímé nkudág. Nzé nyébelé nén, nê débíl nzé mpedé, nyéetogénné mɔ́né asaa ámpē.

³ Nzé mpedé, bad ábe nyépwédé, m̄lóm̄n bó kálag ákæen nímé mɔ́né nime nyéládé á Jerusalém.

⁴ Nzé ébɔ́o bán mémpē níke, né béwoón me.

Ntíi nime Paalé abéle

⁵ Měpě áwēn nzé mmaa átóm á mbwóg e Masedonia, áyale nwóo mewēmtēn átóm á mbwóg e Masedonia.

⁶ Kapóg mēdyéé ne nyé, nhele mbé-'ε ne nyé póndé esyáál echē ahéb ábáŋkē ngine, ábel bon nyéwóŋgen me ákæen échēm eke á'so hóm ké áhéé áde níkagké.

⁷ Meédáá'ε mēé dényínēn ámín-ámín. Nwóo mewēmtēn ábé ne nyé mwá etún é póndé nzé Sáŋgwéé akwēténé.

⁸ Mēdyéé á Efesus hén kóáŋ ne á póndé e ngande e Pentekos.

⁹ Nzii enédnéde me hén ábel kase e nsón, kénéé ɛ̄díí bán bad híin bédé ábe bétãŋgan me.

¹⁰ Nzé Timotié apedé áwēn, nyényín bán nyékobé mɔ́ nken áyale melemlem mé nsón nime Sáŋgwéé nime ábeléé, mɔ́o mémpē níbeléé.

¹¹ Modmod eenyíné mɔ́ nkóŋtéd. Nyéwóŋgen mɔ́ ákæen échē eke á'so ne nsan ábel bon bɔ́ɔbe bad bé Krísto bémpēe ábe nísinéé, bétán me hén.

¹² Bɔɔb-pɔ́ɔ, tãŋgene awesyánē mwányan Apolose, menwéd mɔ́ nlém á abum bwám bwam áhye dé anan nyé nchoo ne bad bé Krísto bémpēe, bon pen eewóo'ε nlém ápe bɔɔb. Nzé etál ébágnédé mɔ́, ápě.

Melentēn mé asóg

¹³ Nyétéd póndé, nyésunen á adúbe-té. Nyéwúu nlém á abum, nyéwúu áte.

¹⁴ Kéchéé éche nyébeléé, nyélúmed bán nyédáá nhóg ne aníníí.

¹⁵ Bɔɔb-pɔ́ɔ a-baányan, nyébíí nén bán abum á ndáb áde Stefanuse dɔ́o ábédé dé'só á mbwóg e Akaya ádúbe Krístæ, bébágé-'ε echab yäl ábele bad bé Dyɔb. Ncháa nyé nén mēé,

¹⁶ nyébé áse e ndín é bad néé échén, ne áse e mod ké ahéé ámpée awé abele nsón néé nímén.

¹⁷ Ndé menyĩŋge ne epe éche Stefanase, Fɔ́tunatusē ne Akaikuse. Bépédé áyale bébeléé nsón nime nyéntãŋgēnnē abel.

¹⁸ Bévédé me nlém á abum ngáne bēnwēdtē nyémpē nlém á abum. Kéchéé éche échén ndín é bad éhábéé, nyétãŋgéné bó edúbé abe.

¹⁹ Mwembé nime níde á mbwóg e Asia nílómme nyé melentēn. Akwilaa bó Prisilia ne mwembé nime níbome áwab ndáb, bélómme nyé melentēn ne nlém nhóg á dín áde Sáŋgwéé.

²⁰ Ábed baányan bé Krísto ábe bédé hén bélómme nyé melentēn.

Nyhē nhóg ne aníníí tál.

²¹ Me Paalé, mbenlad échēm ekáá átele nyé nímén melentēn.

²² Kénzéé awé eédáá Sáŋgwéé ebómán ne mɔ́. A-Sáŋgú awéd, hyág!

²³ Nsimé nime Sáŋgú Yesue níbē ne nyé.

²⁴ Ndáá nyé bad bésyáál á dín áde Yesu Krístæ.

Kálag echê elónténé ébε echê Paalε áténlé Baá Kōrinto Ndibned ní kálag

Enén kálag chó edé kálag echê elónténé ébe, echê Paalε áténlé bad bé dyad á Kōrinto áde ábédé á Masedonia. Paalε antêl chó á póndé echê mam méekage' aá bōōbe mwembé níme mbédé á Kōrinto. Bad behōg átínté e nímé mwembé bēnhōb Paalε mekan mé mbéb á yál, bonj kénê Paalε anwōŋ nímé bwāmbwam aá bōōbōó bétim ásé. Ade bēntimmé-'ε ásé, Paalε anwōg menyinge bwāmbwam. A kálag-té wén, Paalε ahóbé ngáne bōōbe bad bé mwembé bé Kōrinto bémbēē. Awēd-te ahóbé nzom echê ekāá bonj átelé' enén kálag ne e'yale ábe é'wúú áte tōngene nzyōŋ éche ákúdé ne atyéemen áde baahōg átínté e mwembé bétyéémánnáá mós. Alúmté-'ε nímé menyinge ngáne nyaa echê átélé enén kálag, ébélé bad bétédte ábel dé mbéb bonj bōōbōó bétim-me ásé. Acháa-'ε mwembé aá bésaa mōné ne nímé nhōg áwōŋgen betóótókē bé bad bé Krísto ábe bébédé á mbwōg e Judeya. A kálag-té wē ámpē, Paalε ahóbé mekan álúmed aá mósbedé mbapεε a nlómag a mbále awē Yesu Krístā. Ambel nén áyāle nguse é bad ébédé á Kōrinto échê éñchag yál bán bembapεε bé nlómag bé mbále ábe Krístā, bán Paalε-'ε adé mbapεε a nlómag a metóm.

Nkabtéd ní kálag

Ndibned ní kálag 1.1-11

Paalε ne mwembé ní dyad á Kōrinto 1.12-7.16

Asaŋned bad bé Krísto á mbwōg e Judeya mōné 8.1-9.15

Paalε mbapεε a nlómag a mbále awē Krístā 10.1-13.10

Melenten mé asóg 13.11-13

¹ Mε Paalε, mbapεε a nlómag awē Yesu Krístā ngáne Dyōb átíídé, mε-εé ntelé enén kálag. Mε ne awed mwányanŋ a Krísto, Timotie, sélómme' nyé elad e bad bé Dyōb ábe bédé á dyad á Kōrinto ne bad bé Dyōb bésyāal ábe bédé á mbwōg e Akaya, melenten.

² Nsimé ne nsanŋ ní Dyōb Titée awēd ne Sāŋgú Yesu Krístā, mbê ne nyé.

Dyōb áwéde' moosyāal nímé á abum

³ Syáné déken Dyōb, Sáá awē awed Sāŋgwéé, Yesu Krístā. Mós adé Titée awē awōge moosyāal ngól, abé-'ε Dyōb áde áwéde' moosyāal nímé á abum.

⁴ Áwéde' syáné nímé á abum áyāle ndutul ésyāal eche dékudéé, ábel bonj syáné ámpē déhel bad nímé awéd á abum ábe bōmpē békude nyaa e ndutul ké ehé. Déwéd bō nímé á abum melemlem ngáne Dyōb áwédeé syáné nímé á abum.

⁵ Ngáne Krístā ákúdé' áá metake, née syáné ámpē dékudéé metake áyāl echê. Né-óó, abé áde dédíí ne Yesu Krístā, Dyōb déwéd syáné ámpē nímé á abum bwāmbwam.

⁶ Nzé sékude metake édíí awéd nímé á abum ne áwōŋgen nyé ákud e'soosōŋ. Nzé sékudé e'wéd bé nímé á abum né nyémpē nyéékūd e'wéd bé nímé á abum, nyéékūd-te ngíne áwεsen melemlem mé metake ne e'kan bé nímé ngáne sémpē séwéséné.

⁷ Sésúmé nímé áwēn bwāmbwam. Sébíí nén bán nzé nyékude' metake melemlem ngáne sémpē sékudéé, Dyōb déwéd nyé nímé á abum melemlem ngáne áwéde-'ε sé.

⁸ A-baányanŋ, sédáá bán nyésōŋten nyaa e metake echê sékudé á mbwōg e Esia. Metake níme sénkudté mēndenléd sé nyaa echê sēnwēmēnnē bán séebáá á alonjé.

⁹ Sēnwémētén nén bán bébídíí mbakú bán béwúú sé. Bonj sékudé' áá nímén metake ábel séésúmmé' nímé áwéd yál, bonj pen sésúmmé wée Dyōb, mós awē apuudte bad.

¹⁰ Kénée édíí bán sémbé á nsal ní kwééd, ansōŋ sé. Nzé sédé á ndutul-té, Dyōb débē áson sé. Sésúmmé-'ε nímé nén bán ábē áson sé póndé téé eche sébēε á ndutul ámpē.

¹¹ Áson sé akánned áde nyékánnadte sé. Bad híin bēlad mekáá ákánned sé, Dyōb-pe dénáméd sé. Nén débél bad híin bésāgnēn Dyōb áson áde ásoó sé.

Paalε ahúde eke áse

¹² Dyam áde áde ábélé sédé kúmbe. Nímé ríkénléd sé á abum nén bán, abé áde séwóó á nkōŋsé-te wén, tanje nyaa eche sédíí ne nyé, ne nímé níme rísáá ne nímé nhōg, ádíí nyaa eche Dyōb ábélé aá ébē. Adén abé dénkémbáá ne debyéé á moonyonŋ bonj démbē ne nsimé ní Dyōb.

¹³ Chóm éche sétenléé nyé édíí éche nyéhenlé aláŋ, nyésōŋtén-ne. Nsumé nímé meé nyésōŋtén nímén mekan póndé ésyāal.

¹⁴ Ngáne nyémáá donje á mekan tōngene sé asōŋten, ndúbpé nén meé nyéékōŋ sé asōŋten bwám. Nén débél á póndé eche Sāŋgú Yesuε ápéé, nyéehel ahób bán nyéde kúmbe ne sé melemlem ngáne sémpē séhenlé ahób bán séde kúmbe ne nyé.

¹⁵ Adúbe áde méndübēē meé nén áde mbále mentii meé mēsēbē ape áwēn ábel bon nyétombwēn ngen éche élónténé ébe.

¹⁶ Mentii meé mēhyē áwēn nzé nkag á mbwóg e Masedonia, mentii'-e ámpē meé á ehúu métyēm áwēn ábel bon nyéwōngēn me áke á mbwóg e Judeya.

¹⁷ Ade mémbenlé nímén ntii, énkēmbáá éche ríhelaá-se ríhēlén nlem á abum. Meébélē nímém ntii á nyaa e moonyoŋ. Meésáá née mod awé akwēntan áá, “Ee, mēbēl.” Bon ámbíd e pónde átim ahób áá, “Aáy, méebenlé.”

¹⁸ A'só é' Dyób áde ábele ngáne áhóbé áá mósōbēl, nzé sēlángé nyé bán sēbēl dyam, sēbelé sēbēl-le dō.

¹⁹ Nzom echē ekáá bon nén ábe edii áyāle nkalaŋ ní bwám tāngene Mwān a Dyób, Yesu Krístā, nime me, Sailase ne Timotie sékánlé'áá nyé. Yesue eehóbéé áá mósōbēl dyam bon eéftim dō ábel. Yesu Krístā ábele dyam áde áhóbé áá mósōbēl.

²⁰ Chóm ésyāal éche Dyób áhóbé áá mósōbēl, ábelé mébenlad ábel áde ábélé bon debé ne Krístā. Nén dōo ákásá bon áyāle mekan nime Yesue ábeléé syānē déhōbē bán, “Ebē nē” ábel bon Dyób ákud edúbe.

²¹ Dyób dōo ábélé bon syānē debé dédūbpē Krístā. Dyób dēn dōo áwógté syānē ábē ne Krístā.

²² Ahédé'-e syānē ábē e'chem ábe é'lūmte bán syānē dedé ábē bad, ahé'-e syānē éche Edáádaŋ éche Esáá á nlem-té álúmed nén bán deékūd bwēm é'syāal ábe ahóbé áá mósōbē syānē.

²³ Dyób áde me mbóŋ nén áá chóm éche ríhóbéé édé mbále. Nzom echē enkāŋ bon menkēntim ámbíd á dyad á Korinto, edii áyāle meéhede'áá meé níwóged nyé ndutul.

²⁴ Sēéhédēē bán ebē byánán sēnyágté nyé ádúbe kéchéé. Bon pen sēbele nsón ne nyé, ábel bon nyébē menyinge áyāle nyésūmné á adúbe-té.

2

¹ Né-óó, memmāá á nlem-té nén meé méehyāá nyé anyín ámpē. Nzé mempē nwógté'áá nyé ndutul.

² Nzé nwógté nyé ndutul, mod éebáá awé áwōgēd me menyinge, áyāle nwógté bad ndutul ábe bēmbē bēwógtē' me menyinge.

³ Nén dōo dēnkāŋ bon rítelē nyé enén ndin e kálag. Meéhede'áá meé nzé mpedé áwēn, nyé bad ábe nyéwógtē' me menyinge, nyéwóged me ndutul. Ndúbpé nén meé nzé ndé menyinge, né nyé moosyāal nyéēbē menyinge.

⁴ Ntēnlé nyé enén kálag nyaa eche rítelē áyāle membé ndutul, metake mébé me á nlem-té, rítelē'-e chó ne mēsōd. Menkēntelēé nyé chó ábel bon nyéwóg ndutul, bon mentelé nyé chó ábel nyébii ngáne rídás nyé bwāmbwam.

*Paale áá bad bé Korinto
bélagsēn mod awé ábelé mbéb*

⁵ Nzé mod ábelé dyam áde áwógté bad ndutul, saké áwēm dēmpēn dōo ábélé dō, né ábelé dō wéé nyé moosyāal ámpē. Bon ádēn dyam ádíí dyam áde méēhōbēē bwāmbwam.

⁶ Nkógsēn nime bad híin áftnté echēn bēbágé ene ndin e mod, níkwógnédé mō.

⁷ Bon nyétāngéné néé nyélágséné mō nyéwéd-te mō nlem á abum, ábel ndutul eche ákudé eetómán mō adenled.

⁸ Né-óó, ncháa nyé meé nyélúmed mō bán nyédii nyédéá mō.

⁹ Nzom echē enkāŋ bon rítelē nyé enén kálag edii ábii nzé nyéēbēl mam mésyāal nime ríhóbé meé nyébēl.

¹⁰ Kénzéé awé nyélágséné, mémpē nlágséné mō. Dyam áde rílágséné, nzé édé bán nlágséné dō, né nlagsan dō áyāl echēn. Krístā ábelé ábii'-e áá nlágséné dō.

¹¹ Debele nē ábel bon Satane eetómé' syānē áte, éesáá bán syānē deebii'ē mwane nime Satane.

Békale nkalaŋ tāngene melē mékōālē

¹² Ade nípedé á dyad á Troas, ákal nkalaŋ ní bwám nime Krístā, Dyób dēnnednéd me nzii ábel nime nsón.

¹³ Bon nlem ménkēmbáá me bwám á abum áyāle menkēntánne Tituse, mwānned a Krístā awé sūmō sēbele nsón. Né-óó, menlyágtēn bō, níkág-ke me á mbwóg e Masedonia.

¹⁴ Nságnan Dyób áyāle ayógkē ábel syāá dehele' nime nkalaŋ akal. Ábē áde dédíí ne Krístā ábélé dedé nēngáne bad ábe Dyób ákóbé bon ályágtē áke dé akal nkalaŋ ní bwám mebwóg mésyāal. Dyób ábélé bad bébyēé Yesu Krístā áyāle nímē nkalaŋ nime syāá dékaléé. Mmē nkalaŋ níkág áftnté e bad ngáne elod é bwám.

¹⁵ Elod é bwám, elod é Krísto, chós dédíí á 'sò é' Dyòb. Nzé dekale nkalanj tângene Krístæ, bad bésyāāl ábe bédúbpé nímé nkalanj níme dékálé, Dyòb ásoo' ádāb alongé. Boj bad bésyāāl ábe bédúbpé nímé nkalanj, Dyòb déeso' é ádāb alongé.

¹⁶ Ne bad ábe bédé á nzii eché epágnédé Dyòb á yāl, nkalanj m' bwám níme syāá dékanléé b'ó rídé áwāb nēngāne ebébtéd é elod éche éwúé' b'ó. Abíníí'-é ábe bédé á nzii áke wéé Dyòb nkalanj m' bwám níme syāá dékanléé b'ó, rídii nēngāne elod é bwám áyāle syāá delānge b'ó bán b'ébē á alongé ne Dyòb á ngíndé ne á ngíndé. Nzé-ó adé awé ahelese ábel enén nyaa e nsón?

¹⁷ Séesaá ngāne bad ábíníí híin ábe békale eyale é Dyòb ábel boj békud nsyāj. Ne sé séébéé nē, áyāle Dyòb álómé sé ákal nkalanj m' bwám, nímé nkalanj sékale' m'ó ne nlém nhóg abé áde sédíí mod nhóg ne Krístæ, debíí'-é nén bán Dyòb d'ó álómé syāné ábel níme nsón.

3

Bekal bé nkalanj mé melé mékōōlē

¹ Nyéwémténé bán séhóbe' mekan mé bwám tângene échéd yāl ampé-ye? Nyéwémténé bán séébéé nyé kálag ké' é séhād kálag áwēn, álúmed nén bán sékwognédé ábel nsón átínté echēn, ngāne bad bémpee b'ébeleé-ye? Séebenlé nē.

² Nyédíí sé á nlém-té nēngāne kálag eché bétélé boj bad bésyāāl belāā ábii chōm éche édé áwéd-te.

³ Nyélúmté' bán nyédíí kálag eché Krístæ átélé boj álómén sé. Enén kálag eesaá kálag eché béténlé ínke boj edii eché Edáádānj é Dyòb áde ábage alongé étélé. Bénkēntēnlé enén kálag á melāa mīn, níme métánlé, boj bēntel ch'ó á nlém m' bañyon.

⁴ Séhóbe nén áyāle sésumé nlém ne Dyòb abé áde sédíí ne Krístæ.

⁵ Sé bēn sééhēléé-se séhób bán séhele-se sébēl nímén nsón. Sé bēn sééhēléé-se sébēl m'ó. Dyòb d'ó ábélé boj séhēl m'ó ábel.

⁶ Ábelé sékwōgnédé ákal nímé nkalanj mé melé mékōōlē. Méesaá nkalanj áhíd mbéndé é melé mé nchun. Bad ábe behíde ene mbéndé b'wág, b'ébāg-kaá ne Dyòb. Nkalanj áhíd melé mékōōlē níme séyágtéé, rídé nén bán Dyòb ábage bad Edáádānj éche Esáá, ébele-é b'ébē ne m'ó á ngíndé ne á ngíndé.

⁷ Bōōb-ōō, Mosēe an'yáged bad áhíd mbéndé é Dyòb é melé mé nchun. Dyòb déntēl échēn mbéndé amīn é melāa níme métánlé boj ábe Mosēe áá áyágte bad. Áde Dyòb dēmbéé Mosēe éché mbéndé, ambēl e's'ó é'pēné' Mosēe féréd, álúmed bán éché mbéndé edíi éche. E's'ó é'pēné'áá Mosēe nyaa eché bad bé Israel béhele'áá m'ó anon á's'ó. Boj kénéé é'pēné'áá bwāmbwam, nímé mwayé mēmbōotéd asud mwāmpīn mpīn. Bad ábe bēnhíd melé mé nchun bēnwē, bēnkēmbāá'-áá ne Dyòb.

⁸ Né-ó, nzé séyágte bad nkalanj tângene Edáádānj é Dyòb, Dyòb délūméd bad nén áá nímé nkalanj rítómténé etógnén abé á alongé á bad.

⁹ Dyòb dénlūméd áá m'óde ngum áde ámbéé Mosēe mbéndé. Eché mbéndé émbēl bad b'ebíí bán ákōsgēn b'ó áyāle mbéé níme b'ébélé. Boj anabpé eché ngum álúmed ábel áde ábélé boj sékalé' nímé nkalanj níme rílúmté ngāne bad békobnadté áwe e's'ó.

¹⁰ Mbéndé éche Mosēe áyágté'áá bad b'ōōd áhíd mbéndé é Dyòb émbē etógnén. Áyáged áde séyágtéé bad b'ōōb bán Dyòb délāgsēn b'ó mbéb, b'ébelé-é ngāne áhédeé, d'ó átómténé etógnén abé.

¹¹ Kénéé edíi bán Dyòb dénlūméd ngāne ádíi etógnén áde ábélé melé mé nchun, melé níme mēmbē á esōj é pōndé, álúmté áá m'ótómtēné etógnén abé ábel áde ábélé melé méékōōlē. Mmīn melé méékōōlē m'ó mēhānjléne alongé á bad, m'ébē'-é abé ne abé.

¹² Né-ó ngāne sésumé nlém bán nkalanj níme sékaléé rídé etógnén bwāmbwam, sékale m'ó ésebān sébāa'.

¹³ Séesaá nēngāne Mosēe. Mosēe ankúdtén e's'ó ábel boj bad bé Israel béēnyíne ngāne e's'ó ábe é'pēné'áá m'ó é'díméé.

¹⁴ Boj bēnkēnsōjtēnné. Á mbále, bootyaa ene pōndé ápe chíi, béheleé asōjtén nén bán apen áde e's'ó é'pēné'áá Mosēe, nímé mpentéd rísúde. Pōndé ké ehéé nzé bad b'ewógé mod aláá kálag e melé mé nchun, b'eesōjtānnē chōm éche b'ewógé. Edé nēngāne abad ákúténé b'ó mewémtēn. Nzé mod adé ne Krístæ dēmpēn d'ó asōjtānné.

¹⁵ Á mbále, bootyaa ene pōndé ápe chíi, pōndé ké ehéé eché belāá mbéndé é Mosēe, ébelé ébē byánán abad ákúténé b'ó nsōjtēn nyaa éche b'eheléé chōm éche belāá' é abíi.

¹⁶ Boj nzé b'ó ké ahéé adúbpé Sāngú Yesue, chōm éche ébāg nēngāne abad éche ékutan b'ó nsōjtēn ébelé éhíde.

¹⁷ Bōōb-ōō, Sāngwéé adii Edáádānj. Kéhéé áde Edáádānj éche Sāngwéé edíi, bad b'éébāgkē á mehanj-té.

¹⁸ Syánē ábe Dyöb áhúdé abad áde dénkütēn syánē e'só, abé ádēd ábele' bad bébíi ngáne ehúmé éche Sǎngwéé épédé abé. Bényíne' bán abelé syánē ngáne bad ábe bébele ngáne Dyöb áhédé. Edáádǎn éche Esáá éhǎnǎn syánē ahǎnǎn ne ahǎnǎn ábē ngáne Yesuē ábel bad bényín ngáne ápédé ngíne abé. Sǎngwéé, mǎ awē adé Edáádǎn, mǎ abele nímén mekan.

4

Yesuē alúmté syánē ngáne Dyöb ápédé abé

¹ Ngól eché Dyöb ádíi chókéás bonj sékalé' nímén nkalanj. Né-óó, séedonlé mekuu ámbíd ákal mǎ.

² Séebǎnlé mekan mé e'són níme bad bébeleé á mesóom-té. Séedögnē nyé ehób é nsǎl, séehǎnǎn-naá eyale é Dyöb ádog nyé. Bonj pǎn, séyágte' bad eyale é Dyöb nyaa eché bad bésöntǎn chók. Ngáne séyágte' eyale é Dyöb ne nlém nhóg, modmod eéhǎlé-se ahób á nlém-té aá sédöge mǎ. Sébíi bán Dyöb ábíi kéchéé éche sébeleé.

³ Nzé donje á bad béehéle nkalanj mí bwám níme séyágte' asöntǎn, né édíi wéé ábē bad béedúbpeé mǎ. Ngáne béedúbpeé Dyöb béebáá ne mǎ.

⁴ Satane, nkamléne á nkönsé, akamlan mewémtn níme bad ábe béedúbpe Krístǎe. Béeheléé-se bésöntǎn bán nkalanj mí bwám rílúmté ngáne Krístǎe ápédé etögnén abé. Krístǎe adíi néé Dyöb dǎn.

⁵ Né dóó ákás bonj séekalé tǎngene éched yǎl. Bonj sékanle nyé bán Yesuē mǎ adé Sǎngwéé. Sédíi bembalede ábēn áyǎl e Yesuē.

⁶ Dyöb áde dénhób aá, "E'nyínen bé ekíde é'bē wéé ehíntén énsébēē abé," mǎ abelé nímé nkalanj tǎngene Yesuē ábē nǎngáne e'nyínen bé ekíde ábe é'pene' syánē á nlém-té. Syánē baásyǎál ábe dedúbpe Yesuē bós Dyöb ábénlé nē. Dyöb ábélé nē ábel bonj bad bébíi nén bán módé etögnén abíi áde bad bébíi' é bán Yesu Krístǎe adíi néé mǎ.

⁷ Bonj nkalanj níme Dyöb ábágé sé ákal, rídii chóm éche étómténé etögnén abé. Sédíi nǎngáne mbeé e mag eché chóm édíi áte. Nén ábénléde ábel bonj bad bébíi nén bán ngíne eché echabé ámín ehúú ne Dyöb saké ne sé.

⁸ Sékude nyaa é ndutul híin bonj séélyǎgēé áwéd-te. Donje á pónde séebyéé' é dyam áde sébeleé, bonj séehóbéé nén bán Dyöb déelúmédté se chóm éche sétǎngéné abel.

⁹ Bad bétagte se pónde té bonj Dyöb déetedté sé. Bélögne sé, bonj Dyöb déekwentánné aá béwúu sé.

¹⁰ Kéhéé áde sékagké ákal nkalanj mí bwám séhéde á nlém-té nén bán bad béhéde' sé awúu ngáne bǎnwúu-'é Yesuē, bonj bad bébíi bán Yesuē adé á alonggé, mǎ-'aá ahág sé ngíne áte abé áde sédíi á alonggé.

¹¹ Sébíi nén bán kénéé sédíi á alonggé bǎb, séde bǎnben ne kwéed pónde té áyǎle sébenle Yesuē. Nén adé ábel bonj bébíi bán Yesuē adé á alonggé, mǎ-'aá ahág sé ngíne áte abé áde sédíi á alonggé.

¹² Né-óó, sékwénténé kwéed ábel bonj nyékud alonggé áde déemaá'.

¹³ Sédíi melemlem ngáne mod awé ahóbé ngáne éténléde á kálag e Dyöb nén bán "Ndúbpe wé, né-óó, nkale' tǎngene wé." Melemlem ngáne ane mod ándübēē Dyöb, sémpē sédúbpe Dyöb, sémpē sédíi sékale-'e tǎngene mǎ.

¹⁴ Sébíi bán Dyöb áde ápuúdté Sǎngú Yesuē dépuúdté sémpē ábē á alonggé ámpē ne Yesuē. Dyöb dépéén-ne sé ne nyé wéé adíi.

¹⁵ Metake mésyǎál níme sékudeé médii áwöngēn nyé, ábel bonj nzé bad híin béwógé eyale é Dyöb, nsimé rí Dyöb mébél békúd alagsen dé mbéb, bébúd-te mǎ aságnén. Nén débél bad híin békené' Dyöb.

¹⁶ Né-óó, séedonlé mekuu ámbíd ákal nkalanj mí bwám, kénéé édíi bán ngíne esude' sé á yǎl, kénéé Dyöb áwede' sé nlém á abum, áhág-ke sé ngíne áte mbwé té.

¹⁷ Baá metake ábe sékudeé bǎb béesaá ábe sétagte' sé nlém á abum. Sékude metake bǎb bonj ehúmé éche ébē ne sé échǎb ámín nyaa eché séekamténné metake níme sékúde á nkönsé wén, ébē-'e ne sé á ngíndé ne á ngíndé.

¹⁸ Né dóó ákás bonj séenyíné' metake níme sékudeé bǎb néé dyam. Bonj sébǎnné nlém áyǎl e bwém ábe Dyöb ákóhénéde sé, kénéé édíi bán séenyínéé bó. Bwém ábe sényínéé bǎb é'dé dásǎ áyǎl e esón é pónde, bonj bwém ábe séeheléé-se sényín bǎb, bébé á ngíndé ne á ngíndé.

5

Déekúd yǎl ékǎlé ádyöb

¹ Sébíi nén bán éched yǎl éche sébééné á nkönsé edii néé e'bem ábe sédyéé' é áte. Nzé bǎpáá ábē e'bem, sébíi nén bán séwóó ndáb ádyöb eché moonyonj éelóó' é. Dyöb dóó álóó' chók, ébē-'e á ngíndé ne á ngíndé.

² Sêkɔɔmad áte bɔɔb á ebem-tê wén, sêwane áte bán ene ndáb echê ebíde' ádyôb êkúnten sé ngáne mbóté êkútanné mod.

³ Nzé sêdé ene ndáb áte, séebáá nêngáne mod awé adé nsôb.

⁴ Abéen áde sébééné enén yál á nkòjse te wén, sêkɔɔmad áte adenled áde nén adénlédé sé. Eesaá nén bán sêhede enén yál e nkòjse ahúd, bonj sêhede yál êkɔɔlê eche edé ádyôb, ábel enén yál e nkòjse echê ewág emaa, étim yál echê êbê á alongé.

⁵ Dyôb dɔɔ ábòjnséné syáné ákud nímén nhəjlen alómme-'e syáné echê Edəsdəj eche Esáá álúmed nén aá adén akan débenléd.

⁶ Né-ɔɔ, pónde téé desume' nlem nén bán abé áde dédíí ne échén yál á nkòjse, deesaá hóm ahóg ne Səngwée.

⁷ Sédé á alongé á nkòjse ne échén yál, áyale sêdúbpé mó saké ngáne sényíneé mó.

⁸ Sésumé nlem nén bán ábe syáné yál êkɔɔlê, sêhede-'e échəd yál é nkòjse atede áke débé ne Səngú Yesue.

⁹ Né-ɔɔ, níméd nlem rísyáal rítəngéné abé áwóged Yesue menyíngé áyál e kéchéé eche débéléé, ké ébê bán sêdé ne échəd yál á nkòjse, ké 'e séesaá ne chí.

¹⁰ Syáné mod téé átyeém á nkáásé á'sò ábe Yesu Krístə epun eche ákáadte moosyáal, təngene mekan níme ábélé á pónde echê ábédé á nkòjse. Mod té ákúd nsábe təngene mekan mé bwám ké 'e mé mbéb níme ábélé.

Abé á nchemten ne Dyôb

¹¹ Ngáne sébíí bán Səngwée ákáad bad, sébagé-'e mó edúbé, sêwane' áte nén bán bad bésònten nén bán nkalan níme sékaleé rídé mbále. Dyôb ábíí nyaa é bad eche sédíí, mbíí-'e meé nyempé nyébíí nyaa é bad eche sédíí, ndúbpé-'e meé nyébíí-'e bán sékale mbále.

¹² Séehóbéé mekan mé bwám təngene échəd yál ámpê. Bonj pen sêhede bán nyéwónj nɔɔm ábén sé kúmbe, ábel bonj nyéwónj dyam áláa bad ábe bédé kúmbe áyál e mekan níme bébeléé níme bad bényíneé, saké áyál e mekan níme médé bó á nlem-tê.

¹³ Donge á bad béhóbe bán sêhóbe mekan néé bad ábe nló méesaá 'é áte. Nzé nê adé mbále, né Dyôb dɔɔ sébagéé edúbé. Nzé sêhóbe mekan néé bad ábe nló rísáá áte, né áwónjen nyé dɔɔ sêhóbeé.

¹⁴ Edəngé eche Krístə chíó étédé sé nlem á abum ábel mekan níme sébeléé, áyale sémadé á nlem-tê nén bán Krístə awédé á nló m moosyáal. Né-ɔɔ, edé nêngáne moosyáal áwédé.

¹⁵ Anwé á nló m moosyáal ábel bonj bad ábe bédé á alongé, alongé ádáb déélumtê bán bédé á alongé áyál echáb démpən. Bonj pen bédé á alongé áyál e Krístə, mó awé anwé, bonj Dyôb ápúud-te mó á nló nímáb.

¹⁶ Né-ɔɔ, bootyá bɔɔb, déénōnê mod nyaa eche moonyonj ánonéé. Kénéé edíí bán sənəné' áá Krístə á nyaa e moonyonj, séénōnēé mó nê ámpê.

¹⁷ Né-ɔɔ, kénzéé awé adé mod nhóg ne Krístə, adíí nhəgtéd mékɔɔlê. Mmê mbeltéd mé nchun rísyáal nímáá atóm awóó-'e mbeltéd mékɔɔlê rísyáal bɔɔb.

¹⁸ Mmén mbeltéd mékɔɔlê ríhúú ne Dyôb. Ábelé syáné detimé ásé ne Krístə, abagé-'e syáné nsón ákale bad nén bán béhele bébê nsaj ne Dyôb.

¹⁹ Chóm eche ríhóbeé edíí áyál e kwééd echê Krístə áwédé á awəg. Dyôb ábélé bad bépédé á nchemten ne mó. Dyôb déétóó'áa mbéb níme bad bébeléé, abagé-'e syáné nsón ákale bad nén bán béhele bébê nsaj ne Dyôb.

²⁰ Aláa áde Dyôb áləngéé sé mekan áláa bad sédíí bad ábe béhóbpe Krístə. Sésime nyé etúu áte á díń á Krístə nén nyépe á nchemten ne Dyôb.

²¹ Dyôb démpwəd Yesue átag áyál e mbéb rísyáal níme syáné débéléé. Yesue enkəmbenlé mbéb ké nhóg, bonj kéné ankwentín atag áwəd nló. Dyôb áləgséné syáné mbéb ahóbe-'e aá déébélēé mbéb ámpê melelem ngáne mómpé éebeléé mbéb.

6

¹ Né-ɔɔ, sé ábe sébele' nsón rí Dyôb ne Dyôb, sêháa nyé nén bán nsimé rí Dyôb níme nyékudeé méebəg ngén.

² Dyôb áhóbé ngáne éténlédé nén aá,

“Ade pónde épédé echê étəngéné, menwóg chíom eche nyéhóbé.

Ade epun é e'sooson-'e épédé, menwónjen nyé.”

Nyənəne' pónde nén bɔɔb echê étəngéné, eche nyétəngéné nsimé rí Dyôb akud. Nyənəne', epun épédé eche nyéhele nyékud e'soosonj.

³ Séekásé modmod nzii, ábel bonj awusé déenyínnəd áyál e nsón níme sébeléé.

⁴ Bonj pen, nêngáne bembalede bé Dyôb, sélumtē' yál nyaa ésyáal ábē bad ábe bébele' mekan níme métəngéné. Səwánlé e'kan bé nlem é' ngíne təngene metake níme sékudeé, təngene alongé áde álenlad sé áte, ne ndutul eche étáne sé.

⁵ Sêkude mbéte, béhâg sé á mbwôg, ndun e mod empeén epuutéd béchodé sé yâl áte, sébele ntú ní ngíne, sénanjé' e'pin, sédyé-é nzaa.

⁶ Sêlúmté' ámpé bán sêdíi bembáledé bé Dyôb abel áde sébeleé mekan mé bwâm ne e'sân bé nlém, abe áde Dyôb ábagé sé nsôjten ábii alongé áde sétánjéné awón, awesen áde séwesanné, ne awóon áde séwónné bad bémpêe nlém mí bwâm. Edáádaj éche Esáá chôs élyágte sé, sêdáá-é moosyaál ne nlém nhôg.

⁷ Nkalanj níme sékaleé rídii nkalanj mí mbále, ngíne e Dyôb chós-áá sébenladté ákal mós. Abel áde sébeleé mekan níme métánjéné ábélé bad béewóó'é dyam dé mbéb ké ahôg ábán sé á yâl.

⁸ Séébe sébenlé Dyôb ké béken sé, ké' é béekene' sé. Ké bad béhábé sé mekan mé mbéb áyâl ké' é mekan mé bwâm. Bad béhóbe bán sêlúmté bán sêdé ndín é bad éche séésaá, bonj sêdíi bad ábe séhábé bán sêdé.

⁹ Bad bébíí sé bwâm bonj bémpêe bényíne' sé bán sêdíi bad ábe béesé dyam dé abelen. Bad béwémtan bán séebáá á alongé bonj kéné sêdíi sêdé á alongé. Sêkude metake á mekáá mé bad bonj kéné, béewúú' é sé.

¹⁰ Sêdé á ndutul tê, bonj kéné, séwóge menyíngé pónde ésyáál. Kénéé édlii bán séebudé chóm awón, bonj kéné nsón níme sébeleé mbélé bad híin bédúbpé Dyôb. Né-ós nê ábélé bébudé bwém awónj bôob. Kénéé séewóó' é chómchóm, nhan ní Dyôb rídii nímméd.

¹¹ A-bad bé dyad á Kórinto, séténlé nyé chóm ésyáál ésebán sékónjad nyé dyamdiam. Sêlúmté-é ngáne nlém rídii sé áte áyâl echên.

¹² Sêdáá nyé, séebáá-áá alúmed bán sêdáá nyé. Nyé pen nyélúmté sé nén nyéedáá' é sé.

¹³ Nhóbe áwên bôob néé ábém bán. Nyémpé nyédaj sé ngáne sémpé sêdáá nyé.

Nyéébéle' mekan níme bad ábe bédúbpé Krístáa bébeleé

¹⁴ Nyéebág nlatén ne bad ábe béedúbpé Krístáa. Nhóbe nén áyale bad ábe bétánjéné á'sô é' Dyôb, béewóó' é dyam abelen mekan níme e'bébtéd é' bad bébeleé. E'nyínen bé e'kide béewóó' é dyam abelen ehíntén.

¹⁵ Krístáa eewóó' é dyam abel ne Satané. Mod awé adúbpé Krístáa eewóó' é dyam dé abelen mod awé eedúbpé.

¹⁶ Ndáb-e-Dyôb eewóó' é dyam dé abelen ndáb eché bad bébenléé myôb mémpêe. Nhóbe nén áyale dedii ndáb e Dyôb, Dyôb áde ádé á alongé. Edé nén ngáne éténléde bán Dyôb áhóbe áá,

“Méhé ne ábém bad, rídyé-é áwáb.

Bébelé mé nêngáne ádad Dyôb, mé-é météd bós nêngáne ábém bad.”

¹⁷ Sánjwéé alánje ábé bad áá,

“Né-ós, nyéede, nyéebág-ke ne bad ábe bédúbpé mé.

Nyéewóó' dyam abel ne e'bébtéd é mekan níme bébeleé.

Mékôb-pe nyé néé ábém bán.

¹⁸ Méhé nyé sáá,

nyé-é nyéébé ábém bán.

Mé Dyôb á Ngum mé-éé nhóbe'.”

7

¹ A-baányanj bé edánje, ngáne Dyôb áhóbe áá módíi awesyáné Sáá, syáné-é debé ábe bán, détede mekan níme méwógte syáné mbinde á ekob é yâl ne á edáádaj. Syáné débé Dyôb edúbé, déwónj-é alongé áde áásá, né débél débágé Dyôb edúbé ngáne éhédnadté.

Paale adé menyíngé

² Nhéde meé nyédaj sé ne nlém rísyáál. Séépánnéé modmod, séébéltéé modmod mbéb, séédógéé-é modmod.

³ Meehábéé nén áhób nyé. Mensébé nyé atele nén méé, sêdáá nyé bwámbwam, ké á kwééd ké' é á alongé, débé debé mod nhôg.

⁴ Nkumne nyé ekáá á tâl. Mbééné nyé kúmbe. Nyéwédé mé nlém á abum bwámbwam nyaa eché rítómténé menyíngé abé kénéé sékudéé metake bwámbwam.

⁵ Ade sépédé á mbwôg e Masédonia, sênkênkóméé áte. Sêkudé'áá metake nyaa ne nyaa. Bad bépéntánnáá ne sé mbwôg-ke níbé sé áte áyale sékámánnáá nyé.

⁶ Bonj Dyôb áde áwede bad ábe béewóó' é lyág bé lém, lém á abum, dénwéd syáné nlém á abum alóm áde ánlómmé Tituse áwesyané.

⁷ Sad-kaá eché epe chémpen émbel séwóg menyíngé, bonj awéd áde nyénwédté mó nlém á abum dénwógéd sé menyíngé. Anláá sé ngáne nyédáá mé anyín bwámbwam, aláá-é sé ngáne nyénwógké pél áyale ndutul eche ebédé nyé á nlém-té ngáne nyénkénwógédé mé

menyinge. Anláá-ε me ngáne nyéwóó nlém áte ábε me ámbíd. Ade Tituse álangé sé nímén mekan, membé menyinge bwámbwam.

⁸ Kénée édíí bán ene kálag eché mēnteleé nyé enwógéd nyé ndutul, meesáá ngəl nén me nténlé nyé chó. Kénée édíí nén bán membé ngəl atel áde mēntenlé chó, nnyíné nén meé echem kálag eché ríténlé nyé ewiídé nyé nē á esón é pónde.

⁹ Bonj bɔɔb ndé menyinge, sáké áyále mēnwógédé nyé ndutul, bonj áyále ndutul eche nyénwógkε ebele nyéhānléné áden abé dé mbéb nyébele' ngáne Dyób áhedeé. Nyénwóg ndutul ngáne Dyób áhedeé'áá aá nyéwóg. Né-ɔɔ, ndutul ké ehéé eché sēmbenlé bonj nyéwóg, enkēmbébénné nyé.

¹⁰ Nzé ndutul edé mod á nlém-té ngáne Dyób áhedeé, ane mod abelé ahānlén áde abé dé mbéb ábele' ngáne Dyób áhedeé. Nén ábele' ane mod ákūd e'sooson, nē déewiídéé modmod ámpε. Bonj bad ábe bédúbpé Dyób, ndutul eché edé bó á nlém-té áyále bédíí baanyon ebele' bēwág á edáádā.

¹¹ Bonj ndutul embé nyé á nlém-té ngáne Dyób áhedeé aá ébε. Né-ɔɔ, nyénone' chōm éche nē ápínédé nyé. Nyéhedeé'áá bán nímíí nén meé nyéwane áte álúmed bad nén bán nyéébéleé awusé ké ahóg bɔɔb. Melingá membé nyé áte nén bán ábε bad bēbéleé awusé á etún é pónde nyédé ahób bán nyélānge bó bán bésóg mbéb abel. Nyénwóg mbwóg nén bán Dyób dékagsen nyé nzé nyédé nyébele échén ndín é mekan. Nyéndān me anyín bwámbwam, nyénwóg nlém ábε me ámbíd, nyékōgsān-ne bad ábe bēbele mbéb. Abel áde nyébéleé nímén mésyāal, álúmté sé nén bán nyéébéleé mekan mé mbéb.

¹² Né-ɔɔ, kénée rítélé ene kálag, menkēntenlé chó áyále mod awé abelé epande ké'ε mod awé bēpānné bonj ntelé chó ábel bonj nyébíí á'sō é' Dyób nén bán nyékoó sé adā.

¹³ Né dɔɔ ákás bonj nyéwēde sé nlém á abum.

Saá-kaá e'wéd bé nlém á abum bēnpen, bonj sēmbé menyinge bwámbwam anyín áde sēnyínne Tituse adé menyinge áde ápédé. Anláá sé ngáne nyébéleé bonj asóg atag áte.

¹⁴ Membé kúmbé aláa Tituse ngáne nyédíí bad bé bwám, nyénkēnwógéd-taá me e'són áyále nyénlúmed nén bán mekan nime ménlāá'ε mó méde mbále, ngáne mekan mésyāal nime sēnlāá'ε nyé médíí mbále.

¹⁵ Nē ábélé nime nlém rítimé' áwēn tómaa ké ngen e'só, akamtēn áde ákamtanné ngáne nyé moosyāal nyénwōngε nlém ábel mekan nime ánlāá'ε nyé aá nyébel. Nlém rítimé mó áwēn ámpε nzé akāmténé ngáne nyénkobpé mó ne edúbé, nyéwōngén-ne mó ne nlém nhóg.

¹⁶ Ndé menyinge áyále nsumé nlém rísyāal áwēn.

8

Bad bé Krísto bétógnéé bad ábe bétógnéé awōngén

¹ Bɔɔb-ɔɔɔ a-baanyan, séhede bán nyébíí nén bán Dyób ábágé nímé nsimé wée bad bé Dyób ábe bédé á mwembé nime ridé á mbwóg e Masedonia ábel bonj bésále ekáá áte.

² Békúde metake mé ngíne nime mékage bó áte bwámbwam. Kénée édíí bán bédé atóg bwámbwam, bésánlé ekáá áte bwámbwam, bédé-ε menyinge.

³ Ndé mbónj nén meé, bēmbé chōm éche bēnwōngé, bēntōmtēn-ne abe tómaa chōm éche bēmbéé bēbage'. Bébágé'áá-ε ngáne nlém nímāb ménlāá'ε bó.

⁴ Bēnchān syāné bwámbwam ábε menyinge áwōngén bad bé Dyób bé Jerusalem ngáne bōmpε bébeleé.

⁵ Bēmbél tómaa ngáne sēnwēmtēnné. Bēnsēbē ádāb alongé abe á mekáá nime Sāngwée. Ámbíd ené bēmbé ádāb alongé áwed mekáá ngáne Dyób áhedeé aá bēbel.

⁶ Né-ɔɔ, sécháa' Tituse awé ambootéd nímén nsón ne nyé nén bán ádíí áwōngan nyé, nímén nsón nime nyésánlé ekáá áte, nyébāgε-ε bad kéchéé éche bétógnéé ne nlém nhóg, nyépid mó á asóg.

⁷ Bɔɔb-ɔɔɔ, nyébele bwám á menzii mésyāal. Adúbe áwúú nyé áte. Nyékale' nkalān ní bwám, nyébíí mekan mé Dyób, nyéwóó nlém áwōngén bad nyédáá-ε sé bwámbwam. Né-ɔɔ, séhede bán nyébele bwám, kááñne ásále ekáá áte, nyébage-ε bad kéchéé éche bétógnéé.

⁸ Meékamlánné nyé ábel nén. Bonj ngáne rínyíné bad ábe bédúbpé bēwōngan bad bēmpεe, nhede meé nyémpε nyélúmed ngáne nyédáá bad bēmpεe.

⁹ Nyébíí ngáne echéd Sān, Yesu Krístəá áwōnganné nyé ásale ekáá áte. Kéchéé éche Dyób áwóó mó áwóó. Bonj kéné á etúú échén antedé nímé nhōn rísyāal ádyób ápε á nkōnsé abé nēn ntógétōke ní mod. Ámbél nē ábel bonj nyékud nnam nime Dyób ábāgεé bad.

¹⁰ Mbage nyé elébé nén meé, mwé nime rítómé nyémbé bad bé e'só áwōn nlém áwōngén bad, nyémbé-ε bad bé e'só ábooted bad áwōngén.

¹¹ Bɔɔb-ɔɔɔ, nyétāngéné nsón nime nyébóótédé amad. Né débél bad bēbíí nén bán nyédé mbonjén ábe ngáne nyéwóó ápid-te nē á asóg melemlem ngáne nyémbonjénné ábooted nē.

¹² Nzé ewóó nímé nlém ábe mod chóm ngáne ewóó ch́, ébelé ékobnéd ne Dyób. Dyób déhédeéé aá mod ábe tómaa chóm éche áwóó.

¹³ Meehóbéé meé nwónngen níme nyébageé bad níwónngen bó bon nyé bèn nyébê á metakete, bon nhede meé nyé moosyaál melemlem, nyéwón chóm éche ékwógnédé nyé mod-téé.

¹⁴ Bóob-póó abud áde nyébúdé bwém awón, nyéwónnan bad ábe bédii béhede', ábel bon á pónidé eche nyémpé nyétógnènnè bómpé b́wónngen nyé. Nè débèl mod téé áwón.

¹⁵ Eténlédé á kálag e Dyób nén bán, "Mod awé ambud awón, enkénwóngé tómaa ngáne ántógnènnè, awe mó-'e enkembud awón, andii anwón ngáne ántógnènnè."

Bélómé Tituse bó á Korinto

¹⁶ Nságnan Dyób ábe áde ábágé Tituse ámpé nlém áwónngen nyé melemlem ngáne ábágé me.

¹⁷ Tituse eépagké áwèn áyale sélāngē mó bán ape, bon apag kááj ne áyale awóó nímé nlém ápe, apag áyale mwèn adáá ape.

¹⁸ Sélómne mó mwānned a Krísto ampée. Anén mwānned a Krísto, abyééné áfinté e mwembé rísyāal akal áde akaléé nkanaj ní bwám.

¹⁹ Saké alóm áde sélóméé mó dēmpen, mwembé mēmpwēd mó áhoon sé ngáne sébeleé nsón áwónngen bad ábel bon edubé éche Sāngwéé ényínned ne álúmed nén bán séwóó nímé nlém áwónngen bó.

²⁰ Séhēdēē bán modmod áhōb dyam dé mbéb tāngene nímén nsón mé asále dé ekáá áte níme sébeleé.

²¹ Séwóó nlém ábel dyam áde átāngēné saké á'só ábe Sāngwéé dēmpen bon káájne á'só é' baányonj.

²² Sélómé' mwānned a Krísto áwèn nchoo ne Tituse bó. Alúmté sé á menzii híin aá mówōó nlém áte áwónngen nyé. Bóob-pe áde ályágé nlém áwèn, anābpé nlém awón áwónngen nyé.

²³ Tituse mó ne mó ayōgké me áhoon ábel nsón áwónngen nyé. Abíníí bānned bé Krísto ábe békag ne Tituse bédii bad ábe mwembé mélómé á dín adáb, kéhéé-'e wéé békíí mam níme bébeleé mépiinad Krístā edubé.

²⁴ Né-óó, nyélúmed ábén bad nén bán nyédáó bó. Ábel áde nyébenlé nè, mwembé níme rúlómé bó mēsōñtēn nén bán nén d́ó akáá bon sékumné nyé ekáá á tál.

9

Békag bad bé Krísto bé

Jerusalem mōné asañned

¹ Bóob-póó, éesaá etógnén me átele nyé tāngene nsón níme séwónnganné bad bé Dyób.

² Mbíí nlém níme nyéwóó áte áwónngen bó, mbééné-'e nyé kúmbe awón áde nyéwóó nlém áwónngen bad ábe bédé á mbwōg e Masedonia. Menláá bó nén meé, "Nyé ábe nyédé á mbwōg e Akaya, nyémbé mboñsén se mpú-mwé ábe bó mōné." Nlém níme nyéwóó áwónngen bad rítédé bó bad híin nlém á abum ábel melemlem.

³ Bóob-póó, nlómé' ábén bānned bé Krísto áwèn, ábel bon ahób áde séhóbéé bán sékumne nyé ekáá á tál déébāg bán sékale metóm. Bon ébē bán ngáne rílangé bó meé nyéēbē mboñsén ábe bó mōné, nyéēbē-'e nè dēn.

⁴ Né-óó, nzé mpedé áde bad bé Masedonia b́épédé ne me bon ntáné nyé áde nyéébonseéé, séékwāg bwāmbwam, nyé-'e ámpé nyékwāg.

⁵ Né-óó, nè d́ó akáá bon ndól áte nén meé édé etógnén álóm ábed bānned bé Krísto á'só, ábel nyémad nwónngen níme ríchábé ámín níme nyéhóbé bán nyéēbē bó, abonjen. Nzé nyébelé nè, né nwónngen rísyāal mébē mboñsén nzé mpedé. Nén délúmed nén bán nyébage ne nlém nhóg saké áyale sényágté nyé.

⁶ Nyébíí nén bán mod awé eébudé awén, éebudté ahúd, awe mó-'e abudé awén ábūd-te ahúd.

⁷ Nyé mod té ábe mōné ngáne níme nlém rílangé mó. Mod éébāg sé nlém ríkōglád mó á abum ké' ébē byánán bényágté mod. Dyób ád́óó mod awé abage ne e'sán bé nlém.

⁸ Dyób débe nyé kéchéé éche nyétógnéne ábel bon nyéwón chóm ésyāal éche ékwógnédé nyé ásále ekaá áte ábe bad b́émpé. Nén débèl nyéébudé' bad mekan mé bwám ábele.

⁹ Eténlédé á kálag e Dyób nén bán, "Asánlé ekáá áte ábe betóótóké bé bad nwónngen, bad b́eéchaténné ábē e'bon bé nlém."

¹⁰ Dyób d́ó abage bad bwém ábe b́ewénéé, ábagé-'e bad chóm éche b́edyáké. Ábe nyé bwém ésyāal ábe nyétógnéne áwén, ábēl é'kwōg é'chyaá mbote eche ebuú áte bwāmbwam. Ábel nén áyale e'bon bé nlém ábe nyéwóó.

¹¹ Dyób débèl nyébé nhōn áyale e chóm ésyāal, ábel bon nyésále ekáá áte. Nén débèl bad híin b́esāgnēn Dyób áyale nwónngen níme nyébageé bó níme ríhúú ne sé.

¹² Abel áde nyébeleé nén, déesaá áwóngen bad bé Dyób dëmpen, boŋ áde kóŋne álúmed bán bad híin básagnan Dyób bwámbwam.

¹³ Mekan níme nímén nsón níme nyébeleé nén mébidédte áwed, mébèl bad híin bébagé Dyób edúbé áyale nyébele ngáne nkalan ní bwám níme Krístæ ríhóbéé, nyélúmté-’e ábèn e’ boŋ bé nlem wée bad bé Dyób ábe bédé á Jerusalem, nyélúmté-’e wée bad bé Dyób bémpée.

¹⁴ Bəwóó nlem ányin nyé, bekánád-te nyé áyale nsimé ní Dyób rídé ne nyé. Mmè nsimé ríhábé ámin bwámbwam.

¹⁵ Nságnen mbè ne Dyób áyale abagé syáné nsimé níme rílélé ahægtan.

10

*Paale aláŋgé bad bé Korinto
ad níme nsón ntáŋgéné*

¹ Mè Paale, me awè mpwiítédé nsudte-’e yál nêŋgáne Krístæ, ncháa nyé. Baahóg béhóbe’ nén bán nzé ndé ne nyé mbelé ríwógé mbwóg. Bán boŋ nzé meésé ne nyé, mbelé rítenlé nyé kálag éche éwúú áte.

² Ncháa nyé nén meé nyéebèl’ ngáne ábè bad bébeleé ábel boŋ nzé mpedé áwèn, ríhóben nyé ésebán mbáa’ dyamdyam. Bad ábe méhóbènnè bédii bad ábe béhóbe bán sébele nsón ngáne bad bé nkòŋsé bébeleé.

³ Kénéé edíí bán sèdé á nkòŋsé-te, séewānēē nzum ngáne bad bé nkòŋsé béwaneé.

⁴ Bwëm ábe séwanné nzum béesaá melemlem ngáne ábe bad bé nkòŋsé béwanné. Boŋ bwëm é’ nzum é’ ngine é’ Dyób bəó sébenladtè ábèbed mebwóg mé ngine níme ábəd bad bé ekoyi. Abén bwëm é’ nzum bəó sébenladtè ásuded mpentən ké ríhéé níme bad bépeneé níme meésé mbále.

⁵ Sébenlad bó ámpé ámad mehób mé kúmbe níme béhóbéé níme mébele’ boŋ bad béébye’ Dyób. Sébele’ bad béhəŋlan nímad mewémten ábel nímad mewémten mésyāal mébé nyaa éche Krístæ áhédeé aá mébé.

⁶ A pónde éché nyébenlé ngáne Krístæ áhédeé ne nlem rísyāal, dəó séboŋsenné ákəgsen kénzéé awé alúmté aá məóbenlé ngáne Krístæ áhédeé.

⁷ Nyénəne’ chòm éche édé nyé á’sə-te. Mod ké ahéé awé asumé nlem ne Krístæ ábíi aá ngáne módíí, nê dəó sémpé sédíí ne Krístæ.

⁸ Ké menküm ké ekáá á tál áyale ngine eche Sáŋgwéé ábágé me tómaa ngáne ríkuméé bəob, méewógké e’són. Abagé me ene ngine áwéd nyé áte saké ásuded nyé adúbe.

⁹ Meéhādēē meé ényíned nén bán kálag éche rítenléé nyé edíí áwóged nyé mbwóg.

¹⁰ Nhóbe nén áyale bad béhóbe bán kálag éche rítenléé nyé éwúú áte, éwóó-’e, e’yale bé mbéb áte. Béhóbe-’e ámpé bán boŋ nzé mmèn ndé, meewóó’ é ngine, kéchéé éche ríhóbéé-’e éewóó’ é ngine ké póg.

¹¹ Bad ábe béhóbe nê bəbíi nén bán kéchéé éche rítélé á kálag, nzé meésé ne nyé, mbel chəó nzé ndé ne nyé.

¹² Séehēlēē-se séhób mbéd bán séhəgtan yál, ké’ é sé bán sèdé nyaa póg ne bad ábe béhóbe’ mekan mé bwám áyál echáb. Boŋ ngáne bèn ne bèn béhəgtanné yál, béhóbe-’e bán bèn ne bèn bétómné, bédé eyóké.

¹³ Boŋ sé pen séékümēē ekáá á tál tómaa ngáne sétáŋgéné akum. Hóm áde Dyób álómé sé aá sébel nsón dəó sébéneé kúmbe. Nsón níme sébeleé áfínté echèn mómpé rídé nsón níme sébéneé kúmbe.

¹⁴ Séékümēē ekáá á tál ábel nsón hóm áde Dyób dénkənlómme sé nsón abel. Sé-’aá sébédé bad bé’sə ábid nchabnede áhye dé akale nyé nkalan ní bwám níme Krístæ.

¹⁵ Séékümēē ekáá á tál tómaa ngáne sétáŋgéné akum, nedé séékümēē ekáá á tál áyál e nsón níme bad bémpée bébé. Boŋ pen sésumé nlem nén bán ngáne áden adúbe ákwogé, nê dəó nsón níme sébeleé mékwogéé bwámbwam mebwóg níme sébeleé nsón.

¹⁶ Nén débél séékəg mebwóg mémpée níme méchábnedé, sékale’ Nkalan ní bwám, ésebán sékume’ ekáá á tál áyale nsón níme bad bémpée bébéle mebwóg mémpée.

¹⁷ Eténléde á kálag e Dyób nén bán, “Kénzéé awé akume’ ekáá á tál, atáŋgéné akum ekáá á tál, áyale chòm éche Sáŋgwéé ábenlé mó.”

¹⁸ Saké ahób áde mod áhóbéé yál mekan mé bwám á yál dəó álúmté’ bán akóbnédé néé mbapēē a nlómag, boŋ mod a mbále awé Dyób áhóbéé mekan mé bwám á yál mó adé mod awé akóbnédé.

11

Paale ne bembapēē bé nlómag bé metóm

¹ Ncháa nyé nén meé nyémwe ríláa nyé mwá a akan ké nnyínnéd ké eyóké. Nyébán metúu.

² Nsiide' nyé nyaa eché Dyöb áhele asíí nyé. Nyédii nêngáne ngon e mmwaád eché eébií mwênchóm. Ane mmwaád mós ríhóbé meé mod nhóg áwōŋ, ane mod adii'-e Yesu Krístaa.

³ Boŋ ké nê, ndé mbwóg nén meé ngáne Satane ámpongé Ife nló áte ne rímē mwane, melemlem nê dáo bépongé nyémpē nló áte nyaa eché nyéesummé rímēn nlém rísyāāl ámpē wēe Yesu Krístaa nyébelelé'-e mós ne nlém rísyāāl.

⁴ Nhóbe nén áyāle nzé mod apedé boŋ akánlé nyé nkalan ríme méesē nkalan ríme Yesue ríme sēnkaleé nyé, nyébelé nyésēbēn mós tál. Ké'-e nzé akánlé nyé tǎngene edáádāŋ éche éesē edáádāŋ éche sēnkaleé nyé, nyébelé nyékob. Ké'-e nzé mod akánlé nyé nkalan rí bwám ríme méesē nkalan rí bwám ríme sékánlé nyé, nyébelé nyékōbēn mós mekáá mébe.

⁵ Meedúbpeé meé ábén bad ábe béchágé yāl bán bédé bembapee bé nlómag bémbáá betómé me áyāle e nsón ríme bébeleé, nzé nhágténé syāābō.

⁶ Nhele se meebyéé' dyam ahób áfínté e bad ngáne béhóbéé, boŋ nwóó nsōŋŋen tǎngene dyam áde ríhóbéé. Sékéluméd nyé rímēn mekan áte híin ríme sébeleé.

⁷ Ade ríkánlé'áá nyé nkalan rí bwám ríme ríhuú ne Dyöb, menkénhóbpe meé nyésábe me. Mensudéd echem yāl ábel boŋ nyéwōŋ edúbé. Ade membēnlé nén, dyam dé mbéb dáo mēmbēnlé-ye?

⁸ Mbēnlé'áá nyé, mwembé mémpēe méšábpē me, né-óó, ébébé byánán ndoge' ríme mwembé áwōŋŋen nyé.

⁹ Ade mēmbēē'-e ne nyé donje á pónde meewóo'áá chómchóm boŋ meétagte'áá nyé, áyāle kéchéé éche méntōgnēnné ábēm baányāŋ bé Krísto ábe bémbíd á Mase donia bébágé'áá me. Ngáne mēnkēntagédte nyé ngen e'só, méetagéd-taa nyé pónde ké póg.

¹⁰ Ngáne ríkaleé mbále née mod á Krísto, modmod á mbwóg e Akaya eéhēlēē-se ábēl se nsóg ekáá akum á tál akob áde méekobéé nsábe áwēn.

¹¹ Nyéwémténé bán ahób áde ríhóbé meé méetagédte nyé ákob chóm áwēn adii áyāle méedāā'é nyé-ye? Dyöb ábíí áá ndáá nyé.

¹² Adén akan áde ríbeleé bōob, mēbē ríbeleé dós, ábel boŋ méébágē bembapee bé nlómag bé metóm etál áwōŋ nzoŋ akum ekáá á tál áhób nén bán bébele nsón melemlem ngáne sémpē sébeleé.

¹³ Eché ndín é bad éche ékume' ekáá á tál, bédii bembapee bé nlómag bé metóm. Bédoge bad áyāle e nsón ríme bébeleé, alúmed áde bélúmtéé yāl byánán bédii bembapee bé nlómag ábe Krístaa.

¹⁴ Nén déékāmtēē me yāl áte, áyāle nén ké Satane mómpē alúmté yāl byánán adii ángel e Dyöb eché esáá.

¹⁵ Né-óó, éesaá me menyáké nzé bembalede ábe Satane bómpē bélúmté yāl byánán bédii bembalede ábe béyágté' bad ábel mekan ríme mé-tǎngéné ngáne Dyöb áhedeé. Kásŋne á asóg, nkóŋŋen ríme békudté mé-tǎngēn rímāb mbéltéd.

Metake ríme Paale ákudé née Mbapee a nlómag

¹⁶ Nhóbe ámpē nén meé, modmod eewémtán áá ndé eyókél. Boŋ nzé nyéwémténé bán ndé eyókél, nyéwóg-kóó chóm éche rílangéé nyé ábel boŋ mémpē ríkum ekáá á tál mwámpín.

¹⁷ Kéchéé éche ríhóbéé bōob éesaá chóm éche Sǎngwéé áhóbé áá ríhób. Nzé nkume' ekáá á tál áhób kéchéé bōob, né nhóbe nêngáne eyókél é mod.

¹⁸ Ngáne édíí bán bad híin békume ekáá á tál née bad bé nkōŋsé, mémpē mēbēl melemlem.

¹⁹ Nyébēn nyéhóbéé bán debyéé dēn-éé nyékudé, nē ábélé nyékobe ne menyíŋge kéchéé éche e'yókél é' bad éhóbéé.

²⁰ Ké mod átimté' nyé nêngáne ntán, ké ádyāg nyé bwēm áyāl, ké'-e ádogé nyé, ké'-e áchāgté yāl ámín, ké'-e ábōm nyé abén á'só, nyékobe mós.

²¹ Akwágké ákóbe me nén, sēnkēnwōŋgé ene ndín e nlém ábel nyé éché ndín é mekan á yāl.

Nhóbe bōob nêngáne eyókél é mod. Mēbē kúmbe, ríkumé'-e ekáá á tál áyāl e mekan ríme ríbeleé melemlem nêngáne bembapee bé nlómag bé metóm bébeleé.

²² Belángé nyé bán bédii bad bé Hibru bēn, mémpē ndii mod á Hibru. Béhóbé bán bédii bad bé Israel, mod á Israel mós mémpē rídií. Béhóbe bán bédii bad bé mbyaa ríme Abrahame, mod á mbyaa ríme Abrahame mós mémpē rídií.

²³ Béhóbé bán bédii bembalede ábe Yesu Krístaa, mémpē nlánge nyé meé mbelé nsón tómaa bós. Nhóbe' bōob nêngáne mod awē nló méesáá'é áte. Mbelé ntú rí ngíne tómaa bós, nkénké á mbwóg ngen ne ngen tómaa bós, nkénkú mbéte é ngíne tómaa bós, nkémbē'-e á nsāl rí soŋ ngen ne ngen tómaa bós.

²⁴ Bad bé Israel békébmē me e'taŋgú móom méláán ne abog, ngen étáan.

²⁵ Bad bé Roma békébmēn me ntōŋ ngen éláán. Ngen póg bad bēmpēe békébmēn me meláá kásŋ bēpōn me awúu. Síma ékékunnéd sé á edíib é nkwē-te ngen éláán. Pónde póg

nhóó'áá á edib é nkwě, nén dèmbenléd áyāl e epun ehóg ésyāāl, nkuu ne mūte. ²⁶ Nkénkě meke bwámbwam. A meke-té wê, e'dib é'képón me ahóod. Mponé alongé abód á mekáá mé bechíb, á mekáá níme ábêm bad bé Israel ne á mekáá níme bad ábe béesé bad bé Israel. Mponé alongé abód á dyad á mbáá, nípōn alongé abód á ehyánge, nípōn alongé abód á edib é nkwě te, nípōn-ne alongé abód á mekáá mé bad ábe béhóbe bán bédé bad bé Křısto áde béesaá.

²⁷ Mbelé ntù ní ngine, nnāngé epin ngen ne ngen. Donje á pónde meewóo'áá chòm éche rídýággkě ké'ε ké chòm éche nímwágkě, meéyógkě'aa-'ε pónde awón ádyé ndyéed. Donje á pónde ahéb ábágáá me á yāl bwámbwam meewóo'áá-'ε chòm éche ríhágkě á yāl.

²⁸ Amín e nímén mésyāl, nwóó níme nímén áte mbwe-té ánon mwembé rısyāl níme rídé ásé echēm bwám.

²⁹ Nzé mod eewúu áte áyāl e mekan mé Dyób, mbelé nwóg yāl áte melemlem ngáne mómpe áwógéé. Nzé bebélté mod mbéb, mbelé nwóg ndutul bwámbwam.

³⁰ Nzé rítāngéné ekáá akum á tál, né chòm éche rítāngéné ekáá akumen á tál édíi mekan níme mébele' bonj bad bényín me nēngáne mod awé eewóo ngine.

³¹ Dyób, Sáá awé Sāngú Yesue, abíi áá meékālē metóm. Mekenag mébê ne mó á ngindé ne á ngindé.

³² Ade mbédé á dyad á Damaskos, nkamlēne awé ambé ásé e kān Aretase ambané sánze ánon nsāl mé e'ké ní dyad rısyāl ábel bonj békób me.

³³ Bad bénhē me á elón-tē, bebídéd me á wínde eché ebédé á eséd éche énlāngéd dyad, básüdéd me á ndaab, dso rınyágté bonj ríkē-'ε.

12

Dyób álúmté Paale mekan á ndóg-te

¹ Mēbē níkumé ekáá á tál. Kénéé édíi bán nē déewōngannē. Bonj mēkě á'so álāa nyé tāngene ndóg éche rınyíné ne mekan níme Sāngwéé álúmté me.

² Mbíi dyam áde dēmbenléd ne mod awé adúbpe Křıstāo nhóg. Dyóm á mwé ne rıniin áde átómé ámbid, Dyób dēnsog mō ákēen mō ádyób á ndágke eché etómténé achab amín. Meebíi'ε ké anké áwed á ekob é yāl ké'ε á edaádān, Dyób dso abíi.

³ Mbíi-'ε chòm éche ébēnlédé ane mod áwed, kénéé meébíi'ε ké á ekob é yāl dso ábédé ké'ε á edaádān, Dyób dso abíi.

⁴ Křıstāo ansog mō, ákēen mō á Paradis. Ahed Dyób dénlāā mō mekan níme éemwagké áá moonyon a ekob é yāl áhōb wéε bad bémpēe.

⁵ Ayāl e ene ndín e mod dso mékummé ekáá á tál saké áyāl echēm chēn. Chòm éche mékuménne ekáá á tál édíi mekan níme mélúmté' bán nwóó yāl e moonyon.

⁶ Bō ké mendān ké ekáá akum á tál, méenyínédte nēe eyókéł é mod áyāle mbále chso mékanlé. Méekuménne eché ndín é mekan ekáá á tál ábel bonj nyéebāgē me edúbé áyāle eché ndín é mekan. Bonj pen ndaá meé nyétéd me ngáne rídíi áyāl e mekan níme mbeléé ne níme rı'yágtéé nyé.

⁷ Bonj ábel bonj meebág kúmbe áyāl e níme mekan mé menyáké níme Dyób álúmté me, bonj ábēl-le nwóg, Dyób dēmbēł áá rıwōn nkole á yāl níme níbélé'áá me rıwógé e'wε bwámbwam. Mmén nkole níbédéé nēe mésēnzε níme Satane álómé átaged me ábel bonj meebág kúmbe.

⁸ Nkánne wéε Sāngwéé ngen éláán, rıcháā mō meé ákoben me nímén metake.

⁹ Bonj chòm éche ánlāā'ε me ébédéé áá, "Nsimé níme níbágé wε níkwógé wε. Nwédé wε áte nyaa eché étóméé metake mésyāl áte níme éwóó. Ayāle á pónde eché ngine éebágkě mod áte dso echem ngine éwōnganné mō áwéd mō áte." Bōob-pō, mébē menyenge ákum ekáá á tál áyāl e mekan níme mélúmté' bán ndíi moonyon a ekob, ábel bonj bad bényín nén bán ngine eché Křıstāo édé me áte, chso'áá ewéde me áte.

¹⁰ Né-ōs, á yāl e Křısto, mbelé mbé menyinge ké áde méewúu'ε áte, ké áde bad bésyáé'ε me, ké áde mekan mélnlédé me áte, ké áde bad bétagteé me ké'ε áde rídíi á ndutul té. Nhóbe nén áyāle pónde ké ehéé áde méewóo'ε ngine, Křıstāo ábelé ábē me ngine.

Paale atōhtan mwembé níme rídé á Kōrinto

¹¹ Nhóbe nēe eyókéł é mod bonj nyéé nyékáá bonj rıhōbē nē. Nyēmbé nēe nyéhóbeé me mekan mé bwám áyāl. Ké émbē bán meesaá dyam, bonj pen bad ábe nyéchāgēé bán bembapεé bé nlomag bémbáá, béetóméé me áyāl e chómchóm.

¹² Ade níbédé ne nyé, menwēsén álúmed nyé e'chemléd ne ábel menyáké mé ngine álúmed nén bán ndíi mbapεε a nlomag awé Dyób álómé.

¹³ Etóméé ábele áde níbēnlé nyé bonj meékwentεne meé nyésábe me, nyéláa me nyaa empée eché rítédé bad bé mwembé níminí meé bédé me etógnén tómaa nyé. Nzé édé nén bán nē áde awusé, nyélagsén me.

¹⁴ Bɔɔb ndé mboŋsɛn ɔpɛ ɔwɛn ngen ɛche ɛlɔntɛnɛn ɛlɔ́án boŋ pen méetagédte nyé. Méépáǵké ɔ́bel boŋ nyébage me bwɛm boŋ nyébɛn-ɛɛ nyékaɔ́ boŋ nɔ́pá. Nyétáŋǵéné ɔ́bii nɛn bán besáá ne benyáá bé bán bɔɔ́ bétáŋǵéné ɔ́bab bán atáŋen saké bán bétáŋǵéné benyáá ne besáá.

¹⁵ Mɛ́bɛ menyinǵe ɔ́benled kéchéé ɛche níwóó kááŋne yál echɛm, ɔ́wɔŋgen nyé. Nzé ndáá nyé bwámbwam, nédé nyémpé nyéetáŋǵenɛɛ me adɔŋ bwámbwam-ɛ?

¹⁶ Nyébɛn nyébíí nɛn bán menkɛntagédte nyé, boŋ mod ampée ahóbe aá membé akwáb, rídogné-ɛ nyé metóm.

¹⁷ Chán méndogké nyé? Bad ɔ́be ménlómme ɔ́wɛn menláá bɔ́ méɛ bédog nyé-ye?

¹⁸ Mencháŋ Tituse méɛ ɔ́pɛ ɔ́wɛn, nłómɛn-ne mó aníníí mwánned á Krísto. Nédé nyéɛhɔ́b bán ɔ́de Tituse ɔ́pédé ɔ́wɛn, andog nyé-ye? Eesaá mbále nɛn bán sé Titus sɛwóó mewɛmtɛn mehóŋ-ɛ?

¹⁹ Kapóŋ enén pónde esyáál nyéwɛmtan bán sɛhɛde ɛchɛd yál nɔ́om asuud ahóbe ɔ́de séhóbeɛ bán sékánle nyé mbále. Eesaá nɛ, kéchéé ɛche sɛláŋǵéé nyé sɛláŋǵe nyé chɔ́ nɛɛ bad ɔ́be Krístáá ɔ́lyáŋǵéé, Dyóɔ́p-ɛ ɔ́wóŋé' chóm ɛche séhóbeɛ. A-baányan bé edáŋge, kéchéé ɛche sébeleé, sébele chɔ́ ɔ́wéd nyé áte.

²⁰ Mbáá' nɛn meɛ ɔ́de mépɛɛ ɔ́wɛn mɛ́tán nɛɛ nyébeleé mekan níme méedáá'ɛ, me-ɛ ampé mɛ́bel mekan níme nyéedáŋge. Mbáá' nɛn meɛ ɔ́de mépɛɛ, mɛ́tán ngáne nyébɛn ne bɛn nyésɛnleɛ, nyésíndeɛ nhóŋ ne aníníí, nyélinǵéé nhóŋ ne aníníí, nɛɛ nyéedáá'ɛ bán mod ampée awóŋ edúbé, nɛɛ nyésyáŋneɛ, nyéhóbeɛ nhóŋ ne aníníí ɔ́mbíí, nɛɛ nyédíí kúmbe, nɛɛ nyébeleɛ-ɛ mam mé epuutéd.

²¹ Mbáá' nɛn meɛ ɔ́de mépɛɛ ɔ́wɛn ampé, Dyóɔ́b déwógéd me e'són ɔ́wɛn ɛ'só. Mɛ́sudɛn-ne ɔ́yále bad híin ɔ́tínté echɛn bédíí bébele' mekan mé mbéɛ níme bɛbéle'áá bɔɔ́b, ɛsebán béhɔ́ŋlan ɔ́dab ɔ́be dé mbéɛ ɔ́bel ngáne Dyóɔ́b ɔ́hɛdeɛ. Bébele' mekan mé mbinde, békábe mesón, bébele-ɛ mekan níme mbinde níme méwógte bɔ́ e'són.

13

Paale abagé elébé é asóg

¹ Nɛn délontɛn ngen ɛlɔ́án ɔ́de nɔ́pagké ɔ́wɛn. Etɛnlédé á kálag e Dyóɔ́b nɛn bán, “Nzé békáadte mod bétáŋǵéné awóŋ wéɛ mbóŋ ɛ́be ké'ɛ ɛlɔ́án.”

² Ade mémpɛɛ ɔ́wɛn ngen ɛche ɛnlontɛn ɛ́be, menláá nyé meɛ mékóŋsɛn bad ɔ́be bébele' mbéɛ ɔ́tínté echɛn. Ndií nláŋge-'ɛ bɔ́ bɔɔ́b, nláŋge-'ɛ bad bɛmpɛɛ ɔ́be bɔ́mpɛ bébele' mbéɛ, ké bɔɔ́b ɔ́de méesaá ne nyé. Ade mépɛɛ ampé, méewógké modmod ngól.

³ Ene pónde dóo nyébíí'ɛ bán kéchéé ɛche níhóbeɛ ɛ́húú ne Krístáá. Eesaá nɛn bán Krístáá eewúú'ɛ áte ɔ́yál e chóm ɛsyáál eche ɔ́beleé, boŋ ɔ́lúmtɛ' eche ngíne ɔ́tínté echɛn.

⁴ Edé mbále nɛn bán Krístáá nɛŋgáne moonoyɔŋ, enkɛnwóŋge ngíne ɔ́de bɛmboméé mó á awóŋ. Boŋ kɛnɛ, ɔ́de á alonǵé bɔɔ́b, ɔ́yále Dyóɔ́b démbɛnled eche ngíne ɔ́báne mó á alonǵé ampé. ɔ́be ɔ́de sédíí mod nhóŋ ne Krístáá, sémpɛ nɛŋgáne baányon séewúú'ɛ áte. Boŋ sémpɛ séɛbɛ á alonǵé ne Krístáá á ngíne e Dyóɔ́b, sébɛle-'ɛ nyé chóm ɛsyáál ɛche sétáŋǵéné nyé ɔ́bele.

⁵ Nyé mod téé mwɛn ɔ́tɔŋ yál asimen, ɔ́bii ké alonǵé ɔ́den ɔ́de nɛŋgáne alonǵé á bad ɔ́be bédúbpé. Ndúbpé meɛ nyé mod téé ɔ́bii nɛn aá Yesu Krístáá ɔ́de mó áte. Nzé nyé mod téé asímmé yál né nyéɛbii nɛn bán á mbále nyédé ne Krístáá.

⁶ Ndúbpé meɛ nyéchemé nɛn bán nsón níme sébeleé rílúmtɛ nɛn bán sédíí bembapɛɛ bé nłomag bé mbále.

⁷ Sékánne Dyóɔ́b nɛn bán nyéébeɛ' awusé ké ahóŋ. Séekánnéé nɛ ɔ́bel boŋ bad bényín bán sédíí bembapɛɛ bé nłomag ɔ́be bébele mɛ́mab nsón bwám. Boŋ pen, sékánne' nɛn bán, nyébele mekan nyaa echɛ etáŋǵéné kɛnéé edíí bán donǵe á bad béhɔ́b bán séelúmtɛ chómchóm ɛche ɛlúmtɛ' bán sédíí bembapɛɛ bé nłomag ɔ́be bébele nsón bwám.

⁸ Edé nɛn ɔ́yále séhɛɛɛ-se sébɛl dyamdyam ɔ́de ɔ́táŋgan nkalanɔ́ ní bwám ní mbále. Boŋ pen chóm ɛche sébeleé edíí ɔ́wɔŋgen bad ɔ́bii ne ɔ́bel ngáne nkalanɔ́ ní bwám níhóbeɛ.

⁹ Sébelé sébé menyinǵe nzé sényíné nyébele mekan níme mélúmtɛ nɛn bán ɔ́dúbe ɔ́wúú nyé áte, ké sépen sényínnéd bán séewúú'ɛ áte ɔ́yále séenyínéé nɔ́om ké póg ɔ́kóŋsɛn nyé. Sékánne' nɛn bán Dyóɔ́b ɔ́wɔŋgen nyé nímmɛn mbɛltéd níbɛ bwám ne ɔ́be dɛn.

¹⁰ Nɛn dóo ɔ́kóá boŋ rítel' nímmɛn mekan, kɛnéé edíí bán méesaá ne nyé. Ntenle nyé ɔ́bel boŋ nzé mpedé ɔ́wɛn mééɛnɛlɔ́d ngíne eche Sáŋgwéé ɔ́bágé me ɔ́káne nyé áte. Kunze eche Sáŋgwéé ɔ́bágé me edíí ɔ́bel boŋ níwɔŋgen nyé ɔ́wéd nyé áte saké ɔ́bel boŋ mɛ́benled chɔ́ ɔ́suded nyé.

Melɛntɛn mé asóg

¹¹ ɔ́sóged enén kálag, a-baányan, nyébɛ menyinǵe. Nláŋge nyé meɛ nyéhɔ́ŋlen, ɔ́den ɔ́be ɔ́be bwám ne ɔ́be dɛn. Nhɛde meɛ nyéwóg ɛ́chɛm elébé. Nyéwóŋ mewɛmtɛn mehóŋ. Nyébɛ

nsaŋ ne nhóg ne aníníí. Nzé nyèbèlé nínén mekan mésyāāl, Dyòb áde ábèlé boŋ nyédæen, nyèbè-ε nsaŋ ne nhóg ne aníníí, dénaméd nyé.

¹² Nyéhê nhóg ne aníníí tâl á ðin á Yesu. Bad bé Dyòb bésyāāl bélómmé nyé melɛntɛn.

¹³ Nkânne' nèn meé nsimé nime Sánjú Yesu Krístæa, edæŋge é Dyòb, ne nlatén nime Edæádæŋ éche Esáá épæenéé, bébê ne nyé.

Kálag echê Paale áténlé Baá Galesia Ndibned ní kálag

Békálé' áá nkalaj ní bwám tãngene Yesue áfínté e bad ábe béese' bad bé Israel, bad bénkõb-pe mó. Atate démbíð áyál e nímén nkalaj áde áhõbe ké mod atãngéné mbéndé e Mosese ahíd ábel boj ákoj mod a Krísto abé. Paale alúmté áte nén áá chõm éche ékæ' boj mod ákud alongé áde Krístæ abageé édií adúbe áde áwóó. Boj áfínté e mwembé níme mbédé a dyad á Galesia, dyad á mbwõg e Roma e Esia Maino, bad bébedé ábe bétãngánnáá ayáge áde Paale, béhõbê nén bán mod atãngéné ahíd mbéndé e Mosese ábel boj ákobned á'só é' Dyõb.

Kálag echê Paale áténlé mwembé ní Galesia ebédé ábel boj bad ábe béhídé' áá adúbe áde déetãngene bétim ámbíð béhíde adúbe á mbále.

Paale aboótédé enén kálag álumed bad áte kunze echê áwóó ábê mbapee a nlómag awé Yesu Krístæ. Alúmté áte nén áá abé áde módíí mbapee a nlómag áhúú ne Dyõb saké ne moonoyõ. Alúmté-é áte nén áá níme nsón menkoj abé ábel nsón áfínté e bad bé Israel. Ahóbé-é ámpê nén áá adúbe dẽmpen dõó ákæ' boj bad békobnéð á'só é' Dyõb. Asóged enén kálag, Paale alúmté áte nén áá abé á mod a Krísto ákag ne edãnge éche ehúú mó á nlém té, adúbe áde adúbpé Krístæ.

Nkabted ní kálag

Ndibned ní kálag 1.1-10

Kunze echê Paale áwóó ábê mbapee a nlómag 1.11-2.21

Nkalaj ní bwám mé nsimé ní Dyõb 3.1-4.31

Kunze e mod a Krísto ne chõm éche átãngéné ábel 5.1-6.10

Nsógten 6.11-18

Paale alomé melenten

¹ Me Paale, mbapee a nlómag nhóg, me-é ntelé enén kálag. Saké baányõj bẽpwédé me ábê mbapee a nlómag. Meébnlád-taá kunze e moonoyõ. Boj nímem mpwẽdtédé ríhúú ne Yesu Krístæ bó Dyõb Titée, awé apuúdté mó.

² Mmèn ne bad bé Krísto bẽsyáál ábe bédé ne me hén, sélõmme' mwembé rísyáál níme rídé á Galesia melenten.

³ Nsimé ne nsaj ní Dyõb Titée awéd bó Sãngú Yesu Krístæ mbê ne nyé.

⁴ Nyébíí bán Yesu Krístæ abagé eche yál áwé áyál e nímed mbéb ábel boj áhúd syáné á mbeltéd mé mbéb níme rídé á nkõjs-te chui. Abelé né áyale né dõó Dyõb Titée ántfí' é.

⁵ Mekenag mébê ne Dyõb á ngíndé ne á ngíndé. Ebê né.

Nkalaj ní bwám mémpêe méesaá

⁶ Dyõb ápwédé nyé ábê ábê bad ámbíð e nsimé níme Yesu Krístæ ábénlé nyé. Boj édé me e'kõmten é' yál-áte ányín nén bán nyéwámséné Dyõb atede, nyéhíde ayáge dẽmpée áde nyéwémténé bán áde nkalaj ní bwám.

⁷ Nkalaj ní bwám mémpêe méesaá. Baahóg bédé ábe bẽpuutad nyé. Béheðe nkalaj ní bwám níme Yesu Krístæ ahãjlen.

⁸ Boj níláa nyé nén meé, nzé ké sé, ké' é ángel ehúú ádyõb boj ekánlé nyé nkalaj ní bwám níme rídé nhãjlen ne níme sãnkaléé nyé, e' dim é' bẽ ne mó.

⁹ Sémãd nyé aláa, nlãnge-é nyémpé meé, kénzée awé akánlé nyé nkalaj ní bwám níme rídé nhãjlen ne níme sãnkaléé nyé, boj nyékõb-pe, e' dim é' bẽ ne ane mod.

¹⁰ Ngáne ríhõbêé nén, nyéewémtán nén bán nhede' meé baányõj béchãge' me ðín á bwám. Meéhẽðéé né. Dyõb dõó ríhedeé meé áchãge' me ðín á bwám. Nzé émbê nén bán ndii nhede meé baányõj béchãge' me ðín á bwám, né meesaá mbãlede awé Krístæ.

Nkalaj níme Paale níhúú ne Krístæ

¹¹ A-baányaj, nhede' meé nyébíí nén bán nkalaj ní bwám níme ríkánlé nyé, méehúú' é ne moonoyõ.

¹² Moonoyõ ké nhóg eelãngeé me níme nkalaj, modmod eeyãgte' áa me. Boj Yesu Krístæ mwẽn móó alúmté me níme mekan áte.

¹³ Nyéwógé ngáne ádem alongé démbẽẽ ngen e'só áde ríhídé' áá mbeltéd ní bad bé Israel. Nyéwógé nén bán ntagté' áá bad bé Krísto ne nhel rísyáál. Nhede' áá meé nímad bó moosyáál.

¹⁴ Nhídé' áá ayáge á bad bé Israel tómaa bẽð bẽsyáál ábe syáãbõ sèbédé kãð. Menwõj-é kãn áte bwãmbwam áhíd elem éche ábẽð betaa.

¹⁵ Boj kénéé ebédé né, Dyõb démmãd me apwed né béechyáá' é me. Anchélé me ne níme nsimé, ábele mó.

¹⁶ Anlúmed me awe Mwän ábel boŋ ríkanle bad ábe béeseš bad bé Israel nkalaj ní bwám níme ane Mwän. Ade ábélé nê, menkëntánné modmod meé áyáged me dyam áde rítáŋgéné ábel.

¹⁷ Boŋ ábwōg-ábwōg menkě á mbwōg e Arebia. Ambíd e pónde, mentim ambíd á dyad á Damaskos. Menkénkaá-áá ké á Jerusalem áke dényin bad ábe bénsēbē bembapēe bé nlomag abé.

¹⁸ Ambíd e mwē rílaán dōo nkíí á Jerusalem ányin Petro.* Membé ne mó áwed dyóm dé e'pun ne é'taan.

¹⁹ Menkényinné mbapēe a nlomag ampée ké nhóg ésebé Jemse, Sāŋgú Yesue mwānyan.

²⁰ Mam níme rítenlé nyé medé mbále. Dyōb ábíí aá saké metóm móo ríkaleé.

²¹ Ade ríhúú á Jerusalem, menkě á mbwōg e Siria ne á mbwōg e Silisia.

²² Ene pónde né bad bé Krísto bé mwembé mé myad mé mbwōg e Judeya béebí'í me.

²³ Bēwōgé'áá wōgēn bán, "mod awē ahágé'áá bad bé Krísto á meséb mwēn atimé bōob akanle bad aá bad bédúbe Yesu Krístē, melemlem mé adúbe níme áhédé'áá abóded."

²⁴ Dyam áde Dyōb ábánlé me dēmbēl békéné'áá Dyōb.

2

Bembapēe bé nlomag ábinií béchéme nsón níme Paale

¹ Ambíd e dyóm á mwē ne ríniin, menkě á Jerusalem ámpē. Ene pónde menkě áwed ne Banabase, menwálé-'e Tituse áyál.

² Menkě áwed áyāle Dyōb dénhōb aá ríke. Ade ríbéde áwed, syáabe belyáged bé mwembé sēnkě kun. Mentánléd bó nkalaj ní bwám níme ménkaléé bad ábe béeseš bad bé Israel. Membel nê ábán nēn nsón níme ríbéle, ne níme rídii mbele', meébbō' ngēn.

³ Bēnkōb dyam áde ménlāā'é bó. Ké Tituse awē ambé mod a aloŋ á Grikia awē abédé ne me, bēnkényágedtē mó nēn bán bētāŋgéné mó ayag.

⁴ Kénē, donge á bad bé metóm ábe bénsāl áfinté e bad bé Krísto byánán bōmpē bédé bad bé Krísto bēhédé'áá bán bēyag mó. Ábē bad bénsāl áfinté echēd á mesōom-té ábel bényin ngáne débaleé mekan ne kunze esyáál áyāle syánē dedé ne Yesue. Bēhédé'áá bán débē betāŋ, déhíde' mbéndé e bad bé Israel.

⁵ Boŋ sēnkēnháá bó etál ké mwāmpín, áyāle séhédé'áá nēn bán nyébē nyébii ngáne mbále e nkalaj ní bwám ékóó abé.

⁶ Bad-te ámpē ábe bēbéde áhed néé belyáged bé mwembé, bēnkēnwōngé dyamdyam ábád amín e mam níme rí'yágté. Ké né-'e, abé áde bēmbē belyáged dénkēnwōngé dyamdyam ábel ne me áyāle moosyáál adii nyaa póg á'só é' Dyōb.

⁷ Boŋ bēntim anyin nēn bán Dyōb ábágé me ekag ákale bad ábe béeseš bad bé Israel nkalaj ní bwám.

⁸ Edé nēn bán, Dyōb áde ápwédé Petro ábē mbapēe a nlomag wēe bad bé Israel, dō-áá ápwédé mēmpē ábē mbapēe a nlomag wēe bad ábe béeseš bad bé Israel.

⁹ Ade Jemse, Petro ne Jone ábe bad bēmbí'í néé mekon mé mwembé bényiné bán Dyōb ábágé me nímē nsimé ábē mbapēe a nlomag, bēnhē sé Banabase ekáá-áte, álúmed nēn bán békóbé sé néé bad ábe bóbōo bebele' nsón nhóg. Syáábōo séntii nēn bán, sébē sékanle bad ábe béeseš bad bé Israel nkalaj ní bwám, bō-'e bēbē bēkanle bad bé Israel.

¹⁰ Bēnlāā sé pēn bán, sééchatán betóótókē bé bad awōŋgen. Nē dō-áá ábédé dyam áde mēndāŋ'é ábel bwāmbwam.

Paale akánné Petro áte á dyad á Antyōg

¹¹ Ade Petro ápédé á Antyōg, menkáné mó áte áfinté e bad áyāle ábelé'áá dyam áde déebo.

¹² Ade ápédé áwed pēn, ammentén ndyéed adyé ne bad bé Krísto ábe béeseš bad bé Israel. Boŋ áde donge á bad bé Israel bēbíde wēe Jemse á Jerusalem boŋ bēpe á Antyōg, Petro ambootéd mekuu adol ambíd. Eedyáge'áá ndyéed ámpē ne ábē bad ábe béeseš bad bé Israel. Ambel nē áyāle abáá'áá epepe é bad ábe bēhóbē'áá bán bētāŋgéné bad ábe béeseš bad bé Israel ayag.

¹³ Nē dēmbēl bad bé Israel ábe bēmbē bad bé Krísto bōmpē bēmbootéd mekuu adol ambíd. Kōŋne Banabase mómpē anhíd bó ábel áde awusé.

¹⁴ Ade rínyíné nēn meé bēbeleléé mam ngáne nkalaj ní bwám ríhóbēé aá bēbel, menlāá Petro á'só wēe bó moosyáál meé, "Kénéé edíí mod a Israel, etédte mbeltéd mí bad bé Israel, ebele mam bōob néé bad ábe béeseš bad bé Israel. Chán-nō éhele ényágté' bad ábe béeseš bad bé Israel áhíd mbeltéd mí bad bé Israel?"

* **1:18 Petro:** Kálag é'só éwóó Sepase. Adé dín adii melemlem néé Petro.

¹⁵ Sóo bën awë dedé bán bé Israel se á nchyaátén, deesáá née bad ábe béesë bad bé Israel ábe debíí nén bán béebíí'é mbéndé é Dyöb.

¹⁶ Boñ kéné, debíí nén bán Dyöb déekobéé mod née mod awë asáá áyále áhídeé mbéndé. Adúbe áde mod ádúbpé Yesu Krístæ dóo ábele' boñ Dyöb ákób mod. Né-óó ké syánë ámpë dedúbpé Yesu Krístæ ábel boñ Dyöb ákób syánë áyále adúbe áde dedúbpé Yesu saké áyále dehíde mbéndé. Dyöb déekobéé modmod áyále áhídeé mbéndé.

¹⁷ Ahed áde déhedéé bán désán' á'só é' Dyöb áyále adúbe áde dedúbpé Krístæ, ábele donje á bad bé Israel benýíne' syánë née bebel bé mbéy áyále deehídeé mbéndé é bad bé Israel ámpë. Nédë élutme' bán Krístæ móo abelte' syánë mbéb-é? Aáy, nê déehéleé-se ábë.

¹⁸ Boñ nzé ntímé ámbíd ámpë boñ nhíde' mbéndé éche mémmaté atede, né nkwedé mbéndé.

¹⁹ Nzé béhíde mbéndé chó ne chó, né nwédé. Né mbéndé chën-naá ewúú me. Boñ Yesu Krístæ anhúd me á mbéndé-te, ábel níhel Dyöb ábele.

²⁰ Awé áde Yesue ánwëé á awog áde nén bán mémpë menwé. Meesáá á alongé ámpë. Krístæ móo adé me áte. Né-óó, kéchéé éche mbéleé á nkõnsé-te wén bõob, mbéle' chó ne adúbe áde ndúbpé Mwán a Dyöb awé adás me, boñ awé-é á nló nímém.

²¹ Meesáá nhóg awé ahale ahób nén áá nsímé ní Dyöb meesáá dyamdyam. Áyále nén, nzé émbë nén bán Dyöb áhelesé ákób mod áyále áhídeé mbéndé, nédë né Yesue awédé á awog ngên.

3

Mbéndé káa adúbe

¹ Eyókéł é' bad bé Galesia. Nlem áhéé adyédeé nyé nén? Nyéekamtánné ngáne ménlümédte nyé áte nén meé, Yesue awédé á awog á nló níme nyé moosyáál-é?

² Ndás meé nisededé nyé dyam ahóg. Póndé echë nyékudé Edásánj éche Esáá, áyále nyéhídeé'áá mbéndé e bad bé Israel dóo nyénkudte chó-ye? Ngé áyále nyéndübëé nkalanj ní bwám níme nyénwögkë?

³ Chán nyédíí eyókéł nén? Née nyémaá abooted dé ábel ngáne Edásánj é Dyöb éhedéé, mbeltéd nímën níhedé átím á asóg hén bõob ngáne mewémten mé baányonj níhedéé-ye?

⁴ Nyékudé metake áde nyédúbpé Krístæ. Nédë nímê metake médeé ngên-é?

⁵ Dyöb dëmbë nyé Edásánj éche Esáá, ábël-le menyáké áftínté echën. Áyále nyéhídeé'áá mbéndé dóo dënkánj boñ ábelé né-ye? Aáy, saké nê dënkánj. Nkalanj ní bwám níme nyéndübëé móo mënkanj boñ ábel nê.

⁶ Nyénõne mod née Abrahamæ. Eténlédé nén bán, "Andúbé Dyöb. Nê dëmbël, Dyöb dënkob móo née mod awé asáá."

⁷ Nyésõnten-óó nén bán bad béesyáál ábe bédúbpé Dyöb ngáne Abrahamæ ándübëé bõo békóó bán ábe Abrahamæ ábë.

⁸ Eyale é Dyöb énhõb á'só e' póndé nén bán Dyöb dékõb bad ábe béesë bad bé Israel née ábë bad áyále bédúbpé mó. Nén démbýëen bootya póndé eche Dyöb dénláá-é Abrahamæ áá, "Méénaméd melonj mé nkõnsé méesyáál ámbíd echõj."

⁹ Né-óó Dyöb dénaméd moosyáál awé adúbé mó melemlem ngáne ánnamédte Abrahamæ.

¹⁰ Nyébíí-é nén bán e'dim é'dé ne baasyáál ábe bébánné nlem nén bán ahíd á mbéndé dóo débël boñ Dyöb ákób bõ. Eténlédé á kálag e Dyöb nén bán, "E'dim ne kénzéé awé eehíde' mbéndé ésyáál éche eténlédé á kálag e Dyöb."

¹¹ Bõob-óó élutme nén bán modmod eékobnádte á'só é' Dyöb áyále áhídeé chõm-éé mbéndé éhedéé. Nhóbe nê áyále eténlédé nén bán, "Bad ábe békõbnédé á'só é' Dyöb áyále bédúbpé, békúd alongé áde déemaá'."

¹² Mbéndé eewó'é dyamdyam ábel ne adúbe. Eténlédé á kálag e Dyöb nén bán, "Nzé mod ahíde' mbéndé ákud alongé, atãngéné mbéndé ésyáál ahíd."

¹³ Boñ Krístæ ahúdeé syánë á e'dim ábe dékudé á mbéndé-te. Eténlédé á kálag e Dyöb nén bán, "E'dim ne kénzéé awe hébõmmé á awõg." Né-óó, áde hébõmmé Krístæ á awõg, ámpém e'dim áyále mbéb níméd.

¹⁴ Yesu Krístæ ámpém e'dim ábel nén, bad ábe béesë bad bé Israel békud nnam níme Dyöb dénhõbpé áá, Abrahamæ áküd. Nê ákás adúbe áde dedúbpé mó, ábélé syánë ámpë dékudé Edásánj éche ánhõbpé áá móóbë syánë.

Mbéndé ne dyam áde Dyöb

dénhõbpé áá móóbël

¹⁵ A-baányan, ndás meé nítéd nhagtén ne mekan níme mébenlad epun téé. Nzé bad bébe bétédé nsal, boñ bétífidé dyam, bépédé-é á nchemtæn, modmod éhéleé-se ahúd dõ áse.

¹⁶ Dyöb dëmbë Abrahamε ne mwän akag. Kálag e Dyöb eehóβεé nén aá, “bän” byánán bad bébúú áte. Ehóβε nén aá “mwän.” Krístæ mó-’aá adé ane Mwän.

¹⁷ Chöm éche níkoó’ é ahób édii nén Dyöb démwē melē ne Abrahamε Dyöb áhób-pe aá mósłonéd adé akag. Mbwókel é mwē éniin ne móom mé mwē meláán, ámbíd e nē, dáo Dyöb ábágé Moseε mbéndé. Echē mbéndé éehelē-se ébóó nímé melē, se éhúd dyam áde Dyöb áhóbé ásé.

¹⁸ Nzé émbē nén bán, Dyöb ábage’ nyé kéchéé éche átāngéné ábē bán abe áyāle nyéhídeé mbéndé, né nímé nnam níme ábageé nyé méesaá ámpē áyāle dyam áde ánhōbpē aá mósłbelé Abrahamε.

¹⁹ Cheé-ō émbē nzom echē Dyöb ábágné mbéndé? Ambē chó álúmed bad chöm-εε abel dé mbéb ákóó abé. Ene mbéndé entāngén-ne abé kásñ ne pónde eche mwän a mbyaa níme Abrahamε awē Dyöb dëmbēinné akag ántāngēnē ape. Dyöb dëmbē mbéndé wēε ángel ábe Moseε. Moseε mó abédé mod-a-tínté a baányonj ne Dyöb.

²⁰ Bōōb-pōō mod-a-tínté aheadnad nzé bad bédé mbíd ébe. Boj Dyöb dëmbē Abrahamε akag ne mó mwēn, áde mod-a-tínté éesaá.

Nsán nime mbéndé éwóó

²¹ Nédē nén álúmte bán mbéndé epentan akag á Dyöb-ε? Aáy, éesaá nē mbéd. Nzé émbē nén bán mbéndé embé echē ebage alongé áde déemaá’, né desáá á’sō é’ Dyöb ahíd áde déhídeé chó.

²² Boj kálag e Dyöb ehóβε nén aá, mbéb níháá nkōñsé ísyāāl. Né-ō ndε echē Dyöb dénhōbpē aá mósłbē, abagé chó wēε bad ábe bédúbpé Yesu Krístæ.

²³ A pónde eche Krístæ éépēdēē, mbéndé enhanj syánē, dembé-’ε ásé e mbéndé kásñ ne á pónde eche Dyöb dénlümēdtē nén aá bad bésun nlém wēε Krístæ.

²⁴ Né-ō mbéndé chó enoné’áá sé kásñ ne pónde eche Krístæ ápédé ábel nén Dyöb ákob sé áyāle adúbe áde sédúbpé Krístæ.

²⁵ Bōōb áde pónde épédé echē détāngéné nlém asum wēε Krístæ, chöm éetāngeneé abé éche énone’ sémpē.

²⁶ Nyé moosyaál nyédii bán bé Dyöb áyāle adúbe áde nyédúbpé Yesu Krístæ.

²⁷ Nyékudé edusen, né-ō, nyédé mod nhóg bōōb ne Krístæ, nyéwóó-’ε kunze bōōb néε mó.

²⁸ Né-ō nhājén méesaá ken mod adé mod á Israel, ken mod éesaá mod á Israel, ken mod adé ntāñ ké’ε kunze, ken mmwaád-ε ké’ε mwenchóm. Nyé moosyaál nyédii mod nhóg áyāle nyédúbpé Yesu Krístæ.

²⁹ Ngáne nyédii bad bé Krísto, nyédii bán ábe Abrahamε, nyéékúd-te nnam níme Dyöb dénhōbpē aá mósłbē Abrahamε.

4

¹ Chöm-εε níhóβεé édé nén, mwän awē sáá áttíde aá mósdyé eche mbwóg, nzé adii adé mwēndem, abelé abé néε mbaledε, kénéε édii nén bán mó akoó ene mbwóg awónj.

² Ene pónde, abelé awónj bad ábe bélyágnédé mó ne ábe bēnōnne’ mó ene mbwóg kásñ ne pónde eche sáá áttíde épédé.

³ Melemlem nē dáo syánē dëmbēε néε bēndem áde Krístæ éépēdēē. Pónde eched, ngíne é nkōñsé éntēd syánē ntāñ.

⁴ Boj áde pónde eche Dyöb déntíí’ é épédé, Dyöb dénlōm awe Mwän á nkōñsé-te. Ane Mwän ambíd á abum dé mmwaád, ákwōg-ke ásé e mbéndé.

⁵ Dyöb dénlōm mó ákōde syánē á mehanj mé mbéndé, ábel boj syánē détim bán bé Dyöb.

⁶ Abé áde nyédii-’aá bán bé Dyöb, ábélé Dyöb álómé Edāōdāj é Mwän áwesyané nlém-té. Echē Edāōdāj ébélé bōōb, dechage Dyöb bán, “A-Tē.”

⁷ Né-ō nyéesaá betāñ ámpē. Nyédii bán bé Dyöb. Abé áde nyédii-’aá bán bé Dyöb, Dyöb débē nyé kéchéé éche átāngéné ábe bán abe.

⁸ Ngen e’só, áde nyénkëmbíí’ é Dyöb, nyébédé betāñ ásé e myöb níme méeseé dyamdyam.

⁹ Boj bōōb áde nyébíí Dyöb, ké’ε níhōb meé bōōb áde Dyöb ábíí nyé, cheé ékásá boj nyéhédé mbíd atimen ábe betāñ ámpē ásé e ngíne é nkōñsé?

¹⁰ Nyéhíde donje dé e’pun néε bíñ é’ mbáá, nyéhíde-’ε donje á ngon, donje á pónde áyāle mwē, ne donje á mwē néε bíñ é’ mbáá byánán Dyöb dáo nyé benléé.

¹¹ Nē ábele’ ndé mbwóg nén meé mbébté pónde áyāle nsón ísyāāl níme mbélé áyāle echén.

¹² A-baányanj, ncháa’ nyé meé, nyébē néε me, áyāle mémpē ndé bōōb néε nyé. Méesaá ásé e mbéndé ámpē. Nyéébeleé-’ε me dyam dé mbéb ké ahóg.

¹³ Nyébíí nén bán áde nísebpé nyé nkalanj m’ bwám akale, ndyééné’áá nyé áyāle menkëndyé’ é bwám.

¹⁴ Kénéε nímém nkole níhélé’áá níbel nyébāñ me áyāl, nyéekëmbāñ’ é me áyāl, nyéekënnān-naá me. Nyénkōb me byánán ángel e Dyöb chós nídíí, ké’ε byánán Yesu Krístæ nídíí.

¹⁵ Ene pónde nyèbè menyinge bwambwam. Héé nímè menyinge médíí bɔɔb? Mmɛn mbide nyé mbóŋ nén meé, á pónde eched, nyëndɔŋ me nyaa echè, nzé émbè nén bán mod ahélé'áá-se ahúd míd ábe waáb, áá ábenlad, né nyénhúd nímɛn míd nyébé me.

¹⁶ Nédè ntimé mod a ekoyí awe nyé bɔɔb áyale níkanlé nyé mbále tɔŋɛne nkalanj ní bwám-ε?

¹⁷ Abè bad ábe béyágte nyé ayáge démpée, béwóó nlém nén bán nyétimɛn bó, bonj béewóŋnɛé nyé nlém ní bwám. Béhede bán nyéebág ne me ábel bonj nyéwóŋ nlém ábè ne bó.

¹⁸ Ebóó áwóŋ nlém ábel dyam, nzése nímè nlém rídé ábel dyam á bwám. Ebóó áwóŋ nlém ábel dyam pónde ésyāál, saké nzé nyédé ne me démpɛn.

¹⁹ A-bán bé nlém ábém, nwóge' e'we bɔɔb áyál echèn, melemlem ngáne mmwaád áwógeé e'we bé achád. Mɛéwóg-ke ábè e'we káŋj né abé á Krísto ásólé nyé áte bwám.

²⁰ Mendɔŋ mɛé mbé ne nyé bɔɔb ábel míbíí ngáne níhóbeé áwɛn áyale nyéhóódté me yál áte.

Elɔŋsɛn éche Hagaa ne Seraa

²¹ Nyé ábe nyéhede abé ásé e mbéndé, ndáó nyé asceded mɛéken nyébíí chòm-εε mbéndé ékoo' é ahób-ε?

²² Eténlédé á kálag e Dyób nén bán Abrahamɛ anchyáá bán bé baachóm bébé, nhóg ne mmwaád a ntán, aníníí-ε ne mmwaád a kunze.

²³ Mwán awé mmwaád a ntán ányhāá' é, anchyáá mó nyaa eche moonoyŋ áchyáá' é mwán. Bonj akag áde Dyób démbéé Abrahamɛ dáo dɛnkɔŋ bonj mmwaád a kunze achyáá mwán.

²⁴ Abén bebaád bébe, dehele déhagtén bó ne melé mé Dyób mébe. Hagaa adé nhagtén ne melé nime Dyób démwɛé ne bad bé Israel á mbɔod e Sinai á pónde eche ábágé Mosee mbéndé. Bad bésyāál ábe bédé ásé e nímè melé bédíí betánj.

²⁵ Hagaa adíí nɛŋgáne melé nime Dyób démwɛé ne Mosee á mbɔod e Sinai, á alonj á Arebia. Bad bé Jerusalem bómpe bédíí bɔɔb néé Hagaa áyale bó moosyāál bédíí betánj.

²⁶ Bonj mmwaád a kunze, adé nhagtén ne Jerusalem awé adé ámín. Ane mmwaád mó-'áá adé nyaá awesyáné.

²⁷ Eténlédé á kálag e Dyób nén bán,

“A-ekóm e mmwaád, we awé weechyáá’,

hé esaád é menyinge. We awé weéwógé e'we é' mwán mbéd, wóg menyinge áyale,

we awé awonj nchóm ántédéé, echyáá bán bɔɔb

tómaa mmwaád awé nchóm adíí á ndáb.”

²⁸ Bɔɔb-póó a-baányan, akag áde Dyób démbéé Abrahamɛ ábélé bɔɔb nyédíí bán bé Dyób melemlem néé Aisige.

²⁹ Ene pónde, ébédé nén bán, mwán awe bɛnchyāá' é nyaa echè moonoyŋ áchyáá' é, atágté'áá mwán awé bɛnchyāá á ngine e Edáádɔŋ é Dyób. Melemlem nê dáo édíí káŋj ne chíí.

³⁰ Bonj chán kálag e Dyób éhóbé tɔŋɛne nê? Kálag e Dyób éhóbe' nén áá, “Nán mmwaád a ntánj bó mwán. Mwán awé mmwaád a ntánj áchyáá eetɔŋɛnéé mbwóg eche sáá adyé nchoo ne mwán awé mmwaád a kunze áchyáá.”

³¹ Né-óó a-baányan, deesaá bán bé mmwaád a ntánj. Dedíí bán bé mmwaád a kunze.

5

Séesad á mehanj-té ámpɛ

¹ A mehanj-té dáo Krístə áhúdé syáné ábel bonj syáné deebág néé betánj ámpɛ. Né-óó nyéwéd mekuu ásé, nyéemwāg-ke se modmod ahé nyé á mehanj-té ámpɛ.

² Nyéwóglɛn me. Me Paale, nláŋge nyé nén meé nzé nyéwémtné nén bán nzé béyágé nyé, né né débél Dyób ákob nyé néé bad ábe bésáá, né nsón mime Krístə ábélé méehelélé-se níwóŋɛn nyé mbéd.

³ Nsimé nyé etúu áte ámpɛ nén meé, kénzéé awé akwɛnténé áá béyag mó ábel bonj Dyób ákob mó, atáŋɛné mbéndé ésyāál ahíd.

⁴ Nyé ké ahéé awé awémtné áá mótáŋɛnɛ mbéndé ahíd ábel bonj Dyób ákob mó, asénlédé ne Yesue, ahúdé-'ε yál á nsimé ní Dyób-te.

⁵ Sé ne sé, Edáádɔŋ é Dyób ébélé sélyágé nlém nén bán Dyób dékob sé nɛŋgáne bad ábe bésáá áyale sédúbpɛ Krístə.

⁶ Ken béyágé mod-ε, ken béeyagé mod-ε, nê déewóó' é dyamdyam ábel ne abé áde dedíí ne Yesu Krístə. Chóm éche édé etógnɛn édíí, ádúbe Krístə. Adé adúbe átáŋɛné anyínned ne edáŋge éche déwóŋné nhóg ne aníníí.

⁷ Ngen e'só, nyékeéné'áá mekan bwám. Nzé-módé ahəŋléné nyé nlém á abum áá nyéhéide' mbále e nkalanj ní bwám ámpɛ?

⁸ Ahəŋlen áde nyéhəŋléné nlem á abum déehelée-se áhúú ne Dyöb, áyale Dyöb dən döw ápwédé nyé ábē ábe bán.

⁹ Mod nhóg awē adé mbéb áfinté echên, mós abébe' baáb ábiníi bésyāā, nēŋgáne mbumé ní ngun nsonléé nzé béhédé mwā esulten áwēd-te.

¹⁰ Boŋ pən ndúbpé nén mээ, Dyöb débēl nyéehídte ayáge á bad bémpēe boŋ nyéehíd adém. Dyöb dékōgsən mod ké ahéé awē apuutad nyé, ábē kénzée.

¹¹ A-baányan, nzé émbē nén bán ndii nkale nén mээ bétəŋgéné mod ayag boŋ Dyöb dékob mós nээ mod awē asáá ngáne baá Israel bédúbpé, né cheé ékás boŋ béhé mээ á meséb? Nzé nkalé'áá nén mээ bétəŋgéné bad ayag boŋ meékale'áá kwééd eche Krístəə áwédé á awəg, né nē déeliŋséé bad bé Israel.

¹² Ndəə nén mээ ábē bad ábe bépuutad nyé nló áte, békag á'so, béke bésélen yāl e mwəŋchóm esyāā.

¹³ A-baányan Dyöb dənchēlē nyé áhide á mehan-tē. Boŋ abé áde nyéesaá á mehan-tē ámpē déebageé nyé kunze ábel kéchéé eche échēn ekob é yāl éhedeé. Boŋ pən, nyémod-téé ábēnle waáb á edəŋge-tē.

¹⁴ Nyébele' nē áyale nzé bəládé mbéndé esyāā, chōm eche éhōbēé édií nén, "Edəŋ mwānyon ngáne édáá echoŋ yāl."

¹⁵ Boŋ nzé nyétimé nyékwaglan, nyéwanne-'e nhóg ne aníníi nээ nyam é mehín, nyétéd pónde. Nzé nyéetéde pónde, ne nyéewūú nhóg ne aníníi ne awúu ásyāā.

Edəədan é Dyöb ne ekob é yāl

¹⁶ Né-əə, nlébe nyé nén mээ nyémwē Edəədan é Dyöb élyágte nyé. Nē débēl nyéebelée mekan mээ mbéb níme ekob é yāl éhedeé.

¹⁷ Mam níme ekob é yāl édáá, méekagké ne mam níme Edəədan édáá. Mam-mээ níme Edəədan édáá méekagké ne mam níme ekob é yāl édáá. Echén ngíne ébe éwane'. Nē ábele' nyéehēlēē dyam ábel áde nyééáá ábel.

¹⁸ Boŋ pən nzé Edəədan é Dyöb élyágte nyé, né nyéesaá áse e mbéndé ámpē.

¹⁹ Mbeltéd mé ekob é yāl méeyəgtádtéd. Ndii mbeltéd nээ akáb dé mesón, ábel dé mekan mé mbinde, akáb dé akwalee.

²⁰ Abele á myöb mémpēe, alem, ekoyi, nselag, kónji, meliŋgá, abun dé e'tál, ngabén, nkabén,

²¹ asíí á bad, sōgké e mím, epuutéd ne mbeltéd mé mbéb mémpēe nээ nímén. Nsimé nyé etúu áte ngáne ménsím-maá bōsd nén mээ, bad ábe bēbele' échē ndín é mekan béekudté nnam mé nkamlən ní Dyöb.

²² Boŋ nzé Edəədan éche Esáá éde mod áte, chōw ébele boŋ ábelé mam ne edəŋge, ne menyiŋge, ne nsan, ne nwesən, ne e'boŋ bé nlem, ne abé á bwám, abé-'e mod awē bad bēbele bésun nlem áyāl.

²³ Edəədan chō-áá ébele' boŋ mod ásudté yāl, acháá-'e yāl bwám. Mbéndé éewóó'ē dyam ábelen nén.

²⁴ Bad ábe bédé ne Yesu Krístəə béesaá áse e nkamlən ní mam mé ekob é yāl ámpē. Ebelé ebé byánán bēbómme échab esíí é mam mé ekob é yāl á awəg, éwédé-'e áhed.

²⁵ Ngáne Edəədan é Dyöb ébágé syānē alonjé dékōlē, démwē échē Edəədan chēn élyágte syānē áyale chōm ké ehéé eche débēléé.

²⁶ Deényənē yāl ámin, déeliŋséé nhóg ne aníníi, deesíídé-'e nhóg ne aníníi.

6

Kéchéé eche mod áwéné chōw áhúdtē

¹ A-baányan, nzé nyé mod nhóg nyéhúné á mbéb-te, nyé ábe nyédii nyébele' mekan níme Edəədan é Dyöb éhedeé, nyétəŋgéné nээ nyéwōŋgéné mós áhúdté mós á mbéb-te. Nzé nyéwōŋgan mós, nyéchédēn mós yāl. Boŋ pən, nyétéd pónde ábel nén nyébēn ámpē nyéehúné' á mekəgsən-tē ábel níme mbéb.

² Nyéwōŋgan nhóg ne aníníi áhide á ndutul-tē. Nzé nyébele nē, ne nyéhíde' ngáne mbéndé e Krístəə éhedeé.

³ Kénzée awē awémtnéé áá mótōmtēnē abé, adoge yāl. Ene ndín e mod eesaá dyamdyam.

⁴ Mod téé átōŋ yāl asimen. Nzé mod ábelé nsōn ní bwám, né áwōgēn yāl menyiŋge. Né éhəgtán-áá yāl ne bad bémpēe.

⁵ Nhōbe nē áyale mbeltéd níme mod téé níŋone' mēn.

⁶ Kénzée awē báyágteé Eyale é Dyöb, atəŋgéné nээ áhágké mod awē ayágte' mós chōm é bwám ké ehéé eche áwóó, áwōŋgen mós.

⁷ Mod eédōgē yāl. Mod eewémtnē-ə áá móhale módog Dyöb. Kéchéé eche mod áwéné, chōw áhúdtē.

⁸ Kénzée awé abele mam mé mbéb níme ekob é yál éhedeé, ábii aá nímé mam mën mépiinéd mós kwééd. Boŋ kénzée awe mós-é abele' mekan mé bwám ngáne Edaádaŋ é Dyöb éhedeé, ábii aá nímé mam mébél mósóküd alongé áde déemaá'.

⁹ Deekómé bwám abel. Nzé deétednede ábel bwám, né deéküd nnam á pónde eché etáŋgéné.

¹⁰ Né-ós pónde téé eche etál ébágnédé syáné ábel bwám, débel bwám wée moosyáál, tanje wée bánned bé Krísto.

Elébé ne melentén mé asóg

¹¹ Nyébën nyényín mbónj mé e'yale abè mbénlédé átele nyé enén kálag ne échém ekáá.

¹² Bad ábe béhede nyé anyáged nén bán bétáŋgéné nyé ayag, bébele nê álúmtén yál, ábel boŋ békud dín á bwám á'só é' bad. Bébaá' bán bad bééhāg bós á meséb nén bán bétúmé akal nén bán, kwééd eche Yesu é áwédé á awog chēnpēn chós ekāā boŋ mod ákūd e' choóchoŋ.

¹³ Ké bad ábe béyágé bēn bééhídēē mbéndé, boŋ béhede bán béyag nyé ábel békume ekáá á tál nén bán nyékwénténé nén bán béyag nyé.

¹⁴ Dyam áde me pen mékuménne ekáá á tál ádíi kwééd eché awesyáné Sāŋgwéé, Yesu Krístāā áwédé á awog áwēd nló. Eche kwééd ebelé mam mé nkōrsé meesaá me dyamdyam á díd-te, meewóo-áa dyam ábelēn nkōrsé.

¹⁵ Ken béyágé mod, ken béeyagé mod-ε, nê déewóó' é dyamdyam ábel. Dyam áde áde etógnén ádíi Dyöb átimeđ mod ekóólé.

¹⁶ Nsaŋ ne ngol e Dyöb ébê ne bad bésyáál ábe béhíde ádén ayáge. Abé bad bós bédé bad ábe Dyöb ápwéde.

¹⁷ Asóged enén kálag, nlāŋge nyé nén meé, modmod eétagtán me nímén mekan áyāle mebaŋ méde me á yál hén níme melúmte nén bán mbēnle Yesu.

¹⁸ A-baányan, nsimé níme Sāŋgú Yesu Krístāā mbē ne nyé moosyáál. Ebê nê.

Kálag echê Paale áténlé Baá Efesus Ndibned ní kálag

Kálag echê Paale áténlé bad bé Efesus ehôbe' tângene ntíi ní Dyôb, ápeen míme nhægtéd rísyāál, míme rídé á nkòñsé ne míme rídé ámín hòm ahóg. Krístæ mós-'áá adé nló ámín e míme nhægtéd rísyāál (1.10). Ehôbe-'e ámpé ngáne bad bé Dyôb bétàngéné abé nêngáne mod nhóg abé áde bédíi ne Yesu Krístæ.

A mbooted, enén kálag ehôbe' tângene abé áde bad bé Dyôb bétàngéné abé nêngáne mod nhóg. Ngáne Dyôb ápwédé abé bad, álagsén bó, ahúd-te bó á mbéb-te, mbwiined ne awe Mwán Yesu Krístæ. Ehôbe-'e ámpé ngáne Edáádaj ehé Esáá élúmteé aá dyam áde Dyôb áhóbé aá mósòbèl, débènléd. Asóged, Paale alébé bad bé Dyôb bé Efesus ngáne abé ádáb átàngéné abé nêngáne bad ábe bédé mod nhóg á dín á Krísto. Paale abènlédé ngan híin álúmde ngáne bad bé Dyôb bétàngéné abe abé áde bédíi mod nhóg ne Krístæ.

Nkabtéð ní kálag

Ndibned ní kálag 1.1-2

Krístæ ne mwembé ní bad bé Krísto 1.3-3.21

Alonjé dékòlè ábe ne Krístæ 4.1-6.20

Nsógteɛn 6.21-24

Paale alómme' bad melenten

¹ Me Paale, mbapɛe a nlomag awê Yesu Krístæ ngáne Dyôb áhédé'áá, me-éé ntenle nyé enén kálag. Ntenle nyé bad bé Dyôb ábe nyédé á dyad dé Efesus. Nyédé mod nhóg ne Yesu Krístæ nyéhíde-'e mós ne nlém nhóg.

² Nsimé ne nsanj ní Dyôb Tité awéd ne míme Sánjú Yesu Krístæ níbê ne nyé.

Nnam míme bad ábe bédé nhóg ne Krístæ békúde

³ Débe Dyôb mekenag. Mós adé Dyôb áde awéd Sánjwéé, Yesu Krístæ, abé-'e mós Sáá. Dyôb dós ánámte syáné abe áde ábágé syáné bwém é'syāál ábe é'bidé awé nkamleɛn ní mín. Abelé nén abé áde dédíi mod nhóg ne Krístæ.

⁴ Byánán Dyôb déhæg nkòñsé, ampwéd syáné ábè abé bad, abel áde ámbenlé bon desán, deewóó-'e atón dé mbéb ké ahóg áwe e'só. Adaj áde Dyôb ádás syáné,

⁵ dèmbèl antíi se' boód aá débè ábe bán mbwiined ne nsón míme Yesu Krístæ ámbelèé syáné. Dyôb dèmbèl nén áyāle nén dós antíi' é aá mósòbèl ngáne ébòñnéde mós.

⁶ Abelé aá débè ábe bán ábel bon dékene mós áyāle mekan mé bwám míme ábélé. Abagé syáné echê ndale e nsimé ngán. Dekúde míme nsimé abé áde dédíi mod nhóg ne awe Mwán awé ádás bwámbwam.

⁷ Abé áde dédíi mod nhóg ne Krístæ ne asyog áde ásyógé míme mekií áwesyané nló, dós ákás bon ákòde syáné alagsen áde álāgsené syáné mbéb. Abel áde Dyôb ábélé nén álumte syáné bán míme nsimé rídé kase e nsimé.

⁸ Abagé-'e syáné mós nyaa echê elóné mbon, ábūd-te syáné debyéé abe, ábèl-le desòñtén mekan mésyāál.

⁹ Abelé mekan mésyāál ngáne áhédé'áá aá móbel. Abelé syáné debíi mekan míme káaj ne boób modmod éesòñténéé. Mmén mekan médíi mekan míme ámbenlé mbwiined ne Krístæ.

¹⁰ Dyôb átííde aá mósòbèl mímén mekan mésyāál á pónde echê étàngéné. Ene pónde álad bwém é'syāál ábe é'dé á nkonj ní mín ne rísé, bébè áse e Yesu Krístæ mós awé adé nêngáne nló.

¹¹ Dyôb ápwédé sé ábè abé bad abel áde ábélé bon debé mod nhóg ne Krístæ. Ambel nén áyāle ammad atíi se' boód. Abele mam mésyāál mébenlad ngáne átííde.

¹² Ambel nén ábel sé ábe sébédé bad bé e'só ásum nlém wée Yesu Krístæ séwále abé áde dékaj bon bad bémpèe béken mós áyāle e echê ngume echê echabé ámín.

¹³ Nyémpé nyênwóg nkalanj ní mbále. Mmè nkalanj ní mbále rídíi nkalanj ní bwám míme nípínédé nyé e'sooson. Nyéndúbé Krístæ, nyébé-'e mod nhóg ne mós. Nén dèmbèl Dyôb dèmbè nyé Edáádaj ehé Esáá ehé ánhòpè aá mósòbè abé bad. Echê Edáádaj édíi nêngáne e'chem ábe é'lúmte bán nyédíi bad bé Dyôb.

¹⁴ Echê Edáádaj chós élúmte syáné nén bán deékúð bwém ábe Dyôb áhóbé aá mósòbè syáné. Deékúð abén bwém á pónde eche Dyôb déhúdté syáné ábe dedé ábe bad á mehanj-té. Nén débèl bad békené Dyôb áyāle echê ngume echabé ámín.

Mekane míme Paale

¹⁵ Nwógé bán nyédúbé Sánjú Yesu, nwógé-'e bán nyédáá bad bé Dyôb bésyāál. Né-óó,

- ¹⁶ nságnan Dyöb pónde téé áyál echên, nzé nkánnad nyé.
- ¹⁷ Nkánne-’ε meé, Dyöb áde echéd Sáj, Yesu Krístæ, Titéε a ehúmé ábe nyé Edáádaj é debyéé ne é nsón̄ten mé mekan mé e’koñnéd ábel boj nyébii mó bwám.
- ¹⁸ Nkánne-’ε ámpē nén Dyöb ákédled nyé nlém á abum, ábel nén nyébii bwēm é’ bwám ábe nyésumme nlém áyál, áyále apwédé nyé. Nkánne-’ε nén meé nyésón̄ten ngáne nnam níme áhábé áá mósbē ábē bad mpédé achab ámin.
- ¹⁹ Nkánnad-te nyémpē nén meé nyébii eche ngíne. Ene ngíne etómé bwēm é’syā́l, ch’-’áá ewōngan syā́nē ábe dedúbpé mó. Mmén melemlem mé ngíne eche echabé ámin,
- ²⁰ ch’soo ámbenlédte áde ámpuúdté Yesuε, ábel-le ádyēē mó á ekáá émbáá áwē nkamlen ní mín.
- ²¹ Ahed-taá Krístæ ákamlanné ngumε ne benkamlenε bésyā́l. Ade ðin-ne áde ngíne tómaa mín mé benkamlenε bésyā́l, ábe bédé bōob ne ábe bébē á pónde eché ehúε’.
- ²² Dyöb ábágé Krístæ nkamlen ámin é chōm ésyā́l, abelé-’ε mó awé akamlan chōm ésyā́l, ábē nló, mé elad é bad ábe bédúbpé.
- ²³ Eché elad é bad ábe bédúbpé bédii náε yál eché Krístæ. Eché elad é bad élágte Krístæ mbom, Krístæ mó-’áá álógte chōm ésyā́l eche édé kéhéé mbom.

2

Dedé á alongé abé áde dedii mod nhóg ne Krístæ

- ¹ Ngen e e’só, nyémbé nēngáne bad ábe bēwédé áyále nyéébele’áá mekan níme Dyöb áhóbé’áá áá nyébel, nyébeláá-’ε mbéb.
- ² Ene pónde nyéhídé’áá mbeltéd mé mbéb ní bad bé nkōñsé. Nyéwógné’áá nkamlenε awé akamlan e’daádaj bé mbéb ábe é’dé á pemε-té. Kóñ̄ne chii éché edáádaj édií élyágte’ bad ábe béebelé’ ngáne Dyöb áhēdeé.
- ³ Syā́nē moosyā́l debédé náε bō, dékōdté esíí é mekan mé ekob é yál. Debelé’áá ngáne mekan mé mbéb mé ekob é yál méhédé’áá áá débél, déhíde-’ε mekan níme mewēm̄ten melánjé’áá syā́nē áá débél. Mmén mbéb níme débélé’áá mēmbēl Dyöb déntāngēn syā́nē ámpē akōgsēn melemlem ngáne ántāngēnnē moosyā́l akōgsēn.
- ⁴ Boj ngáne Dyöb átómténé ngól abé ádāñ-’ε syā́nē bwāmbwam,
- ⁵ abelé syā́nē dedé á alongé abé áde dedii ne Krístæ, kénεε édií bán dembé náε bad ábe bēwédé áyále deébele’áá mekan níme Dyöb dénhōbpé áá débél. Nsimé ní Dyöb móo níkáá boj nyékūd e’soóson.
- ⁶ Abé áde dedii-’áá ne Krístæ, Dyöb ápuúdté syā́nē ne mó, adidé-’ε syā́nē hōm ahóg ne Krístæ á nkoñ nímín.
- ⁷ Ambel nén álúmed syā́nē ábē e’boj bé nlém mbwiined ne Yesuε Krístæ ábel boj á pónde eché ehúε’, bad bényín ngáne níme nsimé mpédé nhōn abé nítom-me chōm ésyā́l.
- ⁸ Nsimé ní Dyöb móo níkáá boj nyékūd e’soóson. Adúbe áde nyédúbpé Krístæ dóo ákáá boj nyékūd ábē e’soóson. Saké mekan níme nyébélé mékáá boj nyékūd e’soóson. E’soóson ábe nyékūd é’ dii nde e Dyöb.
- ⁹ Saké mekan mé bwām níme nyébélé mékáá boj nyékūd e’soóson. Né-’so, nzam ké póg eésaá eche mod átāngéné ekáá akum átál.
- ¹⁰ Syā́nē dedii ekáá é nsón é Dyöb. Abé áde dedii mod nhóg ne Yesu Krístæ, ábágé syā́nē alongé ábel boj débele mekan mé bwām. Nén dóo Dyöb déntii’ é se’ bōód áá déwōñ ene nyaa e abé á alongé.

Abé nhóg ne Krístæ

- ¹¹ Nyé ábe nyéēsē bad bé Israel nyééchatán ngáne nyémbēē bōód. Bad bé Israel ábe béchágé yál bán, “bad ábe bēyágé,” béchage nyé bán, “bad ábe béeyagéé.” Boj nímén meyag mé ekob é yál médií chōm éche moonoyōñ ábenleε mekáá.
- ¹² Nyééchatán bán ene pónde nyéknēmbíí’ε Krístæ. Nyéknēmbáá nlatén ne echoñ é bad bé Israel, bad ábe Dyöb ápwédé. Nyéknēwōngé dyam ábel ne melé níme Dyöb démmwēε níme níltmte’ chōm éche Dyöb dénhōbpé áá mósbēl. Abé áde nyémbēē á nkōñsé-te, nyéknēwōngé e’lyág bé nlém hōmhōm, nyéknēmbíí-’áá Dyöb.
- ¹³ Bōód nyénchabné Dyöb á yál. Boj bōob abé áde nyédii nhóg ne Yesu Krístæ, apééné nyé benben ne Dyöb asyōg áde ásyógé nímē mekií áwen nló.
- ¹⁴ Krístæ mwēn mó apínédé syā́nē nsaj. Abelé bad bé Israel ne bad ábe béésē bad bé Israel bédé mod nhóg. Kwééd eche áwédé ehúde ekoyí éche ébédé áttinté echéd. Eché ekoyí ébédé náε ekāñned éche énkab syā́nē áte.
- ¹⁵ Abelé mbéndé é bad bé Israel énkēwōngé ngíne ámpē. Ambel nén ábel boj álad bad bé Israel ne bad ábe béésē bad bé Israel bébē náε mod ekóálé nhóg awé bōóbōo bébē mod nhóg ne mó mwēn Krístæ. Né-’so, abel áde ábélé nén ápééné nsaj áttinté e bad bé Israel ne bad ábe béésē bad bé Israel.

¹⁶ Awé áde áwéde á awog, ábelé syánē dedé mod nhóg ne Dyöb, atímté-'e syánē asē ne Dyöb. Né-óó, amadé ekoyí éche ébéde áftinté e' syánē.

¹⁷ Krístəə ampē ákanlé nyé ábe nyéēsē bad bé Israel, nyé ábe nyénchabné Dyöb á yäl nkalanj mé nsaj, ankalé-'e bad bé Israel, bó ábe bémbē Dyöb bēnben.

¹⁸ Mekan níme Krístəə ábelé, mébéle syánē moosyäl dekudé nzii ápe á'sō wēe Titée. Melemlem mé Edəəđəj ehóg chós éwöngan syánē ábel nē.

¹⁹ Né-óó, nyé bad ábe béésē bad bé Israel nyéəsaá beken ampē nyéəsaá-'aá bad ábe bébíde etún. Boj pen nyáábe bad bé Dyöb nyédii bad ábe bébíde hóm ahóg. Nyé moosyäl nyédii née bad ábe bédé á túmbé e Dyöb.

²⁰ Nyédii née bwēm ábe bélöjnéé ndáb. Bembapēe bé nlomag ne bekal bé é'dəəđəj bó bédé nsáaned ní ndáb. Yesu Krístəə mwēn-naá adé akon dé nchómé.

²¹ Mú akáá boj ene ndáb etyéem, ékwogé', épē-'e ndáb eche Esáá eche Sängwéé.

²² Abé áde nyédii mod nhóg ne Krístəə, aladé nyé ne bad bé Krísto bémpēe. Abé áde nyédii-'aá bəb nyédii née ndáb echē Dyöb ádye'é áte. Dyöb áde adé éngáne Edəəđəj.

3

Paale akánlé bad ábe

béésē bad bé Israel nkalanj ní bwām

¹ Enén nzom chós ekəá boj níkánád nyé. Abele áde níbenlé Yesu Krístəə ne akale áde níkanlé nyé dáo akáá boj mbé mod a mbwog.

² Ndúbpé meé nyéwogé bán Dyöb ápwéde me ákale nyé nkalanj ní bwām tängene nímé nsimé.

³ Dyöb ábágé me nsöjten mé mekan mé e'konéd níme níbéle mbíi mekan níme káájne bəb modmod éesöjtenéé. Mmaá nyé nguse é e'yale atele tängene nēn.

⁴ Nzé nyéláá mam níme nítelé, nyéechēm nímém nsöjten áyäl e mekan níme káájne bəb modmod éesöjtenéé tängene Krístəə.

⁵ Bəód, Dyöb dénkénlúmedté baányoj nímén mekan níme káájne bəb modmod éesöjtenéé. Boj bəb abēnléde échē Edəəđəj álúmed bekal bé'dəəđəj ne bembapēe bé nlomag ábe bédé ábele Dyöb, nímén mekan.

⁶ Mmēn mekan níme moonyoj enkēmbíí é médii nēn: Bad ábe béésē bad bé Israel, bómpē bekúde nnam níme Dyöb áhóbé aá mósbe melemlem nēngáne bad bé Israel bekúde. Bad bé Israel ne bad ábe béésē bad bé Israel bédé mod nhóg, Dyam-me áde Dyöb áhóbé aá mósbele bad bé Israel, bad ábe béésē bad bé Israel bómpē bétombwēn dó áyale bédé mod nhóg ne Yesu Krístəə. Nkalanj ní bwām móo níkáá boj nímén mekan mésyäl mébenlé.

⁷ Mmēn nkalanj ní bwām móo níkalé. Dyöb abēnléde nímé nsimé, abagé me nímén nsón. Mbele mó á nwöjgen mé eche ngíne.

⁸ Kénéé méetəgneé etógnén abé áftinté e bad bé Dyöb, Dyöb dēmbē me nímén nsimé, ákale bad ábe béésē bad bé Israel tängene nnam níme Krístəə ábagé. Moonyoj eéhāē-se abii ngáne nímén nnam nídi.

⁹ Dyöb dēmbēl mentánléde bad bésyäl nyaa echē ápidé níme ntii mé mekan á asóg níme káájne bəb modmod éesöjtenéé. Dyöb áde áhágé chóm ésyäl, dénkénlúmedté modmod nímén ntii bəód.

¹⁰ Dyöb dēmbēl nē, ábel nēn benkamle ne ngume echē éde á nkoj nímín, bényín ngáne ápedé debyéé awóg áyäl e chóm ésyäl éche ábeleé bəb, mbwiined ne elad é bad bé Dyöb.

¹¹ Se' bəód, byánán Dyöb déhəg nköjse, ammad atii aá nímén mekan móo móbenlé. Bəb-pe, ábelé nímén mekan mébenléde mbwiined ne mam níme Yesu Krístəə, echad Sáj ábelé.

¹² Adúbe áde dedúbpé Krístəə debé-'e mod nhóg ne mó, dáo ádíbnéde syánē nzii ápe bēnben ne Dyöb ne e'sum bé nlem é'syäl ésebán debáa' dyamdyam.

¹³ Né-óó, ncháa' nyé nēn meé nyéētímné mbíd áyale metake níme níkudéé áyäl echēn, médii níme nípiinad nyé bwām.

Paale akánnéde bad bé Efesus

¹⁴ Enén nzom chós ekəá boj níbwogē' meböbój á'sō wēe Titée ákánned nyé.

¹⁵ Mú adé Titée a metúmbé mésyäl, áwé dáo mīn mé metúmbé mé nkoj ríse ne mé nkoj ní mín mébíde.

¹⁶ Ngáne nímé nhən níme ákójnéde nyé níchábé ámín, nkánne nēn meé échē Edəəđəj ébe nyé ngíne ábel boj nlem níwúu nyé á abum.

¹⁷ Nkánne-'e ámpē ábel nēn adúbe áde nyédúbpé Krístəə ábel ásumen nyé á nlem-té. Nkánne-'e meé nyédəj Dyöb, nyédəj-'e nhóg ne aníní. Nzé nyébele nē, né nyéebē nēngáne alín á bwel áde níme nkanj níkíí asē bwām, nyébé-'e née ndáb eche esúmnéde asē bwām.

¹⁸ Nkánne' nēn meé nyé ne bad bé Dyöb bésyäl nyébii bán Krístəə adəó syánē bwámbwam, échē edənge éewóo-'aá asóg.

¹⁹ Nkánne' ámpè nèn meé kénéé edíí bán modmod eéhéle-se ákon abii ngáne Krístæ ápédé nyé adān, Dyōb ábel nyésōn̄ten. Nkánne' nê ábel bon abé áden ábê nêe áde Dyōb.

²⁰ Dyōb áwóó ngíne ábel mekan níme méchábé ámín bwámbwam tómaa mekan níme déhédné mó. Abéle mekan tómaa ké ngáne déhele dewém̄tén bán ábēl. Eche ngíne eche edé-é syánē áte chōó ábenladdé ábel n̄m̄n mekan.

²¹ Mekenag mébê ne mó áyāle ndale é mekan éche ábálé, éche ényínnédé áfínté e elad é bad bé Dyōb, ényínnéd-te áyāl e mekan níme Krístæ ábélé. Mekenag mébê ne mó pónde ésyāal, á ngíndé ne á ngíndé. Ebê nê.

4

*Bad ábe bédúbpé Krístæ
bédé mod nhóg ne mó*

¹ Né-óó, me n̄ngáne mod a mbwōg áyāle nsón níme n̄benléé Sāngwéé, ncháa' n̄n meé, abé áden ábē abé á bwám ngáne Dyōb áhedeé, apwēd áde ápwédé nyé.

² Kéchéé éche nyébeléé nyésudé yāl, nyébé bad ábe bépwiídtédé, nyéwesane-ne nhóg ne aníníí. Nyélumed edānge awesen áde nyéwesanné nhóg ne aníníí.

³ Edáádān éche Esáá ébélé nyédé mod nhóg. Né-óó, nyéwan áte ábē nsañ ne nhóg ne aníníí, ábel n̄n nyédíí nyébé mod nhóg.

⁴ Syánē baasyāal dedíí yāl póg, melemlem mé Edáádān ehóg chōó syánē dékúde. E'yāg bé nlém e'hóg bō-áa déwóó áyāl e melemlem mé n̄nam níme Dyōb dénhōbpé áa módbē syánē áde ámpwēdté syánē.

⁵ Sāngwéé nhóg móo syánē baasyāal déwóó'. Adúbe ahóg dōo syáa baasyāal déwóó dékúde-te melemlem mé edusen.

⁶ Dyōb ahóg dōo syánē baasyāal débēnléé, mó-áa adé Titéé awe syánē moosyāal. Mó akamlan syánē baasyāal. Abéle' syánē moosyāal debele kéchéé éche áhedeé áa débēl, adé-é syánē moosyāal áte ne éche Edáádān.

⁷ Syánē mod té dekadé nsimé á nhāgtéd níme Krístæ ábágé. Bon níme nsimé méesaá nyaa póg.

⁸ Nê dōo ákóó bon étenléd á kálag e Dyōb n̄n bán, "Anké á hōm áde áchábé ámín.

Ade ákagké, ankeén ábē bad bé ekoyí ábe ántōmmé áte, ábē-é ábē bad eché nde."

⁹ Ngáne étenlédé n̄n bán, "Anké á hōm áde áchábé ámín." Chán nê ádíí? Nê alúmtē n̄n bán ansébe ape a hōm áde áde se ášē, nédé á nkōñsē wēn.

¹⁰ Mó awé ámpé á nkōñsē mó adé melemlem me mod awé anké á hōm áde áchábé ámín tómaa mebwōg mésyāal. Anké ámín ábel chóm ésyāal elón mbom.

¹¹ Mó mwēn mó abagé bad nde. Abéle donge á bad ábē bembape é bé nlomag, donge ábē bekal bé dáádān, ábēl donge ákal nkalaní m̄ bwám, ábēl donge ábē belyáged bé bad ábe bédúbpé, ábēl-le donge ábē bemeléede áyáged bad ábe bédúbpé.

¹² Ambēl ábē bad échén nde ábon̄sen bad bé Dyōb ábele mó. Ambēl nê ábel bon bad ábe bédúbpé bō ábe bédé n̄ngáne yāl eche Krístæ béwúu áte.

¹³ N̄n débē kóñne á pónde eche syánē débē mod nhóg, adúbe áde dédūbē Mwán a Dyōb, debíí-é mó. Nzé dedé nê, nê débēl déélōn mbon, debé n̄ngáne Krístæ awé alóné mbon.

¹⁴ Né déebáá n̄ngáne b̄ndem ámpé. N̄n débēl bad bé akwáb ábe b̄yágte' ayáge dé mótom, béehēnlé syánē adog, béehēl-laá abel se dedúbé mekan níme méetāngene. Déebáá n̄ngáne b̄le ábe epub é ngíne éhunené ped e mendib póg étimnē' eníníí.

¹⁵ Déebáá nê, bon pen dékale mbále délúmtē-é edānge ne nhóg ne aníníí. Débele nê ábel bon dékwog á menzií mésyāal débē n̄ngáne Yesu Krístæ awé adé nló.

¹⁶ Krístæ aladé ábē bad hōm ahóg, ngáne mebon̄ mé yāl meládeé yāl e moonyon. Nzé ped e yāl téé ebale níme nsón ngáne étāngéné abel, ne yāl esyāal ékwogé', ewúú-é áte. Nê dōo edíí kóñne á elad é bad bé Dyōb, nzé mod-té adáá mwānyān.

Alongé dékōōlé á mod á Krísto

¹⁷ Né-óó, nkoo' nyé aláa á d̄n á Sāngú n̄n meé abé áden déébāg n̄ngáne abé áde bad ábe béebíí Dyōb. Mekan níme békamtanné médíí mekan níme méesē dyam dé abelen, méehelé-é se méwōngén bō.

¹⁸ Áyāle nímb mewém̄ten méde mewém̄ten mé mbéb, béhídēē nyaa e Dyōb. Béewóó'é alongé áde Dyōb ábágé áyāle béwúu nló áte béebíí-áa nyaa e Dyōb.

¹⁹ Nzé bébélé dyam dé mbéb, akwágké déekóbéé bō. Bébágé yāl ábel mekan níme échāb ekob é yāl éhedeé. Béwóo nlém áte pónde ésyāal ábel mekan mé mbinde.

²⁰ Bon nyé, áde b̄n'yāgdéte nyé t̄ngene Krístæ, saké ene ndín e abé b̄n'lāā-é nyé bán nyétāngéné awōn.

²¹ Ndúbpé nén meé nyénwóg mam mé mbále tângene Yesue. Abé áde nyémbéé'-e mod nhóg ne mó bēnlāā nyé mam áyāl eché.

²² Bén'yāgēd nyé bán nyétede abé dé nchun áde nyénsēbēē awón. Ene pónde áden alonjé démbēb áyale nyénwón nlém dāsō ábel mekan mé mbéb. Mímé nlém níme nyéwóó'áá'-e ábel mekan mé mbéb mpánté'áá nyé nzii.

²³ Bén'yāgēd nyé nén bán nyémwe Dyób áhānjen nyé nlém á abum ábel bon nyéwón mewémtēn mékōsīlē.

²⁴ Dyób ábágé nyé abé dékōsīlē áde áde nēngāne áde abé. Né-óó, abé áden abé nēngāne áde abé dékōsīlē. Áden abé dékōsīlē ádíí abé dékōsīlē á mbále ngāne Dyób áhedeé ásān'-e.

²⁵ Né-óó, modmod eekālē metóm ampē. Syānē mod-tē ákanle mwānyān mbále, áyāle syānē moosyāāl dedíí nēe bad ábe beládné bon bēbēl yāl póg.

²⁶ Nzé nyéllí, nyéémwāg-se melingá mébēlēd nyé mbéb. Nyéémwāg-se nímēn melingá métom epun é bín.

²⁷ Nyéebāgē Satane yāl ádog nyé.

²⁸ Bad ábe béchíbe' bésóg achíb. Bon pen bēbenlad nímab mekáá ábel nsón ne nlém nhóg ábel bon békud chóm, bēwōngēn-ne betóótókē bé bad.

²⁹ Eyale é ebébtéd ké ehóg éebídé modmod á nsal. Bon pen nyébenlad e'yale é' bwām ábe bēwōngēn bad áwúu áte á adúbe tē. Nyébenlad e'yale á pónde eche ehednad, ábel é'wōngēn bad ábe bēwōnglan nyé.

³⁰ Nyéebēlē mam níme méwōgēd Edáádān éche Esáá ndutul. Edáádān éche Esáá chōó édé nēngāne e'chem ábe Dyób áhédé nyé ásin pónde eche ákōdéé nyé ne akōde ásyāāl.

³¹ Nyéhūd mewémtēn mé mbéb mésyāāl á nlém-tē, nyéchene'-e ekan é ngine ne melingá. Nyéésnlé', nyéesyāá'-e bad áhób áde nyéhóbe' bó mekan á yāl. Nyéelúmté' e'bēb bé nlém wēe modmod.

³² Nyéelúmed e'bon bé nlém wēe nhóg ne aníní, nyéwōng-ge nlém ní ngal. Nyélagsan nhóg ne aníní melemlen ngāne Dyób álágséné nyé áyale Krístāe.

5

Abé áde bad bé Krísto bétāngéné awón

¹ Nyéwále abé áde áde nēngāne abé á Dyób, áyāle nyédíí ábe bán ábe ádáá bwāmbwam.

² Nyédān bad bēmpēe, melemlen ngāne Krístāe ádáá nyé bon awé'-e á nló níme syānē. Ambé yāl wēe Dyób nēe mendē ne nde eché enwógéd Dyób menyinje bwāmbwam.

³ Ngāne edíí bán nyédíí bad bé Dyób, éeboo'é bán nyékábe' mesón, ké'ε nyébele mekan mé mbinde ké'ε nyébhē ngodó. Echén ndín é mekan éeboo'é ké awógnéd áftnté echén.

⁴ Eeboo'é bán nyéhóbe' mbinde ne e'nyāgléd bé mehób, ké'ε nyébele' e'kúkú bé ngwel. Bon pen nyésāgnan Dyób.

⁵ Nyébíí nén bán kēnzéé awé akábe mesón ké'ε awé ábele mbinde é mekan ké'ε awé adé ngodó, éesónlé á nkamlen níme Krístāe ne níme Dyób, éekud-tāá bwēm é' bwām ábe Dyób áhóbé áá mósōbē. Mod awé adé ngoód adii nēe mod awé abenle' myób mémpēe.

⁶ Nyéémwāg-se mod ádogēn nyé e'yókél é' mehób. Dyób dékōgsēn bad ábe bēbele' ngāne áhedeé bon bēbele' échén ndín é e'bébtéd é' mekan.

⁷ Né-óó, nyéelátán ne bad ábe bēbele' échén ndín é e'bébtéd é' mekan.

⁸ Ngen e'só nyémbé á ehíntén-tē, bon bōob abé áde nyédíí ne Sāngwéé ábēlé nyédé á e'nyínēn bé ekide tē. Né-óó, abé áden abé ngāne abé á bad ábe bédé á e'nyínēn bé ekide.

⁹ Nhóbe nén áyāle bad ábe bédé á e'nyínēn bé ekide tē bēbele mekan mé bwām, bēbele mekan níme métāngéné ne mekan níme médé mbále.

¹⁰ Né-óó, nyéwanen ábíí mekan níme méwōgte Sāngwéé bwām.

¹¹ Nyéewóó dyam ábel ne mbéltéd níme méeboo níme bad ábe bédé á ehíntén tē bēbeleé. Bon pen nyéelúmed bad nén bán échē ndín é mbéltéd éeboo'é.

¹² Edé e'són átúb échē ndín é mekan dīn éche bad bēmpēe bēbeleé á mesōm-tē.

¹³ Nzé mod abídté échē ndín é mekan áwed bad bényīn ngāne mēn mékóó abé.

¹⁴ E'nyínēn bé ekide bōó é'koo mekan mé mbéb abided áwed. Né dōó ákásá bon éhóbndé nén bán,

“Wε awé ekúne' kábnéd,

puú, weebág nēe mod awé awédé.

E'nyínēn bé ekide ábe Krístāe'-e é'pen wε á yāl.”

¹⁵ Né-óó, nyétéd pónde ne nyaa e abé eché nyéwoo'ε. Áden abé déebāg nēngāne abé áde e'yókél é' bad bon ábē nēngāne abé áde bad ábe bēwóó debyéé.

¹⁶ Pónde ké ehéé eche etál ébāgnédé nyé ábel bwām, nyébel. Áyāle mbéb rítómé áte enén pónde.

¹⁷ Né-óó, nyéebág nêngáne bad ábe bédé eyákel. Boŋ pen nyésòŋten chòm éche Sàngwéé áhedeé áá nyébel, nyébel-le chók.

¹⁸ Nyéemwág mím se mékóbē nyé áyāle nén nê áwógte mod e'són. Boŋ pen Edáádəŋ éche Esáá cháchá ébē nyé áte.

¹⁹ Nyékónne' nhóg ne aníní ngase é Dyöb áwéd nhóg ne aníní nlém á abum. Nyékóne' ngase éche ébidé á kálag e Dyöb, nyékóne' ngase éche ékene Dyöb ne Krístəə, nyékóne'-e nkángé ké ríhée míme ríhúú ne Edáádəŋ Eche Esáá, áken Dyöb.

²⁰ Nyéságnan Dyöb, Títée awéd pónde ésyāál áyāl e kéchéé éche ébenlad. Nyéságnan mó á dín áde echən Sáj Yesu Krístəə.

Paale alébe' baachóm ne ábāb bebaád

²¹ Mod téé ábele ngáne waáb áhedeé áyāle edúbé éche nyébageé Krístəə.

²² Mmwaád-téé áwógne nchóm melemlen ngáne áwógneé Sàngwéé.

²³ MwENCHÓM té awóó nkamlen ámín e mmwaád, melemlen ngáne Krístəə áwóó nkamlen ámín e elad é bad bé Dyöb. Chók-áá édé nêngáne eche yāl mó-áá abage chók e'sooson.

²⁴ Né-óó, mmwaád-téé atəŋgéné áwógne nchóm áyāl e mam mésyāál, melemlen ngáne elad é bad bé Dyöb éwógneé Krístəə.

²⁵ Nyé baachóm ábe béwóó bebaád, mod téé ádəŋ mwaád, melemlen ngáne Krístəə ádáá elad é bad bé Dyöb boŋ ábē-é áde alonjé áwé áwab nló.

²⁶ Anwé á nló mímb ábel boŋ bésán. Ambenléd mendíb ne éché eyale ásaad bó.

²⁷ Ambel nén ábel boŋ elad é bad ébon áwé e'só. Ahedé'áá áá mópəen éché elad é bad áwé, ésebán atón á mbinde ké ehóg, ké'ε aban, ké'ε dyam dé mbéb ábág bó áyāl. Boŋ pen bésán, béwəōō'-ε dyam dé mbéb ké ahóg áde mod ahele ahób bó áyāl.

²⁸ Melemlen nê dáo baachóm bétəŋgéné ábab bebaád adəŋ ngáne bédáá échab yāl. MwENCHÓM kéhéé awé adəŋ mwaád, adəŋ eche yāl.

²⁹ Modmod eékəō' é yāl, boŋ ábelé átəŋgé chók ánoné'-ε chók bwám. Melemlen nê dáo Krístəə ábeleé elad é bad bé Dyöb.

³⁰ Syáne dedé bad ábe bébélé eche yāl.

³¹ Eténlédé á kálag e Dyöb nén bán, "Enén nzəm chók ekəá boŋ mwENCHÓM átedé sáá ne nyan, ábē ne mwaád, boŋ búmā bad bébe bétím mod nhóg."

³² Adén dyam ádíi ndale e dyam eche modmod éhéłéε-se asòŋten. Boŋ ndúbpé meé mímén mekan méhóbe təŋgenε Krístəə ne elad é bad bé Dyöb.

³³ Né-óó, mwENCHÓM téé awé awóó mmwaád, adəŋ mwaád ngáne ádáá eche yāl. Mmwaád a nchóm téé-ε atəŋgéné nchóm edúbé ábe.

6

Paale alébe' bānbān ne

ábāb besáá ne benyaá

¹ Nyé bānbān, nyéwógne' áben besáá ne benyaá ngáne bad ábe bédé ne Sàngwéé bétəŋgéné ábel.

² Eténlédé á kálag e Dyöb nén bán, "Nyéwógne' áben besáá ne benyaá." Atínté e mbéndé éche Dyöb ábágé, enén mbéndé chók ebédé mbéndé e'só eche Dyöb dénhəbənnē dyam.

³ Dyam áde ánhóbpé ádíi nén bán, "Nzé nyéwógne' áben besáá ne benyaá, né mekan mébēn nyé bwám, né alonjé ádəŋ-ne déchāb áte."

⁴ Besáá bé bān-ne, nyéelinsé áben bán. Boŋ pen nyénəne bó, nyélébe bó, nyéyágte'-ε bó nyaa eche Sàngwéé áhedeé.

Paale alébe betāŋ ne bewōŋ bé betāŋ

⁵ Nyé betāŋ nyéwógne' áben bewōŋ. Nyébage bó edúbé nyéwógne'-ε bó ne nlém nhóg, melemlen ngáne nyéwógneé Krístəə.

⁶ Nyébenlé bó dásá á pónde échē bényínéé nyé ábel békémed nyé. Boŋ nyé, nêngáne betāŋ ábe Krístəə, ábele áde nyébenléé Dyöb ábíđ nyé á nlém-té.

⁷ Nsón ké ríhée míme nyébeleé, nyébel mó ne kán esyāál. Nyébele mó byánán Dyöb dáo nyébenléé saké baányon.

⁸ Nyébíi nén bán mod téé ákud nsábe áyāle nsón mí bwám ké ríhée míme ábélé. Abé ké ntāŋ ké'ε kunze.

⁹ Nyé bad-te ábe nyéwóó betāŋ ásē echēn, nyécháá áben betāŋ bwám. Nyéekímmé bó bán bétāg. Nyébíi nén bán nyāābō moosyāál nyédé ásē e Sàngwéé, nhóg awé adé ámín, eékwōnād-táá modmod.

*Ngáne bad ábe bédúbpé
bétəŋgéné Satanε atəŋgen*

¹⁰ Asóged, nlánge nyé nén mée; Nyébê nyébê ne Sánḡwéé ábel boḡ eche ngíne eche ewúú áte éwéd nyé nlém á abum.

¹¹ Nyétéd bwém é' nzum é'syāāl ábe Dyöb ábágé nyé ábel boḡ nyéhél akwáb áde Satane atóm áte.

¹² Nzum eché déwanéé eésaa nzum eche déwanéé ne baányoḡ. Boḡ ngume, ngíne, ábáb benkamlené ábe békamlan nkòḡsé mé ehintén ne ngíne é ebébtéd éche edé ámín, bós déwannéé nzum.

¹³ Né-óó, nyétéd bwém é' nzum é'syāāl ábe Dyöb ábágé nyé ábel boḡ nzé póndé e ebébtéd epedé, nyéhél bós atyéemén. Nyéewán nzum nyépid á asóg nyélyəḡ nyésümén ngáne nyémbē.

¹⁴ Né-óó, nyéboḡsen nyékale mbáale póndé ésyāāl. Nzé nyébelé nê, ébê nēngáne mod awé awáá ngáá á nkog awé abòḡséné ábel dyam. Nyébele mam níme métəḡgéné, áyale ábel mekan níme métəḡgéné ádíi nēngáne mod awé ahédé mbóté eche bébénlé e' kii ákúten yāl á póndé e nzum.

¹⁵ Nyébê nyékale' nkalaḡ ní bwám. Mós nípeene' nsaḡ. Nzé nyébelé nê, né ébē byánán nyéhédé metámbe á mekuu, mébēl nyésümén bwám.

¹⁶ Ámín e nímén mésyāāl, nyébê nyédúbpe Yesu Krístəə. Adúbe ádēn débē nēngáne ekəḡḡé éche ékəə nyé ábel boḡ mekoḡ mé muú níme Satane álómmeé nyé méebelé nyé dyamdyam.

¹⁷ Nzé nyékag awan nyébíi nén bán nyékudé e'soosoy á mekáá mé Dyöb, modmod éhéllaá nyé dyamdyam ábel. Nyéebē nēngáne nwan-é nzum awé ahédé ekóté éche bébénlé ekii. Nzé nyékag-ke nyétəḡgéné nēe nyéwánlé nkwáté níme Edəədaḡ éche Esáá ébágé nyé. Mmé nkwáté ndé nēngáne eyale é Dyöb. ¹⁸ Nyékánne' póndé ésyāāl ngáne Edəədaḡ éche Esáá élyəḡtéé nyé. Nyéláa Dyöb bán áwəḡḡan nyé áyāl e kéchéé éche nyébelé. Nyétéd póndé, nyékánne' póndé ésyāāl ésebán nyékóme'. Nyékánnad-te bad bé Dyöb bésyāāl.

¹⁹ Nyékánnad mémpe, nén bán póndé kéhéé nzé nhóbe mée nhóbe dyam, Dyöb débē me e'yale ábe é'təḡgéné. Nén débēl mēhēl bad nkalaḡ ní bwám níme bad bēnkənsəḡtēnné aláa, ésebán mbáa' dyamdyam.

²⁰ Yesu Krístəə apwədə me ábē níme mésénze, ákal nímén nkalaḡ ní bwám, ene nzoḡm chó-'aa ekəə boḡ mbé bəəb nēe mod a mbwəḡ. Né-óó nyékánnad me nén bán Dyöb áwéd me nlém á abum níkal nímén nkalaḡ ní bwám ésebán mbáa dyamdyam.

Paale aa Dyöb anamed bad ábe bédúbpe

²¹ Tikikuse, awesyánē mwānyaḡ a Krísto awé dédáá, abenle Sánḡwéé ne nlém nhóg. Mós álāá nyé mekan təḡḡene me. Nén débēl nyébíi ngáne rídíi ne chóḡm éche mbéleé.

²² Nlóme mós áwēn ábel boḡ álāa nyé mam níme mébenlad ne sé, áwéd-te nyé nlém á abum.

²³ Nsaḡ níme Dyöb Titéé awéd, ne echəd Səḡ Yesu Krístəə, mbê ne nyé, bad ábe bédúbpe. Bébel nyébê nyédaḡ nhóg ne aníníi, nyébê nyédúbe-'e Krístəə.

²⁴ Dyöb álúmed nímé nsimé ne moosyāāl awé adəá awəd Sánḡú Yesu Krístəə, edəḡḡe éche ébē abé ne abé.

Kálag echê Paale áténlé Baá Filipi Ndibned ní kálag

Paale mó aténlé mwembé níme rídé á Filipi enén kálag áde ábédé á mbwɔg. Abédé ndutul ne ayáge áde déetàngene áde bad bémpée béyágté'áá. Kénéé nímén mekan mébénládáá, Paale ambé menyinje, ásúm-me nlém áyál e adúbe áde adúbpé Yesu Krístáa.

Nzóm eche ekáá bonj Paale átél enén kálag edii áságnen bad bé Krísto bé Filipi áyále nwónge níme bémbéé mó á pónde eche ántógnènnè nwónge. Awédé bó nlém á abum, aláá-é bó aá bébè bésúm mekuu. Acháá bó aá béwón asuded á yál áde Yesue, ésebán bémwag bán mekan mé esíí mé ekob é yál mékamlan bó. Akamtan bó aá abé áde bédíí mod nhóg ne Krístáa ádíí nsimé ní Dyòb, aá Dyòb débèl-le bébè menyinje bébè-é nsanj ábe áde bédíí mod nhóg ne Krístáa.

Nkabted ní kálag

Paale alénté, aságnéné, akánnéd-te mwembé ní Filipi 1.1-11

Paale aá ábè á nkònsé ádíí ábele Krístáa, áwé-é débògnéd mó 1.12-30

Paale aá abé á bad bé Krísto ábè ngáne áde Krístáa 2.1-11

Paale aá bad bé Krísto bébè á nkònsé néé tintine 2.12-18

Paale akené Timotie bó Epafroditus 2.19-30

Paale aá mod awé adúbpé Krístáa ákòbnéd á'sò é' Dyòb 3.1-11

Paale aá mod téé áwan áte ápid mam á asóg bwám 3.12-21

Paale alébe bad bé Krísto 4.1-9

Paale aságnan mwembé ní Filipi 4.10-20

Melentan mé asóg 4.21-23

Paale alómmé bad melentan

¹ Mè Paale, nchoo ne Timotie, me-éé ntenle nyé enén kálag. Sédii bembáledé ábe Yesu Krístáa. Ntenle bad bé Dyòb, bad ábe bédé mod nhóg ne Yesu Krístáa ábe bédé á Filipi, nchoo ne belyáged ne bad ábe béwónge ákéen nsón ní Dyòb á'sò.

² Nsimé ne nsanj níme ríhúú ne Dyòb awéd Titée, ne Sàngú Yesu Krístáa mbè ne nyé.

Meságnen ne mekáne níme Paale

³ Nságnan Dyòb áde níbenléé, pónde téé nze nkámténé nyé.

⁴ Mbélé mbé menyinje pónde téé nze nkánnad nyé moosyáál.

⁵ Mbélé mbagé nságnen áyále nwónge níme nyékébéé me ákal nkalanj ní bwám, bootya á pónde eché nyéwógé mó, bonj nyédúbe-é, ápe bóob.

⁶ Ndúbpé meé Dyòb áde ábótédé nímén nsón ní bwám áfinté echén, dékéén mó á'sò kááj ápèén mó á asóg á Epun éche Yesu Krístáa ápéé.

⁷ Ntágné enén ndin e mewémten awón áyál e nyé baásyáál áyále nyédé me á nlém-té. Ké áde rídíí á mbwɔg, ne áde ríhóbeé mam tângene nkalanj ní bwám, nhóbe meé nímén nkalanj méesaá metóm, rídé mbále. Dyòb álúmté syáné moosyáál nímé nsimé ngáne débènléé mó.

⁸ Dyòb áde me mbón nén aá nlém níme ríwónné nyé áte, rídé melellem ne nlém níme Yesu Krístáa áwónné nyé.

⁹ Nkánne-é nén meé, edange éche nyéwónné Dyòb ne éche nyéwóó ne nhóg ne aníníí ébè ékag á'sò. Nkánne-é meé nyébíí mekan mé Dyòb, nyésónjen-ne nharlén áfinté e mekan mé bwám ne mekan níme méesé mekan mé bwám.

¹⁰ Nén débèl nyééhèl mekan níme métómténé abonj abíí. Nén débèl nyéésán-é á'sò é' Dyòb, béekóbén-naá nyé awusé ké ahóg á Epun éche Krístáa ápéé ámpè.

¹¹ Nén débèl abé á bwám áden áde áhúú ne Yesu Krístáa dényínnéd áyál e mekan mé bwám méssyáál níme nyébéléé, ábel bonj Dyòb ákud ehúmé ne mekenag.

Paale aá ábè á nkònsé ádíí ábele Krístáa, áwé-é débògnéd mó

¹² A-baányan, ndáá meé nyébíí nén bán mekan níme mébénlédé ne me hén, ríkóó awónge ábel bonj nkalanj ní bwám nkanlad ríkag á'sò.

¹³ Nén ábélé sánze ésyáál éche énoe eyáde éche mod ambáá ne bad bémpée béssyáál hén, bébíí nén bán ndé á mbwɔg áyále rídíí mbáledé awé Krístáa.

¹⁴ Abé adé rídíí-é á mbwɔg, áwédé ekud é bad ábe bédúbpé nlém á abum, bénábpé nlém awón ákal eyale é Dyòb ésebán bébáá' dyamdyam.

¹⁵ Edé mbále nén bán bó baahóg béwónné me kónjí, béhede-é alúmed bán bédé etógnén tómaa me. Bonj pen, bó baahóg-ke békale níme nkalanj ne mewémten mé bwám.

¹⁶ Bad ábe békale mós ne mewémten mé bwám, békale mós áyále bédásá me, bébíf-’e nén bán Dyöb ákwénténé aá rúbé á mbwög hén ábel bon ríháb meé nkalaj ní bwám méesaá metóm, rídé mbále.

¹⁷ Abé ábe béwónné me kónji béekaléé nkalaj ní bwám ne mewémten mé bwám, békale mós áhede échab yál chén bwém. Bébele nê, ne mewémten nén bán ríwög ndutul abé áde rídíí á mbwög.

¹⁸ Bon nén déewóó’ é dyam dé abel. Ayál e rímê menzii mésyāā, nkalaj ríme Krístā mós békaleé, ké bébenlād mewémten mé bwám, ké’ e mewémten mé mbéb, ákal mós. Né-óó, áyále nê, mēbē menyinge.

¹⁹ Mēbē mbé menyinge áyále mbíí nén meé mekáne ríme nyékánnadté me ne nwōngēn ríme Edāádānj éche Yesu Krístā ēbageé me, bébēl ríkúd e’soóson.

²⁰ Nwóó nlem áte ne menyinge mésyāā, nlyógé-’e nlem meé méewógké e’són, bon méwōnj e’wéd bé nlem á abum pónde ésyāā, tanje bōob, ábel bon kéchéé éche ríbeléé ébel ehúmé éche Krístā ényínned, ké ndé á alongé ké’ e nwédé.

²¹ Ne me, abé áde rídíí á alongé ádíí ábele Krístā, nzé nwédé-’e ébonné me.

²² Nzé édé bán ndé á alongé mēbē ríbelé nsón ríme ndé etógnén. Bōob-pōó, meebíí’ é ped eche rítāngéné atéd.

²³ Mmēn mekan mébe métyéémé me á’sō-te, étómé me áte éche rítāngéné apwed. Ndáá meé rítēde hén ríbbē ne Krístā, áyále nén ábóó tómaa ábē á nkōnsé wén.

²⁴ Bon ayál echén, édé etógnén bán rídíí ríbbē á alongé.

²⁵ Ndúbpé nén, mbíí-’e meé mēbē mbé á alongé, mēbē mbé-’e ne nyé moosyāā ábel bon adúbe áde nyédúbpé Krístā ákwoge, nyébé-’e menyinge áyále nyédúbpé mós.

²⁶ Nén débēl abé áde mēbē ne nyé ámpé, nyéēnabé nzam awōnj ábe Krístā mekenag ayál echēm.

²⁷ Bōob-pōó, abé áden átāngéné abé ngáne Krístā áhóbeé áwē nkalaj ní bwám. Nén débēl ké mpédé ányín nyé ké’ e meépede, mēbíí nén meé nyésumé mekuu nēngáne mod nhóg, nyéwóó-’e mewémten mehóg áwan áte ákēā chōm éche nyédúbpé.

²⁸ Nyéebáá’ bad ábe bétāngan nyé. Nlem ríwúu nyé á abum pónde ésyāā. Nén délúmēd nén bán béekudté e’soóson bon nyéekúd. Dyöb dō-’aá áfíde rímén mésyāā.

²⁹ Dyöb ábénlédé ábē e’bon bé nlem áwēn, saké ádúbe Krístā dēmpen, bon kóānj ne ákud metake ayál e Krístā.

³⁰ Syánē dewane nzum á yál e nkalaj ní bwám bōob. Melemlem mé nzum ríme nyényínnē nwane’ mós rídíí ríwanéé bōob.

2

Paale aá abé adēd abē nēngáne áde Krístā

¹ Abé áde nyédíí nhóg ne Krístā áwédé nyé nlem á abum, éché edāngē-’e épwiitad nyé nlem á abum. Nyédé nlatén ne Edāádānj éche Esáá. Nyélúmte’ e’bon bé nlem, nyéwóó-’e nlem ní ngol ne nhóg ne aníníí.

² Mmēm menyinge mēlōn mbon nzé nyéwóó mewémten mehóg, nyélúmte melemlem mé edāngē ne nhóg ne aníníí, nyéwóó nlem nhóg, nyédé-’e nēngáne mod nhóg ayál e kéchéé éche nyébeléé.

³ Nyéebēlē mekan ríme mēlúmte bán échen yál chén chós nyéhēdteé bwám. Nyéebēlē mekan ríme mēlúmte nén bán nyédé kúmbe. Bon ne asuded á yál, nyényín bad bēmpēe etógnén tómaa échen yál.

⁴ Nyéebēlē mekan ríme mépiinad nyé bēn pēn nsyāj, bon pēn nyébele kóānjne mekan ríme méwōngan kóānjne bad bēmpēe.

⁵ Mewémten rímēn mēbē nēngáne ríme Yesu Krístā mēmbēē.

⁶ Abédé nyaa eche Dyöb ádíí, bon kéné, enkēnwōngé mewémten nén aá móchagned nén mós bō Dyöb bétásá.

⁷ Enkētédteé yál etógnén, bon ambēl eche yál nēngáne mbāledé, bēnchyāā-’e mós néē moonoyōnj.

⁸ Ade ábédé néē moonoyōnj, ansudéd eche yál, ákwéntén-ne awé. Ankwéntén áwē kóānj ne kwééd e awōg.

⁹ Né-óó, Dyöb dēmbē mós etál éche étómténé achab ámín, ábē-’e mós dīn áde átomé mīn mésyāā.

¹⁰ Dyöb dēmbēl nén ábel bon á dīn áde Yesu, nhāgtéd rísyāā ríbwōg mebóbōnj, ké nhāgtéd ríme rídé á nkonj rímín, á nkōnj rísé, ké’ e á mbwōg e baásē.

¹¹ Moosyāā áháb aá Yesu Krístā mós adé Sāngwéé,

ábel Dyöb Titée ákud edúbé.

Nyébé áttnté e bad ngáne tintine

¹² A-baányan bé edånge, ngáne nyéyógké' áá mekan abel níme Dyöb áhóbé áá nyébel áde mbédé ne nyé, édé etógnén bwámbwam bán nyébel mekan níme áhóbé áá nyébel, baob áde méesaá ne nyé. Nyéwón mbwóg ní Dyöb áte nyésuded-te yál á'sõ é' Dyöb. Nyéwan áte bwámbwam ábel mekan níme Dyöb áhédéé, ábel bon e'sooson ábe nyékúdé, é'lón mbon.

¹³ Nyébel nê áyále Dyöb áde ne nyé pónéd ésyāā, ábel nyéwón nlém ábel mekan mé bwám nímé áhédéé áá nyébel, nyébenle-'e mó.

¹⁴ Nyébele' chóm ésyāāl ésebán nyényonje áte, nyépentan-ne.

¹⁵ Nyébele nén ábel bon modmod eehóbé' áá nyéwóó atón dé mbéb ké á hóg á yál, nyésán-'e. Nén débél nyéēbē bán bé Dyöb ábe béewóó atón dé mbéb ké á hóg á yál, ábe bédé áttnté e bad bé mbéb ábe bébele mbéb pónéd ésyāā. Nyédé áttnté echáb á nkõjsé-te nēngáne betintine ábe bépene'.

¹⁶ Nyébele nén akal áde nyékaleé nkalan nímé nípene' alongé áde déemaá'. Nzé nyébele nén mēbē kúmbe ne nyé á epun éche Krístæ ápéé áyāle nén déluméd bán awan áde ríwané' áá áte ne ntú níme mbéle, bēēbō'é.

¹⁷ Mēbē nēngáne nẏm e mīn echē bésyógé ámīn e nsón níme nyébeleé, nēngáne mende, áyāle adúbe áde nyédúbpé. Nhele-se ríkud metake, nwé-'e áyāle nkale' nkalan ní bwám melemlen ngáne nyémpē áyāle nyédúbpé nímé nkalan ní bwám. Bon kénê ndé menyinge mēwōgēn-ne nyé moosyāāl menyinge.

¹⁸ Melemlen nê dóo nyémpē nyétāngéné menyinge awóg, nyéwōgēn-ne mémpē menyinge.

Paale atelé tāngene Timotie bō Epafroditus

¹⁹ Nzé édé á ntú níme Sāngú Yesue, nwóó nlém álóm Timotie áwēn mwāmpīn ní pónéd, ábel bon pāle éche mēwōgké áyāl echēn, éwéd me nlém á abum.

²⁰ Meewóó'é modmod ampée néé mó awé akoó nímé nlém awón ádān dé ábíi ngáne nyédíí.

²¹ Nhóbe nén áyāle bad ábe bélyágé asē echab yāl chōo bétōntanné, béebeléé ngáne Yesu Krístæ áhédéé áá bébel.

²² Nyé bēn nyébíi ngáne Timotie álumté áá móbele nsón bwám. Abelé nsón ne me ákal nkalan ní bwám ngáne mwān ábeléé nsón ne sáá.

²³ Né-óó, nlyágé nlém mēé mēlóm mó áwēn áde ményīnnē ngáne mekan mēbēēnnē me.

²⁴ Ndúbpé-'e nén mēé Sāngwéé ábēl mwāmpīn ní pónéd mēmēn āmpē mēpē áwēn.

²⁵ Nnyīné nén mēé édé etógnén me álóm awed mwānyan Epafroditus áwēn. Abele nsón níme Krístæ ne me, awōngan-ne átāngēn bad ábe bētāngan nkalan ní bwám, mó-áá abédé nēngáne mēsēnzē níme nyélómé áwōngēn me.

²⁶ Awóó nlém áte bwámbwam ányīn nyé moosyāā, anwóg-ke ndutul áde áwógé bán nyéwógé bán mōnkolé.

²⁷ Edé mbále bán ankolé, ápōn-ne káān ne awé. Bon Dyöb dénwōg mó ngól, saá-kaá mwēmpēn, Dyöb dénwōg mēmpē ngól. Enkēnkwentēnné áá áwé ábel bon meēnabpé ábe á ndutul-té.

²⁸ Né-óó, nwóó nlém áte bwámbwam álóm mó áwēn ábel bon nyéwōg menyinge ányīn mó āmpē, me-'e āmpē meēbūdē atag áte áyāl echēn.

²⁹ Né-óó, nyébē menyinge ákob mó nken áyāle adúbpé Sāngwéé ngáne nyémpē nyédúbpé, nyébage-'e bad nēngáne mó edúbé.

³⁰ Nyébage mó edúbé áyāle ampon awé, abé-'e á nsāl ní son abele áde ábenléé Krístæ. Ambel nén ábel bon áwōngēn me ábel nsón níme nyébēn nyéehéle' áá-se nyébel.

3

Bad ábe bédúbpé Yesue

bōo bēkobnad á'sõ é' Dyöb

¹ Asóged a-baányan, nyébē menyinge abé áde nyédíí mod nhóg ne Sāngwéé. Eetagtéé me átele nyé mekan níme ménsēbēē nyé atele. Nén ádíi ákæ nyé.

² Nyétéd pónéd ne ábē e'bēbtéd é' bad. Echē mbwé, bad ábe bēhóbe bán bētāngéné mod ayag.

³ Syānē-ēé bēyágé nyaa echē etāngéné. Edāádan éwōngan syānē ábe Dyöb edúbé ngáne débenléé mó. Syānē dedé menyinge ngáne dédíí ne Yesu Krístæ. Debíí bán baányon bēehelēé-se bēwōngēn syānē.

⁴ Kénē mēmēn nwóó nẏm ályág nlém á yāl e mekan mé moonyon. Kénzēé áttnté echēn awé awémténe áá mówóó nẏm ásum nlém á yāl e mekan mé moonyon né nwóó nẏm tómaa nē.

⁵ Ade béchyáá me bèn'yāg me ámbid e epun saámbé. Ndií mod a Israel awé abidé á túmbé e Benjamin. Echem sánj ne nyanj bébédeé bad bé Hibru. Mbédéé mod a Farisia, ríhídé mbéndé ngáne éhóbeé.

⁶ Menwōn kán áte bwámbwam nyaa eché nê dèmbenlé nítagté elad é bad bé Krísto. Modmod eéhele'áa-se ahóob áá nwóó atón dé mbéb ké ahóg áyál, áyále nhídé'áá mbéndé é bad bé Israel ésyáál.

⁷ Bonj ábè bwēm é' syáál ábe rínyíné'áá nēe nsyōn béesaá dyam dé abelen bōob, áyále chōm éche Krístáá ábénlé me.

⁸ Saké nê dēmpen, nnyíne chōm ésyáál meé éesaá dyamdyam nzé nhāgténé chō ne ndāle e dyam eché edé ábíi Yesu Krístáá, awem Sāngwéé. Áyál éché chōm ésyáál éesaá dyam dé abelen, nnyíne-'e chō nēngáne mbinde ábel bonj níbíi Krístáá,

⁹ níhē-'e mod nhóg ne mǎ. Saké ahíd á mbéndé dō akóó bonj níkobnéd á'sō é' Dyōb. Bonj nkōbnédé á'sō é' Dyōb áyále ndúbpé Krístáá. Dyōb-paá ábélé bonj níkobnéd áwe é'sō áyále ndúbpé Krístáá.

¹⁰ Ndáá meé níbíi Krístáá níwōn-'e ngíne eché ánwōngē áde ámpuú'é. Ndáá meé níbē níkude metake melelem ngáne ánkudté. Ndáá-'e meé níkud metake ngáne ánkudté káōn béwúu me ngáne bénwúú'é mǎ.

¹¹ Nlyágé nlém nén meé nímén mésyáál mébenléd ábel bonj Dyōb ápuud me ámbid e kwééd echém.

*Paale ad mōwane áte
ápid mam á asóg bwām*

¹² Meehóbeé nén meé mmaá nímén mekan amad ké'e meé mmaá atyéem á menzii mésyáál. Bonj ndii wane áte ábè nyaa e mod eché Yesu Krístáá áhédé'áá áá níbē áde ápwédé me.

¹³ A-baányan, meehóbeé nén meé mmaadé chōm ésyáál. Bonj dyam ahóg áde níbeleé ádíi, áchaten mekan níme métómé ámbid ne áwan áte áhíd mekan níme méhúe' á'sō.

¹⁴ Ndií wane áte áke á'sō káōn nípe wéé nítāngéné asóg ábel bonj níkud nsábe níme Dyōb ábánnédé me ádyōb. Achénle me áá níke ádyōb mbwiined ne Yesu Krístáá.

¹⁵ Syáné moosyáál awé demaá akwōg á adúbe té déwále nímén melelem mé mewémten tāngene nímén mekan. Bonj nzé edé bán nyéwóó mewémten mémpēe tāngene nímén mekan, né Dyōb déwōngēn nyé ásoñten mǎ bwām.

¹⁶ Kénē-'e detāngéné déhídé mekan níme syáné demáá abii.

¹⁷ A-baányan, nyéladten nyébé nyéhíde nímmém mekuu, nyénone-'e bad ábe bébele ngáne nyényinné ngáne sébéláá.

¹⁸ Nkánlé'áá nyé ngen ne ngen, bōob-pe ámpē nlānge nyé ne mēsod tāngene bad híin ábe nímbá mbeltéd nílúmtéé nén bán bédé bad bé ekoyí tāngene nkalanj níme ríhóbe kwééd eche Krístáá áwédé á awōg.

¹⁹ Echén ndín é bad ádad asóg ádíi dū á muú. Chōm éche ékamlan bó édii mekan mé esíí mé ekob é yál. Bédáá ábel mekan níme bétāngéné békwāgne. Mekan mé nkōñsé mémpēn-naá békamtanné.

²⁰ Bonj syáné pen dedii bad ábe echab mbwóg édii ádyōb. Desine-'e awesyáné Nsoode, Sāngú Yesu Krístáá bán ábíd ádyōb átim ámbid á nkōñsé.

²¹ Ábenléd eche ngíne eche ábenladté ákamlen chōm ésyáál, áhānlen échesyáné yál é nkōñsé, yál éche éewóó ngíne, ábel bonj dékud ndāle é yál ngáne ánkudté áde Dyōb dēmpuúdté mǎ.

4

Paale abagé elébé

¹ A-baányan, ndáá nyé anyín ámpē áyále ndáá nyé bwámbwam. Nyébelé ndé menyínge nyédé-'e nēngáne nsábe nímmém áyál e nsón míme níbélé. Né-óó, a-baányan bé edānge, nyébé nyésum mekuu tāngene adúbe áde nyédúbpé Sāngwéé.

² Ncháá nén meé Yudia bó Sintike bēbē á nchemten áyále bó bad bēbe bēdíi baányan bé Krísto.

³ Nlānge wémpē, awem nsón a nsón awé nílyágé nlém áyál, nhēde meé éwōngēn ábén bebaád ábè nsān. Ábén bebaád bēbe, Klemene ne bad bé nsón bēmpēe bēbéde me benben. Syáábōó sébelé ntú ábel bonj níhel nkalanj ní bwām akal. Mmab mín mésyáál médé á kálag e alongé.

⁴ Nyébé menyínge pónde ésyáál áyále nyédii bad ábe Sāngwéé. Nhóbe ámpē, nyébé menyínge.

⁵ Ábè ádēn álúmed á'sō é' bad bésyáál nén bán nyéchedne bad yál. Sāngwéé akwogé ape.

⁶ Nyéētāgē áte áyál e dyamdyam. Bonj pen áyál e kéchéé éche étáné nyé nyékānne Dyōb nén bán ábe nyé chōm éche nyétógnéné. Nzé nyékānne-'e nyésāgnān mǎ.

⁷ Nzé nyébelé-'ε nê, Dyöb débêl nyêbê nsan, nsan nîme ríchábé ámln tómaa ngáne baányan bébele bésòñten. Mmén nsan méwòñgèn nyé ábel bon nyéētāgē áte abé áde nyédíí bad ábe Yesu Krístaa.

⁸ Asóged a-baányan, nyékamtan ábén bwēm pónéd ésyāal. Nyékamtan kéchéé éche édé mbále, kéchéé éche ékwógnédé chòm éche ebóó, kéchéé éche étāñgéné, kéchéé éche éewóo atán dé mbéy áyāl, kéchéé éche bad bétāñgéné adāñ ne kéchéé éche nyényiné bán ébóñné nyé. Nyékamtan mekan nîme mébóó bwāmbwam ne nîme bad béhóbeé bán mébóó. Echén ndín é mam cháo nyétāñgéné ahé á mewēmten-tē pónéd ésyāal.

⁹ Kéchéé éche n'ýágté nyé bon nyékōb-pe ne kéchéé éche nyéwógé áwēm ne éche nyényiné nêe nábélé, nyébele chó. Nzé nyébele nén, Dyöb, mó awê abage nsan, ábē ne nyé.

Paale asógnéné nwòñgen nîme ákudé

¹⁰ Abé áde ndíí mod awe Sāngwéé, ábélé ndé menyinje bwāmbwam, áyāle káññe á asóg nyélúmté bán nyébòñge me. Mbíí nén meé nyéwóó mewēmten ábóo me pónéd ésyāal, bon etāl éebagnedéé nyé ábel áned.

¹¹ Meehóbéé nén áyāle ntóge' chòm. N'ýákgé ákob kéchéé éche étáné me á alongé.

¹² Mbíí ngáne mod ábákgé ésebán awóó chòm éche átógnéné, mbíí-'ε ngáne ébāgkē mod ábud dé awóñ chòm éche átógnéné. Mmēnténé ákob kéchéé éche étáné me. Mmēnténé abé áde nábudé chòm éche n'ýákgē awóñ, nímēntén-ne ádyεε nzaa. Mmēnténé ábē áde n'wóó tómaa ngáne n'ótógnéné, nímēntén-ne abé áde méewóó' é chòm éche n'ótógnéné.

¹³ Kéchéé éche étáne me, ngíne eche Krístaa ábageé me ébêl métōm chó áte.

¹⁴ Nyébelé bwām áwóñgèn me áyāl e nímēm metake.

¹⁵ Nyé bad bé Filipi nyébíí bwām nén bán áde n'ábóótédé nkalāñ n'í bwām akal áde mbidé á Masdonia, nyé bēnpēn-εé nyébédé mwembé nîme ménwòñgèn me.

¹⁶ Ké áde mémbeé á dyad á Tesalonika, nyénlómé me nwòñgèn ngen ne ngen.

¹⁷ Meehóbéé nén áyāle nhede meé nyélómme me nde. Bon nhede meé n'nyíne' ngáne Dyöb ánamtéé nyé anamed ne anamed.

¹⁸ Nkudé chòm ésyāal éche nyékélómēē me, n'kūd-tε ké tómaa nê. Epafrodituse ampiinéd me bwēm ábe nyénlómēē me. Edii byánán nyébagé Dyöb nde eche ewóó elod é bwām. Dyöb ákóbé nímé mendε, mébóñnéde-'ε mó.

¹⁹ Adém Dyöb débē-'ε nyé kéchéé éche nyétógnéné átínté e nímē nkuú mé nhōn, mbwiined ne Yesu Krístaa.

²⁰ Ehúmé ébê ne áded Dyöb, awêd Titée á ngíndé ne á ngíndé. Ebê nê.

Melēnten mé asóg

²¹ Nyéleled bad bé Dyöb bésyāal ábe bédúbpé Yesu Krístaa. Abesyánē baányan ábe bédé ne me bélómme nyé melēnten.

²² Bad bé Krísto bésyāal bélómme nyé melēnten, bwāmbwam abum á ndáb áde Kaisεε.

²³ Nsimé nîme Sāngú Yesu Krístaa nábê ne nyé moosyāal.

Kálag echê Paale áténlé Baá Kolose Ndibned ní kálag

Paale, mbapee a nlomag nhóg awe Yesu Krístaa mós antél enén kálag áde adíí á mbwóg á dyad á Roma. Antelé bad bé dyad á Kolose. Saké Paale andibé mwembé míme mbédé á Kolose. Epafrase mós andibé mwembé míme mbédé áwed. Epafrase ambé á dyad á Efesus. Anwóg eyale é Dyöb áwed, adúbe-’é Yesu Krístaa. Anhidnéd échê eyale, áke ákal chò á Kolose, ádíbe-’é mwembé áwed. Ambíd e pónde, Paale anwóg nén bán bemeléede bé metóm bépééné ayáge adé déeboo á mwembé-te wê. Abé bemeléede béyágté’áá nén bán, kénzéé awê ahede’ Dyöb abíí, awê ahede-’é e’soósonj akud, atánjéné néé ábageé ngine ne benkamlene bé nkònsé edúbé. Bán mod atánjéné-’é néé áhídeé mbéndé néé áyag mod ne áhíd mbéndé émpéé tãnjene ndyééd échê mod ééatãnjeneé adyé, ne ekud é mam émpéé. Mmén mekan méesyáál-lóó mós mênkãñ bonj Paale áténlé bad bé mwembé mé Kolose enén kálag, álél bô ábel bébii mbáale tãnjene Yesu Krístaa ákamlen bad béwsyáál ne ákamlen ngine é nkõñ rísé ne nímin. Mwênpen-naá ahéle ahúd syáné á mbéb-te.

Nkabted ní kálag

Ndibned ní kálag 1.1-8

Nsón míme Krístaa 1.9-2.19

Alongé dékóólé ábe ne Krístaa 2.20-4.6

Nsógten 4.7-18

Paale alómmé bad melenten

¹ Mē Paale, mbapee a nlomag nhóg awê Yesu Krístaa, ngáne Dyöb átíidé me-éé ntenlé nyé enén kálag. Se Timoti, awesyáné mwányanj a Krísto, sélómme nyé melenten.

² Ntenle nyé bad bé Dyöb ábe nyédé á dyad á Kolose. Nyédé ne Krístaa, nyéhíde-’é mós ne nlem nhóg. Nsimé ne nsanj ní Dyöb Titée awéd mbé ne nyé.

Paale aságnéné Dyöb á mekáne-te

³ Pónde téé sékánnad nyé, séságnãñ Dyöb, Sáá awê awed Sãngwéé, Yesu Krístaa.

⁴ Séságnãñ Dyöb áyale sêwógé bán nyédúbpé Yesu Krístaa, nyédaá-’é bad bé Dyöb bésyáál.

⁵ Sébii nén bán nyébele’ né áyale nyésumé nlem nén bán nyéékud nnam míme Dyöb ákónjéde nyé ámin. Nyémmãd mam awóg tãnjene níme nnam adé bésébpé nyé nkalanj ní bwám ní mbáale akale.

⁶ Mmén nkalanj ní bwám mé nsimé ní Dyöb ríkanlad mebwóg ne mebwóg rílag á’só. Epun e é’só éche nyéwógé nyénsòntén bán Dyöb ákónjté nlem ní bwám awónj ne bad bé mbéb.

⁷ Epafrase, mbáledé awe Yesu Krístaa mós ankalé nyé níme nkalanj. Adíí mod awé syáábóó sêbele’ nsón, sêdaá-’é mós bwámbwam. Abenle’ Yesu Krístaa ne nlem nhóg. Abé áde adíí-’é ne nyé, nsón míme séntãnjénné ábel mós ábeléé.

⁸ Mós alángé-’é sé aá Edaáðanj é Dyöb ébéle nyédaá bad bé Dyöb.

⁹ Né-’ó, bootya pónde échê sêwógé nímin mam, sékánnad nyé pónde téé. Sékánné nén bán Dyöb ábel nyékonj chóm éche áhedeé aá nyébel asòntjen. Sékánné nén bán Dyöb ábe nyé debyéé ne nsòntjen ábel nyésòntjen mam mé Edaáðanj bwám.

¹⁰ Nê débél áðen alongé débé ngáne alongé áde bad bé Dyöb átãnjéné abé. Nyéébele’ mam níme méwógte mós menyinge. Mekan mé bwám mós ne mós-’éé nyébeléé. Nyaa echê nyésòntjen-naá Dyöb, échãgkê acháge ne acháge.

¹¹ Sékánné-’é ámpé nén bán, Dyöb ábê awéd nyé áte ne echê ngum echê echabé ámin, ábel nén nyéhel awesen, nyékanj nlem, nyébé-’é menyinge áyál e mam méesyáál.

¹² Nyééságnãñ Titée áyale chóm ésyáál. Mós-’aá ábelé bonj nyékwognéd ábê bad ábe békobe akab á bwém ábe ákónjéde ábê bad hóm áde e’nyínen bé ekíde é díí.

¹³ Ahúde syáné ásé e ngine e nkamlene a ehíntén, apééné syáné ásé e nkamlen míme awe Mwán a nlem.

¹⁴ Dyöb álagсэнé syáné nímed mbéb akóde áde ákódté syáné ne mekií míme awe Mwán ásyógé á awóg.

¹⁵ Modmod eenyínnéé Dyöb díí. Bonj bad bénsòntjen ngáne Dyöb adíí áde bényíné Krístaa áyale adíí nwágén ní Dyöb.

¹⁶ Edé nê áyále, mbwiined ne Krístaa dós Dyöb áhágé bwém é’syáál á nkonj ní mín ne rísé. Ahágé bwém ábê bényínnéé díí ne ábê bényínnéé díí. Mós ahágé benkamlene, ne ngine ésyáál. Dyöb áhágé bwém é’syáál mbwiined ne mós, mós-’aá Dyöb áhágkê ábê bwém é’syáál.

¹⁷ Bédéhób bán béhage’ kéchéé á nkònsé-te né Krístaa adé alongé. Mós-’aá akáá bonj bwém é’syáál ébê á e’díí.

¹⁸ Mós adé nló níme bad ábe bédúbpé mós, bós-'aá bédé nēngáne eche yāl. Mós abage ábē bad alongé áyāle mós adé mod a'só awē Dyōb ápúúdté awē ábē-'e abé ne abé. Nén dēmbenléd ábel nén ábē nkamlenē ámín mekan mésyāāl.

¹⁹ Mmēn mekan médé nē áyāle nén Dyōb dēn-'é adē.

²⁰ Dyōb dēmbēl nén aá chōm ésyāāl étim ásē ne mós Dyōb mbwiined ne Krístāē. Abén bwēm é'bédé bwēm bé nkoj rísé ne bwēm bé nkoj ní mín áyāle asyōg adé awe Mwān ásyōgέ mekií á awōg. Bōob-pōō, chōm ésyāāl éhale ébē nsañ ne Dyōb.

²¹ Nyé ne nyé nyēmbé nchabned ne Dyōb, nyáābe Dyōb nyēebédéé áyāle mewēmten mé mbéb níme nyénwōñ' é ne mbēltéd mé mbéb níme nyébélé'áá.

²² Bōj bōob, Dyōb ábélé nyétimé ásē ne mós, awé áde awe Mwān Krístāē awē abédé moonyoñ áwédé á awōg. Dyōb dēmbēl nē ábel nén nyébē wéε módíí, nyébē bad ábe bésáá, nyéewóó atón dé mbéb ké ahóg á yāl, béékōbnē-'e nyé awusé ké ahóg.

²³ Ehē nén bán áden adúbe adíi awúú áte nyéehúde-'e mekuu ásē ne asum áde nyésumé nlém áyāl e nkalaj ní bwām níme nyéwógé. Mmē nkalaj ní bwām níme nyémáá awōg, nííi nkalaj níme níkanlédé nkōjsé áte rísyāāl mós-'aá me Paale, rítimé mbaledé a Dyōb ákal.

Nsón níme Paale

²⁴ Ndé menyinge bōob ne metake níme ríkudeé áyāl echēn. Ngáne ríkudeé nímén metake, mmade metake níme Yesue nímé rítāngéné abé, áyāl eche yāl, nédē bad ábe bédúbpé mós.

²⁵ Dyōb ábélé me mbaledé ábele bad ábe bédúbpé Krístāē. Alómé me aá níkoj nyé éché eyale akale bwām.

²⁶ Bōód, éché eyale émbē dyam adē bad bēnkēnsōñtēnné. Bōj bōob ábele ábē bad bēbíí chós.

²⁷ Dyōb áhede' nén aá ábē bad bēbíí nén bán nhon ne ehúmé éche Krístāē edé kááñne ne bad ábe béesé bad bé Israel. Kun eché edé áwēd-te edíi nén bán, nyésum nlém nén bán nyéékúđ ehúmé éche Dyōb áhóbé aá mósbē ábē bad.

²⁸ Né-'aá ákás bōj sélāngē bad tāñgēne Krístāē kéhéé wéε sékagké. Sélébe', séyāgtē-'e bós ne debyéé ásyāāl áde Dyōb ábágé sé. Sébele nē áyāle séhede nén bán békobned á'só é' Dyōb nēngáne bad ábe mekuu mémáá awédned ásē á adúbe-tē.

²⁹ Bōj nwane áte bwāmbwam. Ngum echē Krístāē eche edé me áte, chós-'e ebage me ngine áwan áte.

2

¹ Ndás méé nyébíí ngáne ríkēmpéé awan áte áyāl echēn, ne áyāl e bad bé dyad á Laudesia, nyébíí-'e ngáne ríkēmpéé awan áte áyāl e bad bēmpēe ábe béēnyínnē me díđ.

² Mbēle nē áwéd bós nlém á abum ábel bōj edāñge éche edé áfínté echēn ébel nyébē mod nhóg. Nhede me nyáābōō nyésum nlém ne asum ásyāāl néε bad ábe bésōñtēné dyam á Dyōb áde bad bēnkēnsōñtēnné. Adé dyam-me adíi Krístāē mwēn.

³ Krístāē mós ahele ábēl bōj nyéwōñ debyéé ásoñten mekan mé Dyōb. Mmē mekan médé etógnén bwāmbwam.

⁴ Nlāñge nyé nén ábel bōj mod eédoñné nyé e'nyin bé nsal áte se nyéwémten nén bán dyam áde álāñgéé nyé átāñgéné.

⁵ Ndás méé nyébíí nén bán kénéε mmēn méesaá ne nyé, ndé ne nyé é edáádāñ. Kénéε méesaá-'aá ne nyé, ndé menyinge nén adúbe áde nyédúbpé Krístāē ályágé adé ngine.

Bad bé Krísto béesađ ase e mbéndé é nkōjsé ámpē

⁶ Né-'aá, ngáne nyékóbé Krístāē nēε Sāñgwéé awēn, nyébē nyébele' ngáne áhedeé.

⁷ Adúbe áde nyédúbpé chōm-'ée ábēn bemeléede bēyāgté nyé edé mbále. Nyéságnan-ne Dyōb pónde té áyāle chōm ésyāāl.

⁸ Nyéēmwāg-se mod atéd nyé ntāñ áhíd e'hóhó bé áyāge dé metóm áde bēyāgtéé. Ayāge adē bēyāgtéé nyé adíi ayāge adē békóbé wéε ábāb betaa ne áde áhíde mbéndé é mekan mé nkōjsé. Adé ayāge adíi ayāge adē áhúú ne baányoñ ngēn dééhúú' é ne Krístāē.

⁹ Nyéēmwāg-se ábē bemeléede bé metóm bédog nyé áyāle nén ngine ne abé á Dyōb adé yāl e moonyoñ echē Krístāē áte.

¹⁰ Né-'aá, nyélóné mbon áyāle nén nyédé ne Krístāē, Mós-'aá akamlan ngine ne benkamlené bésyāāl.

¹¹ Abé adē nyédíí ne Krístāē, Krístāē ayagé nyé. Eesaá nēngáne moonyoñ áyagéé mod. Krístāē mós ayagé nyé é edáádāñ-tē. Ahúde áden abé dé mbéb.

¹² Áde bēndusénné nyé, edé néε nyénwé, bélímé nyé, Dyōb ápúúđ-te nyé ne Krístāē. Nén dēmbenléd ne nyé áyāle nyéndúbé nén bán ngine e Dyōb echē epuúdté Krístāē epuúđ nyémpē.

¹³ Ngen e'só nyëmbé byánán nyëwédé áyale nyébóó'áá mbéndé é Dyòb. Ene póndé-'é né Krístáa ééhüdeé nyé abé dé mbéb áyál. Boŋ bɔɔb, Dyòb ábágé nyé alongé dékɔɔlè apuud áde ápuúúdté syánē ne Krístáa. Alágséné syánē nímmed mbéb rísyáál.

¹⁴ Edé nēngáne apínné mbéb nímé syáné wéε antenlé mɔ. Nédé nímé mbéb méesaá ámpé. Dyòb ábómmé nímé mbéb á awɔg abome áde bébómmé Krístáa á awɔg boŋ awé-'ε.

¹⁵ Dyòb déntóm ngíne ne benkamlene bé nkòŋsé áte. Atóm áde ántómmé bó, dényínnéd ne moosyáál ne awé áde Krístáa ánwéé á awɔg.

¹⁶ Né-ɔɔ, nyéemwág-se bad bélāngé nyé bán nyébele awusé áyale nyédyágkè donge dé medyé, ké'ε áyale nyémwágkè donge dé mmítéd, ké'ε áyale nyéebágkè donge á ngande áse, ké'ε ngande eché ebág nze ngon étúbé túbén, ké'ε ngande e Epun é Nkóme áte.

¹⁷ Eché mbéndé ésyáál ebédé-'ε néε e'diídinge ábè é'lúmté'áá mam mé bwám nímé Dyòb déntāngēnné alóm. Krístáa mɔ-'áá alónté nímé mam mésyáál.

¹⁸ Nyéemwág-se mod anyágéd nyé áá nyétāngéné yál asuded. Nyéemwág-ke se mod anyágéd nyé nēn áá nyétāngéné ángel edúbé abe ngáne ábageé. Nze nyébele nē né nyéebɔd nde eché Dyòb áhóbé áá mɔɔbē nyé. Kénzée awé ayágte' nē, ahóbe' áá mónyíné á ndóg-te. Ene ndín e mod edé kúmbe ngēn ne mekan mé mbéb nímé níbide' mɔ á nlém-té, boŋ eewóo'ε nzom ké póg ábē.

¹⁹ Ene ndín e mod esógé Krístáa awé adé nló mɔ bad ábe bédúbpé adúbe. Ngáne nló ríkamlanné yál esyáál, melemlem nē dɔo Krístáa ákamlanné bad ábe bédúbpé mɔ bésyáál ábel bebé mod nhóg. Ngáne nsid ríladéé mebóŋ mé yál mé mod boŋ abé mod nhóg, nē dɔo Krístáa áladéé bad ábe bédúbpé mɔ ábē mod nhóg áse eché. Mmē nlatén ríkwoge-'ε ngáne Dyòb átiídé.

Awé ne ábē á alongé ne Krístáa

²⁰ Edé bɔɔb byánán awé áde Krístáa áwédé, nyéwédé ne mɔ. Né-ɔɔ nyéesaá áse e mbéndé é nkòŋsé ámpé. Cheé-ɔ ékɔs boŋ nyébé nyéhíde' eché mbéndé byánán nkòŋsé rídi ríkamlan nyé?

²¹ Abé bemeléede bé metóm bélānge nyé nēn bán, "Nyéechāngé échén, nyéewóglán échíníí á nsál, nyéésítán eché."

²² Eché mbéndé ésyáál énone' bwēm ábè béebāg dyamdyam ámpé nze mod amaa bó abenled. Eché mbéndé edíí mbéndé ne ayáge áde bad bēn béhāgné nló.

²³ Eché mbéndé ébele ényínnāad byánán edé debyéé áte bwāmbwam áyale nēn, éyágte bad nēn bán bēn bétāngéné néε béwóó nlém ábel mekan nímé mékámé ábel, álúmed nēn bán békoo Dyòb ahíd. Éyágte bad bán bésuded yál, bébane-'ε yál á metake-té bwāmbwam. Boŋ ké bad bēnhūú eché mbéndé ahíd, éehéléé bó awóŋgen ásóǵ mewémten mé mbéb awóŋ.

3

¹ Edé bɔɔb byánán apuud áde Dyòb ápuúúdté Krístáa, nyémpé nyépuúdé ne mɔ. Né-ɔɔ, nyébé nyóngé áyál e mam mé mīn, wéε Krístáa ádií á nkamlan á ekáá émbáá é Dyòb.

² Nyébé nyésum nlém áyál e mam mé mīn, nyéésümé nlém áyál e mam mé nkòŋsé.

³ Nyébíí nēn bán, awé áde Krístáa áwédé, edé nēngáne nyémpé nyéwédé.

⁴ Krístáa mɔ adé alongé ádéd, áde ápeé-'ε á nkòŋsé-te wén nyémpé nyéébe ne mɔ ne ehúmé ésyáál.

Alongé dé nchun ne alongé dékɔɔlè

⁵ Né-ɔɔ, nyéhúd mekan mé ekob é yál nlém ne ahúd ásyáál. Nyéhúd nlém áyál e mam nēngáne, akáb dé mesón, mbinde é mekan, esíí é mam mé ekob é yál, áwóŋ mewémten mé mbéb ne ngoód. Nze nyédé ngoód né edé nēngáne nyébage Dyòb démpée edúbé.

⁶ Dyòb dékògsēn bad bésyáál ábè bébele' échén ndín e mekan. Echén ndín é mekan éliŋse' Dyòb, né-ɔɔ, ákògsēn bad ábe bébele chí héén.

⁷ Echén ndín é mekan chíó nyébeláá ngen e e'só, áde esíí é mekan mé nkòŋsé ékámllannáá nyé.

⁸ Boŋ bɔɔb mekan nēngáne meliŋgá, péł, ekoyí, ábébed mod dīn, ne ábéb nsál áte, nyétāngéné mɔ asóg dé ábel.

⁹ Nyéekanlé' nhóg ne aníníí metóm. Nyéebēlé' nímén mekan ngáne edíí bán nyémaá áden abé dé mbéltéd mé mbéb atede.

¹⁰ Bɔɔb-poo nyémaá nkob mékɔɔlè ahé. Dyòb áhédé nyé áden alongé dékɔɔlè áte, akwogte-'ε dɔ ábel nyébé néε mɔ, nyékon-'ε mɔ awé ahegé nyé abii bwám. Awóŋ áde nyéwóó áden alongé dékɔɔlè ábélé

¹¹ nhāŋlén méesaá áfínté e mod awé adé mod a Israel ne awé eesé, ké'ε mod awé báyágé ne awé béeyageé. Ken mod adé mod a nken-ε, ken mod e ahín-té-ye, ken ntāŋ-ε, ken kunze-ye. Krístáa mɔ adé dyan ásyáál adé-'ε bó mod ásyáál áte.

¹² Né-ɔ́, nyétàngéné nlem ní ngɔ́l awón, nyétàngéné nlem abon, nyétàngéné-ɛ yál asuded. Nyétàngéné arwiited, nyétàngéné-ɛ awesɛn.

¹³ Nyétàngéné nhóg ne aníní awesɛn. Nzé mod bó waáb békúú waáb álagsɛn mɔ́. Ngáne Sàngwéé álagsɛné nyé, nyémpɛ nyétàngéné nyélagsɛn nhóg ne aníní.

¹⁴ Amin e mímén mɛsyā́l, nyédəŋ nhóg ne aníní. Edəŋge chɔ́ ɛ́lade' chòm ɛsyā́l.

¹⁵ Krístaa abelé nyédé nsaj ne nhóg ne aníní. Né-ɔ́ mímé nsaj rítàngéné chòm ɛsyā́l éché nyébeléé alyáged. Nyétàngéné nyéságnɛn-ne Dyɔ́b pónédé ɛsyā́l.

¹⁶ Eyale éche Krístaa ébɛ nyé á nlem-tɛ bwám abé ne abé. Nyébenlad éché eyale ne debyéé ɛsyā́l áyáged ne áléb nhóg ne aníní. Nyékónne' Dyɔ́b ngəse éche édé á kálag e Dyɔ́b. Nyékónne' Dyɔ́b ngəse éche ékémte' Dyɔ́b ne Krístaa, ne nkəŋgé ké ríhée míme mípiídé nyé ákéméd Dyɔ́b. Nyékónne' mɔ́ ásaŋnɛn mɔ́ ne nlem rísyā́l.

¹⁷ Kéchéé éché nyéhóbéé, ké'ɛ éché nyébeléé, nyébele chɔ́ á ðin áde Sàngú Yesue. Nyéságnan Dyɔ́b Titéé á ðin á Yesu.

Alongé dékə́le ađe nyétàngéné awón

¹⁸ Nyé bebaád bé bechóm, nyéwógne áben bechóm. Nê dóo bad ábɛ bédúbpɛ Sàngwéé bétàngéné abel.

¹⁹ Nyé baachóm ábe nyéwóó bebaád, nyédəŋ áben bebaád, nyéetagté-ɛ bó ngɛn.

²⁰ Nyé bānbān, nyéwógne áben bésáá ne benyaá áyāl e kéchéé éché nyébeléé. Nê dóo Sàngwéé ádóó aá nyébel.

²¹ Nyé bésáá bé bān, nyéekantɛ áben bān. Nzé nyékanɛ' bó, né nyésúnte bó yāl áte.

²² Nyé betāŋ, nyéwógne áben bewón pónédé ɛsyā́l. Nyéebnle bó nsón dásɔ́ pónédé éché bényínɛé nyé ábel békéméd nyé. Bon nyébenle bó ne nlem nhóg áyale nɛn Sàngwéé mɔ́ nyébagé edúbé.

²³ Nsón ké ríhée míme nyébeléé, nyébele' mɔ́ ne nlem rísyā́l. Nyébele mɔ́, nyébii-ɛ nɛn bān Dyɔ́b dóo nyébenléé saké baányon.

²⁴ Nyébii nɛn bān nyéékúɛ nsábe míme Sàngwéé ákónnéde ábɛ bad. Krístaa mɔ́ adé mod awé nyékoó'ɛ abele.

²⁵ Dyɔ́b dékə́sɛn kénzée awé abelé mbéɛ áyāl e mbéɛ míme ábélé. Dyɔ́b déekwognádté modmod.

4

¹ Nyé bad ábe nyéwóó betāŋ ásé echɛn nyéwále áben betāŋ nyaa eché Dyɔ́b áhɛdeé, nyéchə́-ɛ bó bwám. Nyébii nɛn bān nyémpɛ nyéwóó mod amin awé nyédíí ásé eché.

Paale awéde' bad nlem á abum

² Nyébɛ nyéwéd yāl áte á mekáne-tɛ. Nzé nyékánne-ɛ nyébānɛ nlem ne kéchéé éche nyélanɛé Dyɔ́b, nyéságnɛn-ne mɔ́.

³ Nyékánne-tɛ sémpɛ ábel nɛn Dyɔ́b ánedned sé nzii ákal nkalan tǎŋgene Krístaa míme bad békə́nsónɛnné bɔ́ɔd. Mmɛ nkalan míme ríkaleé mɔ́ ríkásɔ́ bon mbé á mbwog.

⁴ Nyékánne' nɛn bān ríkale mɔ́ bwám nyaa eché rítàngéné abel.

⁵ Nyébii ngáne nyébeléé mekan nzé nyédé ne bad ábe bédúbpɛ Krístaa. Pónédé téé eche etál ébágné ne nyé, nyébenle' bó mekan mɛ bwám.

⁶ Nzé nyáábɔ́ nyékale', nyéched ehób á nsal, nyékale póle éche ébonɛ bad nlem á abum. Nzé nyébele' nê, né nyéebii ngáne nyékwentanné kénzée awé asédté nyé dyam.

Melɛntɛn mé asóg

⁷ Tikikuse, mwánned a nlem a Krísto áláá nyé mam míme mébenlad ne mɛ hɛn. Mómɛ adii mbaledé awé abenle Sàngwéé ne nlem nhóg nchoo ne me.

⁸ Nlómé' mɔ́ áwɛn ábel bon áláa nyé ngáne sédíí, áwéd-te nyé nlem á abum.

⁹ Nlómé' bó Onesimus. Onesimuse mómɛ adii mwánned a Krísto awesyáné awé dédásɔ́. Mómɛ abenle Krístaa ne nlem nhóg. Adii mod awé abíde áwɛn dyad. Bó Tikikuse béláá nyé mam míme mébenlad hɛn.

¹⁰ Aristakuse awé súmɔ́ bedé á mbwog hɛn alɛnté nyé. Banabase mwányan mómɛ alɛnté nyé. Memáđ nyé aláa tǎŋgene Makɔ́se. Nzé apedé, nyékok mɔ́ nken.

¹¹ Yesue awé béchə́gé bān Justuse, mómɛ alente' nyé. Abɛn bad beláán bɛnɛn bóo bédé bad bé Israel ábe bédúbpɛ Krístaa, ábe syáábɔ́ debele' nsón ákal nkalan tǎŋgene nkamɛn ní Dyɔ́b. Békéwéd mɛ nlem abum bwámbwam.

¹² Epafraze mómɛ alɛnté nyé. Mómɛ adii mod awé abíde áwɛn dyad, abé-ɛ mbaledé awe Yesu Krístaa. Akánnad nyé pónédé téé. Aá Dyɔ́b dɛn ábel nyékonɛ chòm éche áhɛdeé aá nyébel abii, nyébel-le chɔ́.

¹³ Mmɛn mbíde' mɔ́ mbón nɛn mɛé abelé nsón bwámbwam áyale echɛn ne áyāl e bad bé Krísto ábe bédé á Laudesia ne á Hirapólis.

¹⁴ Lukase, dógtɛɛ awé dédásɔ́ bó Demase, bómpɛ belómme nyé melɛntɛn.

¹⁵ Nyéłnted mε bänned bé Křısto ábe bédé á Laudesia. Nyéłnted-tε mε Nimfaa, ne bad ábe bédúbpé bésyāal ábe bébome' áwe ndáb.

¹⁶ Nzé nyémaá enén kálag aláŋ, nyélóm ch́ á Laudesia ábel bómpē belāŋ ch́. Nyémpē nyényín nén bán nyéłáá kálag echē rílómmé bad bé Laudesia.

¹⁷ Nyéłáa Achipuse bán ányín nén áá mómadé nsón ríme Sáŋgwéé ábágé mós áá ábel.

¹⁸ Mε Paale mmēn-εé mbēnlédé échēm ekáá átele nyé rímén melentεn. Nyéēchatán nén bán ndé á mbwəg. Nsimé rí Dyōb ríbê ne nyé.

Kálag e'só eché Paale áténlé Baá Tesalonika Ndibned ní kálag

Dyad á Tesalonika dǎǎ ábédé nló mé alonj á mbwóg e Masedonia. Ade Paale ábídé á dyad á Filipi, anké á Tesalonika ádíbē mwembé áwed. Ambíd e pǎndé, Paale anhidé á Tesalonika áke á dyad á Beria. Anhidé áwed ámpē ákē á dyad á Kǎrinto, áwed-taá ákúdé kálag eché mod awé búmǎ bébele nsón, Timotie, álómmé mó, áláa mó tǎngene mekan níme mébenlad á mwembé níme rídé á Tesalonika.

Paale antelé mwembé níme ndé á Tesalonika, enén kálag e'só áwéd bó nlém á abum tǎngene adúbe áde bédúbpé Sǎngwéé bédǎñ-é mó. Awéd-te, ankamtén bó nyaa e alongé eché ánwǎngé áde ábédé ne bó, ákǎñ-é bó mekan alúmed áte tǎngene epe éche Krístǎá ápeé ámpē, éche émpēén mpúutéđ átínté e mwembé níme ndé á Tesalonika. Anlúmed bó áte ngáne áwóó nlém áte átim ámbíd áwáb ábel bonj áwéd bó nlém á abum tǎngene mam mémpēe níme ménǎne' ádab adúbe. Anláá bó mekan níme bétǎngéné ábel áwóged Dyǎb menyinje ne ngáne alongé ádáb átǎngéné ábē asin áde básinéé epe éche Sǎngwéé.

Nkabted ní kálag

Ndibned ní kálag 1.1

Meságnen ne mekenag 1.2-3.13

Elébé tǎngene abé á bad bé Krístó 4.1-12

Elébé tǎngene epe éche Krístǎá 4.13-5.11

Elébé é asóg 5.12-22

Nsǎgten ní kálag 5.23-28

¹ Me Paale, nchoo ne Sailase bó Timotie, me-éé ntenle' nyé enén kálag. Ntenle nyé bad ábe bédé á mwembé níme rídé á dyad á Tesalonika, nyé ábe nyédé bad ábe Dyǎb Tité, nyébé-é bad ábe Sǎngú Yesu Krístǎá.

Nsimé ne nsaj níme Dyǎb mbé ne nyé.

*Paale aságnan áyǎle adúbe
áde bad bé Tesalonika béwóó*

² Séságnan Dyǎb áyǎl e nyé moosyǎl pǎndé té, séhǎg nyé á mekáne pǎndé-té nzé sékáñne'.

³ Nzé sékáñne' ádéd Dyǎb echéd Sǎñ, sébelé sékamtán nsón níme nyébéleé áyǎle adúbé áde nyédúbpé. Sékamtan ngáne edǎnge éche nyéwǎñné bad bémpēe ébéle nyébele ntú áwǎngēn bó, nēngáne alyǎg áde nyélyǎgē nlém áyǎl e epe éche awesyáné Sǎngwéé, Yesu Krístǎá, ábéle mekuu méwúú nyé áse.

⁴ A-baányan, sébíí nēn bán Dyǎb ádáá nyé apwédé-é nyé ábē ábē bad.

⁵ Sébíí nēn áyǎle áde sémpēé áwēn bonj sékanlé nyé nkalanj ní bwám, saké e'yale bēnpen bó sémpēénné. Bonj ngine e Edǎǎdǎñ éche Esáá chǎ embēl bonj sékalé nkalanj ne ngine, sēnkǎñ-é adúbe nēn bán kéchéé éche séhǎbéé édé mbále. Nyébíí ngáne abé ádéd démbēé áde sémbēé ne nyé. Chǎm éche énkǎñ bonj ábē né édíí áwǎngēn nyé.

⁶ Ne nyé, nyéhídé'áá nyaa e abé eché sēnwǎngē, nyéhídé-é abé áde Sǎngwéé. Edǎǎdǎñ éche Esáá émbēl nyéwóg menyinje akob áde nyénkobpé nkalanj níme sémpēénné áwēn.

⁷ Né-ǎǎ, abé ádēn démbē nēngáne elǎnsén átínté e bad ábe bédúbpé, ábe bédé á mbwóg é Masedonia ne Akaya.

⁸ Nyéé nyékǎá bonj nkalanj níme Sǎngwéé níwógnéd mebwóg mémpēe. Saké á mbwóg é Masedonia ne á Akaya démpēn-éé níwógnédé. Bonj adúbe áde nyédúbpé Dyǎb dǎmpé áwógnédé hǎm ásyǎl. Né-ǎǎ, nzǎm ké pǎg eesaá eché séhǎbéé ádén akan ámpē tǎngene nyé.

⁹ Ábē bad bēn bóó bétime ahób ngáne nyénkobpé sé nken áde sépédé áwēn. Béhǎbé-é ngáne nyétímné Dyǎb, nyétedé-é abele á myǎb mé metóm bonj nyébenlé Dyǎb dēn áde ádē á alongé.

¹⁰ Béhǎbé-é ngáne nyésinéé epe éche Mwǎn a Dyǎb awé abíde ádyǎb. Ane Mwǎn a Dyǎb, Yesu, awé asoo' syáné áse e nkǎgsen ní Dyǎb níme níhúé', mǎs Dyǎb démpúúdté.

2

Paale abelé nsón á Tesalonika

¹ A-baányan, nyé bēn nyébíí bán epe éche sémpēé áwēn, énkémbáá ngēn.

² Nyé bēn nyébíí ngáne sēnkúdté metake béwóged-te sé e'són á dyad á Filipi. Bonj ádesyáné Dyǎb dénwéd sé nlém á abum, ákale nyé nímē Nkalanj ní bwám. Sékalé'áá mó kénéé édíí bán bad híin bétyéámánáá sé bwámbwam áyǎle béehede'áá bán sékale má.

³ Chõm éche sêlàngé'áá nyé bán nyébel, ênkêmbáá nén bán sênwõj mewêmtɛn mé mbé, káa bán ébéde chõm éche sênkêntàngénné abel ké'-ε ádog nyé.

⁴ Bon pen sêlàngé'áá nyé mós, née bad ábe Dyõb ápwéde ákwogned dé akal nímē nkalaj. Né-ò, sêkale nímē nkalaj ní bwám saké áwóged moonoyõj menyinje bon áwóged Dyõb áde ábíí sé nlém áte menyinje.

⁵ Nyébíí bán áde sêmbéε ne nyé sêebonje'áá nsal áte, ngoód-ε eebédeé sé áte. Dyõb áde sé mbõj áyál e nê.

⁶ Séehede'áá nén bán nyé ké'ε bad bémpeé békene' sé.

⁷ Kénεé édíí bán sê nêngáne bembapεε bé nlomag ábe Krístæ, sênwõj kunze ápéméd nyé nted, sênkêmpémtédte nyé, bon pen sêmpwiitéd áfinté echên ngáne nyé-mwán átagnéé ábe bán.

⁸ Sédæ nyé bwámbwam, saké ákale nyé nkalaj ní bwám ní Dyõb mêmpeɛn, bon káõjne ábel nyaa eché séhele sêwõjgên nyé, áyále sêdæ nyé bwámbwam.

⁹ A-baányaj bé Krísto, ndúbpé méε nyékamtan nsõn ne ntú ní ngine nímē sêbéle. Ade sêkánlé'áá nyé Nkalaj ní bwám ní Dyõb, sêbéle'áá nsõn nkuu ne müte ábel bon sêétagté nyé modmod.

¹⁰ Nyéde sé mbõj, Dyõb-pe ámpé áde sé mbõj nén, áde sêbéde áfinté echên, nyé ábe nyédúbpé, abé dénsaj sé, sêbéle'áá mekan nímē métàngéne, sênkênwõj-'áá awusé ké ahõg á yál.

¹¹ Nyébíí nén bán sênchæá nyé mod téé ngáne sáa-a-mwán áchàngéé ábe bán.

¹² Séwéde'áá nyé nlém á abum, sésimē-ε nyé etúu áte áwõj abé áde áwógte Dyõb menyinje. Dyõb dõó áchénlé nyé ábe áfinté e ábē bad ábe ákamlanné ne ábē ásē e éche ehúmé.

¹³ Nzom empée edé eché ekæá bon sêbagé Dyõb meságnɛn pónde ésyáál. Ade sêmpéénné eyale é Dyõb áwɛn, nyênwóg chõ, nyékõb-pe chõ. Nyênkênkoppé chõ nêngáne eyale éche éhúú ne moonoyõj bon nyênkob chõ nêngáne eyale éche éhúú ne Dyõb, ngáne chên-ne ékõjté abé. Eché eyale chõ-'áá Dyõb ábenladté áfinté echên, nyé ábe nyédúbpé, áwõjgen nyé.

¹⁴ A-baányaj, melemlem mé mam nímē mêmbeñléd ne mwembé ní bad bé Dyõb ábe bédúbpé Yesu Krístæ ábe bédé á Judeya, mós mébéñléde ne nyémpé. Nyékudé metake á mekáá nímē ábɛn bad melemlem ngáne bõmpé bènkuaté metake á mekáá mé bad bé Israel.

¹⁵ Abé bad bé Israel bó donje bénwúu Sàngú Yesue, bémpeε-ε béwúu bekal bé'dæádaj. Abé bad bé Israel-ε bó donje-'áá bènñán sé áwáb dyad-té. Béewógtéé Dyõb menyinje, bétýeeman-ne moosyáál.

¹⁶ Bébele nê ábel bon sêekanlé bad ábe béesε bad bé Israel eyale é Dyõb, ábel bon béekudé e'soosõj. Bébáde mbéð ámín e mbéð pónde ésyáál, káõjne á asóg-ke, Dyõb átàngéne bó akõgsɛn.

*Paale awóó nlém áte anyin
bad bé Dyõb bé Tesalonika*

¹⁷ A-baányaj, sêhõbe nén bán sêpágnéde nyé á yál á esõj é pónde. Kénεε séesaá hõm ahõg ne nyé, sédíí sêkamtan nyé. Ngáne sênwõjgê mewêmtɛn bwámbwam ányin nyé, sênwán áte bwámbwam ányin nyé ámpé.

¹⁸ Nén ábéde áyále séhedé'áá ape áwɛn. Mmên Paale, nwané áte ngen ne ngen ápe bon Satanε ênkênháá sé etál.

¹⁹ Nyéε nyékæá bon sêwõj e'lyág bé nlém, nyéε nyékæá bon sêbé menyinje, nyéε nyékæá-ε bon sêkumé ekáá á tâl, áyále nsábe nímē sênõnεé á'sõ ákud á pónde eché Sàngú Yesue ápeé. Nyébên-εé nyékæá.

²⁰ Ne mbále, nyéε nyékæá bon sêkumé' ekáá á tâl, bon sêbé-ε menyinje.

3

¹ Né-ò, áde sênkênhenlé adyεε ésebán sêde ne nyé, sêntíí nén bán séédyéé ne sé bèn á dyad á Atens.

² Sênlóm Timotiε, awesyánē mwányaj áwɛn. Syáábõ sêbele nsõn ní Dyõb ákal nkalaj ní bwám tångɛne Krístæ. Sênlóm mós áwɛn áwõjgen nyé áwéd nyé áte á adúbe-té ne áwéd nyé nlém á abum.

³ Séhede bán áwéd nyé nlém á abum ábel bon nímén metake méebéle'-sε nyétímɛn mbíd. Nyébên nyébíí bwám nén bán Dyõb ámáá atíí nén áá syáá baasyáál deékúd nímén metake nímē nyékudéé.

⁴ Nyébíí nén bán áde sêbéde ne nyé, sênláá nyé á'sõ é' pónde nén bán sêékúd metake. Nyé bèn nyébíí-ε bán nén dên-εé ébénléde.

⁵ Nén dáo dênkãñ bonj nóm Timotie. Menkênhenlé nlem akanj ámpē, né-óó, menlóm mó áhye dé ahead áte ngáne adúbe ádíí nyé. Membel nê áyale mbáá'áá méé ane awè abele' bonj bad béhún á mekəgsen-té, ahele ahúnéd nyé á mekəgsen-té. Nén délúméd bán sèbelé nsón ngén.

⁶ Bɔɔb-pɔɔ, Timotie abidé áwēn apedé ámbid áwēd, aláńgē-é sé kəse e nkalanj, áá nyédii nyédúbpé, nyédii nyédáá-é nhóg ne aníní. Aláńgē-é sé áá nyédii nyékamtan sé ne nlem ní bwám, áá nyédii nyédáá sé anyín ngáne sémpē sédáá nyé anyín.

⁷ Né-óó, a-baányan, áfnté e échēd ndutul ne metake mésyáál, nlem níwúú sé á abum áyál echēn. Aden adúbe dáo áwédé sé nlem á abum.

⁸ Bɔɔb-pɔɔ, séēbē menyinje abé áde sédíí ámín, ngáne mekuu méwúú nyé áse áyale adúbe áde nyédúbpé Sǎńgwéé.

⁹ Bɔɔb séhele séságnén Dyób áyál echēn. Séságnan mó áyale menyinje níme sédíí áyál echēn áwe e'só.

¹⁰ Sèkánne' nkou ne múte, bwámbwam nén bán séhel apé áwēn ámpē, ábel bonj dényínen, séwónngen-ne nyé ábel adúbe áwúú nyé áte.

¹¹ Nhele méé ádesyánē Dyób, Titée ne awesyánē Sǎńgú Yesue bélúmed syánē nzii séhel apé áwēn ámpē.

¹² Nhele méé Sǎńgwéé ábel edənge éche nyéwónné nhóg ne aníní ne bad bémpēe ékwəg akwəg ne akwəg melemlem ngáne edənge éche séwónné nyé ékwəgéé akwəg ne akwəg.

¹³ Sèkánne' nén ábel bonj Sǎńgwéé áwéd nyé nlem á abum ábel nén nyéewóó' átón dé mbéb ké ahóg á yál, nyésán-é á'só ábe ádesyánē Dyób Titée, áde awesyánē Sǎńgú Yesue ápéé ne ábē bad.

4

Nyéwónj abé áde áwógte Dyób menyinje

¹ A-baányan séhóbe ámpē nén bán, nyén'yágé áwēd nyaa e abé eché nyétánjéné awónj, ábel bonj nyéwóged Dyób menyinje. Enén ndín e abé chós'-áá nyéwóó. Bɔɔb-pɔɔ, sécháá', sélánge-é nyé á dín á Sǎńgú Yesu nén bán, nyébē nyékeene' enén ndín e abé á'só.

² Nyébēn nyébíí mam níme sén'yágédte nyé, sé nēngáne bad ábe Sǎńgú Yesue ábágé kunze.

³ Dyób áhede áá nyébē nēngáne bad ábe bésáá. Nyéekábé mesón.

⁴ Nyé mod-té ábíí ngáne ákóbeé eche yál.* Nyébele nê nyaa eché etánjéné, ne nyaa eché nê débéé nyé edúbé áfnté e bad.

⁵ Yál echēn éebág yál éche éwóó' esíí bwámbwam áyál e mekan mé ekob é yál ngáne bad ábe bébíí Dyób béwóó'.

⁶ Áyale ádén dyam, modmod eébēnlē mwányanj epande átéd-te chóm éche édé échē. Sēnláá nyé nímén mekan ngen e'só sésím-me nyé etúú áte nén bán Dyób dékəgsen bad ábe bébele nē.

⁷ Dyób dēnkəmpwédte syánē áwónj abé á mbinde, bonj ampwéd syánē áwónj abé áde ásáá.

⁸ Kénzée awé eékobe ayáge áde séyágté mó, saké moonyonj móo ábáá á yál, bonj Dyób dáo ábáá á yál. Dyób dós'-é ábáge' nyé échē Edəsdəñj éche Esáá.

⁹ Nzom ké póg éesaá eché nítenléé nyé ngáne nyé mod téé átánjéné mwányan adəñ, áyale Dyób dēn ámáá nyé ayáged ngáne nyé mod téé átánjéné mwányan adəñ.

¹⁰ A mbále nē dēn-naa nyédáá áben baányanj bé Krísto bésyáál ábe bédé á mbwóg e Masedonia esyáál. Kénē, a-baányan, sécháá nyé nén bán nyédəñ bó tómaa nē pónde ésyáál.

¹¹ Sécháá nyé ámpē nén bán mod téé áwónj alonggé áde ápwítédé, modmod eénōnē chóm éche waáb ábeléé, mod téé ábele-é níme nsón. Nén dáo sēnláá' é nyé bán nyébele'.

¹² Ábel áde nyébēnlē nén, bad ábe béédúbpe, bébéé nyé edúbé, nyé mod téé ábónjgē-é eche yál.

Sǎńgwéé ápē táled

¹³ A-baányan, séhede bán nyébíí mbále tənjenne bad ábe béwédé, ábel bonj nyéélēbē nēngáne bad ábe béewóó e'yágé bé nlem.

¹⁴ Ngáne sédúbpe nén bán Yesue anwé, ápūū'-é, sébíí nén bán áde Yesue ápéé, Dyób débēl bad ábe hédúbpe ábe béwédé, bépuú, bébé ne Yesue.

¹⁵ Ayáge áde séyágtéé nyé bɔɔb ádíí ayáge áde Sǎńgwéé. Adé ayáge ádíí nén bán, syánē ábe déēbē á alongé epun éche Sǎńgwéé ápéé, déebaá á'só se bad ábe béwédé bébé ámbid.

¹⁶ Sǎńgwéé mwēn ábid ámín, esaád é ngíne éwógnéd, ehób éche ángel embáá éwógnéd, esaád é elonj é Dyób-pe éwógnéd. Ene pónde dyam dé'só, bad ábe béndúbē Krístəə, bépuú.

¹⁷ Ámbid enē syáá ábe dedé á alonggé ábe dedé á nkónsé, deélatén ne bó, déké ámín á mbag-té átán Sǎńgwéé á pemē-té. Né-áá débēē ne Sǎńgwéé á ngíndé ne á ngíndé.

* 4:4 Nyé mod-té ábíí ngáne ákóbeé eche yál; Donge á kálag áwóó Nyé mod té ábíí ngáne áchōnjéé mwáad.

18 Né-òó, nyébenled ádén ayáge áwéd nhóg ne aníní nlem á abum.

5

Nyébe mbojsén áyál e epe éche Sǎngwéé

1 Bǎob-pǎó a-baányan bé Krísto, nzom ké póg eésaa átele nyé aláa nyé pónde ne epun eché nímén mekan mébenlédté.

2 Ayále nyé bèn nyébí bwám nén bán epun éche Sǎngwéé ápagké, ápe táléd, melemlen nēngáne nchíb ápagké nkuu áde mod éesinéé mó.

3 Áde bad béhóbeé nén bán, “Nsanj níde, dyamdyam déesaá áde sébáa’é,” dǎo ebébtéd épií’é bó táléd. Ebē melemlen ngáne e’wē bé achád é’piideé mmwáad awē adé nkog. Modmod éébíd-táa échén ebébtéd áte.

4 Boj a-baányan, nyé pen nyéesaá bad bé mbéb ngáne bad ábe bédé á ehintén-té. Né-òó, epun éche Sǎngwéé ápagké étánē nyé táléd melemlen ngáne nchíb ápagké táléd.

5 Nyé baasyāal nyédíi bad bé e’nyínen bé ekíde, nyébe bad bé bín ábe é’kénlé. Syánē déesaá bad bé nkuu ké’ε bad bé ehintén.

6 Né-òó, deebág nēε bad ábe bédé nēngáne békúne’. Boj syánē détéd pónde déchǎa-’ε éche syánē yǎl.

7 Nkuu dǎo bad békunéé, bad ábe mím mó-’ε mékóbeé, nkuu dǎo bémwákē mím boj mékóbē bó.

8 Boj ngáne syánē dédíi bad bé bín ábe é’kénlé, syánē déchǎa éched yǎl. Adúbe ne edǎnge éche édé syánē áte bébē nēngáne mod ahédé mbóté eché bébénlé e’kii ákúten tǎl á pónde e nzum. E’lyág bé nlem-’ε ábe nyéwóó áyál e e’soosoj ábe nyékudté é’bē nēngáne mod awē ahédé ekóté éche bébénlé e’kii.

9 Dyób déntíi áá móssōj syánē mbwiined ne awesyánē Sǎngwéé, Yesu Krístǎa. Enkéntíi’ε áá nímē melíngá mépii syánē.

10 Yesuε anwé á nló níméd ábel boj ké nzé édé bán syánē dedé á alongé, ké’ε dewédé, dēbē ne mó.

11 Né-òó, nyéwéd nhóg ne aníní nlem á abum, nyéwéd-te nhóg ne aníní áte ngáne nyébéle’áá bǎod.

Elébe ne melēten mé asóg

12 A-baányan, séchǎa nyé ábe edúbé bwámbwam wēε bad ábe bēwōngan nyé. Bǎo bélyáge nyé, béyágtē-’ε nyé ngáne alongé ádén átǎngéné abé nēngáne bad bé Krísto.

13 Nyéchéá bó ne edúbé éche échábé ámín, nyédǎj-’ε bó áyále nsón nímē bébeleé. Nyébe nsanj ne nhóg ne aníní.

14 A-baányan, sélǎnge nyé nén bán, nyéléb bad ábe béebelé chǎmchǎm. Nyéwéd bad ábe bēwóó mbwóg áte, nlem á abum. Nyéwōngan bad ábe bēewúu áte, nyéwēsen-ne nhóg ne aníní.

15 Nyényín nén bán modmod ééítmēē mbéb áyál e mbéb. Boj pen nyéwane áte pónde ésyāal áwój nlem nǎbwám wēε nhóg ne aníní ne wēε bad bésyāal.

16 Nyébéag menyíngē pónde ésyāal.

17 Nyékánne’ pónde ésyāal.

18 Kéchéé éche ébenléde ne nyé, nyéságnan Dyób. Mmén mekan móó Dyób áhédeé áá nyébele’ abé áde nyédíi mod nhóg ne Yesu Krístǎa.

19 Nyééítmē Edǎádǎj éche Esáá áte áyále nsón nímē ébeleé.

20 Nyéebáá’ nkalanj á yǎl nímē Dyób áhóbé áá nyékal.

21 Boj pen nyékag mam mésyāal nímē béhóbeé. Nyéchénged mam nímē béhóbeé nímē méátǎngéné.

22 Nyéewóó’ dyan ábel ne mam nímē béhóbeé nímē mééatǎngene.

23 Dyób dēn, mó awé abage syánē nsanj ábel nyésǎj áyál e mam mésyāal. Nyébane edǎádǎj ne yǎl échén ésyāal bwám, éewóó’ atón dé mbéb ké ahóg á yǎl kǎjné á pónde eché awesyánē Sǎngú Yesu Krístǎa ápeé.

24 Dyób áde áchénlé nyé ábele’ ngáne áhóbé, ábēl-le áned.

25 A-baányan, nyékánnad sé.

26 Nyélentad sé ábesyánē baányan bésyāal, nyéhē bó tǎl.

27 Nlǎnge nyé á dín áde Sǎngwéé nén méé nyélǎj enén kǎlag wēε ábesyánē baányan bésyāal.

28 Nsimé nímē awesyánē Sǎngwéé, Yesu Krístǎa nímē ne nyé.

Kálag eché elónténé ébε eché Paalε áténlé Baá Tesalonika Ndibned ní kálag

Kálag eché elónténé ébε eché Paalε ántelélé bad bé mwembé míme nídé á Tesalonika, ehóbe tǎngene adúbe áde bad b́énwǒngé ńén bán epe éche Krístə́ə ápéé ámpé, émaá ape áte. Paale antelé bad bé Krísto enén kálag átií b́ó nsǒhten míme b́énwǒngé tǎngene nímén mekan. Mḿén mewémten míme baahóg á mwembé-te b́énwǒngé, m̀emb̀él b́ó donje á bad b́énkwán mekáá áte, b́enkéntéd-taá e'boj b́é nlém ábe donje á bad bé Krísto b́élúmté'áá néε dyam. Paale anlúmed b́ó áte ńén áá, Krístə́ə ád̀éhób áá ḿopag ámpé, ebébtéd ne mod-e-ebébtéd b́ó b́ésébé ape. Ane mod e ebébtéd ḿó átǎnggen Krístə́ə, alúmed-te káǒhne lúmtén áá ḿó mwén-éé ḿódé Dyób. Paale ansím b́ó etúu áte áá bédii b́éwéd ádab adúbe áte kénéε békudéé ndutul ne metake. Ansím-me b́ó etúu áte ámpé áá b́éékwáné mekáá áte boj b́ó mod téé ábele nsón ábel boj áhel eche yál atǒgen, melemlen ngáne ḿó Paale ne bad ábe b́ó b́ó b́ébele nsón.

Nkabtéd ní kálag

Ndibned ní kálag 1.1-2

Mekénag ne e'wéd b́é nlém á abum 1.3-12

Elébé tǎngene epe éche Krístə́ə 2.1-17

Elébé tǎngene abé á bad bé Krísto 3.1-15

Nsǒgten ní kálag 3.16-18

¹ Mε Paale, nchoo ne Sailase b́ó Timotiε, mε-éé ntenle' nyé enén kálag. Ntenle nyé bad ábe bédé á mwembé míme nídé á dyad á Tesalonika, nyé ábe nyédé bad ábe Dyób Titée awéd, nyébé-ε bad ábe Sǎngú Yesu Krístə́ə.

² Nsimé ne nsan míme Dyób Titée ne míme Sǎngú Yesu Krístə́ə mbé ne nyé.

Dyób dékád bad nyaa eché etǎngéné

³ A-baanyan sétǎngéné néε sésǎgnanné Dyób áyál ech́en pón dé téé. Etǎngéné bán sébel né áyale adúbe ádén ákwǒge, akwǒg ne akwǒg, edǎnge-ε éche nyéwǒnné nhóg ne aníníí ch́ó-ε ékwǒge'.

⁴ Né-óó, áfinté e mwembé ní Dyób, séb́en sékumne nyé ekáá á tál tǎngene awesen áde nyéwésiné ne adúbe áde nyéwóó, ataged áde b́étagtéé nyé ne metake mésyáál míme nyékudéé.

⁵ Mḿén mekan mésyáál melúmté' ńén bán nyaa eche Dyób ákáadté etǎngéné. Mḿén mésyáál ḿó-áá ḿékǎh boj Dyób átéd nyé néε bad ábe b́ékwǒgnédé áb́é áwé nkamlen. Mḿé nkamlen ḿó ríkás boj nyékudé metake.

⁶ Dyób ábele mekan nyaa eché etǎngéné. Bad ábe b́ébele' boj nyékudé' metake, Dyób dépiínéd b́ó metake.

⁷ Dyób débél nyékudté metake ámpé, áb́el-le sé-ε ámpé séekudté. Nén déb́enléd áde Sǎngú Yesuε áb́ltdé ádyób ne éche ángel é ngíne, muú míme níchodne-ε mélǎhned b́ó.

⁸ Akǒgsen bad ábe b́ebáá Dyób á yál b́ebán-ε áhíd nkalanj ní bwám míme níhóbe tǎngene awesyáné Sǎngú Yesuε.

⁹ Akǒgsen b́ó ne metake míme méb́e á ngíndé ne á ngíndé. B́ebáá wée Sǎngwée ádíí, béenyín-naá ngáne éche ehúmé épédé achab ámín.

¹⁰ Ade ápéé eché epun, bad bé Dyób b́ébe ḿó mekenag, bad ábe b́éédúbpe b́esyáál-le, b́enyǎg bwámwam. Nyémpé nyéébe áfinté e áb́en bad áyale nyéndúbé nkalanj míme sénlǎá' é nyé.

¹¹ Abé áde mímén mekan mésyáál médíí sé á nlém-té d́óó akás boj sékǎnnád nyé. Sékǎnne bán ádéd Dyób ábel nyékwogned ákud bwém é' bwám áb́é áhedeé nyé ábele apwéd áde ápwédé nyé áb́é áb́e bad. Sékǎnne-ε bán ábenled eche ngíne ábel boj mekan mé bwám mésyáál míme nyéhedeé, adúbe áde nyédúbpe Krístə́ə nyékud ḿó.

¹² Sékǎnne ńén ábel boj d́ín áde awesyáné Sǎngú Yesu Krístə́ə áwǒh edúbé áfinté ech́en, nyé-ε ámpé nyéékúd edúbé áyál ech́é. Nsimé míme ádéd Dyób ne míme Sǎngú Yesu Krístə́ə, ḿó méb́él boj ńén ábenled.

2

Mod-e-ebébtéd ápé

¹ Bóob-póó a-baanyan, sétenle nyé tǎngene epe éche awesyáné Sǎngwée, Yesu Krístə́ə ápéé ámpé ne aladen áde déladné áb́e ne ḿó. Ncháa nyé ńén mεé,

² nyéewámsán apuudted á mewémten, kéε nyéetédnád áte ahób áde bad b́éhóbeé bán epun éche Sǎngwée émaá ape. Kapóg bad b́ewémtan bán sénhób ádén akan áde séhóbé'áá

mam níme Edaðaðŋ élyágté'áá sé aá séhðb, ké'ε áde sékánlé'áá nyé nkalaj m' bwám ké'ε bán sêntelé nyé m'ó á kálag-tê. Boŋ sênkêmbenlé nê.

³ Nyéemwág-se mod ábenléd nzii ké pág ádog nyé. Ayále Epun éche Sánjwéé ápeé éepaa káŋne á pónké echê mpuutéd ní ngíne mépéé á nkòŋsé, mod awé m'ó-ε adé ebébtéd anyínnéd. Dyòb ámáá atíí aá ane mod ákê á ehyán é múú.

⁴ Atyèemēn kéchéé éche bad béchagéé bán dyòb ké'ε kéchéé éche bad bébagéé edúbé, ábānē-ε eche yāl ámín echáb. Asl, ádyēē-ε ásē káŋne á ndáb e Dyòb, áchagé-ε yāl aá m'ó m'ódé Dyòb.

⁵ Nyéēchatán nén bán áde m'ibédé ne nyé menláá nyé nímén mekan.

⁶ Nyébíí dyaam áde áchánjé ane mod boŋ eépédé ððð. Adé dyaam áchánjé m'ó ábel ápe á pónké echê etánjéné.

⁷ Mekan mé' ekonéd mé ebébtéd mémáá abooted dé abenled. Ane awé achánjé nímén mekan ábel boŋ méebenlád ððð, m'ó ábē acháá m'ó káŋne á pónké echê Dyòb débēnle boŋ áhíde.

⁸ Ene pónké-'áá mod a ebébtéd anyínnédte. Adii mod awé Sánjú Yesuε áwūū'é ne echê peme e nsal, abébé-d-tε m'ó apen áde yāl épenne m'ó áde ápeé.

⁹ Mod-e-ebébtéd ápē ne ngíne eche Satanε. Ábelé nsón mé edogké álúmed eche ngíne, ábelé' e'chemléd ne menyáké nyaa ne nyaa.

¹⁰ Ábenléd-tε medogké mé ebébtéd nyaa ne nyaa wéε bad ábe ádáb alongé débðð'ε. Adáb alongé débðð áyale bémbāŋ mbále akob, ábel boŋ békud e'soosoj.

¹¹ Né-ðð, Dyòb démbēl bēwōŋ mewēmten mé mewusé mé ngíne ábel boŋ bédúbe metóm.

¹² Nén débēl bad ábe bédúbpε mbále boŋ bétimé' bēwógé menyinge ábel mbéb, békúd nkòŋsen.

Dyòb ápwédé nyé ákud e'soosoj

¹³ A-baányan, nyé ábe Sánjú Yesuε ádáá, sètánjéné sésāgnān Dyòb pónké téé áyāl echēn. Sésāgnan m'ó áyale ápwédé nyé bad bé Tesalonika ábē bad bé'só ákud e'soosoj á ngíne e Edaðaðŋ éche Esáá ábel boŋ nyébē ábē bad ábe bésáá. Ámbēl-lε nyékúd e'soosoj adúbe áde nyédúbpε mbále.

¹⁴ Ápwédé nyé ákud e'soosoj mbwiined ne nkalaj m' bwám níme sékánlé nyé. Ábelé nén ábel boŋ nyémpē nyébē ásē e ehúmé éche awesyáné Sánjú Yesu Krístæ.

¹⁵ Né-ðð, a-baányan, mekuu méwúu nyé ásē nyéhíde-ε ayáge áde sékúidé, boŋ sémpē séyáged nyé. Séyágté'áá nyé akale áde sékánlé'áá nyé ne atele áde séténlé'áá nyé kálag.

¹⁶ Awesyáné Sánjwéé, Yesu Krístæ mwēn ne Dyòb Titéé awéd, m'ó awé adáá syānē abēnlédé nímē nsimé ábe syānē e'wéd bé nlém á abum ábe béemaá', ábē-ε syānē e'lyág bé nlém ályág nlém áyāl e mod mé bwám.

¹⁷ Awéd nyé nlém á abum awéd-tε nyé áte pónké ésyāāl ábel ne áhób mekan mé bwám.

3

Paale áá bad bé Krísto békānnad bō

¹ A-baányan, tāŋgene mekan mémpēe, nhóbe nén meé nyébē nyékānnad sé nén bán nkalaj m' bwám níme Sánjwéé m'íbē níkanlad áfínté e bad bémpeé níkaŋ á'só, bad békob-pe m'ó ne edúbé melemlen ngáne émbēē ne nyé.

² Nyékānne-ε ámpē nén bán Dyòb ásoŋ sé á mekáá mé bad ábe bēbébé nlém ne á mekáá mé e'bébtéd é' bad, áyale saké bad bésyāāl ábe bēwóge nkalaj m' bwám bédúbpε m'ó.

³ Boŋ Sánjwéé ábele' ngáne áhóbé áá m'óðbēl, áwéd nyé áte ákāā-ε nyé ábel boŋ Satanε éébēlé nyé ebébtéd.

⁴ Sésuomé nlém nén bán Sánjwéé ábēl nyébēl kéchéé éche sélánjé nyé bán nyébēl, nyéēbē nyébēlé-ε ch'ó.

⁵ Sánjú Yesu Krístæ mwēn ábel nyésōŋten ngáne Dyòb ápédé nyé adāŋ, nyéwεsen-ne melemlen ngáne ánwεsénne.

Paale áá mod atánjéné nsón ábel

⁶ A-baányan, sésime nyé etúu áte á dīn áde Sánjú Yesu Krístæ, nén bán nyéédólē bad bé Krísto á yāl ábe békwané mekáá áte bééhíde-ε ayáge áde séyágté nyé.

⁷ Nyé bēn nyébíí bán séē nyétánjéné ahāŋten. Sēnkēnkwané mekáá áte áde sébéde ne nyé.

⁸ Sēnkēndyáá chōm é mod éche séésábpéé, boŋ pen sébelé'áá nsón ne ntū ní ngíne, nkuu ne m'ute ábel boŋ séétágté nyé modmod.

⁹ Sébelé'áá nén saké nén bán sēnkēnwóngé kunze áláa nyé nén bán nyéwōŋgen sé. Boŋ sébelé'áá ábel boŋ kéchéé éche sébelé' ébē nēŋgáne eláŋsén éche nyémpē nyétánjéné ahíd.

¹⁰ Ade sébéde ne nyé, séyógké'áá nyé etúu asim áte nén bán, "Mod awé abáá nsón ábel, béebagé m'ó chōm éche ádyēē."

¹¹ Séhóbe nén áyāle sēwógé nén bán donje á bad bédé átíntè echên ábe békwané mekáá áte, béebeléé chómchóm, béhāg-ke nsal áyāl e mekan mé bad.

¹² Echén ndín é bad sésíme bó etúu áte, sélāngge-'e bó á dín áde Sāngú Yesu Krístā nén bán bébwog yāl, bébele mímab nsón ákud ndyééd e epun é bín.

¹³ A-baanyan, nyéekómé' ábel mbonj.

¹⁴ Nzé mod abáá chóm éche sétélé á kálag-tè wén ahíd, nyébane mó míd á yāl. Nyéewóó' dyam ábel ne mó ábel bonj ákwāg.

¹⁵ Kénê, nyéetédé mó nēē mod a ekoyí. Bonj pen nēngáne awen mwānyan a Krísto, nyéláa mó bán átéd póndé.

Melentēn mé asóg

¹⁶ Sāngú Yesuē mwēn, mó awē abage syānē nsan, ábe nyé nsan póndé ésyāāl ne á menzii mésyāāl. Sēkānne-'e bán mwēn ábê ne nyé moosyāāl.

¹⁷ Mē Paale, mmēn-éé ntelé mímén melentēn ne échēm ekáá. Nén dóo adé nēngáne e'chem áyāl e échēm kálag ésyāāl. Nē dóo ríteleé kálag.

¹⁸ Nsimé míme awesyānē Sāngwéé, Yesu Krístā, míbê ne nyé moosyāāl.

Kálag e'só echë Paale áténlé Timotië Ndibned ní kálag

Timotië abédé kódemod echë endúbé Krístæ. Ambíd á Esia Maino. Nyaá abédéé mmwaád á Israel, sáá-'e mod á Griikia. Ahõñné'áá Paale ábelé-'e nsón ní Dyõb ne mó. Kálag e'só echë Paale áténlé Timotië ekoo' metón meláán ahób.

Dyam dé'só, ene kálag esime bad etúu áte átéd pónde ne ayáge dé metóm áde abédé á mwembé-te. Adén ayáge dênladtén mekan níme bad bé Israel behídé'áá ne níme bad ábe beesé bad bé Israel behídé'áá. Adé ayáge abédé nén bán nkõñsé níme bad bédíí áte ríd ebébtéd, bán nzé mod ákúð-te e'soosõj atáñgéné abíí mekan mé e'koñné ábelé-'e mekan nêñgáne ákii donje á ndyééd ne ádyee ésebán mod awóo' mmwaád ké'e mmwaád awóo' nchóm. Enén kálag ehóbe ámpé ngáne bad betáñgéné mwembé alyáged, ngáne betáñgéné Dyõb edúbé abe, ne nyaa e abé echë bad ábe belyágte mwembé ne ábe béwõñgan á mwembé-te betáñgéné awónj. Asóged, Paale alébe Timotië ngáne atáñgéné mbaledé awe Yesu Krístæ á bwám abé ne nsón níme atáñgéné abel áfinté e bad ábe bédúbpé Krístæ.

Nkabtéd ní kálag

Ndibned ní kálag 1.1-2

Elébé tãñgene mwembé ne bad ábe belyágte mó 1.3-3.16

Timotië akudé elébé tãñgene níme nsón 4.1-6.21

Paale alómmé Timotië melentén

¹ Mæ Paale, mæ-éé ntelé enén kálag. Ndií mbapere a nlómag awé Yesu Krístæ. Nduke echë nkúdé ábel nímé nsón ehúu ne Dyõb, mó awé asoó syáné áyál e mbéb, ehúú-'e ne Yesu Krístæ, mó awé adé syáné e'lyág bé nlém.

² A-Timoti, wæ-éé rítenléé enén kálag. Edíí nêñgáne awem mwán mwën, adúbe áde édúbpé Krístæ. Nsimé, ngól ne nsaj níme nhúú ne Dyõb Titée awêd ne Yesu Krístæ, Sãñgwéé awêd mbê ne wæ.

Paale alébe Timotië tãñgene

bemeléede bé metóm

³ Ade nkágé'áá á mbwóg e Masdonia menláá wæ mæé élyág hê á dyad dé Efesus ábel bonj weémwág wéé donje á bad belyágte' ayáge áde déetãñgene.

⁴ Weémwág-ke-se ábê bad bebébté pónde ákal póle éche éesé mbále ne póle éche ehóbe tãñgene ábáb betaa ábe mod éehelée-se atónj. Nzé belyágte echë ndín é póle éperene mpenten, éewõñgänné bad awónj alongé áde álúmte bán bédúbpé Dyõb.

⁵ Nzom echë enkãñ bonj nláá wæ mæé éyágte bad ayáge áde atáñgéné edíí ábel bonj bad bédãñ nhóg ne aníní. Etãñgéné edãñge awónj éche ébídé' á nlém níme nísáá, nlém níme mbíí dyam áde atáñgéné ne áde déetãñgene, mbíí-'e adúbe áde áde mbále.

⁶ Donje á bad behídéé nímén mekan, nê ábelé bepáné nzii ahób áde behóbeé e'kúkú é' mekan.

⁷ Abé bad béwóó nlém áte ábê bemeléede ábe belyágte mbéndé é Dyõb bonj beesõñtencé mekan níme belãñgeé bad, beesõñtencé-'e mekan níme behóbeé bán békóó abíí.

⁸ Debíí nén bán mbéndé eboó nzé bad bebénlad chõ ngáne ehednad té.

⁹ Debíí' e nén bán Dyõb déebeleé mbéndé áyále bad ábe bébele' ngáne áhedeé. Bonj Dyõb ábélé mbéndé áyále bad ábe béehídé mbéndé ne bad ábe bébele' ngáne áhedeé. Abelé mbéndé áyále bad ábe béewóó Edæðãñ é Dyõb áte, ne bad ábe bébele mbéb. Béhélé mbéndé áyále bad ábe béewóó mbwóg ní Dyõb áte, ne ábe behóbe Dyõb mekan mé mbéb áyál. Dyõb ábélé mbéndé áyále bad ábe béwúe' ábab besáá ne benyaá, ne bad ábe béwúe' bad bémpée.

¹⁰ Bébéle mbéndé áyále bad ábe békábe mesón, baachóm ábe benãñnad baachóm bémpée, bad ábe békóbe bad bonj besóm bõ néé betãñ, bad ábe békale metóm, bad ábe bémwág melé mé metóm á pónde e nkáásé ne bad ábe bébele' kéchéé éche éesé nchoo ne ngáne ayáge á bwám áhóbeé.

¹¹ Adé ayáge áde nchoo ne nkalanj ní bwám níme Dyõb ábágé mæ ákale bad. Mmè nkalanj ní bwám nhúú ne Dyõb dé ehúmé áde bad békencé.

Nságnan áyále ngól e Dyõb

¹² Nságnan Yesu Krístæ, Sãñgwéé awêd, mó abage mæ ngíne ábel nímém nsón. Nságnan mó áyále anyín áde anyíné aá mēbēl mó nyaa eche etãñgéné, ápwēd-te mæ ábele mó.

¹³ Ambel nê, kénéé edíi bán ngen e'só nhóbe'áa mós mam mé mbébé áyál, rítágté bad ábe bédúbpé mós, nîbenlád-te e'yale bé mbébé áyál eché. Bon Yesu Krístæ anwóg me ngól áyále menkémppáa adúbe awón, menkémmbíi-'áa chóm éche nîbeléé.

¹⁴ Sánwéé ambé me nímē nsimé nîme méesé ahágtēn, ábēl ndúbé Krístæ, ábēl-'e áa rílúmed bad bémpēe edáŋge áyále dedé nhóg ne Yesu Krístæ.

¹⁵ Yesu Krístæ ampé a nkóŋsé áson bebel bé mbébé. Mmēn-ne mbédé mod awé atómtánnáa mbébé abel tómaa moosyáál. Enén póle edé mbále detáŋgéné-'e chós akonj dé adúbe.

¹⁶ Bon Dyób dénwóg me ngól áyále ahedé'áa áa Yesu Krístæ alúmed áa nímē nwesen méewóó'é asóg áyál e me awé ntómtánnáa mbébé abel tómaa moosyáál. Nén dembenléd nēngáne elánsēn wéé bad ábe bédúbē, békūd-te alonggé áde déemaá'.

¹⁷ Ehúmé ne edúbé bēbē ne Dyób á ngíndé ne á ngíndé. Mós adé káŋ eché edé á ngíndé ne á ngíndé. Mós-'áa adé ane awé bad béenyinnēē díd awé eewág-ke. Mwēmpēn-'e áde Dyób. Ebé nē.

¹⁸ A awem mwān Timoti, mekan nîme rílangéé we meé ébel, médiu mekan nîme Dyób dénláá'é bad áa bēhób bán mēbenléd áyál echón. Abé e'yale é'wéd we áte. Abenled áde ébenladte ayáge á mbále é'bel we ébē nēngáne mod awé awane nzum bwām.

¹⁹ Enyin-ne nēn wéé móchāŋnēdē ne adúbe áde edúbpé Krístæ, ébele-'e mekan bwām ngáne nlēm rílangé we. Donje á bad béebeléé ngáne nímab nlēm nlangé bós. Nén ákásá béchénné ádab adúbe béebíi' é wéé békagké.

²⁰ Atínté e bad ábe nhóbeé nē, nhóg adé bán Himenosē, aníníi-'e bán Alésandaa. Abén bad nēdēté bós á mekáa nîme Satanē ábel bonj bēbii nēn bán éeboó'é áhób Dyób mekan mé mbébé á yál.

2

Elébé tãŋgene ábe Dyób edúbé

¹ Dyam dé'só, nwéde we aláa nēn meé nyékánnad moosyáál. Nyékánnad bad bémpēe. Nyékánnē nēn bán Dyób álóme nyé bwēm ábe nyétógnēn, nyéságnan-ne mós áyále mbonj nîme ábenléé nyé ne bad bésyáál.

² Nyékánnad káŋ é bad ne bad bésyáál ábe bédé á nkamlēn. Nén débēl alonggé áde syánē débē nsaj ésebán mehób médé, débéléé ngáne Dyób áhedeé, débáge-'e mós edúbé á menzii mésyáál.

³ Akánned bad ábóó. Nén áwógte Dyób áde ásóó syánē menyinge.

⁴ Dyób áhede áa moosyáál ákud e'soosoj bésóŋten-ne mbále eché Eyale é Dyób ékaléé.

⁵ Ebyééné nēn bán Dyób ahóg dēmpēn dós adé. Mod nhóg mwēmpēn-naa adé awé apēene Dyób ne baányonj á nchemtēn. Ane mod adii Yesu Krístæ.

⁶ Ambé áde alonggé áwé á nló mí moosyáál. Ene kwééd eché awédé a nló mí moosyáál enlúmed á pónde eché etáŋgéné nēn bán Dyób áhede áa moosyáál ákud e'soosoj.

⁷ Ayále nēn dós ákásá bonj Krístæ álómē me nēe mbapēe a nlómag áke dé akal nímē nkalanj tãŋgene adúbe á Krísto ne mbále, wéé bad ábe béesé bad bé Israēl. Dyam áde ríhóbeé áde mbále. Meékálēē metóm.

⁸ Né-ós hóm ké áhéé adé bad bé Krísto bēladnéé, nhede nēn meé baachóm ábe bēbáge échab yál ábele Dyób bényene mekáa ámín bēbage mekáne. Abé bad béétãŋgeneé melinjá ahé á nlēm káa béétãŋgeneé bad abé ábe bésēnle'.

⁹ Nhede-'e ámpé nēn mé bebaád bēhág mesanj nímé bad bényinnē nēn bán métáŋgéné. Mmāb mesanj métáŋgéné bós yál akúten bwām ésebán métēde baachóm nlēm á abum. Béenabpé esid é nló nyaa eché etómé áte, bēehág bwēm é' gól, bēewāā' nsaj nîme bēbénlé bán bé meláá mé etógnēn, bēehág-ke mbóté éche étómténē nkun abé.

¹⁰ Bon pen nímāb mbéltéd mí bwām rílúmed nēn bán bēdii bebaád ábe bēbenle Dyób.

¹¹ Mmwaád atáŋgéné ádyēē piib, ásúdēd yál bonj áwóglān ngáne baachóm bēyágtēé.

¹² Meehóbeé nēn meé mmwaád awóó kunze áyáged káa ákamlēn baachóm. Mmwaád atáŋgéné ádyēē piib.

¹³ Nhóbe nēn áyále Dyób dénsēbē Adame ahag bonj áhagé' Ife.

¹⁴ Ebyééné-'e nēn bán mmwaád mós Satanē ándogké bonj abóó mbéndé, saké Adame. Né-ós mmwaád mós ambóó mbéndé.

¹⁵ Bonj Dyób désóŋ alonggé dé mmwaád á pónde e achád nzé adii asumé nlēm wéé Krístæ alúmté-'e edáŋge ne bad bémpēe, eewóó-'e atón dé mbébé ké ahóg áyál.

3

¹ Nzé mod ahede aá móbê nlyáged a mwembé, né apwédé kase e nsón. Enén póle edé mbále.

² Βῶβ-ῶῶ, mod awe alyágte mwembé, atánǵéné abé mod awé bad béēhōbēē mekan mé mbéb á yál, atánǵéné-ε dásō mmwaád nhóg awón.* Abé mod awé akóbe yál, abé mod awé adole dyam áte bwám, abé mod awé adélté yál áte, abé mod awé akobe beken, abé-ε mod awé abíe bad ayáged.

³ Eebág mod awé abagé yál á amwé á mím, káa mod awé apεene epuutéd. Bonj ábê mod awé apwítédé, ábē-ε mod awé eésenlé'. Eebág mod awé atómtné mōné adān.

⁴ Atánǵéné abé mod awé achánǵé eche ndáb bwám, ábōŋgē-ε ábe bán nyaa eché béwōgnéé mós bébagé-ε mós edúbé á menzii mésyāal.

⁵ Nhóbe nê áyāle nzé mod eéhele eche ndáb akamlen, chán-nō áhenlé mwembé rí Dyōb akamlen?

⁶ Eetánǵénéε se abé mod awé adúbpe Krístæ ekóólé ekóólé. Esehé nê, né abē kúmbe, chós ébēl ákwe, ákūd-te nkógsen melemlem ngáne Satane ánkweé bonj ákūd-te nkógsen.

⁷ Abád ámpε, ane mod atánǵéné abé mod awé kóŋne bad ábe béese á mwembé bébagéé edúbé. Nén débēl éekudté akwágké éehūn-naá melám níme Satane áhíínédé mós.

⁸ Bad ábe béwōŋgan ábel nsón á mwembé, ébē melemlem nées bó. Bétánǵéné abé á bwám awón, bébē-ε bad ábe béhōbe dyam ne nlém nhóg. Béetánǵénéε bad ábe ábē bébagé yál á ámwé á mím, káa bad ábe bédé metog áyāle mōné.

⁹ Bétánǵéné béhíd mbále eché Dyōb ábeléé bonj bad bébíi tǵengene mewémten níme áhedéé aá béwōŋ ne abé áde áhedéé aá béwōŋ. Bétánǵéné bébel nê ne nlém níme mbíi chóm éche étánǵéné.

¹⁰ Belyáged bédēhōb bán bépwece bad ábe béwōŋgan á mwembé-te, bétánǵénéε bad ábe béhedéé apwed asebe dé asimen. Nzé bényíne nén bán mod awé bésímné eewóó-é awusé ké ahóg á yál nê ane mod akwōgnédé ábel nímé nsón.

¹¹ Kóŋne ábāb bebaád bétánǵéné abé á bwám awón. Béebāg bebaád ábe béhōbe bad ámbíd, bébē bebaád ábe békóbe yál, bébē-ε bebaád ábe bad béhele-se bésūm nlém á yál ne kéchéé éche bébeléé.

¹² Mod awé awōŋgan ábel nsón á mwembé atánǵéné dásō mmwaád nhóg awón. Atánǵéné abé mod awé abōŋge ábe bán ne bad bémpee ábe bédé áwe ndáb bwám.

¹³ Nhóbe nê áyāle nzé bad ábe béwōŋgan ábel nsón á mwembé bébele nsón bwám, bad bébe bó edúbé. Nén débēl béwōŋ nlém áhōb tǵengene adúbe áde béwóó ne Yesu Krístæ.

Dyam dé e'koŋnéé áde déntím abyēn

¹⁴ Á Timoti, kénée édíi bán nwóó nlém ápe áwōŋ mwāmpín pónédé, ndíi ntenle we enén kálag.

¹⁵ Ntenle we nímén mekan níme étánǵéné abel ábel nén ké meelyoge ape, ehéle ebíi nyaa e abé eché bad bé Dyōb bétánǵéné awále. Bad bé Dyōb bóó bédé mwembé rí Dyōb, Dyōb áde-ε á alongé. Mmē mwembé móó rídé nēngáne akon ne nsáaned níme ríchǵnéé mbále Eyale é Dyōb bwám. Ahed dós-á ane mbále ébwōgnédé. ¹⁶ Dyōb ábélé syāá debíi nén bán nímé nkalanj ndé etógnén bwāmbwam. Ndé nén bán:

Krístæ ampé, abé-ε moonyon,
Edáádān éche Esáá énlúméd sé nén bán adíi Mwān a Dyōb,
ángel-le énnýín mós.

Bénkaleé bad bé nkóŋsé bésyāal, béndúbe-ε mós.

Dyōb dēmpuúé mós ákē-ε ádyōb ne ehúmé ésyāal.

4

Paale alébé Timotiε tǵengene bemeléede bé metóm

¹ Edáádān éche Esáá énhōb bwám nén aá, nímén mesú donje á bad bétédé adúbe á mbále ádāb, bédúbpε bad ábe béyágte ayáge dé metóm. Adén ayáge dóó e'dáádān bé mbéb é'hedéé aá bédúbe.

² Abén bad bébele' byánán békale mbále bonj metóm móó békaleé. Nzé béyágte chóm éche étánǵene bélúmte nén bán bébíi' é nhǵlén áfinté chóm éche étánǵéné ne éche étánǵene.

³ Abén bemeléede bé metóm, béyágte bad bán béwōŋné, bán bad béedyāg-ke donje dé medyé. Dyōb dénhǵ nímé medyé ábel nén bad bédyāg mós. Bad ábe bébíi nkalanj rí bwám, bédúbpε mós, béságnanne Dyōb áyāle nímé medyé.

⁴ Abé bemeléede béetánǵénéε, áyāle kéchéé éche Dyōb áhágé ébóó. Nzom ké póg eésaa ábán donje dé medyé. Né-óó, déságnen Dyōb akud áde dékudeé ábén bwém.

* 3:2 Atánǵéné-ε dásō mmwaád nhóg awón káa atánǵénéε dásō mwáád awón ngen póg ne ngen ésyāal káa mod atánǵénéε dásō mwáád mwémpen anapmed.

⁵ Mod eekl̄ē ndyēéd, áyale Eyale é Dyöb ne mekáne bēbele ch́ó ēbonj adýe.

*Paale alánggé Timotiē
ngáne átángéné mbáledē
a bwám awe Kr̄istāā abē*

⁶ Nzé eyágte bad ábe bédúbpé Yesue nímén mekan né wēbē mbaledē a bwám awe Yesu Kr̄istāā. Wēwēdnēd-te áte á edāádānj-tē áyāl e nkalanj níme édúbpé ne áyale ayáge dé eyale é Dyöb áde ehúdeé ámbíd.

⁷ Weewóo dyam dé abelen ne póle éche élúmte bán bad bēédúbpéé Dyöb, ne e'yókél é' póle. Bonj pen eyágke' pónde té ábel ngáne Dyöb áhedéé aá ébel.

⁸ Edé etógnén mod áyáged yál e nkōjsé, áwéd ch́ó áte. Bonj étómténé etógnén abé nzé mod awédé yál áte ábel ngáne Dyöb áhedéé áyāl e ch́óm ésyāāl. Débel ngáne Dyöb áhedéé áyale, Dyöb áhóbe aá mósōbē syané alongé áde déemaá', bōob ne á pónde eché ehúe'.

⁹ Adén dyam áde r̄hóbe nén adé mbále. Nyétángéné d́ó adúbe.

¹⁰ Nē-ōō, nén d́ó ákásá bonj dēnyóde, déwanté-'e yál áte áyale delyágé nlém ne Dyöb áde áde á alongé. Ḿó abage baasyāāl e'soosoj, bwámbwam bad ábe bédúbpé ḿó.

¹¹ Nyín nén wēé mólāngē bad ábe bédúbpé nímén mekan, wēé ḿyágte-'e b́ó ḿó.

¹² Weémwāg-se modmod anyín wē nkóntéd áyale edíí kódemod. Bonj pen lúmed bad ábe bédúbpé abé a bwám ábel bonj b́ompé bēbel melelem. Nyaa eché éhóbeé dyam, abé áde éwóo, nyaa eché édásá bad, nyaa éche édúbpé Dyöb ne abel áde wēebeléé mekan mé mbinde ábē néé elānsén wēé bad ábe bédúbpé.

¹³ Enyín nén wēé mólāā' Eyale é Dyöb nzé bad bēlādne á mwembé-te. Elāngē b́ó ch́óm éche eché Eyale é Dyöb éhóbeé, eyágte-'e b́ó káānj né mpedé.

¹⁴ Weetédte nsón níme Dyöb ábáge wē nēé nde, áláa bad mekan níme Dyöb dénhōbpé aá éláa b́ó á pónde eche belyáged b́é mwembé bēmbānnē wē mekáá á nló.

¹⁵ Belé nímén mekan ne nlém nhóg ábel bonj baasyāāl bényín nén bán ebele ḿó bwám, ekeene-'e ḿó á'só.

¹⁶ Etónj yál acháa bwám ne kéchéé éche eyágteé bad. Keene' nē á'só, ábel bonj Dyöb ásonj wē alongé, ásoj-'e alongé á bad ábe eyágteé.

5

*Paale alánggé Timotiē ngáne átángéné
donje á bad ach́āá á mwembé-te*

¹ Weekánne mod a mbáá áte. Ch́ás ḿó melelem ngáne ehele-se echás sóo mwēn. Ch́ás bad ábe béepede wē kóde néé baányonj b́é baachóm.

² Ch́ás bebaád bēmbáá nēngáne ehelēé-se echás nyoó mwēn. Echáā-'e ngōndere néé baányonj b́é bebaád. Weewōnjné b́ó mekan mé mesón á mewēmtēn.

³ Bekúd ábe béewóo bad ábe bēnōne b́ó éwōngan b́ó.

⁴ Bonj nzé nkúd achyáá bán káa bán ábe ábē bán, bétángéné ḿó atōgen. Nén adé dyam dé'só áde bad ábe bēbele ngáne Dyöb áhedéé bétángéné abel. Abāb benyaá ne besáá bēntāgén b́ó, b́ompé bétángéné b́ó atōgen. Nén áwōgte Dyöb menyinge.

⁵ Nkúd awé adé mwēmpen bonj eewóo mod awé awōngan ḿó, wēé Dyöb dēmpen d́ó ályágéé nlém. Abé ákānne', áhedne-'e ḿó nwōngan nkuu ne m̄ute.

⁶ Bonj nkúd awé asólté yál á mekan mé nkōjsé, awédé á edāádānj, kénéé adíí á alongé.

⁷ Láa bad b́é mwembé nímén mekan ábel bonj mod eehóbe b́ó mekan mé mbéá á yál.

⁸ Nzé mod a Kr̄isto eétoḡné bad b́é túmbé ábē, bwámbwam áde abum a ndáb, né álúmte nén aá mósódubpéé Kr̄istāā. Ene ndín e mod nímé mbēltéd r̄lúmte nén bán adíí mod awé abelé mbéé tómaa mod awé eedúpe Kr̄istāā.

⁹ Nkúd awé ehēle-se etónj wēé átángéné nwōngan akud, adíí nkúd awé atómé móom mé mwē ntóob. Atángéné abé-'e nkúd awé a nwónj nchóm nhóg mwēmpen.

¹⁰ Ane nkúd atángéné abé mmwaád awé bad bényíné bán níme mbēltéd r̄mbóó. Atángéné abé mmwaád awé apeéné bán ámín bwám, abé mmwaád awé akobe beken awe ndáb bwám, abé mmwaád awé asudte yál, ábenlé bad b́é Dyöb nyaa eché áwóbpé'áá b́ó mekuu. Atángéné mmwaád abé awé awōngéné bad ábe bēmbé á ndutul-tē, ábē-'e eche yál ábel mekan mé bwám.

¹¹ Bonj weetóó bekúd ábe bédé etum nēngáne bekúd ábe békud nwōngen. Weetóó b́ó áyale nzé bēwóó esíí áwónj bechóm ámpé bēebeléé Kr̄istāā ngáne ehēdnadte.

¹² Nzé bēwóó-'e bechóm bēmpēe né békwógnédé ákud nkōgsen, áyale bēelóntéé akag áde bēnhēē nén bán bēbelé Kr̄istāā.

¹³ Saá-kaá nē dēmpen, bēwóó abé áde bēebeléé ch́óm, bēhyóme ndáb ne ndáb. Amín enē bēhóbe bad ámbíd, bēhāg nsāl áyāl e mekan mé bad, bēhóbe-'e mekan níme bēnkētángēnné ahób.

¹⁴ Né-ɔɔ, ndáa meé e'tum bé bekúd béwōŋ bechóm, béchyáa bǎn, bébōŋge-'e écháb ndáb. Nén débēl béebeléé mekan nímé bad ábe békóó syánē béhǎbē syánē mekan mé mbéb á yǎl.

¹⁵ Nhǎbe nén áyāle ábén bekúd donge bébóótédé mekan abel níme Satané áhedeé aá bébel.

¹⁶ Mmwaád ké ahéé awē adúbpé Krístaa awē awóó bekúd áwē abum á ndáb, atǎŋgéné bǎ atǎŋgen, saké nén bǎn ápémten mwembé nímé nted. Nén débē mwembé etál ábóó bekúd ábe béwóó bad ábe bédōŋge bǎ.

¹⁷ Mwembé níbe bad bémbáá ábe býlyágte bǎ bwám edúbé ne nsábe, bwámbwam ábe býlyáged ábe bébele nsón mé akal ne áyáged Eyale é Dyōb.

¹⁸ Edé né áyāle éténlédé á kálag e Dyōb nén bǎn, "Weetádé nyag nsal eche esálte ngun." Eténlédé ámpē nén bǎn, "Bébel bé nsón bétǎŋgéné nímab nsábe akúd."

¹⁹ Weedúbpé mekan níme bad béhóbēé býlyáged bé mwembé áyāl, éetóméé né mbōŋ ébe káa éláán étyéémé nén bǎn nē ádé mbále.

²⁰ Nzé mod ámbáá a mwembé abelé mbéb, káné mó áte á'sō é' mwembé ábel boŋ bad bémbáá bémpēe bébǎn mbéb abel.

²¹ Nlǎŋge wé á'sō é Dyōb ne Yesu Krístaa ne á'sō é ángel éche épwédndéé meé ébel chǎm eche étǎŋgéné abel, ésebán ekwognad modmod. Weéftímē-'e modmod ambid.

²² Weewámsán mod mekáá abán á yǎl áwáged mó mod a mbáá a mwembé. Nzé ebélé né boŋ ane mod atímé mbéb abel, ne wǎmpē ebélé mbéb. Mmōŋ weébelé mekan mé mbinde.

²³ Weemwág mendíb mwǎmpēn ámpē. Mwág mwǎ ním abel nén abum áde ákwaglan wé áte póndé ésyāal ámaa.

²⁴ Donge á bad bébele mbéb á nhéné níme moosyáal ábíí, békáād-te bǎ. Abíníí-'e bébele mbéb á mesǎm-té níme bad béébíí' é kǎŋ né béhédé áte.

²⁵ Melemlem nē dǎo donge á bad bébeléé mbōŋ níme mbyééné ne moosyáal. Bémpēe-'e bébele mbōŋ a mesǎm-té níme bad béébíí' é kǎŋ né béhédé áte.

6

¹ Bad ábe bédé betǎŋ býsyāal bétǎŋgéné bébage bad ábe bédíí ásē echáb edúbé ábel boŋ modmod eehóbé Dyōb mekan mé mbéb áyāl, eehóbé-'e ayáge ádéd mam mé mbéb áyāl.

² Betǎŋ ábe bédé ásē e bad ábe bédúbpé Krístaa béewémtn bǎn ngáne ábab besáá bédíí bad ábe bédúbpé, béetǎŋgenéé bǎ edúbé abe. Bétǎŋgéné bǎ abele tómaa ngáne béhélé'áá-se bébelé bad ábe béedúbpé Krístaa. Bétǎŋgéné abel nē áyāle ábab besáá ábe bébenléé bédíí bad ábe bédúbpé Krístaa bébé-'e bad ábe ábǎb bembaledé bédáá-'e.

Paale ahǎbe tǎŋgene ayáge dé metóm ne nhǎn níme ntǎŋgéné

Eyágte bad nímén mekan éwéd-te bǎ nlém á abum áhíd mó.

³ Donge á bad bédé ábe býyágte' ayáge áde déetǎŋgene. Adab ayáge déesáá melemlem ne ayáge áde awed Sǎngú Yesu Krístaa áde ayágte bad ábel ngáne Dyōb áhedeé.

⁴ Abé bad belóné ne kúmbe, béébíí-'aá dyamdyam. Nyaa eché abé bad bédáá mpentēn mé e'yale ne nselag edíí bǎ nēe nkole. Nén ápene kónjí áftinté echáb, ápeneé mehób áftinté echáb, bad béhǎbē-'e baáb mehób mé mbéb áyāl, béwōŋnē nhǎg ne aníníí mewémten mé mbéb.

⁵ Nén ábele-'e bépentan póndé té nyaa eché béeheléé-se bébíí chǎm éche étǎŋgéné. Béeheléé-se bésóŋtēn chǎm éche edé mbále ne éche éesé mbále. Béwémtn bǎn nzé bébenle Dyōb, né bébē nhǎn.

⁶ Boŋ mod ábē menyíŋge bwámbwam nzé abele' ngáne Dyōb áhedeé nzé atéde-'e aá kéchéé éche mówóó ékwógnédé mó.

⁷ Depedé á nkǎŋsé, deépeneé chǎmchǎm, nzé dewédé-'e, déeswéénné chǎmchǎm.

⁸ Né-ɔɔ, nzé dewóó ndyéed eche dédyáŋkē ne chǎm éche déhǎgkē á yǎl, né nē ákwógnédé syánē.

⁹ Boŋ bad ábe béhede nhǎn asud, bébelé béhún á mekǎŋsen-té, bébé ngáne bad ábe békwdéé melám. Bébelé béhédé mekan abel híin níme mééboo ne mekan híin níme mééboŋne bǎ. Nén ábele bétage bwámbwam.

¹⁰ Mod ké ahéé awē awóó nlém áte bwámbwam ábud mǎné awóŋ, abelé abelé' e'bébtéd é' mekan ákud nímé mǎné. Nē ábélé donge á bad bétédte ádúbe Krístaa, békúdé-'e ndutul híin á nlém té.

Paale abagé Timotié elébé

¹¹ Boŋ wé, á-Timoti, mod a Dyōb, bǎn abé e'bébtéd é' mekan. Nané mekan ámbid níme métǎŋgéné á'sō é' Dyōb, édaŋ bad, éwesan póndé ésyāal, épwiited-te.

¹² Wéd yǎl áte ébē ésum nlém wéé Dyōb ébenle-'e mó. Alonǎgé áde déemaá' áde Dyōb ábágé wé, wéd dǎ achǎŋned. Dyōb démbē wé áde alonǎgé áde wénhǎbpé á'sō é' bad híin wéé módtúbpé Krístaa.

¹³ A'sō é' Dyōb, mós awē abage bwēm ésyāāl alongé, ne á'sō ábe Yesu Krístāa, mós awē ankal mbále á'sō wée Pontus Payledē, nláŋge wē nēn mēé,

¹⁴ ébēle chōm ésyāāl ngáne Dyōb áhóbé aá ébēl, kááŋne pónndé eche awēd Sánŋwéé, Yesu Krístāa ápēé.

¹⁵ Apē á epun éche Dyōb Titée átíídé aá ápe, Dyōb ane awē ábē bad bēbagēé mekenag. Mwēmpēn-naá adé Nkamlenē a mbáá a nkōŋsé rísyāāl. Mós adé Kāŋ e kāŋ ésyāāl abé-é-é Sánŋwéé a besánŋwéé bésyāāl.

¹⁶ Mwēmpēn-éé awóó ngíne ábē á alongé á ngíndé ne á ngíndé, adé-é á e'nyínēn bē ekíde ábe é'pene bwámbwam nyaa eché modmod éhēléé-se ápē bēnben. Mós adé ane awē modmod ényínēē mbéd, modmod eéhēléé-é-se anyín mós. Edúbé ébē ne mós, ábē-é á nkamlēn á ngíndé ne á ngíndé. Ebē nē.

¹⁷ Síŋ bad ábe bédé nhōn etúu áte nēn wēé bēekumé ekáá á tál, béesumé-é nlém áyāl e nímāb nhōn, bwēm ábe é'maa', boŋ bésūm nímāb nlém wēé Dyōb. Mós adé ane awē abage syāné chōm é'syāāl éche détógnéné ábēl boŋ débē menyínŋe.

¹⁸ Láá bós wēé bēbēle mboŋ áwōŋgen bad, ngáne bad ábe bēbúdé mōné awōŋ bēbágkē nhōn, mekan mé bwām níme bēbēléé nībē nímāb nhōn, bēwōŋ-é nlém áwōŋgen bad ne kéchéé éche Dyōb ábágé bós.

¹⁹ Nzé bad bēbēle nēn ébē nēŋgáne békōŋgé nímāb nhōn ádyōb. Nēn débē nēŋgáne nsáaned níme rísúmnédé bwām ábēl boŋ rísógtēn mekan níme méhúé' á'sō ábēl békud alongé dēn áde ákōŋté alongé abé.

²⁰ A-Timoti, nsón níme Dyōb ábágé wē tōŋ mós acháa. Weewóó pónndé ne mehób níme bad bēhóbēé níme mééwōŋgān ábe Dyōb edúbé, ne mehób níme donŋe á bad bēhóbēé bán chōm ehōg édé mbále, bad bēmpēe-é bēhóbē bán chōm émpēe chós édé mbále. Boŋ bós moosyāāl bēbēle awusé nzé bēhóbē bán, "Mē-éé ndé mod awe abíí."

²¹ Donŋe á bad ábe bēwēmtan bán bēbífí mam níme médé, boŋ bēn bēekoó'é adúbe áde Dyōb á mbále ahíd.

Nsimé ní Dyōb nībē ne nyé moosyāāl.

Kálag eche elónténé ébε echë Paale áténlé Timotiε Ndibned ní kálag

Kálag eche Paale áténlé Timotiε eche elónténé ébε éhóbe bwámbwam tângene elébé éche ábageé Timotiε née mod awë búmō bébele nsón ní Dyòb ne awë awòngan mós. Dyam áde Paale ákóó ahób áwëd-te ádíi nwεsen. Alébe Timotiε awéde-ε mós nlém á abum áá ábë ábenle' Yesu Krístáε ne nlém nhóg. Paale akoo Timotiε etúu asím áte áá átéd pónéd ne mpenten mé eyókél míme méewòngān bad boj rítimé npuutád bad. Amín e nímén mésyāal Paale akamtan Timotiε áyāl e ádé alongé, mós Paale nyaa eche ádúbpé Krístáε, awεsen áde áwesanné, edònge éche álúmté wée bad ne metake míme ákudéé akal áde ákaléé Eyale é Dyòb.

Nkabté ní kálag

Ndibned ní kálag 1.1-2

Mekεnag ne elébé 1.3-2.13

Elébé ne asím dé etúu áte 2.14-4.5

Paale ahóbé tângene eche nyaa 4.6-18

Nsógten 4.19-22

Paale alómmé Timotiε melεten

¹ Mε Paale, mbapεε a nlómag awë Yesu Krístáε me-εé ntelé enén kálag. Dyòb áhede áá níkal nkalanj tângene alongé áde áhóbé áá dekudé abé áde dédíí nhóg ne Yesu Krístáε.

² A-Timoti, we-εé rítenléé enén kálag. Edíi awem mwān a nlém. Nsimé, e'boj bé nlém ne nsanj míme ríhúú ne Dyòb Titée ne Yesu Krístáε awesyáné Sāngwéé, míbë ne nyé.

Paale aságnéné Dyòb, awéde-ε Timotiε nlém á abum

³ Nságnan Dyòb áde mibenléé ne nlém nhóg melemlem ngáne ábēm betaa bébénlé'áá mós. Nságnan mós pónéd té áyāl echòñ nzé nkānne', nkuu ne müte.

⁴ Nzé nkāmténé ngáne wénsudénné boj échiu, mbelé rídanj we anyín bwámbwam, ábel boj rílón ne menyinge.

⁵ Nkamtan nén meé ekoo Yesu Krístáε adúbe, nímé melemlem mé adúbe móo nyoo ambáá, Loise, ne nyoo, Yunise, bómpé bēnwòngē. Bōōb-pōō, mbíí meé ádé adúbe dōo wēmpé éwóó.

⁶ Enén nzōm chō ekāō boj ríkamtán we nén meé nde eché Dyòb dēmbéé we áde mémbānne we mekáá á nló, ébë ébenlad chō.

⁷ Dyòb déebeleé áá syáné déwòñ mbwóg áte ábele mós. Boj pεn eché Edáádāñ ébage syáné ngine ábele mós, ébele delúmtε bad edānge, ébele-ε dechānge échesyáné yāl.

⁸ Né-ōó, weewógé e'són ála bad tângene awesyáné Sāngwéé, Yesu Krístáε. Weewógé-ε e'són áyāl echēm kénéé rídíí mod a mbwóg áyāl eché Krístáε. Boj pεn ne ngine eché Dyòb ábágé we, kwentén ákud metake ne me akal áde dékaléé nkalanj ní bwām.

⁹ Dyòb dōo ásóó syáné, achéle-ε syáné ábë ábë bad. Abelé nén saké áyāle dyam áde débélé boj áyāle nímé ntíi mēn míme ámbenlé nkòñsé rídēhób bán mbootad. Abage syáné nímé nsimé alóm áde alómé Yesu Krístáε á nkòñsé áyāl e syáné.

¹⁰ Bōōb-pε, Dyòb álúmté syáné nsimé apε adé Yesu Krístáε, Nsoode awëd ápédé. Abódté ngine e kwééd, abēnlédé-ε nkalanj ní bwām álúmed syáné alongé áde déemaá'.

¹¹ Dyòb ápwédé me nēngáne mbapεε a nlómag ne meléede ákal nímé nkalanj ní bwām.

¹² Enén nzōm chō-áá ekāō boj ríkudé nímén metake. Boj meewógéé akwágké ké ahóg áyāle mbíí ane awë rísúmé nlém áyāl. Mbíí-ε nén meé ákāō chōm éche ábágé áwēm mekáá kóōñe á epun é nkāásé.

¹³ Ayáge áde átāngéné áde r'iyágté we, ékonj dō acháá. Abē nēngáne elānsén éche étāngéné ahíd. Edúbe Yesu Krístáε, édanj-ε bad bēmpēe abé áde edíí mod nhóg ne Yesu Krístáε.

¹⁴ Edáádāñ éche Esáá édé syáné áte, chōó éwòngan we ábel boj nkalanj ní bwām míme Dyòb ábágé áwòñ mekáá échāá mós bwām.

¹⁵ Ebíí wéé bad bé Krísto bésyāal bēmbāñ me á yāl áde mibédé á mbwóg e Esia. Faygeduse bō Homogenes bómpé bēmbē áfínté e bad ábe bēmbāñ me á yāl.

¹⁶ Nkānne' nén meé Dyòb álúmed ndāb eché Onesiforuse ábë e'boj bé nlém áyāle awéde'áá me nlém á abum pónéd té. Enkēnkwágénné me áá ndé á mbwóg.

¹⁷ Ade ápédé á Roma pēén, ambootéd me ahed kóōñ anyín-ne me.

¹⁸ Nkānne meé Dyòb álúmed mós ábë e'boj bé nlém á Epun é nkāásé. Mmòñ ebíí-ε bwām nwòngēn míme ábágé'áá me á dyad dé Efesus.

2

*Paale ad Timotiē atāngéné
abé sánze e bwám eche Yesu Krístæ*

- ¹ Bwám-pwám á awem mwán Timoti, nsimé níme Yesu Krístæ ábágé wε, níbê ríwede wε áte.
- ² Mekan níme wénwógkê néε r'iyágtéε ekud é bad tāngene Krístæ, wémpē yágéd bad mó ábe bédé bad ábe bōmpē béhele béyágéd bad bēmpēe. Bébê bad ábe béyágéd-te bō.
- ³ Wémpē ékwentēn ákud metake, ébê ngáne sánze eche Yesu Krístæ.
- ⁴ Sánze echê edé á nsón, ebélé éhéde áá mówóged awé mod ambáá menyinje, né-ó eesóléé mekan áte níme bad ábe béesé sánze bébeléé.
- ⁵ Nyaa empée eche éhele ébélē Krístæ edé nēngáne mod awé anyágte mehélé ne bad bēmpēe. Eéhēlē-se ákud nsábe éetóméé né ahidé mbéndé éche bétúidé anyaged mehélé.
- ⁶ Mbélē-nzag awé abelé ntú móo atāngéné mod a e'só abé ákud mbote.
- ⁷ Dól mekan áte níme ríhóbé áyāle Sāngwéé ábēl esóntén mó mésyāāl.
- ⁸ Kamtén nēn wéε Yesu Krístæ ambíd á mbyaa níme Dabide, Dyób dēmpuúd-te mó áde awédé. Mmén nkalanj ní bwám móo ríkanléé bad.
- ⁹ Akal áde ríkaléé nímén nkalanj ní bwám dōo ákás boj ríkudé metake káōñ béhāg-ke me á mehanj nēngáne mod awe abóó mbéndé. Boj modmod ééhēlē-se ahé Eyale é Dyób bengobéngōbē.
- ¹⁰ Né-ó, nwéséné metake níme ríkudé ábel bad ábe Dyób ápwédé, bōmpē békud e'soosoj ábe Yesu Krístæ ábēé bō, bēbē-ε asē e ehumé éche ébé á ngindé ne á ngindé.
- ¹¹ Enén póle edé mbále, edé nēn bán,
“Nzé syānē dewédé ne Krístæ,
né syānē deébé-ε á alongé, ne mó.
- ¹² Nzé dedé dewεsan mekan ne mó,
deékamlén ne mó,
nzé debáá mó á yāl
né mó-ε ábāñ syānē áyāl.
- ¹³ Nzé déébēlé' ngáne Krístæ áhédeé áá débēl,
mópen ábē ábel chōm ésyāāl éche áhóbé áá mósbēl,
áyāle ééhēlē-se abāñ eche yāl á yāl.”

Paale ad Timotiē abē mbelē-nsón a bwám

- ¹⁴ Ebê ébele bad ábe bédúbpé békamtan nímén mekan. Esím bó etúu áte á'só é' Dyób wéε béepentān nhóg ne aníní tāngene e'yale. Ene ndín e ntāntén eewōngánné boj pen ebéhte adúbe áde bad ábe bēwóglan.
- ¹⁵ Wéd yāl áte ábel Dyób ányín nēn áá edé mod a nsón awé eékwágé ábel nsón níme ábeléé, ébē-ε mod awé ayágte nkalanj ní mbále nyaa eché etāngéné.
- ¹⁶ Weewóó dyam ábel ne e'kúku é' mehób, ne mehób níme méesé etógnén áyāle nzé bad béhóbe éché ndín é mehób, né débēl bēnābpé mekan abel níme Dyób déehédéé áá débēl.
- ¹⁷ Donje á bad ábe béhóbe échén ndín é mehób bédii Himenose bó Filetus. Mmab mehób médii nēngáne sii eche edyág mod áte ésebán emaa'.
- ¹⁸ Bétédé adúbe áde atāngéné, bétímé béyágte bán syānē ábe dedúbpé, Dyób ámáá syānē apuud. Enén ndín e ayáge ebéhte donje á bad adúbe.
- ¹⁹ Boj kēnē, mekan níme Dyób ámáá anabe, méehānlánné. Awédé mín-naá e'yale éténlédé nēn bán, “Sāngwéé abíi bad ábe bédé ábē bad,” éténlédé-ε nēn bán, “Bad bésyāāl ábe béhóbe bán bédé ne Sāngwéé, bétāngéné bésóg mbé abel.”
- ²⁰ A ndáb e mod ambáá, donje á mīse áde áde bēbēnlé gól, donje silva, donje-ε áde áde bēpádé ne áde bēbēnlé hyøg. Bēbēnlad donje nzé dyam dé edúbé áde, donje-ε bēbēnlád póné kéhéé.
- ²¹ Nzé mod ké ahéé asógé mekan mé mbinde abel, ábē nēngáne mīse níme bēbēnladé nzé dyam dé edúbé áde. Ane mod abelé asánj, eche Sāñ-ε abenlad mó. Ane mod abág mboñsén ábel dyam á bwám ké áhéé.
- ²² A-Timoti, weébēlé mekan mé mbéb níme kódébad ébeléé. Boj pen éwane áte ébele mekan níme métāngéné, ébē édúbe Krístæ, édāñ bad bēmpēe, ébē-ε nsāñ ne bad. Ehíde nímén mekan nchoo ne bad bēmpēe ábe békánne Dyób ne nlém nhóg.
- ²³ Weewóó dyam ábel ne e'yókél bé mpentēn mmé méewóó-ε nwōngēn ké nhóg áyāl e mod. Ebíi wéε mpentēn mīpēene nsēlag.
- ²⁴ Syānē ábe dedé-ε bembaledé bé Dyób deésēnlé. Boj pen, detāngéné débōñ nlém ne mod ké ahéé, detāngéné déyágté bad bwám déwesán-ne bad.
- ²⁵ Déyágté bad ábe bétyéeman syānē ábel boj bēbii bán mam níme béhóbéé syānē á yāl méesaá mbále. Déchedēn bó yāl nzé debale nē. Délyág nlém nēn bán Dyób débēl béchémm ádáb awusé béhāñlén, bésóntén-ne mbále eche eyale é Dyób ékaléé.

²⁶ Nén débĕl debyéé dépĕ bó á nló-te, bébíd-te Devale á melám té. Devale ammad bó akób ádogé-’e bó ábel mekan míme áhédé’áá aá bébel.

3

*Paale ahóbé tǎngene ebébtéd
éche ebĕ á e’pun bé asóg*

¹ A-Timoti, nhede meé ebíí nén weé á e’pun bé asóg, mekan mébĕ ebébtéd.

² Ene póndé bad bébĕ ábe bédásá chǒm, ábe bédásá mǎné, ábe bédé kúmbe, ábe bédé epame, ábe bébĕbé nsál áte, ábe béewógné ábab besáá ne benyaá, ábe béebagé meságnen áyál e chǒmchǒm, ábe béebelé ngáne Dyǒb áhedeé.

³ Bad bébĕ-’e ábe béelúmté bad bémpĕe edǎnge, ábe béewóo nlém ní ngól, ábe békale bad metóm áyál, ábe béehelé yál akób, ábe bédé ekan, ábe béedǎá bwám.

⁴ Bébé ábe békag bad ntúré, ábe béwóo ehóhó é abé, ábe béwĕmtan bán bétómténé abé, bébĕ ábe bédásá menyinge mé nkǒnsé, béedás’ Dyǒb.

⁵ Bad bébĕ ábe bélúmté byánán bébele ngáne Dyǒb áhedeé bonj béemwaá bán ngíne e Dyǒb ehǎngĕn adáb alongé. Weékǎg échĕn ndín é bad benben.

⁶ Abĕn bad donje áde áde ádoge bad, bésól áwab mendáb bédoge bebaád ábe béewóo debyéé ábe bédyĕe áwĕd-te. Abé bebaád bébĕlé mbéb bwámbwam nyaa eche nímé mbéb rídnlédé bó néé nted. Mewĕmtan mé mbéb mǎ ne mǎó ríkamlan bǎ.

⁷ Béwóglan meyáge nyaa ne nyaa bonj béeheléé ayáge á Dyǒb á mbále abii.

⁸ Ngáne Janĕse bǎ Jambres bĕntǎngĕnnĕ Mosĕe bǎóó, melemlem nĕ dǎó ábĕ bemeléede bé metóm bĕtǎngǎnné ayáge á mbále. Mewĕmtan mé mbéb mǎó béwóó. Dyǒb ábáá bǎ á yál áyále béetǎgnéé adúbe awonj.

⁹ Bonj bédǒg bad dásǎ á esónj é póndé áyále bad béchĕm échab edimdim, melemlem ngáne émbĕnlédte ne Janĕse bǎ Jambres.

Paale adii alébe’ Timoti

¹⁰ Bonj we a-Timoti, ehídé ayáge áde ní’yágté bad bwám, ehídé abé áde níwóó, ehíde-’e chǒm éche ríhedeé ábel áwĕm alongé. Ebíí weé ndúbpe Dyǒb, ebíí awĕsen áde níwesanné, edǎnge éche rílúmtéé bad. Ebíí ngáne ríkáá nlém áyál e nsón míme mbéleé.

¹¹ Ebíí ngáne bad bĕtagtĕé me, ebíí-’e metake míme ríkudeé áyál enĕ. Ebíí ndín é mekan éche ébĕnlédé me á myad mé Antyog, Ekǎniom ne á Listra. Ebíí ngáne mĕnkangé nlém áyál e metake míme mĕnkudtĕ áwed. Bonj Sǎngú Yesue ansǒnj ádĕm alongé ásĕ e nímé metake mésyáál.

¹² Ne mbále mod ké ahéé awĕ abele mekan ngáne Dyǒb áhedeé abé áde adíí ne Yesu Krístǎá, atǎngĕné ákud metake á mekáá mé bad.

¹³ Bonj e’bébtéd é’ bad ne bad ábe bédoge’ échab yál, bĕnabpe mekan ábel míme métómténé ebébtéd abé, bédoge bad, bad bémpĕe-’e bédogé bǎ.

¹⁴ We pen a-Timoti, ébĕ ébele mekan míme éyǎgké míme ebíí-’e nén weé medé mbále, áyále ebíí bad ábe béyágté we mǎ.

¹⁵ Ebíí-’e weé se ámwĕndemé mbĕlĕ chǒm éche eyale é Dyǒb edíí. Echĕn eyale é Dyǒb chǎó ébágé we debyéé ásǒntĕn nén weé Dyǒb ásóó we áyále édúbpé Yesu Krístǎá.

¹⁶ Chǒm ésyáál éche bĕtelé á kálag e Dyǒb ehúú ne Dyǒb. Ewǒngan áyáged bad, éwǒngǎn áláa bad nímab mewusé, éwǒngǎn bad átii mewusé míme bébĕlé, élangĕ-’e bad ábel mekan míme métǎngĕné.

¹⁷ Eyale é Dyǒb éwǒngan ábel bonj mod awĕ abenle Dyǒb ábĕ mbonjsĕn ákwognd-te ábel nsón mí bwám rísyáál.

4

¹ A-Timoti, á’só é’ Dyǒb ne Yesu Krístǎá, mǎ awĕ ákáád bad ábe béwédé ne ábe bédé á alongé, á dĕn áde mǎ awĕ ápĕ ámbíd abé-’e nkamlene a moosyáál, nkoo we nímĕn mekan áláa meé:

² Ekale’ nkalanj mí bwám ké áde bad bédásá mǎ awóg ké’ áde béedǎá’é. Ebel bébtii bán chǒm éche éhóbéé edé mbále, ébel bésóg mewusé ábel, éwéde-’e bǎ nlém á abum, éyágte-’e bad nímĕn mekan ne nwĕsen rísyáál.

³ Póndé épĕ echĕ bad béehédte bán béwóg ayáge áde atǎngĕné, bonj pen bébelé’ mekan míme nímab nlém rílangé bǎ aá bébel. Bemeléede-’e ábe bédásá bán bélangĕ bǎ mekan míme bédásá awóglan bĕn ne bĕn-naá béwóglǎnnĕ.

⁴ Bad bébǎnj mbále e Dyǒb awóglan, bébǎg metúu áwóg póle é metóm.

⁵ Bonj we a-Timoti, échǎá echonj yál bwám póndé ésyáál. Ewĕsen metake, ébele nsón mí mod awĕ akanle bad eyale é Dyǒb ébele-’e nsón rísyáál míme Dyǒb ábágé we áá ébel.

⁶ Me pen, póndé emaa me ape echê bēbēé me ngáne nde, póndé emaa me abé benben átede ádén alongé.

⁷ Née mod a nsón awē Krístəə, nwané nzum e bwām, mmadé nsón míme Krístəə àmbēé me aá mbēle mó. Nhídé-'e adúbe nyaa echê etángéné.

⁸ Bəəb-pe, nsábe rísine me, míme rílúmte nén bán mbēle nsón míme rítángéné ngáne Dyòb áhedeé. Mmê nsábe mó Sánjwéé, mó awē akáadte bad nyaa echê etángéné ábēé me á epun é nkáásé. Saá-kaá mməmpen ábēé mó bon ábē káəne bad bésyāəl ábe bésine' échê epe.

Paalé alébe Timotié

⁹ A-Timoti, éwan áte éwámsen ape áwəm.

¹⁰ Nhóbe nén áyale Demase abáá me áyál akií á dyad á Tesalonika áyale adáo mekan mé nkónsé. Kresense akií á mbwóg e Galesia, Tituse mó-'e ákē á dyad á Dalmatia.

¹¹ Lukase mwəmpen mó adé ne me. Nzé epag, épēen Makəse áyale áwəngən me áyāl e nsón míme ríwóó.

¹² Nlómé Tikikuse á Efesus.

¹³ Nzé epag, épiinéd me echem kóte. Mentédé chó á dyad a Troas á ndáb wée Kaapuse. Epiinéd-te me nhúbe rí kálag, bwāmbwam rí ngob é nyam.

¹⁴ Alesandaa awe alúe e'kii abelé me ebébtéd bwāmbwam. Sánjú Yesue ákəgsən mó áyale mbéb míme ábélé.

¹⁵ Wəmpē étédən mó póndé áyale antyéémén sé bwāmbwam áyale nkalan míme sékaleé.

¹⁶ Ngen e'só eche rítýéémé a nkáásé modmod enkənkwoɡnédte me. Moosyāəl ambán me á yāl. Nkánne nén meé Dyòb álagsen bó.

¹⁷ Kéné Sánjwéé ambé ne me, ábē-'e me ngíne. Nén dēmbəl menhəl nkalan rí bwām akal nyaa echê bad ábe béesé bad bé Israel bənwəgkē mó. Sánjwéé anhuíd-te me á nsəl rí ngii.

¹⁸ Sánjwéé ásdə me alongé áyāl e ebébtéd ké éhéé éche étán me ákēén-ne me áwē nkamlən rí mín ne nsan. Edúbé ébē ne mó á ngíndé ne á ngíndé.

Melənten mé asóg

¹⁹ Lentéd me Priskaa bó Akwilaa, élentéd-te me abum á ndáb áde Onesiforuse.

²⁰ Erastuse anlyəg á dyad á Korinto, rítédē-'e Trofimuse á dyad á Miletus, áyale akónlé'áá.

²¹ Ewan áte ényín nén wée mópedé áwəm, ahéb á ngíne ádéhób bán ápag. Yubuluse, Pudense, Laynuse, Klodia ne bānndé bé Krísto ábíní bésyāəl bélénté we.

²² Sánjwéé ábē ne we. Nsimé rí Dyòb rímbē ne we.

Kálag eche Paale áténlé Tituse Ndibned ní kálag

Tituse eebédeé mod a Israel bon antim mod a Krísto, áwōngān Paale, búmā bébelé nsón ní Dyób. Paale antelé Tituse enén kálag alyág áde ányákgē mō á mbwóg é Kret ānān nsón ní mwembé. Enén kálag ekoo' metote méláán anān á díd.

Dyam dé'só, Paale akamtan Tituse nyaa e abé eché belyáged bé mwembé bétāngéné awōn, tanje ngāne bad bé Kret bēnwōngē abe dé mbéb. Paale alébe-'e Tituse ngāne átāngéné bad nyaa ne nyaa aléb á mwembé-te. Abén bad bédii bechun bé bad, kódebad ne ngandére, ne betān. Asóged, Paale alébe Tituse ngāne abé á mod a Krísto átāngéné abé bwāmbwam abé nsañ ne nhóg ne aníní, ábel ekoyí éebāg, mpentēn méebāg, nkabén-ne méebāg á mwembé-te.

Nkabtéd ní kálag

Ndibned ní kálag 1.1-4

Belyáged bé mwembé 1.5-16

Nsón míme bad téé bétāngéné abel á mwembé te 2.1-15

Elébé ne asím dé etúú áte 3.1-11

Nsógten 3.12-15

Paale alómmé Tituse melēten

¹ Mē Paale, mbáledē a Dyób ne mbapee a nlómag awē Yesu Krístā, mē-éé ntelé enén kálag. Yesue ampwéd mē, alóm-mē mē ábel bon adúbe áde bad ábe Dyób ápwédé ákag á'sō ne ábel bon bēbii mbále tāngene Yesue, bébele' ngāne Dyób áhedeé.

² Nén ábele bad bé Krísto bēwōn e'lyág bé nlém ákud alongé áde déemaá', dōó Dyób, mō awē eekálé metóm ánhōbpē áá móóbē, nkōhsé rídéhōb bán mbootad.

³ A pōndé eche etāngéné-'e Dyób dēmbel áá bad bēbii míme nkalan. Dyób dēmbē míme nkalan áwēm mekáá, mē-'e níkal mō ne kunze eche mō Dyób, awesyánē Nsoode ámbéé mē.

⁴ Ntenle wē, Tituse, awem mwān a mbále á adúbe áde syānē moosyāál déwóó. Nsimé ne nsañ míme ríhúú ne Dyób Titēe ne Yesu Krístā awēd Nsoode, míbē ne wē.

Paale ahóbé tāngene nsón míme Tituse

ábenlé á mbwóg e Kret

⁵ Mentadé wē á Kret, mbwóg eche mendib melāngéné ábel bon étii mekan míme méhednad ábel, épweđ belyáged bé mwembé dyad té. Ekamtēn ngāne ménlāá'ē wē mēé ébel.

⁶ Nlyáged atāngéné abé mod awē béeheléé sé békóbēn awusé. Atāngéné awōn dāsō mmwáád nhóg, ábe hān-ne bétāngéné bédúbé Yesue. Bétāngéné abé awōn áde modmod éehēlē-se ahób áá bēwúú nló áte ké'ē áá bédé epuutéd.

⁷ Nlyáged a mwembé nēngāne mod awē ahíde nsón ní Dyób ámbíd, eetāngeneé nēe áwóó awusé á yāl. Eetāngeneé epame abé, ké'ē abé mod awē awāmsan alij. Eetāngeneé-se abé mod awē abagé yāl á amwé á míl káa mod awē apēne epuutéd. Eetāngeneé-'e se abé metōg.

⁸ Bon pēn atāngéné abé mod awē akobe beken abé-'e mod awē adáá akan á bwām. Atāngéné abé mod awē abíe' dyam ábel, abé mod awē ábele mekan míme metāngéné, abé mod awē asáá, abé-'e mod awē akóbe eche yāl.

⁹ Atāngéné abé mod awē akóó nkalan ní bwām, nkalan míme bad bétāngéné nlém asum áyāl adúbe ngāne bēyágté mō mō. Nén débēl áhēl bad bēmpēe ahébe áhíd nkalan ní bwām nyaa eche etāngéné áhēl-le mewusé míme bad ábe bétāngan míme nkalan abided áwed.

¹⁰ Nhóbe nēn áyāle bad híin béekwentēneé áhíd nkamlēn míme belyáged bé mwembé. Bédii bad ábe bēhóbe e'yale ábe bēewóó nsōhtēn bédoge-'e bad. Bad híin ábe bēyágtē enén ndín e ayáge bédii bad ábe bédé á epepé éche éhóbe nēn bán bétāngéné bad ayag.

¹¹ Weémwāg se ábē bad bēyágtē áyāle bēbēbte bad bé Krísto híin ndáb áte ayáged áde bēyágtēé mekan míme bēéwóó'ē kunze áyáged. Bēyágtē' échē ndín e mekan ábel békud mōné.

¹² Mod nhóg awē ámbíd á Kret se' bōód awē abédé mod a debyéé, anhób áá, "Bad bé Kret békale metóm pōndé ésyāál. Bébébé nlém á abum, bédii bad ábe béehēle nsón, bēdyag-kē ndyééd bwāmbwam."

¹³ Abé e'yale ábe ane mod ánhōbpē áyāl e abé bad é'dé mbále. Né-óó, bad ábe bédúbpē Yesue bon bēhíde áde ayáge dé metóm, ékon bō mímb mewusé aláa ábel bédúbe ayáge áde átāngéné.

¹⁴ Nén débēl bēedúbéé pólé é metóm éche bad bé Israel, béehíd-taá mekan míme bad ábe bēbáá ayáge á mbále áyāl bēhóbéé.

¹⁵ Ne mod awë asáá, chõm ésyāal ésaá boŋ ne mod awë eekēnle áte ne awë eedúbpe, chõmchõm áyāle nímāb mewēmten ne nlém méekēnle áte.

¹⁶ Bad ábe béyágte áde ayáge dé metóm béhōbe nēn bán bébīí Dyõb, boŋ nímāb mbeltéd rílumte nēn bán béebīí' é mō. Bébele mam níme bad békóó, béebeléé-'e ngáne Dyõb áhedeé, béeheléé dyam á bwām ké ahóg abel.

2

Paale ad Tituse ayágte ayáge dde átāngéné

¹ A-Titus, éyágte bad ayáge áde átāngéné.

² Eyáged baachóm bémbáá wéé béchyāā échab yāl bwām, bébele mam nyaa echē bad bébagéé bō edúbé bébē-'e bad ábe bébyéé' mam abel. Békag á'sō bédúbpe Krístāā, békag á'sō bédāā bad bémpēe, békag-ke á'sō béwesān metake níme békudeé ayāl e adúbe áde bédúbpe.

³ Eyáged-te bebaád bémbáá wéé nímāb mbeltéd ríluméd nēn bán bébage Dyõb edúbé. Elāa bō wéé béehōbē nhóg ne aníníí mam ayāl ábēbed bō dīn, béebage-'e échab yāl á amwé á mīm. Boŋ elāa bō wéé béyágte bad mam níme métāngéné.

⁴ Bébele nímēn mekan ábel boŋ béhel e'tum é' bebaád ayáged ngáne betāngéné ábab bechóm ne ábab bán adāŋ.

⁵ Béyáged bō bán bébē bebaád bé e'wóngé bé bwām. Bésum nlém wéé ábab bechóm bēnpen, béyáged-te bō nyaa eche betāngéné nímāb mendāb abóo bwām, nyaa eche bébēē bebaád ábe bésúdté yāl áse e ábab bechóm. Nzé bebaád bébele nímēn mekan mésyāāl, bad béehōbpe nkalaŋ níme Dyõb ábágé bad dyam dé mbéb ayāl.

⁶ Melemlem ébel kódēbad échāā yāl.

⁷ A mbeltéd nímōŋ-'e rísyāāl, ébele mekan mé bwām nyaa eche bad béhīdté nímōŋ mekuu. Nzé éyágte, chõm eche éyágteé étāngéné ébé mbāle, ébē-'e mod awë ahíde mekan ámbíd bwām.

⁸ Enyín nēn wéé ayáge ádōŋ átāngéné ngáne bad béekudté etāl áhōb wē mam mé mbéb ayāl. Nēn débēl bad ábe betāngan wē békwaŋ ayāle nēn béekudté nzii áhōb syāné dyam dé mbéb á yāl.

⁹ Eyáged betāŋ nēn wéé béwógne ábab besáá á menzii mésyāāl, bébele-'e mam níme méwōgté bō menyīŋge. Béetāngeneé nēe bēpentanné bō.

¹⁰ Béechībnē-'e bō. Boŋ pen betāngéné alúmed bán ábab besáá béhele bésūm bō nlém ayāl. Nēn débēl bad béwōŋ mewēmten mé bwām tāngene nkalaŋ níme Dyõb, awesyānē Nsoode, níme déyágteé.

¹¹ Dyõb álómé nímē nsimé áfinté e syāné abel áde ábélē nzii eche moosyāāl áhele ákūd e'soosōŋ.

¹² Ábē e'boŋ bé nlém é' Dyõb é'yágte syāné áchene mekan níme Dyõb déehedeé aá débēl ne ásóŋ esíí awōŋ ábel mekan níme bad bé nkōŋsé ábe béebīí Dyõb bébeleé. Eyágte syāné ábel mekan nēngáne bad ábe bébyéé' mam abel, ábel mekan níme métāngéné ne ábel mekan níme Dyõb áhedeé á nkōŋsé wēn.

¹³ Debele nēn ngáne désineé ne e'lyág bé nlém mam níme mépē échē epun áde ádēd Dyõb, mō awë adé Ngum ne awēd Nsoode, Yesu Krístāā ápēé ne eche ehúmé.

¹⁴ Yesue ambē eche yāl ákōde syāné áse e mbéb rísyāāl ábēl-le syāné debē bad ábe besáá, debē-'e ábē bad bēnpen, ábe béwóo nlém áte ábel mekan mé bwām.

¹⁵ Eyágte bad nímēn mekan. Ebenlad kunze eche Dyõb ábágé wē, áwéd bad nlém á abum ne álāa bad nímāb mewusé ábel béhāŋŋen. Weémwāŋ-se modmod anyín wē nkōŋtéd.

3

Paale ahōbé ngáne

abé á bad bé Krísto átāngéné abé

¹ Nlāŋge wē meé ékamten bad ábe éyágteé wéé bésuded yāl áse e benkamlenē ne áse e bad bémbáá. Wéé béwógne bō bébē-'e mboŋsēn ábel dyam a bwām ké áhéé.

² Elāa bō wéé béehōbē modmod dyam dé mbéb á yāl, bébāa' mpenten, bēpwiited, bécheden-ne moosyāāl yāl.

³ Ngen e'sō syāné bēn ámpē debédé eyókél, deewógne'aá Dyõb, dempān nzii, debédeé nēe betāŋ awōŋ áde déwóó'aá esíí ayāl e mekan mé nkōŋsé, déhēde-'e menyīŋge mé nkōŋsé. Dekónāá bad, désīdē-'e bad alongé ádēd ásyāāl. Bad bēnkóó syāné, syāné bēn-ne dékōó nhóg ne aníníí.

⁴ Boŋ Dyõb, awēd Nsoode, anlúmed syāné ábē e'boŋ bé nlém ne échē edāŋge.

⁵ Ansōŋ ádesyāné alongé. Saké nsōn ní bwām níme syāné dēmbēnlé mēmbēl boŋ ábēl nē, boŋ ambel nē áyāle níme nlém ní ngəl. Anlóm Edāádāŋ éche Esáá áwobe syāné mbéb ábel nēn déchyáad ekóólé.

⁶ Dyöb ábúdé syánē Edáádān ēche Esáá abe mbwiined ne Yesu Krīstā, awesyánē Nsoode.

⁷ Dyöb abélé nē, ábel bon nímē nsimé mbél dékobned áwe e'só bon syánē ámpē déwōn e'lyóg bé nlém nén bán deékúd alongé áde déemaá'.

⁸ Enén pále echē níhóbeé edé mbále.

Nhede mēé níkon nyé nímén mekan aláa ábel bon bad ábe bédúbpé Dyöb bēbii ngáne bēbélé mekan mé bwám. Nén dōó ébóó bán débele', nē dō-'aá dépiinéd moosyáál nsyān.

⁹ Bon nyéte de e'kúkú bé mpentēn, akal á pále tñgene ngáne mbyaa mēmbootédte. Nyéte de-'e ngabén ne ntāntēn tñgene mbéndé é bad bé Israel. Abén bwēm béepēnēé nsyān, béesaá-'aá dyam dé abelen.

¹⁰ Mod té awē apēne ngabén áfntē e bad bé Krīsto, nzé ebagé mó elébé ngen póg ne ngen ébe bon eewóge wē, weewóó dyam ábel ne mós.

¹¹ Ebii nén wēé ene ndín e mod abébé abele-'e mbéb. Mbéb nime ábélé nílúmtē bán akwíde eche yál nkáásé.

Elébé ne melēntēn mé asóg

¹² Nzé nlómé Atemase ké'ē Tikikuse bó mod nhóg áwōn, éwān áte áhye dényín me á dyad á Nikopolis áyāle áwed dōó nífidé mēé mēbē á pónde e ahéb á ngíne.

¹³ Ewan áte ábel bon Zenase, mod a mbéndé bó Apolos béhide áke eke éche béhedéé áke. Nyín nén wēé mōwōngēnē bó nyaa eche béetókgé chómchóm éche bēbenlédte áke.

¹⁴ Ebel-'e ábesóo bad bēyáge ábel mekan mé bwám. Bēwōngēn ábel mekan nime méhēdne bán mod ábel. Béebelé mekan nime méesē dyam dé abelen.

¹⁵ Bad ábe bédé ne me bésyāál bélénté wē. Lentéd me ábesyānē baanyān bé Krīsto bésyāál ábe bédáá sé.

Nsimé ní Dyöb mbē ne nyé moosyáál.

Kálag eché Paale áténlé Filemɔne Ndibned ní kálag

Filemɔne abédé mod awé andúbé Krístaa abé-’ε mod awé awóó edúbé bwámbwam á mwembé-te. Kapóg abédé á mwembé míme rídé á Kolose. Anwón ntán awé béchágé’áá bán Onesimuse. Ane ntán ansób wée Filemɔne dó-’áá ámbíd e pónde ábómné Paale. Paale abédé á mbwóg ene pónde. Paale mós ankǎh bon Onesimuse abé mod a Krísto. Kálag eché Paale áténlé Filemɔne, antel chós áá Filemɔne bós awe ntán bétim ásé, áá mós Paale mólóme’ awe ntán ámbíd, nén Filemɔne akob mós ámbíd saké áyále adíí awe ntán dèmpen bon ákob mós nǎngáne mwányaŋ á Krísto.

Nkabtéd ní kálag

Ndibned ní kálag 1-3

Paale akené Filemɔne 4-7

Paale acháá’ Filemɔne átéd Onesimuse ámbíd 8-22

Nsógten 23-25

Paale alómmé bad melenten

¹ Me Paale, awé adé á mbwóg á dín á Yesu Krístaa, me-εé ntelé enén kálag. Sé Timoti, mwányaŋ a Krísto awéd, sélómme nyé melenten. Sélente’ we Filemɔne, nsón e echon awéd awé mómpé abele’ nsón míme sébeleé.

² Sélente’ kóǎhne Afia, awéd mwányaŋ a mmwaád a Krísto. Sélente’ Achipuse awé mómpé akale’ nkalan ní bwám ne ngine esyáál ngáne sémpé sékaléé. Sélente-’ε bánned bé mwembé ábe hébome’ áwoŋ ndáb.

³ Nsimé ne nsan ní Dyób Titée awéd ne Sáŋgú Yesu Krístaa, mbê ne nyé.

Edaŋge ne adúbe ade Filemɔne

⁴ A-Filemɔn pónde tée nzé nkánne’, mbelé ríságnán Dyób áyál echón.

⁵ Nságnan Dyób áyále nwógé nén bán edás bad bé Dyób bésyáál, esumé-’ε nlém wée Sáŋgú Yesu Krístaa.

⁶ Nkánne’ nén meé, nlatén míme syáné déwóó nǎngáne bad ábe bédúbpé Krístaa, míbel nyékon mekan mé bwám mésyáál nímbé Dyób ábágé syáné asónŋten. Nén débél ehúmé éche Krístaa ényínned.

⁷ A-mwányaŋ, edaŋge éche éwónné bad ábe bédúbpé Krístaa, éwógté me menyiŋge bwámbwam éwéde-’ε me nlém á abum. Ewógté bad bé Dyób menyiŋge.

Paale ad Filemɔne akob Onesimuse

⁸ Né-óó, kénéε edíí bán nwóó kunze ákamlen we á dín á Krísto ábel dyaŋ áde étáŋgéné ábel,

⁹ edaŋge éche níwánléne we ébéle ncháa’ we cháán. Me Paale, nhóbe nén nǎngáne nchun ní mod míme rídé-’ε á mbwóg bɔɔb á dín á Krísto.

¹⁰ Ncháa we á nló míme Onesimuse. Adíí bɔɔb nǎngáne awem mwán. Me-εé nkəə bon adúbe Krístaa adé abédé á mbwóg hén ne me.

¹¹ Ngen e’so, enkəmbáá we etógnén. Bon bɔɔb adé sóo etógnén.

¹² Nlómé’ mós ámbíd áwón bɔɔb, adíí mod awé rídás bwámbwam.

¹³ Mendǎh meé ábê ábê ne me ábel bon áwónŋen me á étál échón bɔɔb áde rídíí á mbwóg hén á dín dé nkalan ní bwám.

¹⁴ Kénê, meédaé’ε meé rínyáged we áwóŋen me. Bon pen mǎdǎh meé éwónŋen me áyále mmón edás me áwónŋen. Né-óó, meéhéleε-se míbél dyaŋdyaŋ ésebán mmón ekwěnténé.

¹⁵ Kapóg Dyób dós dǎmbél áá Onesimuse ápágned we á yál é esón é pónde, ábel bon nzé atímé ámbíd áwón ábê ne we ne abé ásyáál.

¹⁶ Bootya bɔɔb, saké ntán ngén adíí. Adíí awéd mwánned a Krísto. Ndaás mós bwámbwam, we-’ε ámpé étáŋgéné mós adǎh ké tómaa ngáne rídás mós. Etáŋgéné mós adǎh ngáne ntán áwón, édǎh-’ε mós néε awon mwányaŋ a Krísto.

¹⁷ Né-óó, nzé etédé me nǎngáne mod awé nyúmō nyébele nsón, étáŋgéné mós akob melem-lem nǎngáne wékobpé me.

¹⁸ Nzé édé nén bán abénlé we epané, ké’ε awánlé we alúm, né mǎsábē we.

¹⁹ Me Paale, mměn-εé ntelé nén ne échém ekáá. Mǎsábē we. Bon pen, weéchatán nén weé ábel áde míbélé bon ékud alongé dékóšlé, édé nǎngáne wémpé ewanlé me alúm.

²⁰ Né-óó, a-mwányaŋ, ncháa’ nén meé éwónŋen me á dín á Sáŋgú. Wógéd me menyiŋge á dín á Krísto.

²¹ Atel áde rítélé enén kálag ábélé nsumé nlém nén mée, wěbelé me kéchéé éche rílánjé we mée ébele me. Mbíí mée wěbēl-le ké tómaa ngáne ríhóbé mée ébel.

²² Dyam démpēe áde ríhóbé mée ríláa we ádíí nén mée, é nabned me toŋ áwoŋ ndáb áyāle ndúbpé nén mée Dyōb déwōg nyé mekáne, abídéd me á mbwōg, ntán nyé ámpē.

²³ Epafraŋe, awé súmō sēdé á mbwōg á dīn á Yesu Krīsto, mōmpē alómme nyé melentēn.

²⁴ Kóŋne Makōŋe, Aristakuse, Demase, ne Lukase ábe syáábō sēbele nsón bōmpē bélénté nyé.

²⁵ Nsimé míme Yesu Krīstāa níbê ne nyé moosyāál.

Kálag e Hibru Ndibned ní kálag

Mod awé atelé enén kálag antel chó áwéd bad bé Krísto nlém a abum áyál e metake níme bó donje á bad békúidé'áá adúbe áde béndübēē Yesue. Alúmté áte nén aá melé níme Yesue ápééné métómé melé níme mēnsēbē abé. Alúmté-é áte ámpē nén aá bééhüntē nlém nén bán Dyób déelónédte akag áde ábágé. A melé mé'só níme Dyób démwēē ne ábē bad mbwiined ne Mosē, beprise bóó bēbágé'áá Dyób mende á nló ní bad. Bon bōob, Yesue mó adé mod a tñté á bad ne Dyób abé-é prise ambaámbáa awe atómé bekal bé'dáádəŋ bé' bóód, atóm ángel, atóm-me kóəŋne Mosē, áyale eche yál chén chóó ámpéé nēe mende, ngen póg ne ngen ésyāál. Hóm áde ádíí Atómténé Asánj tómaa hóm áde beprise bé' bóód bēbágé'áá mende á nló ní bad, mende níme ábágé-é mékwógnédé.

Nkabtéd ní kálag

Krístəə mó alúmté bad ngáne Dyób ákóó abé 1.1-3

Krístəə atómé ángel 1.4-2.18

Krístəə atómé Mosē bó Josua 3.1-4.13

Krístəə adé prise awé atómé beprise bésyāál á mbyaa níme Levi 4.14-7.28

Melé níme Krístəə rítómé melé mé'só 8.1-9.28

Mende níme Krístəə ábágé rítómé mende níme beprise bēbágé'áá bóód 10.1-39

Adúbe atómé chóm ésyāál 11.1-12.29

Abé áde áwógte Dyób menyinge 13.1-19

Mekáne mé asóg 13.20-21

Melentən mé asóg 13.22-25

Dyób áhóbé wée bad mbwiined ne Mwān

¹ Se' bóód, Dyób dénhōb wée ábēd betaa, anláá bekal bé'dáádəŋ mam áláa bó. Anhōb áwāb ngen ne ngen, ábenléd-te menzii híin áhōb áwāb.

² Bon á e'pun bé asóg hén, áhōbe wée syánē, álanjē awe Mwān mam áláa syánē. Wée ane Mwān dōó Dyób ápóó bon áhagé' nkonj ní mín ne ní sé. Mō-áá Dyób átíídé aá mó awóó nhagtéđ rísyāál.

³ Ane mwān móó adé e'kin-áte bé ehúmé é Dyób, mó-áá alúmté syánē ngáne Dyób ákóó abé. Adíí melemlem nēe Dyób-pe ádíí. Ngíne e eyale é nsəl éché ane Mwān ebélé mekan mésyāál mékag á'só ngáne métánjéné abé. Ahúd áde áhúdé syánē á mbēb-te, abelé syánē moosyāál desáá. Ambíd e nē, andyēé Dyób á Ngum é ekáá é mbáá ádyōb.

Mwān a Dyób atómé ángel

⁴ Né-óó, Mwān a Dyób atómé ángel. Melemlem nē dōó đín áde Dyób áchágé mó aá, "Mwān" atómé đín adáb á "ángel."

⁵ Dyób dééhōbēē wée ángel ké póg mbéd aá,

"Edíí awem Mwān,

chii, ndíi sóó."

Dyób dééhōbē'áá wée ángel ké póg aá,

"Mēbē Sáá,

mō-é abé awem Mwān."

⁶ Bon Dyób ádēhōb aá mólōme' awe Mwān a'só á nkōŋsé-te, anhōb ámpē aá,

"Ángel éché m ésyāál étánjéné mó edúbé abé."

⁷ Anhōb tǎngene ángel pen aá,

"Abélé éche ángel édé nēe epub.

Eché Ángel éche édé ábē bembáledé,

abelé édíi nēe muú níme ríchodne'."

⁸ Bon Dyób dénhōb tǎngene Mwān aá,

"A-Dyōb,

wéekamlén á ngíndé ne á ngíndé.

Wéekamlén ábōŋ bad nyaa échē étánjéné.

⁹ Edəə mam níme métánjéné, ékōō-é mam níme méeboo.

Né-áá ákás bon Dyōb, ádonj Dyōb,

ápwwéd wē ábē etógnén tómaa baásyāál ábē nyáábōó nyédé,

ápwwéd-te wē ábē menyinge tómaa baásyāál ábē nyáábōó nyédé."

¹⁰ Dyōb áhóbé ámpē aá,

"A-Sánj wē-éé ehagé nkōŋsé se á mbooted,

nkonj ní mín-ne ndii abwóg áde éhágné échon ekáá.

¹¹ Abé bwēm é'syāāl bēpé á asóg, bonj we pen weébē abé ne abé.
Abé bwēm é'syāāl bémaá áse nēe mbóté.

¹² Weényag bó áte ngáne bényagēé mbóté,
weéhənjlən-ne bó áte ngáne béhənjlané mbóté.

Bonj we pen weébē ebé melemlem, áđonj alongé-é déewóngé asóg."

¹³ Dyób déeləngēē əngel ké póg mbéd aá,

"Dyēé me é ekáá émbáá hén
kóənj ne á pónde eche mébenlé

bonj ékəgtéd əbən bad bé ekəyí əmín ne mekuu."

¹⁴ Cheé-ə əngel éđíí? Éđíí e'dəəđənj əbē é'benle Dyób. Dyób əlόμε-é bó əwóngən bad əbe béküd e'soosonj.

2

¹ Né-əə ngáne débíí nímén mekan, detənjéné kéchéé éche déwógé nlém asum əyāl əbel bonj deépānē' nzii.

² Mekan níme Dyób dénlāā' é əngel əá əláa əbəd betaa ménwənj ngine. Bad bésyāāl əbe bənkənhíd nímé mekan, əbe bənkəmbəl-le ngáne nímé mekan méhóbé' áá, bənküd nkógsən níme bəntənjənné akud.

³ Chán-nə nyéwəmténé bán dehele debíd nímén nkógsən áte nzé deewənjne nkalənj ní bwám pónde? Mmē nkalənj mós-áa nípəene' enén ndín e e'soosonj. Səngú Yesue mwən mós asəbpé bad akale tənjene əbén e'soosonj. Bad əbe bənwəg-ke mam nímé ənhəbpē, bəmbəl syānē denyín nən bán méde mbále.

⁴ Dyób dómpe dénlūméd syānē áte nən aá nímé nkalənj níde mbále. Ambel nē əlumed áde əlúmté e'chemléd, mekan mé menyáké ne menyáké híin. Anlūméd nē əmpé ne mekan nímé bad bēbélé' áá á ngine e Edəəđənj éche Esáá éche Dyób dēmbēé bó. Dyób dēmbē bad Edəəđənj éche Esáá ngáne ébonjnéde mós.

Ane awē alyágte syānē akud e'soosonj

⁵ Saké əngel chəə Dyób əbānné aá ékəmlən nkənsé mékəəlé nímé séhóbéé bán mēpē.

⁶ Bonj étənlédé hóm əhóg á kəlag e Dyób pen nən bán,
"A-Dyób, cheé moononj əđíí awē éwənjné pónde?"

Cheé mwān a moononj əđíí éche ékəś bonj énoné mós?

⁷ Ayāl e esonj é pónde, wəmbəl enkəmpaa əngel. Wəmbané mós á atii dé ehúmé ne edúbé.

⁸ Wəmbē mós ngine əkəmlən chóm ésyāāl."

Abé adé ébágé mós ngine əkəmlən chóm ésyāāl, əlúmté' bán chómchóm éesaá éche éesē áse e nkəmlen nímé. Kénéé éđíí-áa nē, deenyínéé bəəb nən bán chóm ésyāāl éde áse eché.

⁹ Bonj denyine' ngáne Yesue əđíí. Ayāle esonj é pónde Dyób dēmbəl enkəmpaa əngel. Bəəb, Dyób əbágé mós ehúmé ne edúbé nēe kənj əyāle metake níme akúdé ne kwéed eche əwédé. Dyób əlúmté syānē nímé nsímé awē áde Yesue əwédé á nló ní bad bésyāāl.

¹⁰ Bwēm é'syāāl é'đíí é' Dyób, mós-áa anəne' bó. Ngáne éđíí nən bán Dyób əhede' áa bad híin békud etəl əbē əbe bán, békud-te ehúmé, émbē mbonj nən bán əbəl mod awē əsalé bó nzii akud metake. Nē débəl əkwognéd əbē mod awē əbəl bonj bad béküd e'soosonj.

¹¹ Yesue awē əbele' bonj bad bésənj, ne bad əbe bésáá, bó moosyāəl bédíí bán bé Sáá nhóg. Né-áa akəś bonj Yesue eekwágé' əchəg bó aá baányənj.

¹² Etənlédé nən bán anláá Dyób aá,

"Mēéłāā əbēm baányənj ngáne ədonj đín əpédé abé.

Mēkən we nzé syāəbəə səlādné hóm əhóg."

¹³ Anhób əmpē áá,

"Mēésūm nímēm nlém ne Dyób."

Anhób-pe əmpē áá,

"Mē nən, syāəbe bán əbe Dyób əbágé me."

¹⁴ Ngáne éđíí nən bán əbē bán bé Dyób bédíí baányənj əbe bəwóó ekob é yəl ne mekií, Yesue əmpē antéd yəl e moononj nēe bó. Ambel nē əbəl bonj kwéed eche ənwēē ébəded ngine eche Satane awē əbele' bonj bad bəwág.

¹⁵ Awē áde ənwēē əhúde bad á mehanj əbe bēmbē betənj á alongé ədāb əsyāāl əyāle mbwóg ní kwéed.

¹⁶ Enyinnédé bwám nən bán saké əngel ənhyéé awənjən. Bonj əmpē əwənjən bad bé mbyaa níme Abrahame.

¹⁷ Né-əə éhédnəđtáá nən bán Yesue əbē melemlem nēe baányənj á menzii mésyāāl əbel bonj əbē prise əmbáəmbáa awē awóó nlém ní ngəl, abé-é mod awē bēhele bésun nlém əyāl. Əbele áde əbenléé Dyób, əbélé Dyób əlagsən bad mbéb.

¹⁸ Ngáne édíí-'aá bán mwēn antāg, ákūd-te mekəgsen, awōngan bad nzé bédé á mekəgsen-tē.

3

Yesuε atómé Mosεε

¹ Né-ɔ́ a-baányan, nyé ábe Dyōb áchénlé ábē ábē bad, nyénəne' Yesuε. Mó adé mbapeε awē Dyōb álómé, abé-'ε Priεe ambáámháa á mekan níme sehóbé bán sédúbpe.

² Dyōb dēmpwεd mós, ábenlé-'ε Dyōb ne nlém nhóg melemlen ngáne Mosεε ábenlé-'áa Dyōb ne nlém nhóg á abum á ndáb á Dyōb.

³ Mod awē álóó ndáb, bébelé bébe mós edúbé tómaa ndáb eche álóó. Melemlen nē dós Yesuε ákwógnédé ákud edúbé eche étómé edúbé eche Mosεε.

⁴ Ndáb tée ewóó mod awē álóó chós. Boŋ Dyōb dós álóó chóm esyāāl.

⁵ Mosεε abédé mbalede á abum á ndáb á Dyōb, awē abénlé-'áa Dyōb ne nlém nhóg, álúmtē' bad mam á'só é' pónde níme Dyōb débenlé.

⁶ Yesu Krístəə pən abédéε Mwān a Dyōb, ákamlán-ne abum á ndáb á Dyōb ne nlém nhóg, Syánē ámpē dedíi bad bé abum á ndáb á Dyōb nzé édé nén bán dedé déchəgnédé, desumé-'ε nlém ne chóm eche débééné kúmbe, eche desumé-'ε nlém áyāl.

Elébé ne bad ábe béedúbpe

⁷ Né-ɔ́, nyéwóg chóm-εε Edəádəŋ eche Esáá éhóbé. Ehóbé áa,

“Chii nén nzé nyéwógé ehós é Dyōb,

⁸ nyéewúné' Dyōb nló áte ngáne ábən betaa bənwūənnē Dyōb nló áte á pónde echē bənkunnənnē Dyōb yāl.

Bənkunnén mós yāl

á pónde eche békágé mós é ehyánge.

⁹ A ehyánge wē, bənkəg me,

bényín-ne mam níme núbélé é etún é móom mé mwē méniiin.

¹⁰ Nē dós dēnkəŋ boŋ nílin ene nyonŋel e bad boŋ nhób mεé,

'Awab nlém-tē, bétamnad,

bééhíde-'áa nzii echēm.'

¹¹ Né-ɔ́, menlīŋ, mmwé-'ε melē mεé

'Béesónlé áwēm abwóg dé nkóme-áte mbéd.' ”

¹² A-baányan nyétéd pónde ábel nyé modmod nyéewóó nlém mé mbéb níme méedúbpe' Dyōb, ábel boŋ nyéetédé Dyōb áde áde á alongé.

¹³ Boŋ pən nyéwéde' nhóg ne aníníi nlém á abum epun tée, ngáne éché epun échəgnédé bán “Chii”, ábel boŋ mbéb méedogé nyé modmod áwūen Dyōb nló-áte.

¹⁴ Syáné dedíi mod nhóg ne Yesu Krístəə, nzése delyəgé dechəgnédé kásəŋ ne á asóg ne mekan níme desébpé adúbe tənŋene Dyōb.

¹⁵ Demaa anyín nén bán éténlédé á kálag e Dyōb nén bán,

“Nzé nyéwógé ehós é Dyōb,

nyéewúné' Dyōb nló áte

ngáne ábən betaa bənwūənnē Dyōb nló áte á pónde eche bənkunnənnē Dyōb yāl.”

¹⁶ Benzébadé bənwóg ehós é Dyōb boŋ bəkunnén Dyōb yāl? Abé bad bəsyāāl, saá bad ábe Mosεε ámbidənnē á Egipto bəbédé-yε?

¹⁷ Benzébadé Dyōb dēnliin-naa é etún e móom mé mwé méniiin? Saá bad ábe bəmbel mbéb bóo bənnaa ndim é ehyánge-yε?

¹⁸ Benzébadé Dyōb démwéε melē áa béesónlé áwe abwóg dé nkóme-áte mbéd? Saá bad ábe békəmbəl ngáne áhédé-'áa-yε?

¹⁹ Né-ɔ́, denyine' nén bán, bənkəhənle asól áyale bənkəndúbéε Dyōb.

4

Nkóme áte níme bad bé Dyōb bəkudté

¹ Ahób áde Dyōb dénhəbpé áa syáné dēsəl áwe abwóg dé nkóme-áte ádíi étyéémé. Né-ɔ́ déted pónde ábel boŋ nyé modmod eebós' asól áhed.

² Syáné ámpē dewógé nkalan ní bwám melemlen ngáne bómpé bənwógkē. Bənwóg nímé nkalan ní bwám boŋ ménkənwóŋgənnē bó ne awōngən dən áyale nén, bənkəndúbéε mós.

³ Bəəb-ɔ́ɔ́, syáné ábe dedúbpe nímé nkalan, desóle' áde abwóg dé nkóme-áte. Boŋ ne bad ábe béedúbpe pən, Dyōb dénhəb áa,

“Menlīŋ, mmwé-'ε melē nén mεé,

'Béesónlé áwēm abwóg dé nkóme áte mbéd.' ”

Anhób nê, kénéé édíí bán ammäd míme nsón amad se áde áhágé nkõñsé, abwóg dé nkóme áte dëmmäd-te abé.

⁴ Eténlédé á kálag e Dyöb tãngene epun éche élonóténé epun saámbé nén bán, “Dyöb dëmmäd míme nsón. Né-óó ankómé áte epun éche élonóténé epun saámbé.”

⁵ Eténlédé á kálag-té wê ámpé bán Dyöb áhóbé áa, “Béésónlé áwëm abwóg dé nkóme-áte mbéd.”

⁶ Né-óó, etál édíí ébágnédé donje á bad ásól á höm dé nkóme-áte. Bon bad ábe bënwoög nkalaní mí bwám se’ boód, békénhenlé ásól, áyále nén békëmbenlé mekan míme Dyöb dénlāá’ é bó aá bébel.

⁷ Nê dëmbël, Dyöb dëmpwéd epun émpée, áchäg-ke chó aá “Chii.” Anhób nê etún é pónidé ámbíd eché ábäd betaa békëmbenlé ngáne ánhöbpé aá bébel. Anhób nê mbwiined ne e’yale ábe Dabidé ábe mímáá nyé atele nén meé,

“Chii nzé nyéwógé ehób é Dyöb, nyéewúéné’ Dyöb nló-áte.”

⁸ Nzé émbë nén bán höm áde Josua ánkéénné bad dóó dënkõñ höm dé nkóme-áte abé, né ámbíd e pónidé Dyöb dënkënhöbpé tãngene epun émpée.

⁹ Né-óó höm dé nkóme-áte áde áde nêngáne nkóme-áte míme Dyöb dënkõmëé áte áde ámáá nkõñsé ahäg ályágé ásine ábë bad.

¹⁰ Kénzéé awé asólé á abwóg dé nkóme-áte á Dyöb, akómme áte áyále amadé míme nsón, melemlem ngáne Dyöb dënkõmëé áte áde ámáá nkõñsé ahäg.

¹¹ Né-óó syáné déwan áte désól áde abwóg dé nkóme-áte, ábel bon syáné modmod deebóó asól áhed. Deehidé’ mekuu míme bad ábe békëmbël ngáne Dyöb dénhöbpé.

¹² Debíí nén bán Eyale éche éhuú ne Dyöb, éde alongé, éde-é ngine. Ekóbpe’ tómaa páá e nsal míbe. Esóle’ mod áte káñ se á mbom ní ngob e yál ne edaádaj. Esóle-é mod káñ se á mebõñ mé yál ne á e’hid-té. Eché eyale écheme’ mewëmten mé mod ne kéchéé éche mod áhedéé ábel.

¹³ Á e’só é’ Dyöb, chõmchõm éesaá á e’kõñéd. Chõm ésyáal éde á tál e ékwéé. Dyöb dó-’aá détãngéné mekan mésyáal míme débéléé aláa.

Yesue adii ndále e prise ambaámáa

¹⁴ Né-óó, ngáne déwóó Prise Ambaámáa, Yesue Mwán a Dyöb, awé akíí ámín á’só é’ Dyöb, déchãñned adúbe áde désúme nlém áyál.

¹⁵ Ewsyáné Prise Ambaámáa asõnténé mechínzé míme, áyále nén mómpé anküd melemlem mé mekãgsen míme dékudéé á menzii mésyáal, bon kéné, enkëmbenlé mbéb.

¹⁶ Né-óó ne e’sum bé nlém désíde benben ne atii dé nkamlen á Dyöb áde ábage nsímé. Deewógé mbwóg ké nhóg. Débél nê ábel bon Dyöb áwóg syáné ngól, ábãg-ke syáné nsímé míme méwõngãñ syáné pónidé téé eche détõgnéné nwõngën.

5

¹ Prise ambaámáa téé awé Dyöb ápwéde átínté e bad, ápwéde mó ábele mó á dín áde ábë bad. Ane prise mó akobe’ mendé wéé bad bon ábagé mó wéé Dyöb néé nde ne mendé ábel bon Dyöb álagsen bad mbéb.

² Ahele bad yál acheden ábe bépane’ nzii áyále bébébíí’ é chõm éche bébéléé áyále nén mwën ámpé adii moonoyõñ awé awóó mechínzé mé ngob e yál.

³ Nê ábélé átãngéné néé ábageé mendé káñne áyál e míme mbéb mëñ, ábage-é áyále mbéb mí bad.

⁴ Modmod mwën eéhelëé-se ábe yál edubé é prise ambaámáa. Dyöb dóó ápwéde’ mod ábë prise, melemlem ngáne ámpwëdté Arõne.

⁵ Melemlem nê dó-’aá Krístã mwën énkënhágédte yál ábë prise ambaámáa. Dyöb dóó dëmpwëd mó. Dyöb dénlāá mó áa, “Edíí awem Mwán.

Chii ndíí Sóó.”

⁶ Nê áde á kálag e Dyöb höm dëmpée bán Dyöb dénlāá mó áa

“Wéébé prise ábe ne abé,
néé Melkizédege.”

⁷ Ade Yesue ábédé á nkõñsé, akánné’áa, ácháá Dyöb, áchyéé’ awé á ngine, mésäd mébíde’ mó á míd. Akánné’áa wéé mod awé ahele áson alongé áde. Dyöb dénwõg mó mekáne áyále anwõñ mbwóg ní Dyöb áte.

⁸ Kénéé ábédé Mwán a Dyöb, an’yágé áwõngën Dyöb mbwiined ne metake míme ánkudté.

⁹ Dyöb dëmbël ankwoñéd abé-é prise ambaámáa awé akwõgnédé, ábel bad ábe bëwõgne mó békud e’soosõñ ábe é’de á ngíndé ne á ngíndé.

¹⁰ Dyöb dëmbané mó á atii aá mó adé prise ambaámáa néé Melkizédege.

Elébé ábel mod eétedtē adúbe

¹¹ Nwóó mam hiin áhób tǎngene adén atón. Elénlé me áte ngáne mébenlé boŋ nyésóŋtén mós, áyale nén nyéewámsánné dyam asóŋtén.

¹² Nhóbe nén áyale nén nyéntǎngén bad abé boob ábe béyágte' bad bémpée. Boŋ nyédii nyéhédnad ámpé bán mod áyáged nyé mam níme nyémumáde abii tǎngene nkalaj ní Dyób. Nyédii nyéde néé bán bé nkáál ábe béhednad abii saké ndyéed.

¹³ Kénzée awé adii amwáa' abii, adii néé nkáál. Eébii' é mboŋ ne mbéb.

¹⁴ Ndyéed pen edii áyale bad ábe bémáá akwog. Mod ambáá adii mod awé ayággé, awé aménténé'-e mboŋ ne mbéb abii.

6

¹ Né-óó dékéene adúbe á'só nēngáne bad ábe bémáá dyam abii. Deetǎngeneé néé détédeé pónde ámpé áyáge mam níme bēn'yágēdtē syānē tǎngene Krístāe se á mbooted. Demmād ayáge, debii'-e nén bán bad bétǎngéné békúiné mbíd, bétēde ábel dé mekan mé mbéb níme mépene' kwéed. Demmād-te abii nén bán bétǎngéné Dyób adúbe,

² béyágte bad tǎngene edusen* ne tǎngene abán á bad mekáá á nló. Debii'-e nén bán bétǎngéné bad ayáged tǎngene mpuu ne tǎngene mbakú e nkáásé eché ēbē abé ne abé.

³ Deetēdtē nímmē mekan. Dékag á'só nzé Dyób ábágé etál.

⁴ Nhóbe nén áyale nzé bad bétēdtē ádab adúbe, mod eéhēlē-se ápēēn bó ámbíd ámpé, bétēde nímmē mbéb bétimēn Dyób. Nhóbe bad ábe bēnkūd e'nyínēn bé ekíde, bēwóglēn nnam ní Dyób, békūd-te Edāōdaj éche Esáá néé bad bémpée.

⁵ Bēwógléné e'boŋ bé eyale é Dyób, bēnyín-ne ngíne eché ēbē á pónde eche Dyób dékamlénné.

⁶ Nzé abé bad bémáá'-e nímmē mekan anyín boŋ bétimē bétēdtē ádab adúbe, mod eéhēlē-se ápēēn bó ámbíd ámpé átede mbéb áhíd Dyób. Abán áde bēbáá' é Mwán a Dyób áyāl, ébelé ébē byánán bēbomme' mós á awóg ámpé, bēkwágtē'-e mós á'só é' bad bémpée.

⁷ Ndóob eche mbúú éyággé achóoted boŋ mendib mészál áse, ebele bwēm é'kwog bwám. Abé bwēm é'belé é'wōngān bad ábe bēwéné bó. Nē álumte bán Dyób ánamte' ene ndóob.

⁸ Boŋ nzé ene ndóob ekwogte' mekód ne e'sum bé mbéb bémpée, né eésáá dyam de abelēn. Né kááj ne á asóg bēhyaād-te chó.

⁹ A-baányaj, kénēe nílǎngéé nyé nén, ndúbpe nén meé nyébele' mekan nyaa eche nyékudté mekan mé bwám mé e'soosoj.

¹⁰ Dyób ábele' nímmē mekan nyaa eché etǎngéné. Eéchatánné nsón ké nhóg níme mod ábélé, échatán-naa edǎnge éche mod álumté mó ngáne nyédii nyébenléé bad bé Dyób bémpée.

¹¹ Mmēd nlém nídii nén bán nyé mod téé nyébé nyéwōŋ ene kán kááj ne á asóg ábel boŋ nyékude' chóm ésyāal éche nyésúmé nlém áyāl bán Dyób débe nyé.

¹² Séehēdēē bán nyébé bad ábe bēehédé chómchóm abel. Boŋ séhede' bán nyébé bad ábe bēhíde' mekuu níme bad ábe bēwēsan áyale bédúbpé Dyób. Eché ndín é bad ékūd chóm ésyāal éche Dyób áhóbé áá mósóbe bó.

Dyam áde Dyób áhóbé déehidtéé áse

¹³ Se' boód áde Dyób dénhōbpé áá mósóbelé Abrahame dyam, ammwé melé áá móǎngēné áde akag alóned. Áde dīn dēn dōó ámmwēēnné melé áyale nén modmod eebédeé awé atómé mó awé áhélé'áá-se amwé melé áwe dīn.

¹⁴ Anhób áá,

"Nhóbe nén meé, ntǎngéné we anamed, mēbēl-le nímmōŋ mbyaa níbūú áte bwámbwam."

¹⁵ Abrahame anwesén ásūm-me nlém, né-óó ankūd chóm éche Dyób dēmbēēnné mó akag.

¹⁶ Nzé mod amwág melé abenlad dīn áde mod awé atómé mó. Mpentēn ké níhéé'-e nímmē bad bēwóó' é, melé móó méyánle'.

¹⁷ Dyób áhédé'áá abé bad ábe ámbéé akag alúmed áte nén áá, mósóhúdtē dyam áde mósóbe áse. Né-óó amwé melé ásógtēn akag áde ábágé.

¹⁸ Né-óó Dyób ábágé syānē mekan mébe nímmē méehəŋlán áyale Dyób déehelēé-se ákal metóm. Abagé syānē akag, amwé'-e melé. Abelé nē ábel syānē awé dekií awé ábel ákəə syānē, déwōŋ e'wéd bé nlém, désum-me nlém ne mekan níme áhóbé áá mósóbe syānē.

¹⁹ Abé e'lyág bé nlém é'dii néé chóm éche ébélé alongé ádēd ásúmméde, akonéd-te. Ebé e'lyág bé nlém bóó békāŋ boŋ detóm abad dé mmwe ámin, dépe á abwóg á hóm áde ásáá wéé Dyób adii.

* **6:2 Edusen:** eché edusen énkēmbáá edusen eché bédúsánná bad ábe bédúbpé Krístāe bēnpen. Bad bé Israel bómpé bēnwōŋ elem éche bédúsánná bad, bédúsán-ne bwēm bémpée.

²⁰ Yesue mó asébpé asól áhed á nló níme syánē áboṅsen syánē e'di. Bəob atimé prise ambáábáa awēd awē adé á ngíndé melemlem néē Melkizēdege.

7

Melkizēdege abédé Prise

¹ Melkizēdege abédé kâṅ e dyad á Salem, abé-'e prise a Dyöb á Ngum. Ambomén Abrahamé áde Abrahamé áhúe'é á bel ábe ánwū'ú' kâṅ é bad, ánaméd-te Abrahamé.

² Abrahamé-'e ábe mó akab á bwēm ahóg áfínté mekab mé bwēm dyóm níme ánhūēnné á bel. Dyam dé'só, dín á Melkizēdege á ehób é Hibru ádíi bán, "Kâṅ eche ebele mam níme rítáṅgéné." Atón áde álónténé mébe ádíi bán "Kâṅ e Salem," awē adé "Kâṅ e nsaṅ."

³ Eetenléé hómhóm nén bán Melkizēdege anwój sáá, ké'e mbyaa. Béetele-'áa ngáne béchyáá mó, ké'e ngáne áwédé. Adii prise á ngíndé ne á ngíndé melemlem néē Mwán a Moonyon ádíi Prise á ngíndé ne á ngíndé.

⁴ Nyénəne-óó nyaa e ndale e mod eché Melkizēdege abédé. Abrahamé, sáá ambáá awēd, ambé mó akab ahóg áfínté e mekab mé bwēm dyóm níme ánhūēnné á bel.

⁵ Mbéndé e Mosé ebagé kunze nén bán bad bé mbyaa níme Levi ábe bédé beprise békobe' akab á bwēm ahóg áfínté e mekab dyóm téé, wée ábáb bad bé Israel, kénéé émbēē bán bómpe bédéé mbyaa níme Abrahamé.

⁶ Melkizēdege enkémbídté á mbyaa níme Levi, boṅ kénê ankób akab á bwēm ahóg áfínté e mekab dyóm wée Abrahamé. Annaméd-te Abrahamé, Abrahamé awē Dyöb démmdaté akag ábe.

⁷ Ebyééné nén bán mod awē anamte' mod atómé mod awē ánámte.

⁸ Bəob-pəó, prise éche ébíde á mbyaa níme Levi ábe békobe' akab ahóg áfínté e mekab mé bwēm dyóm, bésyāal bédii baányon ábe béwág. Boṅ Melkizēdege awē ankób akab ahóg áfínté e mekab dyóm, adii mod awē eewéde, ngáne kálag e Dyöb élúmtéé.

⁹ Dehele dehób bán Levi awé akobé'áá mekab wée bad mwēn ámpé abagé akab wée Melkizēdege mbwiinede ne sáá ambáá Abrahamé.

¹⁰ Dehele dehób nē áyāle nén, áde Melkizēdege ákíí Abrahamé abomen, né bééchyā'á' Levi.

¹¹ Dyöb démbē bad bé Israel éche mbéndé á pónde eché bad bé túmbé e Levi bédéde beprise á alonj á Israel. Nzé nsón níme ábē beprise bēbélé'áá ménkwognéd ábel bad békobned á'só é' Dyöb, né nzom enkémbáá eché prise ampée ábídeé néē Melkizēdege awé eebíde á mbyaa níme Arəne.* ¹² Nzé mpwədtéd mé beprise nḥāṅléné túmbé, né mbéndé chómpé etāṅgéné ahəṅlen.

¹³ Mod awé nḥóbéé nímén mekan áyā, ambíd á túmbé empée. Modmod eébidé-'áá awe túmbé mbéd awé abelé nsón níme prise.

¹⁴ Ebyééné bwám nén bán Səngwéé awēd ambíd á túmbé e Juda. Moséé enkéntúbpé dín nén áá beprise bēbíd á túmbé e Juda.

Yesue adii néē Melkizēdege

¹⁵ Dyam áde déhóbé təṅgəne ahəṅlen á mbéndé ábúdé anyínned ne abíd áde prise ampée ábíde néē Melkizēdege.

¹⁶ Saké mbéndé é baányon chóó émbēl boṅ abé prise. Boṅ adé prise áyāle awóó ngíne ábē á alonjé abé ne abé.

¹⁷ Eténléde á kálag e Dyöb nén bán,
"Edii prise á ngíndé ne á ngíndé,
melemlem néē Melkizēdege."

¹⁸ Nzé denəné ped póg, Dyöb ásidté mbéndé é' bəóó á nkəg, áyāle énkənwú'ú' áte, énkənwógnéd-taá.

¹⁹ Debíí nén bán mbéndé eebēlē-se chómchóm ébē ngáne étāṅgéné abé. Nzé denəné-'e ped enínií, chóm é bwám épédé eché ékáá boṅ dewonj e'lyág bé nlém. Chó-'áá épəne syánē benben ne Dyöb.

²⁰ Dyam démpəe áde débíí ádíi nén, Dyöb démwē melē áá Krístəə ábē prise abé ne abé. Boṅ áde bəmpwədté beprise bəmpəe, Dyöb dénkəmmwáá melē ké nhóg.

²¹ Boṅ áde Dyöb ápwéde Yesue prise, anhób áá,
"Səngwéé amwéde melē,
éehúd-taá nímé melē ásé,

áá,
'Edii prise á ngíndé ne á ngíndé.' "

²² Mmé melē mélúmté nén bán Yesue mó adé e'chemléd ábē é'lúmté syánē nén bán melē níme Dyöb ámwéde méehídtéé áse.

* **7:11 Arəne:** Arəne ambíd á túmbé e Levi. Mó abédé prise ambáábáa e'só e bad bé Israel.

²³ Beprise bé' boód bēmbuú áte áyāle nēn kwééd ebēlé'áá béehēle'áá nsón akēen á'sō.

²⁴ Boŋ ngāne Yesue ádíí á alongé abé ne abé, ábē prise á ngíndé ne á ngíndé.

²⁵ Né-ṣó, Yesue akwōgnédé áson alongé á bad ábe bēpag wéé Dyōb áwe mbíd. Akwōgnédé áson bó ne ason ásyāāl áyāle nēn, adé á alongé pónédé ésyāāl ákánndé bó.

²⁶ Ehédnádátáá nēn bán déwōŋ ene ndín e prise ambáámbáa awé asáá, mod eéhēlēē se ahób mō awusé ké hóg áyāl, eewóó'é atón á mbinde ké hóg á yāl, awé apágnédé bad bé mbéb áyāl, bēbanē-'e mō amín e atii dé nkamlen ámbáa.

²⁷ Eesaá nēe beprise ábiníí ábe bētāngéné bēbage mende epun-té. Abē beprise bésēbpe mende abe áyāle nímab mbéb, boŋ bēbagé mende áyāle mbéb m bad bēmpēe. Boŋ Yesue ambe yāl nēe mende áyāle mbéb m bad. Ambēl-le nē ngen póg ne ngen ésyāāl.

²⁸ Mbéndé epwede baányon ábē beprise bēmbáámbáa. Baányon bēbele' mewusé. Boŋ Dyōb dēmpwēd awe Mwān ne melē áde ámáá mbéndé abe. Abelé-'e ane Mwān akōbnédé á ngíndé ne á ngíndé.

8

*Yesue mō adé syānē prise
ambáámbáa a melē mékōālē*

¹ Atón áde sékoo'é ahób ádíí nēn; dewóó ene ndín e prise ambáámbáa awé adyēé é ekáá émbáá é atii dé nkamlen á Dyōb á Ngum amín.

² Abenle' Dyōb wéé bwēm ábē é'sáá é'díí á hóm áde ákóó ebem é Dyōb abé. Sāŋ Dyōbe mwēm mōó alóó échē ebem, saké baányon.

³ Bēpwede prise ambáámbáa téé ábe Dyōb nde ne mende mé elém. Né-ṣó, anén prise ambáámbáa mómpe atāngéné chōm awōŋ éche ábēé Dyōb.

⁴ Boob-póó, nzé émbē nēn bán ambé á nkōŋsé, né éebáá prise ne abé dēn, áyāle nēn beprise bédé ábe bēbage Dyōb mende ngāne mbéndé éhedeé.

⁵ Nsón níme ábē beprise bēbeleé rídii nēe e'chemléd ne ediidinge é' mekan níme médé ádyōb. Debíí nē áyāle nēn, áde Mosēe áhóbé áá mólōo' ebem é Dyōb, Dyōb dēnsim mō etúu áte áá, "Nyín nēn wéé mólōo chōm ésyāāl á yāl e échē ebem nyaa e nlóŋtéd eche rílúmté wē á mbōod mīn." ⁶ Boŋ boob, nsón níme prise níme bēbagé Yesue rítómé nsón níme ábē beprise bé' boód. Melemlem nē dōo nchemten níme Yesue ápééné áfínté e Dyōb ne ábē bad, rítómé nchemten mé'sō níme bēmpēnné, áyāle nēn, Dyōb ábágé bad akag áá mōsbē bó bwēm é' bwām.

⁷ Nzé émbē nēn bán melē mé'sō mēnkwognéd ábel bad bēkobned á'sō é' Dyōb, melē mémpēe méehēdnad-taá.

⁸ Boŋ Dyōb dénnýín awusé ne ábē bad, anhób-pe áá,

"Me Sāŋgwéé nhōbe' nēn mēe e'pun é' bín é'húe

áde mémwēē melē mékōālē

ne bad bé Israel

ne bad bé Juda.

⁹ Mmē melē méebáá nēe melē

níme mémwēē

ne ábāb betaa

áde ríchāngé bó á ekáá

boŋ mbídén bó á alon á Egipto.

Bēnkēhídte nímē melē.

Né-ṣó, menhúd bó díd áyāl.

¹⁰ Dyōb áhóbé ámpē áá,

Me Sāŋgwéé me-éé nhōbe'.

Boob-póó melē níme mémwēē ne bad bé Israel

á pónédé échē ehúe' á'sō médii nēn:

Mābēl bēbíí échēm mbéndé,

béwōŋ-'e nlém áhíd chō.

Mēbē ádab Dyōb,

bó-'e bēbē ábēm bad.

¹¹ Bó modmod éeyágédte waáb,

modmod éeláá-'áá mwānyan nēn áá ábii Dyōb,

áyāle bó moosyāāl bēbíí me,

bootya bésad, kōōŋ ne bēmbáá.

¹² Mēélagсэн nímab mbéb,

méekamtén-naá nímab mewusé."

¹³ Ahóḅ áde Dyöb áhóḅéé tãngene melë mékããlë, álúmte' nën bán abelé melë mé nchun rítómé pónde. Chóm kéhéé éche étóme pónde, éche échune'-e, mwãmpin ní pónde éebáá ámpë ne abé ðën.

9

*Abële á Dyöb dé ekob é yäl
ne abele á Dyöb dé Edáádãḅ*

¹ Βαῶβ-ρῶῶ, káãḅ ne melë mé'sõ ménwõḅ mbéndé éche béhídé'áá abele Dyöb, bénwõḅ-ge abwõg á hõm á nkõḅsé wéë bébénlé'áá Dyöb.

² Bénlõḅ ebem éche énwõḅ tonj ébe. Tonj echë embé á'sõ béchágé'áá chõ bán Hõm áde Asáá. Atii dé etrukãḅ ábédé áwëd-te, tébelë abé, ne ewele éche bébágé Dyöb mende.

³ Abad démbë áde ákábé tonj e'sõ ne tonj embíd áte. Ene tonj eche ebédé ámbíd e abad béchágé'áá chõ bán Hõm áde Atómténé Asãḅ.

⁴ A tonj-tê wê, menyán níme bébénlé gól níme béhyãnté'áá e'twé ámín abe Dyöb edúbé mébédé áhed. Ntyág níme béchágé'áá bán ntyág mé melë mómpë míbédé áhed. Mímé ntyág bénkütën mós pëd ésyãäl ne gól. A ntyág-te wê, apom á gól áde ábédé mána áte abédé áwëd-te. Ntõḅ níme Arõne níme ménkãg byaá, míbédé áwëd-te. E'pëd é' meláá é'be abe bëntenlé mbéndé áyäl bómpë é'bédé áwëd-te.

⁵ A ntyág mìn wê, bwëm é'bédé é'be, abe bébálé á nwágén ní ángel, abe é'lúmte'áá ehúmé é Dyöb. Mepab níme abé bwëm ménkütën ebéd é ntyág wéë ábédé hõm dé alagsen dé mbéb. Boḅ abé bwëm é'syãäl deéhélëë-se dékonj bó ahób βαῶβ.

⁶ Bémaá'áá chõm ésyãäl anabe boḅ, beprise bésole á tonj é'sõ epun-té bébelé' nímab nsõn.

⁷ Boḅ prise Ambáábmbá mwëmpen mó asóle á tonj eché edé áte. Asóle áhed mwë-té ngen póg. Eesóléé mbéd áde éewanléé mekií mé nyam abe Dyöb mende áyäl e mbéb nímë ne ní bad bémpëe, níme bébelé ésebán bebíi bán bébélé mbéb.

⁸ Edáádãḅ éche Esáá ébele nímén mam álúmed syãñé áte nën aá, abenled áde dédíi débénladté ebem é nkõḅsé, ábélé nzii eesáá syãñé ápe á Ebem éche Esáá wéë Dyöb ádíi.

⁹ Echë ebem élúmte mekan níme mébenlad chii. Elúmte syãñé nën bán nde ne mende mé nyam níme bad bébágé'áá Dyöb, méehelëé-se mébel nlém níme mod awë abage mende se níkélé á abum.

¹⁰ Mmén mbeltéd nisyãäl níõne' dáso adyé á ndyééd, amwé á mím ne nyaa é mekan émpëe hiin échë bad bébélé'áá ásaád yäl. Mímé mbeltéd nídíi mbéndé e ekob é yäl ngën, éche émaá á pónde eche Dyöb dénabéé mam mésyãäl.

Mekií níme Yesue móo méde nde echë esáá

¹¹ Krístæ amaá ape. Móo adé Prise Ambáábmbá a mekan mé bwãm níme mémáá ape. Abele níme nsõn á ebem éche étómé ebem é nkõḅsé, élón-ne mbom tómaa ebem é nkõḅsé. Saké baányõḅ bélóó échë ebem. Eesáá ebem éche edé á nkõḅsé.

¹² Ade Yesue ásólé á ebem-tê wê, ansól adé Hõm áde Atómténé Asãḅ ngen póg ne ngen ésyãäl. Saké mekií mé mbód ne mé nyag ánkéénné áwëd-te abe mende. Boḅ mímé mekií mén móo ántédte. Ambenléd mó ákõde syãñé á mbéb-te ábel débê á alõngé á ngíndé ne á ngíndé.

¹³ Ngen e'sõ, bétédé'áá mekií mé mbód ne mé nyag, bétéd-te mbúbú é etum é nyag éche béhyãnté, bémwagtáád bad á yäl abe béesáá á'sõ é' Dyöb, ábel bésãḅ.

¹⁴ Nzé edé nën bán mekií mé nyam méhele méwõḅ ngine bwãmbwam, eche ehële esáád bad. Abagé eche yäl eche eewóo mbéb ké nhóg nëe mende, ákõde syãñé moosyãäl. Ambel nën á ngine e Edáádãḅ éche Esáá éche edé á ngíndé ne á ngíndé. Mímé mekií móo mésãḅte syãñé nlém á abum ábel nën deébëlé mekan mé mbéb níme mépiinéd syãñé kwééd. Boḅ pën detãḅngéné Dyöb dé alõngé abele.

¹⁵ Né-'áá ákásá boḅ Krístæ abé mod atínté a melë mékããlë ábel nën bad abe Dyöb ápwédé békud nnam níme mébë abé ne abé. Mímé nnam móo Dyöb áhóḅé aá mósbë abe bad. Kwééd echë Krístæ áwédé chõ ekaá boḅ nën ábenlad. Eche kwééd ekódté bad ásë e mbéb níme bëmbenlé áde melë mé nchun médíi mékámlánnáá bó.

¹⁶ Βαῶβ-ρῶῶ, melë médíi nëe nlyáge. Pónde ké ehéé áde mod alyágkëé, étãḅngéné alúmed nën bán mod awë abele nímé nlyáge amaá awë boḅ béhídé chõm éche ályágkëé.

¹⁷ Nën áde áyãle nën, á pónde echë mod áwédé dóo níme nlyáge níbãgkë ngine. Méebãgkë ngine á pónde eche mod awe abelé nímé nlyáge ádíi adé á alõngé.

¹⁸ Nê dóo ákásá boḅ ké melë mé'sõ níme Dyöb démmwëë ne baányõḅ ménkênwõḅ ngine ésebán mekií mésyãgkë.

¹⁹ Se' bóód, Moseë anláá bad mbéndé ésyãäl éche Dyöb dénhõbpë aá bad béhíd. Ade ámaá bó aláa, antéd mekií mé nyag ne mé mbód, ákumtén ne mendíi. Ambenléd ngen e bwel é'

hísob ne nyoŋ é mbód éche éyáge', ámwagtéd nímé mekií á kálag eche mbéndé ébédé áte, ámwagtéd-te bad á yál.

²⁰ Ade amáá nímé mekií amwagted, anhób aá, "Mmén mekií mós melúmte' nén bán melé mé Dyób méehañláníné."

²¹ Melemlem nê dós Moséé ámmwagtédte nímé mekií ámín e ebem é mende, ne ámín e bwém é'syāāl ábe bebénládtáá ábe mende.

²² A mbále, émbē nén bán á mbéndé, chōm ké éhéé éche bémwágtédé mekií áyāl chō bad bétédé'áá bán ésáá. Mbéb-pe méewóó' é alagsen ésebán mekií mésyógk.

Krístæ eche yāl eché abágé

née nde chōo ehúde mbéb

²³ Né-óó, nén dós dēnkāñ boŋ ebem é nkōŋsé né bwēm é'syāāl ábe é'dé áwēd-te bésāntē bō ne mekií mé e'lém. Abé bwēm é'syāāl é'bédéé nwágēn mé mekan níme médé ámín níme mékōŋtē abé. Boŋ ábē bwēm ábe é'dé ámín, bēntāŋgēn née bésāntēé bō ne mekií níme métóomé mekií mé e'lém.

²⁴ Krístæ enkēnsnlé Hōm áde Asáá áde baányoŋ bóbó bebéle, áde áde á nwágēn á hōm áde ákōŋtē abé. Adyōb dēn dós ānkéé asól. Anké-'e áwēd nēŋgāne mod awé ahóbpe' syāné wēé Dyōb.

²⁵ Enkēnkāá-'aá áwēd ábe yāl née mende ngen ne ngen. Enkēnkāa nēŋgāne prise ambáambáa ákagké mwē téé á Hōm áde Atómténé Asāñ ábe mende mé mekií mé elém.

²⁶ Nzé née émbē, né Krístæ antāŋgēn née átagéé ngen ne ngen taase nkōŋsé mbootad. Boŋ chō-'e énkēmbáá nē. Krístæ ampē ngen póg ne ngen ésyāāl bōob áde nkōŋsé ríkagké ape á asóg. Ambé eche yāl nēŋgāne mende áhúd mbéb mí baasyāāl.

²⁷ Nē dós moonyoŋ asyāāl átāŋgēné awé ngen póg, boŋ ámbíd e pónde ákud nkáásé rí Dyōb.

²⁸ Melemlem nê dós Krístæ abágé eche yāl ngen póg ne ngen ésyāāl áhúd mbéb mí bad híin. Apé-'e ngen éche élónténé ébe, saké áhúd mbéb mí bad, boŋ apé ásoŋ alongé á bad ábe bésine mós.

10

Krístæ abágé eche yāl

ngen póg ne ngen ésyāāl

¹ Mbéndé éche Dyōb dēmbéé bad bé Israel ébédéé ngēn nēŋgāne nwágēn mé mekan mé bwám níme méhúé' á'sō. Eché mbéndé éehelée-se ékoŋ syāné alúmed ngāne nímé mekan mébē. Beprise bebage' Dyōb mende abe ne abe, mwē ne mwē-té. Chán-nō éché ndín é mbéndé éche bebageé éché ndín e mende éhele ébēl bad ábe bédé benben ne Dyōb bésāñ? Eheléé.

² Nzé émbē nén bán behéle'áá, né bēnkēnsógkē Dyōb mende abe-ye? Né bēnsóg áyāle nén né bad ábe bebage Dyōb mende bésáá'áá ngen póg ne ngen ésyāāl, né béetage'aa-'e áte bán bebéle mbéb.

³ Boŋ nímé mende mēn-éé métimé mékamtan bad mwē ne mwē téé nén bán bebéle mbéb,

⁴ áyāle nén mekií mé nyag ne mé mbód méehelée se méhúd mbéb mí bad mbéd.

⁵ Nén dō-'aá dēnkāñ boŋ áde Krístæ apédé á nkōŋsé-te aláá Dyōb aá,

"Saké mende ne nde éhedéé.

Ebōŋséné me yāl e moonyoŋ eché mébéé we née mende.

⁶ E'lém ábe behyānté á menyán,

mende-'e ampē níme bad bebageé we áhúd mbéb mí bad,

béewōgtēē we menyinge.

⁷ Dō-'aá ríhóbeé méé,

'Me nén A-Sāñ,

mbōŋséné ábel ngāne éhedéé

melemlem ngāne éténlédé áyāl echēm á kálag echōŋ.' "

⁸ Ansébe ahób aá, "Saké mende ne nde éhedéé saá-kaá e'lém ábe behyānté á menyán áhúd mbéb mí bad é'wógte we menyinge" kénéé edíí nén bán bad bebéle'áá nímén mekan ngāne mbéndé e Moséé éhedéé.

⁹ Ambé ambád aá, "Me nén A-Sāñ, mbōŋséné ábel ngāne éhedéé." Né-óó, Dyōb ásidté mende mé' bōsd á nkag ábel boŋ átime mende níme Krístæ.

¹⁰ Akwēntēn áde Yesu Krístæ ákwēnténé ábel ngāne Dyōb áhedéé boŋ ábe eche yāl nēŋgāne mende, ábélé syāné desáá á'sō é' Dyōb ngen póg ne ngen ésyāāl.

¹¹ Nsón níme beprise bé Israel rídii átyéem ábe Dyōb mende mehóg ne mehóg epun téé. Mmén mende mō-'e méehelée se méhúd mbéb mí bad mbéd.

¹² Boŋ Krístæ pen abágé mende mehóg níme méwóó ngīne áhúd mbéb mí bad ngen póg ne ngen ésyāāl. Ámbíd ené, andyéé Dyōb á ekáá émbáa.

¹³ Ahed-taá ádyéé ásin pónde eché Dyöb débenlé bon ákəgtéd ábē bad bé ekəyi ámin ne mekuu.

¹⁴ Ayāle mendε mehóg mwəmpen níme ábágé, abelé bad ábe áhúdé nímab mbéb básáa nyaa eche elóné mbon.

¹⁵ Edəádəŋ éche Esáá chəmpē éluťmté syánē áte nēn bán nē ádé mbále. Enhəb aá,

¹⁶ “Səngwéé ahóbé aá

‘Mmēn melē móo syáábəo sémwēē

á pónde eché ehúe’ á’sō.

Mēbēl bēbíí échēn mbéndé,

míbel-le ngáne bēechatēnné chō mbéd.’ ”

¹⁷ Anhób ámpē aá,

“Méekamtén-naá mbéb

ne mewusé nímab ámpē.”

¹⁸ Dyöb ámáá bad mbéb alagsen. Mendε ké mehóg méesaá ámpē níme bad bétəŋgéné abe ákud alagsen dé mbéb.

Syánē dépe benben ne Dyöb

¹⁹ Né-ə, a-baanyaŋ dewóo kunze ásol ádé abwóg á Höm áde Atóťméné Asán.

²⁰ Yesue adlbnédé syánē nzii e ekóólé eché epeene’ alongé abe áde ábágé eche yəl. Eche yəl edé nēŋgáne abad áde dénkəŋ syánē əpe wéé Dyöb ádíí.

²¹ Syánē dewóo ndale e prisε awé anone’ bad bé Ndáb e Dyöb.

²² Né-ə, syánē déside benben ne Dyöb ne nlém nhóg, désum-me nlém nisyāal áwē. Nēn ádé áyāle mekií níme Yesue ásyógé á awəg, mébélé nlém níknlé syánē á abum, awóbpé-ε syánē ne mendíb níme méśáá áte.

²³ Déwéd adúbe áde dédúbpé achəŋned, désum-me nlém áhed, áyāle dedúbpé nēn bán Dyöb áde ábele dyam áde áhóbé aá mósbēl, éche ehəb ééhūnēē á ndəəb.

²⁴ Dənəŋ ngáne déhele dewéd nhóg ne aníníí nlém á abum, ábel dédəəŋ débele-ε mekan mé bwám.

²⁵ Deebág bán deebómēē pónde ésyāal ngáne donge á bad bēbeléé. Bon pen débē déwéde’ nhóg ne aníníí nlém á abum, tanje bəəb áde nyényínéé bán Epun éche Səngwéé əpéé édé benben.

²⁶ Nzé dedíí deko’ mekan mé mbéb abel áde démáá mbále abii, né mendε ké mehóg méesaá ámpē níme méhūd nímé mbéb.

²⁷ Bon nzé mod adíí akoo’ mbéb abel, né mbwóg móo mébē mó áte nēn aá Dyöb dékwid mó nkáá é Epun é Nkáásé. Béhyáad mó á ebonde é muú é ngine éché éhyáad bad ábe bétəŋgan Dyöb.

²⁸ Kénzéé awé eehídé’ mbéndé eche Mosεε, bon bad bēbe ké’ élááán bēbíí mbóŋ nēn bán eehídéé mbéndé, bēbelé bēwúú mó, bēəwəgēē-ε mó ngol.

²⁹ Nzé mod-te eetéde Mwán a Dyöb nēe dyam, eetéde mekií mé melē mé Dyöb níme mébélé bon asán née dyam, ásyāā-ε kəəŋne Edəádəŋ eche epeene nsimé, né chán nkógsen níme ene ndín e mod níhele mbéé?

³⁰ Debíí mod awé anhób aá, “Mékəgsen bad. Mēťimťen bó áyāle mbéb níme bēbélé.” Anhób-pe ámpē aá, “Səngwéé ákəəd ábē bad.”

³¹ Edé ebéťtéd ne kénzéé awé ahúné á mekáá mé Dyöb dé alongé ákud nkógsen.

³² Bon nyéechatán ngáne nyēmbēē-se á mbooted áde nyékúdé e’nyinen bé ekide. Ene pónde, kénéε nyēnkudté metake mé ngine, nyēnkan nlém.

³³ Pónde ebédé eché bad bəwógté’ áá nyé e’són á’sō é’ bad, bétagté-ε nyé. Donge á pónde ámpē nyébágé’ áá ne bad ábe békúdé éché ndín é metake.

³⁴ Nyēwənnádtáá bad ábe bémbe á mbwəg. Ké áde bēndummé nyé bwēm, nyēmbé nyébé menyinje, áyāle nyēmbíí nēn bán nyēwóo bwēm ábe é’tómé nē ábe bēbē abé ne abé.

³⁵ Né-ə, nyébē nyéwéd nlém á abum, áyāle nēn Dyöb ábage nyé nsábe níme níchábé ámin.

³⁶ Nyétəŋgéné awesen ábel nēn nyébel ngáne Dyöb áhedéé, nyékud-te chōm éche Dyöb áhóbé aá mósbē nyé.

³⁷ Eténléde á kálag e Dyöb nēn bán,

“Mwəmpín ní pónde,

mod awé atəŋgéné əpe, əpē,

éebébed-taá pónde.

³⁸ Abēm bad ábe bēbele mekan níme métəŋgéné

bēbe á alongé áyāle bédúbpé abēm e’yale.

Bon pen kénzéé awé atímné mbíd,

méewógēnné mó menyinje.”

³⁹ Syánē pen deesaa nyaa é bad éche étimén mbíd ébós'-é. Dedii bad ábe bédúbpé Dyòb, békúdé-é e'soosoj.

11

Adúbe

¹ Adúbe ádíi áwónj nlém wée mósókúd chóm éche mósúmé nlém áyál. Amad nén wée chóm éche mósónyinnē díd ékóó abé.

² Adúbe áde bad bé' bósód béndúbēē Dyòb dósó dēnkāj boj Dyòb ábéén bó menyinge.

³ Adúbe dósó ákásá boj desójtén nén bán eyale é nsal chósó Dyòb áhágne nkòjsé. Né-ósó, bwēm ábe dényinnē díd é' húú ne chóm éche dényinnē díd.

⁴ Adúbe dósó dēnkāj boj Abele ábe Dyòb mende mé bwám míme méntòm míme Keene ámbéé Dyòb. Adé adúbe dósó dēmbēl boj Dyòb ábéén mó menyinge nēe mod awé abele mekan míme métāngéné. Nén dényinnē ne akob áde Dyòb dēnkobpé mende míme Abele. Adúbe dósó-áá ákásá boj, kénēe ámáá awé, abé álāngē bad mam.

⁵ Adúbe áde Enoge dósó dēnkāj boj eenyinne' kwééd díd. Boj pen Dyòb dēnkēén mó ámín, bēnkēnyín-naa mó ámpē. Eténlédé nén bán, byánán Dyòb dékéén mó ámín, abelé'áá mekan míme méwógté'áá Dyòb menyinge.

⁶ Modmod eehāēē-se awógéd Dyòb menyinge áde éedúbpeé Dyòb. Nén áde áyāle kénzéé awé ahede ape benben ne Dyòb, atāngéné adúbe nén áá Dyòb áde, adúbe-é áá Dyòb désaabe bad ábe béhede mó abii.

⁷ Adúbe dósó dēnkāj boj Noa awógén Dyòb áde Dyòb dénlāā' é mó mam míme mébenléd á'só é' pónde. Kénēe édíi bán pónde eched enkényinnēe míme mekan díd, ambēl ngáne Dyòb dénlāā' é mó. Anlónj bōle é'mbáámáá. Awēd-te dósó bósobe áde abum á ndáb bēnsōnlé békúd-te e'soosoj áde mendib ménlōnnē nkòjsé áte rísyāal boj chóm ésyāal éhó. Abel áde Noa ámbenléd nē, dénlūmēd bán mbeltéd mí bad bé nkòjsé rídé mbéb. Adúbe pen áde Noa ánwōngē dēmbēl Dyòb déntéd mó nēe mod awé abele mekan míme métāngéné.

⁸ Adúbe dósó dēnkāj boj Abrahamē awógén Dyòb áde Dyòb dénlāā' é mó áá áhíde á dyad wée ábédé, áke hóm démpēe á mbwóg eche Dyòb dēmbōjsēnné mó abe. Awógén Dyòb ákē-é, kénēe enkēmbíí' é wēe ákagké.

⁹ Adúbe dósó dēnkāj boj áke ádyēē á mbwóg eché Dyòb dénlāā' é mó áá móhōbē mó móóbe mó. Ámbé áwed nēe nken. Aisige bósó Jakób bōmpē bēdyēē' áá á e'bem-té. Dyòb dénlāā' bōmpē melemlem ngáne ánlāā' é Abrahamē.

¹⁰ Abrahamē ádyēé' áá á e'bem-té wēe ásine' pónde eche ádyēē' é á dyad ámbáá áde ásumnéde, áde Dyòb dēn áttíde boj alónj-é.

¹¹ Adúbe dósó dēnkāj boj Seraa abé nkog kénēe ámmadté kòd e achád atóm. Andúbé né áyāle andúbé áá, nzé Dyòb áhóbe áá móóbēl dyam, abelé alóned dó.

¹² Né-ósó, kénēe Abrahamē ámmadté achun bwám bwám nyaa eché eehēle'áá-se achyáá mwān, nchyaátén rísyāal ménhūú ne mó. Mmē nchyaátén mēmbuú áte nēngáne betintine ábe bédé ámín, mbūú-é áte nēngáne nsíi míme rídé á nkag mé edib é nkwe, míme béehelēē-se bétónj.

¹³ Abé bad bé' bósód, bēnwōj adúbe kósōj ne á kwééd. Kénēe bēn bēnkēnkudté chóm éche Dyòb dénlāā' é bósó áá móhōbē mó móóbe bósó, boj bēnyín abé bwēm nchabnede bēwógén-ne bósó menyinge. Bēnkēmbán-gaá áhób bán bédii beken ábe béewóo hóm áde bēdyēē' é á nkòjsé-te.

¹⁴ Bad ábe béhóbe éché ndín é mekan bēlūmte nén bán béhede hóm áde bēchōgké ádáb.

¹⁵ Nzé bédii bēkám tánnáá wēe bēmbídtē, né bēnhēd nzii átim ámbí.

¹⁶ Boj bēntim béhede dásó mbwóg éche eboó, nēde mbwóg e ekombe é mīn. Né-ósó, Dyòb déekwāgnēe bósó nzé bēchágé mó bán ádáb Dyòb, áyāle amaá bósó echab mbwóg abonjen.

¹⁷ Kénēe édíi nén bán Abrahamē mó Dyòb dénlāā' é áá bán bēbuú mó áte, adúbe dósó dēnkāj boj abé mbonjén ábe Aisige awé ábédé míme mpom mí mwān nēe mende áde Dyòb ákágé mó.

¹⁸ Aisige mó Dyòb dénlāā' é Abrahamē áá, "Mbwēen ne Aisige dósó nchyaátén míme rílāngé wē meé wékúd mébídtē."

¹⁹ Abrahamē andúbé áá Dyòb áwóo ngine ápuud ké mod awé amaá awé. Né-ósó, dehele dehób bán Abrahamē ankúd Aisige ámbíd áde ápuúde.

²⁰ Adúbe dósó dēnkāj boj Aisige áhób áá Jakóbe bósó Esao békúd nnam pónde éche ehúe' á'só.

²¹ Ade Jakóbe ádíi benben ne kwééd adúbe dósó dēnkāj boj ánāmēd mwān-téé awé Josebe. Anwúlén á ntónj míme átomnēé, ábe Dyòb edúbé.

²² Ade Josebe ádíi benben ne kwééd, adúbe dósó dēnkāj boj áhób á'só é' pónde áá bad bé Israel bēbíd á Egipto. Dósó-áá dēnkāj boj álágtén ngáne bētāngéné míme ndim abel.

²³ Adúbe dǎo dǎnkǎj boj Mosεε sǎá bǎ nyan békōō mǎ á etún é ngǎn éláán áde bémáá mǎ achyáa. Bǎnyín nǎn bǎn Mosεε aboó elóon bwámbwam, bǎnkǎmbǎj-gǎá ábóo mbéndé éche kǎj éntōmedte.*

²⁴ Adúbe dǎo dǎnkǎj boj áde Mosεε ámáá akwǎg, enkǎnkwentén aá béchǎge mǎ bǎn mwǎn awé mwǎn a mmwáád awe kǎj e Egipto.

²⁵ Ankwentén ákud metake ne bad bé Israel tǎmaa áwóg bwám á mbéltéd mé mbéb-te á esǎj é pǎndé.

²⁶ Ne mǎ, annyín nǎn aá ákud akwǎgké á nló nǎme Ane-awé-Bésineé, áde nsábe nǎme rítómé nhǎn ní Egipto rǎsyǎal. Ambel nǎ áyǎle asiné'áá nsábe nǎme Dyǎb débéé mǎ á pǎndé eché ehúé'.

²⁷ Adúbe dǎo dǎnkǎj boj Mosεε áhídé á Egipto ésebǎn abáa' melingǎ nǎme kǎj e Egipto. Ankanj nlém abé áke nǎngǎne mod awé anyíne Dyǎb áde mod éenyínnéé dǎd.

²⁸ Adúbe dǎo dǎnkǎj boj atíí Ngande e Nnyíme-ámín. Anláá bad aá bémwagted mekií á mmwe mé e'kob ábel boj nzé ángel e Dyǎb epedé áwúu bǎn bé'sǎ, eewúé' bǎn bé'sǎ bé bad bé Israel.

²⁹ Adúbe dǎo dǎnkǎj boj bad bé Israel béchǎbé edib é nkwé éche béchǎgeé bǎn Edib é nkwé éche Eyǎge'. Bǎnchabé chǎ byánán békag á ndǎb mǎn. Boj áde bad bé Egipto béhǎbé bǎn bǎmpé béchabe, bǎnhǎ.

³⁰ Adúbe á bad bé Israel dǎo dǎnkǎj boj e'ké ábe bǎnlǎjnéd dyad á Jeriko é'kwé áde bad bé Israel béhyǎmnédé bǎ epun saámbé.

³¹ Adúbe dǎo dǎnkǎj boj akwaleε awé béchǎgé'áá bǎn Rahabe enkǎnwé áde bad ábe bǎnwúen Dyǎb nló áte bǎnwéé. Nǎn dǎmbǎnléd áyǎle ankǎb bad bé Israel nǎn awe ndǎb, áde bǎlómé bǎ áhyc dé nǎn dyad áte á mesǎm-té.

³² Mbé rǎkag á'sǎ-ye? Pǎndé eésáá eché rǎhele nláá nyé mam áyǎle bad nǎngǎne Gidione, Barage, Saamsine, Jeftaa, Dabide, Samwεle ne bekal bé edǎáǎǎj bǎsyǎal?

³³ Adúbe áde ábé bad dǎo dǎnkǎj boj bétóm melon áte nǎme bǎsbǎo bǎnwǎn bel. Bélyágté'áá bad ábe bǎbédé ásé echǎb nyaa eché étǎngǎné. Bǎnkú-d-te bwém ábe Dyǎb dǎnhǎbpé aá mǎǎbe bǎ. Bǎnkǎj nsǎl ní ngii.

³⁴ Bǎndiméd e'bonde é' muú. Bǎmbid á mekáá mé bad ábe bǎhédé'áá bǎ páá awúen. Kénéε á mbóoted bǎnkǎnwǎngé ngine boj Dyǎb dǎmbé bǎ ngine, bǎbédéε sǎnze é ngine bǎwanne' sǎnze é melonj mémpǎe, éche sǎnze étómé' mehélé.

³⁵ Adúbe dǎo dǎnkǎj boj dongje dé bebaád ányín néε ábǎb bad ábe bǎmmǎd awé bǎtimé ámbid á alongé.

Dongje á bad pǎn bǎnkú-d mbéte kǎáj bǎwé. Bǎnkǎnkwenténné Dyǎb abǎj á yǎl ábel bǎtede bǎ. Bǎmbel nǎ áyǎle bǎmbíí bǎn bǎpuú békú-d alongé áde áde bwám tǎmaa dé nkǎnsé.

³⁶ Dongje démpǎe dǎnkú-d metake, awel áde bad bǎwéláá bǎ, bǎbǎmé-ε bǎ. Bǎnhǎj dongje bǎhé-ε bǎ á mbwǎg.

³⁷ Dongje ábédé áde bǎnwúenǎn meláá, bǎmpǎe-ε bǎsél bǎ áte e'sǎj é'be. Bǎnwúen bǎmpǎe páá. Abé bad bǎwáá'áá e'kob é' mbód béhyǎmne'. Bǎbédéε betóótókε bé bad, békú-dé' metake, békú-dé-ε ndutul á mekáá mé bad bé ekǎyí.

³⁸ Ehédnǎd-tǎá bǎn bad bé bwám néε bǎ bǎbé á nkǎnsé mé mbéb wén. Bǎtǎmnǎdtǎá á ehýǎnge ne á mbǎod mǎn, bǎdyéé' á e'láá-té ne á e'lóm-té.

³⁹ Adúbe áde ábé bad bǎsyǎal dǎnkǎj Dyǎb ábén bǎ menyinge. Boj ké nǎ, bǎnkǎnkudté chǎm eche Dyǎb dǎnhǎbpé aá mǎǎbǎ ábé bad.

⁴⁰ Nǎn dǎmbé áyǎle Dyǎb dǎmmad atíí aá mǎǎbǎ syǎné chǎm échǎ étómé chǎm éche ánhǎbpé aá mǎǎbe bǎ. Antíí nǎn aá, nchoo ne syǎné dǎo ábé bad bǎkwognédte áwe e'sǎ.

12

Dyǎb dǎo áde syǎné Sǎá

¹ Ngǎne édíí-'aá bǎn énen ndun e mod elǎjnéde syǎné edé-ε mbǎj, tǎngene adúbe áde déwóó, detǎngǎné desidé kéchéé éche ékáá syǎné nzii á nkag, détedé-ε mbéb nǎme rǎháá syǎné. Detǎngǎné néε dékáá nlém ányǎged mehéle nǎme Dyǎb áhǎbé aá dényǎged.

² Detǎngǎné néε désúmé mǎd wéε Yesue mwén, áyǎle mǎ alyágte syǎné áwǎj adúbe. Mwén-naa áwǎngǎn syǎné kǎáj dépid-te dǎ á asóg. Ankwentén áwé kwééd e e'sǎn á awǎg, enkǎntéd-tǎá ádǎ akwǎgké néε dyam ábel nǎn ákud menyinge nǎme Dyǎb ákǎjnéde mǎ. Nǎ ábélé-ε bǎob, adyéé á ekáá é mbáá á atii dé nkamlen á Dyǎb.

³ Nyékamtǎn ngǎne Yesue ánkwenténné metake ákud á mekáá mé bad bé mbéb ábe bǎnkǎó mǎ. Nyékamtǎn nǎmǎ metake ábel boj nyéekámé', nyéédülé-ε mekuu ámbid.

⁴ Nzum eche nyéwanéé ábǎded mbéb, eépédéé ndǎgke eche nló nǎmǎn rǎhele rítóm.

* 11:23 Kǎj e Egipto éntóméd mbéndé aá bǎwúu bǎn bé baachǎm bǎsyǎal ábe béchyáá ekǎǎlé ábe bédé mwé nǎme átimé áse.

⁵ Nyéechatán e'yale ábe Dyöb dëmbenlédte áwéd nyé nlém á abum, achæg áde ánychægké nyé áá ábe bán. Anhób áá,

"Á-mwän, nzé Dyöb ákänné wε áte áyále mbéb míme ébélé, etéd míme nkáne áte néε dyam dën.

Nzé Dyöb ákógséné wε, yäl eehóó' wε áte.

⁶ Bíi nén wεé mod awé Dyöb ádáá, móó ákänné áte.

Mod awé átédé néε awe mwän, móó ákógsanné."

⁷ Né-óó nyéwεsen míme nkógsen áyále nén, ríúmte nén bán Dyöb átédé nyé néε ábe bán. Mwän ahéé adé awé sáá éékógsanné áyále awusé áde ábélé?

⁸ Nzé nyééküdé nkógsen áyále mbéb míme nyébélé ngáne bán bé Dyöb bésyáäl békudéé, né nê álúmte' nén bán nyéekoo' é bán bé Dyöb abé. Né nyédíi bán ábe béchyáá á asón.

⁹ Nzé ábéd besáá bé nkójsé béhele békógsen syáné áyále mbéb míme débélé, débagé-'ε bó edúbé, né detánjéné Sáá awéd awé adé ámín edúbé abe tómaa né, ábel débê á alongé.

¹⁰ A esón é pónde dóó ábéd besáá bé nkójsé békógsanné syáné, kéchán áde ébóhnedé'-ε bó dóó bébeleé. Dyöb pen ákógsan syáné áwónjen syáné ábel nén débê bad ábe besáá ngáne mwän ámpé ásaá.

¹¹ A pónde eche dékúde nkógsen, dewóge mbéb áte, deewógéé bwám. Bonj ámbíd e pónde, kénzéé awé míme nkógsen ní'yágté debyéé, ábelé abé nsanj, ábelé-'ε mekan míme metánjéné.

¹² Né-óó, mekáá míme mémmad nyé achii áte, nyéwéd mó áte. Nyéemwäg-ke se mekúu méšágé nyé ášé.

¹³ Nyéhé nyéhíde' nzii eché etyéémé ábel nén bad ábe bésyagte', béenabpé eped atim, bonj bédyεε bwám.

Elébé áwógen Dyöb

¹⁴ Nyéwan áte ábé nsanj ne moosyáäl. Nyéwan-ne áte ámpé áwónj abé áde ásaá, áyále ésebán mod ásaá, eéhéléε-se anyín Sánjwéé.

¹⁵ Nyényín nén bán nyé modmod nyéebóó' é nsimé ní Dyöb akud. Nyényín-ne nén bán nyé modmod nyéesaá nêngáne mbál mé mbéb míme nzé ríkwogé mbéle nírpéén ndutul, mbébed-te mbál mémpéε.

¹⁶ Nyényín-ne nén bán nyéekábéé mesón, nyéebélé-'ε mam néε bad ábe bééwónne Dyöb pónde ngáne Esao ámbenlé. Esao ansóm kunze eché ánwónjé néε mwän a'só á etútu é ehwög é ndyééd ehóg.

¹⁷ Nyéhíi nén bán, ámbíd e nê, Esao ahedé'áá áá sáá ánamed mó, bonj sáá ambánj mó anamed. Kénéε ánchíi' é bwámbwam, nzii enkénbáá áhænjen dyam áde dëmbenléd.

¹⁸ Nyékamtén nén bán hóm áde nyétyéémé bəəb ádíi á'só é' Dyöb. Nyéetyééméé nêngáne bad bé Israel béntyéemmé benben ne mbəəd e Sinai e nkójsé eché muu ní ngíne mbíde'áá ámín. Adé béntyéemmé áhed, ngænjen e ehíntén embé áhed, bín é'súdén áte, ekukud é ngíne-'ε étome'.

¹⁹ Bénwóg esaád é elon, béwóg-ke ehób. Mbwóg ní ngíne ménkób bó. Bénchæn Dyöb nén bán eehóbé' ámpé.

²⁰ Bénchæn Dyöb nê, áyále dyam áde ánláá' é bó áá bébel dénwógéd bó mbwóg bwámbwam. Anhób áá, "Chómchóm éekidtan enén mbəəd. Nzé ké nyam ekidténe chó, bélúm chó meláá kááj ewé."

²¹ Mekan míme bényínne ménkóbéd bó mbwóg bwámbwam. Mbwóg ménkób káájne Moseε. Anhób áá, "Mbwóg rínænje me."

²² Bonj nyépen, nyépedé benben ne mbəəd e Zayon. Nyépedé bəəb á dyad áde Dyöb dé alongé. Adé dyad ádíi Jerusalem awé adé ámín. Áwéd-te, ángel bíib, éladné áte ne menyínje.

²³ Nyémpé nyépedé á nlatén mí bán bé'só bé Dyöb ábe Dyöb átélé mín ádyöb. Nyépedé wεε Dyöb áde ákáadte' moosyáäl. Nyépedé áfínté e e'dəədən ábe bad bé bwám ábe Dyöb ábélé békwognédé.

²⁴ Nyépedé wεε Yesuε awé adé mod áfínté á bad ne Dyöb á melé mékzälé. Nyépedé bəəb wεε Yesuε ámwágtédé nyé míme mekií. Mmé mekií mébágé syáné nsimé tómaa mekií míme Abele.*

²⁵ Nyényín nén bán nyéekónléé Dyöb metuú tánjenge dyam áde álangsé nyé. Bad ábe bénkénwógen mod awé Dyöb dëmbanéé á nkójsé-te áleb bad, bénküd nkógsen. Ngáne bénkudté nkógsen, syáné ámpé detánjéné nkógsen akud nzé deewóge elébé éche ébidé ádyöb.

* 12:24 Mekii míme Abele méhedé' metuuten, bonj mekií míme Yesuε mépeene dásó alagsen.

²⁶ Βασδ áde ánhǽpǽ akan, nkǽnsé ménsǽgnéd ásē. Βααβ-πε ahóbé nén aá, “Mǽbǽl nkǽnsé rísǽgnéd ámpǽ. Saá-kaá nkǽnsé mwǽmpǽn ménsǽgnéd, mébǽl kǽǽne ekombe é mǽn chǽmpǽ éǽgnéd.”

²⁷ Ahób áde áhóbé aá, “Ámpǽ” álumte’ syánē nén bán Dyób déhūd bwēm ésyǽl ábe bésǽgnéd ásē. Ábē bwēm é’ dǽi bwēm ábe áhágé. Ábǽl nē ábel bonj bwēm ábe béésǽgnéd é’lyag.

²⁸ Né-αα, désǽgnēn Dyób áyǽle nén abagé syánē mbwǽg echē mod éehelée-se aságéd ásē. Désǽgnēn Dyób, débage-ε mó edúbé nyaa echē éwǽgéd mó menyǽnge. Débele-ε nē ne mbwǽg ne edúbé ésyǽl.

²⁹ Ne mbále, Dyób ádéd ádii néε muú níme rǽhyǽnte chǽm ésyǽl.

13

Ábē áde áwǽgte Dyób menyǽnge

¹ Edǽnge é Bad bé Krǽsto ébē ékag á’sǽ áfǽnté echēn.

² Nyéebág bán nyéekobéé bad beken pǽndé ésyǽl. Donge á bad békékǽb ángel nken, áde béebǽl é bán ángel chǽo éde.

³ Nyékamten bad ábe bédé á mbwǽg. Ebē byánán nyáábǽo nyédé áwed. Nyékamtan-ne bad ábe békude metake ásē e bad bémpǽe. Ebē byánán nyémpǽ nyékude’ níme metake.

⁴ Mod-téé awé adé á ndáb e’wǽngé ábage e’wǽngé edúbé. Mod eekábé mesón á ebwǽg. Nyéechatán nén bán Dyób dékǽad bad ábe bébele’ e’tongé é’ mekan ne ábe békábé mesón.

⁵ Nyéésúmē nlém áyǽle edǽnge é mǽné, nyébé-ε menyǽnge ne kéchéé éche nyéwǽo áyǽle nén Dyób áhóbé aá, “Méechenée nyé mbéd, méebán-áá nyé áyǽl.”

⁶ Né-αα, dehele dehób ne nlém rǽsyǽl nén bán,

“Dyób dǽo ádéd nwǽngene awēm,

méebǽngé dyamdyam,

chéé moonyonj áhale ábǽl mε?”

⁷ Nyékamten bad ábe bélyǽgté’ áá nyé βασδ, ábe bēnkálé nyé eyale é Dyób. Nyényǽn nsón níme abé ádáb ábélé. Nyéhíd nímbáb mekuu, nyédúbe ngáne bǽmpǽ béndúbēε.

⁸ Yesu Krǽstǽ adé melemlen pǽndé ésyǽl. Ngáne ámbǽε chǽn, nē dǽo ádíi chii, nē dǽ-áá ábǽε abé ne abé.

⁹ Nyéemwǽg-se ayáge ké áhéé áde adé nhǽjlén áhǽjlén nyé nlém á abum. Ebǽo nén bán nsímé ní Dyób múmǽ rǽwéde nyé áte saké mbéndé tǽngene adyé dé medyé. Echē mbéndé ééwǽngǽnnē bad ábe béhíde chǽ.

¹⁰ Dewǽo menyán mé mende níme beprise ábe bébage mende á ebem é Dyób béewǽo’ε kunze ádyé chǽm áhed.

¹¹ Prise ámbáámbáa, abage Dyób mende áyǽle mbéb ní bad. Abelé atéd mekií mé nyam é mende asǽlén mó á Hǽm áde Atómténé Asánj. Bébelé bétéd ndim ní nyam pen, bébídén ámbíd e eyáde béhyáad mó.

¹² Nē dǽo dénkǽnj bonj Yesue ámpǽ átag, awé ámbíd e e’ké é’ dyad ábel bonj níme mekií mébel bad bésánj.

¹³ Né-αα syánē ámpǽ déke détán mó ámbíd e eyáde ábel bonj syánē ámpǽ dékud e’són ábe ánkudté.

¹⁴ Déke détán mó áhed áyǽle nén deewǽo’ε dyad áde ásúmnédé á nkǽnsé-te wén. Bonj desumé nlém ábē á dyad áde áhúe’ á’sǽ.

¹⁵ Né-αα, débē dékene Dyób mbwiined ne Yesue. Mméd mekenag mébē nēngáne mende níme débageé Dyób. Dékag dékale’ nén bán móo adé Sǽngwéé.

¹⁶ Nyéechatán nén bán, nyéǽngéné bwám ábel wéε bad bémpǽe. Kéchéé éche mod áwǽo-’áá, áwǽngan nhǽg ne aníní. Echē ndín é mende chǽo éwǽgte Dyób menyǽnge.

¹⁷ Nyéwǽgne bad ábe bélyǽgte nyé, nyésuded-te yǽl ásē e nkamlen nímbáb áyǽle bǽo bénǽne nyé. Bétyéem-mε á’sǽ é’ Dyób áláa mó ngáne bénǽné’ áá nyé. Nyéwǽgne bǽ ábel bonj bébē menyǽnge ánon nyé. Esebé nē, né béwǽg ndutul ánon nyé. Né nē dééwǽngén-naá nyé.

¹⁸ Nyékánnad sé. Sébii nén bán nlém níkénlé sé á abum áyǽle chǽm ésyǽl éche sébélé. Séhéde’ áá bán sébél chǽm ésyǽl nyaa echē étǽngéné.

¹⁹ Mbáde nyé achánj nén meé nyékánnad sé ábel nén Dyób ábel rǽwámsen atim ámbíd ábē ne nyé ámpǽ.

Mekáne mé asǽg

²⁰ Dyób dǽo ábage’ bad nsanj, dǽ-’áá ápúúdté Yesue, Sǽngwéé awéd. Βααβ-ρoα, Yesue adii néε ndále a Nnǽn-a-mbód awé bébǽnlédé níme mekií ábel nchemten níbē á ngíndé ne á ngíndé, áfǽnté e Dyób, ne éche mbód.

²¹ Nkánne nén mɛé, Dyõb ábel nyébê mbonşén ábel chõm-té éche áhedeé aá nyébel, nyébé-
'ε nyóngé ábel mam níme métáŋgéné. Yesuε áwõŋgan nyé ábel mam níme méwõgte Dyõb
menyiŋge. Ehúmé ébê ne Yesu Kristæa abé ne abé. Ebê nê.

Eyale bé asóg

²² A-bánned, ncháa nyé mɛé, nyékonj échén elébé awóg. Enén kálag eché ríténlé nyé
ééchabéé áte.

²³ Ndáa mɛé nyébii nén bán bébídte mwãnyan awêd, Timotiε, á mbwõg. Nzé awámséné
mε atán, né sũmõ sêɛpě áwɛn.

²⁴ Nyéɛnted mε bad ábe bélyágte nyé bésyããl, nyéɛled-tε bad bé Dyõb bésyããl. Bad bé
Dyõb bémpée ábe bébídé á Italia, bõmpě bélõmmé nyé melentɛn.

²⁵ Nsimé rí Dyõb níbê ne nyé moosyããl. Ebê nê.

Kálag eche Jemse Ndibned ní kálag

Kálag echè Jemse átélè ehóbè tângene mekan níme bad bé Krísto bétàngéné abel póndé ésyā́l á alonjé ádáb. Bad bé Dyòb ábe bépántédé áte nkòṅsè áte rísyā́l b́o Jemse ánteléé ch́o. Abènlédé ngan híin áléb bad bé Krísto tângene metón híin. Mmè metón médi, ábé nhon ne ábé atóg, mekə́gsen, abé á bwám, ánon bad nkòṅtéd, adúbe ne mbéltéd, ngáne bad bé Krísto bétàngéné echém abenled, áwón debyéé, nselag, kúmbe ne asuded á yál, ábíded mbakú á yál e bad, ákum ekaá á tâl, áwəsen, ne ákáne.

Jemse awédé áte á kálag tē wē nén aá mbéltéd níkag ekuu ehóg ne adúbe.

Nkabtéd ní kálag

Ndibned ní kálag 1.1

Adúbe ne áwón debyéé 1.2-8

Abé atóg ne ábé nhon 1.9-11

Ákə́g ne ákud mekə́gsen 1.12-18

Áwóg ne ábel 1.19-27

Ngabén eéhdnádte 2.1-13

Adúbe ne mbéltéd 2.14-26

Ngáne mod a Krísto ábenladte echém 3.1-18

Mod a Krísto ne mekan mé nkòṅsé 4.1-5.6

Elébé émpée 5.7-20

¹ Mē Jemse, mbə́ledé a Dyòb ne awé Sàngú Yesu Krístə́, mē-éé ntenle nyé enén kálag. Nlente nyé metúmbé dyòm ne mébe mé bad bé Israel níme mépántédé áte nkòṅsé áte rísyā́l.

*Jemse ad bad bédúbe Krístə́
béwón-é debyéé*

² A-baányan, póndé ké ehéé echè nyaa e mekə́gsen ké ehéé étáné nyé, nyétéd nē e'boṅ é yál áte.

³ Nyébi ní nén bán mímén mekə́gsen níme nyékudéé áyāl e adúbe áde nyéwóó, méwéde nyé nlém á abum.

⁴ Nlém níwúu nyé á abum káṅṅ á asóg ábel boṅ mbéltéd mímən rítyéem bwám nílón-ne mbon, ábel boṅ nyéewóó' abé dé mbé́ ké ahóg á alonjé ádēn.

⁵ Nyé ké ahéé awé atóge' debyéé, áchān Dyòb aá ábe ḿo. Dyòb d́o ábage moosyā́l debyéé ne nlém nhóg, ésebán akwognad modmod, ábe-é ḿo.

⁶ Boṅ pen nzé nyéchāa Dyòb nyédúbé bán ábe nyé chóm éche nyésédte ḿo ésebán nlém níkáadte nyé á abum. Mod awé nlém níkáadteé á abum ádíi néé edib é nkwé éche éhode', eph éhúene' mendib ped enén étimne eniní.

⁷ Ene ndín e mod eewémtán aá ḿoókú chóm wée Sàngwéé.

⁸ Adíi mod awé awóó nlém níbe, eechānád-taá hóm ahóg áyāl e kéchéé éche ábeléé.

Betóótókē bé bad ne behon bé bad

⁹ Mod a Krísto awé eesé etógnén á'so é' bad bémpée atángéné abé kúmbe nzé Dyòb áchágté ḿo ámín.

¹⁰ Mod a Krísto awé adé etógnén á'so é' bad bémpée atángéné abé kúmbe nzé Dyòb ásutdte ḿo. Nhóbe nén áyāle ámaá melemlem ngáne ébéeneé mbonja e nkə́kə́ awé adé á ahín-té.

¹¹ Nzé enyen épenne ne ngine ábe e'hyé bé ekíde é'belé é'hyáád ane nkə́kə́, éche mbonja-é ébelé ésoo, e'boṅ é'bāb-pe é'belé é'maa. Melemlem nē d́o behon bé bad bémaá' é anan áde bə́nanéé nímbān nhon ámbíd.

Jemse ad mekə́gsen méhūu' é wée Dyòb

¹² Nnam ne kénzéé awé awéséné mekə́gsen, áyāle nzé atómé mímé mekə́gsen áte, Dyòb débe ḿo nsábe níme níde alonjé áde áhóbé aá ḿoóbé bad ábe bédás ḿo.

¹³ Nzé mod akudé mekə́gsen eetàngeneé ahób aá, "Mímén mekə́gsen méhúu' wée Dyòb." Mod eéhléé-se ákag Dyòb ne ebébtéd, melemlem ngáne Dyòb-pe déekə́gé mod ábel mbé́b.

¹⁴ Mewémten mé mbé́b mé mod mwén ḿo mekə́a boṅ ahún á mekə́gsen-té, ene pónde-áa níme mekə́gsen métédeé ḿo nlém á abum boṅ mehanj ḿo.

¹⁵ Mímé mewémten níme mébāg mod áte ḿo-áa mépene mbé́b, nzé mímé mbé́b-pe níkwógé mod áte, nípiinad ḿo kwééd.

¹⁶ A-baányan bé edānge nyéédógnád.

¹⁷ Nde e bwám ké ehéé ne kéchéé éche élóné mbon éhuú ne Titée awé adé ámín. Titée mó ahagé bwém é'syāāl ábe é'pene ámín. Abén bwém é'pene-é nħaŋlén ne nħaŋlén, bon Dyöb pen déehaŋlanné.

¹⁸ Dyöb dëmbel ntii ábe syānē alongé dékāsīlē abe áde ámbéé syānē éché eyale é mbále. Ambel nē ábel bon áfntíe e nímē nħagtéd rísyāāl, syānē débē ngáne mbote e'só échē bébageé mó nēe mende.

*Jemse ad bad bé Dyöb bébele
ngáne eyale é Dyöb éhóbéé*

¹⁹ A-baányan bé edaŋge, nyébii nímén mekan. Mod téé ábē mehél áwóg dyam áde mod ampée áhóbéé, mod eewámsán dyam ahób pen, mod eewámsán-ne alij.

²⁰ Melingá mé mod méemwagké-se ábēl mekan níme Dyöb áhedeé aá ábel.

²¹ Né-óó nyétede mekan mé mbinde ne mekan mé ebéltéd mésyāāl níme nyébeleé. Ne asuded á yāl ásyāāl, nyékob eyale éche Dyöb áwéné nyé á nlém-té. Echē eyale chós Dyöb ábenladtē áson áden alongé.

²² Nyébele ngáne eyale éhóbéé. Nyéédögē yāl se nyéwögē chós wógén.

²³ Kénzée awé awóge' eyale é Dyöb, ésebán abele' ngáne éhóbéé, adii nēe mod awé anone' ábe e'só á dyenē.

²⁴ Amaá eche yāl anyín, bon aké áde ákagké, abelé áchatén ngáne e'só é'dii mó.

²⁵ Bon bad ábe békoo' mbéndé échē etāŋgénē anon áte, mbéndé eche ehúde' bad á mehan, nzé béhíde chós ngáne éhēdnadté saké bán béléá' chós bon béchatén-ne, bon pen, béhíde chóm éche éhóbéé, Dyöb dénaméd bós áyāl e kéchéé éche bébeleé.

²⁶ Mod ké ahéé awé awémtné aá móbele' ngáne Dyöb áhedeé bon eekóbe éche échém, ene ndín e mod adoge eche yāl, áde abele á Dyöb-pe, áde ngén.

²⁷ Ábele Dyöb nyaa eche esáá ne eche etāŋgénē á'só é' Dyöb Titée, adii ánon menyuu ne bekúd ábe bétage', ne ácháa yāl bwám ésebán mekan mé mbinde mé nkōŋsé méwóge mod áyāl.

2

*Jemse ad béetēde baahóg
etógnén ábíní'-e nkōŋtéd*

¹ A-baányan, nyé nēngáne bad ábe bédúbpē eched Sán, Yesu Krístā, Sāŋgwéé awé échē edúbé échábé ámín, nyéetāŋgenē nēe nyényíné mod á díd-te se nyétéd mó etógnén ké'-e nkōŋtéd.

² Détéd bán mod asólé wēe nyéládné, ahédé nzēd é gól, ahédé-é kase é mbóté, ntógétóke ní mod mómpē rísólé, ahédé mbóté é mbinde.

³ Nzé nyébage mod awé ahédé kase é mbóté edúbé bon nyélangé mó bán, "Hyé édye enén kase e e'dii," bon nyélangé-é ntógétóke ní mod bán, "Tyéém hē," ké' é bán, "Dyéé á ndóob té hē."

⁴ né nyélúmté bán baahóg bétómé ábíní, né nyékaadte-é bad ne mewēmten mé mbéb.

⁵ A-baányan bé edaŋge, nyéwóglan. Eesaá mbále nén bán Dyöb ápwéde betóótókē bé bad á nkōŋsé te aá bédúbe Krístā-yé? Adé adúbe dós-áa adé nímāb nħon, apwede-é bós ábé bad ábe bébé áwē nkamlen. Mmē nkamlen móó áhóbé aá móbē bad ábe bédás mó.

⁶ Bon nyéetédēé betóótókē bé bad nēe dyam. Saá behon bé bad bós bétagte nyé-yé? Eesaá mbále bán bós békene nyé á kóte-yé?

⁷ Eesaá mbále bán bós béhóbe dín dé edúbé áde ane awé akamlen nyé mekan mé mbéb áyāl-é?

⁸ Nyéebēl dyam áde átāŋgénē nzé nyékoo' mbéndé e nkamlen eche Krístā ahíd eche éténlédé nén bán, "Edaŋ mwányon ngáne édsá echon yāl."

⁹ Bon nzé nyétede baahóg etógnén ábíní'-e nkōŋtéd, né nyébele mbéb, né mbéndé e Dyöb-pe ekóbé nyé nēe bad ábe bébóó mbéndé.

¹⁰ Kénzée awé ahíde mbéndé bon abóó mbéndé póg, né abóó mbéndé ésyāāl.

¹¹ Mod awé ahóbé aá, "Nyéekábé mesón á ndáb e e'wóngé," mó ahóbé ámpē aá, "Nyéewúé' bad." Né-óó, nzé mod eekábé mesón bon awúe' bad, né abóó mbéndé.

¹² Nyéhóbe dyam, nyébele-é mekan nēe bad ábe bébii bán Dyöb dékaad bós, nchoo ne eche mbéndé éche ehúde bad á mehan-té.

¹³ Mod awé eewóge mod ampée ngól, Dyöb-pe déewógké mó ngól nzé akáadte bad. Bon mod awé awóge bad bémpēe ngól, éewógké mbwóg mbwē níme Dyöb akáadteé bad.

Jemse ad nzé adúbe déekii ne mbéltéd né áwéde

¹⁴ A-baányan, nzé mod ahóbé aá móúbpē Krístā bon eébéle mekan níme mélúmté bán awóo adúbe, bwám é'héé é'dé áhed? Adé adúbe áhēle áson áde alongé-yé?

¹⁵ Dětéd nén bán mwányonj a Krísto nhóg eewóó'è chòm éche áhāgkē á yāl, eewóó-'áa ndyééd e epun é bín.

¹⁶ Boj nyé mod nhóg alánggé mó aá, “Ekag bwām, ékud chòm éche éhāgkē, ékud-te ndyééd éche édyāgkē.” Nzé nyélanggé mó nê ésebán nyébage mó chòm éche átógnéné, né bwām é'hée nyébéle mós?

¹⁷ Melemlem nê dōo édíí ne adúbe. Nzé mod awóó adúbe áde éebeléé ngáne áde adúbe áhóbéé, né áde adúbe áwédé.

¹⁸ Mod nhóg álāā me aá, “Mod nhóg awóó adúbe, aníní-'é abele mekan mé bwām,” me-'é mētímtén mós meé, “Lúméd me ngáne mod áhele awóñ adúbe ésebán abele mekan mé bwām, mēlúméd we ádēm adúbe áyāl e mekan mé bwām níme mbéleé.”

¹⁹ Edúbpé nén wéé Dyób ádíí ahóg. Nê áde bwām. Kóññe e'dáádāñ bé mbéb bómpe é'dúbpé nê, é'nā-'é ne mbwóg.

²⁰ A-eyškél é mod, ehéde wéé bēlúmed we nén bán nzé mod awóó adúbe boj eēbēlē ngáne áde adúbe áhóbéé, né áde adúbe déesaá dyaḡdyam-é?

²¹ Cheé énkāñ boj Abrahame, awesyáné sáá ambáá, ákobnéd á'sō é' Dyób néé mod awé abele' mam níme Dyób áhóbé? Saá akwenten áde ánkwenténné ábe awe mwān Aisige néé mende-ye?

²² Nyényíné nén bán adúbe áde Abrahame ne nímé mbeltéd békágé'áá ekuu ehóg, nímé mbeltéd-te mēnkāñ áde adúbe álón mbon.

²³ Nén dēmbēl eyale é Dyób ényínnéd mbále ngáne éténlédé nén bán, “Abrahame andúbé Dyób. Nén dēmbēl Dyób dēnkob mós nēngáne mod awé abele mekan níme métāngéné.” Né-óó, bad bēnchāg Abrahame bán nsón a Dyób.

²⁴ Nyényíné nén bán mbeltéd m mod mbéle boj mod ákobnéd á'sō é' Dyób néé mod awé abele' mekan níme métāngéné, saké adúbe dēmpen.

²⁵ Melemlem nê dōo émbēē ne akwalé awé bēchágé'áá bán Rahabe. Ankobnéd á'sō é' Dyób áyale bad bé Israēl ábe bēnlōmmē bán béhye bēnān dyad áte á mesōom-té. Ankób bō nken, abídéd-te bō á dyad-té, nzii empée á mesōom-té.

²⁶ Ngáne yāl e moonyonj echē eewóó edāádāñ éwédé, melemlem nê dōo adúbe áde déekāg ne mbeltéd áwédé.

3

Jemse: aá mod-té akamlan échē echém

¹ A-baányan, nyé bad híin nyéebāg bemeléede bé eyale é Dyób. Nyébíi bán Dyób dékāad se bemeléede tómaa ngáne ákáádté ábíníí bad.

² Syáne baásyāal debele mewusé á ríhóbtéd. Kénzéé awé éebēlē awusé á ríhóbtéd ádíí mod awé áde abé átyéémé, áhele-'é eche yāl akób ábel boj eēbēlē awusé.

³ Dětéd elānsén ne hósé. Nzé mod ahede aá hósé ébel ngáne áhedéé, abelé ahé chó chóm á nsal-té. Echē chóm chó-'aá ábenladté ályáged ene hósé kéhéé wéé áhedéé aá éke.

⁴ Ké'ε dětéd elānsén ámpé ne bōle é'mbáá ábe é'dé á edib é nkwe-te. Kénzéé édíí bán é'kálé bwāmbwam, epub é ngine chó-'aá ékéene bō, mod awé adole' ábē bōle mwā abámbe mós ábenladté ákéen bō kéhéé áde ádás.

⁵ Melemlem nê dōo édíí ne echém. Kénzéé édíí bán éde mwāmpín á yāl e moonyonj, éde kúmbe bwāmbwam áyāl e nímé mbeltéd.

Nyényín ngáne mwā muú áhele se ahyáád ahín ámbáá.

⁶ Echém ámpé édíí nēngáne muú. Édíí ped e yāl e moonyonj póg, ébele' mbéb rí kamlan yāl e moonyonj esyāál. Ebele' alongé á moonyonj ásyāál abé nēngáne ákóbné muú, muú níme mbídé á dū-á-muú, níme méédíme'.

⁷ Moonyonj akamlan nyaa é nyam ésyāál. Akamlan nyam é mehín, ákamlan menān, ákamlan nyam éche édole abum ásé, ákamlán-ne nyam ésyāál éche éde á edib é nkwe-te, ambootéd-te chó akamlen se á mbooted.

⁸ Boj modmod eēhēlē-se ákamlén echém. Echém édíí chóm é mbéb éche modmod éehéleé-se ákamlén, éloné-'é ne e'we bé mbéb ábe é'pene' kwééd.

⁹ Chós débēnladté áken Sāngú Dyóbe, awéd Tité, chó-'aá débēnladté ábe moonyonj ebómán. Moonyonj mós-'aá Dyób áhágé áwágen mós.

¹⁰ A melemlem mé nsal dōo e'yale bé mekenag ne ebómán bēbídéé. A-baányan, éetāngénéé abé nê.

¹¹ N'yéle mé edib nhóg méehéleé-se mébídte mendíb níme mesáá ne mé mbinde abided ahóg.

¹² A-baányan, alín dé asáá déehéleé-se áchyáá e'pum é píe. Ké'ε alín á sabé déehéleé-se áchyáá e'pum é' mesáá. Edib-pe éche ébídte mendíb mé nkwe, éehéleé-se ébídéd mendíb níme mesáá.

Debyéé áde áhúú ne Dyòb

¹³ Mod adé áfínté echên awë awóó debyéé awón-’e nsòŋtan-ε? Alúmed nê ne alongé á bwám áde áwóó, áyāl e kéchéé éche ábeleé. Abel nê ne asuded á yāl áde debyéé áde áwóó ábélé boŋ awón.

¹⁴ Boŋ nzé nyéwóó kán áte eche edé mbéb, nyétòŋtan-ne dásō échen yāl, nyéēbenlād debyéé áde nyéwóó ábel mbéb t̄ngene ayáge á mbále, akum áde nyékumε ekáá á t̄l,

¹⁵ ene ndín e debyéé eehúe’ε ne Dyòb. Edii debyéé áde áhúú ne bad bé nkòŋsé. Adii debyéé áde áhúú ne bad ábe béewóó Edáádəŋ é Dyòb, debyéé dé edáádəŋ é mbéb.

¹⁶ Kéhéé wée bad béwóó kán áte echē edé mbéb, bétòŋtan-ne dásō échab yāl, mpuutéđ mbéle mbé, nyaa e ebébtéd ké ehéé-’ε ebág áhed.

¹⁷ Boŋ debyéé áde áhúú ne Dyòb adé n̄əŋlén. Kénzée awë awóó adé debyéé eewóó’ε atón dé mbéb ké ahóg áyāl. Ene ndín e mod adəə nsan, apwiitad, achede yāl áwóglen bad bémpee, awóó ngəl bwámbwam. Abenle bad mekan mé bwám éseban akwəgnad modmod, abele-ε nê ne nlém nhóg.

¹⁸ Nzé bekóm bé nsan bébele nsón míme mípeene’ nsan áfínté e bad, né débél bad bébele mekan míme Dyòb áhedé.

4*Jemse áá bad bésuded yāl, Dyòb akamlen bó*

¹ Cheé épeene nzum ne nselag áfínté echên? Eesaá mbále bán esíí é awón á bwém éche éwane nyé nzum áte, chōó ekəə’ boŋ nyébelé n̄n-ε?

² Ehede chòm boŋ weékudé chō, nê ábélé ewúú mod. Ewóó esíí áte bwámbwam ákud chòm boŋ weehelé chō akud. Nê ábélé nyésenle, nyéwanne-’ε nhóg ne aníní nzum. Nyéékudē chòm éche nyéhéde áyāle nyéésēdtē Dyòb chō.

³ Nzé nyéhedne Dyòb chòm, nyéékudē chō áyāle nyéhedne chō mewémten mé mbéb. Nyéhede bwém dásō áwóged échen yāl menyínge.

⁴ Nyédé n̄ngáne bad ábe bédé á ndáb é mewónge, boŋ bébé békābē mesón. Nyéēbíí’ε bán ábane nlém ne mekan mé nkòŋsé ábele nyé bad bé ekoyí bé Dyòb-ε? Né-óó kénzée awë adəá nlém abane ne mekan mé nkòŋsé, ábélé eche yāl mod-a-ekoyí a Dyòb.

⁵ Nyéwémtené bán ngēn-εé éténlédé á kálag e Dyòb n̄n bán, “Dyòb ábánné nlém áá edáádəŋ éche m̄hédé syānē áte, ébē échē, adé-ε kónjí ne chō-yε?”

⁶ Boŋ Dyòb ábage syānē nsimé abe ne abe. Né d̄s-’áá ákás boŋ éténlédé á kálag e Dyòb n̄n bán, “Bad ábe bédé kúmbe, Dyòb ákunnad bó yāl, boŋ ne bad ábe bésúdté yāl, Dyòb ábage bó nsimé.”

⁷ Né-óó, nyésuded yāl á’só é’ Dyòb. Nyéwúen Satane nló áte. Nzé nyébelé nê, m̄s-’ε átōm mehéle.

⁸ Nyépe Dyòb benben, m̄ómpē əp̄é nyé benben. Nyé bad bé mbéb, nyésóg mbéb abel. Bad-ε ábe béwóó nlém míbe, nyébane mímen nlém ábel mekan míme mésáá.

⁹ Nyésuden áyāl e mímen mbéb. Nyélebe’, nyéchyε-’ε. Nyésóg awóó, nyélebe’ lebén, nyésóg menyínge awóg, nyésuden sudnén.

¹⁰ Nyésuded yāl á’só ábe Sán̄gwéé. Nzé nyébelé nê, áchagəd nyé.

Jemse áá mod eekáadté mwányan

¹¹ A-baányan, nyéehóbé nhóg ne aníníí mam mé mbéb á yāl. Kénzée awë ahóbe mwányan mam mé mbéb á yāl, ké’ε akáadte m̄ó, né ahóbe mbéndé e Dyòb mam mé mbéb áyāl, né ahóbe-’ε áá ene mbéndé eéboó’ε. Nzé ehóbé wée mbéndé e Dyòb eéboó’ε né weébēlē chòm éche mbéndé ehóbé áá bébel. Boŋ né etédé etál échē éesé échōŋ ábe mod awë akáadte.

¹² Mod nhóg mwəmpen-εé adé awë abage’ mbéndé, mwəmpen-naá akáadte bad. Mwəmpen-εé ahele ásoŋ alongé á bad, mwəmpen-naá ahele abébéd d̄s. Boŋ we, nzé-módé edíí ákád mwányon?

Jemse áá mod eebág kúmbe

¹³ B̄oob-p̄oó, nyéwóglan, nyé bad ábe nyéhóbe bán, “chii ké’ε chān, séēkē dyad dekalengome, séēdyéé áwed mwé nhóg, sékābē nyongé, sékudé-’ε nsyāŋ.”

¹⁴ Nyébíí dyam áde débēnléd chān-ε? Chán nyébíí bán alongé ádēn adé? Alongé ádēn adii n̄ngáne mbag. Ebág á esón é pónde, ámbíd enē, weenyínéé chō ámpē.

¹⁵ Chòm éche nyétángéné ahób edii n̄n, “Nzé Dyòb ákwénténé, né séēbē á alongé, sébēl-le ádēn dyam ké’ε ádíníí.”

¹⁶ Boŋ b̄oob, nyétimé nyékume ekáá á t̄l ne kúmbe esyáál. Enén ndín e akum dé ekáá á t̄l eetəŋgené.

¹⁷ Né-óó, kénzée awë abíí dyam á bwám áde átəŋgéné abel, boŋ eébele d̄s, ábélé mbéb á’só é’ Dyòb.

5

Jemse ad behon bé bad bétéd pónde

¹ Nyé behon bé bad, nyéwóglan me! Nyéchyé', nyéhágke e'saád áyāl e metake míme mǎpíi nyé.

² Mmén nhon míme nyékúmé mímáá aboo, síi'-e é máá nyé asan adyé.

³ Echen gól ne silva éche nyélimmé áse, é máá ngag akób. Ene ngag eche ekóbé ábê bwēm, chǎo ébēl bon Dyōb ákógsén nyé, é mád-te nyé áse nēe muú. Nyékúmmé yāl nhon enén pónde échē edé benben ne e'pun bé asóg.

⁴ Nóné', weesábpéé bad ábe bēbénlé wē nsón á nzag-tē. Etimé edogé bó dogén. Nén ábélé ábē bad ábe wéésábpéé ádab awé áwógnad á'sō wēe Titée, Dyōb á Ngum.

⁵ Ábē áde nyédíí á nkōnsé hén ádíi áchog alongé, nyēbele-'e kéchéé éche nyédás. Nyékódte mímen mewémten, kénéé nyébíí bán epun éche Dyōb dékógsennē ábē bad bé ekoyí ékwógé ape.

⁶ Nyéhóbé bán bad ábe bébele mekan míme métánǵéné á'sō é' Dyōb bédé bad bé mbéb, nyéwúú-'e bó. Béeheléé nyé atyéemen.

Jemse ad bad béwesen metake

⁷ Né-ǎó a-baányan, nyéwesen kǎǵh Sǎngwéé ápe. Nyétéd elánsén ne mod awé ábele nzag. Abelé ásin kǎǵh ne pónde échē ápádtē mbote é bwám. Awesan kǎǵh ne á pónde eche mbúú e'sō ébootadté achó, ne áde édimtanné achó.

⁸ Nyémpē nyéwesen, nyéwéd-te nlém á abum, nyésine' epe éche Sǎngwéé, édé benben.

⁹ A-baányan, nyéenyongé áte tǎngene nhóg ne aníníí ábel bon Dyōb déehábē áá nyédé bad bé mbéb. Nyébíi nēn bán mod awé akáadtē' adé nyé benben.

¹⁰ A-baányan, nyétéde e'chemléd ne bekal bé'dǎádǎj. Békálé'áá nkalan á dín áde Sǎngwéé, békúdé metake, bēwesán-ne mímé metake.

¹¹ Ne mbále, syáá dechǎge bad ábe bēwéséné bán bad ábe békúdé nnam. Nyéwógé ngáne Jobe ánwésenné áde ákúdé metake, nyényin-ne ngáne Dyōb dēmbenlé mǎ bwám á asóg. Sǎngwéé aboo nlém bwámbwam awóó-'e nlém rí ngól.

¹² Amín e mímén mésyǎl, a-baányan, nyéēbenlád dín dé nkōn mímín, ké'e dé nkōn rísé, ké'e chóm émpēe ámwé melē. Bon pen, nzé ehóbé"Ée" abé ee, nzé ehóbé-'e "Aáy" abé aáy. Nzé nyébelé nēn, né Dyōb déekógsenné nyé.

¹³ Kénzéé awé adé á metake té, ákánne. Kénzéé awé awóge menyǵge, ákóne ákené-'e Dyōb.

¹⁴ Kénzéé awé eédyee bwám, áchǎg belyáged bé mwembé, békánned mǎ. Nzé békánnad mǎ bēwǎgtē mǎ dyǎg á dín áde Sǎngwéé.

¹⁵ Nzé édé bán békánnédé mǎ ne nlém nhóg, né Dyōb déwǎg bó mekáne, nē débēl-le mod a nkole ádyēē bwám. Sǎngwéé ábēl áhídē á anōj dé nkole, ádyēē bwám, ké mbéb-pe mǎ ámbenlé Dyōb délǎgsén mǎ.

¹⁶ Né-ǎó, nyépale mbéb áte wēe nhóg ne aníníí, mod téé ákánned-te mwányan, ábel bon nyédyee bwám. Mekáne míme mod awé ábele mam míme métánǵéné á'sō e' Dyōb, mǎdé ngáne bwámbwam, mébele-'e nsón.

¹⁷ Elaijaa abédéē moonyon melelem ngáne syánē. Pónde pǎg ankáné bwámbwam áá mbúú eechóg, mbúú enkénchó-'áá á etún é mwē rílán ne epe.

¹⁸ Ambid enē ankáné ámpē, Dyōb ábēl mbúú echó, bwēm é'bootéd-te akwog.

¹⁹ A-baányan, nzé nyé ké ahéé atédte áhíd nzii e mbále e Dyōb, bon mod ampée ábelé atímné mbíd,

²⁰ ábíi nēn áá, kénzéé awé ábelé bon mod awé ábelé mbéb asóg mbéb ábel, né asóo alongé áde mod awé ábelé mbéb. Nén débēl-le mbéb híin míme ane mod ákébenlé, Dyōb déenonné mǎ á díd.

Kálag e'só eche Petro Ndibned ní kálag

Kálag e'só eche Petro ántenlé, bad bé Krísto b́ó ántelée ch́. A kálag-té wê achagé bó aá, “Bad ábe Dyöb ápwédé.” Abén bad bémpántéd áte á ped e akuu á mbwóg e eché béchágé áá bán Esia Mainó. Nzóm eché enkəñ bonj átel enén kálag, ebédée áwéd bad bé Dyöb nlém á abum áyále metake níme békúdé'áá ne adúbe áde b́enwōngé. Awéd-te, abage bó e'lyóg bé nlém ábe nkalanj ní bwám níme Yesu Krístəə mbageé bó. Mmè nkalanj ní bwám ríhóbe tənge, kwééd, mpuu ne epe éche Yesue ápéé ámpé. Alúméd-te bó áte aá békwenten metake ne e'lyóg bé nlém. Anlúméd bó áte aá beb́ii nén bán nímé metake médií mekagsen ányín nzé adúbe áde b́ewánlé áde adúbe á mbáale. Béb́ii-'e nén bán békúd nsábe á “Epun éche Yesue Krístəə ápéé.” Anlúméd-te bó áte ámpé aá alongé ádáb átəngéné abé ngáne alongé á bad ábe behíde Krístəə.

Nkabted ní kálag

Ndibned ní kálag 1.1-2

Dyöb d́ó abage e'soosoj 1.3-12

Elébé ábel mekan níme mésáá 1.13-2.10

Mekan níme bad bé Krísto b́etəngéné ábel á pónde e metake 2.11-4.19

Asuded á yál ne ábele Dyöb née mod á Krísto 5.1-11

Nsógten 5.12-14

¹ Mē Petro, mbaṗee á nlomag awē Yesu Krístəə, ntenle nyé bad ábe Dyöb ápwédé, ábe b́epántéd áte bonj beb́e beken á mbwóg é Pontus, Galesia, Kapadosia, Esia ne Bitinia.

² A ntii nímé Dyöb Titée, ammadé nyé apwed. Eché Edəádəñ-'e eb́elé nyédé bad ábe b́esáá. Abelé nē ábel nyébele mekan níme Yesu Krístəə áləngé nyé aá nyébel. Abelé nē, ábel nímé mekií níme mésyógké á awəg mébel nyékud alagsen dé mbéb. Nsimé ne nsanj ní Dyöb mbé ne nyé abé ne abé.

Deiwó e'lyóg bé nlém

³ Mekenag mébē ne Dyöb áde áde Sáá awé awed Səngwéé, Yesu Krístəə. Apuúdté Yesu Krístəə. Né-óó dekadé alongé dékəslé. Ábel áde ábélé nē, ábágé syáné e'lyóg bé nlém bé alongé áde déemaá'.

⁴ Desine' káəñne nhon níme Dyöb ákəñnéde ábē bad. Akəñnéde nyé mó ádyöb. Ahead-te méeb́ó'é, méeb́eb-paá.

⁵ Dyöb ábenlad eché ngum ákəə nyé adúbe áde nyédúbpé mó, káəñ né nyékudé e'soosoj. Abé e'soosoj b́enyínnéd á epun é asóg.

⁶ Nyédúí nyébé menyinge ne nē, kénée édií nén bán nyéékud metake nyaa ne nyaa é esón é pónde.

⁷ Mmè metake mápé ákəg nyé adúbe, áluméd nén bán adúbe áwúú nyé áte ne mbáale. Gól ehele ebéb, bonj ké nē, bébelé behé ch́ á d́ú ásaad ch́. Nzé behéle bébel nē ne gól, né b́etəngéné áden adúbe dómpé akəg ábel nén áwúú áte áyále áden adúbe átómé gól. Nzé áden adúbe átómé mekagsen áte, né Dyöb déken nyé, ábe nyé ehumé ne edubé áde Yesue álumédte bad bé nkəñsé b́esyáal yál.

⁸ Nyédəó mó kénée nyéenyínnē mó. Nyédúbpé-'e mó kénée nyéenyínnē mó b́əb. Ké b́əb-pe nyétómténé menyinge abé nyaa eché mod éheléé-se ahóh.

⁹ Ch́m eché nyékudté áyále adúbe áde nyédúbpé mó édií e'soosoj ábe áben e'dəádəñ b́ekudté.

¹⁰ Bekal b́e'dəádəñ behnhōb mam á'só é' pónde tənge abé e'soosoj ábē Dyöb débeé nyé née nsimé. Béntōñ ábē e'soosoj ahead áte ábel b́esōñten b́.

¹¹ Edəádəñ éche Krístəə émbé bó áte áláa bó á e'só é' pónde ngáne Krístəə átagké ne ehumé eché ákudé ámbld e pónde, bonj b́embé behéde áte. Behédé'áá áte ábií pónde eché nímé mam mébenlédté ne wée mod awé mébenlédté.

¹² Dyöb dénlómé abé bekal b́e'dəádəñ áte aá nsón nímé bébeleé méesaá nsón níme b́en b́ekudté nsyāñ ahead, bonj nídií nsón nimenyé. Dyöb dénlómé bad Edəádəñ éche Esáá eché ebíde ádyöb. Eché Edəádəñ ch́ó émbél bonj baahóg b́ekalé Nkalanj ní Bwám nímé nyéwógeé b́əb. Mmén mam móó bekal b́e'dəádəñ behóbe'áá. Káəñne ángel édáá nímén mekan asōñten.

Mbétéd nímən rísán

¹³ Né-óó, nyepúd abad, nyébé mbonjsén ábel nsón níme Dyöb áhedéé. Nyétéd pónde nyésum-me nlém rísyáal áyál e nsimé níme Dyöb débeé nyé á pónde eché Yesue ápéé ámpé áluméd-te nyé yál.

14 Ngáne edii bán nyédii bad ábe bébele mekan níme Dyöb áhadedé, nyéemwäg-se mam mé mbébé nímé nyébéle'áá bə́əd mébé mékamlán ádɛn alongé.

15 Dyöb áde apwədə nyé asáá. Né-ɔ́ nyémpé nyétàngéné asán á mbeltéd nímən rísyáál.

16 Eténlédé á kálag e Dyöb nén bán, “Mbeltéd nímən rísan áyale mbeltéd níməm rísáá.”

17 Dyöb ákaadte' moosyaál nyaa póg. Eékwognáadté modmod. Nzé nyékáne'-e áwé, nyéchége mɔ́ bán Tité. Né-ɔ́, nyéwɔ́n mbwóg rí Dyöb áte á alongé ádɛn ásyáál á nkòṅsé-te wén wée nyédii beken.

18 Nyébii nén bán Dyöb ákódté nyé á ekúkú é abé-te. Ekúkú é abé éché ábɛn betaa bényágnédte nyé saké chòm néé gól ké' é silva éché ébébe' chə́o ánkòdnédte nyé.

19 Ndale e mekií eché Yesu Krístə́ chə́o ánkòdnédte nyé. Krístə́ awé adé néé rídyəṅ rí mbód nímé méewə́o awusé ké ahóg á yál.

20 Nkòṅsé rídɛhób bán níbootad, Dyöb dɛmmád mɔ́ apwəd. Boṅ bə́o á asóg hén alúmté yál wée bad bé nkòṅsé. Abelé nê áyale nyé.

21 Krístə́ akəs nyédúbpé Dyöb. Nyéhele-se nyédúbé Dyöb nyésúm-me nlém rísyáál áwé, áyale apuúdté Krístə́ abídté'-e éché ehúmé áwəd.

22 Abel áde nyébéleé mekan mé mbále ábéle nyésáá. Nê ábéle'-e nyáabe bad bémpéé ábe bédúbpé Yesuə́ nyédəṅné. Né-ɔ́ nyédəṅ nhóg ne aníni ne nlém rísyáál.

23 Nyébii nén bán Dyöb ábágé nyé alongé dékə́alé mbwiined ne éché eyale. Eché eyale épééné alongé éesaa'-aa chòm éché ébébe'. Ebé abé ne abé. Dyöb áde adé á ngíndé ne á ngíndé də́o ábágé nyé ádɛ alongé saké moonyoṅ.

24 Eténlédé á kálag e Dyöb nén bán,

“Moonyoṅ adii néé nkə́akə́,

ábé e'boṅ'-e é' dé nêṅgáne mbonja éché ékwoge á ahín-té.

Nkə́akə́ ayɛnle', mbonja'-e ésoode.

25 Boṅ eyale é Dyöb ébé abé ne abé.”

Eché eyale edii nkalaṅ rí bwám níme békánlé nyé.

2

Nyédii meláá mé alongé

1 Né-ɔ́, nyéte de nímən mbeltéd mé mbébé rísyáál. Nyéekalé metóm, nyéelúmté' á did-te ngén nén bán nyébele bwám áde nyéebeléé, mod eesíídé waáb, e'yale bé mbébé béébidé'-e nyé á nsəl.

2 Nyétàngéné awan áte ákud ndyééd e edə́əṅ eché esáá, melelem ngáne bán bé nkáál béchyéé' é abii, ábel nén nzé nyédyéde ene ndyééd, nyékwog ákud e' soosəṅ.

3 Nyéwógléné ene ndyééd, nyébii'-e bə́o ngáne Sə́ngwéé ábeleé mekan mé bwám.

4 Nyéhyag wée Sə́ngwéé, mɔ́ adé néé aláá dé alongé áde belón bé ndáb bənchenéé, boṅ Dyöb ányín dɔ́ aa ákwógnédé, ápwəd, ákòṅ'-e dɔ́.

5 Nyéhyag-kə́o nyébé néé meláá mé alongé níme Dyöb ábenladte áləṅ eche ndáb e edə́əṅ. Awəd-te'-aa nyébenléé mɔ́. Nyéébeṅ beprise ábe bésáá, nyébagé mɔ́ mendé mé edə́əṅ níme mekóbnédé áwe e' sɔ́ mbwiined ne Yesu Krístə́.

6 Eténlédé á kálag e Dyöb nén bán,

“Ntéde aláá dé etógnén

nsumé á Zayəṅ.

Kéenzéé awé adúbpé mɔ́ éekwágké.”

7 Adén aláá-ɔ́ adé etógnén ne nyé awé nyédúbpé mɔ́ boṅ ne bad ábe béédúbpé mɔ́ adii nêṅgáne

“Aláá áde belón bé ndáb bə́mbə́ngə́ abenled,

də́o átímé aláá dé etógnén abé.”

8 Eténlédé ámpé nén bán,

“Mɔ́ adé aláá áde bad bélúmcé ámin

abé'-e ndim e aláá éché ebele bad békweg.

Bad békweg áyale béewə́gnɛ́ Dyöb. Nê də́o Dyöb átíídé aa ébenled ne bɔ́.”

9 Boṅ nyé, nyéesaá nê. Nyédii bad ábe Dyöb ápwədə, beprise bé Dyöb adé adé kə́n. Nyédii alon áde asáá, Dyöb dɛn-naa áwóo nyé ábel nén nyélúmed bad bémpéé ngáne ápédé bwám abé. Dyöb áhúde nyé á ehíntén-té, apɛné nyé á e'nyínen bə́ ekíde.

10 Ngen e' sɔ́ nyénkə́mbáá bad boṅ bə́o nyéenyédé bad bé Dyöb. Ngen e' sɔ́ ngəl e Dyöb enkə́mpaa áwɛn boṅ bə́o Dyöb áwógé nyé ngəl.

Nyébé betəṅ bé Dyöb

11 A-bánned nhe de mɛé nyésəṅten nén bán nyédii beken, nyétome'-e á nkòṅsé wén tómmén. Né-ɔ́ nyéebanné nlém ne mekan mé ekob é yál áyale nén nê áwanne ábɛn e' də́əṅ bən nzum.

¹² Nyéwáale alongé á bwám átínté e bad ábe béedúbpe Dyöb, ábel bonj ké béhñb bán nyédii bad bé mbéb, bényín nímēn mbeltéd mí bwám. Nê dékñj bébe Dyöb edúbé mbwe níme Dyöb dépéé á epun é asóg.

¹³ A ðin á Sàngú, nyéwógne bad bé nkòñsé ábe bédé á nkamlēn, ken nkamlēn ambáambáa,

¹⁴ ké é kñj échē édé ášē e nkamlēn ambáambáa, echē álómé ákògēn bebel bé mbéb ne ákémed bad ábe bébele' bwám.

¹⁵ Dyöb áhede nēn áá mekan mé bwám nímé nyébeleé mékúdtēn mehób níme ábē e'yókél é' bad béhóbēé nyé áyāl, níme béébií' é.

¹⁶ Nyéesaá betāñ, nyédii kunze. Bonj pen nē déebageé nyé nzm ábel mbéb. Nyébē nēe bembalede bé Dyöb.

¹⁷ Nyébage moosyaál edúbé. Nyédāñ-é bad bémpēe ábe bōmpē bédúbpe Krístāe. Nyébāa Dyöb. Nyébage kñj Embáambáa edúbé.

Metake níme Krístāe mébē syānē e'chemléd

¹⁸ Nyé bad ábe nyédé bembalede, nyésuded yāl ášē e bad ábe nyébenléé ne edúbé ésyāal. Nē déebāg ne ábe bébóó nlém bēnpen, bonj nē ábē ne káññe ábe bébébé nlém.

¹⁹ Dyöb débē menyinje ne nyé nzé nyéweséné e'wē é' metake níme nyéñkēmbáa nyékude áyāl echē.

²⁰ Nzé ebelé mbéb, bonj ewēséné mbēte áyāle nímé mbéb, ne nsyāñ ríhée wékúdté? Bonj nzé ewēséné metake ké áyāle dyam á bwám áde ébélé, né Dyöb débē menyinje ne wē.

²¹ Mmēn metake mébōñnéde nyé awé Dyöb ápwédé, áyāle nēn Krístāe mwēn antāg á nló nímēn. Anlyágé-é nyé elañsēn ábel nyéhíd nímē mekuu.

²² Enkēmbēnlé mbéb ké nhóg, modmod enkēnwóg-kaá mó eyale é mbéb á nsal.

²³ Ade bad bésyásó mó, enkēntimtēnné bō. Ade bétāgté'áá mó, enkēnsidte bō. Bonj ambē mésyāal á mekáá mé Dyöb áde ákáadte bad bésyāal nyaa póg.

²⁴ Krístāe mwēn ampēm nímēd mbéb áwe yāl á awóg ábel nēn deewóó dyamdyam ábel ne mbéb, débele-é mekan níme Dyöb áhedeé, á alongé ádēd. Echē sii ébélé nyékude e'choóchoñ.

²⁵ Nyēmbé nēe ndyōñ mí mbód níme mbós bonj bōb Dyöb ápééné nyé ámbíd áhíd mod awē anone nyé ngāne nnōn-a-mbód áñānéé éche mbód.

3

Bebaád ne ábab bechóm

¹ Nyé bebaád bé bechóm-me nyéwógne áben bechóm ábel bonj ké émbē nēn bán bééhídē eyale é Dyöb, nímēn mbeltéd mí bwám nímēl bōmpē bétimmed Dyöb, bédúbé-é mó. Ké nyéētōgne bō dyamdyam aláa,

² bényín ádēn abé á bwám áde áasáa.

³ Nyéesūmē nlém nēn bán ábēn e'bonj é'bide dāsō áyāle ekñj é mbíd ebwóg nēe anabe dé esid, ahé á bwēm nāñgāne e'bōñ, nsāñ, ne e'bēse ké'ε kase é mbóté.

⁴ Bonj béhii nyé dāsō ne e'bonj ábe é'bide nyé áte. Abé e'bonj béehñlānné áyāle é'bide ne edāádāñ echē épwiítédé echē éetagtán-ne. Abé e'bonj bōó Dyöb ányíneé áá é'dé etógnēn.

⁵ Nē dōo bebaád ábe bésáá bé' bōód ábe bēnsūm nlém ne Dyöb bébélé'áá bonj é'bāb e'bonj é'bíd áwed. Bēwógné'áá ábab bechóm.

⁶ Seraa mwēn ambé nē. Awógné'áá Abrahame áchágé-é mó áá asāñ. Nzé nyébele' mam mé bwám ésebān nyébāa dyamdyam, né nyédii Seraa ábe bñn.

⁷ Nyé baachóm-me ábe nyéwóó bebaád, nyétāñgēné ábēn bebaád edúbé abē. Mod téé ábē ne awē mwaád, áñone mó bwám. Béepedéé nyé e'wúu áte, bonj nyāábōo nyéékūd alongé nyaa póg. Adé alongé ádii nsimé níme Dyöb ábageé. Nzé nyéewāñle bō ngāne éhēdnēé, né Dyöb déewóóké nyé mekáne.

Nyébele bwám ké nyékude metake

⁸ Asóged, nyé moosyaál nyébē mod nhóg, nyéwōñ nlém níme nípwiítédé, nyésuded-te yāl.

⁹ Nyéētímté mbéb áyāle mbéb. Nzé mod ahóbé nyé dyam dé mbéb áyāl, nyémpē nyééhóbé mó dyam dé mbéb á yāl, nyékáné kánnēn bán Dyöb ánamed mó, áyāle nnam móo Dyöb dénhōbpē áá móóbē nyé áde ámpwēdté nyé.

¹⁰ Etéñlédé nēn bán,

“Kéñzéé awe ahede alongé dé menyinje,
áhédé-é áá mónyín e'pun é' bñn é' bwám,
eehóbé' mekan mé mbéb,
eékāle-é metóm.

¹¹ Asóg mbéb ábel, ábele mekan mé bwám.

Awāñēn ábē nsāñ ne moosyaál.

12 Ayāle Dyōb anōné bad ábe bébele mekan mé bwām
awoge-’ε bó mekáne.

Boŋ akunnan bad yāl ábē bébele mbéb.”

13 Nzé-ε ahele ádāŋ nyé mbéb abel nzé nyéwóó nlém áte ábel mekan mé bwām?

14 Boŋ ké nyéntāg-ke ké tagén ábel mekan níme Dyōb áhedéé, né Dyōb dé naméd nyé.
Nyéewógé mbwóg, nyéétāg-ε áte.

15 Boŋ pen nyébe Krístāe edúbé, nén móódé Sāŋgwéé á alongé ádēn. Nyébē mboŋsén póndé
ésyāál átūmtēn kénzée awé asédté nyé dyam tāŋgene nlém níme nyésūmē wée Krístāe.

16 Nyékéled nlém á abum. Nzé nyébele nē, nyésūdéd yāl ne edúbé ésyāál, nyékéled-te nlém
á abum wée bad ábe béhásé nyé mekan me mbéb ayāl, ayāle nyéhídéé Krístāe. Békwaŋ nzé
bényíné ádēn abé á bwām.

17 Nyébii nén bán édé bwām mod ákud metake ayāle dyam á bwām áde ábélé, nzé nē ádé
á ntii ní Dyōb, tómaa ákud metake ayāle dyam dé mbéb.

18 Krístāe mómpē ankūd metake awé-ε ayāle nímed mbéb ngen póg ne ngen ésyāál. Abédéé
mod awé abele mekan níme Dyōb áhedéé, boŋ anwé á nló níme bebel bé mbéb. Ambel nē,
ábel dépe wée Dyōb. Bad bēnwū mós boŋ échē ekob é yāl chós énwē. Dyōb dēmbēl échē
edáádāŋ émbē ébē á alongé.

19 Eché edáádāŋ chós-áá ánkéénné á mbwóg áke dé akale e’daádāŋ eyale é Dyōb.

20 Abēn e’daádāŋ é’bédéé e’daádāŋ ábe bēnkēnwógēn Dyōb se’ bósód áde Dyōb dēnchabtédte
bó e’kad áte ábel bétéde nímad mbéb á póndé échē Noa áló’áá bōle é’mbáá. Bad waam
bēnpen bós bémbē á bōle-tē. Bēnkūd e’soósōŋ ayāle mendib.

21 Nén ádé melemlēn nēŋāne edusen. Eché edusen chós ébele bōob boŋ bad békūd
e’soósōŋ á ngīne e mpūu níme Yesu Krístāe. Edusen éesaá awobe á yāl áhúd mbinde boŋ
édii ákwēntēn dé abele Dyōb ne nlém níme rísáá.

22 Krístāe akii ádyōb, áwed-taá ádyéé Dyōb á ekáá é mbáá boŋ ákamláán ángel ésyāál,
benkamlenē ne ngīne échē édé ámín.

4

*Alongé á bad ábe bédúbpe
ábē ngāne Dyōb áhedéé*

1 Né-ós ngāne édii bán Krístāe ankūd metake é ekob é yāl, nyémpē nyétāŋgéné nyébē
mboŋsén áwōŋ melemlēn mé mewēmtēn nēŋāne ánwōŋgē. Ayāle, kénzée awé atagé é
ekob é yāl, asógé mbéb abel.

2 Ngāne édii-’áá né, alongé ádēn á nkōŋsé wén ábē ngāne Dyōb áhedéé saké bán mpúlé mé
nkōŋsé múmós níkamlan nyé.

3 Mekan níme bad ábe béebii Dyōb bédāé’é abel móo nyémpē nyébélé’áá. Ene póndé
emaá atóm, ekwōgnédé-ε. Nyékábé’áá mesón, nyéwōŋ nlém áte ábel mam mé mbéb,
nyémwágé’áá mīm mékōbē nyé, nyéchagé’áá ngande échē bad bémwágé’áá mīm mékōbē
bō, bébelé-ε e’tongé é’ mekan, nyé bēnlé-ε nyōb mémpē, dyam áde déebo.

4 Bēn ábe nyāábō nyébeláá nímén mbeltéd mé mbéb bósód, bédé menyáké bōob ányín
nyéesaá ne bó ámpē ábel epuutéd ne e’kúkú é’ mekan. Né-’áá ákás boŋ bésyāá nyé.

5 Boŋ bétýēm á nkáá á’só é’ Dyōb áde ábōŋséné ákáad moosyāál. Akāad ábe bédé álongé
ne ábe bēwédé.

6 Nén dós dékēŋ boŋ nkalan ní bwām níkanléd kásŋ ne wée bad ábe bēwédé, ábel boŋ kénéé
bēnkāádté bó áde bédii á nkōŋsé-te, bēwé-ε ngāne moosyāál áwágke, béhele-se bébē á alongé
ngāne Dyōb ádíí.

Nyébenlad nde éche Dyōb ábágé nyé bwām

7 Asógé dé mekan mésyāál ádé benben. Né-ós nyébwōg yāl nyétéd-te póndé ábel nén nyéhel
akáne.

8 Ámín e nímén mésyāál, nyédāŋ nhóg ne aníní ne nlém rísyāál. Nyédāŋ nhóg ne aníní,
ayāle edāŋge ékūdtaŋ mbéb híin.

9 Nyékob nhóg ne aníní nken ésebān nyényonŋe áte.

10 Dyōb áwóó nde híin, abagé-ε mod téé échē nde. Nyébē bembáledé bé bwām nyébenlad-
te échēn nde áwōŋgen nhóg ne aníní.

11 Ane awé abíe’ dyam ahób, ahóbé dós néé nhóg awé akale’ e’yale ábē é’bídé wée Dyōb dēn.
Ké nzé-ε awé awōŋgan baáb, ábele’ nē ne ngīne esyāál échē Dyōb ábágé mós. Nē débídéd
ehúmé é Dyōb áwed á yāl e mekan mésyāál mbwiined ne Yesu Krístāe. Ehúmé ne ngīne
esyāál bébāgnédé mós á ngíndé ne á ngíndé. Ebē nē.

Metake níme bad bé Krísto békudéé

12 A-baányāŋ, nyéebág menyáké ne mekəŋsen mé ngīne níme mépiide nyé bōob. Nén
déebāŋ nyé nken.

¹³ Nyébê menyinge pen nén, nyêkude' metake melemlen ngáne Krístaa ákudé' áá, ábɛl nén nyélón ne menyinge á pónde échê Dyöb délumédte ehúmé éche Krístaa.

¹⁴ Nzé bad bésyáa nyé áyale nyédíí bad ábe béhíde Krístaa, né yál eboó nyé áte, áyale ehúmé é Edáádaj é Dyöb édé ne nyé.

¹⁵ Boŋ pen nzé nyêkude metake éébāg nén bán nyêkude mímé metake áyale nyéwúú bad, ké' é áyale nyéchíbé, ké' é áyale nyédíí bad bé ebébtéd, ké' é áyale nyéssléé mam mé bad áte níme méenóné nyé.

¹⁶ Ké né-é, nzé nyêkudé metake áyale nyédíí bad ábe béhíde Krístaa, nê déékwāgté nyé. Nyésāgnɛn Dyöb sāgnɛn nén bán béchágé nyé bán bad bé Krístoo.

¹⁷ Ayāle pónde édé échê Dyöb débootédte bad akáad, ábootéd-te ne abē bad. Nzé Dyöb áhale ábootéd-te ne syānē awé dedé bad bé Krístoo, chán-nā ébēñnē bad ábe béebélé' mam ngáne nkalaj m̄ bwām ní Dyöb ríhédéé.

¹⁸ Eténlédé-é á kálag e Dyöb nén bán,

“Nzé éhele élenléd káāŋne mod awé abele ngáne Dyöb áhédéé áte ákud e'sooson, né chán-nā ébēñnē bebelé bé mbéb ne bad ábe béedúbpe Dyöb?”

¹⁹ Né-óó, bad ábe bétage' ngáne Dyöb átíídé, bēbē bébele mekan mé bwām, bébe-é yál á mekáá mé Dyöb áde áhágé bō, mō awé ábele kéchéé échē áhóbé.

5

Petro alébe bad ábe bélyágte mwembé

¹ Mē néé nhóg awé alyágte', ndás mēé m̄be bad ábe bélyágte' átínté echên elébé. Ndé nhóg awé ambé metake níme Yesue ásé. Ehúmé échê Dyöb débéé Krístaa épé awém ampé. Nlíbe' nyé nén mēé,

² nyénōne bad ábe Dyöb ábānné ásé echên melemlen nēŋgáne nnōn-a-mbód ánōné éche mbód. Nyénōne bō áyale nyédás bō anōn. Nyéēnōnē bō byánán bényágté nyé ánōn bō. Nyébele' mímé nsón saké é etútú é nsyáāŋ, boŋ ébē bán nyéwóó nlém ábél mō. ³ Nyéekamlán bad ábe bédé ásé echên ne ngíne. Nyébē bad ábe béhídté mekuu nímāb.

⁴ Ade kāŋ e benōn-bé-mbód épéé, ábē nyé nsábe níme ríchábé ámín. Mmē nsábe mbē á ngíndé ne á ngíndé.

⁵ Nyémpé ábe nyédé ásé e bad ábe bélyágte', nyésuded yál, nyésuded-te yál nzé nyéwōŋgan nhóg ne aníníí. Ayāle éténlédé á kálag e Dyöb nén bán Dyöb ákunna bad ábe bédé kúmbe yál, boŋ abage bad ábe bésúdté yál nsimé.

⁶ Né-óó nyésudéd yál ásé e ngíne e Dyöb ábél boŋ mwēn ácháged nyé á pónde échē ebōñédé mō.

⁷ Nyéchene mekan mésyāal níme métagte nyé áwe mekáá, áyale atédé mam níme métagte' nyé néé mímē.

⁸ Nyékób yál, nyétéd-te pónde. Mod a ekōyí awēn, Satane, ahōŋge néé ngii échē edume áte, ahede mod awé ányabéé áte. ⁹ Nyéēmwāg-se atóm nyé áte. Aden adúbe déesudé'. Nyébíí nén bán bad bēmpēe ábe bédúbpe néé nyé nkōŋsé áte rísyāal bōmpé békude metake níme nyémpé nyêkudéé.

¹⁰ Nyêkude' metake boŋ mímé metake méechabpé áte. Ámbíd e nē, Dyöb áde ábage' nsimé rísyāal dēn débē nyé kéchéé éche nyébódé. Ábél nyésūmēn, awéd-te nyé áte. Adíí Dyöb áde nsimé mímē ríkwoŋnédé moosyāal, mbē-é pónde ésyāal. Mō apwédé nyé ákud éche ehúmé échē ébē á ngíndé ne á ngíndé. Nyéékūd-te chō áyale nyédé ne Krístaa.

¹¹ Ngíne esyāal edíí échē á ngíndé ne á ngíndé. Ebē ne.

Melentsn mé asóg

¹² Sailase mō awōŋgéné mē átel anén mwā kálag. Adíí mē néé mwānned mbānné-é mō nlém á yál. Ntenle nyé enén kálag áwéd nyé nlém á abum, áláa-é nyé nén mēé mímén mam níme ríténlé nyé médíí nsimé ní Dyöb ní mbále. Nyéehúdé mekuu áhed.

¹³ Baányon bé mwembé m̄ Babilon ábe Dyöb ápwédé néé nyé, bélómmé nyé melentsn. Awem mwān awé ríkwógté á adúbe-té, Makōse mōmpé alómmé nyé melentsn.

¹⁴ Nyéhé nhóg ne aníníí tál álúmed edāŋge. Nsarj m̄bē ne nyé bad bé Krístoo bésyāal.

Kálag eche elónténé ébε eche Petro Ndibned ní kálag

Kálag echε elónténé ébε echε Petro ántenlé, bad bé Krísto bé' só bésyāāl bóo ánteléé chό. Ene pón dé bad bébéde ábe béyágté' áá bad ayáged dé metóm. Adé ayáged dé metóm ábélé' áá bad bébéle e' tóngé é' mekan. Né-óó, Petro antél ene kálag álúmed áá míme mekan mééboo' é. Anlúmed bó áte nén áá béétāngeneé échē ndín é mekan ahíd. Áá dyam áde betāngéné abel ádíi, ábíi mbále tāngene mam mé Dyōb ne Sāngú Yesu Krístā ne ádúbe bó ne nlém nhóg. Bad ábe béyínné Yesuε béwóg-ke mekan míme áyágté' áá, bóo bébéle bonj ábén bad bébíi nímé mekan. Atón ahóg áde Petro ánkongé anón áte ábéde tāngene bad behóg ábe bélúmté' áá bán Yesu Krístā éepáá ámpē. Anlúmed bó áte nén áá atoo áde Krístā átongeé ápe, ádíi áyāle Dyōb déehedéé áá modmod ábōd alongé, bonj áhede' áá bad bésyāāl bétede abel dé mbéb, béhíde Krístā.

Nkabté d ní kálag

Ndibned ní kálag 1.1-2

Mpwéd té d ní mod a Krísto 1.3-21

Bemeléede bé metóm 2.1-22

Epe e asóg éche Krístā 3.1-18

¹ Me, Simōn Petro, mbáledε ne mbapεε a nlómag awé Yesu Krístā, ntenle nyé bad ábe nyédúbpé Yesu Krístā melemlem ngáne sémpē sédúbpé mó. Yesu Krístā adíi syāné Dyōb abé-'ε Nsoode. Abele' mekan míme metāngéné. Mwēn-naá akáó bonj syāné moosyāal dedúbé mó.

² Nsimé ne nsanj ní Dyōb mbád mbé ne nyé abíi áde nyébíí Dyōb, nyébíí-'ε Yesuε, awesyāné Sāngwéé.

*Nyébele' mekan míme mélúmté'
nén bán Dyōb dāo ápwédé nyé*

³ Ngíne e Dyōb ebagé syāné mam mésyāal míme déhedεé á alongé, ebélé-'ε syāné debele' ngáne Dyōb áhedεé. Nén ábénlédé áyāle debíi mó. Abénlédé eché ngum ne ábε e' bonj bé nlém ápwéd syāné ábε ábe bad.

⁴ Eche ehúmé ne ábε e' bonj bé nlém é' bélé ahóbé áá móóbelé syāné ndale é mekan é bwám. Abele' nímén mésyāal ábel bonj nyéesólé' mbélté d mé mbéb mé nkōjsé áte. Esíí é mekan mé ekób é yál chόó ébelte' bad échē ndín é mekan. Nzé nē ábénlédé né abé ádēn dēsān nēe abé á Dyōb.

⁵ Né-óó, bóob áde édíí nē, nyéwan áte ábel mekan mé bwám. Saá-kaá nē dēmpen. Nyétāngéné awan áte ámpē ábε bad ábe bébēnlad debyéé ábel mekan.

⁶ Abád ámín e debyéé, nyébíi ngáne nyékóbeé échēn yál. Saá-kaá akób á yál dēmpen. Nyébē bad ábe békaa' nlém. Amín e e' kanj bé nlém, abé ádēn átāngéné ábε ngáne abé á bad bé Dyōb átāngéné abé.

⁷ Saá-kaá ábel mam míme Dyōb áhedεé dēmpen. Edānge ébē áfnté echēn nyé Bad bé Krísto. Saá-kaá edānge áfnté e nyé Bad bé Krísto bēnpēn, bonj nyédān moosyāal.

⁸ Nzé áde abé ákwoge-'ε nyé áte, né debyéé áde nyéwóo tāngene Saá awéd, Yesu Krístā, déebáá ngēn, bonj débēl nyéchyáá' e' pum.

⁹ Bonj kēnzéé awé áde abé déesáá áte, adé nēngáne mod awé eéchābε' anyíne, ké'ε awé akwedé ndím. Acháténé-'ε áá Dyōb áwóbpé mó, álagsén-ne mó mbéb.

¹⁰ Né-óó, a-baányān nyénabe awan áte álúmed nén bán Dyōb dāo áchēnlé nyé, ápwéd-te nyé ábε ábe bad. Nhóbe nén áyāle nzé nyébelé nē, né nyéehúnné á mbéb-te mbéd.

¹¹ Nén débél-le Dyōb débē nyé kunze esyāal ásól ne ábε á nkamlēn nímín wéε Saá ne Nsoode awéd, Yesu Krístā ákamlanné nēε kān á ngíndé ne á ngíndé.

¹² Né-óó, ké nēε nyémáá nímén mekan mésyāal abíi bonj nyédúbé-'ε mbále eché edé áwéd-te, mébē níkamtén nyé mó.

¹³ Nnyíné-'ε nén méε, bóob áde nídíi ndé á alongé, éhednad nén bán níkamtan nyé nímén mekan pón dé téé ábel bonj nyékwanled.

¹⁴ Mbíi méε nkwogé nímén nkōjsé atede. Sāngwéé awéd, Yesu Krístā abelé mbíi nē.

¹⁵ Nwane-'ε áte áláa nyé nímé mekan ábel bonj ké nwé ké wéén, nyéhel mó akamtēn pón dé téé.

*Mbōn edé eche ényínné
ehúmé eche Yesuε dí d*

¹⁶ Saké pôle éche bad bën bénábpé sékanlé'áa nyé áde sénhōbpē bán Yesu Krístæ āpē āmpē ne ngum. Sébēn sēnyinné éche ehúmé díd.

¹⁷ Sébéde áhed áde Dyōb Titée ábágé mō edúbé ne ehúmé. Ehōb émbíd ámín éche Dyōb á Ngum álāngéé mō áá, “Awem mwān á nlém mō nēn, mō awōgte' me menyinge.”

¹⁸ Sébēn sēnwōg échē ehōb áde syāābōō débédé á mbōod echē esáá.

¹⁹ Né-ōō syāné dekoó adúbe nēn bán e'yale ábē bekal-bé-e' dāōdān bēnhōbpē é'dé mbále. Ebon nēn bán nyétōn bō awōglen. E' dīi nēe etrukān éche échodne' á ehintēn-tē kōān né Epun épédé échē bīn bésāā' é bon Krístæ, tintine á mbwēmbwē, āpen nyé á nlém-tē.

²⁰ Ámín e nímén mésyāāl, nyétāngéné asōntēn nēn bán modmod eéhēlēē-se ábenléd áde debyéé átōge mekan nīme bekal-bé-e' dāōdān bēnhōbpē ngāne éténlédé á kálag e Dyōb.

²¹ E'yale ábe bekal-bé-e' dāōdān bēnhōbpē bēnkēmbáá á ntīi mī moonoyon, bon Edāōdān éche Esáá chōō élyāgté'áa bad ábe bēnhōb ábē e'yale. Ábē e'yale bēnhūū ne Dyōb.

2

Bemeléede bé metóm ne ebébtéd éche békúdté

¹ Se' bōōd bekal-bé-e' dāōdān bé metóm bēmbíd áfinté e bad. Melemlen nē dōō bemeléede bé metóm bēbīdté áfinté echēn. Bēbenléd mwane āpēen ayāge dé metóm. Adē ayāge débēbēd bad ábe bédúbpé dō. Ábē bemeléede bé metóm bēbān Sāngwéé awē ahúde bō á mbēb-te á yāl. Nēn dēkōn bēn bēwāmsēn yāl ebébtéd akude.

² Bad hīin bēhīd échāb mbinde é mekan. Mbeltéd nīme ábē bad mébēl bad bēmpēe bēhōbē' mam mé mbēh tāngene Nzii e mbále.

³ Adān á chōm áde ábē bemeléede bé metóm débēl bēkanlé nyé pōle éche bēn bénábpé ábēl bēkobn nyé bwēm. Dyōb dēmmād mbakú abided se' bōōd áá mōkōgsēn bō. Mmē nkōgsēn nīsine-'e bō. Echē ebébtéd édé-'e bō á nzii.

⁴ Dyōb dénkēnchenéé ángel éche émbēl mbēh, bon ambwēm bō á ehyān é muú, áhed-tāá bēdīí á mehan é ehintēn-tē, bésine' Epun é nkāásé.

⁵ Dyōb dénkēnlagēsēn-naā bad bē' bōōd. Ámbēl mbúú enchó kōān mendīb ménlōne, méhōód bad bēsýāāl ábe bēnkēnwōn ábē á bad bé Dyōb. Noa awē álāngé'áa bad áá bēbele' mekan nīme métāngéné mwēmpēn-éé Dyōb dēnsongé alongé, nchoo ne bad saámbé bēmpēe.

⁶ Ámbid e nē, Dyōb dénkōgsēn myad mé Sodom ne Gomora. Anhyáád mō métim mbúbú, álúmed chōm éche ébenléd ne bad ábe bēewóo ábē á bad bé Dyōb.

⁷ Dyōb dénkōgsēn nīmē myad bon anōn alongé áde Lote, áyāle Lote abédéé mod á bwām awē enkēndān mbinde é mbeltéd éche ábē bad bé mbēb bēbélé'áa.

⁸ Ane mod á bwām adyēé'áa hōm ahóg ne ábē bad bé mbēb. Epun ne epun téé anyíné'áa, áwōgē-'e e'bébtéd é' mekan ábe ábē bad bēbélé'áa ne ábe bēhōbē'áa. Mmē mekan mébēbté'áa mō nlém á abum áyāle abédéé mod á bwām.

⁹ Né-ōō, Sāngwéé ábīí ngāne áhúdeé bad ábe bēwóo ábē á bad bé Dyōb á mekōgsēn-tē. Bon ābē akōgsēn bad bé mbēb kōān ne é Epun éche ákāádté bad bēsýāāl.

¹⁰ Abē akōgsēn bad, tānge bad ábe bēkódté esí é mekan mé ekob é yāl, ábe bēekobé-'e nkamlēn.

Ábē bemeléede bé metóm bédé kúmbe, bēbé-'e epame. Bēebagé-'áa ngume éche édé ámín edúbé ké ehóg. Bēsýāá' échē ngume kōānne syōsn ésebān bēwōge' mbwōg ké nhóg.

¹¹ Ké ángel éche éwóo ngīne ébē-'e ngum tōmaa ábē bemeléede bé metóm, eéhōbēē échē ngume éche édé ámín mekan mé mbēb áyāl á'sō wēe Sāngwéé mbéd.

¹² Bon ábē bemeléede bé metóm bēbele' mekan nēe nyam é mehīn. Echyáádté-'e ábel bēkōb chō bēwúu. Bēbele' kéchéé éche épífdé bō á nlém-tē. Ábē bemeléede bé metóm bēhōbē' dyam téé áde bēesōntēneé mam mé mbēb á yāl. Né-ōō, Dyōb débōdēd bō melemlen nēngāne bad bēwúé' é échē nyam.

¹³ Dyōb débēl bētāg bwāmbwam áyāle bētāgté bad bēmpēe. Bédāā' échāb esí é ekob é yāl akōded. Bēekwágé-'áá ábel nē ké mūte. Bēwōge' bwām ábel échē ndīn é mekan áde bēdyāgkē ndyééd hōm ahóg ne nyé. Né-ōō, bēbēbte nyé dīn, bēpiināád-te nyé akwāgkē.

¹⁴ Nsōn nīmāb nīsyāāl nīdīi ákáb mesōn ne kēnzéé awē bēnyíné. Echab esí ábel mbēb éemaá' é mbéd. Bédoge' bad ábe adúbe déewúu' é áte, bēhūnte' bō á mbēb-te. Ngoód édé bō á mekīl-te bwāmbwam. Bēdīi bad ábe Dyōb ábágé ebómān.

¹⁵ Bétédte nzii echē etāngéné, bēhīde' nzii empēe. Bēhīde' mbeltéd nīme Balame, * mwām awē Bēo. Balame andān mōnē nīme bēsābēē mō ábel mbēb.

* **2:15 Balame:** Balame ámbé nyōngé bwāmbwam ákud nsábe nīme kōn Balage ásābēē mō nyaa echē ámbēē mbonēsēn ké ábel bad bé Israel mbēb. Nēn áde á kálag e (Nom 22.4-35).

¹⁶ Boŋ Dyöb dêmbël ésel éche Balame énhöb wée Balame. Esel, nyam echê eehbé' akan, énhöb wée Balame ne ehöb é moonyon, ékáné mó áte. Nén dêmbël nímê mbeltéd mé mpemíne níme ane nkal é' d'áádəŋ Balame ménsöŋ.

¹⁷ Abən bad bédii néé n'yélé nímé níléné. Bédii néé mbembag éche epub ékeeneé. Ndid e ehíntén echê Dyöb ábánnédé bō esine bō.

¹⁸ Bébóo' nsal áte ngên. Bébénlad esíí é ekob é yál átéd bad nímé á abum. Bad ábe bétédeé nímé á abum bédii bad ábe bébóótédé mekuu ahúd á echoŋ é bad bé mbéb.

¹⁹ Bélänge' bad bán nzé behíde ádab ayáŋe né bébeáá á mehaŋ-tê, né béhele' bébel kéchéé éche bédáá, áde édíí nén bán mbéb ríháá bèn. Mbéb ríháá bèn áyale nén dyam ké áhéé áde ákamlan mod, ane mod abelé abé ntáŋ áse e áde dyam.

²⁰ Nzé mod adúbpé Səŋgú Yesu Krístəə, Nsoode, né amaa' alongé dé mbéb dé nkōŋsé ahide áte. Nzé amaa'-é dō ahide áte boŋ atímé ámbíd áwəd-te ámpē, áde alongé átédé'-é mó ntáŋ, né nyaa echê ádíí bōob edé mbéb tōmaa ngáne ánsəbēē abé.

²¹ Né émbē mboŋ nzé bēnkəntōŋen nzii e mbále abii tōmaa ámad chó abii boŋ bétimé' bébaa' mbéndé é Dyöb éche ésaá á yál. Alyáŋned dōó bēnlyáŋnedte bō eché mbéndé.

²² Nén ábele' ngan eche békálé nén bán, "Mbwé edyáŋ ábē e'chó," ne eche békálé nén bán, "Ké chán bēnwāŋedte nguú mendíb eéchatánné elōob," éde mbále.

3

Epun echê Səŋgwéé ápeé ámpē

¹ A-baányan, nén kálag chó elónténé kálag ébe eche rítenléé nyé. Atínté eché kálag, nkámtené nyé mam níme nyémáá abii ábel boŋ nzé nyéwémtené mekan níme rítélé, mewōŋgan nyé áwōŋ mewémten níme métáŋŋéné.

² Nhede méé nyékamten mekan níme bekal béd'áádəŋ bé Dyöb bēnhöbpe se' bōód bán mébenléd. Nyékamten-ne chōm-éé Səŋgwéé, Nsoode awəd ánláá' é bembapeé bé nlomag áá beláa nyé.

³ Dyam dé'só, nyétáŋŋéné asōŋten nén bán á e'pun bé asóg, donŋe á bad débid ábe esíí é mekan mé ekob é yál ékamlané ádab alongé. Bēwélé nyé,

⁴ béhəbē bánken, "Anhōb áá móəpē ámpē, héé-ə ádíí bōob? Abəd besáá bēwéde bōob échábé áte, boŋ káŋŋne' bōob mam médíí méde melemlem ngáne mémbeē se á mbootéd mé nkōŋsé."

⁵ Bēn bēkoo' ahúd á mewémten nén bán Dyöb dēmbenléd eché eyale é nsal áhəŋ nkoŋ ní mīn ne ní sé. Ambēl nkōŋsé mbíd á mendíb-te, ambenléd-te mendíb áde áhágé nkōŋsé.

⁶ Mendíb mwēn-naá ámbenlédte ábébed nkōŋsé mé' bōód. Anlóm mbuú. Ene mbuú enchó káŋŋ mendíb melóné nkōŋsé áte rísyāal, chōm ésyāal éhō.

⁷ Melemlem mé eyale níme Dyöb dēmbenlédte áhəŋ nkoŋ ní mīn ne ní sé, móó ábénlédé ákəə mó ábel boŋ ábébed mó ne muú. Asinne' nkoŋ ní mīn ne ní sé mé' chii epun é nkáásé. Eché epun dōó ábōdédte bad ábe béewōo abé á bad bé Dyöb.

⁸ Boŋ a-baányan, nyéechatán dyam ahóg. Nyéechatán nén bán ne Səŋgwéé, nhəŋlén méesaá átínté e epun ehóg ne ekálé é mwé.

⁹ Səŋgwéé eétoŋŋéé álóned áde akag. Donŋe á bad bēwémtan pen bán atonŋe'. Boŋ awéséné nyé áyale éhēdēē áá modmod ábōd alongé. Ahede' áá bad bésyāal békuned mbíd bétéde abel dé mbéb.

¹⁰ Boŋ epun éche Səŋgwéé ápeé, ápē taléd, melemlem nēŋgáne nchíb ápagké. Eché epun, abobe dényōŋ ne esaád é ngine, chōm ésyāal éche éde ádyōb éhyāŋ, ényōŋ'-é. Nkōŋsé ne chōm ésyāal éche éde áwəd-te éhyāŋ, ényōŋ'-é.

¹¹ Ngáne édíí bán chōm ésyāal étáŋŋéné anyōŋ, nyaa é bad éhéé-ə nyétáŋŋéné abé? Abé ádén átáŋŋéné asán, nyéwōŋ'-é abé á bad bé Dyöb.

¹² Nyéwále ádén ngáne nyésineé epun éche Dyöb átífidé áá Krístəə ápē. Nyéwan-ne áte ábel éwámsen ape. Eché epun muú méhyāād abobe ámīn, muú ményáméd chōm ésyāal-le éche éde áwedé-mīn.

¹³ Boŋ desine' akag áde Dyöb ábágé syāné áá móəbēl abobe dékōšlē ne nkōŋsé mé ékōšlē. Bad bésyāal ábe bēbē á nkōŋsé mékōšlē bēbelé' mekan níme rítáŋŋéné.

¹⁴ Né-əó, a-baányan bōob áde nyésineé eché Epun, nyébel ngáne Dyöb dényínnē nyé néé bad ábe bésáá, nyébel-le ngáne éehōbpé áá nyébele mekan mé mbéb. Nyébē'-é nsaj ne mó.

¹⁵ Nyébii nén bán atoo áde Səŋgwéé awəd átonŋeé ápe, ádíí ábel boŋ ábe bad pōndé ákud e'soosōŋ. Nén dōó Paale ámpē ámbenlédte debyéé áde Dyöb ábágé mó, átele nyé kálag.

¹⁶ Atelé ádén atón á kálag eché ésyāal. Donŋe a mekan áde áwe kálag-té áde álélé asōŋten. Eché ndín é mekan chóó bad ábe béewōo nsōŋten, ábe adúbe'-é déetyéeméé bēhəŋlanné nsōŋten níme rídé áwəd-te nyaa eché eetáŋŋene. Melemlem nē dōó bēhəŋlanné e'pəd bēmpēe á kálag e Dyöb-te. Abel áde bēbēle'-áa nē dékšŋ bēbōd ádab alongé.

¹⁷ Boŋ a-baányan, nyé pen nyémaá nímén mekan abii. Né-óó, nyétêd pónde ábel boŋ bad ábe bééhíde' mbéndé é Dyób, bééhüntē nyé ne mewusé níme bégýtéé nyé. Nzé nyéhíde nímāb mewusé, né adúbe ádēn déetyéémmé.

¹⁸ Boŋ pen nyébê nyéwōŋ abé áde Sāngwéé, Nsoode awêd, Yesue Krístā, ābādē nyé nímē nsimé abe. Edúbé ébê ne mó bootya bōōb ne á ngíndé. Ebê nê.

Kálag e'só eche JONE Ndibned ní kálag

Metote médé mébe níme mékásá bon Jone átél kálag e e'só. Atote dé e'só ádíi áwéd bad ábe áténlé chò nlém á abum ábel bébê mod nhóg ne Dyòb ne awe Mwán, Yesu Krístáa.

Metote níme melónténé mébe médii, Jone alánge bad ábe áténlé chò aá bétéd pónde ne ayáge dé metóm áyale débèbèd abé áde bédíi mod nhóg ne Dyòb ne Yesu Krístáa. Adé ayáge dé metóm áhóbe nén bán ebébtéd épag ne abé áde moonyon ábágkè á nkòjsé tē, bán né-òó, Yesue, Mwán a Dyòb eéhele'áa-se ákòj moonyon abé. Abé bemeléede bé metóm béhóbe nén bán nzé mod ákúd e'sóson, atánjéné néé ábáá mekan mé nkòjsé á yál. Bényágte ámpè nén bán e'sóson béewóó'é dyamdyam ábel ne abé á bwám ne áwón edánge ne nhóg ne aníníi.

Alúmed aá ádè ayáge déetánjéneé Jone alúmté á kálag tē wén aá Yesue ankòj moonyon abé akoó'-e alúmed áte nén aá bad ábe bédúbpé Yesue bon bédán'-e Dyòb hétánjéné néé bédás nhóg ne aníníi.

Nkabted ní kálag

Ndibned 1.1-4

E'nyínen bé ekíde ne ehíntén 1.5-2.29

Bán bé Dyòb ne bán bé Satané 3.1-24

Mbále ne awusé 4.1-6

Chòm éche edánge édíi 4.7-21

Adúbe áde átómé mekan mésyáal áte 5.1-21

Eyale é alongé

¹ Ntenle' nyé tãngene ane awè adé Eyale é Dyòb éche épeene' alongé. Abédé se á mbooted, sênwóg mam tãngene mó, sênnyínén mó m'íd, sémbán mó ð'íd áyál, sémbán-ne mó ekáá á yál.

² Mó awè apeene' alongé an'fm moonyon awè bényínneé ð'íd, dennýín-ne mó. Sébíde' mó mbón, sélãnge'-e nyé mam tãngene mó awè abage' alongé áde déemaá', mó awè ambé ne Titée, bon á'fm abyéén á'fnté echêd.

³ Chòm éche sényiné, éche séwógé'-e, chòó sélãngeé nyé, ábel bon nyébê nlatén ne sé. Mméd nlatén-ne rdíi nlatén níme déwóó ne Titée ne awe Mwán Yesu Krístáa.

⁴ Sételé enén kálag, ábel bon níméd menyíngé melón mbon.

Alongé á bad ábe bédé á e'nyínen bé ekíde

⁵ Bóob-òó, póle eché séwógé á nsal wée Yesu Krístáa bon sélãnge'-e nyé edii nén, Dyòb ádíi e'nyínen bé ekíde. Atón dé mbéb ké ahóg déesaá mó á yál.

⁶ Nzé dehóbé bán dedé nlatén ne mó áde alongé ádéd ádíi ádíi alongé dé ehíntén, né dekalé metóm né níme syáné mbéltéd-te méhídéé mbále.

⁷ Bon nzé dewóó alongé dé e'nyínen bé ekíde ngáne Mwèn-ne ámpè áwóó, né syáné déébe nlatén ne nhóg ne aníníi, mekií níme Yesue awe Mwán, mó'-e méwobé nímesyáné mbéb rísyáal.

⁸ Nzé dehóbé bán deewóó'é atón dé mbéb ké ahóg á yál, né dedoge' echéd yál, né mbále'-e éesaá syáné áte.

⁹ Nzé depanle' nímesyáné mbéb áte, né ábél ngáne áhóbé, ábél-le chò nyaa eché etánjéné. Alagsén syáné mbéb, áwòbe'-e nímesyáné mbéb rísyáal.

¹⁰ Nzé dehóbé bán deébéleé mbéb, né dehóbé' bán Dyòb ádíi nkal a metóm, né eyale é Dyòb éesaá'-aá syáné áte.

2

Jone ad Krístáa mó adé awesyáné Nwónjéne

¹ Nyé ábe nyédé nēngáne ábēm bán, ntenle nyé enén kálag, ábel bon nyéebélé mbéb. Bon nzé mod abelé mbéb, syáné dewóó mod awè abele' mekan níme métánjéné, Yesu Krístáa. Mó achánge' syáné Titée.

² Krístáa mwèn-éé ambé nēngáne nde eché Dyòb dēmbēnlédte ákòde syáné áyál e mbéb níme dēmbēnlé. Ambel né ábel dékud alagsen. Saá-kaá mbéb nímesyáné mēmpen, bon mbéb níme bad bé nkòjsé bésyáal.

³ Nzé dehíde' mbéndé é Dyòb né édé mbále bán debíi mó.

⁴ Kénzée awé ahóbé aá móbfi mó, bon eehíde' éche mbéndé, né ene ndin e mod ádíi nkal a metóm, né mbále ké póg éesaá'-áa mó áte.

⁵Boŋ kénzée awë abele' ngáne eyale é Dyöb éhóbéé, edənge éche ene ndín e mod ádás Dyöb éloné' mbon. Nén dáo ábele' boŋ debíi ne mbále bán dedé ne Dyöb.

⁶Kénzée awë ahóbé aá módē ne Dyöb, ádē alongé átāngéné abé nēngáne alongé áde Yesu Krístā.

Mbéndé e ekóólé

⁷A-baányan bē edənge, enén mbéndé echē rítenléé nyé eésaa mbéndé e ekóólé, edii mbéndé e nchun echē nyénwōngē se á mbooted. Enén mbéndé e nchun edii nkaŋ nī bwām nīme nyémáá awóg.

⁸Boŋ kénē, mbéndé e ekóólé cháo rítenléé nyé bōob, mbále echē edé-'ε á mbéndé-te wē, enyinnédé á alongé áde Krístā, enyinnéd-te á alongé ádēn, áyāle nēn ehíntēn ébóótédé amaa, e'nyínen bē ekíde é' mbále é'máá abooted dé apen.

⁹Kénzée awë ahóbé aá módē á e'nyínen bē ekíde boŋ ákōō mwānyan, ene ndín e mod adii adé á ehíntēn-tē.

¹⁰Kénzée awë adāō mwānyan adé á e'nyínen bē ekíde-tē. Né-ō, ene ndín e mod éēbēlēē dyamdyam áde ábelte' bad bēmpēe mbéb.

¹¹Boŋ kénzée awë akōō mwānyan, awóō alongé dé ehíntēn. Ene ndín e mod akag á ehíntēn-tē eebýē-'áá wēe ákagké áyāle ehíntēn ébélé adé nēē mod awë akwedé ndím.

¹²Nyé ábe nyédé nēngáne ábēm bán, ntenle nyé áyāle Dyöb álágséné nyé mbéb á dín áde Yesu Krístā.

¹³A-besán, ntenle nyé áyāle nyébíi ane awë adé se á mbooted. A-kódébad, ntenle nyé, áyāle nyétómé ane awë adé ebébtéd áte.

¹⁴A-bānbān, ntenle' nyé áyāle nyébíi Titée. A-besán, ntenle nyé, áyāle nyébíi ane awë adé se á mbooted. A-kódébad ntenle nyé, áyāle nyéwúú áte, eyale é Dyöb édé nyé áte nyétómé-'ε ane awe adé ebébtéd áte.

¹⁵Nyéēdāō' nkōŋsé ké'ε bwēm ábe é'dé áwēd-te. Nzé mod adāō nkōŋsé, né eēdāō'ε Titée.

¹⁶Bwēm é'syāal ábe é'dé á nkōŋsé te, nédē bwēm ábe moononyon a ekob áwóo'ε esíi áte, bwēm ábe mīd médāō'ε anyín ne bwēm ábe bad békumnéé ekáá á tāl, bēhúu'ε ne Titée, é'dii bwēm bē nkōŋsé.

¹⁷Nkōŋsé ne ábe bwēm é'syāal ábe baányon bēwóo'ε esíi áte áyāl echáb, rítóme tómnē, boŋ mod awë abele' ngáne Dyöb áhedeé, abāg ne Dyöb á ngíndé ne á ngíndé.

Jone ad nyétéd pónde

ne bad ábe bētāngan Krístā

¹⁸A-bānbān, asóg ákwógé ape. Bénlāā nyé bán Mod a Ekoyí awë Krístā āpē, bōob-pe bad bē ekoyí hūin ábe Krístā bémáá ape. Né-ō, debíi bán asóg ákwógé ape.

¹⁹Abé bad bēnkēnkongé bad abé ábe bédé nimesyānē nlatēn, né-'áá dēnkāŋ boŋ bētādē syānē. Nzé bēmbē bad ábe bédé áwesyānē nlatēn, né bēmbē bēbé ne syānē, boŋ bēnchenē syānē ábel boŋ ényínned ne mbále nēn bán bēnkēnkongé abé ne syānē.

²⁰Boŋ ne nyé, Ane-awë-Béwógté abagé nyé Edāādāŋ éche Esáá. Né-ō, nyé moosyāal nyébíi mbále.

²¹Meétēnlēē nyé enén kálag áyāle nyéebíi'ε mbále, boŋ ntenle' nyé chó áyāle nyébíi mbále, nyébíi-'ε nēn bán metóm ké mehóg méebíidēē á mbále-tē.

²²Nzéé-'ō adé nkal a metóm? Nkal a metóm adii kénzée awë ahóbé aá, Yesu e eésaa Ane awë Dyöb Áwógté. Ene ndín e mod chó edé Mod a Ekoyí awe Krístā, abāā' Titée á yāl, abāā-'ε Mwān.

²³Mod éēhēlēē-se abāŋ Mwān a Dyöb á yāl se abé ne Titée. Kénzée awe akobé Mwān a Dyöb, akobé kōāŋne Titée.

²⁴Nyényín nēn bán nkaŋ nīme nyéwógé se á mbooted rídé nyé áte. Nzé nkaŋ nīme nyéwógé, rídii rídé nyé áte, né nyēmpē nyēēbē ne Mwān a Dyöb nyébē-'ε ne Titée.

²⁵Chōm éche Krístā ahóbé aá módē syānē édii alongé áde déemaá'.

²⁶Ntenle nyé nímēn mam áyāle bad bédé ábe bēhede nyé adog.

²⁷Boŋ ne nyé, Krístā abagé nyé Edāādāŋ éche Esáá. Abé áde échē Edāādāŋ édii nyé áte, nyéetōgnēné modmod áyáged nyé. Echē edāādāŋ éyágte nyé mam mēsyāal, mam nīme éyágte-'áá nyé médé mbále, méesaá metóm. Né-ō, nyébē nyébē ne Krístā ngáne Edāādāŋ éche Esáá éyágté nyé.

²⁸Bōob-pāō, a-bānbān, nyébē mod nhóg ne mō, ábel boŋ epun éche ápēé, nlém ríwúu syānē á abum, deewógé-'ε e'sōn átyéem mō á'sō.

²⁹Nyébíi bán Krístā abele mekan nīme métāngéné á'sō é' Dyöb, né-ō, nyébii bán kénzée awë abele' mekan nīme métāngéné, adii mwān a Dyöb.

3

*Jone ahóbé ngáne alongé
áde bán bé Dyób átəngéné abé*

¹ Nyényín ndin e edənge eché Titée ádáá syánē. Eché edənge échábé ámin káəy béchəge syánē bán bán bé Dyób, bən-naa dékóó abé. Nzəm eché ekáá boŋ bad bé nkəŋsə béebii syánē edii áyale béesəbpeé Titée abii.

² A-baányan bé edənge, syánē dedii bán bé Dyób boob. Eəbyēnēē bwám pen chōm-éə syánē débēē. Boŋ debii bán pónde eché Krístəə ápeé, syánē déēbē nēngáne mó, áyale nēn deényín mó ngáne adii.

³ Kénzée awé asumé nlém wée Krístəə átəngéné nées asənté eche yál ngáne Krístəə mwən ámpē ásaá.

⁴ Kénzée awé abelé mbéb, akwedé nkaá áyale abóó mbéndé e Dyób. Mbéb idii abóó á mbéndé e Dyób.

⁵ Nyébii bán epe éche Krístəə ámpēé á nkəŋsə ébedéé ámad mbéb. Krístəə mwən-ne eewóó' é mbéb ké nhóg á yál.

⁶ Kénzée awé adé ne Krístəə éēbēlēē mbéb. Kénzée awé abele mbéb, eenyínéé Krístəə eebii-áa mó.

⁷ A-bānbān, nyéemwāg se mod ádog nyé. Kénzée awé abele mekan míme métəngéné adii mod awé abele mekan míme métəngéné á'sō é' Dyób, ngáne Krístəə ábeléé mekan míme métəngéné.

⁸ Kénzée awé abele mbéb, adii mwān awé Devale áyale Devale ambootéd mbéb abel sé á mbooted. Nzəm eché enkəŋ boŋ Mwān a Dyób ápē á nkəŋsə, ébedéé ábēbed nsón míme Devale ábelé.

⁹ Kénzée awé adé mwān a Dyób, éēbēlēē mbéb, áyale abé á Dyób adé mó áte, éēhēlēē-é-se ábelé mbéb áyale Dyób dáo adé mó Sáá.

¹⁰ Chōm éche ékoo' syánē alúmed bad ábe bédé bán bé Dyób ne ábe bédé bán bé Satan edii nēn bán, bad ábe bébelé' mam míme métəngéné ne bad ábe béedəə baányan bé Krísto, béesaá bán bé Dyób.

Jone áa bad bédəŋ nhóg ne aninii

¹¹ Nkalan mí bwám míme nyénwōgkē se á mbooted mbédéé nēn bán, dédəŋ nhóg ne aninii.

¹² Deebág nées Keene. Keene abédéé mod awé Satané, anwúú-é mwānyan. Cheé énkəŋ boŋ Keene awúú mwānyan? Anwúú mó áyale mekan míme mwən ábelé' áa mébédé mam mé mbéb boŋ míme mwānyan méntəngēn á'sō é' Dyób.

¹³ Né-ó, a-baányan, nyéebág menyáké ngáne bad bé nkəŋsə békáá nyé.

¹⁴ Dedəə bānneé bé Krísto bémpēe, nē dáo ábelé boŋ debii bán dehídté áse e ngine e kwééd dekudé alongéé áde déemaá'. Kénzée awé eedəə bānneé bé Krísto bémpēe, alyágé adé áse e ngine e kwééd.

¹⁵ Kénzée awé akáá mwānyan a Krísto, adii mod a ewúen, nyébii-é nēn bán alongéé áde déemaá' déesaá mod a ewúen ké nhóg áte.

¹⁶ Krístəə ambé áde alongéé á nló mímēd. Nēn dáo ábelé boŋ debii chōm éche edənge edii. Né-ó, syánē ámpē detəngéné nées débágé ádeəd alongéé á nló míme bānneé bé Krísto bémpēe.

¹⁷ Nzé mod adé awé adé nhon, boŋ anyiné mwānyan awé atóge' boŋ eewóó nlém mí bwám áwōŋgen mó, chán áhelese ahób áa módəə Dyób?

¹⁸ A-bānbān, edənge éche déwánléné nhóg ne aninii, éetəngeneé abé dásō á nsəl-tē ne á póle boŋ étəngéné abé á mbeltéd ne á mbále-té.

*Jone ahóbé chōm éche ébele'
boŋ deewógé mbwóg á'sō é' Dyób*

¹⁹ Nzé delúmté nhóg ne aninii edənge, né debii bán dedé bán bé mbále ne debii-é bán nlém méwūú syánē á abum á'sō é' Dyób.

²⁰ Pónde ké ehéé eché mímēd mewēmten mélāngé syánē bán debelé mbéb, debii bán Dyób abii mam mésyāəl tómaa ngáne syánē débii.

²¹ A-baányan bé edənge, nze mímesyáné mewēmten méélānge syánē bán dedii bebelé bé mbéb, deewógéé mbwóg ké nhóg nze dekanne' á'sō é' Dyób.

²² Dekude kéchéé éche désédté mó áyale dehíde' éche mbéndé débélé-é mam míme mewógte mó menyinge.

²³ Mbéndé eché ábágé, edii nēn, dédúbe á đin áde awe Mwān Yesu Krístəə, dédəŋ-é nhóg ne aninii. Melemlem mé mbéndé móó Krístəə mómpē ámbéé syánē.

²⁴ Kénzée-é awé ahíde' mbéndé é Dyób, abág mod nhóg ne Dyób, Dyób-pe abé mod nhóg ne mó. Nēn dás-áa débéléé boŋ debii bán Dyób adé ne syánē. Debii áned áyale Edədəŋ éche ábágé syánē.

4

*Jone ahóbe ad bad betéd
pónde ne e' daádaj bé metóm*

¹ A-baányaj bé edanje, nyeedúbpé bad bésyāal ábe behóbe' bán bēwóo Edaádaj é Dyób. Boj pen, nyékag bó ábíi nzé edaádaj éche édé bó áte éhúú ne Dyób. Nyékag bó áyāle ekud é bekal bé' daádaj bé metóm bépédé á nkòjsé-te.

² Chóm éche wēbenlé boj ebíi mod awé Edaádaj é Dyób edíi áte edíi; kénzée awé ahóbe ad Yesu Krístaa apedé á nkòjsé nées moonyoj, né ane mod awóo Edaádaj é Dyób.

³ Boj kénzée awé ahóbe ad Yesue eépedeé á nkòjsé nées moonyoj, eewóo' Edaádaj é Dyób áte. Edaádaj éche ene ndín e mod awóo áte edíi edaádaj éche ehúú ne Mod a Ebébtéd. Nyénwóg bán échéen edaádaj épé, baab-pe émáa ape á nkòjsé-te.

⁴ A-bánban nyédii bad bé Dyób, nyétómé-'é ábē bekal bé' daádaj bé metóm áte, áyāle Edaádaj éche édé nyé áte édé ngíne tómaa Satanē awé akamlan bad bé nkòjsé.

⁵ Abē bekal bé' daádaj bé metóm bédii bad bé nkòjsé, né-óó, mekan nime behóbeé médii mekan mé nkòjsé, bad bé nkòjsé-'é bēwóglan bó.

⁶ Syánē dedii bad bé Dyób. Kénzée awé abíi Dyób awóglan syánē, kénzée-'é awé eesē mod a Dyób, eewóglanné syánē. Né-óó, nén dōo mod áhele abíi nhəjlén áfinté e Edaádaj é mbále ne edaádaj é metóm.

Jone ad Dyób adás syánē

⁷ A-baányaj bé edanje, dedaj nhóg ne aníníi áyāle nén edanje éhúú ne Dyób. Kénzée-'é awé adaa mwányaj a Krísto adíi mwán a Dyób, abíi-'é Dyób.

⁸ Kénzée awé eédaa baányaj bé Krísto, eebíi' é Dyób, áyāle kéchéé éche Dyób ábeleé élúmté' edanje éche áwónné bad.

⁹ Dyób álúmté syánē edanje ne nén, alomé nímé mpəm mí Mwán á nkòjsé-te ábel boj dékud alonjé áde déemaá' mbwiined ne mó.

¹⁰ Chóm éche édé edanje edíi nén, saké bán syánē dedaa Dyób, boj nén Dyób adás syánē, anlóm-me awe Mwán ákōde syánē áyāl e mbéb nime débélé.

¹¹ A-baányaj bé edanje, ngáne edíi bán Dyób átómténé syánē adaj, syánē ámpé detanjéné dedaj nhóg ne aníníi.

¹² Mod eényinē Dyób mbéd. Nzé dedaa nhóg ne aníníi, né Dyób débē ne syánē, éché edanje-'é éche adás syánē élon mbon.

¹³ Nén dō-'áa débél boj débii bán syánē dedé ne Dyób, Dyób-pe adé ne syánē, áyāle abagé syánē éché Edaádaj.

¹⁴ Syánē denyiné, delanje-'é bad bémpé nén bán Tité alomé awe Mwán ábē Nsoode a nkòjsé.

¹⁵ Bad ábe behóbe' bán Yesue adíi Mwán a Dyób, Dyób adé ne bó, bó-'é bédé ne Dyób.

¹⁶ Né-óó, syánē debíi, dedúbpé-'é edanje éche Dyób adás syánē.

Kéchéé éche Dyób ábeleé élúmté edanje éche áwónné bad, bad-te ábe edanje edíi áte, bédé ne Dyób. Dyób-pe adé ne bó.

¹⁷ Edanje éche édé syánē áte, éloné mbon ne nén, nlém méwūú syánē áte á mbwe mé nkáásé, áyāle nén dedé mod nhóg ne Dyób á nkòjsé-te hén melemlen ngáne Krístaa ámbē ne mó.

¹⁸ Mod awé Dyób adás eewógéé mbwóg. Edanje éche éloné mbon énane mbwóg rísyāal. Abán dé nkógsén dōo ápeene mbwóg. Né-óó, kénzée awé mbwóg rídii áte, edanje éelóné mó mbon áte.

¹⁹ Delúmté' edanje áyāle Dyób ásébpé syánē edanje alúmed.

²⁰ Nzé mod ahóbe ad madaa Dyób boj akóo mwányaj a Krísto, ane mod akale metóm, áyāle mod awé eédaa mwányaj awé ányinéé, ééhəlē-se adaj Dyób áde ényinē.

²¹ Né-óó, enén mbéndé chōo bebágé syánē; kénzée awé adaa Dyób adaj káajne mwányaj.

5

*Jone ad bad abe bédúbpé
Krístaa bétómé nkòjsé áte*

¹ Kénzée awé adúbpé ad Yesue mó adé Ane awé Dyób Awógté, adii mwán a Dyób. Kénzée-'é awé adaa sáa-a-mwán adaa' káajne mwán.

² Nyaa eché débíe' é bán dedaa bán bé Dyób edíi nén bán syánē dedaa Dyób, dekonje-'é éché mbéndé.

³ Adaj Dyób adíi áhíd éche mbéndé, éche mbéndé-'é éetómteneé awúú áte syánē áhíd chō.

⁴ Kénzée awé adé mwán a Dyób atómé nkòjsé áte. Nzom eché atómé nkòjsé áte, edii nén, dedúbpé bán Yesue mó adé Ane awé Dyób Awógté.

⁵ Modmod ampée eesáá awě atóme nkõñsé áte éetóméé mod awě adúbpe aá Yesue adii Mwän a Dyõb.

Jone ahóbe bwem e'ldán abe e'bide Yesue mbón

⁶ Yesu Krístæ ampě á nkõñsé. Bëndusén mó ne mendíb bonj ámbíd e pónde eché áwédé á awõg nímě mekií mēnsyõgé. Saké edusen é mendíb chēmpen ēmbenléd ne mó, bonj áde áwédé nímě mekií mēnsyõgé. Edáádaj éche Esáá chõs élúmte syánē aá nén áde mbále, áyale Edáádaj éche Esáá éekaléé metóm.

⁷ Nyaa édé éláán ábii mbále tãngene Yesue.

⁸ Debíí mbále tãngene Yesue áyale Edáádaj élangé syánē, bëndusén mó ne mendíb, ansyõg-ke nímě mekií áde áwédé. Echén nyaa éláán ésyäl élúmte syánē bán Yesue adii Mwän a Dyõb.

⁹ Ngáne dedúbpe mekan nímě bad behóbeé, kéchéé éche Dyõb álangéé syánē étómténé etógnén abé tómaa mekan nímě bad bélãngéé syánē. Nén áde áyale Dyõb dén dõo álangé syánē, tãngene awe Mwän.

¹⁰ Kénzéeé awě adúbpe Dyõb, abíí nén aá nímén mekan mēsýäl médé mbále. Bonj kénzéeé awě eedúbpe Dyõb, édii nēngáne ahóbe' aá Dyõb ádii nkal a metóm, áyale eedúbpeé mekan nímě Dyõb ahóbe tãngene awe Mwän.

¹¹ Chõm éche Dyõb álangé syánē édii nén; abelé syánē dekadé alongé áde déemaá'. Adén alongé ádii alongé áde awe Mwän ábageé.

¹² Kénzéeé awě áde nhóg ne Mwän a Dyõb akudé áde alongé, kénzéeé-'é awě eesē nhóg ne Mwän a Dyõb, eékudéé áde alongé.

Déwõngen nhóg ne antíí

akud alongé áde déemaá'

¹³ Ntenle' nyé ábe nyédúbpe á ðin á Mwän a Dyõb, ábel bonj nyébii bán nyékudé alongé áde déemaá'.

¹⁴ Desumé nlém nén bán, kéchéé éche déhédné Dyõb ngáne ébõñnéde mó, abelé awõg syánē mekáne.

¹⁵ Ngáne débíí-'é bán awõge' syánē áyál e kéchéé éche déhédné mó, detãngéné abíí bán abage syánē kéchéé éche déhédné mó.

¹⁶ Nzé mod anyíné mwãnyaj abele mbéb nímě méepiinéd mó kwéed, atãngéné akánnéd mó. Dyõb débē ane mod alongé. Bad ábe nhóbeé meé nyékánnéd bédii bad ábe mbéb nímab méebeléé bonj échãb edáádaj éwé. Mbéb nídé nímě nibele bonj edáádaj éwé. Nzé mod abelé ene ndín e mbéb meehóbéé meé nyékánnéd ane mod.

¹⁷ Mewusé mēsýäl médii mbéb, bonj donje dé mbéb áde áde déebelé bonj edáádaj éwé.

¹⁸ Debíí nén bán kénzéeé awě áde mwän a Dyõb eébéēē mbéb, áyale Mwän a Dyõb akõnge mó, Ane awě áde Ebébtéd éhēlēē-'é-se ábel mó mbéb.

¹⁹ Debíí bán dedíí bán bé Dyõb debíí-'é nén bán Ane awě áde Ebébtéd akamlan bad bésýäl ábe béebíí Dyõb.

²⁰ Debíí nén bán Mwän a Dyõb apedé á nkõñsé-te abagé-'é syánē nsõñten ábii Dyõb á mbále. Dedé-'é mod nhóg ne mó áyale dedé mod nhóg ne awe Mwän, Yesu Krístæ. Mwēnpēn-naá áde Dyõb, mwēn-naá abage bad alongé áde déemaá'.

²¹ A-bãnbã, nyéewõ' dyamdyam ábel ne myõb mé metóm.

Kálag echê elónténé ébε eche

Jone

Ndibned ní kálag

Kálag echê Jone echê elónténé ébε elúmté bán, “Nlyáged a mwembé” mó aténlé “Mmwaád nhóg ne ábe bán.” Ane nlyáged a mwembé awé atelé enén kálag adii Jone, mmwaád awé áténlé chó ne ábe bán bédii bad ábe bédé á mwembé-te. Chóm éche Jone átélé á kálag-té wén édé nén bán bad bédəŋ nhóg ne aníní, bétéd-te pónde ne bemeléede bé metóm, ne ádab ayáge.

Nkabted ní kálag

Ndibned 1-3

Edəŋge étómé chóm ésyāāl 4-6

Elébé təŋgəne ayáge dé metóm 7-11

Nsógten 12-13

Melenten

¹ Mε, nēŋgáne nlyáged a mwembé, mε-εé ntelé enén kálag. Ntenle, wε mmwaád awé Dyöb ápwédé, ne ábōŋ bán. Ndəó wε ne mbále, saá-kaá mmēmpeŋ ndəó nyé, boŋ káəŋne bad ábe bēbii mbále bédás nyé.

² Ndəó nyé áyale mbále echê syáné débii, débii-’ε chó á ngíndé ne á ngíndé.

³ Dyöb Titée ne Yesu Krístəə, Mwān awé Titée bēbē syáné nsimé, bélúmed syáné ngəł, bēbē-’ε syáné nsaŋ. Abén bwēm é’ syāāl bēbē ábe syáné ngáne débéléé mekan mé mbále adəŋ áde dédás nhóg ne aníní.

Jone ad dédəŋ nhóg ne aníní dédəŋ-’ε mbále

⁴ Mbédé menyinje bwāmbwam áwóg bán doŋge á bán ábōŋ bēhíde’ mbále melemlen ngáne Titée ahóbé áá syáné déhíd.

⁵ Né-ó, a mwān a mmwaád, ncháa wε nén mεé dédəŋ nhóg ne aníní. Enén mbéndé echê rítenlé wε, eésaá mbéndé e ekóólé. Edii mbéndé eche ebédé ne syáné se á mbooted.

⁶ Echén edəŋge éche rihóbéé édii nén bán syáné detəŋgéné dehíd mbéndé e Dyöb. Ene mbéndé ngáne nyémoosyāł nyéwógé se á mbooted, edii nén, nyétəŋgéné nyédəŋ nhóg ne aníní.

⁷ Bad bé medogké híin bédé a nkōŋsé-te chii. Bédii bad ábe bēekwəntene nén bán Yesu Krístəə achyáádté á nkōŋsé nεe moonyoŋ. Abé bad bédii bad bé medogké ne bad ábe bétəŋgan Krístəə.

⁸ Nyétéd pónde ábel boŋ ntú mímēn méēbōō’ ngēn, boŋ pen, nyékud nsábe níme ríloné mbon.

⁹ Kénzée awé atédte áhíd ayáge áde Krístəə boŋ atimé ahíde’ ayáge démpēe, eésaá ne Dyöb. Boŋ kénzée awé ahíde’ ayáge áde Krístəə, adé ne Titée adé-’ε ne Mwān.

¹⁰ Né-ó, kénzée awé apedé áwēn boŋ ápēēn ayáge áde déehúu ne Krístəə, nyéēkōbē mó áwēn mendáb, nyéēlenté-’ε mó ké lentén nεe mod a Krísto.

¹¹ Nhóbe nén áyale kénzée awé alənté mó, alədténé mó ábel e’bēbtéd é’ mekan ábe ábeléé.

Jone ahóbé e’yale bé asóg

¹² Nwóó mam híin áláa wε boŋ meéhēdēē wε mó atele á kálag-té. Boŋ pen nwóó nlém áte ápe wé ábel boŋ dényínen e’só ne e’só, ábel nímesyáné menyinje mélón mbon.

¹³ Bán ábe mwānyoŋ a mmwaád awé Dyöb ápwédé, bélómme nyé melenten.

Kálag eché elónténé élaán eche

JONE

Ndibned ní kálag

Kálag eche Jone eché elónténé élaán elúmte bán Jone, "Nlyáged a mwembé" mós átelé chós. Gayóse nlyáged a mwembé ampée móó áténlé chós. Awēd-te Jone akene' Gayóse áyale nwónge níme ábagéé bad bé Krísto bémpée, alánge-'e mwembé aá bétéd pónde ne mod awé béchagéé bán Diotrefese. Jone akene-'e Demetruse áyale nsón ní bwám níme ábélé.

Nkabted ní kálag

Ndibned 1-4

Békéné Gayóse 5-8

Béchagé Diotrefese dín dé mbéb 9-10

Béchagé Demetruse dín á bwám 11-12

Nsógten 13-15

Jone alente Gayóse

¹ Me nēngáne nlyáged a mwembé, me-éé ntenle' we Gayóse, enén kálag. Ndáá we ne mbále.

² A-mwányan a edange, nkánne' nén méé mam mésyāā níme ébeleé mékēen we bwám, mmōn-'e ampē édyee bwám, melemlem ngáne edáádan échōn ampē édyee bwám.

³ Menwóg menyinge bwámbwam áde donge ábesyánē baányan bé Krísto bépédé hén bonj béháb ngáne ne mbále ébeleé mekan níme Dyōb álúmté syánē aá débele', mbíi-'e nén méé elyagé ebele' nímē mekan.

⁴ Chómchóm éewōgtēē me menyinge tómaa áwóg bán bad ábe bédé ngáne ábēm bán bébele ngáne Dyōb áhedeé.

Jone aá bad bēwōngan bad bé

Krístō ábe bébele nsón ní Dyōb

⁵ A-mwányan a edange, ébele mekan ne nlém nhóg áwōngēn ábesyánē baányan bé Krísto, kénēe wénkēmbíí'é bós donge á bad.

⁶ Bélánge mwembé níme ndé hén edange éche élúmté bós. Nhede méé éwōngēn ábén bad nzé bétédé nyé áke hōm démpēe. Ebel áned áyale nē dōo Dyōb áhedeé.

⁷ Abén bad békagé'áá mebwóg ne mebwóg ábele Yesu Krístā, bénkēnkwentēn-naá ákob nwōngēn ké nhóg níme mbíde wēe bad ábe bēédúbpe Krístā.

⁸ Né-óó, syánē ábe dedúbpe Krístā detāngénē dewōngén ábē bad ábel bonj syāá ne bós débele nsón álāa bad nkalanj ní mbále.

Jone achagé Diotrefese dín dé

mbéb akēn-ne Demetruse

⁹ Mentelé mwembé níme níde áwōn dyad kálag, bonj Diotrefese eékwentēné ábel chóm éche nítélé áyale ahede' aá móbē nlyáged a mwembé.

¹⁰ Né-óó, áde mépéé mélāā bad bé mwembé bésyāā mam níme Diotrefese ábeleé. Akaltad sé metóm áyāl. Byánán nē déekwognedéé, abāa' bānned bé Krísto nken ákob, ákāā-'e bad bémpēe ákob bós nken, ánané-'e bós á mwembé-te.

¹¹ A-mwányan a edange, weehāntán abé á bad ábe bébele mbéltéd mé mbéb, bonj éhāntan abé á bad ábe bébele' mbéltéd ní bwám. Kénzēé awé ábele mbéltéd ní bwám adii mwán a Dyōb. Kénzēé-'e awé ábele mbéltéd mé mbéb, eebíi' Dyōb.

¹² Baásyāāl béhóbe Demetruse mam mé bwám á yāl. Ábele mekan mé bwám níme mélúmte' bán adii mod a bwám. Me-'e ampē nhóbe' mós mekan mé bwám á yāl, nyébíi-'e nén bán kéchéé éche ríhóbé édé mbále.

Jone ahóbé e'yale bé asóg

¹³ Nwóó mam híin álāa we, bonj mééhēdēē méé nítel mós ásē.

¹⁴ Nwóó nlém áte ányín we mwāmpín ní pónde, ene pónde-'aá dényínēnnē e'só ne e'só, bonj dékal.

¹⁵ Nsanj níbē ne we. Bēn bésyāāl bélómmē we melentēn. Lentéd me bēd bésyāāl, nhóg ne nhóg téé.

Kálag eche Judε Ndibned ní kálag

Kálag eche Judε ántenlé, antel ch3 átāngen bemeléede bé metóm ábe bélúmté'áá bán bédé bad ábe bédúbpé Krístæ. Enén kálag eéhabéé áte. Ch3mpé ewágné kálag eché elónténé ébe eché Petro átélé (2 Petro). Judε awéde' Bad bé Krísto nlém, áá bésúm mekuu ámbíd e mbále e nkalaŋ ní bwám. Áá nímé nkalaŋ ní bwám méehaŋlǎnné. Áá Dyöb dēmbě mó wée ábē bad ngen p3g ne ngen ésyāāl.

Nkabtéd ní kálag

Ndibned ní kálag 1-2

Abé ne ayáged dé bemeléede bé metóm ne ebómán éche békudté 3-16

Bélébe bad áwúu áte á adúbe tē 17-23

Nnamed mé asóg 24-25

Judε alómé melēten

¹ Mε Judε, ndii mbáledε awe Yesu Krístæ, mbé-'ε Jemε mwānyar. Mε-εé ntenle' nyé bad ábe Dyöb ápwédé enén kálag. Nyébii nēn bán Dyöb Titée adaá nyé, Yesu Krístæ-'ε anone' nyé.

² Ngol e Dyöb, nsaŋ ní Dyöb ne edaŋge é Dyöb ébád abé ne nyé.

Bad bé metóm

³ A-baānyar, nkēnwanén nyé atele bwāmbwam tāngene e'soosor ábe Dyöb ábágé syānē mbwiined ne Yesu Krístæ. Boŋ baob nnyíné mεé ébóó bán rítele nyé tāngene mekan mémpēe. Nwéde nyé nlém á abum nēn mεé, nyésúm mekuu ámbíd e mbále e nkalaŋ ní bwám. Mmēn nkalaŋ ní bwám méehaŋlǎnné. Dyöb dēmbě mó wée ábē bad ngen p3g ne ngen ésyāāl.

⁴ Nhóbe' nēn áyāle bad ábe béewóo abé á bad bé Dyöb bésólé áfinté echēn á mesoam-té. Abé bad bēhóbe' nēn bán nsimé nime Dyöb ábágé syānē ne alagsen áde álagsanné syānē mbéb, ábágé syānē kunze ábel mbinde é mekan. Dyöb dēmmád nkógsen nime ábē bad békúdé atii se' boód. Abé bad béekobéé Yesu Krístæ áde édii-'áá bán Yesuε mwēmpeŋ móo adé syānē Sáá abé-'ε Nkamlenε.

⁵ Kénεε nyébii nímēn mekan méesyāāl, ndáas mεé níkamten nyé ngáne Sāngwéé ánhúdté bad bé Israel á mekáá mé bad bé Egipto boŋ ámbíd e pónde abódéd alonjé a bad ábe bēnkēnsúm nlém áwē.

⁶ Nyékamten-ne ángel ámpé éché enkēndyεé hōm áde Dyöb dēnnabnédté bó, boŋ bēnhidé áde abwóg á hōm wée bēntāngēne abé. Dyöb ábánné bó á mehaŋ á mbwog mé ehintén wée bēbēε abé ne abé ké ámbíd e Epun émbáá é nkáásé.

⁷ Ndáas mεé nyékamten káāŋne myad mé Sodom ne Gomora ne myad nime mébédé bó benben. Bad ábe bēbédé nímé myad, békábé' áá mesón, bēhídé-'ε mekan mé esii mé ekob é yāl nime moonyon éetāngeneé abel. Békúdé nkógsen ní muu nime méédime'. Mmēn nkógsen rídé álúmed bad bēmpēe bán nēn áheleε ábenléd ne bó.

⁸ Boŋ kēnē, ábē bad ábe bésólé áfinté echēn bómpé bēdii bēnaŋge nló bán nkamlen rídé áwāb mekáá. Mmē nló níbele' bēbele' mbinde é mekan, bēnyínēε nkamlen ní Dyöb nēε dyam, bésyāā-'ε ngume éche édé ámin.

⁹ Boŋ ké Maikεε, ángel embáá enkēntédté ne mó mwēn ásyāŋ Satane áde búmā bēpéntánnáá tāngene mod awe áted ndim nime Mosεε. Anláá mó dás'áá, "Sāngwéé ákógsen wεε."

¹⁰ Boŋ ábē bad ábe bésólé áfinté echēn pen, kéchéé éche béesōŋtenéé bēhóbe ch3 mam mé mbé áyāl. Kéchéé éche épédé bó á mewēmten ch3ó bēbeleé. Bēbeleé nēε nyam é mehín. Mmē mekan mēn móo mépiinad bó kwééd.

¹¹ Medim ne bó. Bómpé bēbele' ngáne Keene awé anwúu mwānyar ámbenlé. A etútú é mōné, bēhele bēbēl kéchéé, ngáne Balame. E'wúu bé nló-áte ábāb bēbēl bómpé bēwē melemlen nēngáne Koraa ánwēē áyāle anwúŋn Dyöb nló áte.

¹² Abé bad bēékwāgēε, né-áá nze nyāábāo nyéládné ádyé ndyééd álúmed edaŋge éche Sāngwéé, bēbeleé bēbē nēngáne mbinde áfinté echēn. Echab yāl chēn ch3ó bētōŋtanné. Bēdii nēε mbag éché epub ékēnēé éché élúmté' bán mbúú échō, áde éechó'é. Bēdii nēngáne mel nime mééchyāā' e'pum ké á pónde éché mel méchyāā'é. Bēnābpé awé nēngáne bwel ábe bēwúbné nkaŋ áse.

¹³ Bédii nêḡgáne edíb é nkwě éche éhode' ne ngíne. Ahod áde éhodesé ébidte' mbinde á nkin. Nê dáo ádáb abé dé mbéb ábídesé áwed. Bédii nêé betintine ábe bétamnad. Ndib e ehíntén eché Dyöb ákóḡnédé bós esine bós, ébē-'é abé ne abé.

¹⁴ Enogē awē anlóntén nyongel saámbé á mbyaa níme Adame, anhób se' boód á'sō é' pónde tãḡgene abén bad. Anhób aá, "Nyénone', Sãḡgwéé ápēén e'kálé ne e'kálé é' áḡgel éche ésáá.

¹⁵ Akáád bad bé nkõḡsé bésyāāl. Akwíd bad bésyāāl ábe ádab abé déesaá nēé abé á bad bé Dyöb nkáá, akóḡsén-ne bad bé mbéb ábe béewóo mbwóg ní Dyöb. Akõḡsēn bós áyāle mam mé mbéb níme béhóbéé tãḡgene mó."

¹⁶ Abén bad báyogke' anyoo áte báyogké-'é bad ahób ngên. Bébale' dyam dé mbéb ké áhéé áde bédás abel. Békume ekáá á tãl, bényinte-'é nsal áte ábel békud bwám.

Nyêbê nyékεεne' adúbe á mbále á'sō

¹⁷ Bon a-baányan, nyé pen nyékamtēn mam níme bembapēe bé nlomag ábe Sáá awēd, Yesu Křístāe bēnlāā' é nyé.

¹⁸ Bēnlāā nyé bán "Áde e'pun bé asóg bēpēé, bad bēpē, bēwélé nyé, bēhídē' échab esíí é mekan mé ekob é yāl."

¹⁹ Echén ndín é bad chós épεεne' nkabén áfínté e bad bé Dyöb. Esíí é mekan mé mbéb mé nkõḡsé ékamlan bós, béewóo-áa Edáádāḡ é Dyöb áte.

²⁰ Bon a-baányan, adúbe áde ésáá áde nyéwóo ábē ákwoge' ákag á'sō. Nyékánne', ngíne e Edáádāḡ éche Ésáá élyáḡte' nyé.

²¹ Nyékεεne' alongé áden á'sō nyaa eche nyéchemlédté nén bán Dyöb ádáá nyé. Nyésine', nyélyáḡ nlém nén bán Sáá awēd Yesu Křístāe ápē, ábēnléd níme nlém ní ngol, nyékud alongé áde déemaá'. Abel nén áyāle adás nyé.

²² Nyéwõḡ nlém ní ngol wéé bad ábe bēédúbpe ne nlém nhóg.

²³ Nyésõḡ alongé a bad bēmpēe. Nyéhüd bós á dü á muú mehélé. Bēmpēe bédé ábe nyétãḡgéné nlém ní ngol awánlēn, bon pen nyétēden bós pónde. Nyétãḡgéné kááḡne échab mbóté akõ byánán esíí é mekan mé mbéb mé ekob é yāl ékóbté chós mbinde.

Mekáne mé mekenag

²⁴ Ehúmé ébê ne Dyöb áde ábele' bon nyéehúné á mbéb-te. Mwēn-aá apεεne' nyé abwóg á hõm wéé mwēn ádíí ne ehúmé. Apεén nyé áhed ésebán atõn dé mbéb ké ahóg áde nyé á yāl, nyéébē-'é menyĩḡge.

²⁵ Edúbé ésyāāl ébê ne mó. Mwēmpēn móó adé Dyöb áde ásóó alongé ádēd mbwiined ne chõm-éé Yesu Křístāe Sãḡgwéé awēd ábálé. Ehúmé, edúbé, ngum, ne nkamlēn řisyāāl řídii římē, se á mboted, bõb, ne á ngíndé. Ebê nê.

Kálag e Mam nime mébenléd Ndibned ní kálag

Ndibned ní kálag e mam nime mébenléd nime Dyöb álúmté Jone. Jone mó atelé chó á pónde eche bad ábe béndübē Krístæa békúdé'áá metake áyále adúbe áde béndübēē nén bán Yesu Krístæa adii Sängwéé. Atote áde Jone ákóó ahób á kálag té wén adii ábe bad ábe áténlé chó e'lyág bé nlém ne áwéd bó nlém á abum. Mekan nime Jone ábúdé atel á kálag té wén médii mekan nime Dyöb dénlümédtté mó á ndóg-te aá mébenléd.

Kénéé edii bán mewémten mébuú áte tãngene nsõhten nime rídé á kálag té wén, atón áde dën ákóó abé áwéd-te adii nén; káõñ ne á asóg, Dyöb détóm ábē bad bé ekoyí ne Satane áte. Dyöb débél nén mbwinned ne Sängwéé, Yesu Krístæa. Dyöb désábē ábē bad ábe bédúbé mó ne nlém nhóg, anamed áde ánamédtté bó ábē á nkoñ ní mín mékõlè ne nkoñ ní sé mé ekóólé.

Nkabtéð ní kálag

Ndibned 1.1-8

Ndóg e'só ne kálag eche béténlé mwembé saámbé 1.9-3.22

Nhíbe ní kálag nime níwóó e'diben saámbé 4.1-8.1

E'lon saámbé 8.2-11.19

Dragone ne nyam ébe 12.1-13.18

Ndóg híin 14.1-15.8

E'bwóg bé melingá mé Dyöb saámbé 16.1-21

Dyöb ábébté Dyad á Babilon, nyam ekwedé nzum, nkal e'daðédãñ a metóm, ne Devæle 17.1-20.10

Mbakú e asóg 20.11-15

Nkoñ ní mín mékõlè, nkoñ rísé mékõlè, Jerusalem a ekóólé 21.1-22.5

Nsógten 22.6-21

¹ Enén kálag ehóbe mekan nime mébenléd nime Yesue Krístæa ábélé boñ mébyéen. Dyöb démbé mó nímén mekan aá mébyéen ábél boñ álúmed ábē bembæde mekan nime mékwógé abenled. Krístæa ambël awé mbæde, Jone abii nímén mekan alóm áde ánlõmmē ángel áwē.

² Jone mó'-e anhób mam mésyäl ngáne ányinnē. Mmén mam móõ ánhõbpē tãngene nkalan nime níhúú ne Dyöb, ne mbõñ echē ámbídté Yesu Krístæa.

³ Nnam níbē ne kénzèé awé aláá' enén kálag ábél boñ bad bémpēe bēwóg nímén nkalan tãngene mekan nime mébenléd. Nnam níbē'-e ne kénzèé awé awógé nímé nkalan boñ ahíd-te mam nime méténlédé á kálag-te wén. Pónde emaa abé benben echē nímén mekan mésyäl mébenlédtté.

Jone alómmé mwembé saámbé melenten

⁴ Me Jone, ntenle mwembé saámbé nime rídé á mbwóg e Esia. Nsimé ne nsañ ní Dyöb níbē ne nyé. Dyöb áde ádé, áde démbē, ne áde débē, ne e'daðédãñ saámbé bélõmmé nyé nsimé ne nsañ. Abé e'daðédãñ é'dé á'só bé atii dé nkamlen ádyöb.

⁵ Yesu Krístæa mómpē alómmé nyé nsimé ne nsañ. Mó adé ane awé ahóbe mbále tãngene Dyöb nyaa echē débii bán edé mbále. Mó abédé mod a'só awé ansébé apuu, abé'-e nkamlene a kãñ é nkõhsé.

Adá syánē, abelé'-e mbéb méekamlánné syánē ámpē, asyóg áde ásyógé nímé mekií a nló níméd.

⁶ Abelé syánē néé beprise ábe bébenle Dyöb eche Sãñ awé akamlan bó. Eche ehúmé ne nímé nkamlen níbē abé ne abé. Ebé nē.

⁷ Nyéñone', áhũé' ne mbag, mod-té'-e ányin mó, káõñne bad ábe bēmbël boñ awé, abome áde bēmboméé mó á awóg. Metúmbé mé nkõhsé mésyäl-le mélèb mó. Nē dën dóo ébēē, ébē nē.

⁸ Sãñ Dyöb á Ngume ahóbé aá, "Me-éé ndé Alfaa mbé'-e Omégaa." Mó adé Dyöb áde ádé, áde démbē ne áde débē.

Jone anyiné Krístæa á ndóg-te

⁹ Ndií Jone, awen mwãnyan. Ndé nhóg awé mómpē adé melemlen ngáne nyé ákan nlém áweseen metake nime mépiide bad ábe bédé á nkamlen nime Yesu Krístæa. Bēmbané me á mbwóg echē mendib mélãñnéde eche béchãgèé bán Patmõs áyále menkãl Eyale é Dyöb níláá'-e bad mekan nime rínyiné tãngene Yesue.

¹⁰ Edǎǎdǎŋ éche Esáá ǎmpíí me á Epun é Sǎngú.* Menwóg ehǎb é ngíne ébidé me ámbíd, émbē née esaád é elonŋ.

¹¹ Enhǎb aá “Mam níme ényíné, tel mǎ á kǎlag-té, élóme nímén mwembé saámbé níme rídé á Efesus, á Semaina, á Pegamum, á Tiatira, á Sadis, á Filadelfia ne á Laudesia.”

¹² Dǎo ríkunné ányín ehǎb eche éhǎbé’áá áwém, bonŋ rínyíné metii níme bebánné etrukǎŋ ámín saámbé mé gól.

¹³ Atínté e nímé metii saámbé dǎo rínyíné mod awě awágné moonyonŋ. Anhé mengombe níme méchábé kǎáŋ mépě mǎ á mekuu-sé, awáá-’é etúd é gól á tǎl.

¹⁴ Esid é nló épúbé’áá mǎ féréd née mbóm, mǐd méchodné mǎ áte née muú.

¹⁵ Mekuu mémbě mǎ née ekii éche béchǎgěé bán bróns eche béhédé á dǔ bonŋ ébē byánán épené’ áte, ehǎb-pe éduumé mǎ áte née mendíb níme mésobpe’.

¹⁶ Betintine saámbé bémbé mǎ á ekáá émbáá, páá e nsǎl nǐbe echě ekóbpe bwámbwam ébid mǎ á nsǎl-té, e’só-’é é’pené mǎ née enyen éche étómtan apen.

¹⁷ Ade rínyíné mǎ, menkwě mǎ á mekuu, mbé née mod awě awédé. Dǎo ábáné me éche ekáá émbáá á yǎl bonŋ áhǎbē aá “Weebáá’, me-éé ndé Mod a Mbooted mbé-’é Mod a Asóg.

¹⁸ Me-éé ndé ane awě adé alongé. Menwě bonŋ bǎob ndé á alongé abé ne abé. Nwóó nkamlen ámín e kwééd nwónŋ-ge ámín e mbwóg e kwééd.

¹⁹ Bǎob-pǎó tǎl mekan asé níme ényíné, níme mébenlad bǎob ne níme mébenléd.

²⁰ Kun e e’konǎd echě edé tǎŋgene betintine saámbé ábe bédé me á ekáá émbáá ne metii mé etrukǎŋ saámbé me gól edii nén: Betintine saámbé bédii ángel é mwembé saámbé, metii mé etrukǎŋ saámbé-’é médií nímé mwembé saámbé.”

2

Jǎne alómmé mwembé mé Efesus pǎle

¹ Ane awě anwágén moonyonŋ anlǎá me nén aá “Telé ángel echě edé á mwembé níme rídé á Efesus nén wéé, Mod awě awánlé betintine saámbé áwe ekáá émbáá awě akag átínté e metii mé etrukǎŋ saámbé mé gól mǎ alómé enén pǎle.

² Mbíí mekan níme nyébǎlé. Mbíí meé nyétédé ntǔ bwámbwam, mbíí-’é meé nyékaá nlém áwesen. Mbíí ngáne nyéeheléé e’bǎbtéd é’ bad akob, mbíí-’é ngáne nyébélé bonŋ nyéchēm bad ábe béchǎgěé yǎl bán bédé bembapēé bé nlomag áde béesaá, bonŋ nyédíbēd-te bán bédii bekal bé’daǎdǎŋ bé metóm.

³ Mbíí meé nyéwesan ne e’kanŋ bé nlém, nyékude-’é metake á dǐn ádēm, bonŋ kénē nlém rǐlyágé rǐwúú nyé ábum ngáne nyéhídeé me.

⁴ Bonŋ nhǎbe áyǎl echēn nén meé, nyéédǎǎ’é me bǎob ngáne nyénsēbēē me adǎŋ.

⁵ Bǎob-pǎó, nyébēn nyékonŋ anyín nyaa echě nyépédé akwe. Nyétede áden abé dé mbéb nyébele mekan níme nyébélé’áá áde nyébóótédé Yesue ahíd. Nzé nyéetede áden abé dé mbéb, né mǎpě áwen nhúđ áden atii dé etrukǎŋ á e’dii.

⁶ Bonŋ dyam á bwám áde nyébeleé ádii, nyéétimtéé mǐd áyǎl wéé mam nímé bad bé epepé ábe Nikolause ábe mémpě méetimtéé mǐd áyǎl.

⁷ Kénzée awě awóó metúu, áwóge chǎm éche Edǎǎdǎŋ élanggěé mwembé. Kénzée awě atómé mekan mé ebǎbtéd áte, mébe mǎ kunze ádyé epum é bwel éche ébele bad bébē á alongé á ngíndé, éche é’kwoge á Paradis.”

Jǎne alómmé mwembé

níme rídé á Semaina pǎle

⁸ Anlǎá-’é me ámpě aá, “Telé-’é ángel echě edé á mwembé níme rídé á Semaina nén wéé, “Mod awě adé mod a’sǎ abé-’é mod awě adé mod a ndimtetn, awě anwě bonŋ abé á alongé ámpě, mǎ alómé enén pǎle.

⁹ Mbíí nímén metake mbíí-’é meé nyédii betóótōkě bé bad, bonŋ kénē nyédii behǎn bé bad. Mbíí e’bǎbtéd é’ mam ábe bad ábe béhǎbe bán bédé bad bé Israel kénēé béesaá, béhǎbēé nyé áyǎl. Bédii bad ábe bédé bad ábe Satané ké’é bad ábe bédé awě echonŋ.

¹⁰ Nyéebáá’ metake níme méhúé’ nyé á’sǎ. Nlǎŋge nyé meé, Satané ábēl béhē nyé donge á bad á mbwog, wéé nyékudté metuné áyǎl e epun dyóm. Abel né ákag áden adúbe. Ké nyéwǎg ké wúēn, nyébē nyédúbe me. Nzé nyébélé nē, né me-’é mébe nyé alongé áde déemaá’ nǎŋgáne nsábe ní mod awě atómbwéné.

¹¹ Kénzée awě awóó metúu áwóge’ chǎm éche Edǎǎdǎŋ élanggěé mwembé. Bad ábe bétómé mbéb áte béewáá kwééd e edǎǎdǎŋ.”

Jǎne alómmé mwembé

níme rídé á Pegamum pǎle

¹² Anlǎá-’é me ámpě aá “Telé ángel echě edé á mwembé níme rídé á Pegamum.

* 1:10 Epun é Sǎngú ébédéé melemlem nǎŋgáne mbwe ní Sǎndé.

“Ane awê awánlê páá e nsál níbe echê ekóppe’, mós alómmé nyé enén póle.

¹³ Mbíí wée nyédyé’é, wée Satane níme nkamlen nídí. Nyébé nyésum nlém awêm. Nyémbé nyédúbé me ne nlém nhóg ké á pónké echê Antipase. Antipase ambíd me mbón e mbále, bénwúú’é mós áfínté echên wée Satane ádyé’é.

¹⁴ Bon nwóò nguse e mam áhób nyé áyál. Baahóg bédé áfínté echên ábe behíde ayáge áde Balame. Balame mós anlúméd Balage ngáne ásslédte bad bé Israel á mbé-te adyé áde bédyáge’áá medyé níme bebágé’áá myób mémpée néé mende, ambél-le békábé mesón.

¹⁵ Chóm émpée éche níwónné nyé édíi nén bán, baahóg bédé áfínté echên ábe behíde adúbe áde Nikolause áyágté.

¹⁶ Né-óó, nyéte de áden abé dé mbéb. Nzé nyétedte, né mēwāmsen ape áwanen abé bad, mbenléd páá echê ebídé me á nsál áwanen abé bad.

¹⁷ Kénzéé awê awóó metúu áwóge’ chóm éche Edáádaj élanjéé mwembé. Bad ábe betómé mbéb áte, mēbe bós mána níme níkónnéde bós, mēbē-’é bós aláá áde ápúbe’. Amín e áde aláá, betélé dín dékōōlé áde modmod éebíí’é étóméé mod awê bébéé áde aláá.”

*Jone alómmé mwembé
níme níde á Tiatira póle*

¹⁸ Anláá me ámpē áá, “Telé ángel echê edé á mwembé níme níde á Tiatira nén wée,
“Me Mwán a Dyób awê míd méchodnéé áte néé muú, mekuu-’e mébé mós néé ekii éche béchagéé bán bróns bon ebé byánán echodne’.

¹⁹ Mbíí nsón níme nyébeleé. Mbíí edajge éche nyéwánléné me, mbíí-’e adúbe áde nyédúbé me. Mbíí abele áde nyébenléé me, ne nlém níme nyékáá awesen áde nyéwéséné. Mbíí-’e nén meé, nsón níme nyébeleé bōob, nítomé níme nyénsēbēē abel.

²⁰ Bon chóm éche níhóbeé nyé áyál édíi nén meé, nyéwesen mmwaád awê béchagéé bán Jesebele. Achage yál áá mōdíi nkal é’dáádaj a Dyób. Ayágte’, ádogne ábēm bembalede áde adúbe ákáb mesón ne adyé medyé níme bebágé myób mémpée néé mende.

²¹ Mbagé mós pónké meé átede níme mbéltéd mé mbéb bon eéhēdēē akáb dé mesón atede.

²² Nyénōne’, mēbwēm mós ne bad ábe ákábneé mesón á anoj dé nkole, békūd-te metuné mé ngine. Mébel nén nzé béésoge níme mekan mé mbéb abel ne ane mmwaád.

²³ Mēwūú bad ábe behíde chóm éche áyágté, mwembé nísyāāl-le mbíí nén bán me-éé ndé ane awê abíí mewēmten ne nlém ní moosyāāl áte. Mod ké ahéé awê abelé mbéb né-’áá mékōgsenné mós.

²⁴ “Bon nlánge nyé bad ábe nyéyáge áse á Tiatira, ábe nyéehídé áden ayáge, nyé ábe nyéeyággé mekan níme béchagéé mekan mé kun mé Satan, meéhēdēē meé nítaged nyé ámpē.

²⁵ Bon pen, nyébé nyésum nlém awêm kōōjne áde mépē.

²⁶ Bad ábe betómé mekan mé mbéb áte bon bebélé-’e mam níme nílánge bós meé bebél, kōōj ne á asóg dé ádáb alonjé á nkōjse te wēn, mēbe bós kunze ákamlen melonj mésyāāl.

²⁷ Békamlén bad bé níme melonj ne ekáá éche éhyédé, békōgtéd-te bós áte ngáne mod ákōtaté mbeé é mag áte.

²⁸ Melemlem ngáne echem Sāj ábágé me ngine, néé mémpē mébéé ngine wée bad ábe betómé mekan mé mbéb áte. Né-óó, áyāle betómé mekan mé mbéb áte, mēbē bós tintine a mbwembwe.

²⁹ Kénzéé awê awóó metúu, áwóge’ chóm éche Edáádaj élanjéé mwembé.”

3

*Jone alómmé mwembé
níme níde á Sadis póle*

¹ Ane mod awê anwágén moonjonj anláá me ámpē áá, “Telé ángel eche edé á mwembé níme níde á Sadis nén wée,

“Me awé wánlê é’dáádaj é’ Dyób saámbé, nwalé-’e betintine saámbé, me-éé nlómmé nyé enén póle. Mbíí nsón níme nyébeleé. Bad behóbe nén bán nyédé á alonjé, bon nyéesaá á alonjé.

² Nyékábned. Nyéhede nímem nsón asóg dé abel, bon bōob nyéwéd yál áte nyébel mós bwām, ayāle nnyíné nén meé nímen nsón méekwōgnedé á’só ábe ádēm Dyób.

³ Né-óó, nyékamten chóm éche nyén’yāgēē ne eche nyénwōgkē, nyékoo chós, nyéte de-’e áden abé dé mbéb. Bon nzé nyékábne de, né mēpē nēngáne nchíb, nyéebíí-’é pónké echê mépē.

⁴ Nyéwóó nguse é bad á dyad á Sadis ábe béewógté échab mbóté mbinde. Bébé ne me, behé mbóté éche épúbe’ áyāle békwōgnédé.

⁵ Né-óó, kénzéé awê atómé mekan mé mbéb áte, mōmpē áwāā mbóté echê épúbe, melemlem ngáne bós, méehúd-taá mós dín á kálag e alonjé. Mēhōb á’só ábe echem Sāj ne á’só ábe éche ángel nén meé bēdíi ábēm.

⁶ Kénzée awě awóó metúu áwóge chǫm éche Edáádəŋ élanǵeé mwembé.”

Jǫne alómmé mwembé
nĩme nídé á Filadelfia pǫle

⁷ Anláá me ámpé aá, “Telé ángel e mwembé nĩme nídé á Filadelfia nén weé,
“Mod awě asáá abé-’e mod a mbále, mó alómé enén pǫle. Awóó ngĩne ákamlen nēngáne Dabide ákamlánáá. Nzé adĩbpé modmod éehǵeé adib, nzé adibé-’e modmod éehǵeé adibe.

⁸ Mbíí nsón nĩme nyébeleé. Nóné’, ndĩbnédé we ekob éche éde we á s’o-te, modmod éehǵeé-’e chǫ adib. Mbíí meé ngĩne eché nyéwóó edé mwámpín boŋ kéné nyéhíde échēm eyale, nyéehóbéé bán nyéebíí-’e me.

⁹ Nyénone’, bad ábe bédé echon éche Satane, ábe béhóbe bán bédé bad bé Israel kénéé beesaá, bédíí bad ábe békale metóm. Měbǵl bépé áwǫŋ, békwe we á mekuu. Měbǵl-le bǫ moosyǫl bėbíí bán ndás we.

¹⁰ Ngáne edíí bán nyéhíde échēm eyale éche nǵlǵgé nyé meé nyékan nǵm áweseŋ metake, mēmpé meékáá nyé á pǫndé e metake nĩme mēpé á nkǫŋsé, ákag bad bésyǫal ábe bédé á nkǫŋsé-te.

¹¹ Nkwogé ape, nyédíí nyésum nǵm áwēm ábel boŋ modmod eékokbné nyé nĩmen nsábe.

¹² Bad ábe bétómé mekan mé mbéb áte, měbel bǫ akon á ndáb eché ádēm Dyǫb, béebíd-taá áwēd-te ámpé mbéd. Mětel bǫ đĩn áde ádēm Dyǫb áyǫl, mětél đĩn á dyad áde ádēm Dyǫb, Jerusalem á ekǫlé awě ahúú ne ádēm Dyǫb, ámĩn. Mětél-le bǫ ádēm đĩn dékǫlé á yǫl.

¹³ Kénzée awě awóó metúu áwóge’ chǫm éche Edáádəŋ élanǵeé mwembé.”

Jǫne alómmé mwembé
nĩme nídé a Laudesia pǫle

¹⁴ Anláá-’e me ámpé aá, “Telé ángel eché edé á mwembé nĩme nídé á Laudesia, nén weé,
“Ane awě adé Ebé đĩn, awě abele ngáne Dyǫb áhedéé, abé mbǫŋ e mbále, mbwiined ne mǫ-’aá se á mbooted Dyǫb dēnhǵké chǫm ésyǫal, mó alómé enén pǫle.

¹⁵ Mbíí nsón nĩme nyébeleé. Mbíí meé nyéehǫó’ nyéehúnne-’áa. Nyēmbé nyéhǫó’ ké’ nyéhunne’.

¹⁶ Né-’ó, ngáne nyédíí etané, nyéehǫó’ nyéechodté-’áa, mébidéd nyé áwēm nsǫl tē.

¹⁷ Nyéhóbe nén bán nyédé nhǫn, nyéwóó bwēm é’syǫal, nyé bán nyéetǫgé-’e chǫmchǫm. Boŋ nyéebíí-’e bán nyédíí bad ábe bétómtan atag ábe békóbténé etyǫg, ábe bédé atóg, ábe békwédé ndĩm, bėbė-’e nsǫb.

¹⁸ Né-’ó, nlébe nyé nē meé nyéchan gól áwēm eché bétómté á muú-te, ábel nén nyébē nhǫn. Nyéchan-ne mbóté áwēm éche épúbe nyéwáa chǫ, ábel boŋ e’són ábe nĩmen nsǫb nĩpeneé, béenyǫnnǫd. Nyéchan-ne dyǫg áwēm áde nyéwǫgēdté á mǵd ábel boŋ nyényǫnne’.

¹⁹ Bad ábe nǫsǫ nkǫnne bǫ áte nǫkǫsǫn-ne bǫ. Né-’ó, nyéwǫŋ kǫn nyéete-’e ádeŋ abé dé mbéb.

²⁰ Nyénone’, ntyéémé á ekob nkume-’e chǫ. Kénzée awě awógé me ehǫb boŋ ádĩb ekob, mēsǫl, ndyé ndyééd ne mǫ, mǫ-’e adyé ndyééd ne me.

²¹ Bad ábe bétómé mekan mé mbéb áte, měbe bǫ kunze ádyee ne me á atii dé nkamlen, melelem ngáne mmēn ámpé méntómmé bad bé ekǫyí áte boŋ nǫdyēē ne echem Sǫŋ áwě atii dé nkamlen.

²² Kénzée awě awóó metúu áwóge’ chǫm éche Edáádəŋ élanǵeé mwembé.”

4

Jǫne anyĩné atii dé nkamlen áde áde ámĩn

¹ Ambíd enén dǫó nĩnyíné ndǫg empée. Mennyín ekob ádyǫb éche edĩbnédé. Dǫó nǫwógé ehǫb éche esébpé ahǫb áwēm, ebédé nē elon, élanǵeé me nén aá, “Hyǫg ámĩn hén, mǵlǫméd we mekan nĩme métǫŋgéné abenled ámbíd e enén pǫndé.”

² Abwǫg-ábwǫg dǫó Edáádəŋ é Dyǫb épíídé me. Hē đǫ-’aá nĩnyíné atii dé nkamlen, nĩnyĩnē-’e ngáne mod ádíídé dǫ.

³ Ane mod awě andíí áde atii dé nkamlen, yǫl epené-’aá mǫ áte nē meláá nĩme béchǫgéé bán jáspa ne kanǵlian. Ngubélen-ne ámpé enlǫŋnéd atii dé nkamlen. Ene ngubélen epené-’aá áte nē aláá áde béchǫgéé bán eŋeran.

⁴ Metii mé nkamlen mémpēe móom mébe ne ménĩn mēnlǫŋnéd áde atii dé nkamlen, bad bėmbáá-’e móom mébe ne bėnĩn bėndíí nĩmé metii mé nkamlen. Bėnwǫá mbóté éche épúbe bėhé-’e e’kóté bė nkamlen é’ gól á nlǫ.

⁵ A atii dé nkamlen hē, emwēdmwēd éhíídé-’aá, e’saád ébide’, dyǫb-pe ákumé áte. E’kag saámbé ábe é’chodne’ é’bédé á’sǫ ábe áde atii dé nkamlen. Abé e’kag saámbé é’đĩí e’dáádəŋ é’ Dyǫb saámbé.

⁶ Chǫm empēe ebédé á’sǫ ábe áde atii dé nkamlen éche émbē nēe edib é nkwě éche ewǫgne dyné boŋ enyĩnné-’aá áte.

Nyam éniin énləŋnéd ádé atii dé nkamlən pəd ésyāəl éniin. Míd mēbédé bós yāl esyāəl, á'sō ne ámbíd.

⁷ Nyam e'só ebédé nées ngii, nyam eché elónténé ébe ebédé nées nyag, eché elónténé élaán enwōŋ e'só é' moonyon, eché chó'-e elónténé éniin embé nées mbye awé apumme'.

⁸ Eché nyam éniin tées, enwōŋ mepab ntóób, míd-te ménlōn bós yāl esyāəl, kásəŋne á mepab-té. Békóné'áá bwēm nkuu ne mĩte ésebán békōmme áte. Békóné'áá bán,

"Sán Dyōb á Ngume, asáá, asáá, asáá.

Mós ambé, mós adé, mós'-áá əpě."

⁹ Eché nyam éniin ékōnne ane awé adiidé atii dé nkamlən mós awé adé á alongé abé ne abé.

Békōnné mós nkəŋgé nĩme mĩbage mós ehúmé, edúbé ne mesáŋnen.

¹⁰ Póndé eché békóné' nē, ábē bad bēmbáá mōom mēbe ne bēniin bēnkwě ášē á'sō wées ane awé adiidé atii dé nkamlən, awé adé á alongé abé ne abé, bēbage mós edúbé, bēbwēm ábap e'kóté bē nkamlən á'sō ábē adé atii dé nkamlən békōnē bán,

¹¹ "Awəd Səŋgwěé ne ádéd Dyōb, ekwōgnédé

əkud ehúmé, edúbé ne ngĩne,

áyāle nēn wē-éé ehəgé bwēm é'syāəl,

mmōŋ-éé etíídé áhəg bós ne ábel é'bē."

5

Mwān-a-Ndyōŋ ní mbód mós akwōgnédé ádibe nhĩbe ní kálag

¹ Héé rĩnyíné nhĩbe ní kálag á ekáá émbáá éche ane awé adiidé atii dé nkamlən. Mmē nhĩbe ní kálag, bēntel mós bwēm áyāl pəd ésyāəl ébe, bényāg bédīb-pe mós ne e'diben saámbé.*

² Dós rĩnyíné áŋgel e ngĩne ehóbe ne ehób éche échəgké áá, "Nzē-módé akwōgnédé ábóo e'diben bon ádíbē'-e nhĩbe ní kálag áte?"

³ Bon ké ádyōb, ké á nkōŋsé ké' e á mbwōg e baásē, modmod eebédé' awé ahelé'áá nĩmé nhĩbe ní kálag adibe áte ké' e ánon mós áte.

⁴ Menchiú bwāmbwam áyāle nēn bēnkēnyínné modmod awé akwōgnédé ádibe nĩmé nhĩbe ní kálag áte ké' e ánon mós áte.

⁵ Dós mod ambáá nhōg álanŋgé me áá, "Weéchyēē'. Nōné', Ngii-e-nyame awé abídé á túmbé e Juda, á mbyaa nĩme kōŋ Dabidé atómé nzum áte. Ahelē ahúd-te ábē e'diben saámbé, ádíbē'-e nĩmé nhĩbe ní kálag áte."

⁶ Dós rĩnyíné Mwān-a-Ndyōŋ ní mbód atyéémé áfĩnté e atii dé nkamlən ne éché nyam éniin, bad bēmbáá bēlōgnédé mós. Mmē rĩdyōŋ ní mbód mēmbē nées nĩme bēwúú. Mēnwōŋ meséb saámbé, ne míd saámbé. Mmē míd saámbé mós mēdé e'daádəŋ é' Dyōb saámbé ábe Dyōb álómé nkōŋsé áte rĩsyāəl.

⁷ Ane Mwān-a-Ndyōŋ ní mbód ankě nhĩbe ní kálag atéd á ekáá émbáá éche ane awé andii atii dé nkamlən.

⁸ Ade átédé nē éché nyam éniin ne ábē bad bēmbáá mōom mēbe ne bēniin, bēnkwě ášē á'sō wées ane Mwān-a-Ndyōŋ ní mbód. Ábē bad bēmbáá bós mod té anwálé rĩlendé ne kúmbé é gól, elón e'twé áte. Ábē e'twé é'dii mekáne mé bad bē Dyōb.

⁹ Bēnkōn nkəŋgé mēkōšlē nēn bán,

"Ekwōgnédé átéd nhĩbe ní kálag,

ne ádibe e'diben ábe bēndibpé.

Ekwōgnédé áyāle nēn bēnwúú wē,

ékōdnéd-te bad bē Dyōb nĩmōŋ mekií.

Ebelé bétímé bad bē Dyōb.

Bēmbíd metúmbé ne metúmbé,

béhóbé mehób nyaa ne nyaa,

bébíd melon ne melon,

bébé'-e ndín é bad ésyāəl.

¹⁰ Ábelé syánē beprise ábe bēbenle ádéd Dyōb,

békamlán-ne á nkōŋsé."

¹¹ Dós rĩnóné ámpē bon rĩwōgē ehób é' áŋgel biib, élōgnédé ádé abwōg dé atii dé nkamlən wées éché nyam ne bad bēmbáá bēbédé. Eché áŋgel ebédé e'kálé ne e'kálé, e'dun ne e'dun.

¹² Bēnkōn ne ehób éche échəgké bán,

"Mwān-a-Ndyōŋ ní mbód nĩme bēnwúú' é

akwōgnédé ákud ngĩne, nhōn, debyéé, ngum,

edúbé, ehúmé ne mekenag."

* 5:1 E'diben saámbé é'bédé e'twé ábe bēpennáá nhĩbe ní kálag, mod awé adibpé'áá'-e bós abédé' mod awe ene kunze émbagnédé.

13 Dó-áa rıwógé nhəgtéd rısyāāl nıme rıdé ádyōb ne á nkōŋsé, á mbwóg e baasē, á edıb é nkwē-te, bwēm esyāāl ábe é'dé áwəd-te békōne bán,
 “Mekəŋag, edúbé, ehúmé ne ngum
 bebē ne ane awē adııdé atıı dé nkamlən,
 bebē-ε ne Mwān-a-Ndyəŋ nı mbód, abé ne abé.”
 14 Echē nyam éniin ehóbé-áa bán, “Ebē nē.” Bad bémbáá-ε bēnkwe áse bebágé-ε mó edúbé.

6

*Jəne anyıné Mwān-a-Ndyəŋ nı
 mbód adıbpé e'dıben ntóob*

1 Dó rınyıné ane Mwān-a-Ndyəŋ nı mbód adıbpé edıben ehóg áfınté e e'dıben saámbé. Héε rıwógé nyam póg áfınté e echē nyam éniin ehóbé áa “Hyág!” Ehób ebédé chó néε dyōb ákume áte.

2 Héε rınóné boŋ rınyıné hōse echē épube'. Mod awē andıı chó anwálé épweε bebē-ε mó ekóté e nkamlən. Abédé mod awē ayōgké nzum atóm áte akagé-áa-ε áke déttóm nzum émpēe áte éche áwanné ne bad bé ekoyı.

3 Dó rınyıné ane Mwān-a-Ndyəŋ nı mbód adıbpé edıben éche élónténé é'be. Dó rıwógé nyam echē élónténé ébe, áfınté echē nyam éniin ehóbe áa, “Hyág!”

4 Héε hōse empée, echē eyage bwámbwam, ébıdé áwed. Bēmbē mod awē andıı chó kunze bán áhúd nsay á nkōŋsé-te ábel boŋ baányəŋ bēwúε' nhóg ne anıfıı. Bēmbē-ε mó sáŋkalaa a nkwaté.

5 Ade rınyıné ane Mwān-a-Ndyəŋ nı mbód adıbpé e'dıben ábe é'lónténé é'laán, dó rıwógé nyam echē élónténé élaán, áfınté e echē nyam éniin ehóbe' áa, “Hyág!” Héε rınyıné hōse echē ehıne'. Mod awē andıı chó anwálé kıló á ekáa.

6 Dó rıwógé ehób nēŋgáne ehób éche ébıdé áfınté e echē nyam éniin, ehóbe nēn áa, “Asıı á ngun ahóg ngēn áyal e nsábe mé nsón mé epun é bın ne mesıı mé bálı meláán nıme méelele nkun áyal e nsábe mé epun é bın. Boŋ pən mod eebébté mól ne mım.”

7 Dó ane Mwān-a-Ndyəŋ nı mbód adıbpé edıben éche élónténé é'niin. Héε rıwógé nyam echē élónténé éniin ehóbe' áa “Hyág!”

8 Héε rınyıné hōse echē edé mbále. Mod awē andıı chó béchágé-áa mó bán Kwééd, Mbwóg e kwééde-ε áhıdé mó ámbıd. Bēmbē bó ngıne ákamlən eped é nkōŋsé ehóg áfınté e'ped éniin. Bēnhób bán ábenlad nkwaté, nzaa, nkole ne e'loo nyam áwúene bad, á nkōŋsé te.

9 Dó ane Mwān-a-Ndyəŋ nı mbód adıbpé edıben éche élónténé é'táan. Héε rınóné á menyán mé e'twé sé, boŋ rınyıné' e'dəəđəŋ ábe bad ábe bēnwúú' é áyale békálé-áa eyale é Dyōb bēhóbé-ε mam mé mbále təŋgene Dyōb nyaa eche sébıı bán mbále chó edé.

10 Abé e'dəəđəŋ é'hóbé-áa ne ehób éche échágké bán, “A-Sáŋ Dyōb a Ngum, wε awē esáá ebé-ε mbále, káŋse pónde ehéé wékáádté bad bé nkōŋsé boŋ ékūn mekıı nıməd nıme bésyógé?”

11 Héε bebágé bó mod téε mengombe nıme mépube', beláá-ε bó bán bésıne mwámpın nı pónde, káŋ ne á pónde eche mesongé mé baányəŋ bé bembəlede ne baányəŋ bé Křısto melónnē, ábe bēwúú' é bómpé melemlen ngáne bēnwúú' é bó.

12 Dó ane Mwān-a-Ndyəŋ nı mbód adıbpé edıben éche élónténé ntóob. Héε rınyıné ngáne ndəəb énáŋnedé ne ngıne, enyən-ne énhın bwámbwam, ngəŋ esyāál-le éyage' néε mekıı.

13 Betıntıne bēnhūn á nkōŋsé ngáne e'pum é' mel é'soodéé nchəle áde epub éśágté alın á bwel.

14 Abobe dénnıyōŋ nēŋgáne bédós nhıbe rı kálag áte nıme bēnnyfı' é áte. Mbəəd esyāāl ne mbwóg esyāāl éche mendıb meláŋnedé bēnhıdé á e'dıı.

15 Héε kəŋ é nkōŋsé, ndale é bad, bad bémbáá bé sánze, behən bé bad, ngıne é bad, betāŋ ne kunze békóngé yəl á pwóg é meláá tē ne á meláá nıme mebédé á mbəəd mım.

16 Béchágé-áa mbəəd ne meláá bēhóbé bán “Nyéhúnted sé ámın nyékúten sé ábel boŋ ane awē adé á atıı dé nkamlən eenyıné sé, melıŋgá mé Mwān-a-Ndyəŋ nı mbód-te méepııd sé.

17 Epun é ebébtéd éche nımáb melıŋgá mébıdéé áwed émáá apε, modmod éheınlé-áa chó atəŋgen.”

7

*Bembəlede bé Dyōb
 békıdú e'chem a'só é' mbəm*

1 Ade nē atómé, mennıŋ áŋgel éniin étyéémé á metóngé mé nkōŋsé méniin. Echē áŋgel énkəŋ metóngé mé nkōŋsé méniin nıme epub étóméé ábel boŋ epub étómē' á nkōŋsé, ké'ε á edıb é nkwe ké'ε təŋgene bwel ké e'hóg.

²Dóo rınyıne ángel empée ebıde á pæd eché enyæn ebıdeé, awánlê e'chem é' Dyöb dé alongé. Héé ene ángel ne ehób éche échággké, échagée échınıí ángel ınıın eche bébágé ngıne ábébed nkõnsé ne edıb é nkwx̄

³boŋ álångē bó aá, “Nyéebébté nkõnsé, ké'ε edıb é nkwx̄ ké'ε mel, kóŋne á pónde eché débādēē bembaledé bé Dyöb e'chem á mbòm.”

⁴Dóo rıwógé mesongé mé bad nıme bébádté e'chem á mbòm. Bébedé Mbwókel ekalé póg, móom mé e'kalé méniın ne e'kalé é'niın. Mmē mesongé mémbıd áfınté e metúmbé mé alon á Israel mésyāāl dyóm ne mébe.

⁵Mesongé mé bad nıme bémbādēē ábē e'chem á mbòm á túmbé e Juda mébedé dyóm dé e'kalé ne é'be. A túmbé e Ruben mébedé dyóm dé e'kalé ne é'be, á túmbé e Gad mébedé dyóm dé e'kalé ne é'be.

⁶A túmbé e Ashe mesongé mé bad mébedé dyóm dé e'kalé ne é'be, á túmbé e Naftali mébedé dyóm dé e'kalé ne é'be, á túmbé e Manasé mébedé dyóm dé e'kalé ne é'be.

⁷A túmbé e Simion mesongé mé bad mébedé dyóm dé e'kalé ne é'be, á túmbé e Levi mébedé dyóm dé e'kalé ne é'be, á túmbé e Isaka mébedé dyóm dé e'kalé ne é'be.

⁸A túmbé e Zebulon mesongé mé bad nıme bémbādēē e'chem á mbòm mébedé dyóm dé e'kalé ne é'be, á túmbé e Joséb, mébedé dyóm dé e'kalé ne é'be, mébé-'ε á túmbé e Benjamin dyóm dé e'kalé ne é'be.

Nsábe nıme bad bé Dyöb békudté

⁹Ade nén átómé dóo rınyıne nkúú ní bad. Bēmbuú áte nyaa eché modmod éehale'aá bó atón. Bēmbıd melon ne melon, bēmbıd metúmbé ne metúmbé, bēbé nyaa é bad ésyāāl bēhōbē-'ε mehób nyaa ne nyaa. Bentyēem á'sō bé atii dé nkamlen ne é' Mwān-a-Ndyon ní mbód. Bēnhē mengombe nıme mépúbe' bēwálé-'ε e'kikag é' miı á mekáá.

¹⁰Béhóbbé'aá ne ehób éche échággké bán, “E'sooson é' baányon é'húe ne áded Dyöb, Dyöb áde ádífdé atii dé nkamlen, é'húe-'ε ne awe Mwān-a-Ndyon ní mbód.”

¹¹Bad ábe bēnləŋned áde atii dé nkamlen bébedéé ángel ésyāāl, bad bēmbáá, ne eché nyam ınıın. Bēnkwx̄ áse á'sō bé atii dé nkamlen bēbágé-'ε Dyöb edúbé.

¹²Béhóbbé'aá bán, “Ebē nē! Nnam, ehúmé, debyéé, meságnen, edúbé, ngıne, ne ngum bēbē ne áded Dyöb abé ne abé! Ebē nē.”

¹³Dóo mod ambáá nhóg ásedtée me aá ken, “Benzéé bēn ábe bēwáá mengombe nıme mépúbe' Héé bēbíde?”

¹⁴Mentımtén mó meé, “A-sán, we-εé ebıı.” Dóo álångēé me aá, “Ábén bad bóo bétómé metake me ngıne áte; bēwóbpé nımb mengombe ne mekiı mé Mwān-a-Ndyon ní mbód, bēpúbté mó.

¹⁵Né-'aá ábélé boŋ bēbé á'sō bé atii dé nkamlen á Dyöb, bēbágé-'ε Dyöb edúbé nkuu ne müte áwe ndáb e mekáne. Ane awē adé á atii dé nkamlen, adé áhed pónde ésyāāl ınon bó.

¹⁶Nzaa éewaá bó ámpé mbéd, pí-dε ámpé éekóbpé bó mbéd. Enyæn éebábédté bó, bēewóg-kaá e'chode bé ekıde é' ngıne.

¹⁷Ayāle nén ane Mwān-a-Ndyon ní mbód awē adé áfınté e atii dé nkamlen, mwēn ınon bó. Alyāgēd-te bó wēε mendıb nıme mbıdíé á n'yéle nıme mbage' alongé médíı. Dyöb-pe ámpé dépıne bó mésođ mésyāāl á mıd.”

8

Mwān-a-Ndyon ní mbód adıbpé edıben éche élónténe saámbé

¹Dóo ane Mwān-a-Ndyon ní mbód ádıbpé edıben eche élónténe saámbé. Ade ádıbpé chí, ekıde énhōó áte ádyöb, dyam-εε áde eped é háwa.

²Héé rınyıne ángel saámbé éche étyéémé á'sō e' Dyöb, bēbágé bó e'lon saámbé.

³Dóo rınyıne ángel empée epedé, étyéémé á'sō é' menyán mé e'twé, awánlê díse á gól áde bēhyánté e'twé áte. Bēmbud mó e'twé abe bán áladten mekan mé bad bé Dyöb bēsyāāl ábe mendé á menyán mé gól. Mmē menyán mébedé á'sō bé atii dé nkamlen.

⁴Mwēntud mbıdíé'aá áyāl e'twé ábe ángel énwālē, rıkág ámın ne mekáne nıme ene ángel ékánnádtáá bad bé Dyöb. Ene ángel entyéém á'sō é' Dyöb.

⁵Héé ene ángel étédé kúmbe eche e'twé é'bedé áte, atéd muú nıme mémbıd á menyán mé e'twé, alónéd áwēd-te, boŋ ásyög á nkõnsé. Nén dēmbel dyöb ákumé áte e'saad ebıde, emwēdmwēd étóme, ndōb-pe éneŋnad.

Ángel etóó e'lon bē'só é'niın

⁶Dóo éché ángel saámbé éche énwālē e'lon saámbé ébõnséne átón ábē e'lon.

⁷Ángel e'só entón échē elon. Héé meláá mé mbúú ne muú nıme meládténe ne mekiı bēbóótédé asoo á nkõnsé. Eped ehóg áfınté e'ped bé nkõnsé é'láán émmad ahyán. Eped é ahın é mel ehóg áfınté e'ped é'láán ne byaa é'syāāl bēmmad ahyán.

⁸ Angel eche elónténé ébe entónj échē elonj. Héε chōm éche éwagné néε sánjalaa a mbōod echē ehyaá' éhúné á edib é nkwē te.

⁹ Eped e edib é nkwē ehóg áfinté e'ped é'láán, éntīm mekií. Donje ahóg-ke áfinté e monje meláán mé bwēm ábe é'dé á alongé bēnwē á edib é nkwē-te wē. Donje á stīma ahóg-ke áfinté monje meláán éche ébédé á edib é nkwē te wē chōmpē émmād abéb.

¹⁰ Angel echē elónténé éláán entónj échē elonj. Héε sánjalaa a tintine awē achōdné'áá néε ekag ábidé ádyōb, ahún ámin e eped ehóg áfinté e'ped bé e'dib é'láán ne ámin e mendib nime mébidé' á n'yélé.

¹¹ Dīn áde ane tintine ádii "E'chāa." Eped é mendib ehóg áfinté e e'ped é'láán, é'chās'áá. Bad híin ábe bēmmwē nímē mendib bēnwē áyāle nēn méchās'áá.

¹² Angel echē elónténé éniin entónj échē elonj. Dōo chōm ébómé eped é etondεε ehóg áfinté e'ped é'láán, ébōm eped é ngon ehóg áfinté e'ped é'láán, ébōm eped é betintine ehóg áfinté e e'ped é'láán. Nē dēmbēl eped ehóg-téé áfinté e'ped é'láán ábe ábēn bwēm bēnkwē ehíntén. E'nýinεn bé ekide bēnkēmbáá á eped é mūte ehóg áfinté e'ped é'láán, bēnkēmbáá-'áá á eped é nkuu ehóg áfinté e'ped bé nkuu é'láán.

¹³ Dōo rínóné bonj rínyinē' mbyε apumme se ádyōb te álēbpē-'ε ne ehób éche échágkē áá, "Medim, medim, medim mébē ne bad ábe bēdyéé' á nkōjsé á pōndé eche échíníí ángel éláán étōngē ábāb e'lonj, ábe békwógé atónj."

9

Elonj éche elónténé é'taan

¹ Angel echē elónténé étáan entónj échē elonj. Dōo rínyinē tintine ábidé ádyōb ahún á nkōjsé. Bēmbε mó e'kii bé echóg echē éewóo asóg.

² Andibé nsal mé echóg echē éewóo asóg. Mwēntud mémbid áwēd-te nime rídé nēngáne mwēntud nime mbidé á muú rí ngine. Mmē mwēntud, mémbēl enyεn éche épéné'áá éehéle'áá ekide anyined.

³ Dōo bengóméé bébidé á mwēntud tē wē, bésud á nkōjsé. Bēmbē-ε bó ngine nēngáne bēngaabobe bé mpwen ábe bédé á nkōjsé.

⁴ Bēnlāá ábē bengóméé bán bēbēlé nkāákāá ké'ε byaa ké'ε mel ebébtéd ké ehóg. Bonj bán bēbēl ebébtéd dās wēε bad ábe bēéwōo e'chem é' Dyōb á'sō é' mbōm.

⁵ Békēmbáá ábē bengóméé kunze áwúu ábē bad. Bonj bēmbē bó kunze átaged bó á etún é ngon étáan dēmpen. Metake nime ábē bad bēwōgkē nzé ábē bengóméé bēlélé bó, mébē néε metake nime mod ákudeé nzé ngabobe a mpwen alédé mó.

⁶ A etún e échē ngon étáan, ábē bad bēhēd kwééd bonj bēenyinné. Bédəŋ bán bēwē, bonj kwééd ényagéd, ebánj bó áyāl.

⁷ Ábē bengóméé bēmbē néε hōse éche bēbōnséné ákεεn á bel. Bwēm ábe é'bédé bó á nló é'bédé néε e'kóté bé nkamlen é' gól, e'só-'ε é'bé bó néε e'só é' baányonj.

⁸ Nyonj ébédé bó néε nyonj é bebaád, mesonj-'ε mébē bó néε mesonj mé ngii.

⁹ E'kid é'bédé bó á tál ábe é'bédé néε e'kii ábe bad bēwáa'ε ákúdtén tál á pōndé e bel. Ntəgag nime nímāb mepab mébéle'áá mbédé néε ntəgag mé e'bambam ábē hōse híin édoléé ákε á bel.

¹⁰ Bēnwōŋ nkon bēwōŋ-'ε nsyag néε nkon rí ngabobe a mpwen. Mmē nkon mó-'áá ríwóo ngine ábel baányonj ebébtéd á etún é ngon étáan. ¹¹ Bēwóo kəŋ echē ekamlan bó. Ene kəŋ edii ángel echē enone' echóg echē éewóo asóg. Ade dīn ádii á ehób é Hibru bán Abadone, ábē-'ε á ehób é Grikia bán Apolyōne (nē áde nēn bán mod awē abēbte).

¹² Néε medim mé'sō métóomé ámbid enén, medim mémpēe mébe médii méhúε'.

Ángel etóó elonj éche elónténé ntóob

¹³ Angel echē elónténé ntóob entónj échē elonj. Dōo ríwógé néε ehób ébidé á metóngé méniin mé menyán mé e'twé mé gól nime mébédé á'sō é' Dyōb.

¹⁴ Echē ehób élanjé ángel echē elónténé ntóob, echē ewánlé elonj nēn áá, "Huné ángel éniin éche Dyōb ábánné á mehanj á edib embáá é Yufretes."

¹⁵ Ene ángel enhuné échē ángel éniin. Bēmmād bó abonjsen áwúu donje ahóg áfinté e monje mé bad meláán ene pōndé chēn, échē epun chēn, ene ngon chēn nímē mwē mēn.

¹⁶ Bēnlāá mε mesonjé mé sánze éche édiídé hōse. Ebédé mbwókel é e'dun é'be.

¹⁷ Nēn dōo ményinné échē hōse ne bad ábe bēdiídé chō á ndóg-te. Bad ábe bēndií chō bēnwáá e'kii ábē bēwáa'ε ákúdtén tál á pōndé e bel. Ábē e'kii é'yágé'áá nēε muú, é'bē-'ε ebəŋ néε blúu, é'bē-'ε ebəŋ néε nsule. Nló mbédé échē hōse néε nló rí ngii, muú, mwēntud ne muú nime rídé ebəŋ néε nsule bēbidé-'ε chō á nsal.

¹⁸ Mmē medim meláán, nēdē muú, mwēntud ne ebəŋ éche édé néε nsule, ábe é'bidé'áá échē hōse á nsal bēnwúu donje ahóg áfinté e monje mé baányonj mé meláán.

¹⁹ Ngıne edé échē hóse dásá á nsal ebé-'e á nkon. Mmāb nkon rídé néē nyā, ne nló áyāl, bébenlad-te mó ábel bad ebébtéd.

²⁰ Moonyonj anını́ asyáál awé alyáge áse awé nımé medim ménkénwúú'é bénkéntédéé abele á myób nıme bēn bébélé. Bénkénsógké e'dáádaj bé mbéb abele, bénkénsóg-kaá myób mémpēe abele, myób nıme bébénlé gól, sílva, brōns, ké meláá, ké'ε hyōn, myób nıme méēnyınnē', méēwōgnē', méēhelé-'ε akε.

²¹ Béētēdte-'áa adáb abel dé mbéb átıme Dyōb. Béētēdteē awúu á bad, béētēdteē akum á ngan, béētēdteē akáb dé mesón, béētēdte-'áa echīb.

10

*Jone anyıne ángel
echē ewánlé mwā nhıbe rı kálag*

¹ Hē dáo rınyıne ángel e ngıne empée ebıde ádyōb, esude' áse, mbag élanjéd mó, ngubélen-ne ebé mó á nló. E'só bémbē mó néē enyen, mekuu-'ε mébé mó néē mekon mé muú.

² Anwálé mwā nhıbe rı kálag awé bédıbpé áte, ásum ekuu é ekáá é mbáá á edıb é nkwe-te, ásum-me ekuu é ekáá é emwēd á nkin.

³ Héε áhóbé ne ehób éche échágké éche éwágné ehób é ngii echē edume áte. Ade álébpé esaád, ngın saámbe énkwentın ne ndumag.

⁴ Ade ekúmé áte kumén, nhédé'áa chōm éche béhóbé abooted dé atel, boj rıwōgē néē ehób ebıde ádyōb nın bán "Kóo mekan nıme ngın saámbe éhóbé, mébē kun, weétele' mó áse."

⁵ Dáo ángel echē ményınnē néē ásumé ekuu ehóg á edıb é nkwe-te boj ásum-me échını́ı á nkin átıfıde ekáá é mbáá ámın

⁶ boj ámwāg melé á đın á Dyōb áde adé á alongé abé ne abé. Mó áhágé nkon rı mín ne rıse ne edıb é nkwe ne bwēm é'syāal ábe é'dé áwēd-te. Ene ángel enhós áá "Abébed á pónde ké ahóg déebáá ámpē.

⁷ Boj áde ángel echē elónténe saámbe étōngē echē elon, Dyōb débēl dyam áde ántı'ı é áá mósbēl áde adé á e'konéd-te. Abél ngáne ánlāá é abé bembáede, bekal bé'dáádaj."

⁸ Héε ehób éche ménwōgké néē ebıde ádyōb élanjéé me ámpē nın áá, "Kág étéd nhıbe rı kálag nıme rıdıbnédé áte nıme rıde á ekáá é ángel echē etyéémé ne ekuu ehóg á edıb é nkwe échını́ı-'ε ébē á nkin."

⁹ Dáo rıkıfı wéε ene ángel boj rılanjéé mó meé ábe me ane mwā nhıbe rı kálag. Dáo álanjéé me áá "Kób nın, édyē. Achásd wε abum áte boj anyın wε á nsal néē e'chuu."

¹⁰ Dáo rıkóbé mwā nhıbe rı kálag áwe ekáá, ndyé-'ε mó. Annyın me á nsal néē e'chuu. Boj áde nımáá mó amıı, anchásd me abum áte.

¹¹ Dáo bėlanjéé me bán, "Etánjéné mekan ahób nıme mēbenléd ne melon híın, bad nyaa ne nyaa, mehób nyaa ne nyaa ne kın é bad híın."

11

Jone anyıne mbōj ébe

¹ Dáo bébágé me ntōj nıme rıde néē chōm éche béhagneé bwēm, boj bėlanjéé me bán, "Kág éhag ndáb e Dyōb, éhag-ke menyán mé e'twé, étōj-'ε bad ábe bébage Dyōb edúbé áhed.

² Boj weéhāgē' eyáde pen áyāle nın bébágé chó wéε bad ábe béébıı Dyōb. Bėdyanjéd Dyad áde Ásáá ámın á etún é móom mé ngon méniın ne ébe.

³ Mébē échēm mbōj ébe kunze áhób mekan nıme mēbenléd á pónde echē ehúe' á etún é e'pun ekálé ehóg mbwókel ébe ne móom ntóob. Bėwāā-'ε mbóté é melebe."

⁴ Echén mbōj ébe éđıı mel mé menzab mébe ne metıı mé etrukán mébe nıme métyéémé á'só ábe Sánjwéé awé akamlan nkōjse.

⁵ Nzé mod awémténe-'ε bó ebébtéd abel, muú mbıd bó á nsal nıme rıhyánje ábāb bad bé ekoyı nımād-te bó áse. Nın dáo kénzéé awé awémténe bó ebébtéd abel bėwúú'ε mó.

⁶ Abén bad bėwóó ngıne ákāj abobe ámın ábel nın mbúú eechóg á pónde echē bėlanjéé bad mam nıme Dyōb áhóbé áá mēbenléd. Bėwóó-'ε ngıne ábel e'dıb é'tım mekıı, bėwōj-'ε ápeen medım á nkōjse pónde ké ehéé echē bėdás.

⁷ Ade bėmād-táa mam ahób nıme bėlómé bó ahób, ene nyam echē ebıde á echóg echē éewóó asóg étyēēmēn bó nzum, etóm bó áte ewúú-'ε bó.

⁸ Mmāb ndım-me ménaá á nzıı echē epoo' á dyad ámbáá té wéε bėmboméé awab Sánjwéé á awōg. Bėchage adé dyad á ngan-té bán Sodom káa Egipto.

⁹ A etún é e'pun é'láan ne epəd, bad bėbíđ melon ne melon, metúmbé ne metúmbé, mehób nyaa ne nyaa, ne bad nyaa ne nyaa bėnōn nımāb ndım ésebán bėkwentán bán bėlíme mó.

¹⁰ Bad ábe bėdé á nkōjse bėwōgēn abén bad bėbe echab kwééd menyınge. Bėchág ngande, bėbāg-ke nhóg ne anını́ı nde álúmed menyınge. Bėbēl nē áyāle abé bekal-bé-e'dáádaj bėbe bėpınádtáá bó metake bwāmbwam áde bėbédé á nkōjse te.

¹¹Boŋ ámbíd e ábè e'pun é'láán ne eped, pemε e alonggé embíd wée Dyöb esól bó áte bėpuu bėtyéem-me ámın. Mbwóg rı ngıne mėnköb bad ábe bėnyın bó.

¹²Dóo ábè bekal-bé-e' dǎǎdǎŋ bėwógéé ehób échě échágkě ébídé ádyöb nées élanğgeé bó nén aá, "Nyéhyag ámın hén." Dóo bésólé á mbag-té bėke-ε ádyöb. Abáb bad bé ekoyı bėnyın nées bėkágkě.

¹³Abwóg-abwóg ndǎob énaŋned ne ngıne. Eped é dyad ehóg áftınté e e'ped dyöm ábe ádè dyad ámbáá émpǎntéd áte. E'kálé e' bad saámbé bėnwε áde ndǎob énaŋnedé nē. Mbwóg mėnköb bad ábe bėlyágé ášē, bėbage Dyöb á ngumε, mós awě adé ámın, edúbé.

¹⁴Medim nıme mėlonténé mėbe mėntóm. Boŋ nǎné! Medim nıme mėlonténé meláán mėkwógé ape.

Angel etóo elon eché élónténé saámbé

¹⁵Angel eché élónténé saámbé entón eché elon. Dóo ehób éche échágkě ébídé ádyöb éhǎbē nén bán, "Nkamlen mé nköŋsé rıtımé nkamlen nıme awed Sánğwéé, Dyöb ne awé Krıstəə, ákamlen-ne á ngındé ne á ngındé."

¹⁶Hè dóo ábè bad bėmbáá móom mėbe ne bėniin ábe bėdífdé metii mé nkamlen á'sō é' Dyöb bėkwédé ášē á'sō é' Dyöb bėbage mós edúbé.

¹⁷Béhóbé nén bán,

"Séságnéné wε a-Sán Dyöb á Ngum, we awě edé ane ne awě ámbé.

Séságnéné wε áyǎle ebėnlédé echón ngum eboótédé akamlen.

¹⁸Bad ábe bėebenlé wε bėnlıŋ áyǎle melıŋá nımöŋ mé ngıne mėmpř.

Póndé epedé eché bėkáadté bad ábè bėwédé.

Póndé epedé eché ábōŋ bembǎlede, bekal bé'dǎǎdǎŋ, ne bad ábe bėbenle wε ábe bėbage wε edúbé, bad bėsyǎal, ken bad ábe bédé etógnén-ε ké'ε ábe bėesě etógnén, wésǎbēē bó.

Ene póndé dóo wébėbėdté bad ábe bėbėbte bad á nköŋsé te!"

¹⁹Hè dóo nınyıné ndáb e Dyöb eché edé ádyöb nées édíbnédé. Á ndáb-te wē-ε, nınyın Ntyág mé Melě. Emwedmwed étómáá, e'saad é'bide', ádyöb ákumé' áte, ndǎob énaŋnad ášē, meláá mé mbúú mé ngıne-ε mėhúne.

12

Ňne ányıné mmwáád ne dragone

¹Hè dóo e'chemléd é' ngıne é'bídé ámın. Mmwáád ámbé awě eche mbóté émbēē enyεn, ngon chó-ε ebé mós á mekuu sé. Ekóté é nkamlen éche betıntıne dyöm ne bėbe bėdíı áyǎl ébédé mós á nló.

²Ámbé dyēm, ákwóg-ke achyáa. E'wε ne metake mé achád nıme áwógé'áá mėmbēl akánéd awé ámın.

³E'chemléd bé menyáké bėmpēe bėmbíd ámın. Dóo dragon ébídé taléd. Enkál bwámbwam, éyágé-ε. Enwón nló saámbé ne meséb dyöm. Nló téé mėnwáá ekóté é nkamlen.

⁴Andolén nımē nkon donge ahóg áftınté e moŋge mé betıntıne meláán ábe bėbédé ádyöb, abwém-me bó á nköŋsé-te. Ene dragon entyéem mmwáád awě ahedé'áá achyáa á'sō-te ábel nén nze achyáá ádyē mós mwán.

⁵Dóo ane mmwáád áchyáa mwán a mwenchóm awě atánğéné melon mėsýǎal akamlen ne ekáá éche éhyédé. Boŋ bėnsog mwán, bėkēēn mós wée Dyöb ádíı ne ádè atıı dé nkamlen.

⁶Ane mmwáád antóm mehélé á ehýánge wée Dyöb dėmboŋsénné aá bétögen mós á etún é e'pun ekálé ehóg mbwókel ébe ne móom ntóób.

⁷Hè dóo nzum ékúmmé ádyöb. Maıkele bó éche ángel bėntyēēmēn ene dragon nzum. Ene dragon chó-ε ámpē ne éche ángel bėtyéémén bó nzum.

⁸Boŋ Maıkele ne éche ángel bėntóm ene dragon ne éche ángel áte. Dragone ne éche ángel bėnkėnwóŋgé etál ádyöb ámpē.

⁹Dóo bėhúnté ene sánkalaá á dragon á nköŋsé-te. Ene dragon chó ebédé ene nyě e'boód eché bėchagéé bán Devalε ne Satane, awě adoge' nköŋsé rısyǎal. Bėmbwēm-me éche ángel ésyǎal ášē á nköŋsé nchoo ne mós.

¹⁰Hè dóo rıwógé ehób éche echágkě ébídé ádyöb éhǎbē nén bán, "Bǎob-pǎó, e'sooson é' Dyöb é'pédé. Dyöb álúmté eche ngıne e nkamlen nées kǎŋ. Awě Krıstəə álúmté eché ngıne bǎob. Áyǎle ane awě ahábé'áá á'sō é' Dyöb nkuu ne mǔte aá ábesyané baányan bėbélé mbéb, bėhúnté mós á nköŋsé. Abánáá bó mam áyǎl á'sō é' Dyöb nkuu ne mǔte.

¹¹Mekıı mé Mwán-a-Ndyon rı mbód ne mbón e mbále eché bėbíde'áá bėmbēl bétóm Satane áte. Bėnkwentén ké kwéed ákal eyale é Dyöb áyǎle nkalan nıme bėkálé'áá mbéde mbále.

¹² Né-ɔ́, mĩne ne ábe bésyā́l ábe bédé áwed, bėnwōg menyĩnge. Boŋ ndutul ẹ̀bē ne bad ábe bédé á nkō̄nsé ne ábe bédé á edĩb é nkwe áyale nēn Devale asudé ásē áwēn ne melĩngá mé ngĩne ngáne ábíi aá eche pónđé edé esóŋ.”

¹³ Pónđé eché ene dragɔn ɛnyĩné aá bėhúnté mó á nkō̄nsé, embootéd ane mmwaád awé anchyáá mwān a mwēnchóm anan.

¹⁴ Boŋ bėmbě ane mmwaád mepab mėbē nĩme sánkalaa a mbye, ábel nēn ápume ápe hóm áde bėbō̄nsé né mó á ehyaŋge, hóm áde ákudé ntō̄gēn á etũn é mwē rĩlāán né eped, wēe bėkásé mó wēe ene nyā.

¹⁵ Dɔ́o ene nyā ɛsádé ane mmwaád aléed á yāl. Adé aléed dēnsyogé née edĩb ẹ̀mbáá, ábel nēn ehóod ane mmwaád.

¹⁶ Boŋ ndɔ́ob enwō̄ngēn ane mmwaád ɛmĩ edĩb ẹ̀che ẹ̀mbĩd ene dragɔn á nsal.

¹⁷ Dɔ́o dragɔn ɛlĩnē ane mmwaád, boŋ ákǎg ákumé' bel ne nchyáátēn nĩme ane mmwaád rĩsyā́l nĩme rĩyágé ásē, bad bésyā́l ábe bėbele ngáne Dyōb áhedeé boŋ bėbíde-ɛ Yesue mbóŋ.

¹⁸ Dɔ́o ene dragɔn ɛtyéémé á nkin mé edĩb é nkwe.

13

Jone anyĩné nyam ẹ̀be

¹ Hē dɔ́o rĩnyĩné nyam ẹ̀bíde' á edĩb é nkwe-te. Ene nyam enwō̄ŋ meséb dyóm ne nló saámbe, ewō̄ŋ-ɛ e'kóté bė nkamlen dyóm áwe meséb mĩn. Nló téé mėnwō̄ŋ dĩn áde ásyáá' Dyōb.

² Ene nyam eché mėnyĩnnē embé née ebwé é ngā, nĩmē mekuu-ɛ mékál mėbē-ɛ nyon áyāl née mekuu mé nyam e ahĩn eché ekaa' ewō̄ŋ-ɛ nyān ẹ̀che ẹ̀chábé eche bėchǎgēé bán Bēe. Mmē nsal mėmbē née nsal rĩ ngii. Drǎgone ambě ene nyam eche ngĩne, ábe-ɛ chó adē atii dé nkamlen ne ngĩne e nkamlen.

³ Ene nyam enwō̄ŋ nló nhóg nĩme mėmbē byánán rĩkudé sii eché empon chó awúu, boŋ sii eché ɛtĩm amaa. Yāl enkóm bad bė nkō̄nsé bésyā́l áte áyale enēn nyam, bėbootéd-te chó ahíd.

⁴ Bad bėbágé'áá dragɔne edúbé áyale ambě ene nyam nĩmē nkamlen. Bėbágé'áá ene nyam chǎmpē edúbé bėhóbé nēn bán, “Nzé-módé adé nēngáne enēn nyam? Nzé-módé ahele atyéémēn chó nzum?”

⁵ Bėmbě ene nyam kunze áhób e'yale é' kúmbe ne e'yale ábe e'syáá' Dyōb. Bėmbǎg-ke chó kunze ábenled nĩmē nkamlen á etũn é móom mé ngōn ɛniin ne ẹ̀be.

⁶ Dɔ́o ene nyam ɛnédté nĩmē nsal áte boŋ ẹ̀bootéd Dyōb asyáŋ. Ansyáŋ dĩn á Dyōb, asyáŋ abwóg á hóm wēe Dyōb ádye'é, asyēŋ-ɛ bad bésyā́l ábe bédé ádyōb.

⁷ Dyōb dēmbě-ɛ ene nyam kunze áwan nzum ne ábē bad, átóm-me bó áte. Ambě-ɛ mó kunze ákamlen metúmbé ne metúmbé, meloŋ ne meloŋ ne bad nyaa ne nyaa.

⁸ Moosyá́l awé adyee á nkō̄nsé ábe chó edúbé. Bad ábe bėbēé chó edúbé bėdíi bad ábe bėtélé dĩn á kálag e alongé e Mwān-a-Ndyoŋ mí mbód awé bėnwū'é. Bēntel bó mĩn se á pónđé eché Dyōb dēnhǎgkē nkō̄nsé. Moosyá́l awé adyee' á nkō̄nsé ábe chó edúbé. Moosyá́l awé bėeteleé mó dĩn á kálag e alongé se á pónđé eche Dyōb dēnhǎgkē nkō̄nsé. Mwān-a-Ndyoŋ mí mbód awé bėnwū'é mó awóó enēn kálag.

⁹ Kénzée awé awóó metúu áwóge'.

¹⁰ Kénzée awe edíi nēn bán atǎngēné ake á mbwog ákē á mbwog, kénzée-ɛ awé atǎngēné awé ne nkwaté, nkwaté-áá bėwūēnné mó. Nēn áhednad bán bad bė Dyōb bėwō̄ŋ e'kanj bė nlém, bėchǎnged-te ngĩne-ngĩne ne eyale é Dyōb.

¹¹ Hē dɔ́o rĩnyĩné nyam empée ẹ̀bíde' á ndɔ́ob-té, enwō̄ŋ meséb mėbe nēngáne mwān-a-rĩdyoŋ mí mbód, ẹ̀hǎbē-ɛ dyam née dragɔne.

¹² Ebnlǎdtáá ngĩne eché nyam e'só, ẹ̀belé-ɛ áned áwe e'só-te dēn. Abelé-ɛ nkō̄nsé ne bad ábe bédé áwed-te aá bėbage' ene nyam e'só edúbé. Ene nyam ebédée nyam eché enwō̄ŋ sii eché empon chó awúu boŋ ene sii ɛmaa.

¹³ Ene nyam eché elónté né ẹ̀be embēl mekan mé menyáké mé ngĩne. Embēl muú rĩbíid ádyōb rĩhún á nkō̄nsé bad bésyā́l bėnyĩn-ne.

¹⁴ Andōg-ke bad ábe bédé á nkō̄nsé bésyā́l ne nĩmē mekan mé menyáké nĩme ákudé kunze ábel. Abelé'áá-ɛ nē á'só wēe ene nyam eché enkũd sii boŋ ene sii ẹ̀pon chó awúu. Anlǎá bad aá bėbel ediiĩdinge eche bėbageé edúbé ẹ̀che ẹ̀wǎgné nyam eché enkũd sii e nkwaté boŋ ebé ebé á alongé.

¹⁵ Bėmbě nyam eché elónté né ẹ̀be kunze áhēbe peme e alongé á ediiĩdinge é nyam e'só ábel nēn eché ediiĩdinge ẹ̀hel dyam ahób ẹ̀wúu-ɛ bad bésyā́l ábe bėekwēntēne mó edúbé ábe.

¹⁶ Ene nyam ennyágéd bad bésyāāl, ken bad ábe bédé etógnán ké'ε ábe béees'ε etógnán, nhon ne ntógétóke, ntān ne kunze, aá béhē bó e'chem áwab ekáá émbáá ké'ε áwab e'só é'mbōm.

¹⁷ Modmod eéhele'aa chōmchōm achan ké'ε asóm ésebán awóó ábē e'chem. Abē e'chem é'bédéε dīn áde enén nyam ké'ε eche nómbe.

¹⁸ Nén áhēdne debýéé. Mod ké ahéé awé awóó nsōntēn áhēd áte chōm éche nómbe echē ene nyam édífí. Ene nómbe edíi nómbe e dīn á mod. Ane mod eche nómbe edíi mbwōkel ntóób ne móom ntóób ne ntóób.

14

Jone anyiné Mwān-a-Ndyōn ní mbód ne abe bad

¹ Hē dōo rínóné bon rínyíné' Mwān-a-Ndyōn ní mbód atyéémé á mbōod eche béchagēé bán Zayōn. Bad bēbédé ne mós mbwōkel ekálé, móom mé e'kálé méniin ne é'niin ábe bēnwōn áde dīn ne dīn áde Sáá áwab mesó mé mbōm.

² Ene pónde dōo ríwógé ehōb ébídé ádyōb. Echē ehōb ébédéε néε ntogag mé eláá éche ésobpe, ébē-ε néε ntogag níímē ríwág nzé ngin etómé. Ehōb éche ménwōgkē ébédéε nēngāne ntogag ní bad ábe békume rílendē.

³ Abē bad mbwōkel ekálé ne móom mé e'kálé é'niin ne é'niin bentyēem békōnē' nkāngé mékōōlé á'só bé atii dé nkamlēn ne á'só é' nyam chē éniin éche édé á alongé, ne á'só é' bad bēmbáá. Modmod enkēnhenlé níímē nkāngé ayāge nzéεe bó bad mbwōkel ekálé móom mé e'kálé méniin ne é'niin ábe Dyōb ákōdté á nkōnsé-te.

⁴ Abén bad bēbédéε bad ábe béēwōgē mbinde e mmwaád ayāle nēn béēbii'ε nsób mé mmwaád. Abē bad bóó béhíde, Mwān-a-Ndyōn ní mbód kéhéé wēε ákagké. Abén bad bóó békōdté áfínté e baányōn. Bó-aa bédé néε e'pum bésó ábe bēbágé Dyōb ne Mwān-a-Ndyōn ní mbód néε mende.

⁵ Metóm ké mehōg méesaá bó á nsāl, béēwóo-áa awusé ké ahóg á yāl.

Ángel eláán épéiné nkalān ní mbakú e Dyōb

⁶ Hē dōo rínyíné ángel empée epumme' se ádyōb. Ene ángel empēēn nkalān ní bwām níme rídé abé ne abē. Mmē nkalān mō-aa álāngé'áa bad ábe bédé á nkōnsé, bad nyaa ne nyaa, metúmbé ne metúmbé, mehōb nyaa ne nyaa, ne melon ne melon.

⁷ Ene ángel enhōb ne ehōb éche échāgké áá, "Nyébage Dyōb edúbé, nyébage-ε mós mekenag ayāle nēn eche pónde e nkāásé emaa ape. Nyébage' edúbé ne ane awé ahágé ámín ne áse, edíb é nkwhé ne n'yéle."

⁸ Ángel empée echē elónténé ébe enhíd mós, éhōbē nēn áá, "Ndāle e Dyad, Babilon amaa ne amaa ásyāāl! Ambél bad bé melon bésyāāl bēmmwē níme níím mé ngíne. Mmē níím mébédéε esíí é nkābtéd mé akwalēε."

⁹ Ángel empée eche elónténé eláán enhíd bó, éhōbē ne ehōb éche échāgké áá, "Kénzēé awé abage' ene nyam eche ebídé á edíb é nkwhé-te ne échē edíidíngē edúbé bon ákūd-te abē e'chem áwe e'só é' mbōm ké'ε á ekáá,

¹⁰ mómpē ámwē níím rídé melíngá mé Dyōb. Bésyógé mós á kōb e melíngá mé Dyōb ne ngíne esyāāl. Kénzēé awé abage ene nyam edúbé ane mod ákūd metuné mé muú níme ríhunne' bwāmbwam á'só é' ángel éche esáá ne Mwān-a-Ndyōn ní mbód.

¹¹ Mwēntud níme níbide á muú níme ríhyānte' bó, níchāgkē' ámín á ngíndé ne á ngíndé. Nkuu ne mūte, nkōme áte méesaá ne bad ábe bēbage ene nyam ne échē edíidíngē edúbé. Né-aa edíi ne kénzēé awé awóó e'chem é' dīn ábe ene nyam."

¹² Nén áhēdnad bán bad bé Dyōb bēkanj lém. Bad ábe bēbele ngāne mbéndé é Dyōb éhēdeé bon bēdúbe-ε Yesue.

¹³ Dō-aa ríwógé néε ehōb ébídé ádyōb éhōbē áá, "Tēl áse nēn wēε, bootya bōob, nnam ne bad ábe bēwédé, ayāle bēdúbpé Sāngwéε." Edōádān éhōbē nēn áá "Éε, békūd nkōme áte ayāle nsón níme bēbélé, békūd nsábe ayāle nsón ní bwām níme bēbélé."

Jone anyiné bēpáde' mbote á nkōnsé

¹⁴ Dōo rínóné bon rínyíné mbag eche épúbe'. Á mbag mīn wē, mod andyēé awé awágné Mwān-a-Moonyōn. Ekóté é nkamlēn é gól ébē mós á nló, páá echē ekōbpe eche bēpádnēé bwēm nēngāne ngun, chō-ε ebé mós ekáá.

¹⁵ Ángel empée embíd á ndáb e Dyōb-te élēbpē ane awé andyēé á mbag mīn ne ehōb éche échāgké áá, "Benléd ehoj páá ápád mbote, ayāle pónde epedé echē bēpádeé. Mbote é nkōnsé emáá ayag."

¹⁶ Dōo ane awé adyēé á mbag mīn átómteé páá á nkōnsé, ápád-te mbote é nkōnsé esyāāl.

¹⁷ Dōo ángel empée echē chō-ε ámpē enwálé páá echē bēpádnēé bwēm nēngāne ngun ébídé á ndáb e Dyōb echē édé ámín.

¹⁸ Ángel empée empě echě ewóó ngíne ámín e muú, embíd á menyán mé e'twé bonj álěbpě ángel echě ewánlé páá echě ekóbpe ne ehób echě échákgé aá, "Benléd echonj páá, éladen mechəŋj mé e'pum é' mel á nzag éche édé á nkōŋsé, áyāle e'pum é'yágé."

¹⁹ Dóo ene ángel étómté eche páá á nkōŋsé bonj áladé ábē bad ábwēmē bó wée Dyōb álúmté é nímē melingá mé ngíne, ngáne bēladé e'pum é' mel bonj bēbwēm á bwāl bé e'pum é mel.

²⁰ Bēndyāŋ ábē e'pum é' mel á bwāl ábe béesě á dyad tē. Mekíí mémbūl, mébē e'che áse dyam méta mehōg ne epeɗ, méchāb-pe áte dyam mbwókel é máyl ébe.

15

*Jone anyiné ángel saámbé
ne medim saámbé*

¹ Hē dóo rínyíné e'chemléd bēmpēe ádyōb ábe bēmbē ngíne, bēnkāmēd me yāl áte. Menyínj ángel saámbé éche éwánlé medim saámbé. Mmē medim móo médé medim mé asóg áyāle móo Dyōb débēnlédte álúmed nímē melingá ámād-te áte.

² Dóo rínyíné chōm nēe edīb é nkwě éche édé nēe dyené, éche békúmténé ne muú. Menyín-ne nēe bad bētyéémé á nkəg mé échě chōm éche ébédé nēe edīb é nkwě, bēwálé rílende ní Dyōb. Ábē bad bēbédé bad ábe bēntōm ene nyam áte, ne échě ediidinge ne nōmbe e dīn áde ene nyam e'só.

³ Békóné áá nkāngé níme mbaledé a Dyōb, Mosεε, ne níme Mwān-a-Ndyəŋ ní mbód, bán, "A-Sánj Dyōb á Ngum, nímōŋ mbəltéd rídé ngíne ríkómté-ε mod yāl áte.

A kəŋj e melonj,* echōŋ nyaa etāngéné, edé-ε mbále.

⁴ A-Sánj, nzé-módé éebāŋj wε?

Nzé-módé eebāgε wε edúbé?

Mmōŋpen-naá esáá.

Bad bé melonj bésyāāl bēhyě wε edúbé ábe.

Mmōŋj mbəltéd níme rítāngéné níbídé áwed."

⁵ Ade nēn átómé dóo rínyíné nēe bédíbpé ebem é Dyōb á ndáb e Dyōb.

⁶ Dóo ángel chē saámbé éche énwālē medim saámbé ébídé á ndáb e Dyōb-te wē. Bēnhē mbóté échě esáá éche ekine' áte, bēwáá-ε bengásó bé gól á tál tē.

⁷ Dóo nyam póg átínté nyam éniin, ébágé échě ángel kúmbe é gól saámbé, échě éloné ne melingá mé ngíne mé Dyōb, mó awé adé abé ne abé.

⁸ Dóo mwěntud mé ehúmé é Dyōb ne ngíne e Dyōb bēloné á ndáb é Dyōb-te. Modmod-te ekēnhenlé asól á ebem tē wē kōəŋj né medim saámbé níme échě ángel saámbé mēpédé á asóg.

16

Kúmbe saámbé é melingá mé ngíne mé Dyōb

¹ Dóo ríwógé nēe ehób éche échákgé ébídé á ndáb e Dyōb te wē, élāŋgē échě ángel saámbé aá, "Nyékaŋ, nyésyog melingá mé ngíne mé Dyōb níme médé á kúmbe saámbé te á nkōŋsé te."

² Hē dóo ángel e'só ekíí ene kúmbe e melingá mé ngíne mé Dyōb asyog á nkōŋsé-te. Melóg níme médé ebébtéd, níme méwag bwāmbwam mémbíd bad á yāl. Ábē bad bēbédé bad ábe bēnwōŋj e'chem ábe ene nyam bēbē-ε bad ábe bēbágé áá échě ediidinge edúbé.

³ Dóo ángel echě éloné nēe ébe ésyógé ene kúmbe e melingá mé ngíne á edīb é nkwě te. Mēntīm nēŋgáne mekií mé ndim ní mod. Chōm-té éche ébédé á alonjé á edīb é nkwě-te wē énwē.

⁴ Dóo ángel echě éloné nēe élaán ésyógé melingá mé ngíne níme mébédé áwē kúmbe', á e'dīb ne á n'yélé tē. Ábē e'dīb bēntīm mekií.

⁵ Dóo ríwógé ángel echě ekamlan mendīb ehóbe' aá, "Mbakú e nkáásé echōŋ etāngéné. Wε awé edé, awé ambé-ε. Wε awé Esáá."

⁶ Mbakú échōŋ etāngéné áyāle bēnsyóg mekií níme ábōŋ bad ne ábōŋ bekal-bé-e'dásəŋ, né-ə əbágé bó mekií ámwē. Mmē nkōgseŋ mó-áá bétāngéné akud.

⁷ Dóo ríwógé nēe ehób ébídé á menyán mé e'twé ehóbē nēn aá, "A-Sánj Dyōb á Ngum, mbakú echōŋ etāngéné edé-ε mbále."

⁸ Dóo ángel echě éloné nēe éniin ésyógé melingá mé ngíne níme mébédé áwē kúmbe-té á etondeε. Dyōb dēmbē Etondeε ngíne áhyáad bad nēe muú.

* 15:3 Donje á kálag dé'só áwóó: *kəŋj e melonj*; donje-ε áwóó: *kəŋj e bad bé Dyōb*.

⁹ Bad bényhāy ne e' chode bé ekide é' ngine. Héε bésyáá dīn á Dyōb mós awé ákamlan nímé medim. Boŋ békēnhaŋlénne mbeltéd mé mbéb átimen Dyōb ábe mós ehúmé.

¹⁰ Dóo ángel eché elónténé étáan ésyógé meliŋgá mé ngine nime mébedé áwé kúmbe á atii dé nkamlen áde ene nyam eché ebídé á edīb é nkwē-te. Hé dóo nkamlen nime ene nyam ríkwédé ehíntén áte. Bad ábe bhídé'áá ene nyam bélaáde'áá ábab e'chém áyale e'wε ábe béwógé.

¹¹ Bénsyāŋ Dyōb ámīn áyale mewε mé melóg nime béwógé'áá. Boŋ békēntedéé mīmāb mbeltéd mé mbéb átimen Dyōb.

¹² Dóo ángel eché elónténé ntóób ésyógé meliŋgá mé ngine nime mébedé áwé kúmbe-té á edīb é mbáambáa é Yufretes. Eché edīb énlēn, áboŋsen nzii ábel boŋ kāŋ eché ebídé wεε etondεε ábideé éhel atóm.

¹³ Dóo rínyiné néε e'daádāŋ bé mbéb é'láán ábe é'dé néε e'búd é'bídéε. Abé e'daádāŋ, ehóg émbíd á nsāl nime dragōne, ehóg ébíd á nsāl nime nyam eché émbíd á edīb é nkwē-te, échíní-'ε ébíd á nsāl nime nkal e'daádāŋ á metóm.

¹⁴ Abé e'daádāŋ é'diū e'daádāŋ bé mbéb ábe é'bele menyáké, é'hyóme' nkōŋsé áte rísyāāl, bétāne kāŋ é bad, béladé bós áte, ábel béboŋsen nzum e epun éche Dyōb á Ngum ákáádté bad.

¹⁵ Yesue ahóbé áá, “Nyénoné, mēpě á epun éche modmod éebíí'ε, ngáne nchīb ápagké. Nnam ne ane awé adyεé epin, awálé-'ε eche mbóté áyāl ábel boŋ eékāg nsób boŋ awóg akwágké á'sō é' bad.”

¹⁶ Abé e'daádāŋ bēnlād éché kāŋ áte á hóm áde béchāgεé á ehób é Hibru bán Amagadān.

¹⁷ Dóo ángel eché elónténé saámbé chós-'ε ésyógé meliŋgá me ngine nime mébedé áwé kúmbe-té á pemε-té. Ehób éche échāgké émbíd á atii dé nkamlen á ndáb é Dyōb te, éhóbé nén áá, “Ebénlédé.”

¹⁸ Emwεdmwεd étómé'áá, dyōb ákumé' áte, ngin-ne étómé'. Ndóob ennāŋnéd ne ngine nyaa eché éebénlédéé ámpé taa moonoyōŋ abāg á nkōŋsé. Ndóob ennāŋnéd ne ngine nyaa eché ebédé ebébtéd.

¹⁹ Hé dóo dyad á ngine ámbáá ákábné áte moŋge meláán, myad mémháá nime mébedé á meloŋ mésyāāl mémpāá. Dyōb dēnkamtén ngine-e-dyad, Babilōne, ábēl-le áá bad ábe bédé áde dyad békud nkōgsen adēhób áá móbel bémwé mīm nime nímé meliŋgá mé ngine.

²⁰ Dyad ké ahéé áde mendīb mēnlāŋnédté démbōo, mbóod ésyāāl-le ényōŋ.

²¹ Meláá mé mbúú nime méde e'del dyam móom mé kilo méniiin ne étáan, mébídé'áá ámīn méhūntād baányōŋ ámīn. Abé bad bénsyāŋ Dyōb áyale ábē e'dim é' meláá-mé-mbúú bēntōmtēn ebébtéd abé.

17

Jōne anyiné mmwaád awé aditlé nyam

¹ Dóo ángel póg áfinté eché ángel saámbé éche énwālē kúmbe saámbé épédé boŋ élanŋé me áá, “Hyág, ríke rílumed wε nkōgsen nime akwalεε ambáambáa ákudté. Ane akwalεε adyεε' dyad ámbáá áde áde benben ne e'dīb é'mbáá híin.

² Mmwaád awé kāŋ é meloŋ mé nkōŋsé ésyāāl énáŋnáádtáá. Bad bé nkōŋsé bémwágé'áá mīm nime ane mmwaád mékóbé bós békābē-'ε mesón ne mós.”

³ Dóo Edaádāŋ é Dyōb épíídé me, boŋ ángel ékεené me á ehyāŋge. Áhed dós-'áá rínyiné mmwaád nhóg. Ane mmwaád andiū nyam eché eyāge. Ene nyam enwōŋ mīm nime mésyāō Dyōb yāl esyāāl. Ene nyam enwōŋ nló saámbé ne meséb dyōm.

⁴ Ane mmwaád anwáá mbóté eché eyāge', ndīn eche kāŋ éhāgkε ne eché etómtánnáá ayag. Ankútén yāl esyāāl ne bwēm é' gól ne bān bé meláá mé etógnén ábē bépεne áte ne bwēm bé etógnén bémpēe. Anwálé kōb é gól á ekáá éche elóné ne mekan mé nkōlōŋgó ne mekan mé mbinde mé akáb dé mesón.

⁵ Dīn ábédé mós á'sō é' mbōm néε kun e e'koŋnéd áde mod énkémbíí'ε, ábédé bán, “Babilōn, Dyad á ngine. Nyaa á bekwalεε ne mekan mé mbéb á nkōŋsé te.”

⁶ Dóo rínyiné ane mmwaád, mekiū mé bad bé Dyōb ne mekiū nime bad ábe bébele' ngáne Yesue áhedeé, mékóbé mós néε mīm.

Áde rínyiné mós, menyáké mé ngine ménkōb me.

⁷ Dóo ene Ángel ésedtεé me aaken, “Cheé ékás boŋ menyáké mékóbé wε? Mēlāá wε kun e mmwaád ne e nyam eché ádíídé, eché ewóó nló saámbé ne meséb dyōm.

⁸ Ene nyam eché wényínné, ekébé á alongé boŋ éesaá á alongé bōob. Émbíd á echóg éché éewóo asóg, áke wεε béwūū'ε chós. Bad ábe bédé á nkōŋsé, ábe Dyōb déeteleé mīmāb mīm á kálag eche ewóó mīm nímé bad ábe békúdé alongé áde déemaá' byánán áhāg nkōŋsé, menyáké mékōb bós. Yāl ékōm bós áte ányín nyam eché émbé á alongé boŋ eése á alongé boŋ étim abé alongé ámpé.

⁹ Né dso debyéé ne nsòŋten béhednadté. Mmē nló saámbé nĩme ene nyam éwóó nĩdii e'kone saámbé ábe ane mmwaád ándii' é ámĩn, mbé-'é kãŋ saámbé.

¹⁰ Atĩnté échē kãŋ saámbé, étáan émáá awé, póg edii edé á nkamlen, enĩnii póg-ke eépédéé á nkamlen. Boŋ áde épéé, édyéé á esóŋ é pónidé.

¹¹ Ene nyam echē embé boŋ eesé bɔɔb, chò elónténé kãŋ waam. Echē kãŋ saámbé chòs éwóó chò, ekag-ke wéé éwéé.

¹² Meséŋ dyóm nĩme ene nyam médii kãŋ dyóm éche éékūdē nkamlen. Boŋ békūd ngine ákamlen néé kãŋ nchoo ne ene nyam áyale háwa póg.

¹³ Ntĩi nhóg mɔɔ échē kãŋ dyóm éwóó, bébage-'é ene nyam echab ngine ne nĩmāb nkamlen.

¹⁴ Bēwān nzum ne Mwān-a-Ndyɔŋ ní mbód. Mwān-a-Ndyɔŋ ní mbód átom bó áte á nzum. Nén débenléd áyale mó adé Sãŋgwéé á baásyāā, abé-'é kãŋ e kãŋ ésyāā. Adé ne bad ábe Dyób áchénlé boŋ ápwēd-te, ábe bébenle mó ne nlém nhóg."

¹⁵ Dso ene ángel élanjéé me áá, "E' dīb ábe ényíné wéé ane mmwaád-a-akwaleé ádyēē, é'dii bad, amute, meloŋ ne mehób.

¹⁶ Meséŋ dyóm nĩme ényíné bɔɔbe ene nyam békóó ane akwaleé. Békobén mó chòm ésyāā eché áwóó, bēbēl abé nsób. Bedyē mó nyam, béhyāād-te mó á muú.

¹⁷ Bēbēl nē áyale Dyób áhéde bó nĩmē ntĩi á nlém-té, nĩme áhédeé áá bēbēl. Dyób átíidé nén áá échē nyam éwóŋ ntĩi nhóg, ábele mó néé mod nhóg. Bēbē ene nyam echab ngine e nkamlen kóŋŋe pónidé eché e'yale ábe Dyób áhóbé bēlónnē.

¹⁸ Mmwaád awé ényíné adii dyad ámbáá áde ákamlan kãŋ é nkòŋsé."

18

Jone anyíné ngáne Dyób akòŋséné Babilone

¹ Ade nĩmén mekan métómé dso nĩnyíné néé ángel empée ébidé ámĩn, eché ewóó nkamlen ní ngine, éche ehúmé épené' nkòŋsé áte nĩsyāā.

² Dso ákáné áte ne ehób éche écháŋké áá, "Akwedé, Babilone, ndale e dyad akwedé! Atimé dyad dé e'dáɔdɔŋ bé mbéb, abón dé e'dáɔdɔŋ ábe béesáa é'syāā, ne abón dé menon nĩme méesáa * ne nĩmé bad békóó.

³ Ayāle bad bé meloŋ mé nkòŋsé bésyāā bēnwōŋ esii ábel mekan mé mbéb nĩme ábeléé byánán abagé bó mĩm nĩme mékóbé bó. Kãŋ é nkòŋsé ékábné mó asón. Esii é ngine ábel mekan mé mbéb échē-'é, ébélé bekáb bēnyonjéé bé nkòŋsé bésúdeé nhon."

⁴ Dso níwógé ehób émpēe ébidé ámĩn nén bán,

"Ábēm bad, nyébíd áde dyad áte, ábel nén nyéelatán bó ábel mbéb boŋ nyéékūdē akab dé nkòŋsen nĩme békudté.

⁵ Mbéb nĩme níkúmné mó á yāl níde e'che se ádyób, Dyób-pe ákamténé nĩmē mekan mé mbéb nĩme ábélé.

⁶ Bēl mó melelem mé dyam nĩme mɔ-'é ábélé wē.

Sábé mó ngen ébe áyāle mekan mé mbéb nĩme ábélé.

Hagé mó mĩm ngen ébe á káb eché áhágké wē ébe mó.

⁷ Ewōgēd mó ndutul ne metake nĩme médé ngen ébe ne nhəgtéd mé ehúmé ne esii é ngine ábel mekan mé mbéb éche ábágé yāl.

Áhóbe' áwe nlém-té áá,

'Ndyéé néé ndale e mmwaád, meesáa nkúd, méelēb-paá mbéd.'

⁸ Né-ɔɔ, medim mésyāā mépií mó epun ehóg.

Mmē medim médii: Nkole, achii dé awé ne nzaa.

Béhyāād mó ne muú, áyale Sãŋ Dyóbe, mó awé ákaād mó, awóó ngine."

⁹ Kãŋ é nkòŋsé éche ékábnáá mó mesón, bēlatán-ne mó ne esii é ngine ábel mekan mé mbéb, bēchií bēlēb-pe pónidé eché bēnyinnē mwēntud nĩmbide' áde áhyáá'ē.

¹⁰ Betyēem nchabnede áyale bēwóge mbwóg bán bómpē békūd metake nĩme ákúde. Bēbōné bán, "Etyag, etyag ne ndale e dyad, a ngine e dyad á Babilon, á etún é háwa póg ngén dso ékúde nkòŋsen nén-ε?"

¹¹ Bekáb bé nyonjéé bé nkòŋsé-'é bēchyeé', bēlebe-'é mó áyāle modmod éechanéé ábab bwēm ámpē.

¹² Bwēm é' nyonjéé bē é'bédéé bwēm é' gól, sílva, bán bé meláá ábe békine áte ne bán bé meláá bé etógnén. Ábē bwēm é'bédéé kóŋŋe mebad nĩme mélélé nkun, ahóg áde bēchagéé lĩnen, démpēe bán Sílíke, ne mémpēe nĩme méyage', ndín éche kãŋ éhágké ne nĩme métómtan ayag. Ábē bwēm é'bédéé mebámbé nĩme mébidé áyāl e mel mé e'lod é' bwām

* 18:2 Mbéndé é bad bé Israel elúmté'áá nén bán donje dé menon ne donje á nyam déesáa'ē, né-ɔɔ béedyáge'áá ábén bwēm.

ne bwēm ábe bépódé ábe é'lélé nkun bwámbwam. Abé bwēm é'béde kóŋne bwēm ábe bébénlé meson mé nzyog ne e'kii, brāns ne meláá nime mékine áte nime béchagéé mábel.

¹³ Bénwōŋ kóŋne bwēm nēŋgáne sinamōn, bwēm bé elod é bwām, e'twé, mía, frankinsen, mīm, dyōg dé menzab, kase é mbumé rí ngun ne ngun éche béchagéé bán wít. Bésomé'áá kóŋne nyag ne mbód, hōse ne e'bambam, ne betāŋ ne bad ábe békóbe.

¹⁴ Bekáb bé nyongé béhóbe'áá áwē nén bán, "Bwēm é' bwām é'syāal ábe nyénwōŋgē esíí áyāl, béesaá ne nyé ámpē. Ebós bwēm é' bwām é'syāal ne bwēm bé elóon, wéekūd-taá bós ámpē."

¹⁵ Bekáb bé nyongé ábe bēwóó ábén bwēm bésúde nhon ne ábe bwēm. Bétyēem nchabnede áyale bēwóge mbwōg bán bōmpē békūd metake nime ákúde, béchyéé' bélebé'-e.

¹⁶ Béhōnē bán, "Etyāg, etyāg, á ndāle e dyad, wē awē ewāá'áá mbóté é bwām éche bébāŋnéde kase e abad eche béchagéé bán línēn, éwāā'-e áde áyāge ne áde átómtan ayāg. Wē awē ehágáá bwēm é' gól, ábe bébénlé bán bé meláá mé etógnén ábe békine áte ne bán bé meláá bēmpēe ábe bélélé nkun ábe béchagéé bán pēel,

¹⁷ á etūn é háwa pōg ngēn nímē nhon rísyāal nóbós."

Bad bēmbáá bé stíma ne bad ábe békag ne stíma, bad ábe bébele nsón á stíma tē, bad ábe békábe nyongé á edíb é nkwē te, bēntyēem nchabnede,

¹⁸ anyín áde bényínné mwēntud míbide' áde béhyāŋtēé mós. Bēnlēbē e'saád bán, "Ndāle e dyad ké pōg eébédeé nēŋgáne enén!"

¹⁹ Dós bēsyōgēé e'bumbō áwab nló áyale béchyéé'áá', bélebé'-e, béhōbē bán, "Etyāg, etyāg, ne ndāle e dyad, echē bewōŋ bé stíma bésúde nhon ne ábe bwēm. A etūn é háwa pōg ngēn abódé chōm ésyāal.

²⁰ "Bwēl-amíne asyāal áwōg menyīŋge áyale nkōgsen nime ane mmwāád ákúde. A-bad bé Dyōb, bembapēe bé nlómag ne bekal-bé-e'dāsdāŋ, nyéwōg menyīŋge áyale Dyōb ábidtéde nyé mbakú tāŋgene mós."

²¹ Dós ángel e ngíne ényéné nyē ndim e aláá abwēm-me dós á edíb é nkwē te, áhōbē áá, "Nén dós bēbwēmme ndāle e dyad embáá, Babilōne, ásē ne ewāŋge ésyāal, bad bēnyín-naá dós ámpē mbēb.

²² Ene pōndé ntōgag nime bechōg bé rílenē, ne bekón bé nkōŋgé, ntōgag nime betōŋ bé ngōmbē ne betōŋ bé e'lon méewōgnédte áwōŋ dyad-tē ámpē. Bad bé nsón mé mekáá ábe bēebáá ámpē, ntōgag nī mesín nime mékōge' bwēm méewōgnédte ámpē.

²³ Awōŋ dyad tē, etrukāŋ éepenné ámpē mbéd, ehōb é sómbé bós nchóm éewōgnédte ámpē mbéd. Adé dyad bébébed dós áyale áhē bekáb bé nyongé bós bébéde ndāle é bad á nkōŋsé, bad bé meloŋ mé nkōŋsé mésyāal-le bēndognéd áyāl e echōŋ ngāŋ."

²⁴ Dyōb ákōgsénē Babilōne áyale bad bé Babilōn bēwúú bekal-bé-e'dāsdāŋ, ne bad bēmpēe ábe bēwéde á nkōŋsé.

19

¹ Ade ene Angel émáá nímén mekan mésyāal ahób, dós ríwóge chōm nēŋgáne ehób éche échággé é ndun e mod ébidé amín, bébōnē bán "Mekēnag mébē ne Dyōb. E'soosōŋ, ehúmē ne ngíne béhúú ne áded Dyōb.

² Echē mbakú edé mbāle etāŋgéné'-e áyale akáádté akwalee ambáá awē abēlté bad bé nkōŋsé bēsyāal mbēb ne áde akáb dé mesón, akuné'-e mekíí nime ábē bembalede nime ane mmwāád ánsyōggé."

³ Dós bébóné ámpē bán, "Mekēnag mébē ne Dyōb. Mwēntud nime míbide' ngáne ene ndāle e dyad éhyáá'é ríkag amín á ngínde ne á ngínde."

⁴ Abé bad bēmbáá móom mébe ne bēniin ne échē nyam éniin bēnkwē ásē á'sō é' Dyōb bébagé'-e mós edúbé, mós awē adiíde atii dé nkamlēn, béhōbē nén bán, "Ebē nē! Mekēnag mébē ne Dyōb."

*Jōne anyíné ngānde e e'wōŋgé
e Mwān-a-Ndyōŋ nī mbód*

⁵ Dós ríwóge ehób ébidé á atii dé nkamlēn, ehōbē' nén áá, "Nyékene' áded Dyōb. Nyé ábe nyéde ábē bembalede, nyé ábe nyébage mós edúbé, ken bad ábe bédé etógnén-e ké'e ábe béesé etógnén."

⁶ Dós ríwóge chōm nēŋgáne esaád é ngíne é ndun e mod, ébéde byánán mendíb nime mésoppe', ébéde ámpē néē dyōb ákumé' áte ne ngíne. Echē esaád éhōbē nén, "Mekēnag mébē ne Dyōb. Áyale awed Sāŋgwéé, Dyōb á Ngum adé á nkamlēn.

⁷ Syānē déwóge' menyīŋge bwámbwam, déhōbe bán dedé menyīŋge dékené'-e mós, áyale pōndé e e'wōŋgé eche Mwān-a-Ndyōŋ nī mbód epedé, sómbé'-e emáá aboŋsen.

⁸ Ayāle akwōgnédé, Dyōb ábágé mós kunze áhé mbóté eche bébáñnédé kàse e abad áde béchagésé bán línen. Apene' áte ásáá'-e." Ene kàse e mbóté édé nēngáne mekan nĩme bad bé Dyōb bébeleé nĩme Dyōb áhedéé.

⁹ Dóo ene ángel élangésé me áá, "Tél nén we, Nnam ne ábē ábe bélébpe á ngande e e'wóngé eche Mwān-a-Ndyoñ ní mbód." Anhób áwēm ámpē aláá'-e me ámpē áá, "Ábén e'yale é' mbále é'húú ne Dyōb."

¹⁰ Dóo níkwédé ásé áwe e'só ábe mós edubé. Anláá me áá, "Weebēlē nē, mémpē ndii mbáledé a Dyōb nēe we, mbé nēe bad bēmpēe ábe bédúbpé Krístáa, mbé'-e nēe nhóg awē atyéémé áyál e mbále eche Yesue áyágté. Dyōb dóo nyétáñgéné edubé abe. Ene mbále eche Yesue ábídté áwed, chós ebage bad ngíne ákal nkalan ní Dyōb."

*Mod awē adiídé hásé eche épúbe'
atómé nyam eché ebídé
á edīb é nkwe'-te áte á nzum*

¹¹ Menyín méé ádyób ánédnéde. Héé nínóné boñ ninyínē' hósé eché épúbe', mod awē mós'-e andii chós béchágé' áá mós bán Ane Awē Adé mbále ábelé'-e bad ábii mbále tǎngene Dyōb. Akógsan bad nyaa eché etóñgéné áwanné'-é ábē bad bé ekoyí.

¹² Míd mébédé mós áte nēe muú nĩme níhodne', anhé'-e e'kóté bé nkamlen híin á nló. Anwón dín á yál áde modmod éebii' é etótméé mwēn.

¹³ Anwáá'-e megombe nĩme béchúbé á mekií-te, dín áde béchagésé'-e mós ádíí Eyale é Dyōb.

¹⁴ Sǎnze éche édé ádyób énhē kàse é mbóté eche bébáñnéde abad áde béchagésé bán línen, épúbē' esán'-e. Béndii hósé eche épúbe' béhídé mós.

¹⁵ Páá eché ekóppe' bwámbwam embíd mós á nsal-té. Chós ábenléé ákógsen bad bé melon. Akamlén-ne bós ne ekáá éche éhyédé. Akógtéd bwál bé e'pum áte ábel ámín besabé ábe bébenléé mím, álúmed nímē meliñgá mé ngíne mé ébébtéd nĩme Dyōb á ngumē.

¹⁶ Dín áde áwē mengombe ne áwē epoñ mún nén bán, "Kǎñ e kǎñ ésyāal ne Sǎngwéé a besǎngwéé bésyāal."

¹⁷ Dóo ninyíné ángel etyéémé á enyen-té boñ ábóñné menon nĩme mépúmmé' áá ádyób ne ehób éche échágké áá "Nyéhyag nyéladen áyāle sǎñkalaa a ngande eché Dyōb déboñsénne.

¹⁸ Nyéhyag nyédyé nyam é kǎñ, nyam é sǎnze émbáá, nyam é ndale é bad, nyam é hósé ne nyam é bad ábe bédífíde chós. Nyéhyag nyédyé nyam é baányon bésyāal, é kunze ne é betán, bad ábe bédé etógnén ké'-e ábe béésé etógnén."

¹⁹ Dóo ninyíné nyam ne kǎñ é bad é nkóñsé ne échab sǎnze éladné áwan nzum ne ane awē ansébé ape ádíí hósé eché épúbe' ne éche sǎnze.

²⁰ Dóo békóbé ene nyam ne nkal é' dǎádǎñ a metóm. Ane nkal é' dǎádǎñ a metóm ambé chós á'so-te, álúmté e'chemléd ádog bad ábe békúde e'chem ábe ene nyam, bébage'-e eché ediiñingé edubé. Ade bédífí á alongé, bémwēm bós bad bébé á edib é nzab é muú, bényhǎñ ne muú nĩme níhunne' bwámbwam.

²¹ Ane awē adiídé hósé ambenléd páá e eché embíd mós á nsal té awúú bad ábe belyágé ásé, eché kǎñ ne échab sǎnze. Menon mésyāal ménkōd áde bédýdé échab nyam.

20

Devale ábē á mehan á etún é ekálé é mwé

¹ Ade ane mod atómé ábē bad bé ekoyí áte, dóo ninyíné nēe ángel ébídeé ádyób ésudé ásé ewálé e'kii bé echóg éché éewóo asóg, ewálé'-e sǎñkalaa a ngobéngōbē awé adelé.

² Dóo ákóbé dragone, ene nyā e'boód eché édé Devale, ebé'-e Satane, áhan mós á etún é ekálé é mwé.

³ Ambwém mós á echóg éché éewóo asóg ádíb, ápēn-ne chós ábel boñ eéhēlē bad bé nkóñsé adog ámpē kǎñne á pónde eché ekálé é mwé émaá' é áte. Ambid enē bényhūd mós á mehan á esón é pónde.

⁴ Dóo ninyíné metii mé nkamlen, bad ábe Dyōb démbéé kunze ákamlen, bós bēndýéé áhed. Mennyín-ne e' dǎádǎñ é' bad ábe bēnwē. Bénywū bós áyāle mbón eché bédíde' áá Yesue ne áyāle ákal áde békálé' áá nkalan nĩme níhúú ne Dyōb. Bénywū bós áyāle bébage'-áá ene nyam edubé ké'-e eché ediiñingé ne áyāle akob áde bénkēnkobpé e'chem á mbom ké'-e á ekáá. Bétim ámbíd á alongé, bósbe Yesu Krístáa bēbé á nkamlen á etún é ekálé é mwé.

⁵ Nén dóo débē mpuu mé e'só. Bad ábe bényág ásé ábe bēnwē bénkēntimmé ámbíd á alongé kǎñne ámbíd é ekálé é mwé.

⁶ Nnam níbē ne ábē ábe bēbē mpuu mé'só áte. Bédii bad ábe bésáá. Kwééd eché édé kwééd e edǎádǎñ éewóngé ngíne ámín e bad ábe bédé mpuu mé'só áte. Boñ bēbē prisé é Dyōb ne eché Krístáa bēbé'-e á nkamlen ne mós á etún é ekálé é mwé.

Jone anyíné Satane akwedé nzum

⁷ Ade éché ekálé é mwé epéé á asóg, bényhūd Satane á mbwōg.

⁸ Abíd áde ábidtē á mbwóg, áke metóngé mé nkòṅsé méniin, áḍög bad bé nkòṅsé. Mmēn metóngé mé nkòṅsé médii Góg, ne Mágog. Satane álad b́́o áwan nzum, b́́ebuú-’e áte nēṅgáne nsíi nime rídé á edib é nkwx̄.

⁹ D́́o b́́ekíi nkòṅsé áte ŕ́syā́l, b́́eləṅnéd abwóg á hóm áde Dyób ádáá, ẃ́e abē bad b́́edíi, boṅ muú mémbid ámin ŕ́hyā́ad b́́o baasyā́l bam.

¹⁰ Devále awé andog b́́o, b́́embwēm ḿ́o á edib é nzab é muú nime ŕ́hunne’ bwám bwam, ẃ́e ene nyam ne nkal é’ d́́adádəṅ a metóm b́́edíi. Ahed d́́o b́́ekudté metake mé ngíne nkuu ne müte á ngíndé ne á ngíndé.

Dyób akáadté bad á asóg dé nkòṅsé

¹¹ D́́o ŕ́nyíné mod adíidé atii dé nkamlen ámbáá áde ápúbe’. Ahed-taá nkòṅsé ne abobe ámin b́́ennyōṅ é áwe e’ s’ó-te béetime abé ámpē.

¹² Héé ŕ́nyíné bad ábe b́́emáá awé, bad ábe b́́edé etógnén ne ábe béesé etógnén, b́́etyéémé á’ s’o b́́e adé atii dé nkamlen. Kálag éche Dyób d́́entenlé nímāb mbeltéd áte, b́́endibé ch́́o áte, b́́endibé-’e empée áte. Ene ch́́o enwōṅ ḿ́n mé bad ábe b́́ebē abé ne abé ne Dyób. Dyób d́́ekáad bad ábe b́́ewédé, nchoo ne mbeltéd nímāb ngáne éténlédé á kálag-tē ẃ́e.

¹³ Bad ábe b́́ewédé á edib é nkwx̄-te b́́enkē ẃ́e Dyób ábel b́́ekáad b́́o. Abíníi bad-te ábe b́́ewédé ábe b́́edé á mbwóg e kwééd, b́́ompé b́́etyēem á’ s’o é’ Dyób ábel b́́ekáad b́́o nchoo ne nímāb mbeltéd.

¹⁴ B́́embwēm Kwééd ne Mbwóg e kwééd á edib é nzab é muú. Enén kwééd e edib é nzab ch́́o edé kwééd e edáádəṅ.

¹⁵ Kénzéé awé b́́enkéntenlé d́́in á kálag e alongé, b́́embwēm ḿ́o á edib é nzab é muú.

21

Jəne anyíné nkòṅsé ne nkoṅ ní ḿ́n mé ekóólé

¹ Ade nkáásé ŕ́tómé, d́́o ŕ́nyíné nkoṅ ní ḿ́n mékóólé ne nkòṅsé mé ekóólé. Nkoṅ ní ḿ́n ne ŕ́sé mé’ s’o b́́ennyōṅ, edib é nkwx̄-’e énkembáá ámpē.

² Héé ŕ́nyíné Dyad áde Asáá, Jerusalem e ekóólé, ahúe’, ábideé ámin ẃ́e Dyób. Dyób d́́emboṅsén ḿ́o ngáne bebaád b́́eboṅsanné sómbé eché ekag á e’ w’óngé.

³ D́́o ŕ́wógé ehób éche échágkē ébidé á atii dé nkamlen éhóbē nén aá, “Nyénəne’, e’ d’ii é’ Dyób é’ dé ne baányōṅ b́́əb! Dyób d́́edyéé hóm ahóg ne b́́o, b́́o-’e b́́ebē abē bad. Dyób d́́edyéé hóm ahóg ne b́́o.

⁴ Apínē b́́o ḿ́esod mésyā́l á ḿ́d. Kwééd éebáá ámpē, bad b́́eelebpé ámpē, b́́echii-’aá ámpē, b́́ewóg-kaá e’ w’e ámpē. Ebē nén áyāle mam mé nchun métómé.”

⁵ D́́o ane awé adíidé atii dé nkamlen áhóbéé aá, “Nyénəne’, mbale’ bwēm é’ syā́l ekóólé!” Anhób ámpē aláá-’e me aá, “Tél nén, áyāle e’ yale ábe ŕ́hóbéé é’ dé mbále é’ dé-’e ábe moosyā́l ádúbēē.”

⁶ Anhób ámpē aláá-’e me aá, “Emáá. Me-éé ndé Alfaa mbé-’e Omégaa, me-éé ndé mbooted mbé-’e asóg. Kénzéé awé pid ékóbé, ḿ́ebe ḿ́o mendib mé nhyélé nime mod ámwākē boṅ abé á alongé abé ne abé. Ḿ́ebē-’e nyé ḿ́o ngēn.

⁷ Mod awé átom metake áte, adúbe áde ádúbpe me, ḿ́ebe ḿ́o ábén bwēm é’ syā́l. Ḿ́ebē áde Dyób ḿ́o-’e abé awem mwān.

⁸ Boṅ ne bad ábe b́́ewóo mbwóg áte, ábe b́́ewóo adúbe, ábe b́́ebale’ mbinde é mekan, bad bé ewúen, bekáb b́́e mesón, bekum b́́e ngan, bad ábe b́́ebenle’ myób mé metóm ne bekal b́́e metóm b́́esyā́l, ádab abwóg á hóm ádii edib é nzab é muú nime ŕ́hunne’ bwám bwam. Enén kwééd ch́́o edé kwééd e edáádəṅ.”

Jəne anyíné Jerusalem a ekóólé

⁹ D́́o ángel póg áttinté e ángel saámbe éche énwālé kúmbé saámbe éche éloné ne medim saámbe épédé boṅ élaṅgē me aá, “Hyág, ḿ́elūméd we sómbé, mmwaád awé Mwān-a-Ndyōṅ ní mbód.”

¹⁰ D́́o Edáádəṅ éche Esáá épíidé me boṅ ene ángel ékéené me á mbood ḿ́n eché echabé ámin bwám bwam. Ambané me áwedé-ḿ́n alúméd me Jerusalem, dyad áde ádáá, ngáne ábideé ámin ẃ́e Dyób,

¹¹ ápené-’e ne ehúmé é Dyób. Adé dyad ákínáá áte ń́e aláá dé etógnén áde álélé akud, ákiné áte ń́e jáspa ányíinnē-’e áte.

¹² Adé dyad d́́enwōṅ sáṅkalaa a e’ k’é ábe é’ chábé ámin. B́́enwōṅ nsál mé e’ k’é dyóm ne mébe, ne ángel dyóm ne ébe éche énoṅe nímé nsál mé e’ k’é ŕ́syā́l. Áyāl e nímé nsál mé e’ k’é, b́́entél ḿ́n mé metúmbé dyóm ne mébe mé bad b́́e Israel.

¹³ Abé e’ k’é b́́enwōṅ ped éniin. Ped e á akuu enwōṅ mmwe mé e’ k’é ŕ́láán, á mekunekune mmwe ŕ́láán, á mehúlélhulé mmwe ŕ́láán á ped e mbəṅ ŕ́láán.

¹⁴ E’ k’é ábe b́́enləṅnéd áde dyad b́́ensumén ámin e meláá dyóm ne mébe. Ámin e nímé meláá, b́́entél ḿ́n nime bembapé b́́e nlomag dyóm ne b́́ebe ábe Mwān-a-Ndyōṅ ní mbód.

¹⁵ Angel echê elângé'áa me nîmên mekan, enwálé ntónj ní gól nîme áhagné'áa adé dyad, nîmê nsal mé e'ké ne abé e'ké é' dyad.

¹⁶ Adé dyad dénwōj metóngé méniin, e'chab áte ne e'kál áte é'bédé nyaa póg. Ene ángel embenléd nîmê ntónj áhag adé dyad. Abédé ekálé é máyl ehóg ne mbwōkel étáan. A e'chab áte, e'kál áte ne e'chab ámín bébédéé nyaa póg.

¹⁷ Ene ángel anhág káájne e'che bé e'ké, é'bédé móom mé méta ntóób ne ntóób. Ambenléd nhagtéd nîmê bad bésyāal bébenladté.

¹⁸ Bēmbenléd jáspa álōj abé e'ké. Bēmbenléd gól echê eēsē mbinde áte, éche epene áte néē dyené álōj adé dyad.

¹⁹ Meláá nîme bēsuméé abé e'ké ámín, mébédé bán bé meláá ábe bélélé nkuu nyaa ne nyaa. Aláá dé nsumé dé e'só, abédéé jáspa, áde alónténé mébe, abédéé safia, áde alónténé meláán áget, áde alónténé méniin émeral,

²⁰ áde alónténé métaan, ónis, áde alónténé ntóób kanēlia, áde alónténé saámbé krisolit, áde alónténé waam béril, áde alónténé abog topas, áde alónténé dyóm kaladóni, áde alónténé dyóm ne ahóg hyasín, áde alónténé dyóm ne mébe ametís.

²¹ Mmên mmwe dyóm ne nîbe nîbédéé meláá mé etógnén, mmwe nhóg téé nîbédéé aláá dé etógnén ahóg. Nzii eche empōj á dyad té ebédéé gól echê eēsē mbinde áte echê epene' áte.

²² A dyad-tē wē, menkēnyinné ndáb e Dyōb áyāle Sāj Dyōb é Ngume ne Mwān-a-Ndyōj ní mbód, bédii néē ndáb e Dyōb.

²³ Adé dyad déehēdnéé bán áwōj enyen ké'ε ngōn áwēd-te áyāle ehúmé é Dyōb édii ábe e'nyinen bé ekide, Mwān-a-Ndyōj ní mbód-te ápene' néē éche etrukánj.

²⁴ Bad bé nkōjsé bésyāal bébenléd ábe e'nyinen bé ekide ábel nîmab mam nîme bétāngéné abel epun ké éhéé. Kāj é nkōjsé épēén nîmāb nhōn á dyad-tē wē.

²⁵ Mmē mmwe mé e'ké dyóm ne nîbe béepenné mó mbéd, áyāle nkuu méebáá áwēd-te mbéd.

²⁶ Bēpēén bwēm é' bwām ne nhōn ní bwēm é' bad bé nkōjsé áwēd-te.

²⁷ Dyam á mbinde ké ahóg, ké'ε mod awé abele' e'bébtéd é' mekan, ké'ε mod awé akale metóm ké nhóg éesólné á dyad-tē wē. Bad ábe mīn médii á kálag e alongé eche Mwān-a-Ndyōj ní mbód bēnpen bōó bēsāl áwēd-te.

22

*Jōne anyiné edib éche ébage
alongé á ngindé ne á ngindé*

¹ Dōó ene ángel élúmtéé nēē edib é mendib nîme mébele bonj mod abé á alongé á ngindé ne á ngindé, ényinné áte nēngāne dyené. Echê edib ébidé'áá á atii dé nkamlēn áde Dyōb ne Mwān-a-Ndyōj ní mbód,

² époó' áfinté e nzii á dyad-tē. A nkin mé échê edib, ped ébe, nyaa e bwel póg eche echyáá' e'pum ábe é'bele bonj mod abé á alongé abé ne abé ebédé áhed. Mmē mel méchyaá'áá e'pum nyaa dyóm ne ébe, méchyaá'áá ngōn té. Bad bé nkōjsé bébenlédáá ábab byaa ákud e'choóchoj.

³ Chōmchōm éche Dyōb ábágé ebómán éebáá á dyad-tē wē. Atii dé nkamlēn áde Dyōb ne Mwān-a-Ndyōj ní mbód mébédé áwēd-te, bembaledé bé Dyōb-pe ébágé mó edubé.

⁴ Bényin Dyōb e'só ne e'só, áde dīn-ne démbē bó á mesó mé mbōm.

⁵ Nkuu méebáá ámpē, béehēd-taá etrukánj káa enyen ányinen ekide áyāle Sāj Dyōbe ábe ábab e'nyinen bé ekide, bēbē-ε á nkamlēn á ngindé né á ngindé.

Jōne anyine epe éche Yesue

⁶ Dōó ene ángel elāngéé me áá, "Abén e'yale ábe rílangé nyé é'dé mbále, né-ōó nyédúbe bó. Sāj Dyōbe awé abage bekal bé'dáádāj échē edáádāj ábel bonj békale nîmē nkalanj, alómé eche ángel álúmed abé bembaledé mam nîme mékwógé abenléd."

⁷ Dōó Yesue áhóbéé áá, "Nyēnōne', nkwogé ape. Nnam ne bad ábe béhíde' mekan nîme bétélé á kálag-tē wēn nîme mébenléd bōab ne á póndé echê ehúe' á'só."

⁸ Me, Jōne nwógé nnyin-ne nîmên mekan. Ade nîwógé nîmên mekan nnyin-ne má, menkwé áse á'só é ángel echê enlúmed me nîmên mekan, ábe mó edubé.

⁹ Bonj anláá me áá, "Weébēlé nē! Mēmpē ndii mbaledé a Dyōb néē wē, ne néē ábinií baányōj bé Křisto ábe bédé bekal bé'dáádāj ne bad ábe béhíde' chōm éche éténlédé á kálag-tē wēn. Dyōb dōó nyétāngéné edubé abe."

¹⁰ Dōó alāngéé me ámpē áá, "Nyéékōjnād bad mekan nîme mébenléd nîme méténlédé á kálag-tē wē áyāle mékwógé abenléd.

¹¹ Bad ábe bébele mbēb bēbē bébele' mbēb. Abe bébele mekan mé mbinde bēbē bébele' mekan mé mbinde. Abe bébele mekan nîme métāngéné bēbē bébele' mekan nîme métāngéné, ábe bō-ε bēsáá bēbē bēsāj."

¹² Dóo Yesue áhóbeé aá, “Nyénone’, nkwogé ape, ásábe mod-té nchoo ne nsón nîme ábélé.

¹³ Mε-εé ndé Alfaa mbé-ε Omégaa, awě Asébpé ne awě Adimténé, mbé-ε Mbooted ne Asóg.”

¹⁴ Nnam mbê ne ábê ábe bėwópé nímáb megombe, bėwōŋ kunze ápon á mmwe mé e’ké ásól á dyad-té ábel bėdyê e’pum é’ bwel ábe é’bele mod abé á alongé abé ne abé.

¹⁵ Bad ábe béesól á dyad-té wê, bėdii bad ábe bėbélé mekan mé mbinde, bad ábe bėkume ngan, bad ábe bėkábe’ mesón, bad ábe bėwúe bad, bad ábe bėbenle myōb mé metóm ne bad ábe bėdás akal dé metóm ne ábe bėkale metóm.

¹⁶ Mε Yesue, mε-εé nlómé echem ángel áláa nyé ábe nyédé á mwembé-te nímén mekan. Ndií ane awě abídé á mbyaa nîme kân Dabide, tintine a mbwembwe awě apene’.

¹⁷ Edásdan é Dyōb ne Sóbé bėhóbe nén bán, “Hyăg.” Kénzée awě awógé nén, mómpē áhōb aá, “Hyăg.” Ane awě pid ékóbé áhye ámwé mendib nímé mébele bon bad bėbe á alongé á ngindé ne á ngindé. Mod ké ahéé awě ahede’ nímén mendib átēd mó ngen.

Jone ahóbe ehōb é asóg

¹⁸ Nsime mod ké ahéé etúu áte awě awógé e’yale ábe é’ténlédé á kálag tē wén tângene mekan nîme mébenléd. Nzé mod abádé kéchéé á kálag tē wén, né Dyōb dēbādē mó medim nîme bétélé á kálag tē wén.

¹⁹ Mod ké ahéé-ε awě áhūd ké eyale ámin e mekan nîme méténlédé á kálag tē wén tângene mekan nîme mébenléd, Dyōb dēhūd ádē asii dé e’pum é’ mel é’ bwel ábe é’bele bon mod abé á alongé á ngindé ne á ngindé. Dyōb dēhūd-te éche etál á Dyad áde Asáá. Mmén mekan méténlédé á kálag tē wén.

²⁰ Ane awě abíde mbón tângene nímén mekan mésyāāl ahóbe nén aá, “Ne mbále, nkwogé ape.” Ebē nē, hyăg a-Sánjú Yesu.

²¹ Nsimé nîme Sánjú Yesue mbê ne bad bėsyāāl.*

* **22:21** *Bad bėsyāāl*; donje á kálag dé’só áwóó *Bad bé Dyōb* káa *Bad bé Dyōb bėsyāāl*.